


Ṭṣitamenti Ikne
n'Ọnu Ikwere



New Testament in Ikwere

Ṭesitamenti Ikne n'Ọnu Ikwere

New Testament in Ikwere

copyright © 2010 Wycliffe

Language: Ikwere

Translation by: Wycliffe

Ikwerre – (ikw) Nigeria

The Iwerre language of Nigeria can also be spelled Ikwere and Ikwerri. This language is spoken primarily by the Ikwerre people who live in the Rivers State of Nigeria and is one of the many ethnic groups in the Niger Delta. There were more than 23,000 speakers of this language in 1973. There is also a considerable local interest in literacy and grammar.

Copyright Information

© 2010, The Nigeria Bible Translation Trust. All rights reserved.

This translation text is made available to you under the terms of the Creative Commons License: Attribution-Noncommercial-No Derivative Works. (<http://creativecommons.org/licenses/by-nc-nd/3.0/>) In addition, you have permission to port the text to different file formats, as long as you do not change any of the text or punctuation of the Bible.

You may share, copy, distribute, transmit, and extract portions or quotations from this work, provided that you include the above copyright information:

You must give Attribution to the work.

You do not sell this work for a profit.

You do not make any derivative works that change any of the actual words or punctuation of the Scriptures.

Permissions beyond the scope of this license may be available if you contact us with your request.

Printed book ISBN 9789789076369

New

The New Testament

in Ikwere

© 2010, The Nigeria Bible Translation Trust. All rights reserved.

This translation is made available to you under the terms of the Creative Commons Attribution-Noncommercial-No Derivatives license 4.0.

You may share and redistribute this Bible translation or extracts from it in any format, provided that:

You include the above copyright and source information.

You do not sell this work for a profit.

You do not change any of the words or punctuation of the Scriptures.

Pictures included with Scriptures and other documents on this site are licensed just for use with those Scriptures and documents. For other uses, please contact the respective copyright owners.

2019-08-09

PDF generated using Haiola and XeLaTeX on 18 Apr 2025 from source files dated 29 Jan 2022
c17ee3a1-1c7a-5c05-8e0f-5043e8228d89

Contents

Matiyu	1
Makı	34
Lukwu	55
Jõni	89
Èrnu Ele Izi	114
Ele Rom	144
1 Ele Kõrinti	158
2 Ele Kõrinti	172
Ele Galasia	181
Ele Efesõsi	186
Ele Filipaı	191
Ele Kõlosi	195
1 Ele Tẽsalonika	199
2 Ele Tẽsalonika	203
1 Timoti	205
2 Timoti	209
Taıtosi	212
Filemõni	214
Ele Hiburu	215
Jemisi	225
1 Pita	229
2 Pita	233
1 Jõni	236
2 Jõni	240
3 Jõni	241
Judu	242
Okpume	244

**Izi oma lele kpa
Matiyu
gbaru a n'okwukwo
Nhne gbasiri okwukwo ka**

Izi oma lele kpa Matiyu gbaru a n'okwukwo nookwu oka izi oma nu Jizosi bu Nye Oznohia Chiokike kweru mkwna a. Omumu Jizosi nye Nazareti gwebnanyarnu eli-eze ikne n'owa, ke bu ochichi Chiokike. Izi oma Matiyu neegesi eli-eze ikne ka hite nu nhne Jizosi, nye bu Mezaya, znirni nu nhne o mernu. Matiyu gesiri kpa Jizosi mezuru kpakara nhne be gbaru nu Tesitamenti Oknani gbasiri a. O gesiri nu be murnu Jizosi hite n'avurnu ele eze. Nne a Meri bu woknornokno ma nyerukna. Matiyu tukparu ehni gba nu ele buo ele Ju nwernu igwe n'eli-eze Chiokike lele kpa ele Ju nwernu. O kwuru nhne gbasiri enwu Jizosi, olizo n'enwu a, nu iwu o nyernu ele sno apna be zni kpakara ele zi n'owa izi oma a.

Nhne zi n'okwukwo ka

Budnu wikoro Jizosi (1:1--4:25)
Ikwu-onu Chiokike o kwuru n'olu rugwu (5:1--7:29)

Nhne o znirni, elulu nu nhne berere nu Galili (8:1--18:35)

Izne a du Jeruselem (19:1--20:34)
Ikwezu ipne-aznu Jizosi nu rime Jeruselem (21:1--27:66)

Olizo n'enwu a (28:1-20)
Nye gbaru okwukwo ka: Matiyu (Liva)
Risi nhne o kwno gba a: O gesi nu Jizosi bu Mezaya, nye gweyaru eli-eze ke bu ochichi Chiokike n'owa.

Osnusno omumu Jizosi
(Luk 3:23-38)

¹ Okwukwo osnusno omumu Jizosi Karaishi, nnwo Devidi, nnwo Ebereham.

² Ebereham murnu Aziki, Aziki mphia Jekopu, Jekopu mphia Juda nu rumu nne a.

³ Juda mphia Perezu nu Zera, nne be bu Tama, Perezu mphia Hezironi, Hezironi mphia Ram,

⁴ Ram mphia Aminadabu, Aminadabu mphia Nasoni, Nasoni mphia Salimoni,

⁵ Salimoni mphia Boazi, nne a bu Rehabu, Boazi mphia Obedi, nne a bu Rutu, Obedi mphia Jesi,

⁶ Jesi mphia Eze Devidi.
Devidi mphia Solomoni, nne a bu nnwerne Uraya,

⁷ Solomoni mphia Rehoboam, Rehoboam mphia Abija, Abija mphia Asa,

⁸ Asa mphia Jehosafati, Jehosafati mphia Joram, Joram mphia Uzaya,

⁹ Uzaya mphia Jotam, Jotam mphia Ehazi, Ehazi mphia Hezikaya,

¹⁰ Hezikaya mphia Manase, Manase mphia Amoni, Amoni mphia Josaya,

¹¹ Josaya mphia Jekonaya nu rumu nne a. Ka bu ige ele Babiloni vuru be la n'eli Babiloni.

¹² Nga be vukworu be zne nu Babiloni, Jekonaya mphia Seateli, Seateli mphia Zerubabeli,

¹³ Zerubabeli mphia Abiudu, Abiudu mphia Eliakim, Eliakim mphia Azu,

¹⁴ Azu mphia Zadoku, Zadoku mphia Akim, Akim mphia Eliudu,

¹⁵ Eliudu mphia Eleza, Eleza mphia Matani, Matani mphia Jekopu,

¹⁶ Jekopu mphia Josefu nzi Meri. Meri bu nye murnu Jizosi, nye be kwu Karaishi.

¹⁷ Kpakara eburnu hite n'Ebereham du Devidi bu nri eburnu nu eno, hite nu Devidi du nga be vuru be zne n'eli Babiloni bu nri eburnu nu eno, hite nu nga be wuru nu Babiloni du nu omumu Karaishi bu nri eburnu nu eno.

Omumu Jizosi Karaishi
(Luk 2:1-7)

¹⁸ Ka bu kpa be jiri mu Jizosi Karaishi. Nga be kweru nu Josefu joolu nne a Meri, * nga be yaadnanyina, be whurnu nu o zi rime hite n'Enine Nso.

¹⁹ Josefu bu nzi a bu omamarna badnu, o chola o kpasu a iwhnerne nu ruwhnu ohna, o piuru o gba a nnam nu mgwugwa.

²⁰ Kovu nga o zi naar kpakara nhne ka nu mkpoma a, enine izi Nyenwe a vakwnusiri a nu mboro, kaa, "Josefu, nnwo Devidi, i tuko ogwnu o kwuru nnwerne i Meri, nnwo o zi rime a hi n'aka Enine Nso.

²¹ O joomuhia nnwo rukna, i jookwu a Jizosi, kwnornu nu o jooznohia ele ke a nu kpakara mmehie be."

²² Ka bu ma nhne Nyenwe a kwuru hite n'onu nye ohnurninya mezu,

²³ "Otu woknornokno ma nyerukna jootu rime, o joomuhia nnwo rukna, be jookwu a Imanueli," ke bu, "Chiokike zinu a."

²⁴ Nga Josefu tnenyarnu nu anyarna, o lizo, o mee kpa enine izi Nyenwe a nyernu a iwu, o kwuru Meri nnwerne a.

²⁵ Kovu ya nu a dnanyina du nga o mphiaru nnwo rukna, o jita rewhna a Jizosi.

2

Ele ako varu

¹ Nga be murnu Jizosi nu Betilehem n'eli Judiya, nga Eradu bu eze, ele ako* hiri n'obosi ehnam vaduru Jeruselem,

² neesikwa, "Ndaa hne o zi bu nye be murnu, eze ele Ju? Kwnornu nu a whurnu

* 1:18 Mbu ogbasi omu n'aka ke neegesi nu aka ji a.

* 2:1 Ele ako: bu ele nomu nhne gbasiri mbo.

mbọ a n'ọbosi ẹhnam, a varu ma a kponu a risi ẹli."

³ Nga Eze Erodu nurnu nhne ka, mkpoma laru a mini, ya nu kpakara ele zi nu Jeruselem.

⁴ Nga o sukwukotaru kpakara ele risi ariohna nu ele zni iwu ele Ju, o sika be hne be joomu Karaisi wam.

⁵ Be kanu a nu Betilehem n'eli Judiya, o bu kpa be gbaru a n'okwukwo hite n'onu nye owhnurninya, kaa,

⁶ "Ji Betilehem, n'eli Juda, i zila mati kakwo n'esilawuru risi ẹli Juda ria ria,

kwnornu nu hite nu ji hne nye risi jeehi whuya,

nye jooznu ele ke m Izireli lele aturnu."

⁷ Nga Erodu sukuru ele ako wam nu mgwuga, o sikhahia be nga mbọ wam whuyaru iwhne.

⁸ O kanu be zne Betilehem, kaa, "Anu zne piosi nnwo ikne wam rikne, nga anu pi-ohiaru a, anu va kanu m, m jeezne kponu a risi ẹli masi."

⁹ Nga be nurnu oka Eze Erodu, be whoga, le mbọ wam ke be whurnu n'ọbosi ẹhnam neezne nu ruwhnu be du nga o varu gwuzoru n'olu hne nnwo wam zi.

¹⁰ Nga be whurnu mbọ wam, be nwudarnu k'agida.

¹¹ Be bna nu rime oro, whnu nnwo ikne wam, ya nu Meri nne a, be dna n'eli kponu a risi ẹli. Be kpume igbe ẹkwu be, nyee a nkesi, golu, franki-isensi nu maa.

¹² Chiokike do be aka nu nsnj nu mboro be lahnakwadia ke Erodu, be garu apna berere la ẹli be.

Be gbazne n'eli Ijipiti

¹³ Nga be laru, enine izi Nyenwe ai mernu Josefu whnu a anya nu mboro, kaa, "Lizo, kwuru watakiri wam nu nne a gbazne Ijipiti, daziri nu pi du nga me jaakanu i, kwnornu nu Erodu joopio nnwo wam ma o gbu a."

¹⁴ O lizo, kwuru nnwo wam nu nne a n'abalj gbazne Ijipiti.

¹⁵ Be zi n'Ijipiti tem Erodu nwuma, ma nhne Nyenwe ai kwuru hite n'onu nye owhnurninya a mezu, "M sukwhiaru m nnwo m hite Ijipiti."

Erodu gburu rumu takiri

¹⁶ Nga Erodu whurnu nu ele ako wam nyernu a mkpari, o weru ehni k'agida, o zizne ele ogwunu kaa be gbu kpakara rumu rukna zi nu Betilehem ma ẹli zi be ndundu, hite nu ele gbaru awha lawuru ya ẹli. Ka bu hite n'ige wam o sikhahiaru oka n'onu ele ako wam.

¹⁷ N'ige wam bu hne be mezuru nhne Jerimaya nye owhnurninya kwuru, naakaa, ¹⁸ "Be nurnu akpiri nu rime ẹli Rama,

naakwua ẹkwua nu okne ogba mkpe, Rehelu naakwananu rumu a ẹkwua, o kwela be kasi a mkpoma kwnornu nu be zima."

Be hiri n'Ijipiti yahna

¹⁹ Nga Erodu nwurnu, enine izi Nyenwe ai mernu Josefu whnu a anya nu mboro n'Ijipiti,

²⁰ kaa, "Lizo kwuru nnwo wam nu nne a zne n'eli Izireli, ele noopio budnu a nwunam."

²¹ O lizo kwuru nnwo wam nu nne a, va n'eli Izireli.

²² Kovu nga o nurnu nu Akelosi nnwo Erodu bu eze Judiya nu ngadna nda a, o turu ogwunu o zne pii. Nga Chiokike doru a aka nu nsnj nu mboro, Josefu tuhna zne Galili.

²³ Be zne wuru n'eli mati be kwu Nazareti, ma nhne be kwuru hite n'onu nye owhnurninya mezu, "Be jookwu a nye Nazareti."

3

Ikwu-onu Joni Nye Wu Mini

(Mak 1:1-8; Luk 3:1-18; Jon 1:19-28)

¹ N'ige wam Joni Nye Wu Mini varu nookpo okwo ikwu-onu Chiokike n'eli-ikpa ke Judiya,

² naakaa, "Anu tuhna mkpoma, kwnornu nu ẹli-eze Chiokike zi ndundu."

³ Joni bu nye wam Azaya nye owhnurninya kwuru oka gbasiri a, naakaa,

"Akpiri otu badnu nookpo okwo n'eli-ikpa, naakaa,

'Anu mekwata apna Nyenwe ai, anu mee apna a snj asni.'"

⁴ Joni wogwu iwo be jiri rijini akpukpo anohia be kwu kameli mee, ajni o snu n'ikwnu bu akpukpo anohia, wiri a bu igwuru be nu mono ebeka ohia.

⁵ Ele Jeruselem nu kpakara ele Judiya nu kpakara ele wugwu nu ngeri Osimini Jodani gburugburu whokwnusiri a,

⁶ o wu be mini n'Osimini Jodani, be nookwuhia mmehie be.

⁷ Kovu nga o whurnu agida ele Farisi nu ele Sadusi hne be naava ma o wu be mini, o kanu be, "Anu eburnu agwo, nyele kannu anu, anu gbanahoru oву owe ehni Chiokike ke jaava?"

⁸ Anu mji mkpuru ke jeegesi nu anu tuhna narnu mkpoma hite nu mmehie.

⁹ Anu riko nu rime anu, naakaa, 'Eberham bu nda ai,' me kanu anu nu Chiokike nwernu rikne mee kpakara akaworugwu ka ghọ rumu Eberham.

¹⁰ Kitna, be tukwasilam ehni gwe n'ikwnu kpakara isisi, ke bu nu be joogbudna isisi obula ke minyala mkpuru oma, be jootubna a nu rime ẹkwunu.

¹¹ “M ji m mini nṵowu anṵ mini ke neegesi nṵ anṵ tṵhnasarnu mkpṵoma hite nṵ mmehie anṵ, kṵvu nye kagwṵ m rikne naava n’aznṵ m, nye me dṵgwṵ n’owhudnahie chiri okoro-ṵchi a, nye wam jeeji Enine Nsṵ nṵ bṵkwu nṵowu anṵ mini.

¹² Nye nhne ṵwhusna iṵpa zṵ n’aka a, ṵ ṵṵowhusna iṵpa a nkari, ṵ jaachikota iṵpa a yisi n’ṵbna a, kṵvu o jeeji bṵkwu ke chni echni rnesnama ruznurnuznu iṵpa.”

Ṵwuwu mini Jizṵsi

(Mak 1:9-11; Luk 3:21,22)

¹³ N’ige wam, Jizṵsi hiri nṵ Galili vadu Osimini Jṵdani znekwnusi Jṵni ma ṵ wṵ a mini.

¹⁴ Kṵvu nṵ Jṵni kwṛle a, ṵ kaa, “Ṵ zṵ m mkpa i wṵ m mini, ji n’iwhuru i, i naavakwnusi m?”

¹⁵ Jizṵsi kanṵ a, “Gharṵ a kṵam kṵtna, kwnornu nṵ ṵ bṵru ṵma kṵam ma a mezu kṵakara nhne bṵru ṵma n’omume.” Jṵni gharṵ a.

¹⁶ Nga Jṵni wṵru Jizṵsi mini, ngangam o hiri nṵ mini nṵowhuya, le, oligwe kṵumernu, Jizṵsi whnṵ Enine ke Chiokike hne o neewhedna lele nduru, neebekwasi a.

¹⁷ Otu akpiri hiri n’oligwe, naakaa, “Ka bṵ Nnwṵ m me whnṵru n’anya, nhne a masiri m.”

4

Ṵrnurna Jizṵsi

(Mak 1:12,13; Luk 4:1-13)

¹ Enine Nsṵ duru Jizṵsi zne n’ṵli-iṵpa ma Ekwensu rna a ṵrnurna.

² Nga o vukworu ṵnu nri ṵbochi ṛno iwhnehnie nṵ abali, wiri gwnṵru a.

³ Nye ṵrnurna wam vakwnusiri a, kanṵ a, “Ṵ bṵru nṵ i bṵ Nnwṵ Chiokike, kanṵ akaworugwu ele ka be ghṵ bṛṵdi.”

⁴ Jizṵsi sarṵ a, “Be gbarṵ a n’ṵkwukwo nsṵ, kaa,

‘Ṵ bṵo bṛṵdi bṵ nhne badnṵ jeeri kṵṵi ziri bṵṵnu,

kṵvu nṵ ṵ bṵ kṵakara ikwu-ṵnu ke hiri n’ṵnu Chiokike whṵya.’ ”

⁵ Ekwensu kwuru a zne Jeruselem, ṵli-ṵhna nsṵ, gwuzote a n’olu tṵwa Ṵro Nsṵ Chiokike,

⁶ ṵ kanṵ a, “Ṵ bṵru nṵ i bṵ Nnwṵ Chiokike, gbṵṵna ṛhni i n’ṵli hna, kwnornu nṵ be gbarṵ a n’ṵkwukwo nsṵ, kaa,

‘Ṵ jeenye ele enine izi a iwu gbasiri i, be jeegheru i n’aka be, ma i gharṵ ṵ kṵṵi ṵchi i nṵ rugwu.’ ”

⁷ Jizṵsi sarṵ a, “Berere kwno, be gbarṵ a n’ṵkwukwo nsṵ, kaa, ‘I rnaki Nyenwe i Chiokike i ṵrnurna.’ ”

⁸ Berere kwno, Ekwensu kwuru a zne rugwu zṵ n’olu k’agida, gerisi a kṵakara ṵli-eze ke ṵwa nṵ igwugwu be.

⁹ Ṵ kanṵ a, “M jeenye i kṵakara nhne ka, ṵ bṵru nṵ i jaadna n’ṵli kṵṵnu m risi ṵli.”

¹⁰ Jizṵsi sarṵ a, “Whoga m nṵ ruwhnu m, Setani, kwnornu nṵ be gbarṵ a n’ṵkwukwo nsṵ, kaa, ‘I jṵokponu Nyenwe i, Chiokike i risi ṵli. Ṵ bṵ ya kṵṵi bṵ nye i jeekpenu.’ ”

¹¹ Ige wam Ekwensu sigbasiri Jizṵsi, ele enine izi vakwnusiri a, neeznenu a izi.

Jizṵsi panizoru ṛnu a

(Mak 1:14,15; Luk 4:14,15)

¹² Nga Jizṵsi nṵru nṵ be yisiri Jṵni n’ikelu, ṵ lahna Galili.

¹³ Ṵ whoga nṵ Nazareti zne wuru nṵ Kapanom, ke zṵ nṵ ngeri osimini, n’ṵli Zebuloni nṵ Nafitali,

¹⁴ ma ṵka be kwuru hite n’ṵnu Azaya nye ṵwhnurninya mezu, kaa,

¹⁵ “Ṵli Zebuloni nṵ ṵli Nafitali, n’apna okne osimini,

n’aznṵ Osimini Jṵdani,

Galili ṵli ele bṵo ele Ju.

¹⁶ Ele wu n’ṵchichiri

whnṵnam agida iwhne,

ele wu n’ṵli ṛnuwṵ kṵusnigwu

bṵ ele iwhne nṵomukwasi.”

¹⁷ Hite n’ige wam Jizṵsi panizoru nṵokpo okwo, naakaa, “Anṵ tṵhnasna mkpṵoma, kwnornu nṵ ṵli-eze Chiokike zṵ ndṵndu.”

Ele mbṵm sno apna Jizṵsi

(Mak 1:16-20; Luk 5:1-11)

¹⁸ Nga Jizṵsi neezne izne n’ṵnu mini Osimini Galili, ṵ whnṵ rṵmu nne lawṵru, Sajmoni nye be nookwu Pita nṵ Anduru nwene a, hne be nṵowu igbo n’osimini, kwnornu nṵ be bṵ ele noogbu aznṵ.

¹⁹ Jizṵsi kanṵ be, “Anṵ snornu m, m jeeme anṵ bṵru ele jṵokwuhia ele badnṵ lele kpa anṵ noogbu aznṵ.”

²⁰ Ngangam, be sigbasi igbo be sno a.

²¹ Nga o zneturu nṵ ruwhnu, ṵ whnṵru rṵmu nne lawṵru berere, Jemisi nnwṵ Zebidi nṵ Jṵni nwene a, nṵ Zebidi nda be. Be zṵ nṵ rime ṵgbo neemekwa igbo be. Jizṵsi sukwu be.

²² Ngangam be sigbasi ṵgbo wam nṵ nda be sno a.

Jizṵsi znirni nhne,

gwṵ ele nriria

(Luk 6:17-19)

²³ Jizṵsi znernu nṵ kṵakara Galili neezni nhne n’ṵro ṵgbako ele Ju, nṵokpo okwo izi ṵma ṵli-eze Chiokike, nṵogwo ele nriria zṵ ṵdo n’ṵdo nṵ ṵhni igbugbu zṵ ṵdo n’ṵdo n’esilawuru be.

²⁴ Ṵnutnu a gazuru kṵakara Siriya, be kwuyanṵ a kṵakara ele naariya nriria nṵ ele ṵhni igbugbu zṵ ṵdo n’ṵdo, nṵ ele nṵowhnusi

anya, ele renwu ojo n'wugwu, n'ụ ele akwukwu n'ụ ele ngeri ẹhni be d'onwurnu d'onwu. Jiz'osi gw'ọ kpakara be.

²⁵ Ag'ida ele badn'ụ hi n'ụ Galili, Dekapolisi n'ụ Jeruselem n'ụ Judiya n'ụ azn'ụ Osimini J'odani snornu a.

5

*Jiz'osi znirni nhne
n'olu rugwu*

¹ Nga Jiz'osi whnurnu ag'ida badn'ụ wam, o pnezne n'olu rugwu, daz'iri ẹli, ele sno apna a vakwnusi a,

² ọ panizo neezni be nhne, naakaa,

*Mkp'oma oso n'onu n'ezi
(Luk 6:20-23)*

³ “Owa ọma z'inu ele mboni n'ụ mkp'oma,*
kwnornu n'ụ ẹli-eze Chiokike b'ụ ke be.

⁴ Owa ọma z'inu ele naagba mkpe,
kwnornu n'ụ be jaakasi be ovu.

⁵ Owa ọma z'inu ele z'ị enwerne n'ụ mkp'oma,
kwnornu n'ụ ele kam jeek'hija ọwa.

⁶ Owa ọma z'inu ele wiri n'og'wnu n'ụ ele akpiri
kp'oga b'ekwnu n'ome nhne b'uru ọma,
kwnornu n'ụ ruw'ho jeeji be.

⁷ Owa ọma z'inu ele nweru obirizi
kwnornu n'ụ be j'odonu be obirizi.

⁸ Owa ọma z'inu ele z'ị r'ichna n'ụ mkp'oma,
kwnornu n'ụ be j'ow'nhu Chiokike.

⁹ Owa ọma z'inu ele neeme udno,
kwnornu n'ụ be jookwu be ruwu
Chiokike.

¹⁰ Owa ọma z'inu ele be naakpakna ẹhni
kwnornu imerne ọma,
kwnornu n'ụ ẹli-eze Chiokike b'ụ ke be.

¹¹ “Owa ọma z'inu an'ụ nga ele badn'ụ jaak-
pari an'ụ, neemekpa an'ụ ẹhni, nookwunu
an'ụ onu ojo, naaghagidne an'ụ akebne agha-
laghala z'ị ichne ichne kwnornu n'ụ me.

¹² An'ụ nw'urnihoru, mkp'oma so an'ụ n'onu
k'agida, kwnornu n'ụ og'wo ẹrnu an'ụ z'ị ag'ida
n'oligwe. O b'ụ kpa be jiri kpakna ele
o'whnurninya ele be an'ụ osno ẹhni.

*Ar'ụ n'ụ iwhne
(Mak 9:50; Luk 14:34,35)*

¹³ “An'ụ b'ụ ar'ụ ke ọwa, k'ovu ọ b'uru ar'ụ
tuw'hu oso n'onu a, be jeeji k'ini mee a ọ so
n'onu? O z'ia iru ọ bnarn'ụ berere, okwolem
be tuw'hu a n'ederez'ị, ele badn'ụ zo a ọchi.

¹⁴ “An'ụ b'ụ iwhne ke ọwa. Mba wu n'olu
rugwu b'otugwali.

¹⁵ Be z'á n'omusi tonji b'ita a n'ụ mkpururu
nk'ita, tnunuma, n'olu nhne be b'ita tonji, o
neenye kpakara ele z'ị n'oro wam iwhne.

¹⁶ An'ụ mee kpa iwhne an'ụ jaazi noonwu
n'ụ ruw'nhu ele badn'ụ, ma be n'ow'nhu ẹrnu
ọma an'ụ, znarn'ị Nda an'ụ ke z'ị n'oligwe.

Iwu Mozizi

* 5:3 ke b'ụ ele noopio Chiokike

¹⁷ “An'ụ ch'eko n'ụ m var'ụ m o lulu iwu
Chiokike m'obu nhne ele o'whnurninya g'bar'ụ,
m váge m o lulu be, m var'ụ m o mezu be.

¹⁸ N'ezi, me kan'ụ an'ụ, tem oligwe n'ụ ọwa
whume, ọ z'á otu nhne ọbula z'ị mat'ị, ke
z'ikakworu mat'ị ke be jeegweme n'iwu, d'ụ
nga kpakara be jeemezu.

¹⁹ Nye ọbula ke joolulu otu n'ụ rime iwu ele
ka, ọ b'urubedi iwu ke kakwo mat'ị, ke jeezni
ele badn'ụ kpam, be jookwu a nye kakwo
mat'ị n'ẹli-eze Chiokike. K'ovu nye ọbula ke
jaab'ita iwu, neezni be, nye wam b'ụ nye be
jookwu nye kakwo n'olu n'ẹli-eze Chiokike.

²⁰ Me naakan'ụ an'ụ, ọ b'uru n'ụ agwa ọma
an'ụ k'ala ke ele zni iwu n'ụ ele Farisi mma,
n'ezi, an'ụ jáabna n'ẹli-eze Chiokike.

Ovu owe ẹhni

²¹ “An'ụ nurnu n'ụ be kann'ụ ele gbaka,
'I gb'ik'ọ badn'ụ, nye ọbula ke gburu badn'ụ
jaabna n'aka ikpe.'

²² K'ovu me kan'ụ an'ụ, nye nweru ovu
ẹhni megidne nwene a jaabna n'ikpe. Nye
ọbula ke jaakan'ụ nwene a, 'O z'ia iru ị
bnagwu,' jee nye ẹhni a n'aka ele eze-ikpe.
Nye ọbula ke jaakaa, 'Nye iwhnirniwhno,'
jee nye ẹhni a n'aka b'ekwnu ẹli renwu.

²³ Kam kpayar'ụ, ọ b'uru n'ụ ị gweyar'ụ
nkesi i n'ụ ruw'nhu Chiokike n'ọjo ar'iohna, i
chenwanya n'ụ nwene i kar'ụ n'ụ i mernu a
nhne ojo,

²⁴ sig'bas'ị nkesi i n'ụ p'iji n'ụ ruw'nhu ojo
ar'iohna, la, beru osno mee ma j'ị n'ụ nwene
i z'iri n'udno, yahna, nyega nkesi i.

²⁵ “Mee ma j'ị n'ụ nye kwu i neezne ikpe
b'uru ọma wara wara, nga j'ị n'ụ ya z'ị n'apna,
ma nye wam kwu i neezne ikpe ghar'ụ o
gweru i nyee n'aka nye risi ikpe, nye risi
ikpe gweru i nyee n'aka nye neezne izi, be
t'ubna ị ikelu.

²⁶ Me kan'ụ ị ezi ọka, ị j'ow'huya p'iji tem ị
kw'uh'nata kpakara ịwai ipne-azn'ụ ị j'gwu.

Iznizni gbas'iri ome ọyi

²⁷ “An'ụ n'una m n'ụ be kann'ụ ele gbaka, 'I
m'eko ọyi.'

²⁸ K'ovu n'ụ m naakan'ụ an'ụ, n'ụ nyerukna
ọbula ke jeele nyerinya anya ọ mas'ị a ma ya
n'ụ nwerinya wam dnanyi, o mesilem a ọyi
n'ụ mkp'oma a.

²⁹ O b'uru n'ụ anya akarikwnunga ị jeeme
i, i mee mmehie, ghna'hija a, tuw'hu a n'ẹhni
ị, kwnornu n'ụ ọ jaakan'ụ ị mma n'ụ otu
nhne z'ị ị n'ẹhni whogaru, tnunuma be t'ubna
kpakara ẹhni ị n'ụ rime b'ekwnu ẹli renwu.

³⁰ O b'uru n'ụ akarikwnunga ị jeeme i, i
mee mmehie, g'ubime a, tuw'hu a n'ẹhni
ị, kwnornu n'ụ ọ jaakan'ụ ị mma n'ụ otu
n'ụ nhne z'ị ị n'ẹhni whogaru, tnunuma be
j'otubna kpakara ẹhni ị n'ụ rime b'ekwnu ẹli
renwu.

Ogba nnam

(Mat 19:9; Mak 10:11,12; Luk 16:18)

³¹ “Be kakwornu nū, ‘Nye obula ke jaagba nnwerne a nnam, o nyega a okwukwo nnam.’

³² Kọvu m naakanu anu, nye obula ke jaagba nnwerne a nnam, hne o buo nu o mernu oyi, o neeme nyerinya wam buru nye neeme oyi, nye obula ke jolu nnwerne be gbaru nnam bu nye neeme oyi.

Okwe mkwna

³³ “Berere, anu nuna m nu be kannu ele gbaka, kaa, ‘Bita mkwna i kweru, i lahma aznu nu o mee mkwna i kweru, kovu mee nhne i kweru mkwna nu ruwhnu Nyenwe ai.’

³⁴ Kovu me naakanu anu, anu ji nhne obula du risi, anu ji oligwe du risi, kwnornu nu o bu ngadna eze Chiokike.

³⁵ Anu ji owa du risi, kwnornu nu ikpechi otukwasi ochi a, anu ji Jeruselem du risi, kwnornu nu o bu eli-ohna ke eze kwu wam.

³⁶ I ji risi i du risi, kwnornu nu i nwée rikne mee otu rukeri-ize o chna richna mbu o ji riji.

³⁷ Kovu ikwu-onu anu buru ‘Owe, m jeeme mee a,’ mbu, ‘Oza, m jeeme mee a.’ Kwnornu nu nhne obula kari ri ka hi nu nye ojo wam.

Iznizni gbasiri omegwnarnu

(Luk 6:29,30)

³⁸ “Anu nurnu nu be karu, ‘Anya lanu anya, ize lanu ize.’

³⁹ Kovu me naakanu anu, anu megwnarnu ele mernu anu nhne ojo. Nye obula ke gboru i aka nu nsi akarikwnunga, tuhnsanau a nsi berere.

⁴⁰ O buru nu nye obula piuru o mesi i oka ma o nahoru i iwo rime i, sigbasinu a iwo i ke olu masi.

⁴¹ Nye obula ke jeeme i ma i zne otu majli, snornu a zne majli lawuru.

⁴² Nyega nye obula norio i nhne, i gwako nye noopio ma i gbaznisi a nhne nj.

Whnu ele irno anu n'anya

(Luk 6:27,28,32-36)

⁴³ “Anu nuna m nu be karu, ‘Whnu nye agbatibi i n'anya, sno nye irno i irno.’

⁴⁴ Kovu me naakanu anu, anu whnu ele irno anu n'anya,† kpenu ele neemekpa anu ehni okpukpe.

⁴⁵ Anu mee kpa, anu jobu rumu Nda anu ke zi n'oligwe, kwnornu nu o neeme ma ehnau a nomukwasi badnu ojo nu badnu oma, o neeme masi ma mini zokwasị ele ome mma nu ele ojo.

⁴⁶ O buru nu anu whnurnu ele wam n'anya bu ele nowhnu anu n'anya, kini bu ogwo eru anu? O bu nye ele ona ntu mee kpa sa?

⁴⁷ O buru masi nu o bu rumu nwene anu kpai bu ele anu neebekwu rehna, kini bu nhne anu mernu karu ele berere? O bu nu ele ma Chiokike mee kpa sa?

⁴⁸ Anu jobu ele zuru ozu lele kpa Nda anu ke oligwe zuru ozu.

6

Iznizni gbasiri okesi nhne

¹ “Anu whnu nu anu za neeme nhne oma anu nu ruwhnu badnu, ma be whnurnu anu. Anu mee kpa, anu nwée ogwo ernu nu hne Nda anu ke oligwe zi.

² “Ke bu nu nga i noru ernu obirizi i, i jiko okwodu kpo okwo lele kpa ele ruwhnu lawuru mee n'oro ogbako ele Ju, ma n'apna, ma ele badnu ja be mma. Owe, m naakanu anu ezi oka, be nwezulem ogwo ernu ke be.

³ Kovu nga i noru ernu obirizi, i kweko akarita i mahia nhne akarikwnunga i neeme,

⁴ ma ernu obirizi i buru nhne zi mgwugwa. Nda i ke nowhnu nhne zi nu mgwugwa jookwuhna i.

Iznizni gbasiri okpukpe

(Luk 11:2-4)

⁵ “Nga anu neekpe okpukpe, anu meko lele ele ruwhnu lawuru, kwnornu nu o naamasị be o gwuzoru n'oro ogbako ele Ju ma ngeri apna neekpe okpukpe ma ele badnu whnurnu be. Owe, m naakanu anu ezi oka, be nwezulem ogwo ernu be.

⁶ Kovu nga i neekpe okpukpe, bnazne nu rime oro i, nga i gbasimernu mngo i, kpenu Nda i ke zi nu mgwugwa, Nda i ke nowhnu nhne zi nu mgwugwa jookwuhna i.

⁷ Nga anu neekpe okpukpe, anu kwiko agida oka etekne, lele kpa ele ma Chiokike mee, kwnornu nu be naari nu be jonu ogol-ogo okpukpe be.

⁸ Anu kpakwadia agwa lele be, kwnornu nu Nda anu magwu kpakara nhne ke zi anu mkpa, su anu ke rjo a.

⁹ “Anu kpe okpukpe kpa, ‘Nda ai ke zi n'oligwe, rehna i buru nhne zi nso,

¹⁰ eli-eze i va, be mee nhne i pioga, kpa be mee a n'oligwe, be mee a kpa n'owa.

¹¹ Nyega ai wiri tna,

ke joozunu ai obochi tna.

¹² Gbarunu ai nhne ojo a mernu, lele kpa a naagbarunu ele mernu ai nhne ojo.

¹³ I yisi ai nu rime nhne ornurna, kovu dhia ai n'aka nye ojo.*

† 5:44 Agwna okwukwo kamasiri: gosi ele nowu anu onu, menu ele sno anu irno nhne oma * 6:13 Agwna okwukwo kwuru: kwnornu nu eli-eze bu ke i, ma iknema, ma igwugwu, tim tom. Amim.

14 O buri nu anu gbarunu badnu ogahie be, Nda anu ke oligwe jaagbarunu anu masi.

15 Kovu o buri nu anu jaagbarunu badnu ogahie be, Nda anu ke zi oligwe jaagbarunu anu.

Iznizni gbasiri ovu onu

16 "Nga anu noovu onu, anu meko lele ele ruwuhu lawuru, ele naagbaru ruwuhu, donwuta ruwuhu ma o zi kpa ele badnu mahia nu be noovu onu. Owe, m naakanu anu ezi oka, be nwezulem ogwo ernu be.

17 Kovu nga i noovu onu, gweru monu te nu risi i, snu ruwuhu i,

18 ma ele badnu gharu o mahia nu i noovu onu. Kovu Nda i nye noowuhu nhne zi nu mgwuga jaamahia, Nda i jokwu i ogwo.

Ekwu ke zi n'oligwe

(Luk 12:33,34)

19 "Anu kpabitani ehni anu ekwu n'owa, hne akika nu ajarj naata, hne ele buznu neeliwa oro nooznu buznu,

20 kovu anu kpabitani ehni anu ekwu n'oligwe, hne akika nu ajarj za naata, ele buznu za neeliwa oro nooznu buznu.

21 Kwnornu nu hne ekwu i zi, bu hne mkpoma i jaazi masi.

Iwhne ke ehni

(Luk 11:34-36)

22 "Iwhne ke ehni bu anya, ke bu nu o buri nu anya i buri oma, kpakara ehni i jobu iwhne iwhne.

23 Kovu o buri nu anya i zila budnu, kpakara ehni i jeejiyiya n'ochichiri. O buri nu iwhne ke zi i n'ehni bu ochichiri, ochichiri wam jaahna ezi.

Chiokike nu ekwu

(Luk 16:13; 12:22-31)

24 "O za nye nwernu rikne buri phi nda kwu lawuru. O buri kpa, o joosno otu irno, whnu ke berere n'anya. Mbu o joosobisinu otu k'agida, ledna ibne a anya. Anu jobuli phi Chiokike nu phi ekwu.

25 "Ka bu nhne me kwno naakanu anu, anu rigbuko ehni anu n'oriri gbasiri budnu anu, nhne anu jeeri mbu nhne anu jonwo, mbu gbasiri ehni anu iwo anu joowo. O buo budnu kakwo wiri? O buo ehni kakwo iwo sa?

26 Anu le wonunu ke oligwe, be gha mkpuru, be gwemasia nhne n'ekwu, o zia nhne be chibna n'obna, kovu Nda anu ke oligwe nooznu be. Anu buo nhne gburu okne onu ahia karu be?

27 Ndaa nye n'esilawuru anu nwernu rikne tukwasi nhne matj n'ogologo budnu a hite n'origbu ehni a?

28 "Kini mernu anu naarigbu ehni anu gbasiri iwo anu joowo? Anu lekpm okoko zi n'ohia, kpa be nooso, be za n'odogbu ehni be n'ernu, be kwné ikpe.

29 Kovu me kanu anu o bubedi Solomoni n'iwuhuru a, nu kpakara igwugwu a, yige eyi lele otu nu rime be.

30 O buri nu Chiokike wosiri achara ke ohia iwo kpa, ke zi tna, ekile be tubna a n'ite bekwnu, o bu nu o jooosi anu iwo ke kakwo, anu ele okwnata ovu matj?

31 Anu rigbuko ehni anu, naakaa, 'Ndaa nhne a jeeri?' mbu, 'Ndaa nhne a jonwo?' mbu, 'Ndaa nhne a joowo?'

32 Kwnornu nu kpakara nhne ele ka bu nhne ele ma Chiokike noopio, Nda anu ke oligwe magwu nu kpakara nhne ka zi anu mkpa.

33 Kovu anu beru osno pio eli-eze Chiokike, nu ome oma a, be jootukwasinu anu kpakara nhne ele ka.

34 Kam kpararu, anu rigbuko ehni anu n'oriri gbasiri ekile, ekile jaarhianu ehni a. Mmekpehni ke obochi obula zunnem a.

7

O kpe ele berere ikpe

(Luk 6:37,38,41,42)

1 "Anu kpé ikpe, ma Chiokike gharu o kpe anu ikpe.

2 Kwnornu nu ikpe anu kperu bu nhne Chiokike jeeji kpe anu, nhne anu jiri tunu nye berere bu nhne Chiokike jeeji tunu anu.

3 Kini kpararu i ji neele nhne matj ke zi n'anya nwene i, kovu i za naarj oriri gbasiri igwe-isisi ke zi n'anya i?

4 Ndaa kpa i jeeji kanu nwene i, 'Nwene, sete me gweme nhne matj ke zi i n'anya,' ma, le, igwe-isisi zi n'anya ke i?

5 Ji nye ruwuhu lawuru, beru osno gweme igwe-isisi ke zi n'anya ke i, ngam, i jowhhusnama osno o gweme nhne matj wam n'anya nwene i.

6 "Anu nyeko nkita nhne zi nsó, o zi be tuhna doka anu. Anu túsako palj nu ruwuhu ezni, o zi be zokwasi be ochi.

Rjo, pio, znu aka nu mgbo

(Luk 11:9-13)

7 "Anu rjo, be jeenye anu, anu pio, anu joopiohia, anu znu aka n'onu-mgbo, be jaagbamanu anu.

8 Kwnornu nu nye obula ke n'orio, n'orohia, nye noopio, noopiohia, nye nooznu aka nu mgbo, be jaagbamanu a.

9 "Ndaa nda n'esilawuru anu nye nnwo a jorio bréi, o nyee a akaworugwu?

10 Mbu nu o rjo a aznu, o nyee a agwo?

11 O buri nu anu, anu bu ele ojo, magwu kpa be nyee rumu anu nkesi buri oma, o ko buri Nda anu ke zi n'oligwe, o bu nu o jeenye ele n'orio a nhne buri oma?

12 Kpakara nhne ke anu pioru ma badnu menu anu, anu menu masi ele badnu kpa. Kwnornu nu ka bu nhne iwu nu ele owhnurninya kwuru.

Apna zì nwọronwo
(Luk 13:24)

13 “Anụ garu ọnu-mgbo ke zì nwọronwo bna. Kwnornu nù ọnu-mgbo nù apna wam ke noodubna badnù nù mwu zì rude, ele naaga a masi zì agida.

14 Kọvu nù ọnu-mgbo wam zì nwọronwo, apna wam ke noodubna nù bụdnu naara ẹhni nù ọguga, ele noophija zì ele nù ele.

Isisi nù mkpuru a
(Luk 6:43,44)

15 “Anụ zeru ele ọwhnurninya aghalaghala, ele naavakwnusi anụ n’iwo atnurnu, kọvu nù rime be, be bụ edu ọdogobu atnurnu.

16 Anụ jaamahia be hite nù mkpuru be nẹemi. Ele badnù be ọoghohia mkpuru vaiji n’isisi akukara, mọbu mkpuru figi n’igwnu-ogna?

17 Kpam masi, ọmama isisi miiga mkpuru ọma, kọvu isisi bụo ọma miiga mkpuru ojo.

18 Ọmama isisi nwée rikne mji mkpuru ojo, isisi ojo nwée rikne mji mkpuru ọma.

19 Isisi ọbula ke mfinyala mkpuru ọma, be jeegbudna a, túbna a nù rime bẹkwnu.

20 Kam kpararu, anụ jeehi nù mkpuru be mahia be.

Ọdo aka nù nsnì
(Luk 13:25-27)

21 “Ọ bụo nye ọbula ke noosukwu m, ‘Nyenwe ai, Nyenwe ai,’ jaabna n’eli-eze Chiokike, okwolem nye neeme nhne Nda m ke zì n’oligwe noopio.

22 Agida badnù jaakanu m n’obochi wam, ‘Nyenwe ai, Nyenwe ai, a jile rẹwhna i whnụ ọwhnurninya? A jile rẹwhna i chihala ele rẹnwu ojo? A jile rẹwhna i rnụ ẹnu ndu-ẹhni zì ọdo n’odo?’

23 M jaakanu be, ‘M máam nye anụ bụ, anụ whoga nù hne me zì, ele aruru-ẹli.’

Ntu-ẹli lawuru
(Luk 6:47-49)

24 “Nye ọbula ke ọnonu kpakara ikwu-ọnu m neeme be, m jeeji a sninu nyerukna ke marnu nhne, nye wuru ọro a n’olu rugwu.

25 Mini zo, mini-ẹli gba, ruwhere whe masi, kwana ọro wam, kọvu ọ dnána, kwnornu nù ọ turu ntu-ẹli a n’olu rugwu.

26 Nye ọbula ke ọnonu kpakara ikwu-ọnu m ka, ọ zá neeme be, m jeeji a sninu nye iwhnirniwhno, nye wuru ọro a n’olu rịzna.

27 Mini zo, mini-ẹli gba, ruwhere whe masi, kwana ọro wam, ọro wam dna gi-rigidim, tị ogwnu.”

Rikne Jizosi

28 Ọ dụ nga Jizosi kwukworu kpakara ikwu-ọnu ka, nhne o znirni du kpa be hna ẹhni.

29 Kwnornu nù o neezni nhne lele nye nwernu rikne, ọ bụo lele ele zni iwu ele Ju.

8

Jizosi gworu nye nchnichna
(Mak 1:40-45; Luk 5:12-16)

1 Nga Jizosi hiri n’olu rugwu hiedna, igbudu ele badnù snornu a.

2 Otu nye naarija nchnichna vakwnusiri a, gbunu a mpnerne ọchi, kaa, “Nyenwe ai, ọ buru nù i piuru, i nwernu rikne mee m, m ziri richna.”

3 Jizosi dọsnima aka kpatu a, kaa, “M piuru m, ziri richna.” Ngangam, nchnichna wam whogaru n’ẹhni a.

4 Jizosi kanu a, “Ọ zá nye ọbula i kanu, kọvu la, gweru ẹhni gesi nye ọkwa ariohna, gweru masi nhne Mozizi nyernu n’iwu kwa ariohna ma ọ buru nhne akebe nyee be.”

Jizosi gworu nnwo izi
nye risi ogwnu
(Luk 7:1-10)

5 Nga Jizosi bnanyarnu Kapanom, otu nye nẹchi otu riwhu ele ogwnu vakwnusiri a, rjo a,

6 kaa, “Nyenwe ai, nnwo izi m dnanýgwu n’oro, otu ngeri ẹhni a nwurnu ọnwu, ọ zì n’igbugbu k’agida.”

7 Jizosi kanu a, “M jaava, gwọ a.”

8 Nye wam nẹchi otu riwhu ele ogwnu kanu a, “Nyenwe ai, m duge m nù nye i jaabnanya ọro a, kọvu kwu ọka kpọi, i ọogwo nnwo izi m.

9 Kwnornu nù m bụ m nye zì nù mkpururu ọchichi ele kakwo m, m nwernu m ele ogwnu zì nù mkpururu m, me kanu nye ka, ‘Zne,’ o zne, m kanu nye berere, ‘Vaa,’ ọ vaa, m kanu nnwo izi m, ‘Mee ka,’ o mee a.”

10 Nga Jizosi nurnu ọka ka, o duru a ẹhni, ọ kanu ele sno a n’aznu, “N’ezi, me kanu anụ, m whnulele m ọkwnata ovu hna kpa, ma nù ovu nye Izireli.

11 Me kanu anụ nù agida badnù jeehi n’obosi ẹhnam nù ọdidna ẹhnam va, snornu Ebereham, nù Aziki, nù Jekọpu, daziri ẹli n’eli-eze Chiokike,

12 kọvu nù be jaachibna ele kwesiri ọ bna n’eli-eze Chiokike nù rime ọchichiri, hne be jaazi naakwina ẹkwina, naata rụkwurnu-ize.”

13 Jizosi kanu nye wam nẹchi otu riwhu ele ogwnu, “La, be menu i lele kpa i kweru.” ẹhni buru nnwo izi a ọma ngangam.

Jizosi gworu ele nriria
(Mak 1:29-34; Luk 4:38-41)

14 Nga Jizosi bnarnu ọro Pita, ọ whnurnu nne nnwerne a hne ọ dnaný n’okpata naarija ẹhni orne bẹkwnu.

15 Ọ nwugwuru a aka, ẹhni orne bẹkwnu wam sigbasi a, o lizo, bete neeznenu be izi.

16 N’ogbednachi, be kwuyanụ a agida ele rẹnwu ojo nnwugwu, ọ ji ikwu-ọnu chihala ele rẹnwu ojo, gwọ kpakara ele naarija nriria.

17 O gworu be, ma nhne Azaya nye owhnurninya kwuru mezu, kaa, “Ya n’iwuhuru a vumernu kpakara eñni igbugbu a, vuru masi nriria a zị ọdo n’odo.”

*Nhne o joowhu
ele sno Jizosi
(Luk 9:57-62)*

18 Nga Jizosi whnurnu agida ele badnu gbaru a gburugburu, o kanu ele sno apna a ma be whe aznu osimini kiyari.

19 Otu nye zni iwu ele Ju vakwnusiri a, kanu a, “Nye-zni-nhne, m joosno i, penupe obula i neezne.”

20 Jizosi kanu a, “Edu nwernu mkpewu hne be dnanyi, onunu oligwe nwernu alikwu hne be zukwa inwe, kovu Nnwọ ke Badnu nwée hne o jaabita risi a.”

21 Nye ke berere n’esilawuru ele sno apna a, kanu a, “Nyenwe a, kweru m me beru osno lite nda m.”

22 Kovu Jizosi kanu a, “Sno m, gharu ele nwurnu onwu ma be lite ele nwurnu onwu ibne be.”

*Jizosi bigboru
ruwhere osimini*

(Mak 4:35-41; Luk 8:22-25)

23 Nga Jizosi bnarnu nu rime ogbo, ele sno apna a sno a.

24 Ngangam, okne ruwhere beteru ewhe n’olu osimini, ke mernu mini n’owubna nu rime ogbo, kovu Jizosi n’iwuhuru a neezni anyarna.

25 Ele sno apna a vakwnusiri a, kpatnonya a, kanu a, “Nyenwe a, d’ohia a, a noowhu.”

26 O kanu be, “Kini mernu anu n’ootu ogwnu, anu ele okwnata ovu mati?” O lizo, bigbo ruwhere osimini, ohna dna bii.

27 O du kpa be hna eñni, be naakaa, “Nye ka bu ọdo badnu kini? Ruwhere nu okne osimini noobnotenu a nsni.”

*Jizosi gworu
ele rukna lawuru*

(Mak 5:1-20; Luk 8:26-39)

28 Nga o varu n’aka osimini kiyari n’eli ele Gadara, ele rukna lawuru ele renwu oju nwugwu, ele hi nu hne be li zine whuya, ele ruwhnu be tu ogwnu, ke kpayaru o za nye neewhe n’apna wam.

29 Be siwama okokoba, kaa, “Ai nu ji nwekogwu kini, Jizosi, ji Nnwọ Chiokike? I varu ma i ta a awnhuwuhnu hne ige a y’oduge?”

30 Agida ezni zi hne zila ikere naata wiri.

31 Renwu oju wam riasno a, kaa, “O buru nu i chihala a, zine a ma a bna nu rime ezni ele ka.”

32 O kanu be, “Anu zne.” Be whuya, zne bna n’agida ezni wam, kpakara agida ezni

wam gbadnarnu nu ngwulangwu dnabna nu rime osimini, rinwu nu rime mini.

33 Ele nooznu be gbawhu, bna n’eli-ohna wam tñsi nhne be whnurnu, nu nhne mernu ele wam renwu oju nwugwu.

34 Kpakara ele eli wam whuya kwnusi Jizosi. Nga be whnurnu a, be riasno Jizosi o whoga n’eli be.

9

*Jizosi gworu nye eñni a
d’ownurnu o’donwu*

(Mak 2:1-12; Luk 5:17-26)

1 Jizosi bna nu rime ogbo, lahna aka osimini kiyari, va n’eli ke a.

2 Be vuyanu a otu nyerukna ke ngeri eñni a d’ownurnu o’donwu, dnanyi n’olu okpata, nga Jizosi whnurnu okwnata mkpoma be, o kanu nye wam ngeri eñni a d’ownurnu o’donwu, “Mkpoma si i rikne, si nnwo m, be gbarunam ji kpakara mmehie i.”

3 Agwna ele zni iwu ele Ju neesikwa nu mkpoma be, “Nyerukna ka nookwulu Chiokike.”

4 Jizosi mahjaru mkpoma be, o kanu be, “Kini kpahjaru anu naari oriri ka nu mkpoma anu?”

5 Ndaa ke zi ewheke, o kaa, ‘Be gbarunam ji kpakara mmehie i,’ m’obu, o kaa, ‘Lizo, zne izne?’

6 M jeegesi anu nu Nnwọ ke Badnu nwernu iknernema n’owa o gbaru mmehie.” O kanu nye wam ngeri eñni a d’ownurnu o’donwu, “Lizo, chiri etere i, la oro i.”

7 Nyerukna wam lizo, la n’oro a.

8 Nga agida ele badnu whnurnu a, be tu ogwnu, znarni Chiokike, nye nyegaru badnu iknernema nu kpa.

Jizosi sukwuru Matiyo

(Mak 2:13-17; Luk 5:27-32)

9 O du nga Jizosi hiri nu pii neewhe, o whnurnu otu nye rewhna a bu Matiyo, hne o dazi n’oro ntụ, o kanu a, “Sno m.” O lizo snornu a.

10 Nga Jizosi dazi neeri wiri n’oro Matiyo, agida ele ona ntụ nu ele mmehie varu snornu Jizosi nu ele sno apna a neeri wiri.

11 Nga ele Farisi whnurnu a, be sika ele sno apna a, “Kini mernu Nye-zni-nhne anu sno ele ona ntụ nu ele mmehie neeri wiri?”

12 Nga Jizosi nurnu a, o kanu be, “Mkpa dibia ziko naakpa ele eñni buru oma, okwolem ele nriria.

13 Kovu anu zne m’uhia nhne ka bu, ‘M noopio obirizi, o buo arjohna.’ Kwnornu nu m vage m o sukwu ele oma, kovu ele mmehie.”

Ajji gbasiri ovu onu

(Mak 2:18-22; Luk 5:33-39)

14 Ele sno apna Joni vakwnusiri Jizosi sika a, “Kini kpayaru a nu ele Farisi noovu

onu ige obula, kovu ele sno apna i za noovu onu?"

¹⁵ Jizosi saru be, "Ele be ziri va hne be nopolu nnwerne ikne, be jaazi noodukwa ruwhnu hne be nu nye nopolu nnwerne ikne zi? Kovu obochi vawa nga be jaanahoru be nye nopolu nnwerne ikne, ige wam be joovu onu."

¹⁶ "O za nye jeegweru mkpekele ikpe ikne dnusni n'iwu oknani, kwnornu nu ke ikne jodokahala nhne n'ehni iwo oknani, o jodoka ke kakwo agida.

¹⁷ O zi masi nye jeegweru manya ikne gbasị n'olori akpukpo oknani, be mee kpm, olori wam jaagbawama, manya nu olori akpukpo whume etekne. Kovu be gbasị manya ikne n'olori akpukpo ikne, kam jaabita be lawuru nkari."

Nnwọ rinya matị nu

nwerinya ntụ ovnarna

(Mak 5:21-43; Luk 8:40-56)

¹⁸ Nga o naakanu be oka ka, le, otu nye risi varu, kponu a risi eli, kaa, "Nnwọ m rinya nwunam kitna, kovu va tukwasi a aka i, o jaazi budnu."

¹⁹ Jizosi lizo, snornu a zne, ele sno apna a sno a masi.

²⁰ Otu nyerinya ke naaria ntụ ovnarna nri nu awha lawuru, garu a n'aznu, kpatu onu iwo a aka.

²¹ Kwnornu nu nyerinya kannu ehni a, "O buru nu me kpatu onu iwo a aka kpoi, o jeeme ehni buru m oma."

²² Kovu nu Jizosi tuhnasarnu, whnu a, kanu a, "Nnwọ m rinya, mkpoma si i rikne, okwnata mkpoma i znohialam ji." Be gworu nwerinya wam ngangam.

²³ Nga Jizosi varu n'oro nye risi wam, whnu ele ji opi noogwnu eri oli iznu nu agida mkpakpo pii,

²⁴ o kanu be, "Anu whoga hna, kwnornu nu nnwọ rinya matị ka nwuna onwu, kovu nu o neezni anyarna." Be mu a rumu.

²⁵ Nga o chihalaru agida ele badnu wam, o bna nu rime oro, nwugwu nnwọ rinya matị wam n'aka, nnwọ rinya matị wam lizo.

²⁶ Otututu a gazu kpakara eli wam.

Jizosi gworu ele isni

²⁷ Nga Jizosi hiri nu pii whuya, ele isni lawuru snornu a, neesi lulo, naakaa, "Ji Nnwọ Devidi, donu a obirizi."

²⁸ Nga o bnarnu n'oro, ele isni lawuru wam vakwnusi a, Jizosi sikwa be, "Anu kweru nu m nweru m rikne o gwọ anu?"

Be kaa, "Owe, Nyenwe ai."

²⁹ O kpatu be aka n'anya, kaa, "Lele kpa okwnata mkpoma anu nu, o menu anu kpm."

³⁰ Anya be snama. Jizosi do be aka nu nsni, kaa, "Whnu nu o za nye anu kanu."

³¹ Kovu nga be whogaru, be wheke rewhna Jizosi kpakara eli wam.

Ogwugwo nye mgbu

³² Nga be nowhoga, be kwuyanụ Jizosi nye mgbu ke renwu ojo nwugwu.

³³ Nga o chihalaru renwu ojo wam, nye mgbu wam kwuru oka, o du agida ele badnu ehni be, naakaa, "A whnulele nhne nu kpa n'Izireli."

³⁴ Kovu ele Farisi karu, "O ji rikne nye risi renwu ojo naachihala ele renwu ojo."

Ele ernu zi ele nu ele

³⁵ Jizosi neezneghari kpakara eli-ohna ma nu mgbu neezni nhne n'oro ogbako be, nookpo okwo izi oma eli-eze Chiokike, noogwo kpakara nriria nu ehni igbugbu zi odo n'odo.

³⁶ Kovu nu nga o whnurnu agida ele badnu wam, o donu be obirizi, kwnornu nu inwe gwuru be, be nwee rikne yinu ehni be aka, be gbasaru lele atnurnu nwee nye nooznu be.

³⁷ O kanu ele sno apna a, "N'ezị, ogwe nhne ekwu zi agida, kovu nu ele ernu zi ele nu ele.

³⁸ Kam kpararu, anu rio Nyenwe ogwe nhne ekwu ma o zizne ele ernu n'ekwu a."

10

Ele izi nri nu ebo

(Mak 3:13-19; Luk 6:12-16)

¹ Jizosi sukwuru nri nu badnu lawuru wam ele sno apna a. O nyee be rikne be chihala renwu ojo, gwọ masi kpakara nriria nu ehni igbugbu zi odo n'odo.

² Ka bu rewhna ele izi nri nu ebo wam, nye mbom bu Sajmoni, nye be nookwu Pita, nu Anduru wnene a, nu Jemisi nnwọ Zebidi nu Joni nwene a,

³ Filipu nu Batolomi, Tomosi nu Matiyo nye ona ntụ, Jemisi nnwọ Alifayosi nu Tadiyosi,

⁴ Sajmoni nye zi n'esilawuru ele noonwu bekwu nu mkpoma, nu Judasi Isikarioti, nye reru a.

Ernu ele izi nri nu ebo

(Mak 6:7-13; 13:9-13; Luk 9:1-6; 21:12-17)

⁵ Jizosi zihala nri nu badnu lawuru ka, do be aka nu nsni, kaa, "Anu zneko n'eli ele buo ele Ju, mofu nu rime eli-ohna obula ke ele Sameria.

⁶ Kovu anu znekwnusi ele Izireli, ele nu lele rumu atnurnu whuru owhu.

⁷ Nga anu neezne anu kanu be, 'Eli-eze Chiokike zi ndundu.'

⁸ Anu gwọ ele nriria, mee ele nwurnu onwu be hi n'enuwu lizo, anu gwọ ele nchnichna, anu chihala renwu ojo. Anu nahiaru ewhu ewhu, anu nyee n'ewhu ewhu.

⁹ Anu ji iwai obula nu rekpa anu.

10 Anụ jí rẹkpa n'izne anụ, mọbu iwo lawuru, mọbu okoro-ochi, mọbu mkpara, kwnornu nụ nye ẹrnu kwesiri be nyee a wiri nù hne ọ nọrnu ẹrnu.

11 “Eli-ohna obula, mọbu mgbu obula anụ bnarnụ, anụ piohia ezi badnụ nù rime a, daziri pji tem anụ whọga.

12 Nga anụ bnarnụ n'oro wam, anụ kaa, 'Udno zinu anụ.'

13 O buri nù oro wam buri oma, udno anụ jaadazinu a, kovu nù o buri nù oro wam buo oma, udno anụ jeehiehnakwnusi anụ.

14 Nye obula ke nábanyana anụ, ke nuna ikwu-onu anụ, anụ jowhoga n'oro wam mọbu n'eli-ohna wam, lishnama ruznurnuznu ochi anụ.

15 N'ezí me naakanụ anụ, be joodonu eli Sodom nù Gómora obirizi n'obochi ikpe karu eli-ohna kị.

16 “Le, m neezihala anụ lele atnrnu n'esilawuru edu, anụ nwe akọ lele agwo, kpa enwerne lele nduru.

17 “Kovu anụ ze ele badnụ, kwnornu nù be jeegweru anụ nyee n'aka ele ikpe, be jaapnia anụ nhne n'oro ogbako ele be.

18 Be jookwuru anụ zne nù ruwhnu ele risi ochichi nù ele eze kwnornu m, ma anụ kanu be nhne gbasiri, ma ele buo ele Ju.

19 Kovu nù nga be jeegweru anụ nyee ele ikpe, mkpoma láko anụ mini kpa anụ jogoru onu anụ mọbu nhne anụ jookwu, ige wam be jeenye anụ nhne anụ jookwu.

20 Kwnornu nù o buo anụ nookwu oka, kovu o bu Enine ke Nda anụ nookwu oka nù rime anụ.

21 “Nwene jeegweru nwene a nyee ma be gbu a, nda jeegweru nnwo a nyee, rumu jeelizo megidne ele mnrnu be, mee be nwuma.

22 Kpakara ele badnụ jooano anụ irno kwnornu nù rwhna m, Kovu be jooznohia nye obula ke jaaknata mkpoma dazigidne du okwukwo kpakara nhne.

23 Nga be kpagburu anụ n'otu eli-ohna, anụ gbazne nù ke berere. Me naakanụ anụ ezi oka, anụ jaagazu kpakara eli-ohna Izireli du nga Nnwọ ke Badnụ jaava.

24 “Nye sno apna nye-zni-nhne jáaka nye zni a nhne. Ohi jáaka nyenwe a.

25 O dulam nga nye sno apna nye-zni-nhne joonu lele nye zni a nhne, nù ohi o nù lele nyenwe a. O buri nù be sukwuru nda nwe oro Belizibolu, o bu nù be jóosukwu ele oro a karukwo?

*Nye anụ jootu ogwnu a
(Luk 12:2-7)*

26 “Anụ túko ogwnu be, kwnornu nù o zá nhne be kpusnirni okpusni ke be jóokpume, mọbu nhne zị mgwugwa ke be jáamahia.

27 Nhne me kannu anụ n'ochichiri, anụ kwu a n'iwnehnie, nhne be tukasiri nù nsní, anụ kwusa a n'olu oro.

28 Anụ tú ogwnu ele noogbu anọ-ehni, ele nwée rikne gbu mkpoma. Kovu anụ tú ogwnu nye wam ke nwernu rikne gbu mkpoma nù anọ-ehni nù bekwnu eli renwu.

29 Be zá neere wonzna lawuru otu mkpuru iwai matí? Kovu otu nù rime be jáadna n'eli sù Nda anụ kwéle.

30 Kovu nù kpakara rukeri-ize ke zị anụ nù risi gwnnrnu ogwnu.

31 Ogwnu tú anụ, anụ zị okne onu ahia karu agida wonzna.

*O kwuhia nù o ju Karaisi
(Luk 12:8,9)*

32 “Nye obula ke jookwuhia m nù ruwhnu ele badnụ, o bu ya bu nye me jookwuhia nù ruwhnu Nda m ke oligwe.

33 Kovu nye obula ke joozonahoru m nù ruwhnu ele badnụ, bu nye me joozonahoru nù ruwhnu Nda m ke zị n'oligwe.

*O buo udno
kovu ama-ogwnu
(Luk 12:51-53; 14:26,27)*

34 “Anụ chéko nù m varu m o gweya udno n'owa, m vage m o gweya udno, kovu ama-ogwnu.

35 Kwnornu nù m varu m o kewa

'nnwo rukna nù nda a,

nnwo rinya nù nne a,

nnwerne nnwo nù nne nzi a.

36 Nye irno badnụ joo bu ele ezi-nu-oro a.'

37 “Nye obula ke whnrnu nda a mọbu nne a n'anya karu m, kwésile m, nye whnrnu nnwo a rukna mọbu nnwo a rinya n'anya karu m, kwésile m.

38 Nye obula ke vúrúle ogba a sno m n'aznụ, kwésile m.

39 Nye obula ke noopio budnu a jootuwu a, nye tuwhuru budnu a kwnornu m, jooophia a.

*Ogwo ẹrnu
(Mak 9:41)*

40 “Nye obula ke nabnanyarnu anụ, nabnanyarnu m, nye nabnanyarnu m, nabnan-yarnu nye ziyaru m.

41 Nye obula ke nabnanyarnu nye owhnrninya kwnornu nù o bu nye owhnrninya, jaanahia masi ogwo ẹrnu nye owhnrninya. Nye nabnanyarnu nye mee mma kwnornu nù o bu nye mee mma, jaanahia ogwo ẹrnu nye mee mma.

42 Nye obula ke jookwute otu nù rime ele matí ka otu okiko mini jiri iyi kwnornu nù o bu nye sno apna m, owe, me naakanu anụ ezi oka, o jaanahiariri ogwo ẹrnu a.”

11

*Jizosi nù Joni
Nye Wu Mini
(Luk 7:18-35)*

¹ Nga Jizōsi nyekworu ele sno apna a nri nū ẹbo wam iwu, o hiri nū pji whōga, zne zni nhne, kpō okwo izi ọma kpakara ẹli-ọhna zī be ndūndu.

² Jōni nūrnu n'oro ikelu kpakara ẹrnu Karaīsi nōornu, o zizne agwna ele sno apna a.

³ Be sīkwa a, “Ọ bụ jiwa bụ nye jaava, sọbu a le anya nye berere?”

⁴ Jizōsi sarū be, “Anū lahna kanū Jōni kpakara nhne anū nūrnu nū nhne anū whnūrnu,

⁵ ele isni nōowhnu ọsno, ele mgworo neezne izne, be neeme ele nchnīchna be ziri rīchna, ele nsnī inyo nōonu nhne, ele nwūrnu ọnwu lizōru n'ẹnwu, be neezni ele mboni izi ọma.

⁶ Chiokike jōgozi nye ọbula ke jūla m kwnornu nhne me mernu.”

⁷ Nga ele sno apna Jōni larū, Jizōsi bete naakanū agida ele badnū wam nhne gbasīri Jōni. O sīkwa be, “Kīni bụ nhne anū znernu ọ whnū n'ẹli-ikpa? Ekere achara ruwhere noovu?”

⁸ Sọbu kīni nhne anū znernu ọ whnū? Nyerukna wogwu iwo zī pīali pīali sa? Le, ele wogwu iwo zī pīali pīali zī n'oro ele eze.

⁹ Anū kanū m, kīni bụ nhne anū whōgaru zne ọ whnū? Nye ọwhnurninya sa? Owe! Nye kakwo nye ọwhnurninya.

¹⁰ Nye ka bụ nye be gbarū nhne gbasīri a n'ọkwukwo nsọ, kaa,

'Le, m neezizne nye izi m nū ruwhnu i, nye jeemekwata apna i nū ruwhnu i.'

¹¹ N'ezī me kanū anū, n'esislawuru ele ele rinya mūrnu, ọ zá nye ke kakwo Jōni Nye Wū Mini, kovu nye zīkakworu matī n'ẹli-eze Chiokike kakwo Jōni.

¹² Hite n'ọbochi Jōni Nye Wū Mini dū kītna, be neeme ẹli-eze Chiokike nhne rikne, ele gbasīri rikne naagbalī ọ bna nū rime a.

¹³ Tem dū n'ige Jōni, kpakara ele ọwhnurninya nū iwu kwuru nhne gbasīri ẹli-eze Chiokike wam.

¹⁴ O būrū nū anū jeekweru a, Jōni bụ Elaija nye be gbarū nhne gbasīri a nū ọ jaava.

¹⁵ Nye nwernu nsnī, ọ nūrnu.

¹⁶ “Ndaa nhne me jeeji sninu ebiri ka? Ebiri ka nū lele rumu takīri dazīgwu n'ahja, noosukwu ibne be ikwu,

¹⁷ be naakaa,

'A kwannū anū eri,

anū tnéne eri,

a gwnū eri mkpe,

anū kwnána ẹkwna.'

¹⁸ Kwnornu nū Jōni varū rīle wiri, ọ nwóge manya, be kaa, 'O nwernu rēnwu ojo.'

¹⁹ Nnwọ ke Badnū varū, neeri wiri, nōonwo manya, be kaa, 'Le, nye okne wiri, nū nye nwọ okne manya, enyi ele ọna ntū nū ele

mmehie.' Ẹrnu ọma ke neehi nū akōniche Chiokike whūya neegesi nū akōniche būrū ọma.”

Eli-ọhna kwé ekwe

(Luk 10:13-15)

²⁰ Jizōsi bete ọ nyanū agida ẹli-ọhna ọnyinya hne ọ nrūrnu agida ẹrnu kwnornu nū be kwéle ọ tūhnasna mkpọma nū mmehie be.

²¹ “Awhnūwhnu jaazīnu i, jī Korazini, awhnūwhnu jaazīnu i, jī Bētesaida, ọ būrū nū be nrūrnu kpakara agida ẹrnu ndu-ẹhni ka nū Taya nū Sajdoni bụ ke be nrūrnu nū rime anū, be znernu ọtūhnasna mkpọma agida ige wheru ewhe, daziri n'ikpe mkpe nū rētnu.

²² Kovu me kanū anū, be jōdonu Taya nū Sajdoni obirizi n'ọbochi ikpe karū anū.

²³ Jī n'iwihuru i masī, Kapanom, be jeegwelizō i olu dū oligwe? Be jeegwedna i ẹli, dū bēkwu ẹli rēnwu. O būrū nū agida ẹrnu ndu-ẹhni be nrūrnu nū rime i nū be nrūrnu a nū Sodom, o znernu adazī dū ọbochi tna.

²⁴ Kovu me kanū anū, be jōdonu ẹli Sodom obirizi n'ọbochi ikpe karū i.”

Ozukwa inwe

(Luk 10:21-22)

²⁵ N'ige wam Jizōsi karū, “Meka, Nda, Nyenwe oligwe nū ọwa, kwnornu nū i bīgaru nhne ele ka n'anya ele akō nū ele marnū nhne, kovu i kpumennu be rumu takīri.

²⁶ Owe! Nda, meka, kwnornu nū ọ būrū ọma kpam n'anya i.

²⁷ “Nda m yisiri kpakara nhne n'aka m. O zá nye magwū Nnwọ wam, okwolem Nda. O zī masī nye magwū Nda wam, okwolem Nnwọ a kpōi, nū ele Nnwọ wam piuru o kpumenu a.

²⁸ “Anū wakwnusi m, anū ele nōdogbu ẹhni anū n'ẹrnu, ele be vuteru ivu rīnya, m jeeme anū zukwaru inwe.

²⁹ Anū ynarnū yokwu m * n'ili anū, anū mūhia nhne n'ọnu m, kwnornu nū m bụ m nye zī wōhnerne nū nye gwednarnū mkpọma n'ẹli, anū joopohja ozukwa inwe nū mkpọma anū.

³⁰ Kwnornu nū yokwu m gbū igbugbu, ivu m zī ewheke.”

12

Ajji gbasīri

Ọbochi Ozukwa Inwe

(Mak 2:23-28; Luk 6:1-5)

¹ N'ige wam, Jizōsi naagawhe n'ẹkwa ikpa n'Ọbochi Ozukwa Inwe, wiri nōogwnu ele sno apna a, be bete nōogho ikpa naata.

² Nga ele Farisi whnūrnu a, be kanū a, “Le, ele sno apna i neeme nhne kwésile n'iwu n'Ọbochi Ozukwa Inwe.”

* 11:29 Yokwu bụ isiisi be knegidernu n'ili anọ ọro ma be rnū ẹrnu be karū be mee.

³ O kanu be, “Anu gwnuna nhne Dev-idi mernu nga wiri gwnurnu a, ya nu ele snogwu a?”

⁴ O bnazernu n'oro nso Chiokike ri bredi be bitaru nu ruwhnu Chiokike, ke kwesile n'iwu nu Devidi nu ele sno a ri, okwolem ele okwa arjohna kwesiri o ri a?”

⁵ Mofu anu gwnuna n'iwu kpa ele okwa arjohna Chiokike ji neemeru Obochi Ozukwa Inwe n'Oro Nso Chiokike, kofu ikpe mana be?”

⁶ Kofu me kanu anu nu nye kakwo Oro Nso Chiokike zi hna.

⁷ O buru nu anu mahiaru nhne ikwu-onu ka bu, 'M noopio obirizi, o buo arjohna,' anu jaama ele ikpe mana ikpe.

⁸ Kwnornu nu Nnwofu ke Badnu bu Nyenwe Obochi Ozukwa Inwe.”

Nyerukna aka

dönwurnu ödonwu

(Mak 3:1-6; Luk 6:6-11)

⁹ Jizosi hi nu pii whoga, bna n'oro ogbako ele Ju,

¹⁰ otu nwerukna aka dönwurnu ödonwu zi pii. Be noopio nhne be jeeji bno Jizosi nhne, be sjkwa a, “O buru oma n'iwu o gwofu nriria n'Obochi Ozukwa Inwe?”

¹¹ Jizosi kanu be, “Ndaa nye nu rime anu ke jeenwe otu atnurnu, o buru nu atnurnu wam dnabna rime olulu n'Obochi Ozukwa Inwe, o bu o jöonwugwu a, döhia a?”

¹² Badnu gburu onu karu atnurnu. Ka bu nu o buru oma o mee nhne oma n'Obochi Ozukwa Inwe.”

¹³ O kanu nye nyerukna wam, “Dösnima aka i.” O dösnima aka a, aka a buru oma lele aka a berere.

¹⁴ Ngam, ele Farisi whogaru gba iznuznu kpa be joogbu a.

Nnwofu izi Chiokike höhiaru

¹⁵ Nga Jizosi mahiaru a, o hi nu pii whoga, agida badnu snornu a, o gwofu kpakara ehni igbugbu be.

¹⁶ O doru be aka nu nsnj be meko ele badnu mahja nye o bu.

¹⁷ O mernu ka ma nhne be gbaru n'okwukwo nso hite n'onu Azaya nye owhnurninya mezu, ke kwuru,

¹⁸ “Le, ka bu nye izi m me höhiaru, nye me whnurnu n'anya, nye nhne a nooso m.

M jeeyisi Enine m nu rime a.

O jookpo okwo ikpe zi snam nu kpakara mba.

¹⁹ O jöolu ogwunu, o jeesi lulo, o za nye jöonu akpisi a n'ederez.

²⁰ O jaagbaji ekere achara hipagwu ehia, mofu whusnime tonji noohio runwurnu, tem o mee ikpe zi snam megbu.

²¹ Kpakara mba jeenwe olile anya nu rewhna a.”

Jizosi nu Belizibolu

(Mak 3:20-30; Luk 11:14-23)

²² Ige wam be kwuyan Jizosi otu badnu renwu ojo nwugwu, nye kpuru isni, ke dnarnu mgbu, o gwofu a ehni igbugbu wam, nye mgbu wam kwuru oka, whnu masi osno.

²³ O duru agida ele badnu wam ehni, be kaa, “Nyerukna ka, o jofu Nnwofu Devidi sa?”

²⁴ Kofu nga ele Farisi nurnu a, be kaa, “Nwerukna ka neejri rikne Belizibolu nye risi ele renwu ojo naachihala renwu ojo.”

²⁵ Nga Jizosi mahiaru oriri be, o kanu be, “Eli-eze obula kewama megidne ehni a, jootubiri etekne, eli-ohna obula mofu oro obula ke kewaru megidne ehni a jöogwuzoli.

²⁶ O buru nu Setani chihala Setani, o kewaru megidne ehni a, eli-eze a jaaga ola gwuzo?”

²⁷ O buru nu m ji m rikne Belizibolu naachihala ele renwu ojo, nu rikne nyele bu hne ele ke anu ji naachihala be? Be jofu ele ikpe anu.

²⁸ Kofu o buru nu m ji m Enine ke Chiokike naachihala renwu ojo, le, eli-eze Chiokike dulam anu ehni.

²⁹ Berere kwno, badnu jaaga ola bna n'oro nye dikne, nahoru a kpakara nhne n'aka rikne, o buru nu o bele osno kne dikne wam eriri? Nga wam o jeenwe rikne nahoru a nhne zi n'oro a.

³⁰ “Nye nu me zila, bu nye neemegidne m, nye snone m naachikota nhne, bu nye noobosa obosa.

³¹ Kwnornu nu ka, m naakanu anu, be jaagbarunu badnu mmehie nu okwulu obula be kwuluru, kofu nu be jaagbarunu okwulu be kwuluru Enine Nso.

³² Nye obula ke jookwugidne Nnwofu ke Badnu, be jaagbarunu a, kofu nye obula ke jookwugidne Enine Nso, be jaagbarunu a, o buo n'ige ka, mofu ige ke jaava.

Isisi nu mkpuru a

(Luk 6:43-45)

³³ “Anu mee isisi ma o buru oma, mee masi mkpuru a ma o buru oma, mofu mee isisi ma o buru isisi ojo, mee masi mkpuru a ma o buru mkpuru ojo. Kwnornu nu be mahja isisi hite nu mkpuru a.

³⁴ Anu eburnu agwo, anu jaaga ola kwu oka oma, hne anu bu ele ojo? Kwnornu nu nhne jipiyaru mkpoma bu nhne onu nookwu.

³⁵ Badnu oma hite n'ekwnu oma ke zi nu mkpoma a neegwehia nhne oma, badnu ojo hite n'ekwnu ojo ke zi nu mkpoma a neegwehia nhne ojo.

³⁶ Kofu me kanu anu, nu oka obula ele badnu nookwu ke bnagwo nu nhne, be jaasa ajiji a n'Obochi ikpe.

³⁷ Kwnornu nū be jeehite n'ikwu-ḡnu i gwnḡsi i nū nye mee mma, hite masi n'ikwu-ḡnu i maa i ikpe.”

*Nhne elekema ke Jona
(Mat 8:11,12; Luk 11:29-32)*

³⁸ Ige wam agwna ele zni iwu nū ele Farisi kanū a, “Nye-zni-nhne, a noopio ḡ whnū nhne elekema n'aka i.”

³⁹ Jizḡsi sarū be, “Ebiri ojo ke naagba ewhere noopio nhne elekema, ḡ zā nhne elekema be jeenye a, okwolem nhne elekema Jona nye ḡwhnurninya.

⁴⁰ Lele kpa Jona daziri ḡbochi ḡto iwhnehnie nū abali nū ruwho aznū, ḡ bū kpa Nnwḡ ke Badnū jaadazī nū rime ḡli ḡbochi ḡto iwhnehnie nū abali.

⁴¹ Ele rukna Ninive joosno ebiri ka lizḡ n'ikpe, be jaama be ikpe, kwnornu nū be tūhnasarnu mkpḡma n'ḡkpo okwo Jona. Kḡvu le, nhne kakwo Jona zī hna.

⁴² Eze nyerinya Seba jeelizo ya nū ele ebiri ka bna n'ikpe, ḡ jaama be ikpe, kwnornu nū o hiri n'ḡsotoma ḡwa va nūrnū akḡnīche Solomḡni. Kḡvu le, nhne kakwo Solomḡni zī hna.

*Rḡnwu ojo hiehnarnu
(Luk 11:24-26)*

⁴³ “Nga rḡnwu ojo hiri nū rime badnū whḡḡa, ḡ zneghari n'ḡli chna chna chna, noopio hne o joozukwa inwe, kḡvu ḡ pīḡhjala,

⁴⁴ ḡ kaa, ‘M jaalahna n'ḡro m hne me hiri whūya.’ Nga ḡ vaduru, ḡ whnū nū ḡ zā nye wu nū rime ḡro wam, nū be zasnarnū a, bīkwata nhne nkari.

⁴⁵ O jeezne chīri rḡnwu ojo ḡsau ibne a ele nwernu risi rikne karū a, be bna wuru nū rime nye wam, ḡnodi ipne-aznū ke nye wam johnasi būjo karū kpa ḡ zī nū mbḡm. ḡ bū kpa ḡ jḡonu n'ebiri ojo ka.”

*Nne Jizḡsi nū rḡmu nne a
(Mak 3:31-35; Luk 8:19-21)*

⁴⁶ Nga ḡ nookwunu agīda ele badnū wam ḡka, nne a nū rḡmu nne a varū gwuzoru n'ederezi noopio o kwunu a ḡka.

⁴⁷ Otu badnū kanū a, “Le, nne i nū rḡmu nne i gwuzogwu n'ederezi noopio i o kwunu i ḡka.”

⁴⁸ Jizḡsi sarū a, “Nyele bū nne m, ele kele bū rḡmu nne m?”

⁴⁹ ḡ ḡḡsnima aka nū hne ele sno apna a zī, kaa, “Anū le nne m nū rḡmu nne m.

⁵⁰ Kwnornu nū nye ḡbula ke jeeme nhne Nda m ke zī n'oligwe noopio, nye wam bū nwene m rukna nū nwene m rinya, nū nne m.”

13

*Elulu nye ḡgha mkpḡru
(Mak 4:1-9; Luk 8:4-8)*

¹ N'ḡbochi wam Jizḡsi whūyaru nū rime ḡro zne daziri ḡli nū ngeri osimini.

² Agīda ele badnū gbakḡru hne ḡ zī, ke kpa-yaru ḡ jiri bna nū rime ḡgbo, daziri ḡli, agīda ele badnū wam gwuzoru nū mkpḡmko ḡli.

³ O jī elulu zī ḡdo n'ḡdo zni be agīda nhne, kaa, “Otu nye ḡrnū ḡkwu znernu agha mkpḡru.

⁴ Nga ḡ naagha, agwna mkpḡru dna nū ngeri apna, rḡmu ḡnunu varū tḡturu be ta.

⁵ Agwna mkpḡru dnarnū n'ḡli rugwu, hne be nwēe agīda rīzna, ngangam mkpḡru wam fuhjari, kwnornu nū be nwēe agīda rīzna.

⁶ Nga ḡnam wasiri, be chnanwū, kwnornu nū be nwēe ḡgwnugwu.

⁷ Agwna mkpḡru berere dnarnū n'esilawūru igwnu, igwnu wam sohja, kpagbu be.

⁸ Agwna mkpḡru berere dnarnū n'ḡli ḡma, be mīi mkpḡru otu riwhu, berere nri isunu, berere nri ḡto.

⁹ Nye nwernu nsnī, ḡ nūrnū.”

*Nhne o kwno tnū elulu
(Mak 4:10-12; Luk 8:9,10)*

¹⁰ Ele sno apna a vakwnusi a, sīkwa a, “Kīni kpayarū i nookwunu be ḡka n'elulu?”

¹¹ Jizḡsi sarū be, “Be mernu anū mahja nhne tugwaru otugwa ke ḡli-eze Chiokike, kḡvu nū ḡ būo be.

¹² Nye ḡbula ke nwernu nhne, be jeenye hnasi ḡ, o jeenwe agīda nhne, kḡvu nye ke nwēe, be jaanahḡru a ḡ bḡbedi ke o nwernu.

¹³ Kam kpayarū, me nḡotnunu be elulu. Be neele anya kḡvu be zā nḡowhnu, be noobno nsnī, be zā ḡḡonu, be jḡḡghohia nhne.

¹⁴ Nhne Azaya nye ḡwhnurninya kwuru gbasiri be mezu nū risi be, ke kwuru, ‘Anū jḡonu kḡḡi, kḡvu anū jḡomuhia rīa rīa, anū jḡowhnu kḡvu anū jḡḡghohia rīa rīa.

¹⁵ Kwnornu nū mkpḡma ele ka gbasninem n'ḡto,

nsnī kḡḡsninem be masi.
Be kḡpsninem anya be,
ma be gharū ḡ jī anya be whnū ḡsno,
gharū ḡ jiri nsnī be nūrnū nhne,

gweru mkpḡma be ghḡhia, ma be tūhnasna,
ma m gwḡ m be.’

¹⁶ Anū bū ele ḡwa ḡma, kwnornu nū anya anū nḡowhnu ḡsno, nsnī anū nḡḡonu nhne.

¹⁷ N'zei me kanū anū, ḡ gwnūrnū agīda ele ḡwhnurninya nū ele ḡma ḡgwu ḡ whnū nhne anū nḡowhnu, kḡvu nū be whnūna, nū ḡ nūrnū nhne anū nḡḡonu kḡvu nū be nūna.

*Risi elulu
nye ḡgha mkpḡru
(Mak 4:13-20; Luk 8:11-15)*

¹⁸ “Anū bnote nsnī ma anū mūhia risi elulu nye ḡgha mkpḡru wam.

¹⁹ Nye ḡbula ke nūrnū ikwu-ḡnu ḡli-eze Chiokike, kḡvu ḡ ghḡhiala a, nye ojo wam va,

nahọru a nhne be kpasịru nụ mkpọma a. Ka bụ mkpuru ke be ghasiri nụ ngeri apna.

²⁰ Mkpuru ke be ghasiri nụ rugwu bụ ele nurnu ikwu-ọnu wam, ngangam be gweru snarnjima nwugwu a.

²¹ Kọvu nụ be nwée ẹgwugwu nụ rime be, be dazị ige matị, nga mmekpẹhni mọbu awnhuwhnu varu kwnornu nụ ikwu-ọnu wam, ngangam, be dnahnala aznu.

²² Mkpuru ke be ghasiri n'elilawuru igwunu bụ ele nurnu ikwu-ọnu wam, kọvu mmekpẹhni ke ọwa ka nụ aghigho ọwhnu ẹkwu n'anya kpagburu ikwu-ọnu wam, ọ buru nhne mīna mkpuru.

²³ Mkpuru ke be ghasiri n'eli buru ọma, bụ ele ke nurnu ikwu-ọnu wam, be ghọhia a, be mīhia mkpuru k'ezī, otu riwhu, ke berere nri isunu, berere nri ẹto."

Elulu achara atna

²⁴ Jizosi tñunu be elulu berere, kaa, "Eli-eze Chiokike nū lele hne badnụ kpasịru mkpuru ọma n'ekwu a.

²⁵ Nga ele badnụ neezni anyarna, nye irno varu kpasị atna n'ekwu wam, la.

²⁶ Nga mkpuru ọma wam fuhiaru, ọ mī mkpuru, atna wam whọru iwihne.

²⁷ Ele izi nye nwe ẹkwu wam wakwusi a, kanu a, 'Nda-aj-kwu, i kpasịla mkpuru ọma n'ekwu i? O zi hnele fuhia atna?'

²⁸ "O kanu be, 'Ka bụ aka ẹru nye irno.'

²⁹ "Ele izi a sịkwa a, 'I pioru a zne whome be?'

³⁰ "O kanu be, 'Ọza! O zi kpa anu zi noowho atna anu whokota ikpa.

³¹ Anu gharu be lawuru sokota du ige o gwe nhne n'ekwu, nga wam, m jaakanu ele neegwe nhne n'ekwu be beru ọsno whome atna wam, kpukota be n'okwukwu, kpo be bekwnu. Kọvu anu chibna ikpa wam n'obna m.' "

Mkpuru mositadi nu nhne whu bredi

(Mak 4:30-34; Luk 13:18-21)

³¹ Jizosi tñunu be elulu berere, kaa, "Eli-eze Chiokike nū lele mkpuru isisi be kwu mositadi, ke badnụ kpasiri n'ekwu a.

³² O bụ n'ezī nū ọ zī matī kakwo kpakara mkpuru, ọ ghọ isisi kakwo kpakara nhne be kpasiri n'ekwu, ke ọnuu oligwe naava nọonu alikwu nū nkala a."

³³ O tñunu be elulu berere, kaa, "Eli-eze Chiokike nū lele nhne whu bredi, ke nyerinya gweru gwasī nū rime agida ikpa, tem kpakara a whu."

³⁴ Kpakara ikwu-ọnu ka bụ ke Jizosi kwunnu igbudu badnū n'elulu. O kwugene be ikwu-ọnu hne o jile elulu.

³⁵ "Ka bụ ma nhne be kwuru hite n'onu nye ọwhnurninya mezu, ke karu, 'M jookpume ọnu m tñu elulu, m jaakahia nhne be bigwaru abigwa ke nga ọwa panizoru.' "

Jizosi kowamarnu risi elulu achara atna

³⁶ Nga ọ ghasaru igbudu badnū wam, ọ bna nū rime ọro. Ele sno apna a vakwnusiri a, naakaa, "Kọwanu aj risi elulu atna wam zī n'ekwu wam."

³⁷ O kaa, "Nye naagha mkpuru ọma bụ Nnwọ ke Badnū.

³⁸ Ẹkwu bụ ọwa, mkpuru ọma wam bụ rumu ẹli-eze Chiokike, kọvu atna wam bụ ele ke nye ojo wam.

³⁹ Nye irno wam ke kpasiri be bụ Ek-wensu, ogwe nhne n'ekwu bụ okwukwo ọwa, ele wam neegwe nhne n'ekwu bụ ele enine izi.

⁴⁰ Lele kpa be nookpnokota atna wam nọokpo be bekwnu, ọ bụ kpa ọ jaazī n'okwukwo ọwa.

⁴¹ Nnwọ ke Badnū jeezihala ele enine izi a, be chikota n'eli-eze a kpakara ele naak-pahia aruru-eli nū ele neeme mmehie.

⁴² Be jootubna be n'okne bekwnu wam hne be jaazī naakwina ẹkwana, naata rukwnurnu-ize.

⁴³ Ige wam ele mee mma joonwu lele ẹhnam n'eli-eze Chiokike Nda be. Nye nwernu nsnī, ọ nurnu.

Elulu ẹto

⁴⁴ "Eli-eze Chiokike nū lele ẹkwu be bigwaru n'ekwu, ke otu badnū whnurnu. O gweru nhne kpusnime a, gweru snarnjima la, re kpakara nhne ọ nwernu, zuru eli wam.

⁴⁵ "Eli-eze Chiokike nū lele nye mgbama-ahia noopio palī ọma.

⁴⁶ Nga ọ whnurnu otu palī gburu okne ọnu, o zne re kpakara nhne o nwernu, zuru a.

⁴⁷ "Berere kwno ẹli-eze Chiokike nū lele igbo be wusiri nū rime osimini, ke gburu agida aznū zī ọdo n'odo.

⁴⁸ Nga o jiru, be dōhia a nū mkpomkpo ẹli, daziri ẹli hōsi aznū ele ke buru ọma nū rime nhne, tuwhume aznū ele ke bụo ọma.

⁴⁹ O bụ kpa ọ jaazī n'okwukwo ke ọwa, ele enine izi jootuhya, kewahia ele ojo n'ehni ele mee mma.

⁵⁰ Be jootubna ele ojo n'okne bekwnu, hne be jaazī naakwina ẹkwana, naata rukwnurnu-ize."

⁵¹ Jizosi sịkwaru be, "Anu ghohiaru kpakara nhne ka?'

Be kaa, "Owe."

⁵² O kanu be, "Nye zni iwu obula be znirni apna ẹli-eze Chiokike, nū lele nye nwe ọro nye hiri n'ekwuna a neegwehija nhne ikne nū nhne oknani."

Be juru Jizosi nu Nazareti (Mak 6:1-6; Luk 4:16-30)

⁵³ Nga Jizosi tñukworu elulu, o hiri nū pji whoga.

⁵⁴ Nga ọ varu n'eli ke aka a, neezni nhne n'oro ọgbako be, ke kpararu nhne o znirni

duru be ɛhni, be kaa, “Ndaa hne nwerukna ka nweh̄iaru akoniche n̄u ɛrnu ndu-ɛhni ka?”

⁵⁵ Nyerukna ka ɔ b̄uɔ nnw̄o omenka aɪ? Ɔ b̄uɔ nne a b̄u nye be kwu Meri n̄u r̄umu nne a rukna, Jemisi, n̄u Josef̄u, n̄u Saɪmoni n̄u Judasi?

⁵⁶ R̄umu nne a rinya be z̄ia n'ɛsilaw̄uru aɪ? Ndaa hne nwerukna ka nweh̄iaru kpakara nhne ka?”

⁵⁷ Be we ovu ɛhni megidne a.

Kov̄u Jiz̄osi kan̄u be, “Okwolem n̄u ɛli ke a n̄u ezi-n̄u-oro a b̄u hne nye ɔwhnurninya nw̄ee ɔso anya.”

⁵⁸ Ɔ nr̄una aḡida ɛrnu ndu-ɛhni n̄u p̄i kwnornu n̄u be nw̄ee ɔkwnata mkp̄oma.

14

Enwu Ɔoni Nye W̄u Mini

(Mak 6:14-29; Luk 9:7-9)

¹ N'ige wam Eze Er̄odu nye n̄echi Galili n̄urnu ɔtnutnu gbas̄iri Jiz̄osi.

² Ɔ kan̄u ele neeznenu a izi, “Nyerukna ka b̄u Ɔoni Nye W̄u Mini, o hilem n'ɛnwu lizo, ɔ b̄u nhne mernu o nwernu rikne ka o ji n̄ornu ɛrnu ndu-ɛhni.”

³ N'ige wheru ewhe Er̄odu nw̄ugwuru Ɔoni, kne a eriri, yisi a n'oro ikelu kwnornu n̄u Erodiasi nnwerne Filipu wnene a rukna.

⁴ Kwnornu n̄u Ɔoni kann̄u a, “Ɔ b̄uɔ ɔma n'iwu ɔ l̄u nnwerne nwene i.”

⁵ Er̄odu pioru o gbu a, kov̄u ɔ t̄uru ogw̄nu ele Ju, kwnornu n̄u be kwegwu Ɔoni b̄u nye ɔwhnurninya.

⁶ Nga ɔbochi ochenwanya ɔmumu Er̄odu duru, nnw̄o rinya Erodiasi neetne eri n̄u ruwhnu be, ɔ s̄oru Er̄odu n'onu k'ezi,

⁷ o kwe a mkwna, kwesi a rikne n̄u o jeenye a nhne ɔbula o j̄orio.

⁸ Nne a zni a ezni ɔ kaa, “Nyee m risi Ɔoni Nye W̄u Mini n'agb̄uga hna.”

⁹ O gburu eze igbugbu n̄u mkp̄oma, kov̄u kwnornu n̄u mkwna wam o kweru, n̄u ele ya n̄u be daz̄i neeri wiri, ɔ kar̄u be nyee a.

¹⁰ O zizne be gbuh̄ja risi Ɔoni n'oro ikelu.

¹¹ Be vuya risi a n'agb̄uga, nyee nnw̄o rinya wam, o nyee a nne a.

¹² Ele sno apna Ɔoni va, wuru iznu a, li a, be zne kan̄u Jiz̄osi nhne mernu.

Jiz̄osi nyernu pokwu

badn̄u isne wiri

(Mak 6:30-44; Luk 9:10-17; Ɔon 6:1-14)

¹³ Nga Jiz̄osi nr̄nu a, o hiri n̄u p̄iam wh̄oga, ya n̄u nsn̄unu a bna n'ogbo zne hne kor̄u owu. Kov̄u ele badn̄u pioh̄iaru hne ɔ z̄i, be hi n̄u kpakara ɛli-ɔhna wam snornu a n'ochi ɛli.

¹⁴ Nga Jiz̄osi wh̄yaru n'ogbo whn̄u aḡida badn̄u, ɔ ɔonu be obirizi, gw̄o ele ke naarīa nr̄ria.

¹⁵ Nga ɔ duru ogbednachi, ele sno apna a vakwnusiri a, kaa, “Hna kogwu owu, ɔbochi

zneminem, zila ele ka ma be zne n̄u rime ɛli-ɔhna zne z̄uru nhne oriri.”

¹⁶ Jiz̄osi kan̄u be, “Ɔ z̄ila mkpa n̄u be jaala, an̄u nyee be nhne be jeeri.”

¹⁷ Be kan̄u a, “Nhne a nwernu hna kwolem ike br̄edi isne n̄u azn̄u law̄uru.”

¹⁸ Jiz̄osi kan̄u be, “An̄u ch̄yanu m be hna.”

¹⁹ Ɔ kan̄u kpakara igbudu badn̄u wam daz̄iri ɛli n'olu achara. O gweru ike br̄edi isne n̄u azn̄u law̄uru wam, le anya n'oligwe, t̄u mmamma, nyawama be, nyee ele sno apna a, be gweru a nyee igbudu badn̄u wam.

²⁰ Kpakara be ri, riji ruwh̄o, ele sno apna a t̄utukota ruvnuruvnu ke gwnarn̄u agwna, ke jih̄iaru nk̄ita nri n̄u nk̄ita law̄uru.

²¹ Ele riri wiri wam b̄u pokwu ele rukna isne, be gweme ele rinya n̄u r̄umu tak̄iri.

Jiz̄osi znernu izne

n'olu mini

(Mak 6:45-52; Ɔon 6:15-21)

²² Ngangam Jiz̄osi kan̄u ele sno apna a be bna n'ogbo, beru a ɔsno whe aka osimini kiyari, ma o zila igbudu badn̄u wam.

²³ Nga o zilakworu igbudu badn̄u wam, o pnezne n'olu rugwu n̄u nsn̄unu a zne kpe okpukpe. N'ige ogbednachi, ya n̄u nsn̄unu a z̄i p̄iam.

²⁴ Kov̄u n̄u ogbo wam z̄i ikere n'olu osimini, abaka-mini z̄i noovu a, kwnornu n̄u ruwhere neewhegidne a.

²⁵ Kov̄u n'onu ɔsisi, Jiz̄osi neezne izne n'olu mini ma ɔ vakwnusi be.

²⁶ Nga ele sno apna a whn̄urnu a, hne o neezne izne n'olu mini, mkp̄oma whuru be, be t̄u ogw̄nu, si okokoba n̄u ɔ b̄u r̄enwu.

²⁷ Ngangam Jiz̄osi kan̄u be, “Mkp̄oma si an̄u rikne, ɔ b̄u mawa. An̄u t̄uko ogw̄nu.”

²⁸ Pita sa a, “Nyenwe aɪ, ɔ b̄uru n̄u ɔ b̄u jiwa, kan̄u m me vakwnusi i n'olu mini.”

²⁹ Jiz̄osi kan̄u a, “Vaa.”

Pita hi n'ogbo hiedna, zne izne n'olu mini, neeznekwnusi Jiz̄osi.

³⁰ Kov̄u nga ɔ whn̄urnu okne ruwhere, ɔ t̄u ogw̄nu, bete neemi, o siwama, “Nyenwe aɪ, zn̄ohia m.”

³¹ Ngangam Jiz̄osi d̄osnihala aka a, nw̄ugwuru a, kan̄u a, “Nye ɔkwnata mkp̄oma mat̄i, k̄ini kpayar̄u i jiri nwe mkp̄oma law̄uru?”

³² Nga be bnarn̄u n̄u rime ogbo, ruwhere wam whebiri.

³³ Ele z̄i n̄u rime ogbo wam var̄u kp̄onu a risi ɛli, be naakaa, “N'ez̄i, i b̄u Nnw̄o Chiokike.”

Jiz̄osi gw̄oru ele nr̄ria

n'eli Genezareti

(Mak 6:53-56)

³⁴ Nga be wheru azn̄u mini wam, be va du n'eli Genezareti.

³⁵ Ele rukna ẹli wam mahjaru Jizosi, be zihala nu kpakara ẹli kwuyan a ele nriria.

³⁶ Be rjasno a ma be kpatu onu iwo a aka kpoi. O gworu kpakara ele kpaturu onu iwo a aka.

15

*Omen'eli ke ele mbom
(Mak 7:1-13)*

¹ Nga ele Farisi nu ele zni iwu ele Ju hiri nu Jeruselem vakwnusi Jizosi, be sikwa a,

² "Kini kpararu ele sno apna i za naabita omen'eli ele mbom? Be za nokwo aka hne be ri wiri."

³ Jizosi saru be, "Kini kpararu anu za naabita nhne Chiokike nyernu n'iwu kwnornu omen'eli anu?"

⁴ Chiokike karu, "Sobisinu nda i nu nne i," nu "Nye obula ke jovu nda a mabu nne a onu, be gbu a."

⁵ Kovu anu karu nu nye obula ke jaakanu nda a mabu nne a, "Nhne i jeerija n'aka m bu nkesi me nyernu Chiokike,"

⁶ o zima mkpa nu o josobisinu nda a mabu nne a rja rja. Anu neeme ikwu-onu Chiokike nhne etekne kwnornu omen'eli anu.

⁷ Ele ruwhnu lawuru, Azaya nye owhnurninya kwuru ezi oka gbasiri anu nga o kwuru,

⁸ Ele ka ji mgbele-onu etekne nosobisinu m, kovu nu mkpoma be zi ikere nu hne me zi.

⁹ Be nokponu m risi eli n'etekne, be neezni nhne badnu nyernu n'iwu lele nu o bu iwu Chiokike."

*Nhne neemeru badnu
(Mak 7:14-23)*

¹⁰ Jizosi sukuru igbuda badnu wam, kanu be, "Anu bnote nsi, anu ghohia masi."

¹¹ O buo nhne bnarnu n'onu badnu bu nhne neemeru badnu, o bu nhne hi n'onu whuya bu nhne neemeru badnu."

¹² Ele sno apna a vakwnusiri a, kanu a, "I mahjaru nu ele Farisi weru ehni nga be nurnu oka wam?"

¹³ Jizosi saru be, "Be joowhohala isisi obula ke Nda m ke oligwe kpasila."

¹⁴ Anu gharu be, be bu ele kpuru isni noodu ele kpuru isni. O buru nu nye isni noodu nye isni, be lawuru jaadabna nu rime olulu."

¹⁵ Pita kanu a, "Kowanu ai risi elulu ka."

¹⁶ Jizosi kanu be, "Anu nwee oghohia du kitna?"

¹⁷ O bu anu ma nu nhne obula ke bnarnu n'onu neezne nu ruwho, be nynohala a nosoro?"

¹⁸ Kovu nu nhne ke hiri n'onu whuya hi nu mkpoma whuya, ka bu nhne ke neemeru badnu.

¹⁹ Kwnornu nu hite nu rime mkpoma bu hne kpakara oriri ojo hi nowhuya, ogbu badnu, ome oyi, ogba ewhere, oznu buznu, akebne aghalaghala nu oka ele berere.

²⁰ Nhne ele ka bu nhne meru badnu, kovu o ri wiri n'aka kwoge okwo meru badnu."

*Okwnata ovu otu nyerinya
(Mak 7:24-30)*

²¹ Jizosi hiri nu piam whoga, zne n'eli Taya nu Sajdoni.

²² Otu nyerinya Kena, nye eli wam, whuyaru, siwama, "Nyenwe ai, Nnwọ Devidi, donu m obirizi, renwu ojo nwugwusi nnwo m rinya aka rikne."

²³ Jizosi sala a nhne obula. Ele sno apna a vakwnusi a, rjasno, kaa, "Chihala a, kwnornu nu o neesisno ai lulo."

²⁴ Jizosi saru, "Be ziyaru m kwnornu aturu whuru owhu ke ele Izireli kpoi."

²⁵ Nyerinya wam varu kpou a risi eli, kaa, "Nyenwe ai, yisinu m aka."

²⁶ Jizosi saru, "O buo oma o gweru wiri rumu takiri tuhalanu rumu nkita."

²⁷ Nyerinya wam karu, "Owe, Nyenwe ai, kovu nu rumu nkita neeri agwna ruvurunu ke hi nu n'olu ikpechi ele nwe be naadna."

²⁸ Ige wam, Jizosi saru a, "Nyerinya, okwnata mkpoma i hna ezi, o dazinu i lele kpa i pioru." Ngangam, ehni buru nnwo a rinya oma.

Jizosi gworu ele nriria

²⁹ Jizosi hi nu piam whuya, va nu ngeri Osimini Galili. O pnezne n'olu rugwu, daziri eli.

³⁰ Agida ele badnu vakwnusiri a, kwuru ele mgworo, nu ele isni, ele vu oru, nu ele mgbu, nu agida ele naaria nriria zi odo n'odo va. Be kwubita be n'eli n'ochi Jizosi, o gwọ kpakara be.

³¹ Ka kpararu o duru ele badnu wam ehni, nga be whurnu ele mgbu hne be kwuru oka, ele vu oru, ehni buru be oma, ele mgworo neezne izne, nu ele isni whurnu osno. Be ja Chiokike ke Izireli mma.

*Jizosi nyernu pokwu
badnu eno wiri
(Mak 8:1-10)*

³² Jizosi sukuru ele sno apna a, kaa, "M nodonu agida ele badnu ka obirizi, kwnornu nu me nu be dazlam obochi eto kitna, be nwee nhne be jeeri, m jeezila be n'onu etekne, o zi be tubo n'apna."

³³ Ele sno apna a kanu a, "Ndaa hne a jeenwehja bredi n'eli-ikpa ka ke jeeji igbuda badnu ka ruwho?"

³⁴ Jizosi sikwa be, "Anu nwernu ike bredi ele?"

Be saru, "Esau, nu aznu matj ele nu ele."

³⁵ Jizosi kanu igbuda badnu wam be daziri eli.

³⁶ O gweru ike brēdi ɛsau nū aznū wam, tū mmamma, ɔ nyawama be, nyee ele sno apna a, ele sno apna gweru nyee igbudu badnū wam.

³⁷ Kpakara be ri, riji ruwho, be tūtukota ruvnuruvnu ke gwnarnū agwna, nkīta ɛsau jīpiyaru.

³⁸ Ele riri a bū pokwu ele rukna ɛno, be gweme ele rinya nū rūmu takīri.

³⁹ Nga Jizōsi zihalaru ele badnū wam, ɔ bna n'ogbo zne n'eli Magada.

16

Orio nhne elekema

(Mak 8:11-13; Luk 12:54-56)

¹ Ele Farisi nū ele Sadusi vakwnusiri Jizōsi naakpa a iru, kanū a, o gesi be nhne elekema hi n'oligwe.

² O sarū be, “N'ogbednachi, anū naakaa, ‘Ruwhnu oligwe būru ɔma, kwnornu nū oligwe naachna ihie ihie.’

³ N'osisi, anū naakaa, ‘Ruwhnu oligwe būo ɔma tna, kwnornu nū oligwe dugwu ruwhnu naachna ihie ihie.’ Anū magwū kpa be le ɔwa nū ruwhnu oligwe anya gwnū nhne o jooḅu. Kɔvu ndaa kpa anū maa ige ka?

⁴ Ebiri ojo naagba ewhere, noopio nhne elekema, ɔ zā nhne elekema be jeenye anū, okwolem nhne elekema Jona nye ɔwhnurninya.” O gharū be, whɔga.

Nhne whū brēdi ke ele Farisi nū ele Sadusi

(Mak 8:14-21)

⁵ Nga ele sno apna a gawheru nū ngeri kiyari, be chezuru o gweru brēdi.

⁶ Jizōsi kanū be, “Anyā dū anū ɛli, anū neeze nhne whū brēdi ke ele Farisi nū ele Sadusi.”

⁷ Be nɔotnurita n'esilawūru be, naakaa, “O bū kwnornu nū a jīle brēdi.”

⁸ Nga Jizōsi mahjaru a, ɔ kaa, “Ele ɔkwnata ovu matī, kīni kpayarū anū jī nookwu n'esilawūru anū nū anū nwēe brēdi?”

⁹ Anū ghōhia kɔriri, anū chēnwanyana ike brēdi isne ke pokwu badnū isne, nū nkīta ele anū pnojiri?

¹⁰ Mɔḅu nga me keru ike brēdi ɛsau ke pokwu badnū ɛno wam, nkīta ele anū pnojiri?

¹¹ Kīni kpayarū anū ghōhiala nū o būo brēdi hne me naakaa? Kɔvu anū zeru nhne nɔowhu brēdi ke ele Farisi nū ele Sadusi.”

¹² Nga be ghōhiaru nū ɔ kála be ze nhne nɔowhu brēdi, kɔvu be neeze iznizni ele Farisi nū ele Sadusi.

Pita kahiaru nye Jizōsi bū

(Mak 8:27-30; Luk 9:18-21)

¹³ Nga Jizōsi varū n'ɔdoru ɛli Sizaria Fili-paj, ɔ sīkwa ele sno apna a, “Ele badnū be naakaa nū Nnwɔ ke Badnū bū nyee?”

¹⁴ Be kaa, “Agwna be kaa Jōni Nye Wū Mini, ele berere kaa ɛlajja, ele bereri kwno kaa Jerimaya mɔḅu otu nyenum nū rime ele ɔwhnurninya.”

¹⁵ O sīkwa be, “Anū n'iwhuru anū, anū kanū nū m bū m nyee?”

¹⁶ Saīmoni Pita kanū a, “Jī n'iwhuru i bū Karaīsi wam, Nnwɔ Chiokike zī būdnu.”

¹⁷ Jizōsi kanū a, “I bū nye ɔwa ɔma, Saīmoni nnwɔ Jona, kwnornu nū anɔ-ɛhni nū ɔvnarna kpūmennu i ya, okwolem Nda m ke zī n'oligwe.

¹⁸ Me kanū i, nū jī n'iwhuru i bū Pita, ɔ bū n'olu rugwa ka hne me joowu ɔgbako ke m, iknernema ɛnwu jāaka a rikne rja rja.

¹⁹ M jeenye i snambī ke ɛli-eze Chiokike, nhne ɔbula ke i knernū eriri n'ɔwa Chiokike jeekne a eriri n'oligwe, nhne ɔbula ke i tɔmarnu n'ɔwa, Chiokike jootoma a n'oligwe.”

²⁰ Ige wam Jizōsi dɔ ele sno apna aka nū nsnī, be kánukwadia nye ɔbula nū ɔ bū Karaīsi.

Jizōsi kwuru ɔka

gbasiri ɛnwu a

(Mak 8:31--9:1; Luk 9:22-27)

²¹ Hite n'ige wam Jizōsi bete naakanū ele sno apna a nū ɔ jeezneriri Jeruselem, ta agīda awhnūwhnu n'aka ele okno badnū nū ele risi ariohna nū ele zni iwu ele ju, be jooju a, gbu a, n'ɔbochi ke ɛto, o jeehi n'ɛnwu lizo.

²² Pita kwuhala Jizōsi ichne, bete naabnanū a mbna, naakaa, “Chiokike kwé, Nyenwe aī, nhne ka jéeme i.”

²³ Kɔvu Jizōsi tūhnasnarnu kanū Pita, “Zne n'aznū m, Setani, i naadnasninu m apna. Kwnornu nū i neeche echiche lele badnū, ɔ būo lele Chiokike.”

²⁴ Ige wam Jizōsi kanū ele sno apna a, “O būru nū nye ɔbula joosno m n'aznū, o jooju ɛhni a, vuru ɔgba a, sno m.

²⁵ Nye ɔbula ke noopio ɔ dōhia būdnu a, jootuwhu a, kɔvu nye ɔbula ke jootuwhu būdnu a kwnornu m, o jooiohja a.

²⁶ Mbnarna kīni bū nhne badnū jeenwe, ɔ būru nū o rihja kpakara ɔwa n'iru, kɔvu tuwhume būdnu a? Kīni bū nhne badnū jeeji gbanwo būdnu a?

²⁷ Kwnornu nū Nnwɔ ke Badnū jaava n'igwugwu ke Nda a, ya nū ele enine izi a, ige wam o joookwuhnata nye ɔbula ɔgwo ɛru nhne ɔ rnūru.

²⁸ N'ezī, me kanū anū, nū agwna ele gwuzo hna jōonwu ɛnwu tem be whnū Nnwɔ ke Badnū hne ɔ naava chī lele eze.”

17

Onwoghari ke Jizōsi

(Mak 9:2-13; Luk 9:28-36)

¹ Nga ɔbochi isunu whemernu, Jizōsi kwuru Pita, nū Jemisi, nū Jōni nwene a,

yisinu ẹhni a, kwuru be whoga ichne, pne olu rugwu hna n'olu.

² O nwogharị nū ruwhnu be, ruwhnu a noonwu lele ẹhnam, iwo a naachna lele iwhne.

³ Be whn̄rnu Mozizi nū Ẹlajia hne be nū Jizōsi nookwurita ọka.

⁴ Pita kanu Jizōsi, "Nyenwe aḡ, ọ buru ọma a daziri hna, ọ buru nū i jeekwe, a wu ọro-ẹka ẹto hna, otu buru ke i, otu ke Mozizi, otu ke Ẹlajia."

⁵ Nga ọ kpu ọka ka n'ọnu, erumeru oligwe ke chnaga rịchna kpusniri be, otu akp̄iri hiri n'erumeru oligwe wam dna, kaa, "Ka b̄u Nnwọ m me whn̄rnu n'anya, nye nhne a masiri m, anu bnonu a nsni."

⁶ Nga ele sno apna a n̄rnu a, be dna, kpute ruwhnu n'eli, t̄u ogwnu k'agida.

⁷ Jizōsi vakwnusiri be, kpatu be aka, kaa, "Anu lizo, anu t̄u ogwnu."

⁸ Nga be lelizoru anya, ọ z̄a nye be whn̄rnu, okwolem Jizōsi kp̄oi.

⁹ Nga be hiri n'olu rugwu wam hiedna, Jizōsi d̄o be aka nū nsni, kaa, "Ọ z̄a nye anu kanu nhne anu whn̄rnu tem Nnwọ ke Badnu hi n'ẹnwu lizo."

¹⁰ Ele sno apna a s̄ikwa a, "Kini kpyaru ele zni iwu ele Ju jiri kaa nū Ẹlajia jeebe ọsno va?"

¹¹ Jizōsi kanu be, "Ẹlajia jeebe ọsno va n'ez̄i, ọ jaabikwata kpakara nhne.

¹² K̄ovu me kanu anu nū Ẹlajia val̄em, be m̄ahjala a, be mee a kpa o jiri masi be. Ọ b̄u masi kpa be jeeme Nnwọ ke Badnu ta awhn̄whnu n'aka be."

¹³ Ige wam ele sno apna a gh̄ohiaru nū ọ kannu be ọka gbasiri J̄oni Nye W̄u Mini.

*Jizōsi gw̄oru wikoro rukna
(Mak 9:14-29; Luk 9:37-43a)*

¹⁴ Nga be vakwnusiri igbuda badnu wam, otu nyerukna vakwnusiri Jizōsi gbunu a mpnerne ọchi n'eli,

¹⁵ kaa, "Nyenwe aḡ, donu nnwọ m rukna obirizi, ọ naata awhn̄whnu k'agida kwnornu nū ọ naarta akw̄ukwu, agida ige, ọ naadnabna b̄ekw̄nu, agida ige masi ọ dnabna mini.

¹⁶ M kwuyan̄u a ele sno apna i, k̄ovu nū be nw̄ee rikne gw̄o a."

¹⁷ Jizōsi saru be, "Anu ebiri ka nw̄ee ọkwnata mkp̄oma, ele mkp̄oma hiri agh̄i, me nū anu jaadazi d̄u ngele? Me jeesinu anu mkp̄oma d̄u ngele? Anu kwuyan̄u m nnwọ wam hna."

¹⁸ Jizōsi bigb̄o r̄enwu ojo wam, o hi nū rime a wh̄ya, Jizōsi gw̄o nnwọ wam ngangam.

¹⁹ Nga ele sno apna a vakwnusiri a ichne, be s̄ikwa a, "Kini kpyaru a nw̄ene rikne ch̄ihala r̄enwu ojo wam?"

²⁰ Jizōsi kanu be, "Kwnornu nū ọkwnata ovu anu z̄i mati. N'ez̄i me kanu anu, ọ

buru nū anu nwernu ọkwnata ovu hna lele mkp̄uru m̄ositadi, anu jaakanu rugwu ka, 'Hi nū hna zne hne berere,' o jeezne, ọ z̄a nhne jaara ẹhni hne anu zi." [

²¹ K̄ovu nū r̄enwu ojo nū kpa j̄owhoga, okwolem hite n'okpukpe nū ovu ọnu.]

*Jizōsi kwukwnornu
ọka gbasiri ẹnwu a*

(Mak 9:30-32; Luk 9:43b-45)

²² Nga Jizōsi nū ele sno apna a gbak̄oru nū Galili, Jizōsi kanu be, "Be jeegeru Nnwọ ke Badnu resi n'aka ele badnu.

²³ Be joogbu a, k̄ovu n'obochi ke ẹto, o jeehi n'ẹnwu lizo." O gbu ele sno apna a igbugbu k'agida.

Ntu iwai Oro Nso

²⁴ Nga Jizōsi nū ele sno apna a vaduru Kapanom, ele naana iwai ntu Oro Nso Chiokike vakwnusiri Pita, s̄ikwa, "Nye-zni-nhne anu ọ z̄ia n̄otu ntu Oro Nso?"

²⁵ Pita kaa, "Owe, ọ n̄otu."

Nga be bnarnu n'oro, Jizōsi beru ọsno s̄ikwa Pita, "Saimoni, kini b̄u echiche i, ọ b̄u n'aka ele kele hne ele eze ọwa ka naarnu ntu ah̄ia m̄obu ntu risi badnu, n'aka r̄umu be m̄obu n'aka ele izne?"

²⁶ Pita kanu a, "N'aka ele izne."

Jizōsi kanu a, "Ọ buru k̄pam, r̄umu be z̄ila nū rime a.

²⁷ K̄ovu ma a gharu o mee nhne jeewe be ẹhni, zne n̄osimini, t̄usi ar̄i aznu, gweru aznu ọbula beru ọsno wh̄ya, nga i kpumernu ọnu a, i j̄owhnu otu mkp̄uru iwai, gweru a nyee be, ọ buru ke me nū ji."

18

Nyele kakwo ibne a?

(Mak 9:33-37; Luk 9:46-48)

¹ N'ige wam ele sno apna Jizōsi vakwnusiri a, s̄ikwa a, "Nyele kakwo n'eli-eze Chiokike?"

² Jizōsi sukwu otu watakiri, gwuzote a n'esilawuru be.

³ Ọ kanu be, "Me kanu anu ezi ọka, okwolem ma anu t̄uhnasarnu lele r̄umu takiri, anu j̄aabna n'eli-eze Chiokike r̄ia r̄ia.

⁴ Nye ọbula ke jeegwedna ẹhni a lele watakiri ka, nye wam kakwo n'eli-eze Chiokike.

⁵ Nye ọbula ke jaanarnu otu watakiri nū kpa nū r̄ewhna m, nanabnanya m.

Nhne jeeme badnu mehie

(Mak 9:42-48; Luk 17:1,2)

⁶ K̄ovu nye ọbula ke jeeme ma otu nū rime ele mati ka kweh̄iaru nū me mehie, ọ jaakanu a mma o buru be gweru okne rugwu ogwe-wiri nyasi a n'ili, migbu a nū rime osimini.

⁷ Awhn̄whnu jaazinu ọwa kwnornu nū nhne ọrnuna ke neeme ele badnu neeme

mmehie. Ọ zị mkpa nụ ọrnurna jaava, ọvụ awnhwuhnu zīnu nye wam ọrnurna jeehi n'aka a va.

⁸ Ọ bụru nū aka i, mọbu ọchi i, jeeme i, i mee mmehie, bihala a, tuwhume a, ọ kanụ i mma i bna nū bụdnu bụru nye mgworo mọbu vuru ọru, karu ọ nwernu aka lawuru mọbu ọchi lawuru be tūbna i nū bẹkwnu ẹli rēnwu chnī echni.

⁹ Ọ bụru masi nū anya i jeeme i, i mee mmehie, gweme a, tuwhume a, ọ kanụ i mma i bna nū bụdnu nwernu otu anya, karu ọ nwernu anya lawuru be tūbna i nū bẹkwnu ẹli rēnwu.”

*Elulu atnuru whuru owhu
(Luk 15:3-7)*

¹⁰ Anụ whnū nū anụ zia neeledna otu nū rime ele matị ka anya, kwnornu nū me kanu anụ, n'oligwe ele enine izi be nọowhnu ruwhnu Nda m ke zị n'oligwe anya ige ọbula.

[¹¹ Kwnornu nū Nnwọ ke Badnū varu ọ znohia ele whuru owhu.]

¹² Kini bụ echiche anụ? Ọ bụru nū badnū nwernu otu riwhu atnuru, otu nū rime be kpawhu ọri, ọ jáaghasa nri tolu nū tolu kiyari n'olu rugwu, zne noopio ke kpawhuru ọri?

¹³ Me kanu anụ ezi ọka, nga ọ piohuru a, ọ jounwudna nū risi a karu nū risi nri tolu nū tolu wam whule owhu.

¹⁴ Kpam masi, ọ bụo echiche Nda anụ ke zị n'oligwe, nū otu nū rime ele matị ka joowhu etekne.

*Nga nwene i mernu i nhne ojo
(Luk 17:3)*

¹⁵ “Berere, ọ bụru nū nwene i mee i nhne ojo, zne kanu a nhne ọ mernu i n'esilawuru ji nū ya kpọi. Ọ bụru nū ọ nurnu nhne i karu, i rihalam nwene i n'iru.

¹⁶ Ọvụ ọ bụru nū ọ nuna, kwuru otu badnū mọbu badnū lawuru yisinu ẹhni i, ọka ọbula be kwuru jọburu nhne ele akebne lawuru mọbu ẹto jeemesi rikne.

¹⁷ Ọ bụru nū ọ kwéle ọ bnonu be nsni, kanu ọgbako Chiokike. Ọ bụru nū ọ bnođe ọgbako Chiokike nsni, gweru a lele nye máa Chiokike mọbu nye ọna ntụ.

¹⁸ “Me kanu anụ ezi ọka, nhne ọbula ke anụ jeekne eriri n'owa, Chiokike jeekne a eriri n'oligwe, nhne ọbula ke anụ jootoma n'owa, Chiokike jootoma a n'oligwe.

¹⁹ “Berere, me kanu anụ, ọ bụru nū anụ badnū lawuru kwerikota nū nhne ọbula anụ rjoru n'owa, Nda m ke zị n'oligwe jeemezunu anụ ya.

²⁰ Kwnornu nū hne badnū lawuru mọbu ẹto gbakoru nū rēwhna m, m zị m hnam n'esilawuru be.”

Elulu ọhi ke nwée mkpoma obirizi

²¹ Pita vakwnusiri Jizosi sịkwa a, “Nyenwe ai, mgba ele bụ hne nwene m jeemehie megidne m, m gbarunu a? Dụ mgba ẹsau sa?”

²² Jizosi kanu a, “M kágene m ji dụ mgba ẹsau, ọvụ dụ nri ẹsau mgba ẹsau.

²³ Kam kpararu, be jeeji ẹli-eze Chiokike neesninu otu nye eze, nye pioru ma ya nū ele ọhi a pjakota iwai.

²⁴ Nga ọ beteru naapia, be kwuyanụ a otu badnū ke ji a nri pokwu talenti.*

²⁵ Ọvụ nū kpa ọ nwée rikne nọokwu ọgwo ọ ji, nyenwe a karu be re ya nū nnwerne a nū rumu a, nū kpakara nhne ọ nwernu, ma be kwuhkata ọgwo ọ ji.

²⁶ “Ọhi wam dnarnu n'ẹli kpọnu a risi ẹli, kaa, 'Nyenwe m, knatanu m mkpoma, m jookwuhkata i kpakara nhne me ji i.’

²⁷ Nyenwe ọhi wam ọnu a obirizi, ọ sigbasi a, gbarunu a ọgwo ọ ji a.

²⁸ “Ọvụ nū ọhi wam whogaru, whnū otu nū rime ọhi ibne a, ke ji a otu riwhu mkpuru iwai, ọ nwgwusi a rikne, whatasi a n'akpiri, naakaa, 'Kwuhkata m nhne ọbula i ji m.’

²⁹ “Ọhi ibne a dna n'ẹli riasno a, kaa, 'Knatanu m mkpoma, m jookwuhkata i.’

³⁰ “Ọ kwéle, tnunuma, ọ gweru a tūbna a n'oro ikelu, dụ nga ọ jookwuhkata a ọgwo ọ rigwu a.

³¹ Nga ele ọhi ibne a whnuru nhne mernu, ọ gbu be igbugbu k'agida, be zne tnusinunyenwe be kpakara nhne mernu.

³² Ige wam nyenwe ọhi wam sukwuru a, kanu a, 'Ji ọhi ojo, m gbarunu m i kpakara ọgwo wam kwnornu nū i riasnormu m.

³³ Ọ bụ nū i kwésile ọ ọnu ọhi ibne i obirizi, lele kpa me jiri ọnu i obirizi?”

³⁴ Nyenwe be weru ẹhni k'agida, ọ gweru a zizne n'oro ikelu ma be ta a awnhwuhnu dụ nga ọ jookwuhkata kpakara ọgwo ọ jigwu a.

³⁵ “Ọ bụ kpa Nda m ke oligwe jeeme anụ, ọ bụru nū nye ọbula nū rime anụ jáagbarunu nwene a hite nū mkpoma a.”

19

*Ogba nnam
(Mak 10:1-12)*

¹ Nga Jizosi kwukworu ọka ka, ọ hi nū Galili whoga, zne n'ike ẹli Judiya n'aznu Osimini Jodani kiyari.

² Igudu ele badnū snornu a, ọ gwọ be nriria be pji.

³ Agwna ele Farisi vakwnusiri Jizosi, naakpa a iru, kaa, “Ọ bụru ọma n'iwu nyerukna gba nnwerne a nnam kwnornu nū nhne ọbula?”

⁴ Ọ saru be, “Anụ gwnuna nū nye kpuru be hite n'ọpanizo 'kpuru be nyerukna nū nyerinya.’

* **18:24** nri pokwu talenti: ka whuyaru nhne nū lele agida pokwu ndasi mkpuru iwai.

⁵ kaa, ‘Ka kpayarū, nyerukna jaagharu nda a nū nne a, takwnūsi n’ēhni nnwerne a, be lawūru jōoghō otu anō-ēhni?’

⁶ Kam kpayarū, be bīma badnū lawūru, kōvu otu anō-ēhni. Nhne Chiokike knekōtaru, badnū tōmana a.”

⁷ Be sīkwa a, “Kīni kpayarū Mozizi nyernu iwu, kaa be gba ọkwukwo nnam nyee nyerinya, chīhala a?”

⁸ Jizōsi kanū be, “Mozizi kweru ka kwnornu mkpōma ojo anū, kweru anū gba nnwerne anū nnam, kōvu hite nū mbōm, ọ būo kpa ọ zī.

⁹ Me kanū anū, nye ọbula ke jaagba nnwerne a nnam, hne ọ būo nū o neeme ọyi, lūru nnwerne berere, o neeme masī ọyi.”*

¹⁰ Ele sno apna a kanū a, “Ọ būru kpm n’esilawūru nyerukna nū nyerinya, ọ ka mma badnū gharū ọ lū nnwerne mōbu gbō nzi.”

¹¹ Kōvu Jizōsi sarū be, “Ọ būo kpakara badnū jeegweru ọka ka, okwolem ele Chiokike nyernu rikne.

¹² Kwnornu nū agwna ele rukna bū okiri-badnū hite nū rūwhō nne be, ọ zī masī ele badnū ibne be meteru okiri-badnū, ele ke berere bū ele meteru ēhni be okiri-badnū kwnornu ēli-eze Chiokike. Nye nwernu rikne o gweru ọka ka, gweru a.”

Jizōsi goziri rūmu takīri

(Mak 10:13-16; Luk 18:15-17)

¹³ Be kwuyanū Jizōsi rūmu takīri ma ọ tūkwasi be aka a lawūru, kpenu be okpukpe. Kōvu ele sno apna a bigbōru ele kwuyaru be.

¹⁴ Kōvu nū Jizōsi kannū be, “Anū gharū rūmu takīri ma be vakwnusi m, anū bnōsni be, kwnornu nū ēli-eze Chiokike bū ke ele nū kpa.”

¹⁵ Ọ tūkwasi be aka a lawūru, hi nū pī whōga.

Eze wikoro

(Mak 10:17-31; Luk 18:18-30)

¹⁶ Otu nyerukna vakwnusi Jizōsi, sīkwa a, “Nye-zni-nhne, kīni bū nhne ọma me jeeme ma m nwe m būdnu kwó okwo?”

¹⁷ Jizōsi kanū a, “Kīni kpayarū i nēesikwa m nhne gbasīri nhne ọma? Ọ zá nye bū nye ọma okwolem otu badnū, bū Chiokike kpōi. Kōvu ọ būru nū i piuru ọ bna nū būdnu, bīta nhne Chiokike nyernu n’iwu.”

¹⁸ Ọ sīkwa a, “Ndaa iwu kọ?”

Jizōsi kanū a, “I gbúko badnū, i mēko ọyi, i znúko buznu, i gbáko akebne aghalaghala,

¹⁹ sōbisinu nda i nū nne i, i jōwhnu nye agbatibi i n’anya lele ēhni i.”

²⁰ Wikoro wam kaa, “M bītaru m kpakara iwu ele ka. Kīni gwnarnū berere me jeeme?”

²¹ Jizōsi kanū a, “Ọ būru nū i piuru nū i joozu ozu k’ezī, la, re kpakara nhne i nwernu, kesi ele mboni, i jeenwe ẹkwnu n’oligwe, vaa, sno m.”

²² Nga wikoro wam nūru ikwu-ọnu ka, ọ la, naagbaru ruwhnu, kwnornu nū o nwernu ẹkwnu k’agida.

²³ Jizōsi kanū ele sno apna a, “Me kanū anū ezi ọka, ọ jaara ēhni nye nwernu ẹkwnu ọ bna n’ēli-eze Chiokike.

²⁴ Berere kwno, me kanū anū, ọ zīnu anōhia be kwu kamēli ewheke ọ gawhe n’anya alanga, karū nye nwernu ẹkwnu ọ bna n’ēli-eze Chiokike.”

²⁵ Nga ele sno apna a nūru ọka ka, o du kpa be hna ēhni, be sīkwa, “Ndakwanū nye be jōoznohia?”

²⁶ Kōvu nū Jizōsi legidnernu be anya, kanū be, “Nū hne badnū zī be jéemeli a, kōvu be meli kpakara nhne hne Chiokike zī.”

²⁷ Pita sīkwa a, “Le, a sigbasiri kpakara nhne a nwernu snornu i, kīni bū nhne a jeekehja?”

²⁸ Jizōsi kanū be, “Me kanū anū ezi ọka, anū ele sno m, nga Nnwō ke Badnū jaadazī nū ngadna eze ke igwugwu a n’owa ikne wam, anū n’iwuru anū jooosno m dazīri nū ngadna eze nri nū ẹbo neekpe ẹbnurnu nri nū ẹbo ke Izireli ikpe.

²⁹ Nye ọbula ke sigbasiri oro, mōbu rūmu nne rukna mōbu rūmu nne rinya, nda mōbu nne, mōbu rūmu, mōbu ẹkwu, kwnornu nū rēwhna m, o jeekehja otu riwlu nhne ọ sigbasiri, kehja masī būdnu kwó okwo.

³⁰ Kōvu nū agida ele be ọsno jōobu ele ipne-aznū, ele ipne-aznū jōobu ele be ọsno.”

20

Elulu ele ẹrnu ẹkwu vaīni

¹ “Eli-eze Chiokike nū lele otu nyerukna nwernu ẹkwu ke whōgaru n’ọnu ọsisi zne o gno ele ẹrnu jōornunu a ẹrnu n’ẹkwu vaīni a.

² Nga ya nū ele ẹrnu wam kwekōtaru nū ọ jōokwu be otu mkpūru iwai n’ọbochi, o zizne be n’ẹkwu vaīni a.

³ “Ọ whōga masī nū nhne nū lele ọtnu-ige tolu n’ọsisi whnū ele berere nwée nhne be nōornu hne be gwuzogwu n’ederezī ahia.

⁴ Ọ kanū be, ‘Anū zne nū rime ẹkwu vaīni m, nhne dūnnu anū bū nhne me jeenye anū.’

⁵ Be zne. Ọ whōga kwno nhne nū lele ọtnu-ige ke nri nū ẹbo, nū ọtnu-ige ke ẹto n’esilawūru iwnehnie, mee masī otu nhne wam.

⁶ Ọ whōga masī n’ọtnu-ige ke isne n’ogbednachi whnū ele berere hne be gwuzogwu n’ederezī ahia, ọ sīkwa be, ‘Kīni kpayarū anū gwuzogwu hna kpakara ọbochi, ọ zá nhne anū nōornu?’

* 19:9 Ọkwukwo berere kamasīri: *Nye jōolu nyerinya wam nga nzi a gbarū a nnam neeme masī ọyi.*

7 “Be kaa, ‘Kwnornu nù ọ zà nye gnornu aj ẹrnu.’

“Ọ kanù be, ‘Anù zne n’ẹkwu vajini m.’

8 “N’ogbednachi, nye nwe ẹkwu vajini wam kanù nye risi ele ẹrnu o sukwu ele ẹrnu wam, kwù be ọgwo ẹrnu be. Ọ panizo nù ele ipne-aznù dù nù ele be ọsno.

9 “Nga ele be gnornu ẹrnu n’otnu-ige ke isne varù, be nahjaru otu badnù otu mkpuru iwai.

10 Kọvu nga ele be ọsno varù, be cheru nù be jaanahja ke kakwo, be nahja kwno otu badnù otu mkpuru iwai.

11 Nga be nahjaru a, be takponu nye nwe ẹkwu.

12 Be kaa, ‘Ele ipne-aznù ka rnùrnu ẹrnu otu otnu-ige, i kwùru aj nù be otu ọnu iwai, aj bù ele vuru ivu rinya ke ọbochi tna neerne ẹkwu.’

13 “Kọvu ọ sarù nnim nù rime be, kaa, ‘Enyi m, m méhieie m i, me nù ji a kwéoritala nù m jeenye i otu mkpuru iwai?’

14 Gweru ke bù ke i, laba, ọ masiri m me nyee ipne-aznù lele kpa me nyernu i.

15 O kwésile n’iwu me gweru nhne m mee kpa me piuru sa? I neewe ẹhni kwnornu nù m neemenu ele badnù imerne ọma sa?’

16 “Kpam masi, ele ipne-aznù jeebe ọsno, ele be ọsno jọbu ele ipne-aznù.”

Jizọsi kwuru ọka gbasiri ẹnwu a ke mgba eto

(Mak 10:32-34; Luk 18:31-34)

17 Kpa Jizọsi neezne Jeruselem, o kwuru ele sno apna a nri nù ẹbo wam zne ichne nù ngeri apna. Ọ kanù be,

18 “Le, a neezne Jeruselem, be jeegweru Nnwọ ke Badnù nyewhete n’aka ele risi ariohna nù n’aka ele zni iwu ele Ju, be jaama a ikpe ẹnwu,

19 be jeegweru a nyewhete n’aka ele búo ele Ju, be jeeme a nhne mkpari, prnja a nhne, kpogidne a n’ogba, n’ọbochi ke eto, o jeehi n’ẹnwu lizọ.”

Arijo ke nne rọmu Zebidi

(Mak 10:35-45)

20 Nne rọmu Zebidi vakwnusiri a, ya nù rọmu a rukna, kpọnu a risi ẹli, nọorio nhne n’aka.

21 Jizọsi sịkwa a, “Kini nhne i noopio?”

Ọ kanù a, “Kweru rọmu m rukna lawuru ka daziri otu n’akarikwnunga i, otu n’akarita i n’ẹli-eze i.”

22 Jizọsi kanù be, “Anù máa nhne anù nọorio. Anù jọnwoli okiko ke me nọonwo?”

Be kanù a, “A nweru rikne.”

23 Jizọsi kanù be, “Anù jọnwo n’okiko m, kọvu ọ dazị n’akarikwnunga m nù akarita m, ọ búo ke m n’onyega, kọvu nù ọ bù ke ele Nda m bjkwatannu a.”

24 Nga ele sno apna a nri ke gwnarnù nurnu a, o we be ẹhni k’agida kwnornu rọmu nne lawuru ka.

25 Jizọsi sukwukọta be, kanù be, “Anù magwu nù ele risi ele búo ele Ju neeme ele be neechi kpa ọ masiri be. Ele kwu be ji aka rikne neechi ele zị nù mkpururu be.

26 Ọ jáazị kpam n’esilawuru anù. Kọvu nye piuru ọ búru nye kwu n’esilawuru anù, ọ jọbu nye neeznenu anù izi,

27 nye ke piuru ọ búru nye mbọm n’esilawuru anù jọbu ọhi anù.

28 Lele kpa Nnwọ ke Badnù váge ma be znenu a izi, kọvu ma o neeznenu ele berere izi, gweru masi búdnú a nyee ma ọ búru nhne ọgbahia agida badnù.”

Jizọsi gwọru ele isni

(Mak 10:46-52; Luk 18:35-43)

29 Kpa Jizọsi nù ele sno apna a nọowhuya nù Jeriko, agida ele badnù noosno a.

30 Ele rukna lawuru kpuru isni dazigwu nù ngeri apna, nga be nurnu nù Jizọsi neewhe, be si lulo, kaa, “Dọnu aj obirizi, Nyenwe aj, Nnwọ Devidi.”

31 Agida ele badnù wam bigbọru be, kanù be, be kpusti ọnu. Kọvu nù be siwama k’agida, kaa, “Dọnu aj obirizi, Nyenwe aj, Nnwọ Devidi.”

32 Jizọsi gwuzoru, sukwu be, kaa, “Kini bù nhne anù piuru me menu anù?”

33 Be kaa, “Nyenwe aj, a piuru ma i mee ma a whnù ọsno.”

34 Jizọsi dọnu be obirizi, ọ kpatù be aka n’anya, ngangam be beteru ọ whnù ọsno, be snornu a.

21

Jizọsi bnaznenu Jeruselem

(Mak 11:1-11; Luk 19:28-38; Jọn 12:12-19)

1 Nga be vaduru Jeruselem ndundu, be duru Bẹtifagi, ke zị nù Rugwu Olivu, Jizọsi ziznenu badnù lawuru ele sno apna a.

2 Ọ kanù be, “Anù zne nù mgbu matị ke zị nù ruwhnu anù, ngangam anù jọowhnu iyinya be kpọkwnusiri, ya nù nnwọ a, anù tọma be, toyanu m be.

3 Nye sịkwaru anù nhne ọbula, anù kanù a, ‘Be zị Nyenwe aj mkpa,’ ngangam o jeenye anù be.”

4 Ka bù ma nhne be kwuru hite n’ọnu nye ọwhnurninya mezu,

5 “Kanù ele Zayoni, ‘Le, eze i naavakwnusi i, ọ bù enwerne badnù,

ọ dazigwu n’olu iyinya, n’olu nnwọ iyinya.’”

6 Ele sno apna a zne mee kpa Jizọsi nyernu be iwu.

7 Be toya iyinya wam nù nnwọ a, wukwasi be iwo be, Jizọsi daziri n’olu be.

⁸ Igbudu ele badnu gbata iwo be n'apna, ele berere gbubihiaru nkala isisi, tusa be n'apna.

⁹ Igbudu badnu ele neezne nu ruwhnu a nu ele snogwu a, neesi lulo, naakaa,

“Ozana* zinu Nnwọ Devidi!

Chiokike gozi nye naava nu rewhna Nyenwe ai,

Ozana nu hne kakwo n'olu.”

¹⁰ Nga o bnanyarnu nu Jeruselem, kpakara eli-ohna mernu imerne, naakaa, “Nyele bu nyerukna ka?”

¹¹ Igbudu ele badnu wam naakaa, “Nyerukna bu Nye Owhnurninya wam, Jizosi ke hi nu Nazaręti ke Galili va.”

Nhne Jizosi mernu

n'Oro Nso Chiokike

(Mak 11:15-19; Luk 19:45-48; Jon 2:13-22)

¹² Jizosi bna n'Oro Nso Chiokike chihala ele neere, nọozu ahia n'Oro Nso. O kpute ikpechi kpakara ele naagbanwo iwai ruwhnu n'eli, nu ngadna ele neere nduru.

¹³ Ka nu be, “Be gbaru a n'okwukwo nso, kaa, “Be jookwu oro m oro okpukpe,” kovu nu anu mernu a o buru obna ele buznu.”

¹⁴ Ele isini nu ele mgworo vakwnusi a n'Oro Nso, o gwọ nriria be.

¹⁵ Kovu nga ele risi arjohna nu ele zni iwu ele Ju whnurnu kpakara ernu ndu-ehni o nornu, nu rumu takiri neesi okokoba n'Oro Nso, naakaa, “Ozana zinu Nnwọ Devidi,” o we be ehni k'agida.

¹⁶ Be sika a, “I nurnu nhne rumu takiri ka nookwu?”

Jizosi kanu be, “Owe! Anu gwnuna nhne okwukwo nso kwuru,

‘Hite n'onu rumu takiri nu rumu nonwo rema,

i mernu oznarni dna odna.”

¹⁷ O gharu be, whoga, zne Betani, daziri chi bo.

Jizosi vuru isisi

be kwu figi onu

(Mak 11:12-14,20-24)

¹⁸ N'osisi, nga Jizosi hiri nu Betani naala Jeruselem, wiri gwnurnu a.

¹⁹ Nga o whnurnu isisi figi n'apna, o vadu a ehni, kovu o whnuna mkpuru obula n'olu a, okwolem okwukwo budnu kpoi, o kanu isisi wam, “Mkpuru miko n'olu i tim tom.” Isisi figi wam kponwu ngangam.

²⁰ Nga ele sno apna a whnurnu a, o duru be ehni, be kaa, “Ndaa kpa isisi ka jiri kponwu ngangam?”

²¹ Jizosi saru be, “Me kanu anu ezi oka, o buru nu anu nwernu okwnata mkpoma, nwee mkpoma lawuru, o buo nhne be mernu isisi figi ka bu nhne anu jeemeli dai, kovu o buru

nu anu jaakanu rugwu ka, ‘Lizo, dnabna osimini,’ o jeeme.

²² Kpakara nhne obula anu jorio n'okpukpe, anu jaanahia, o buru nu anu nwernu okwnata mkpoma.”

Rikne Jizosi

(Mak 11:27-33; Luk 20:1-8)

²³ Nga o bnanyarnu n'Oro Nso Chiokike, ele risi arjohna nu ele okno badnu ele Ju vakwnusiri a. Nga o neezni nhne, be sika a, “Rikne kini bu nhne i ji neeme nhne i neeme? Nyele nyernu i rikne i ji neeme kpakara nhne ka?”

²⁴ Jizosi saru be, “M jaasika anu otu aiji, o buru anu sa m, m jaakanu anu rewhna rikne me ji neeme kpakara nhne ka.

²⁵ Owu mini Joni o hi hnele va? O hi n'oligwe sa, mibu n'aka badnu?”

Be kwu a n'esilawuru ehni be, kaa, “O buru nu a kaa, ‘O hiri n'oligwe,’ o jaasika ai, ‘Kini mernu anu kwela a?”

²⁶ Kovu o buru a kaa, ‘O hi n'aka badnu,’ a notu ogwnu ele badnu ka, kwnornu nu kpakara badnu kweru nu Joni bu nye owhnurninya.”

²⁷ Be saru Jizosi, “A ma.”

Jizosi kanu be, “M jaaka masinu anu rewhna rikne me ji neeme kpakara nhne ka.”

Elulu rumu rukna lawuru

²⁸ Jizosi kanu be, “Kini bu nhne anu naari? Otu nyerukna nwernu rumu rukna lawuru, o znekwnusi ke mbom, kanu a, ‘Nnwọ m, zne ernu tna n'ekwu vaini m.’

²⁹ “O kaa, ‘M jeezne,’ omekwo, o tūhnasna mkpoma zne.

³⁰ Nda be znekwnusi ke ebo, kwu otu nhne wam, ke ebo kaa, ‘M jeezne, nyenwe m,’ kovu nu o znege.

³¹ “Nyele nu rime be lawuru mernu nhne nda a pioru?”

Be kaa, “Nye ke mbom.”

Jizosi kanu be, “Me kanu anu ezi oka, nu ele ona ntụ nu ele naagba ewhere jeebe anu osno bna n'eli-eze Chiokike.

³² Kwnornu nu Joni varu gesi anu apna ome mma, anu kwela, kovu ele ona ntụ nu ele naagba ewhere kweruru. Nga anu whnurnu a, anu tūhnasana mkpoma, kweru a.

Elulu ele ernu ekwu vaini

(Mak 12:1-12; Luk 20:9-19)

³³ “Anu nurnu elulu berere, otu nyerukna zi ke nwernu ekwu, o kparu vaini. O gba a mgbugba gburugburu, gwu igbodo hne be jaazi nọozosna manya nu rime a, wu masi oro olu ele nse nu rime a. O gweru ekwu wam yisi n'aka ele jeelekota a, whoga zne n'eli berere.

* 21:9 N'ikwu-onu ele Hiburu, Ozana bu Zophial

³⁴ Nga ige ọ ghọ mkpuru duru, o ziznenu ele izi be znekwnusi ele ọnu ẹkwu wam, nahja be mkpuru ke dunnu a.

³⁵ "Ele ọnu ẹkwu wam nwugwu ele izi wam, pnja otu nhne, gbu otu, lo kwno ke berere akaworugwu.

³⁶ O zizne kwno ele izi berere ke kakwo ele ke mbom, be mee kwno be kpam.

³⁷ N'ipne-aznu o ziznenu nnwo a, kaa, 'Be jiosobisinu nnwo m.'

³⁸ "Kovu nga ele ọnu ẹkwu wam whnurnu nnwo wam, be gba iznuznu, kaa, 'Ka bu nye jeeri mkpe nye nwe ẹkwu ka, anu va ma a gbu a, ri mkpe a.'

³⁹ Be nwugwu a, gwehala a n'aznu ẹkwu vai ni wam, gbume a.

⁴⁰ "Nga nye nwe ẹkwu vai ni wam varu, kini bu nhne o jeeme ele ọnu ẹkwu wam?"

⁴¹ Be kanu a, "O jeeme ele oju wam nwu ẹnwu oju, gweru ẹkwu vai ni a nyewhete n'aka ele ọnu ẹkwu berere ele jeenyehnata a mkpuru a n'ige a."

⁴² Jizosi kanu be, "Anu gwnuna nhne be gbaru n'okwukwo nsọ,

'Akaworugwu ke ele noowu ọro juru, kiyam ghlam risi nsukala ọro.

Ka bu ọnu Nyenwe ai, o bu nhne ndu-ehni n'anya ai.'

⁴³ "Me naakanu anu nu be jaanahoru anu eli-eze Chiokike, nyewhete ele berere ke jaami mkpuru a. [

⁴⁴ Nye obula ke jaadnakwasi akaworugwu ka, jaagbawa ibekala ibekala, kovu nye obula ke akaworugwu ka jaadnakwasi, o jeegweri a lele retnu.]"

⁴⁵ Nga ele risi arjohna nu ele Farisi nurnu elulu ele ka, be mahiaru nu o nookwu oka gbasiri be.

⁴⁶ Be noopio kpa be jeeji ọowugwu a, kovu nu be turu ogwnu igbudu badnu wam, kwnornu nu be gweruru a nu nye ọwhurninya.

22

*Elulu ọlulu nnwerne
(Luk 14:15-24)*

¹ Jizosi tukwnonu be elulu berere, kaa,

² "Be jeeji eli-eze Chiokike sninu otu nyerukna bu eze, ke mennu nnwo a rukna iriri ọlu nnwerne.

³ O zihala ele izi a be sukwu ele be ziri va n'iriri ọlu nnwerne wam. Kovu be kwéle o va.

⁴ "O zihala ele izi a berere, kaa, 'Kanu be nu m mekwatalam nhne iriri, be gbulem kpakara okne ehni m nu rumu nnwo ehni m be znurnu oznu, be mekwakwolem kpakara nhne, anu vanu m iriri ọlu nnwerne.'

⁵ "Kovu nu be lewhuru a anya, znenu ke be, otu nyenum n'ekwu a, ke berere n'ọnu a.

⁶ Ele gwnarnu nwugwu ele izi a mee be nhne iwhnerne, gbu be.

⁷ Eze wam weru ehni k'agida, o zizne ele ogwnu a, be zne gbumekwo ele ogbu badnu wam, kpo eli-ohna be bekwnu.

⁸ "O kanu ele izi a, 'M bjkwatakwolem nhne iriri ọlu nnwerne, kovu nu ele me sukwuru kwésile.

⁹ Anu zne nu kpakara ngeri apna, sukwu kpakara badnu anu whnurnu, be va ri wiri ọlu nnwerne ke m.'

¹⁰ Ele izi wam whoga n'apna, sukwu kpakara badnu be whnurnu, kpa be hna, ma ele oju ma ele oma, ọro ọlu nnwerne wam jipiyaru nu badnu.

¹¹ "Kovu nga eze wam bnanyarnu o lesi ele izne wam, o whnurnu otu nyerukna ke woge iwo ọlu nnwerne.

¹² O sika, 'Enyi m, ndaa kpa i jiri bnanya hna ma woge iwo ọlu nnwerne?' Onu snirni a.

¹³ "Ige wam eze kannu ele izi a, 'Anu kne a eriri ochi nu aka, gwehala n'ederezi, bita a n'ochichiri hne be jaazi naakwna ẹkwna, naata rukwnurnu-ize.'"

¹⁴ N'ochikota kpakara nhne n'otu, Jizosi kaa, "Be sukwuru agida badnu, kovu nu ele be hohiaru zi ele nu ele."

Otu ntụ-eli

(Mak 12:13-17; Luk 20:20-26)

¹⁵ Ige wam ele Farisi znenu gba iznuznu kpa be jeeme ma o hite n'ikwu-ọnu gbu nu mbita be.

¹⁶ Be ziznenu a ele sno apna be nu ele dagwnu Erodu, kaa, "Nye-zni-nhne, a magwu nu i bu nye ezi oka, nye neezni apna Chiokike n'ezi oka, nu i so badnu anya kwnornu nu i le badnu anya nu ruwgnu.

¹⁷ Kanu ai, kini bu echiche i, o buru oma n'iwu a tu ntụ nyee Siza, sọbu o buo oma?"

¹⁸ Kpa Jizosi magwu nhne oju be vu nu mkpoma, o sika be, "Ndaa nhne anu kwno naakpa m iru, ele ruwgnu lawuru ka?"

¹⁹ Anu gesi m mkpuru iwai ntụ." Be gweyanu a otu mkpuru iwai.

²⁰ O sika be, "Nyele nwe ruwgnu ka nu rewhna be gbakwasiri a?"

²¹ Be kaa, "Siza nwe."

O kanu be, "Anu nyee Siza nhne ke Siza, nyee masi Chiokike nhne ke Chiokike."

²² Nga be nurnu a, o duru be ehni, be whoga, gharu a lahna.

Ajji gbasiri olizo n'enwu

(Mak 12:18-27; Luk 20:27-40)

²³ N'obochi wam masi, ele Sadusi vakwnusiri a, ka bu ele karu nu olizo n'enwu zila. Be sika a,

²⁴ "Nye-zni-nhne, Mozizi karu, 'O buru nu nyerukna nwu, nwée rumu, nwene a rukna jooluru nnwerne a mubahanu nwene a rukna rumu.'

²⁵ Kĩtna, rụmụ nne rukna ẹsau nụ aj wuru hna, ke mbòm luru nnwerne, nwụma nwée nnwọ, ọ sigbasinu nwene a rukna nnwerne a.

²⁶ Otu nhne wam mernu nwene a rukna ke ẹbo, nụ ke ẹto, dụ nụ ke ẹsau.

²⁷ Omekwo kpakara be nwụkworu, nwerinya wam masị nwurnu.

²⁸ N'olizọ n'ẹnwu, nwerinya wam ọ jọbu nnwerne nyele nụ rime ẹsau wam? Kwnornu nụ kpakara be luru a nụ nnwerne."

²⁹ Jizọsi sarụ be, "Anụ gahieru apna, anụ maa nhne be gbarụ n'okwukwo nsọ, mọbu rikne ke Chiokike.

³⁰ Kwnornu nụ n'olizọ n'ẹnwu, be lụ nnwerne, be gbọ nzi. Be jọonu lele ele enine izi zị n'oligwe.

³¹ Kọvu nhne gbasiri olizọ n'ẹnwu ke ele nwurnu ọnwu, anụ gwnụna nhne Chiokike kannu anụ? Ọ karụ,

³² "Mawa bụ Chiokike ke Ebereham, nụ Chiokike ke Aziki, nụ Chiokike ke Jekọpu?" Chiokike bụo Chiokike ke ele nwurnu ọnwu. Ọ bụ Chiokike ke ele zị bụdnu."

³³ Nga igbudu badnụ wam nurnu a, o du kpa be hna ẹhni n'iznizni a.

Iwu ke kakwo ibne a

(Mak 12:28-34; Luk 10:25-28)

³⁴ Nga ele Farisi nurnu nụ Jizọsi mesnirni ele Sadusi ọnu, be gbakọru n'otu.

³⁵ Otu badnụ nụ rime be, bụ nye ọgwu iwu sịkwa a ajiji naakpa a iru. Ọ kaa,

³⁶ "Nye-zni-nhne, ndaa iwu ke kakwo kpakara Iwu Mozizi nyernu a?"

³⁷ Jizọsi sarụ a, " 'I jeegweru kpakara mkpọma i, gweru kpakara mkpuru ovu i, gweru kpakara ọriri i, whnụ Nyenwe a! Chiokike n'anya.'

³⁸ Ka bụ iwu ke kakwo nụ nhne mbòm be nyernu n'iwu.

³⁹ Iwu ke ẹbo nụ lele ya, 'I jọowhnu nye agbatibi i n'anya lele ẹhni i.'

⁴⁰ Kpakara Iwu nụ kpakara iznizni ele ọwhnurninya Chiokike knogwu aka n'iwu lawuru ka."

Karaisi bụ nnwọ nyele?

(Mak 12:35-37; Luk 20:41-44)

⁴¹ Kpa ele Farisi gbakọru, Jizọsi sịkwa be,

⁴² "Kini bụ echiche anụ gbasiri Karaisi? Ọ bụ nnwọ nyele?"

Be kanụ a, "Ọ bụ Nnwọ Devidi."

⁴³ Jizọsi kanụ be, "Kini mernu Enine Chiokike jiri mee Devidi sukwu a 'Nyenwe m'? Devidi karụ,

⁴⁴ 'Nyenwe a! kannu Nyenwe m, Daziri ẹli n'akarikwuunga m, tem dụ nga me jaabita ele irno i nụ mkpururu ọchi i lawuru.' "

⁴⁵ "Ọ bụru nụ Devidi sukwuru a 'Nyenwe m,' ndaa kpa o jeeji bụru kwno nnwọ a?"

⁴⁶ Be maa nhne be jaasa a. Hite n'ige wam ọ zima nye nwernu anya rikne ọ sịkwa a ajiji berere.

23

Ele Farisi nụ

ele zni iwu ele Ju

(Mak 12:38-40; Luk 11:37-52; 20:45-47)

¹ Nga wam, Jizọsi kanụ agida ele badnụ wam nụ ele sno apna a,

² "Ele zni iwu nụ ele Farisi ji rikne Mozizi neezni iwu.

³ Anụ bnote nsni, anụ mee nhne be karụ anụ mee, kọvu anụ kpakwadia agwa lele be. Kwnornu nụ be mee nhne be neezni.

⁴ Be noovute ele badnụ ivu rinya, kọvu be nwée rikne gweru otu mkpaka kpatu ivu wam.

⁵ "Kpakara nhne be neeme bụ ma ele badnụ lekiri be. Be neeme rẹkpa akpukpo anohia be biga iwu ziri rude, mee ọnu iwo be zị ogologo.

⁶ Ọ naamasị be ọ dazị nụ risi ngadna nụ ige iriri, ma nụ risi ngadna n'oro ọgbako ele Ju.

⁷ Ọ naamasị be ele badnụ neebekwu be ikwu n'ahia, ele badnụ noosukwu be, 'Nye-zni-nhne.'

⁸ "Anụ kwéko be sukwu anụ 'Nye-zni-nhne,' kwnornu nụ otu nyenum bụ Nye-zni-nhne anụ, kpakara anụ bụ rụmụ nda.

⁹ Anụ sūkwo nye ọbula 'nda' n'owa, kwnornu nụ otu nyenum bụ nda anụ, Nda ke oligwe.

¹⁰ Be sūkwo anụ 'Nda-ai-kwu,' kwnornu nụ otu nyenum bụ Nda-ai-kwu, ya bụ Karaisi.

¹¹ Nye kwu n'esilawuru anụ jọbu nye izi anụ.

¹² Nye ọbula ke jeegwelizọ ẹhni a olu, be jeegwedna a ẹli, nye ọbula ke jeegwedna ẹhni a ẹli, be jeegwelizọ a olu.

¹³ "Awhnụwhnu zinu anụ, ele zni iwu nụ ele Farisi, ele ruwhnu lawuru. Anụ naagbasni mgbo ẹli-eze Chiokike nū ruwhnu ele badnụ, anụ zā naabna, anụ kwé ele naabna be bna. [

¹⁴ Awhnụwhnu zinu anụ, ele zni iwu nū ele Farisi, ele ruwhnu lawuru. Anụ neerida oro ele rinya nzi be nwurnu, neekpe ogologo okpukpe ma ele badnụ whnụ anụ, anụ jeenwe ọmuma ikpe kakwo ele berere.]

¹⁵ "Awhnụwhnu zinu anụ, ele zni iwu nū ele Farisi, ele ruwhnu lawuru, anụ neewhe okne osimini ma nū ẹli etekne mee otu badnụ ọ buri nye sno anụ kpenu Chiokike, nga anụ mernu a, anụ mee nye wam ọ buri nye kwesiri o zne bekwnu ẹli renwu mgba lawuru karụ anụ.

¹⁶ "Awhnụwhnu zinu anụ ele ndu isni, ele karụ, 'Nye ọbula ke jeegweru Oro Nso Chiokike dū risi, ọ zā nhne ọ bụ, kọvu nye

ɔbula ke jeeji golu zì n'Ọro Nsọ dọ risi jigwu Ọgwo.'

¹⁷ Anụ ele iwhnirniwhno whnụ ọsno, ndaa ke kakwo, golu, sọbu Ọro Nsọ ke Ẹtaru golu nsọ?

¹⁸ "Anụ karu, 'Nye ɔbula ke jeeji ojo arịohna dọ risi, ọ zà nhne ọ bụ, kọvu nye ɔbula ke jeeji nkesi zì n'olu a dọ risi jigwu ọgwo.'

¹⁹ Ele whnụ ọsno, ndaa ke kakwo, nkesi sọbu ojo arịohna ke Ẹtaru nkesi wam nsọ?

²⁰ Kam kpayarụ, nye ji ojo arịohna dọ risi, ji a, nụ kpakara nhne zì n'olu a dọ risi.

²¹ Nye ji Ọro Nsọ Chiokike dọ risi, ji a, nụ Nye wu nụ rime a dọ risi.

²² Nye jimasị oligwe dọ risi, ji ngadna eze Chiokike, nụ nye dazì n'olu a dọ risi.

²³ "Awhnụwhnu zìnu anụ, ele zni iwu nụ ele Farisi, ele ruwhnu lawuru, anụ nọokwu otu nga nụ nri nga ke mkpọro ọkwukwo nwernu ẹknarna ọma, mịnti nụ anisi nụ kumi, anụ gharu nhne zì rịnya n'iwu, bụ ikpe zì snam, nụ obirizi, nụ ọkwnata mkpọma. Ọ zì mkpa nụ anụ zneru eme nhne ka nụ ke berere.

²⁴ Anụ ele ndu isni, anụ naazahala ndna, kọvu ro kameli.

²⁵ "Awhnụwhnu zìnu anụ, ele zni iwu nụ ele Farisi, ele ruwhnu lawuru, anụ nọosnu aznụ okiko nụ ọkwu be zìri rịchna, kọvu nụ rime be jipiyaru nụ ọwho-anya nụ badnụ nwée rikne jikwaru ẹhni a.

²⁶ Jì nye Farisi kpuru isni, beru ọsno mee ma rime okiko nụ agbugba zìri rịchna, ma aznụ a bụru kwno nhne zì rịchna.

²⁷ "Awhnụwhnu zìnu anụ, ele zni iwu nụ ele Farisi, ele ruwhnu lawuru, anụ nụ lele ilili be teru nznu, ke neegesi ẹhni a lele nhne marnụ mma n'iwhe, kọvu ọkpukpu ele nwurnu ọnwu nụ kpakara nhne zìla rịchna jihjaru nụ rime a.

²⁸ Ọ bụ kpa anụ neegesi ẹhni anụ ele badnụ lele ele ọma, kọvu ruwhnu lawuru nụ agwa ojo jihjaru nụ rime anụ.

²⁹ "Awhnụwhnu zìnu anụ, ele zni iwu nụ ele Farisi, ele ruwhnu lawuru, anụ noowu ilili ele ọwhnurninya, bijkwata hne be liri ele ọma.

³⁰ Anụ naakaa, 'Ọ bụru nụ a zì n'ọbochi ele nda aị, a bo snóné be wụsi ọvnarna ele ọwhnurninya.'

³¹ Kam kpayarụ, anụ naagbagidne ẹhni anụ akebne, anụ bụ rụmu ele gburu ele ọwhnurninya.

³² Anụ mezute nhne ọtutu mmehie ke ele nda anụ.

³³ Anụ agwo, anụ ẹbnurnu okpu-eli, ndaa kpa anụ jaagbanahoru ikpe ke ẹkwunu ẹli renwu?

³⁴ M neeziyanu anụ ele ọwhnurninya nụ ele akoniche nụ ele zni Iwu Mozizi. Kọvu anụ joogbu agwna be, kpogidne be n'ogba, anụ jaapnịa agwna be nhne n'oro ọgbako anụ,

kpagbu be hite nụ otu ẹli-ohna dọ ẹli-ohna berere.

³⁵ Kam kpayarụ, ọvnarna kpakara ele ọma be wuwuhuru n'owa jaadnakwasị anụ, hite n'ọvnarna Ebeli nye ọma dọ ọvnarna Zakaraya nnwo Berecaya, nye anụ gburu n'iketa hne zì nsọ nụ ojo arịohna.

³⁶ Me kanu anụ ezi ọka, kpakara nhne ka jaadnakwasị ebiri ka.

Jizosi whnurnu

Jeruselem n'anya

(Luk 13:34,35)

³⁷ "Chei! Jeruselem, Jeruselem, jì ke noogbu ele ọwhnurninya, ke ji akaworugwu nọolo ele be ziyannu i. Mgba ele kpa me pioru ọ chikota rụmu i lele kpa enwerne ọchichi nẹchikota rụmu a nụ mkpururu aka nkwa a lawuru, kọvu i kwéle.

³⁸ Le, be naaghasanụ anụ oro anụ ma ọ tọbiri etekne.

³⁹ Kwnornu nụ ka, me kanu, hite kịtna, anụ jóowhnu m berere dọ nga anụ jaakaa, 'Chiokike gọzi nye wam ke naava nụ rẹwhna Nyenwe aị.' "

24

Be joolulu Ọro Nsọ

Chiokike

(Mak 13:1,2; Luk 21:5,6)

¹ Jizosi hi n'Ọro Nsọ Chiokike whoga, ele sno apna a vakwnusi a neegesi a kpa be jiri wu Ọro Nsọ Chiokike.

² Jizosi kanu be, "Anụ whnurnu kpakara nhne ka? Me kanu anụ ezi ọka, otu akaworugwu jóogwuzo n'olu ibne a, be jaakwnadna kpakara be n'eli."

Mmekpẹhni nụ

ọkpakna ẹhni

(Mak 13:3-13; Luk 21:7-19)

³ Nga Jizosi daziri ẹli n'olu Rugwu Olivu, ele sno apna a vakwnusi a ichne, be kaa, "Kanụ aị nga kpakara nhne ele ka jeeme. Kini jeegesi nụ ọvuwa i zì ndundu, ya nụ okwukwo ọwa?"

⁴ Jizosi saru be, "Any a dọ anụ ẹli ọ zì nye ọbula duhie anụ.

⁵ Kwnornu nụ agida ele badnụ jaava nụ rẹwhna m, naakaa, 'Mawa bụ Karaisi,' be jooduwhu agida ele badnụ.

⁶ Anụ joonu ọgwu nụ ọtntnu ọgwu, kọvu mkpọma lá anụ mini. Kpakara nhne ka jeebe ọsno mee, kọvu okwukwo yooduge.

⁷ "Mba jeelizo megidne mba, ẹli-eze jeelizo megidne ẹli-eze, ọkwnunyo nụ ẹli otne enye jaaži nụ hne zì ichne ichne.

⁸ Kpakara nhne ka joonu lele ọpanizo igbugbu ọmumu nnwo.

⁹ "Ige wam be jeegweru anụ nyee ma be kpakna anụ ẹhni, gbu agwna anụ, kpakara mba jooosno anụ irno kwnornu m.

¹⁰ Agida ele badnu jáabita okwnata mkpoma be, be jeere ibne be, sno ibne be irno.

¹¹ Agida ele owhnurninya aghalaghala jeelizo masi, duwhu agida ele badnu.

¹² Kwnornu nu nhne ojo jaazi agida, owhnun'anya agida ele badnu jeeji iyi.

¹³ Kovu be jooznohia nye obula ke jaaknata mkpoma, dazigidne du okwukwo kpakara nhne.

¹⁴ Be jookpo okwo izi oma ka ke gbasiri eli-eze Chiokike nu kpakara owa ma o buru nhne akabne nyee kpakara mba, ige wam okwukwo kpakara nhne jaava.

Awhnuwhnu ke ele Jeruselem jaata

(Mak 13:14-23; Luk 21:20-24)

¹⁵ "Anu joowhnu nhne ruru oru ke neegweya gba eso n'eli hne o gwuzo nu hne zi nsq, ke Daneli nye owhnurninya kwuru oka gbasiri a. (Bno nsnj, nye obula ke n'ogwnu nhne ka, ghohia a masi.)

¹⁶ Ige wam, ele zi nu Judiya gbazne n'olu rugwu.

¹⁷ Nye zi n'olu oro hiedna o kwahala nhne zi n'oro a.

¹⁸ Nye zi n'ekwu lahana aznu, chiri iwo a.

¹⁹ Awhnuwhnu jaazinu ele rinya zi rime nu ele neechi nnwo rema n'ige wam.

²⁰ Anu kpenu Chiokike ogba eso anu buko n'ige okirika mobu n'Obochi Ozukwa Inwe.

²¹ Kwnornu n'ige wam okne mmekpehni jaazi ke nu lele ya zikolele hite n'opanizo owa du kitna, owe, o jaazima berere.

²² O buru nu be mene obochi wam ziri ichichi, o za badnu obula be jooznohiali, kovu kwnornu nu ele Chiokike hohiaru, o mernu obochi wam ziri ichichi.

²³ Ige wam o buru nu nye obula kanu i, 'Le Karaisi zi hna,' mobu, 'O zi p'ari,' i kwé.

²⁴ Kwnornu nu Karaisi aghalaghala zi odo n'odo, nu ele owhnurninya aghalaghala zi odo n'odo joowho iwihne, noornu agida ernu ndu-ehni nu ernu elekema zi odo n'odo, ma be duwhu ele Chiokike hohiaru o buru nu o jeekwe omume.

²⁵ Anu bnote nsnj, m bele m osno kanu anu.

²⁶ "O buru nu nye obula kanu anu, 'Le o zi n'eli-ikpa,' anu zné, mobu 'O zi nu rime oro mati,' anu kwé.

²⁷ Kwnornu nu lele kpa amuma oligwe neehi n'obosi ehnam dna nu odidna ehnam, bu kpa o joonu nga Nnwó ke Badnu jaava.

²⁸ Henuhne obula iznu dnarnu, idele jaag-bako pi.

Nnwó ke Badnu vava

(Mak 13:24-27; Luk 21:25-28)

²⁹ "Wara wara mmekpehni ka whemernu n'obochi wam, ehnam jaagba ochichiri, enwa jéenyé iwihne a,

mbó ke oligwe jaadna,

kpakara iknernema ke oligwe jooohnio ohnio.

³⁰ "Ige wam, nhne elekema ke Nnwó ke Badnu joowhuya iwihne n'oligwe, kpakara mba jaagbanu a mkpe. Be joowhnu Nnwó ke Badnu hne o naava n'erumeru oligwe n'iknernema nu okne igwugwu.

³¹ Be joogbu okne okwodu, o jeezihala ele enine izi a, be chikotanu a ele ke Chiokike hohiaru hite nu ruwheru eno k'owa, hite n'osotoma owa du n'osotoma berere.

Muhia nhne hite

n'isisi be kwu figi

(Mak 13:28-31; Luk 21:29-33)

³² "Anu muhia nhne hite n'isisi figi, nga nkala a zlam p'ali p'ali nooru okwukwo ikne, anu mahia nu nduru-mini zi ndundu.

³³ Kpam masi, nga anu joowhnu kpakara nhne ka, anu mahia nu ige wam zi ndundu n'onu-mgbo.

³⁴ Me kanu anu ezi oka, ebiri ka jéewhe tem kpakara nhne ka mee.

³⁵ Oligwe nu owa jaagawhe, kovu ikwu-onu m jaagawhe rja rja.

O za nye magwu

obochi wam

(Mak 13:32-37; Luk 17:26-30,34-36)

³⁶ "O za nye magwu obochi mobu otnu-ige wam, ele enine izi ke oligwe mamasí, Nnwó wam mamasí. Okwolem Nda m kpóí bu nye magwu obochi wam.

³⁷ Lele kpa o nu n'obochi Noa, o bu kpa o joonu ige Nnwó ke Badnu jaava.

³⁸ Hne o du ige mgba-mini eli wam, ele badnu zi neeri, noonwo, ngolu nnwerne, noogbo nzi, du n'obochi Noa bnaznenu nu rime ogbo.

³⁹ Be máa, tem mgba-mini eli wam va vuru kpakara be zne. O bu kpa o jaazi nga Nnwó ke Badnu jaava.

⁴⁰ Badnu lawuru jaazi n'ekwu, be gweru otu ghasa ibne a.

⁴¹ Ele rinya lawuru jaazi neegwe wiri nu hne be gwe wiri, be gweru otu ghasa ibne a.

⁴² "Kam kpayarú, anu neese nse, kwnornu nu anu máa obochi Nyenwe anu jaava.

⁴³ Kovu anu mahia nu o buru nu nye nwe oro mahiaru otu-ige nye buznu jaava, o zn-ernu ose oro a, o béekwele be liwa oro a.

⁴⁴ Kpam masi, anu ziri nu ojiknenu, kwnornu nu Nnwó ke Badnu jaava ige anu túge anya a.

Ohi ke kwesiri

o kwnata ovu

(Luk 12:41-48)

⁴⁵ "Nyele bu ohi wam ke nwernu akoniche be kwesiri o kwnata mkpoma, nye nda a

kwu mernu nye risi ele ọhi berere zị n'oro a ma o neenye be wiri n'ige kwesiri?

⁴⁶ Ọwa ọma zịnu n'ọhi wam ke nda a kwu highnarnu whnu nụ o neeme kpa nda a kwu karu.

⁴⁷ Me kanu anu ezi oka, o jeeme a nye jeelekota kpakara ekwnu a.

⁴⁸ Kọvu o buru nụ ọhi wam bu ọhi ojo, o kanu ehni a, 'Nda m kwu joogbu okwnu.'

⁴⁹ O bete naaligbu ele ọhi ibne a, snornu ele manya noogbu, neeri nonwo manya.

⁵⁰ Nda kwu ọhi wam jaava n'ige o tuge anya a, n'otnu-ige o ma.

⁵¹ O joogbubi a ichichi lawuru, mee ya nụ ele ruwhnu lawuru bna n'otu ogbo, hne be jaazi naakwna ekwna, naata rukwnurnu-ize."

25

Elulu nri

rumu oknornokno

¹ "Ige wam be jeeji eli-eze Chiokike sninu nri rumu oknornokno ele chiri tonji be zne o kwnusi nye nọlu nnwerne ikne.

² Isne n'esilawuru be bu ele iwhnirniwhno, isne bu ele nwernu echiche.

³ Ele iwhnirniwhno gweru tonji kovu be jile mono.

⁴ Ele nwernu echiche gweru tonji, gbaru mono n'olori gweru zne.

⁵ Nye nọlu nnwerne ikne vage ngwa, anarna turu kpakara be, be zni anyarna.

⁶ "N'esilawuru abali, be siri lulo, 'Le nye nọlu nnwerne ikne, anu whuya, zne kwnusi a.'

⁷ "Kpakara rumu oknornokno wam lizo, tulizo tonji be.

⁸ Ele iwhnirniwhno kanu ele nwernu echiche, 'Anu nyebosi ai agwna mono anu, tonji ai neechi echni.'

⁹ "Rumu oknornokno wam nwernu echiche saru be, 'Oza, mono a nwernu joozonu ai nu anu, anu zne n'aka ele neere mono zuru mono ke anu.'

¹⁰ "Kpa be znernu o zu mono, nye nọlu nnwerne ikne varu, rumu oknornokno ele jiknenu snornu a bna n'iriri olu nnwerne. Be gbasni oro.

¹¹ "Omekwo rumu oknornokno iwhnirniwhno wam varu, nooznu aka n'onu-mgbo, naakaa, 'Nyenwe ai, Nyenwe ai, gbamanu ai oro.'

¹² "Kovu o saru be, 'Me kanu anu ezi oka, m maam ele anu bu.'

¹³ "Kam kpayaru, anu ziri nu nse, kwnornu nu anu ma obochi wam mabu nga otnu-ige wam jobu.

*Elulu talenti** (Luk 19:11-27)

¹⁴ "Berere kwno, be jeeji eli-eze Chiokike sninu otu nyerukna ke neezne izne, o sukwu ele ọhi a, gweru ekwnu a nyewhete be n'aka.

¹⁵ O nyernu otu badnu talenti isne, nye berere talenti lawuru, nye masi nye ke berere otu talenti. O nyernu nye obula lele kpa rikne a hna. O lizo zne hne o znezne.

¹⁶ Nye ke o nyernu talenti isne znernu ngangam noozu ahia, o nwehia mbnarna talenti isne berere.

¹⁷ Nye ke nahiaru talenti lawuru zne mee masi kpa, o nwehiaru mbnarna talenti lawuru berere.

¹⁸ Kovu nye ke nahiaru otu talenti znernu gwu eli, lite iwai nyenwe a.

¹⁹ "Nga agida ige whemernu, nyenwe ele ọhi wam varu ma ya nu be piakota nhne o nyernu be.

²⁰ Nye wam ke nahiaru talenti isne gweru talenti isne berere va, kaa, 'Nyenwe m, i nyernu m talenti isne, kovu le, m nwehiaru m mbnarna talenti isne berere.'

²¹ "Nyenwe a kanu a, 'I mekwaru nkari, ọhi oma, ke be kwesiri o kwnata mkpoma, i kwesiri be kwnata i mkpoma nu nhne ele nu ele, m jeeme i nye risi agida nhne. Vaa, snornu Nyenwe i n'ovu oso n'onu a.'

²² Nye ke nahiaru talenti lawuru varu masi, kaa, 'Nyenwe m, i nyernu m talenti lawuru, le m nwehiaru m mbnarna talenti lawuru berere.'

²³ "Nyenwe a kanu a, 'I mekwaru nkari, ọhi oma ke be kwesiri o kwnata mkpoma, i kwesiri be kwnata i mkpoma nu nhne ele nu ele, m jeeme i nye risi agida nhne. Vaa, snornu Nyenwe i n'ovu oso n'onu a.'

²⁴ "Nye wam ke nahiaru otu talenti varu, kaa, 'Nyenwe m, m maam nye i bu, nu i bu badnu aka-nchni, i neegwe nhne n'ekwu hne i kpala mkpuru, i naachikota nhne hne i ghala mkpuru.'

²⁵ Kam kpayaru, ogwnu turu m, m gweru m talenti i lite n'eli, le, gwehnarnu ke bu ke i.'

²⁶ "Nyenwe a saru a, 'Ohi ojo, nye ime-gwu, i magwu nu m neegwe nhne n'ekwu hne me kpala mkpuru, naachikota nhne hne me ghala mkpuru?'

²⁷ O buru oma, i znernu eyisi iwai m n'aka ele gbanwo iwai, nga me varu m znernu m anahoru iwai m nu mbnarna.

²⁸ " 'Anu nahia a talenti wam nyega a nye wam ke nwernu nri talenti.

²⁹ Kwnornu nu nye obula ke nwernu nhne, be jeenye, o nwehnasiru, kovu nye ke nwée, be jaanahoru a, o bubedi ke o nwernu.

³⁰ Anu tubna ọhi ke bnage nu nhne wam n'ederezị, o bna n'ochichiri hne be jaazi naakwna ekwna, naata rukwnurnu-ize.'

* **25:13 Talenti:** N'ige mbom, ogwo ernu obochi bu otu mkpuru iwai. Otu talenti hna lele nri pokwu mkpuru iwai.

Rumu owu nu atnurnu

31 “Nga Nnwọ ke Badnụ jaava n’igwugwu a, ya nụ kpakara ele enine izi a, ọ jaadazi ẹli nū ngadna eze ke igwugwu.

32 Be jaachikota kpakara mba nū ruwhnu a, ọ jeekeme ele badnụ n’esilawuru ibne be, lele kpa nye nọoznu atnurnu neekewahala atnurnu n’esilawuru owu.

33 Ọ jaabita atnurnu n’akarikwnunga a, bita owu n’akarita a.

34 “Eze wam jaakanu ele zi a n’akarikwnunga, ‘Anu va, ele Nda m gọziri, anu kehia ẹli-eze be bitannu anu hite nga Chiokike kpuru ọwa.

35 Kwnornu nū wiri gwnurnu m, anu nyernu m wiri, akpiri kporu m bekwnu, anu nyernu m mini, m bu m nye izne, anu kwubnarnu m ọro anu.

36 M gbaru m ẹto, anu chita m ikpe, m rjaru m nriria, anu leri nriria, m zi m n’oro ikelu anu varu lekwa m.’

37 “Ige wam ele oma wam jaakaa, ‘Nyenwe aj, ndaa ige a whnurnu wiri nọogwnu i, a nyega i wiri, mọbu ige akpiri nọokpo i bekwnu, a kwute i mini?

38 Ndaa ige a whnurnu nū i bu nye izne, a kwubnanya i n’oro aj, mọbu nū i gba ẹto, a chita i ikpe?

39 Ndaa ige a whnurnu nū i naaria nriria mọbu n’oro ikelu, a lekwa i?’

40 “Eze wam jaasa be, ‘Me kanu anu ezi oka, kpakara nhne anu mennu nye ka kakwo matị n’esilawuru rumu nda m, anu mennu me.’

41 “Nga wam, ọ jaakanu ele ke zi a n’akarita, ‘Anu whoga hne me zi, ele be vuru onu, bna nū bekwnu noonwu tim tom ke be bitannu Ekwensu nū ele enine izi a.

42 Kwnornu nū wiri gwnurnu m, anu nyege m wiri, akpiri kporu m bekwnu, anu kwutege m mini.

43 M bu m nye izne, anu kwubnanyage m, m gbaru m ẹto, anu chitage m ikpe, m rjaru m nriria, m zi m n’oro ikelu, anu lekwa m.’

44 “Be jaasa a masi, ‘Nyenwe aj, ndaa ige a whnurnu nū wiri nọogwnu i, mọbu nū akpiri nọokpo i bekwnu, mọbu nū i bu nye izne, mọbu nū i gba ẹto, mọbu nū i naaria nriria, mọbu nū i zi n’oro ikelu, a lekwa i?’

45 “Ọ jaasa be, ‘Me kanu anu ezi oka, kwnornu nū anu mennu a otu nye ke kakwo matị n’esilawuru ele ka, anu mennu m.’

46 “Ige wam be jeezne ta awhnwhnu ke kwọ okwo, kovu ele oma jaabna nū budnu kwọ okwo.”

26

Be gbaru iznuznu

o gbu Jizosi

(Mak 14:1,2; Luk 22:1,2; Jon 11:45-53)

1 Nga Jizosi kwukworu kpakara oka ka, ọ kanu ele sno apna a,

2 “Anu magwu nū obochi lawuru wheme nū Iriri Ọgawhe jaazi, be jeegweru Nnwọ ke Badnụ nyee ma be kpogidine a n’ogba.”

3 Ige wam ele risi arjohna nū ele okno badnụ ke ele Ju gbakoru n’obiri nye risi arjohna be nookwu Kayafasi.

4 Be gba iznuznu kpa be jeeji aghigho nwugwu Jizosi, gbu a.

5 Kovu be karu, “Ọ jọbu n’Iriri ka, ọ zi a kpasu ohna.”

Be teru Jizosi mono

nū Betani

(Mak 14:3-9; Jon 12:1-8)

6 Nga Jizosi zi nū Betani, n’oro Sajmoni nye rjaru nchnichna,

7 otu nwerinya bnanyarnu nye vu mono otute zi gburu okne onu ke nweru ẹknarna oma ke zi n’ite alabasita, ọ wusi mono otute ka nū risi Jizosi kpa ọ dazi ẹli neeri wiri.

8 Nga ele sno apna a whnurnu a, o we be ehni, be kaa, “Kini kpararu be wuwuru mono otute ka etekne?”

9 Be znernu o re mono otute ka agida iwai, nyee ele mboni.”

10 Kpa Jizosi maharu nhne be nookwu, ọ kanu be, “Kini kpararu anu neemkpa nwerinya ka ehni? O rnurnu ẹnu oma n’ehni m.

11 Anu nū ele mboni zi kpakara ige, kovu nū me nū anu jaazi kpakara ige.

12 Ọ wusiri mono otute ka n’ehni m, o mernu a ma ọ bikwata m n’olili m.

13 Me kanu anu ezi oka, hne nū hne obula be jookpo okwo izi oma ka nū kpakara oma, be jookwuhia nhne nwerinya ka mernu, ma ọ buru nhne o chenwanya a.”

Judasị kweruru

o re Jizosi

(Mak 14:10,11; Luk 22:3-6)

14 Ige wam otu badnụ n’esilawuru ele sno apna a nri nū ẹbo wam, be kwu Judasị Isikarjoti, znekwnusiri ele risi arjohna,

15 ọ sika be, “Kini bu nhne anu jeenye m, ọ buru me gweru a nyee n’aka anu?” Be kwu a nri siliva ẹto.

16 Hite n’ige wam, o bete o pio oghere o jeegweru Jizosi nyee be.

Jizosi nū ele sno apna a

riri Iriri Ọgawhe

(Mak 14:12-21; Luk 22:7-13; Jon 13:21-30)

17 N’obochi mbom ke Iriri Bredi Whuge Qwhu, ele sno apna a vakwnusiri Jizosi, sika a, “Ndaa hne i pioru ma a mekwatanu i ma i ri Iriri Ọgawhe?”

18 Ọ kanu be, “Anu zne ẹli-ohna ka, znekwnusi nye nū kpa, kanu a, ‘Nye-zni-nhne karu kpa, Ige m zi ndundu, me nū ele sno apna m jeeri Iriri Ọgawhe n’oro i.’ ”

19 Ele sno apna a mee lele kpa Jizōsi nyernu be iwu, be mekwata Iriri Ōgawhe.

20 N'ogbednachi, Jizōsi nū ele sno apna a nri nū ēbo wam daziri neeri wiri.

21 Kpa be neeri wiri, ō kaa, "Me kanū anū ezi ōka, otu badnū n'ensilawuru anū jeere m."

22 O gbu be igbugbu k'agida, kpakara be n'otu n'otu panizo naakanū a, "Nyenwe ai, ō bụ mawa sa?"

23 Jizōsi sarū be, "Nye me nū a noosnukōta aka n'otu agbugba wiri, nye wam jeere m.

24 Nnwō ke Badnū jaala lele kpa be gbarū a n'okwukwo nsō gbasiri a, kōvu nū awhnūwhnu jaazinu nyerukna wam be jeehi n'aka a re Nnwō ke Badnū. Ō buru ōma ō buru be muna nyerukna wam."

25 Ige wam Judasi, nye reru a, kaa, "Nye-zni-nhne, ō bụ mawa sa?"

Jizōsi sarū a, "Ji n'iwhuru i karū kpa m."

Wiri Anyasnu Nyenwe ai

(Mak 14:22-26; Luk 22:14-20; 1 Kor 11:23-25)

26 Kpa be neeri wiri, Jizōsi gweru brēdi, tūnu Chiokike mmamma, nyawama a, nyee ele sno apna a, kaa, "Anū gweru, ri, ka bụ anō-ēhni m."

27 O gweru okiko, tū mmamma, nyee be, kaa, "Kpakara anū nwō nū rime a.

28 Kwnornu nū ka bụ ōvnarna m ke ōgba-njō-ēhni ke be nōowusi kwnornu agida badnū ma be gbarūnu be mmehie be.

29 Me kanū anū, hite kītna m jōonwoma manya hi n'isisi vaiṅi whuya rīa rīa tem dū n'ōbochi me nū anū jōonwa a ke ikne n'eli-eze nda m."

30 Nga be gwnūkparu eri, be whōga zne nū Rugwu Olivu.

Jizōsi karū nū Pita

jōogonahoru a

(Mak 14:27-31; Luk 22:31-34; Jōn 13:36-38)

31 Nga wam, Jizōsi kanū be, "Kpakara anū jaagbakwo ēso n'abalī tna, kwnornu nū be gbarū a n'okwukwo nsō, kaa,

'M joogbu nye nōoznu atnūrnū, atnūrnū a jaagbakemekwo.'

32 Kōvu nga me hiri n'ēnwu lizō, m jeebe anū ōsno zne Galili."

33 Pita sarū a, "O bụbedi nū kpakara badnū gbanahōru i, m jaagba ēso rīa rīa."

34 Jizōsi kanū a, "Me kanū i ezi ōka, n'abalī ka, ige okne ōchichi yāakwnana ēkwana, i jōogonahoru m mgba ēto."

35 Pita kanū a, "Ō burubedi nū ō zi mkpa me sno i nwwama, m jōogonahoru i rīa rīa." Ō bụ masi kpa kpakara ele sno apna a kwuru.

Jizōsi kperu okpukpe

nū Gēsemani

(Mak 14:32-42; Luk 22:39-46)

36 Jizōsi nū be vaduru n'ēkwu Gēsemani, ō kanū ele sno apna a, "Anū daziri hna, me zne kpe okpukpe nū pīari."

37 O kwuru Pita nū rūmu rukna Zebidi lawuru yisinu ēhni a, ō panizo o gbu a igbugbu nū o wute a nū mkpōma.

38 Ō kanū be, "O noogbu m mkpōma m igbugbu k'agida dū ēnwu, anū dazigidne hna, snornu m se nse."

39 O znetū nū ruwhnu matī, dna, kpu ruwhnu a n'eli, kpe okpukpe, kaa, "Nda m, ō buru nū o kwe omume, ma okiko awhnūwhnu ka whenahōru m, kōvu ō bụo nhne me pioru, kōvu nhne i pioru."

40 Ō vakwnusi ele sno apna a, hne be neezni anyarna, ō kanū Pita, "Kīni, anū nwēe rikne snornu m se nse otu ōtnu-ige?"

41 Anū se nse, neekpe okpukpe, ō zi anū dnabna n'ōrnurna. Enine ke badnū zi bekwnu, kōvu nū anō-ēhni zīla rikne."

42 Ō gharū be zne kwno berere ke mgba lawuru, kpe okpukpe, kaa, "Nda m, ō buru nū okiko awhnūwhnu ka jēewhenahōru m, okwolem ma m nwōrnū m a, be mee nhne i pioru."

43 Jizōsi hiehna berere, whnū be neezni anyarna, kwnornu nū anya be zī rīnya.

44 Ō gharū be, zne kpe okpukpe ke mgba ēto, nookwu kōriri otu ōka wam.

45 Nga o hiehna hne ele sno apna a zi, ō kanū be, "Anū zī kōriri neezni anyarna, noozukwa inwe? Le, ōtnu-ige ke m zī ndūndu. Be neegweru Nnwō ke Badnū resi n'aka ele mmehie.

46 Anū lizō, ma a zne. Anū le, nye neegweru m nyee zī ndūndu."

Be nwudnernu Jizōsi

(Mak 14:43-50; Luk 22:47-53; Jōn 18:3-13)

47 Kpa Jizōsi kpu ōka n'ōnu, le, Judasi, otu nū rime nri nū badnū lawuru wam varū, ya nū agida badnū ji ama-ōgwūnu nū okpīri. Be hi nū hne ele risi arīohna nū ele okno badnū ele Ju va.

48 Judasi, nye wam reru a nyernu be nhne elekema, kaa, "Nye ōbula ke me joosnutu ōnu, nye wam bụ ya, anū nwūgwu a."

49 Ngangam, o znekwnusi Jizōsi, kaa, "Nye-zni-nhne, m bekwulem jī." O snutu a ōnu.

50 Jizōsi kanū a, "Enyi m, mee nhne i varū o mee."

Be vakwnusi Jizōsi, be tūkwasi a aka, nwūgwusi a rikne.

51 Otu badnū nū rime ele sno apna Jizōsi dōsnimarnu aka, mñjohia ama-ōgwūnu a, gbu nye izi nye risi arīohna, bihala a nsñi.

52 Jizōsi kanū a, "Mñjohnasi ama-ōgwūnu i n'ōbo a, kwnornu nū kpakara ele gbu ama jaala n'ama.

* 26:53 Lijoni: bụ pokwu ele ōgwūnu isunu.

⁵³ O bu nu i maá nu m nwernu m rikne kanu Nda m, o ziyanu m nhne kakwo lijonni * nri nu ebo ele enine izi a?

⁵⁴ Kõvu me mee kpam, nhne be gbaru n'okwukwo nsò nu o jeemeriri, ndaa kpa o jeemezu?"

⁵⁵ Ige wam, Jizosi kanu agida ele badnu wam varu o nwugwu a, "Anu varu chiri ama-ogwunu nu okpiri o nwudne m lele nu bu m nye neemegidne iwu eli. Kpakara obochi m daziri m n'Oro Nso Chiokike neezni nhne, anu nwudnene m.

⁵⁶ Kpakara nhne ka mernu ma nhne ele owhnurninya gbaru n'okwukwo nsò mezu." Ige wam kpakara ele sno apna a ghasaru a, gbawhu.

Jizosi gwuzo nu ruwhnu ele eze-ikpe

(Mak 14:53-65; Luk 22:54,55,63-71; Jon 18:13,14,19-24)

⁵⁷ Ele nwudnenu Jizosi duru a zne n'oro Kayafasi, nye risi arìohna, hne ele zni iwu nu ele okno badnu gbakogwu.

⁵⁸ Pita snornu a, be zitagwo ndundu. O bna nu rime ederezi nye risi arìohna, daziri eli n'esilawuru ele nse, ma o whnu risi nhne neeme.

⁵⁹ Ele risi arìohna nu kpakara ele eze-ikpe noopio ele akebne aghalaghala gbagidne Jizosi ma be gbu a.

⁶⁰ O bu n'ezi nu agida ele akebne aghalaghala whuyaru, kovu be nwée rikne piohja nhne.

N'ipne-aznu, badnu lawuru whuyaru, ⁶¹ be kaa, "Nyerukna ka karu nu o nwernu rikne kwadna Oro Nso Chiokike ka, wu a n'obochi eto."

⁶² Nye risi arìohna lizo sika Jizosi, "O za nhne i naasa? Kini bu akebne ka ele badnu ka naagbagidne i?"

⁶³ Kovu nu Jizosi kpusnirni onu. Nye risi arìohna kanu a, "M ji m Chiokike ke zi budnu kwusi a rikne, ma i kanu ai, ji n'iwuru i bu Karaisi, Nnwò Chiokike."

⁶⁴ Jizosi saru a, "Owe! Ji n'iwuru i karu. Kovu me kanu anu,

Hite kina, anu jowhnu Nnwò ke Badnu hne o dazi n'akarikwnunga Chiokike ke bu Dikne, naava masi n'erumeru oligwe."

⁶⁵ Nye risi arìohna dowama iwo a, kaa, "O kwululem Chiokike, ndaa nhne a kwno noopio ele akebne berere? Anu nurnu kpa o kwuluru Chiokike.

⁶⁶ Kini bu echiche anu?" Be saru, "O kwesiri o nwu enwu."

⁶⁷ Ige wam be bete nógbu a onu mini, naapnja a nhne. Ele berere nógbo a aka,

⁶⁸ be kaa, "Whnu nu ai owhnurninya, Karaisi, nyele gboru i aka?"

Pita Gõnahoru Jizosi
(Mak 14:66-72; Luk 22:56-62; Jon 18:15-18,25-27)

⁶⁹ Pita dazi n'ederezi, otu nnwo oknornokno ele neezne izi vakwnusi a, kaa, "Ji nu Jizosi nye Galili sno masi."

⁷⁰ Kovu Pita goru nu ruwhnu kpakara be, kaa, "M maam nhne i naakaa."

⁷¹ Nga o whogaru n'onu-mgbo, nnwo oknornokno berere whnu a, o kanu ele zi pii, "Nyerukna ka nu Jizosi nye Nazareti sno."

⁷² Pita kwusi a rikne, go kwno berere, kaa, "M maam nyerukna ka."

⁷³ Ige matì berere, ele gwuzo ndundu vakwnusiri Pita, kanu a, "N'ezi, ji n'iwuru i bu otu badnu nu rime be, kwornu nu ikwu-onu i neegwehja i iwhne."

⁷⁴ Ige wam o panizo nógbo ehni a ngugo, nógdu risi, kaa, "M maam nyerukna ka." Ngangam, okne ochichi kwarnu ekwna.

⁷⁵ Pita chenwanya ikwu-onu Jizosi kwuru, kaa, "Ige okne ochichi yaakwnana ekwna, i jogonahoru m mgba eto." O whoga ederezi kwna ekwna mkpuru ovu k'agida.

27

Be kwuznenu Paileti Jizosi

(Mak 15:1; Luk 23:1,2; Jon 18:28-32)
¹ N'onu osisi, kpakara ele risi arìohna nu ele okno badnu ele Ju gbaru iznuznu, kpebi o gbu Jizosi.

² Be kne a eriri, duru a zne, gweru a nyewhete n'aka Paileti nye neechi.

Enwu Judasi
(Ernu 1:18,19)

³ Nga Judasi nye reru a whnurnu nu be kperu Jizosi ikpe enwu, marnuhmini mernu a k'agida, o chinnalanu ele risi arìohna nu ele okno badnu nri siliva eto wam,

⁴ kaa, "M mmehiele m nu ogweru ovnarna nye ikpe mana resi anu."

Be kanu a, "Ndaa ke gbasiri ai? Ki bu mkpa i?"

⁵ Judasi tusa iwai wam nu rime Oro Nso Chiokike, whoga, kpogbu ehni a.

⁶ Ele risi arìohna gweru kpakara iwai wam, kaa, "O megidneru iwu ai o yisi iwai ka nu nhne be bita iwai n'Oro Nso Chiokike, kwornu nu o bu iwai ovnarna."

⁷ Be kpebi o gweru iwai wam zu eli ele kpu ite hne be jeeli ele izne.

⁸ Ka kpararu be nookwu a Eli Ovnarna du tna.

⁹ Nhne ka mernu ma nhne Jerimaya nye owhnurninya kwuru mezu,

"Be gweru nri siliva eto bu onu ahja ele Izireli whnurnu onu a,

10 be gweru a zuya ẹli ele okpu ite,
lele kpa Nyenwe aiyernu m n'iwu."

*Jizosi gwuzo nu
ruwuhu Paileti*

(Mak 15:2-5; Luk 23:3-5; Jon 18:33-38)

11 Koyu nu Jizosi gwuzo nu ruwuhu nye
neechi ẹchi, nye ọchichi wam sika a, "I bu
Eze ele Ju?"

Jizosi saru a, "Owe! Ji niwuhuru i karu
kpa."

12 Nga ele risi arjohna nu ele okno badnu
noobno a nhne, o sala be nhne obula.

13 Paileti sika a, "I nuna kpakara nhne be
noobno i?"

14 Koyu nu Jizosi sala a oka obula, ke mernu
o gbagojiri nye ọchichi anya k'agida.

*Be marnu Jizosi
ikpe enwu*

(Mak 15:6-15; Luk 23:13-25; Jon 18:39--
19:16)

15 N'Iriri Ogawhe obula, nye neechi ẹchi
neesigbasinu be otu nye ikelu be rjoru a.

16 Be nwernu otu nye ojo ke ohna marnu zi
n'oro ikelu be nookwu Barabasi.

17 Nga igbudu badnu wam gbakoru, Paileti
sika be, "Ndaa nye anu pioru me sigbasinu
anu, Barabasi* sobu Jizosi, nye be kwu
Karaisi?"

18 Paileti kwuru ka kwnornu nu o magwu
nu be kwuyannu a Jizosi kwnornu owho-
anya.

19 Kpa Paileti daziri nu ngadna ikpe a,
nnwerne a zizenu a izi, kaa, "Aka i zi nu
nhne gbasiri nye mee mma wam, kwnornu
nu m taru m agida awhnuwhnu nu mboro tna
kwnornu a."

20 Koyu nu ele risi arjohna nu ele okno
badnu sigidneru igbudu ele badnu wam
be rjo a Barabasi, gb Jizosi.

21 Paileti sika be, "Ndaa nye anu pioru me
sigbasinu anu n'ehni badnu lawuru ka?"

Be kaa, "Barabasi."

22 O sika be, "Kini bu nhne anu pioru me
mee Jizosi, nye be kwu Karaisi?"

Kpakara be siwama, "Kpogidne a n'ogba."

23 Paileti sika, "Kini mernu? Kini bu nhne
ojo ke o mernu?"

Be siwama okokoba ke kakwo, kaa,
"Kpogidne a n'ogba."

24 Nga Paileti whnurnu nu o nwée rikne
mee nhne obula, koyu agida ọgbugbo dnarnu,
o gweru mini kwọ aka a lawuru nu ruwuhu
kpakara be, kaa, "Aka m zi richna n'ovnarna
nwerukna ka, anu niwuhuru anu magwu
nhne gbasiri a."

25 Kpakara be karu, "Ovnarna a zi nu risi
ai, zi masi nu risi rumu ai."

26 Paileti sigbasinu be Barabasi. Nga o
pniarnu Jizosi nhne, o gweru a nyewhete be
ma be kpogidne a n'ogba.

*Ele ogwnu kpariri Jizosi
(Mak 15:16-20; Jon 19:2,3)*

27 Ele ogwnu nye ọchichi duru Jizosi zne
n'obna ele ogwnu hne kpakara odobiri ele
ogwnu gbaru a gburugburu.

28 Be tuma a iwo a, wosi a iwo ihie ihie.

29 Be kpa okpu igwnu, kpasi a nu risi,
nyee a mkpara n'akarikwnunga, gbunu a
mpnerne ọchi nu ruwuhu a, kpari a, be kaa,
"A bekwulem ji, Eze ele Ju."

30 Be gbọ a ọnu-mini, gweru mkpara wam
nele a nu risi.

31 Nga be kparikworu a, be tuma a iwo
wam, wosi a kpakara iwo a, duru a zne ma
be kpogidne a n'ogba.

*Be kpogidneru
Jizosi n'ogba*

(Mak 15:21-32; Luk 23:26-43; Jon 19:17-
27)

32 Nga be whuyaru, be whnurnu otu
nwerukna Sirini, rwhna a bu Saimoni, be
sigidne a ma o vuru ogba a sno be.

33 Nga be vaduru hne be kwu Golugota, ke
bu "Hne Okpokoro Risi,"

34 Be nyee Jizosi manya be gwaru nhne lu
nlulu. Koyu nga Jizosi raturu a riro, o kwéle
o nwọ a.

35 Be kpogidne a n'ogba, ele ogwnu ke iwo a
n'esilawuru be nga be vukworu ogbanuchi. †

36 Be daziri ẹli neese a.

37 Be bjaru n'olu risi a nhne be bnornu a,
"Ka bu Jizosi, Eze ele Ju."

38 Be kpogidneru ele buznu lawuru nu
Jizosi n'olu ogba, otu badnu n'akarikwnunga
a, nye ke berere n'akarita a.

39 Ele naagawhe naakaja a, neewh-
nuwhne risi,

40 be kaa, "Ji nye naakwadna Oro Nso
Chiokike, wu a n'obochi ẹto, znphia ehni i. O
buru nu i bu Nnwọ Chiokike, hi n'olu ogba
hiedna."

41 O bu masi kpa ele risi arjohna nu ele zni
iwu nu ele okno badnu naakpari a.

42 Be kaa, "O znhiaru ele berere, koyu o
nwée rikne znphia ehni a, o bu eze Izireli, o
hi n'olu ogba hiedna kitna, a jeekweru nu a.

43 O tukwasiri Chiokike mkpoma, o znphia
a kitna, o buru nu o masiri a, kwnornu nu o
karu, "M bu m Nnwọ Chiokike."

44 O bu masi kpa ele buznu wam be
kpogidneru be nu Jizosi n'olu ogba zi masi
naakpari a.

Enwu Jizosi

(Mak 15:33-41; Luk 23:44-49; Jon 19:28-
30)

* 27:17 Barabasi: Agwna okwukwo kwuru Jizosi Barabasi
kwuru hite n'onu nye owhurninya mezu, "Be keru iwo m n'esilawuru be, gweru iwo m vuru ogbanuchi."

† 27:35 Agwna okwukwo kwuru: Be mernu ka ma nhne be
kwuru hite n'onu nye owhurninya mezu, "Be keru iwo m n'esilawuru be, gweru iwo m vuru ogbanuchi."

⁴⁵ Hite n'esilawuru iwhnehnie,[‡] ɔchichiri gbasnirni kpakara ɛli wam du n'otnu-ige ke ɛto.[§]

⁴⁶ N'otnu-ige ke ɛto, Jizosi jiri okne nkɔli siwama, kaa, "Eloi, Eloi, lama sabatani," ke bu, "Chiokike m, Chiokike m, kini mernu i ghasaru m?"

⁴⁷ Agwna ele gwuzo ndundu nurnu a, be kaa, "O noosukwu Elaija."

⁴⁸ Ngangam, otu badnu gba ɛso gweru sponji gbajite a nu manya gbaru oka, tukwasi a n'olu isisi, nyee a ma o nwɔ.

⁴⁹ Ele berere kaa, "Gharu a, a lesi ma Elaija jaava o znɔhia a."

⁵⁰ Nga Jizosi jiri okne nkɔli si okokoba berere, o nwebime inwe.

⁵¹ Ige wam ikpe obnosni ke Oro Nso Chiokike gbawaru ibekala lawuru hite n'olu du n'ɛli. ɛli otne enye dnarnu, agida rugwu gbawaru.

⁵² Ilili kpumernu, agida ele nso hiri n'enwu lizo,

⁵³ be whuya nu rime ilili. Nga Jizosi hiri n'enwu lizo, be bnazne nu rime ɛli-ɔhna nso, gesi agida ele badnu ehni be.

⁵⁴ Nga nye neɛchi otu riwhu ele ogwnu nu ele ogwnu a zi neese Jizosi whuru ɛli otne enye nu kpakara nhne mernu, be tu ogwnu k'agida, be kaa, "N'ezi, nyerukna ka buru Nnwɔ Chiokike."

⁵⁵ Agida ele rinya zi masi hne zi ikere neelekiri, ele hi nu Galili snornu Jizosi va, neeznu a izi.

⁵⁶ N'esilawuru be bu Meri Magidalini, nu Meri nne Jemisi nu Josef, nu nne rumu Zebidi.

Be liri Jizosi

(Mak 15:42-47; Luk 23:50-56; Jon 19:38-42)

⁵⁷ Nga ogbednachi, otu nye eze be kwu Josef, nye Arimatiya, nye sno apna Jizosi,

⁵⁸ znekwnusiri Paileti, rjo a iznu Jizosi. Paileti nyernu iwu be vute a iznu Jizosi.

⁵⁹ Josefuru vuru iznu wam, whu a n'ikpe abochna marnu mma,

⁶⁰ zne lite a nu rime ilili ikne ke aka a, ke o gwuwaru nu rime rugwu. O vuru otu rugwu hna ezi kpusni onu-mgbo ilili wam.

⁶¹ Meri Magidalini nu Meri kiyari zi ndundu, kete ruwhnu n'ilili wam.

⁶² N'ekile a, ke bu ɔbochi ke sno ɔbochi ojknernu, ele risi arjohna, nu ele Farisi gbakoru znekwnusiri Paileti,

⁶³ kaa, "Nda-a-kwu, a chenwanyarnu nu nye nduwhu wam karu nga o zi budnu, 'Nga ɔbochi ɛto whemernu, m jeehi n'enwu lizo.'"

⁶⁴ Kam kpayaru, nyee iwu ma be mesni illi wam rikne du ɔbochi ɛto, ma ele sno apna a gharu o znurnu a n'abal, kanu ele

badnu nu o hiri n'enwu lizo. Aghalaghalala ke ipne-aznu jaakakwo ke mbom."

⁶⁵ Paileti kanu be, "Anu zne, gweru ele ogwnu, be se, anu mesni ilili wam rikne kpa anu nwernu rikne o mee a."

⁶⁶ Be zne, mesni ilili rikne, kasu ilili a akara n'olu akaworugwu, beta masi ele nse.

28

Jizosi lizoru n'enwu

(Mak 16:1-10; Luk 24:1-12; Jon 20:1-10)

¹ Nga ɔbochi Ozukwa Inwe whemernu, nga chi nɔbo n'ɔbochi mbom n'ikwezu, Meri Magidalini, nu Meri kiyari varu lekasi ilili.

² Ngangam, ɛli tneru enye, enine izi Nyenwe a hiri n'oligwe hiedna, vume akaworugwu wam, daziri ɛli n'olu a.

³ Ruwhnu a nu lele amuma, iwo a naachna lele mkpuru-mini.

⁴ Ogwnu turu ele nse wam, be ma ririri dna n'eli lele ele nwuru onwu.

⁵ Enine izi wam kanu ele rinya wam, "Ogwnu tu anu, m maam nu anu noopio Jizosi, nye be kpogidneru n'ogba.

⁶ O zila hna, kwnornu nu o hilem n'enwu lizo, lele kpa o kwuru. Anu va whnu hne be liru a.

⁷ Anu zne wara wara kanu ele sno apna a, nu o hilem n'enwu lizo, o belem anu osno neezne Galili, anu jowhnu a pii. Le, m bele m osno kanu anu."

⁸ Be gweru ɛso, gweru izne hi n'ilili wam gbawhu, be ɔnotu ogwnu, mkpoma noso masi be n'onu k'agida. Be zne kanu ele sno apna a.

⁹ Jizosi kwnusiri be kpa be neezne n'apna, o kanu be, "M bekwulem anu." Be bna a n'ochi lawuru, kpunu a risi ɛli.

¹⁰ Jizosi kanu be, "Ogwnu tuko anu, anu zne kanu rumu nda m, be zne Galili, o hne be jowhnu m."

Otnutnu ele nse

¹¹ Kpa ele rinya wam naala, agwna ele ogwnu wam neese ilili znernu n'eli-ɔhna kanu ele risi arjohna kpakara nhne mernu.

¹² Ele risi arjohna nu ele okno badnu gba iznuznu, be kwu be agida jwai.

¹³ Be kaa, "Anu kaa, 'Ele sno apna a varu n'abal nga a neezni anyarna znurnu iznu a.'"

¹⁴ O buru nu nye neɛchi ɛchi nu a, a jeeme o kweru nu ikpe mana anu, anu jabna nu mmekpehni."

¹⁵ Ele ogwnu wam gweru jwai wam mee nhne ele risi arjohna nu ele okno badnu karu be mee. Be wheke otnutnu ka kpakara n'esilawuru ele Ju du tna.

[‡] 27:45 n'esilawuru iwhnehnie: ɔkwukwo ke mbom kwuru ige awa isunu [§] 27:45 otnu-ige ke ɛto: ɔkwukwo ke mbom kwuru ige awa tolu

*Jizōsi mernu ele sno apna a
whnū a anya*

(Mak 16:14-18; Luk 24:36-49; Jon 20:19-23; Eru 1:6-8)

¹⁶ Ele sno apna a nri nū otu wam zne nū Galili n'olu rugwu lele kpa Jizōsi kanū be.

¹⁷ Nga be whnūrnū a, be kpōnu a risi ẹli, kōvu agwna be nwernu mkpōma lawūru.

¹⁸ Jizōsi vakwnusi be, kaa, “Be nyernu m kpakara rikne ke zi n'oligwe ma n'owa.

¹⁹ Anū zne nū kpakara owa mee ele badnū be būru ele sno apna m, nōowu be mini nū rewhna ke Nda, nū ke Nnwọ nū ke Enine Nsọ.

²⁰ Anū zni be hīta kpakara nhne me nyernu anū n'iwu. N'ezi, me nū anū zī kpakara ige dū ọkwunukokwnu.”

**Izi ɔma lele kpa
Makj
gbarụ a n'okwukwo
Nhne gbasiri okwukwo ka**

Izi ɔma lele kpa Makj gbarụ a n'okwukwo jiri mkpuru ɔka ka panizo, "Opanizo izi ɔma Jizosi Karaisi, Nnwọ Chiokike." Makj gesiri nū Jizosi bụ badnū ke n̄ornu ɛrnu ndu-ɛhni nū nye nwernu rikne. Iknerema a whūyaru iwhe nū nhne o znirni, nū rikne megidne r̄nwu ojo, nū rikne ọ gbarūnu ele badnū mmehie. Jizosi kwuru ɛhni a Nnwọ ke Badnū, nye varū o gweru b̄dnu a nyee ma ọ d̄hia ele badnū hite nū mmehie be.

Makj gbarū nhne Jizosi mernu karū ikwu-ɔnu o kwuru nū nhne o znirni. Ọ gbarū nhne matj gbasiri J̄ni Nye Wū Mini, ɔwuwu mini a, nū ɔrnurna Jizosi. O znernu nū ruwhnu kwu nhne gbasiri ele sno apna Jizosi nū ele irno a. N'ipne-aznū ọkwukwo a, o kwuru gbasiri ɛnwu Jizosi nū olizọ n'ɛnwu a.

Nhne zj n'okwukwo ka

Opanizo izi ɔma (1:1-13)

ɛrnu Jizosi nū rime Galili (1:14--9:50)

Jizosi znirni nhne rnū ɛrnu ndu-ɛhni nū

Judiya (10:1-52)

Hite nū Galili dū Jeruselem (11:1--15:47)

Olizọ n'ɛnwu Jizosi (16:1-8)

Jizosi gesiri ɛhni a, mekwu lahna oligwe (16:9-20)

Nye gbarū okwukwo ka: Makj

Risi nhne o kwno gba a: O gesi nū Jizosi bū Nnwọ Chiokike, hite nū ɛrnu ndu-ɛhni a.

Ikwu-ɔnu J̄ni

Nye Wū Mini

(Mat 3:1-12; Luk 3:1-18; J̄n 1:19-28)

¹ Opanizo izi ɔma Jizosi Karaisi, Nnwọ Chiokike.

² Lele kpa Azaya nye ɔwhnurninya gbarū a n'okwukwo, Chiokike karū,

"Bno nsnj, le, m neezizne nye izi m nū ruwhnu j,

nye jeemekwata apna j.

³ Akp̄iri otu badnū n̄okpo okwo n'eli-ikpa, naakaa,

'Anū mekwata apna Nyenwe aj,

anū mee ma apna a sn̄rni asnj.' "

⁴ J̄ni Nye Wū Mini bū nye wam whūyaru iwhe n'eli-ikpa n̄okpo okwo naakaa ele badnū t̄hnasna mkp̄oma ma be wū be mini, ma Chiokike gbarūnu be mmehie.

⁵ Kpakara ele zj nū mgbu Judiya nū ɛli Jeruselem wh̄okwnusiri a. Ọ wū be mini n'Osimini J̄dani, be nookwuhja mmehie be.

⁶ J̄ni wogwu iwo rijni akp̄uko an̄hia be kwu kameli. Ajnj ọ snū n'ikwnu bū akp̄uko

an̄hia. Wiri a bū igwurube nū m̄ono ebeka ɔhia.

⁷ Ọ n̄okpo okwo naakaa, "Nye kakwo m rikne vawa n'aznū m, nye me kw̄sile o whudnahie ɛli t̄oma eriri okoro-ɔchi a lawuru.

⁸ M j̄i m mini wū anū mini, k̄ovu nū nye wam jeeji Enine Ns̄o n̄owu anū mini."

Ọwuwu mini Jizosi

nū ɔrnurna a

(Mat 3:13--4:11; Luk 3:21,22; 4:1-13)

⁹ N'ige wam, Jizosi hiri nū Nazareti ke zj n'eli Galili va, J̄ni wū a mini nū rime Osimini J̄dani.

¹⁰ Ngangam Jizosi hiri nū mini n̄owhuya, ọ whn̄rnu oligwe hne o kpumernu, ọ whnū Enine Ns̄o hne o neewhekwasia a lele nduru.

¹¹ Otu akp̄iri hiri n'oligwe kaa, "J̄i bū Nnwọ m me whn̄rnu n'anya, nhne j̄ masiri m."

¹² Ngangam Enine Ns̄o wam duru a bna ɛli-ikpa.

¹³ Ọ zj n'eli-ikpa nri ọbochi ɛno. Ekwensu naarna a ɔrnurna, ya nū r̄mu an̄hia zj. K̄ovu nū ele enine izi neeznenu a izi.

Jizosi sukwuru ele

noogbu aznū

(Mat 4:12-22; Luk 4:14,15; 5:1-11)

¹⁴ Nga be yisiri J̄ni n'ikelu, Jizosi znernu Galili neezni izi ɔma Chiokike gweyaru.

¹⁵ Ọ naakaa, "Ige zulem, ɛli-eze Chiokike zj nd̄undu, anū t̄hnasna mkp̄oma kweru izi ɔma."

¹⁶ Nga o znernu nū ngeri Osimini Galili, ọ whnū Saj̄moni nū Anduru nwene a rukna hne be zj n̄owu igbo nū rime osimini, kwnornu nū be b̄u ele noogbu aznū.

¹⁷ Jizosi kanū be, "Anū va sno m n'aznū, m jeeme anū b̄uru ele j̄okwuhia ele badnū lele kpa anū noogbu aznū."

¹⁸ Ngangam be sigbasi igbo be, sno a.

¹⁹ O zne nū ruwhnu matj, ọ whnū Jemisi nnwọ Zebidi nū J̄ni nwene a rukna zj n'ogbo berere, neemekwata igbo be.

²⁰ O sukwu be, ngangam be gharū Zebidi nda be n'ogbo, ya nū ele be gnornu ɛrnu, snornu a.

Jizosi ch̄ihalaru

r̄nwu ojo

(Luk 4:31-37)

²¹ Be nū Jizosi zne n'eli-ɔhna Kapan̄m bna n'oro ọgbako ele Ju n'Ọbochi Ozukwa Inwe neezni nhne.

²² Nhne o neezni duru be ɛhni, kwnornu nū o znirni nhne lele nye nwernu rikne, ọ b̄u lele ele zni iwu ele Ju.

²³ Otu nwerukna r̄nwu ojo nwūgwu bnan-yanū nū rime ọro ọgbako be, siwama,

²⁴ “Kini bu nhne ai nu ji nwekoḡwu, Jizosi nye Nazareti? I varu ma i gbumekwo ai? M maam nye i bu, i bu nye nsọ ke Chiokike.”

²⁵ Jizosi bigbora a, kaa, “Kpusnime onu i, hi nu rime a whuya.”

²⁶ Renwu ojo wam dosiri a rikne. O gweru okne nkoli si okokoba, hi nu rime a whuya.

²⁷ O duru kpakara be ehni ke mernu be bete neesikwarita ehni be, “Ka bu kini? O bu o zni nhne ikne sa? O nwernu rikne ke o ji nootunu renwu ojo oka, be bnotenu a nsni.”

²⁸ Be tnusi otnutnu a nu kpakara eli Galili.

*Jizosi gworu ele nriria
(Mat 8:14-17; Luk 4:38-41)*

²⁹ Nga Jizosi hiri n'oro oḡbako ele Ju wam whuya, ya nu Jemisi nu Joni, be bna n'oro Sajmoni nu Anduru.

³⁰ Ige wam nne nnwerne Sajmoni dnanyi naarija ehni orne bekwnu, ngangam be kanu Jizosi nhne gbasiri nwerinya wam.

³¹ O znekwnusi a, jiri a n'aka, dolizo a olu. Ngangam ehni orne bekwnu wam sigbasi a, o bete neeznenu be izi.

³² N'ogbednachi, nga ehnam dnarnu, be kwuyanu Jizosi kpakara ele nriria, nu ele renwu ojo nwuḡwu.

³³ Kpakara ele zi n'eli wam gbakoru n'onu-mgbo neelekiri.

³⁴ O gworu agida ele nriria zi odo n'odo, o chimarnu agida renwu ojo. O kwéle renwu ojo kwu oka, kwnornu nu be magwu nye o bu.

*Jizosi znirni izi oma
nu Galili*

(Luk 4:42-44)

³⁵ N'onu osisi, nga chi yóbochnage, o lizo zne hne koru owu, neekpe okpukpe.

³⁶ Sajmoni nu ele ya nu be zi noopio a.

³⁷ Nga be piohjaru a, be kanu a, “Kpakara ele badnu noopio i.”

³⁸ Koru Jizosi kanu be, “A jeezne n'eli ele ke berere ma m zni m be izi oma, kwnornu ka bu nhne me kwnornu va.”

³⁹ O zne nu rime kpakara oro oḡbako ele Ju zi nu kpakara Galili neezni izi oma, chihala masi renwu ojo.

*Jizosi gworu nye nchnichna
(Mat 8:1-4; Luk 5:12-16)*

⁴⁰ Otu nye naarija nchnichna vakwnusiri a, rjasno a, gbonu a mperne ochi, kaa, “O buru nu i piuru, i nwernu rikne mee m ziri richna.”

⁴¹ Jizosi donu a obirizi, dosnima aka a, kpatu a, kaa, “M piuru m, ziri richna.”

⁴² Ngangam be gworu a nchnichna wam, o ziri richna.

⁴³ Jizosi doru a aka nu nsni k'agida chihala a.

⁴⁴ O kanu a, “O za nye obula i kanu, koru la, gweru ehni i gesi nye okwa ariohna, gweru masi nhne Mozizi nyernu n'iwu kwa

ariohna ma o buru nhne akebbe nyee be nu i zi richna.”

⁴⁵ Koru o whogaru bete notnunu ele badnu, neewheke oka wam, ke kphjaru nu Jizosi nwema rikne berere o bna nu rime elihna hne ele badnu jowhnu a, koru o znernu hne koru owu, ele badnu neehi penupe obula naavakwnusi a.

2

*Jizosi gworu nye ehni a
donwurnu odonwu*

(Mat 9:1-8; Luk 5:17-26)

¹ Nga Jizosi lahnarnu n'eli Kapanom, kpa obochi ele nu ele whemernu, agida ele badnu nurnu nu o zi n'oro.

² Agida ele badnu varu jipiya kpa o zima oghere zi, ma n'onu-mgbo. O zi masi nookwunu be ikwu-onu Chiokike.

³ Be vakwnusi a, vuyanu a otu nye ngeri ehni a donwurnu odonwu, badnu eno vu a.

⁴ Nga be nwéle rikne du a ehni kwnornu nu agida ele badnu wam, be koma olu oro hne o zi. Nga be dokamarnu a, be vudna okpata ke nye ngeri ehni a wam donwurnu odonwu dany.

⁵ Nga Jizosi whnurnu okwnata ovu be, o kanu nye wam ngeri ehni a nwurnu onwu, “Nnwọ m, be gbarunam ji kpakara mmehie i.”

⁶ Koru nu agwna ele zni iwu ele Ju dazi eli pi, zi neesikwa nu mkpoma be,

⁷ “Kini mernu nwerukna ka jiri kwu oka kpa? O kwululem Chiokike. Ndaa nye nwernu rikne o gbaru mmehie hne o buo Chiokike kpoi?”

⁸ Ngangam, Jizosi mahjaru nu rime enine a nu be zi naarija oka wam nu rime mkpoma be, o sikwa be, “Kini kphjaru anu naari oriri ka nu mkpoma anu?”

⁹ Ndaa ke zi ewheke, o kanu nye ngeri ehni a donwurnu odonwu, ‘Be gbarunam ji kpakara mmehie i,’ mọbu o kaa, ‘Lizo, chiri etere i, zne izne.’

¹⁰ M piuru m anu mahja nu Nnwọ ke Badnu nwernu rikne n'owa o gbaru mmehie.” Jizosi kanu nye wam ngeri ehni a donwurnu odonwu,

¹¹ “M ka m ji, lizo, chiri etere i, la oro i.”

¹² Ngangam, o lizo, chiri etere a, whoga nu ruwhnu kpakara be, o du kpakara be ehni, be znarni Chiokike, naakaa, “A whnulele nhne nu kpa.”

Jizosi sukwuru Livaı

(Mat 9:9-13; Luk 5:27-32)

¹³ Jizosi whoga kwno berere nu ngeri Osimini Galili, agida ele badnu vakwnusiri a. O bete neezni be nhne.

¹⁴ Nga o neewhe, o whnu Livaı nnwọ Alifayosi, hne o dazi n'oro ntu. O kanu a, “Sno m.” O lizo snornu a.

¹⁵ Ọ dū nga Jizọsi dazị neeri wiri n'ọro Li-vai, agida ele ọna ntụ nụ ele mmehie snornu Jizọsi nụ ele sno apna a neeri wiri. Ige wam, ele sno a zị agida.

¹⁶ Nga ele zni iwu ele Ju ele bụ ele Farisi whnrnu nụ ele mmehie nụ ele ọna ntụ sno a neeri wiri, be sịkwa ele sno apna a, “Kini mernu o noosno ele ọna ntụ nụ ele mmehie neeri wiri?”

¹⁷ Nga Jizọsi nrnu a, ọ kanụ be, “Mkpa dibja ziko naakpa ele ełni bụru ọma, okwolem ele nriria. M vage m o sukwu ele ọma, okwolem ele mmehie.”

Ajji gbasiri ovu ọnu

(Mat 9:14-17; Luk 5:33-39)

¹⁸ Ọ dū nga ele sno Joni nụ ele Farisi noovu ọnu, agwna ele badnụ vakwnusi Jizọsi sịkwa a, “Kini mernu ele sno Joni nụ ele sno ele Farisi noovu ọnu, kovu ele sno apna i zā noovu ọnu.”

¹⁹ Jizọsi saru be, “Ele varu hne be nọolu nnwerne ikne be joovu ọnu hne nyerukna wam nọolu nnwerne ikne nụ be zị? Kpakara ige ke be nū nye nọolu nnwerne ikne zị, be jọovu ọnu.

²⁰ Kovu ọbochi vawa nga be jaanahoru be nye nọolu nnwerne ikne. Ọbochi wam be joovu ọnu.

²¹ “Ọ zā nye jeegweru mkpekele ikpe ikne dnusni n'iwu ọknani. O mene kpam, iwo ke ikne jodokahala nhne n'ehni ke ọknani. Ọ jodoka ke kakwo agida.

²² Ọ zā masi nye jeegweru manya ikne gbasị n'olori akpukpo ọknani. O mene kpam, manya wam jaagbawama, manya nū olori akpukpo whume etekne. Kovu be gbasị manya ikne n'olori akpukpo ikne.”

Ajji gbasiri

Ọbochi Ozukwa Inwe

(Mat 12:1-8; Luk 6:1-5)

²³ Ọ dū n'otu Ọbochi Ozukwa Inwe, Jizọsi nū ele sno apna a naagawhe n'esilawuru ẹkwu ikpa. Ele sno apna a bete ọ ghọ ikpa kpa be znezne.

²⁴ Ele Farisi kanu a, “Le, kini mernu be neeme nhne kwesile o mee n'Ọbochi Ozukwa Inwe?”

²⁵ Jizọsi saru be, “Anu gwnuna nhne Dev-idi mernu nga ọ zị nū mmekpehni, nga wiri gwnrnu a, ya nū ele snogwu a?”

²⁶ O bnazernu n'oro nsọ Chiokike, nga Abjata bụ nye risi arjohna, o ri bredi be bitaru nū ruwhnu Chiokike ke kwesile n'iwu o ri, okwolem ele okwa arjohna bụ ele kwesiri n'iwu o ri a, o nyee masi ele nū ya snogwu.”

²⁷ Ọ kanu be, “Chiokike mernu Ọbochi Ozukwa Inwe kwnornu badnụ, be méne badnụ kwnornu Ọbochi Ozukwa Inwe.

²⁸ Ọ nhne kpharu Nnwọ ke Badnụ jiri buri masi Nyenwe Ọbochi Ozukwa Inwe.”

3

Nyerukna aka

dɔnwurnu ɔdonwu

(Mat 12:9-14; Luk 6:6-11)

¹ Jizọsi bna kwno berere n'oro ọgbako ele Ju, otu nyerukna aka dɔnwurnu ɔdonwu zị pii.

² Ele Farisi zị neese a, ma ọ jooگو a n'Ọbochi Ozukwa Inwe, ma be bno a nhne.

³ Ọ kanu nyerukna wam aka a dɔnwurnu ɔdonwu, “Lizo, gwuzoru nū ruwhnu kpakara ele badnụ.”

⁴ Ọ sịkwa be, “Ọ buri ọma n'iwu o mee nhne ọma, mọbu o mee nhne buo ọma n'Ọbochi Ozukwa Inwe? Ọ znohia budnu mọbu o gbu ogbu?”

Kovu be nyasimernu bidim.

⁵ Nga o lekparu anya ngaramanga o we ełni, o nwe ovu ojo kwnornu nū mkpoma ojo be. Ọ kanu nyerukna wam, “Dɔsnima aka i.” Ọ dɔsnima aka a, aka a buri ọma lele kpa ọ zị nū mbom.

⁶ Ele Farisi whoga, ngangam be nū ele dagwunu Erodu zne gbagidne a iznuznu, kpa be joogbu a.

Agida ele badnụ

snornu Jizọsi

⁷ Jizọsi nū ele sno apna a whogaru zne ngeri Osimini Galili. Agida ele badnụ hi n'eli Galili snornu a, ma ele hi nū Judiya,

⁸ ma ele hi n'eli Jeruselem, nū eli Idumiya, ma n'obosi ehnam ke Osimini Jodani nū gburugburu Taya nū Saıdoni, vakwnusiri Jizọsi nga be nrnu kpakara nhne o mernu.

⁹ Ọ kanu ele sno apna a be mee kpa otu ogbo matı jaaziri a ndundu kwnornu agida ele badnụ wam, ọ zị be kpagbu a.

¹⁰ Ige wam, Jizọsi gworu agida ele nriria, ke kpharu agida ele nriria ojo zı ọdo n'odo nkokpu n'ehni a ma be kpatu a kpa.

¹¹ Nga obula ele renwu ojo whnrnu a, be dna n'eli nū ruwhnu a, siwama, kaa, “Jiwa bụ Nnwọ Chiokike.”

¹² Jizọsi dọ be aka nū nsnı be méko ele badnụ mahia nye ọ bụ.

Jizọsi horuru nri nū

badnụ lawuru ele izi

(Mat 10:1-4; Luk 6:12-16)

¹³ Jizọsi pnezne n'olu rugwu, sukwu ele o pioru. Be znekwnsi a.

¹⁴ Ọ horu ele rukna nri nū ebo ma ya nū be daziri, kwu be ele izi, ma o zihala be zne kpo okwo izi ọma,

¹⁵ o nyernu be rikne ọ chihala renwu ojo.

¹⁶ Ka bụ nri nū badnụ lawuru wam ọ horuru, Saımoni, nye Jizọsi jiri renwhna Pita,

¹⁷ nū Jemisi nnwọ Zebidi, nū Joni nwene Jemisi, ọ jı kwno be renwhna Banajisi, ke bụ rumu egbe oligwe,

¹⁸ nù Anduru, nù Filipu, nù Batolomi, nù Matiyu, nù Tòmosi, nù Jemisi nnwò Alifayosi, nù Tadiyosi nù Saimoni nye zì n'esilawùru ele noonwu bèkwu nù mkpòma,

¹⁹ nù Judasì Isikarijoti, nye reru a.

Jizòsi nù Belizibolu

(Mat 12:22-32; Luk 11:14-23; 12:10)

²⁰ Jizòsi bna n'otu òro, agìda ele badnù jipiya kwno berere, ke kpayarù o nwée oghere ri wiri.

²¹ Nga rùmu nne a nùrnu a, be whòga ma be nwùgwu a, kwnornu nù be karù, "Mkpòma a zùle ozu."

²² Agwna ele zni iwu ele Ju hiri nù Jeruselem va, kaa, "O nwernu Belizibolu, o ji rikne nye risi rēnwu ojo naachìhala rēnwu ojo."

²³ Jizòsi sukwukòta be, tñunu be elulu zì òdo n'òdo, "Setani ò jaachìhalali Setani?"

²⁴ Ò buru nù èli-eze kewama megidne èhni a, èli-eze wam jóogwuzoli.

²⁵ Ò buru masì nù ezi-nù-òro kewama megidne èhni a, ezi-nù-òro wam jóogwuzoli.

²⁶ Ò buru masì nù Setani lizòru megidne èhni a, kewama, o jóogwuzoli, ènwu a valēm.

²⁷ "Ò zá nye jaabnali n'òro nye dikne, naahòru a kpakara nhne a, ò buru nù o béle òsno kne dikne wam eriri. Ige wam ò jeenwe rikne naahòru a nhne zì n'òro a."

²⁸ "Owe! M naakanù anù ezi òka, Chiokike jaagbarùnu rùmu badnù kpakara arùru-èli be ruru nù òka ojo be nookwu,

²⁹ Kòvu nye òbula ke kwuru kwugidne Enine Nsò jéenwe ogbarunu tim tòm. Kwnornu nù nye wam rùlam arùru-èli nwée ogbarunu òkwnukokwnu."

³⁰ Jizòsi kwuru ka kwnornu nù be naakaa nù o nwernu rēnwu ojo.

Nne Jizòsi nù rùmu nne a

(Mat 12:46-50; Luk 8:19-21)

³¹ Nne Jizòsi nù rùmu nne a varù, be gwuzoru n'ederezi, ziznenu a izi, noosukwu a.

³² Agìda ele badnù wam zì a gburugburu kanù a, "Le, nne i nù rùmu nne i zì n'ederezi noopio i."

³³ Jizòsi sìkwaru be, "Nyele bù nne m nù rùmu nne m?"

³⁴ O lehnata anya ele dazì a gburugburu, kanù be, "Anù le nne m nù rùmu nne m."

³⁵ Nye òbula ke neeme nhne Chiokike noopio, nye wam bù nwene m rukna nù nwene m rinya nù nne m."

4

Elulu nye ogha mkpuru

(Mat 13:1-9; Luk 8:4-6)

¹ Jizòsi panìzo neezni kwno nhne nù ngeri osimini. Agìda ele badnù jihàru hne ò zì, ke kpayarù ò bnazne n'ogbo, daziri èli. Kpakara igbudu badnù wam gwuzoru nù mkpomkpo èli.

² O ji elulu neezni be agìda nhne zì òdo n'òdo. Nù nhne o neezni, ò kaa,

³ "Anù bnote nsnì, otu nye èrnu èkwu zn-èrnu agha mkpuru.

⁴ Ò dù nga ò naagha mkpuru, agwna mkpuru dnarnù nù ngeri apna. Rùmu ònunu tùturu be ta.

⁵ Agwna mkpuru dnarnù n'èli rugwu hne be nwée agìda rìzna, ngangam mkpuru wam fuhàru, kwnornu nù be nwée agìda rìzna.

⁶ Kòvu nga èhnam wasìri, be chnanwù, kwnornu nù be nwée ègwugwnu.

⁷ Agwna mkpuru berere dnarnù n'esilawùru igwnu, igwnu wam sohìa, kpagbu a, ò mìnayage mkpuru.

⁸ Agwna mkpuru berere dnarnù n'èli buru òma, fuhìa, nooso, naaba, mihìa nri mkpuru èto, berere nri isunu, berere otu riwhu."

⁹ Ò kanù be, "Nye nwernu nsnì ò ji ò nù nhne, ò nùrnu."

Nhne o kwno tñù elulu

(Mat 13:10-17; Luk 8:9,10)

¹⁰ Nga Jizòsi nù ele sno apna a nri nù badnù lawùru wam zì, nù agwna ele berere, be sìkwaru a nhne gbasìri agìda elulu.

¹¹ Ò kanù be, "Be mernu anù mahìa nhne tugwaru otugwa ke èli-eze Chiokike, kòvu ele zì n'ederezi, be naakanù be kpakara nhne n'elulu,

¹² ma

'Be neele anya kpò, gharù ò whnù, ònonu nù nsnì, gharù ò ghòhia, ò zì be tũhnasna mkpòma hne Chiokike zì, nwehìa ogbaru."

Risi elulu nye

ogha mkpuru wam

(Mat 13:18-23; Luk 8:11-15)

¹³ Jizòsi sìkwa be, "Anù ghòhiage elulu ka? Ndaa kpa anù jeeji ghòhia kpakara elulu?"

¹⁴ Nye èrnu èkwu naagha mkpuru ghasìri ikwu-ònu Chiokike.

¹⁵ Mkpuru ele ke dnarnù nù ngeri apna nù lele ele ke nùrnu ikwu-ònu wam, kòvu nga be nùrnu a, ngangam Ekwensu varù gweme òka wam nù mkpòma.

¹⁶ Mkpuru ke be ghasìri nù hne rugwu zì nù lele ele ke nùrnu ikwu-ònu wam, ngangam be gweru snarnìma gweru a.

¹⁷ Kòvu nù be nwée ègwugwnu, be dazì ige matì, omekwo, nga mmekpèhni mòbu awhnùwhnu varù kwnornu nù ikwu-ònu wam, ngangam be dnahnala aznù.

¹⁸ Mkpuru ke be ghasìri n'esilawùru igwnu nù lele ele ke nùrnu ikwu-ònu wam,

¹⁹ kòvu mmekpèhni ke òwa ka, nù aghìgho ò whnù èkwu n'anya, nù nkòli ke nhne berere, bnanyarnù, kpagbu ikwu-ònu wam. Ò ghò nhne mìnà mkpuru.

²⁰ Mkpuru ke be ghasìri n'èli buru òma nù lele ele ke nùrnu ikwu-ònu wam, be narnù

a, o mįpiya nri mkpuru ęto, berere nri isunu, berere otu riwhu.”

Elulu tņnji n'olu ikpechi
(Luk 8:16-18)

²¹ Jizōsi kanų be, “Anų neegweya tņnji bįta a nų mkpururu nkįta, mōbu nų mkpururu ękpata? O bįo n'olu nhne be bįta tņnji?”

²² Kwnornu nų o zą nhne be bigwaru abįgwa, ke be jęeme o whųya iwħne, be jookpume kpakara nhne be kpusnirni okpusni.

²³ O bųru nų nye nwernu nsnį o jį o nų nhne, o nrnu.”

²⁴ O kanų be, “Anų bnote nsnį nkarį nkarį nhne anų nņonu. Nhne anų jiri tųnu nye berere bų nhne be jeeji tųnu anų, be jeenye anų karųkwo.

²⁵ Nye nwernu nhne bų nye be jeenye, nye nwęe, be jaanahōru a, o bųbedi ke o nwernu.”

Elulu mkpuru nooso oso

²⁶ Jizōsi kaa, “Eli-eze Chiokike nų lele nga badnų kpasįri mkpuru n'ęli.

²⁷ O zni anyarna n'abalį tnenya n'iwħnehnie, mkpuru wam fuhįa, nooso, nye wam mąa kpa o jį neeme kpa.

²⁸ Eli nų nsnųnu a neeme isisi nooso, naamįhia mkpuru, ke mbōm, o fuhįa, omekwo igwugwere, omekwo įkpa karų aka ke hi n'igwugwere.

²⁹ Kōvu nga įkpa wam karų, ngangam, o gweru ama bete o gbu įkpa kwnornu n'įge o gwe nhne n'ękwu dųlam.”

Mkpuru mōsitadi
(Mat 13:31,32,34; Luk 13:18,19)

³⁰ Jizōsi kaa, “A jeeji kįni gbu esni ęli-eze Chiokike? Mōbu ndaa kpa a jeeji nņotnu elulu a?”

³¹ O nų lele mkpuru isisi be kwu mōsitadi, ke, nga be kpasįri a n'ęli, o bų mkpuru isisi zį matį kakwo kpakara mkpuru n'ōwa.

³² Kōvu nga be kpasįri a, o sohįa bųru nhne kakwo kpakara nhne be kpasįri n'ęli, wahįa agįda nkala hna ezi, ke mernu oņunu nņornu alįkwu nų mkpururu idno a.”

³³ Jizōsi jiri agįda elulu nų kpa nookwunu be ikwu-ōnu Chiokike, lele kpa be jōonuli.

³⁴ O kwųgene be ikwu-ōnu hne o jįle elulu. Kōvu nga ya nų ele sno apna a kpōi dazįri, o kōwanu be risi kpakara elulu ka.

Jizōsi bigbōru
ruwhere osimini

(Mat 8:23-27; Luk 8:22-25)

³⁵ O dųru n'ogbednachi, o kanų ele sno apna a, “Ngwa ma a whe aka osimini kįyari.”

³⁶ Nga be whōgaru n'įgbudu badnų wam, be bnakwnusi Jizōsi n'ogbo ke o zį, be nų ya snornu. Ogbō ele ke berere sno be.

³⁷ Okne abaka-mini lizō, mini nņowubna nų rime ogbo wam, ke kpahįaru mini jįhįa n'ogbo wam.

³⁸ Kōvu nų Jizōsi zį n'aznų ogbo neezni anyarna n'olu nhne oche-risi. Be kpatnenya a, kanų a, “Nye-zni-nhne, o gbąsįla į nų a noowhu sa?”

³⁹ O tnenya, bigbō ruwhere, kanų okne osimini, “Udno! Dazįri bii.” Ruwhere whebiri, oħna dna bii.

⁴⁰ Jizōsi kanų be, “Kįni mernu anų nņotu ogwnu? O bų nų anų nwęe ękwната mkpōma sa?”

⁴¹ Be tųru ogwnu k'agįda, be nęesikwarita ęħni be, “Nye ka bų nyele? Ke ruwhere nų okne osimini noobnotenu nsnį?”

5

Jizōsi gwōru nye
ręnwu ojo nřwugwu
(Mat 8:28-34; Luk 8:26-39)

¹ Jizōsi nų ele sno apna a vadu ngeri Osimini Galili kįyari, n'ęli ele Gerasa.

² Nga o hiri n'ogbo whųya, otu nyerukna ręnwu ojo nřwugwu hiri nų hne be li iznu kwnusi a.

³ O wu nų hne be li iznu, o zįma nye nwernu rikne tų a įjįgba,

⁴ kwnornu nų be tųsilam a įjįgba nų nhne ikelu agįda ige, o gbajįkwo įjįgba, lijįkwo nhne ikelu be tųgwu a. O zįma nye nwernu rikne mee anya dno a.

⁵ Ige oħula, abalį nų iwħnehnie o zį nų hne be li iznu ma n'olu rugwu, neesi okokoba, gweru akaworugwu bųko nņodowa ęħni a ęħni.

⁶ Kōvu nga o whnrnu Jizōsi nų hne zį ikere, o gba ęso, kpōnu a risi ęli.

⁷ O gweru okne nkōli si okokoba, naakaa, “Kįni bų nhne me nų jį nwekōgwu, Jizōsi Nnwō ke Chiokike Kakwo Nhne Dum Olu?”

⁸ Ka bų kwnornu nų Jizōsi kannų a, “Hi nų rime a whųya, jį ręnwu ojo.”

⁹ Jizōsi sįkwa a, “Kįni bų ręwhna į?”

O kaa, “Ręwhna m bų Lįjōni, kwnornu nų a zį agįda.”

¹⁰ O rįasnosi Jizōsi rikne o chįhala be n'ęli wam.

¹¹ Kōvu agįda ezni zį pįam naata wiri nų ngeri rugwu zį ndųndu.

¹² Kpakara ręnwu ojo wam rįasno Jizōsi, kaa, “Zize aį nų rime ezni ma a bna nų rime be.”

¹³ Jizōsi kweru be, kpakara ręnwu ojo wam whųyaru zne bna nų rime ezni wam, kpakara rųmu anōhįa wam, ke dųru pokwu lawųru, gbadnarnų nų ngwulangwu ngeri mini, rinwų nų rime mini.

¹⁴ Ele nņoznu be gbawhuru, tņusi a n'ęli-ōħna ma nų rime ękwu. Be va whnų nhne mernu.

¹⁵ Be vakwnusi Jizōsi, whnū nye wam agida rēnwu ojo n̄wūgwu nū mbōm, hne ọ dazị ẹli, woru iwo, mkpōma a zumasiri ozu, be tū ogwnu.

¹⁶ Ele whnūrnū a tñrnū nhne mernu nye wam rēnwu ojo n̄wūgwu nū odokwnu ezni wam.

¹⁷ Be bete arıasno Jizōsi ọ whōga nū ngeri ẹli be.

¹⁸ Nga ọ naabna nū rime ogbo, nye wam rēnwu ojo n̄wūgwu nū mbōm rıasno a ma o snornu a la.

¹⁹ Jizōsi kwéle. Kōvu ọ kanū a “La n’oro i, lakwnusi ele ke i, tñsinu be kpakara nhne Nyenwe aị mennu, nū kpa ọ dōnnu i obirizi.”

²⁰ Nwerukna wam la, panizo n̄otnu nū rime Dekapolisi nhne Jizōsi mennu a, o duru kpakara ele badnū ẹhni.

Nnwọ rinya matị nū

nwerinya ntū ọvnarna

(Mat 9:18-26; Luk 8:40-56)

²¹ Nga Jizōsi lahnarnū aznū bna n’ogbo dū nū aznū osimini kiyari, agida ele badnū jihıaru nū hne ọ zị. Ọ daziri nū ngeri osimini.

²² Otu nū rime ele risi ọro ogbako ele Ju, nye rēwhna a bụ Jariōsi, varū, nga o whnūrnū Jizōsi, ọ dna n’ẹli n’ochi a,

²³ rıasno a, kaa, “Nnwọ m rinya matị zị n’ōnu ẹnwu, va soso tūkwasi a aka i lawūru ma i dōhia a, ọ ziri būdnu.”

²⁴ Jizōsi snornu a zne. Agida badnū snornu a naakpagbu a.

²⁵ Otu nyerinya ke naarıa ntū ọvnarna nri nū awha lawūru sno nū igbudu ele badnū wam,

²⁶ ke whnūrnū agida awhnūwhnu n’aka agida ele dibia, tuwhukwo kpakara nhne o nwernu, kōvu ọ bnána mbnarna ọbula, ọ jōru bujo ke agida.

²⁷ Nga ọ nūrnū nhne gbasiri Jizōsi, ọ va n’aznū a n’igbudu badnū wam, kpatū iwo a aka,

²⁸ kwnornu nū ọ karū, “Ọ buri me kpatū iwo a aka kpōi, o jeeme ẹhni buri m ọma.”

²⁹ Ngangam ọvnarna a gbabiri, o metū a n’ẹhni nū be gwōlam a nrıria ojo wam.

³⁰ Ngangam Jizōsi mahıaru nū rikne hilem n’ẹhni a whōga. Ọ tūnasna n’igbudu badnū wam sika, “Nyele kpatūru iwo m aka?”

³¹ Ele sno apna a kanū a, “I whnūrnū igbudu badnū naadnagidne i, i naakaa, ‘Nyele kpatūru m aka?’ ”

³² O le anya gburugburu ma ọ jōowhnu nye ke mernu nhne ka.

³³ Nwerinya wam, kpa ọ mahıaru nhne mernu a, ọ yahna n’ogwnu naama a ririri, dna n’ẹli n’ochi a, kōwanu a kpakara ezi ọka zị a.

³⁴ Jizōsi kanū a, “Nnwọ m rinya, ọkwnta mkpōma i znōhıalam ji, la nū udno, nrıria i la.”

³⁵ Nga Jizōsi kpū ọka n’ōnu, ele hi n’oro nye risi ọro ogbako ele Ju wam va, naakaa, “Nnwọ i rinya n̄wūnam. Ndaa ke i naakpaknata Nye-zni-nhne ẹhni?”

³⁶ Jizōsi bnōge nsni nū nhne be nookwu, ọ kanū nye risi ọro ogbako ele Ju wam, “I tūko ogwnu, kweru kpōi.”

³⁷ O kwéle nye ọbula snornu a zne, okwolem Pita, nū Jemisi nū Jōni nwene Jemisi.

³⁸ Nga be vaduru n’oro nye risi ọro ogbako ele Ju wam, ọ whnūrnū mkpakpō, nū agida ele naakwna ẹkwna, neesi okokoba.

³⁹ Nga ọ bnazernu, ọ sika be “Ndaa nhne anū naakpakpōnu, naakwna? Nnwọ rinya ka n̄wūna ọnwu, kōvu ọ zị n’anyarna.”

⁴⁰ Be mū a rumu. Nga ọ chıhalaru kpakara be, o kwuru nda watakiri wam nū nne a nū ele nū ya sno bna nū hne watakiri wam dnanyi.

⁴¹ Ọ n̄wūgwuru watakiri wam n’aka, kanū a, “Talita kumi,” ke bụ, “Nnwọ rinya matị, m ka m ji, lizo.”

⁴² Ngangam, nnwọ rinya matị wam lizo, neezne izne (ọ gbarū nri nū awha lawūru). O duru be ẹhni k’agida.

⁴³ Jizōsi dọ be aka nū nsni ọ ziko nye mahıa nhne mernu. Ọ kaa masi be nyee a nhne o ri.

6

Be juru Jizōsi nū Nazareti

(Mat 13:53-58; Luk 4:15-30)

¹ Jizōsi hi hnam whōga, va n’ẹli a, ele sno apna a snornu a.

² Ọ dū n’Ọbuchi Ozukwa Inwe, ọ panizo o zni nhne n’oro ogbako ele Ju. Nga be nūrnū nhne o neezni, o duru be ẹhni, be n̄esikwa, “Ndaa hne nwerukna ka nwehıaru kpakara nhne ka? Kını bụ akōnıche ke be nyernu a. Ndaa kpa o ji n̄ornu kpakara ẹrnū ndu-ẹhni ka?”

³ Ka ọ būo nye ọkwa-nka wam, nnwọ Meri, nū nwene Jemisi nū Josefu, nū Judasi, nū Saimoni? Ọ būo rumu nne a rinya zị n’esilawūru aị hna?” Be we ovu ẹhni megidne a.

⁴ Jizōsi kanū be, “Okwolem nū ẹli ke a nū ezi-nū-oro a, ma nū esilawūru ele ke a, bụ hne nye ọwhurninya nwée ọsobisinu.”

⁵ Ọ rnūlige ẹrnū ndu-ẹhni n’ẹli kị, okwolem nū o bikwasiri ele nrıria ele nū ele aka, me ẹhni siri be rikne.

⁶ Ọkwe ekwe be duru a ẹhni.

Jizōsi zıhalaru ele izi a

nri nū ẹbo

(Mat 10:5-15; Luk 9:1-5)

Jizōsi zne nū rime ẹli-ọhna zị ichne ichne zị be ndūndu, neezni nhne.

⁷ O sukwu ele izi nri nū ẹbo wam, panizo neezihala be ẹbo ẹbo, nyee masi be rikne nū hne rēnwu ojo zị.

⁸ O nyee be iwu be jíkò nhne òbula n'izne be, okwolem mkpara, be jíkò nhne oriri, m̀òbu r̀ekpa, m̀òbu ̀ıwai ǹu r̀ekpa iwo be.

⁹ O karu be woru okoro-òchi, be wóko iwo lawuru.

¹⁰ O kanu be, “Anu dazigidne n'oro òbula anu jaabna, tem anu whoga n'eli wam.”

¹¹ Hne òbula be nábnanyana anu m̀òbu bnóne nsnj n'ikwu-ònu anu, anu j̀owhoga pii, l̀isnama r̀izna ke zı n'ochi anu, ma o buru nhne akebne megidne be.”

¹² Be whoga nookwunu ele badnu ikwu-ònu Chiokike, be t̀uhnasma mkpoma.

¹³ Be chíhalaru agida renwu ojo, tesi masi agida ele naaria aria m̀ono, me ehni siri be rikne.

Enwu Jóni Nye Wú Mini

(Mat 14:1-12; Luk 9:7-9)

¹⁴ Eze Eròdu nurnu a, kwnornu nu r̀ewhna Jizosi whòlam iwihne. Agwna badnu naakaa nu Jóni Nye Wú Mini hilem n'enwu lizo, o bu nhne mernu kpakara rikne ka ji nòornu ernu ndu-ehni nu rime a.

¹⁵ Ele berere karu, “O bu Elajia.”

Ele berere kaa, “O bu nye owhnurninya, lele otu nu rime ele owhnurninya gbaka.”

¹⁶ Kòvu Eròdu nurnu a, o kaa, “O bu Jóni Nye Wú Mini, nye me biri risi, o lizòlam.”

¹⁷ Eròdu karu nu m̀òbm be nwudne Jóni, kne a eriri n'oro ikelu kwnornu nu Erodiasi nnwerne Filipu nwene a, nye o luru.

¹⁸ Jóni kannu Eròdu, “O búo oma n'iwu òlu nnwerne nwene i.”

¹⁹ Erodiasi beteru o vunu Jóni irno nu mkpoma, o pioru o gbu a, kovu nu o nwée rikne,

²⁰ kwnornu nu Eròdu turu ogwnu Jóni. O mahjaru nu o bu nye mee mma nu nye zı nso, o bıkwata a nkari. Ige òbula o nurnu ikwu-ònu a, oriri jihia mkpoma, kovu nu o ji snarnjma nurnu ikwu-ònu a.

²¹ N'ipne-aznu, oghere whuyanu Erodiasi. Eròdu siri wiri o chenwanya omumu a. O sukwu ele nu ya sno neechi, nu ele risi ogwnu nu ele risi eli Galili.

²² Nga nnwo rinya Erodiasi bnanyarnu tne eri soru Eròdu nu ele nu ya zı n'onu k'agida, eze kanu woknornokno wam, “Rio m nhne òbula masiri i, m jeenye i.”

²³ O kweru a mkwna kwesi a rikne, kaa, “Nhne òbula i r̀ioru m, m jeenye i, o b̀ubedi o keme eli-eze m ebo.”

²⁴ O whoga sikwa nne a, “Kini bu nhne me jorio?”

O kanu a, “Risi Jóni Nye Wú Mini.”

²⁵ Nnwò rinya wam gba eso kwnusi eze, kanu a, “M choru m i nyee m risi Jóni Nye Wú Mini n'agbugba kítina.”

²⁶ Ehni nwurnu eze, kovu kwnornu mkwna wam o kweru nu ele ya nu be dazı neeri

wiri, o masıla a o la aznu nu mkwna o kweru a.

²⁷ Ngangam, o zihala nye gbu badnu, nyee a iwu o bihia risi Jóni. O zne bihia risi Jóni n'oro ikelu.

²⁸ O vuya risi a n'agbugba, nyee a nnwo rinya wam, nnwo rinya wam nyee a nne a.

²⁹ Nga ele sno apna Jóni nurnu a, be va vuru iznu a lite.

Jizosi nyernu pokwu

badnu isne wiri

(Mat 14:13-21; Luk 9:10-17; Jón 6:1-14)

³⁰ Ele izi Jizosi hiebnanyarnu hne Jizosi zı, be tnusinu a kpakara nhne be mernu nu kpakara nhne be znirni ele badnu.

³¹ Kwnornu nu agida ele badnu naava, naala, oghere o ri wiri zıla, Jizosi kanu be, “Anu va ichne nu hne kovu owu, zukwaru inwe.”

³² Be nu nsnunu be bna n'ogbo zne hne kovu owu.

³³ Agida badnu whnurnu nga be neezne. Be mahjaru be, be hi nu kpakara eli-òhna gweru ochi gbako nu pii, beru be osno du.

³⁴ Nga Jizosi whuyaru n'ogbo, o whnu igbudu ele badnu, o donu be obirizi, kwnornu nu be nu lele atnurnu nwée nye nòoznu be. O panizo neezni agida nhne.

³⁵ Nga obochi znemirnu, ele sno apna a vakwnusi a, kaa, “Hna kogwu owu, obochi zneminem.”

³⁶ Zihala ele ka ma be zne nu rime ekwu ma nu rime eli-òhna zne zuru nhne oriri.”

³⁷ Kovu Jizosi kanu be, “Anu nyee be nhne be jeeri.”

Be sikwa a, “A jeezne zuya brędi riwhu mkpuru iwai lawuru, nyega be, ma be ri?”

³⁸ O sikwa be, “Anu nwernu ike brędi ele? Zne lekasi.”

Nga be mahjaru, be kaa, “Ike brędi isne, nu aznu lawuru.”

³⁹ Jizosi kanu be mee kpakara be daziri eli nu mkpuru nu mkpuru n'olu achara budnu.

⁴⁰ Be daziri eli nu mkpuru nu mkpuru, ele otu riwhu nu ele nri isne.

⁴¹ Jizosi gweru ike brędi isne wam nu aznu lawuru wam, le anya n'oligwe, tu mmamma, nyawama ike brędi isne wam, nyee ele sno apna a ma be nyee ele wam. O keme aznu lawuru wam n'esilawuru kpakara be.

⁴² Kpakara be ri, riji ruwho.

⁴³ Ele sno apna a tutukota ruvnuruvnu brędi nu aznu ke gwnarnu ke jihjaru nri nu nkita lawuru.

⁴⁴ Ele riri brędi wam bu pokwu ele rukna isne.

Jizosi znernu izne

n'olu mini

(Mat 14:22-33; Jón 6:15-21)

⁴⁵ Ngangam o mee ele sno apna a bna n'ogbo, beru a osno kwowhe aznu osimini du eli Betesaida, nga o neezila igbudu badnu wam.

⁴⁶ Nga o zilakworu be, o zne n'olu rugwu zne kpe okpukpe.

⁴⁷ N'ogbednachi, ogbo wam zi n'esilawuru okne osimini, ya nu nsnunu a zi n'olu eli.

⁴⁸ O whnu be hne be zi n'odoli n'okwo ogbo kwnornu nu ruwhere neewhegidne be. O vakwnusi be nu onu osisi neezne izne n'olu mini. O pio o whe be,

⁴⁹ Kovu nga be whnuru a hne o neezne izne n'olu osimini, o nu be lele renwu. Be si okokoba k'agida.

⁵⁰ Kpa kpakara be whnuru a, mkpoma la be mini.

O kanu be, "Mkpoma si anu rikne, o bu mawa. Anu tuko ogwnu."

⁵¹ O pnekwnusi be nu rime ogbo, ruwhere wam wehberi. O duru kpakara be ehni k'agida.

⁵² Be ghoyage eru ndu-ehni gbasiri ike bredi isne wam, mkpoma be ghoyagele a.

*Jizosi gworu ele nriria
n'eli Genezaretii*

(Mat 14:34-36)

⁵³ Nga be wheru, be vadu n'eli Genezaretii kpokwnusi ogbo be.

⁵⁴ Kpa be whuyaru n'ogbo, ngangam agida ele badnu mahiaru Jizosi.

⁵⁵ Be gbazu kpakara eli wam, panizo noovuya n'okpata ele nriria penupe obula be nuru o zi.

⁵⁶ Hne nu hne obula o bnaznenu, n'eli mati, mibu eli hna ezi, mibu n'ekwu, be dnanyita ele nriria n'ahia, be naarjasno a ma be kpatu ke bu onu iwo aka. O gworu kpakara ele kpaturu onu iwo a aka.

7

Omen'eli ke ele mbom
(Mat 15:1-9)

¹ Nga ele Farisi nu agwna ele zni iwu ele Ju hiri nu Jeruselem vakwnusi Jizosi,

² be whnuru nu ele sno apna a ji aka kpuru rune neeri wiri, ke bu aka be kwola okwo.

³ Ele Farisi nu kpakara ele Ju ri wiri hne be kwola aka nkarı. Be naabita omen'eli ke ele mbom znirni be.

⁴ Be hi ahia yahna, be ri nhne obula hne be hnjage ehni. O zi masi omen'eli berere ke be nahiaru, noosno, lele kpa be snu okiko, nu ite, nu okwu.

⁵ Ele Farisi nu ele zni iwu ele Ju sikwa Jizosi, "Kini kpayaru ele sno apna i za naabita omen'eli ele mbom? Be gweru aka be kwokwala nkarı neeri wiri."

⁶ Jizosi saru be, "Azaya whnuru owhnurninya gbasiri anu k'ezi, naakaa, anu

bu ele ruwhnu lawuru, lele kpa be gbaru a n'okwukwo nso, naakaa,

'Ele ka ji mgbele-onu etekne nosobisinu m, kovu mkpoma be zi ikere nu hne me zi.

⁷ Be n'okponu m risi eli n'etekne, neezni nhne badnu nyernu n'iwu lele nu o bu iwu ke Chiokike.'

⁸ Anu naagharu iwu ke Chiokike, nwukwaru omen'eli ke badnu."

⁹ Jizosi kanu be, "Anu marnu ama gharu nhne Chiokike nyernu n'iwu ma anu bita omen'eli anu.

¹⁰ Kwnornu nu Mozizi karu, 'Sobisinu nda i nu nne i,' nu 'Nye obula ke jovu nda a mibu nne a onu, be gbu a.'

¹¹ Kovu anu karu nye obula ke jaakanu nda a mibu nne a, 'Nhne i jeerihia n'aka m bu Kobani' (ke bu nkesi o nyernu Chiokike)

¹² Ige wam anu jeeke o menu nda a mibu nne a nhne berere.

¹³ Anu neeme nhne ka neegweru ikwu-onu Chiokike neeme nhne etekne hite n'omen'eli ke anu, neenyewhete a n'aka ele berere. Nu agida nhne nu kpa anu neeme."

Nhne neemeru badnu
(Mat 15:10-20)

¹⁴ Jizosi sukuru igbudu badnu wam berere kanu be, "Anu bnote nsnı n'ikwu-onu m, anu ghohia a masi.

¹⁵ O za nhne ke hi n'ederezi bna nu rime badnu ke nwernu rikne meru a. Kovu nhne ke hiri nu rime badnu whuya bu nhne neemeru badnu." [

¹⁶ Nye nwernu nsnı o ji o nu nhne o nuru.]

¹⁷ Nga o gharuru agida ele badnu wam bna nu rime oro, ele sno apna a sikwaru a ajji gbasiri elulu wam.

¹⁸ O saru be, "Ke bu nu anu nwee oghohia? Anu ma nu nhne ke hiri n'ederezi bna nu rime badnu nwee rikne meru a?

¹⁹ Kwnornu nu o bnana nu rime mkpoma a, hne o bnarnu bu ruwho a, be nynohala a n'osoro." (Ka bu ke Jizosi jiri kaa nu kpakara wiri zi richna.)

²⁰ Jizosi zi koriri nookwu, "Nhne ke hiri nu rime badnu whuya bu nhne neemeru badnu.

²¹ Kwnornu nu o bu nu rime mkpoma badnu bu hne kpakara oriri ojo hi nowhuya, ome oyi, oznu buznu, ogbu badnu,

²² ome oyi ele nwernu nnwerne nu ele nwernu nzi, anyakwu, aruru-eli, aghigho, ogba ewhere, owho-anya, okaja, oknomokno, iwhnirniwhno,

²³ Kpakara nhne ojo ka hi nu rime badnu whuya, be meru badnu."

*Okwnata ovu otu
nwerinya Sirofinisa*
(Mat 15:21-28)

²⁴ Jizōsi hi nū rime pji whōga, zne n'eli zi rāya ndūndu. Ō bna n'otu oro, ō piole ele badnū mahja, kovu nū be nwée rikne bīgwa a.

²⁵ Ngangam, otu nyerinya ke nnwō a rinya matī nweru rēnwu oju nūrnū nhne gbasiri Jizōsi, o varū dna n'eli n'ochi a.

²⁶ Nwerinya wam būo nye Ju, be mūrnu a nū Sirofinisa. Ō rjasno a ma ō chihala rēnwu oju wam n'ehni nnwō a rinya.

²⁷ Jizōsi kanū a, “Beru ōsno nyejite rūmu takiri wiri rūwhō, kwnornu nū ō būo ōma o gweru wiri rūmu takiri tūhalanu nkīta.”

²⁸ Kovu ō sarū, “Nyenwe aī, ō būbedi rūmu nkīta ke zī nū mkpururu ikpechi neeri rūvnuruvnu wiri rūmu takiri.”

²⁹ Jizōsi kanū a, “Kwnornu nū nhne ka i kwuru, la, rēnwu oju wam whōgalam n'ehni nnwō rinya.”

³⁰ Ō la n'oro a, whnū nū nnwō a dnanyī n'olu ōkpata, nū rēnwu oju wam whōgalam masi.

Jizōsi gworu nye mgbu nū nsnī inyo

³¹ Jizōsi whōgaru nū ngeri Taya gawhe n'esilawūru Sajdoni, hi n'esilawūru eli Dekapolisi dū Osimini Galili.

³² Be kwuyanū a otu nyenum ke dnarnū mgbu ke nū nsnī, be rjasno a ma o bikwasī a aka a.

³³ Jizōsi kwuhala a n'esilawūru agida badnū whōga ichne, ō yisi mkpaka a nū nsnī a lawūru, gbū ōnu-mini, kpatū riro a aka.

³⁴ Ō lelizo anya n'oligwe, snū idne, kaa, “Eƒata,” ke risi a bū, “Kpume.”

³⁵ Ngangam nsnī a lawūru kpumernu, nhne knesnirni a riro tōmarnu, o kwukwata ōka.

³⁶ Jizōsi kasīnu be rikne be kánukwadia nye ōbula, kovu kpa ō naakanusīnu be rikne bū kpa be neewheke a.

³⁷ Ō duru kpa be hna ehni k'agida, be naakaa, “Ō neeme kpakara nhne būru ōma. Ō mernu ele nsnī inyo nū nsnī, ele mgbu kwu ōka.”

8

Jizōsi nyernu pokwu badnū eno wiri (Mat 15:32-39)

¹ N'ige wam nga agida ele badnū gbakōru berere, be nwée masi nhne be jeeri. Jizōsi sukwu ele sno apna a, kanū be,

² “M nōdonu agida ele badnū ka obirizi, kwnornu nū me nū be dazīlam ōbochi ęto, be nwée nhne be jeeri.

³ Ō būru nū me zihala be n'ōnu etekne, anya-ajū joovu be n'apna, agwna be hi hne zī ikere va.”

⁴ Ele sno apna a sīkwa a, “Ndaa kpa badnū jeeji nyeji ele badnū ka wiri rūwhō n'eli-ikpa hna?”

⁵ Ō sīkwa be, “Anū nweru ike brēdi ele?” Be kaa, “Esaú.”

⁶ Ō kanū agida ele badnū wam daziri eli. Ō gweru ike brēdi esaú wam, tūnu Chiokike mmamma, ō nyawama be, nyee ele sno apna a be bete neenye ele badnū, ele sno apna a kesiri ele badnū wam wiri.

⁷ Be nwemasiri aznū matī ele nū ele, ō tū kwno mmamma, kaa be nyee ele wam.

⁸ Be ri, rūwhō ji be, be tūtukota rūvnuruvnu brēdi ke gwnarnū, ekperi nkīta esaú jihjharu.

⁹ Be dūru pokwu eno, Jizōsi zihala be.

¹⁰ Jizōsi bna nū rime ōgbo, ya nū ele sno apna a, be va nū eli Dalamanuta.

Ele Farisi piuru nhne elekema

(Mat 16:1-4)

¹¹ Ele Farisi varū panizo nēsesikwa a ajiji, noopio nhne elekema hi n'oligwe, naakpa a iru.

¹² Ō snū idne k'agida nū rime oву a, kaa, “Kini kpaħjaru ebiri ka noopio nhne elekema? N'ezī me kanū anū, ō zá nhne elekema be jeenye ebiri ka.”

¹³ Ō gharū be bna kwno nū rime ōgbo whe aznū osimini kijari.

Nhne whū brēdi ele Farisi nū Erodu

(Mat 16:5-12)

¹⁴ Ele sno apna a chezuru o gweru brēdi, be ji otu ike brēdi kpōi nū rime ōgbo.

¹⁵ Jizōsi kasīnu be rikne, “Anyā dū anū eli, anū neeze nhne whū brēdi ke ele Farisi nū Erodu.”

¹⁶ Be nōotnurita n'esilawūru be, naakaa, “Ō bū kwnornu nū a jile brēdi.”

¹⁷ Nga Jizōsi mahjharu a, ō kanū be, “Kini kpaħjaru anū naakaa nū anū jile brēdi? Anū yōghoyage? Nduu ōtula anū sa?”

¹⁸ Anū nweru anya, anū whnū ōsno? Anū nweru nsnī, anū nū nhne? Anū gbadiyala?

¹⁹ Nga me keru ike brēdi isne n'esilawūru pokwu badnū isne, nkīta ele jihjharu nū rūvnuruvnu anū vulizōru?”

Be kaa, “Nri nū ębo.”

²⁰ “Nga me keru esaú nye pokwu badnū eno, rūvnuruvnu nkīta ele bū nhne anū vulizōru?”

Be kaa, “Esaú.”

²¹ Ō kanū be, “Ō bū nū anū yōghohiala kōriri?”

Jizōsi gworu nye isni nū Bętesaida

²² Jizōsi nū ele sno apna a va n'eli Bętesaida. Be kwuyanū a otu nye isni, rjasno a ma ō kpatū a aka.

²³ Ọ nwụgwuru nye isni wam n'aka, duru a zne n'aznụ ẹli-ọhna wam. Ọ gbụsi a ọnu mini n'anya, tükwasi a aka a lawuru, ọ sịkwa, "Ọ zị nhne j nọowhnu?"

²⁴ Ọ le anya n'olu, kaa, "M nọowhnu badnụ, kọvu be nụ lele isisi neezne izne."

²⁵ Jizọsi tükwasi kwno a aka a lawuru n'anya a berere, o legidne anya, anya a buru ọma, ọ whnụsnama kpakara nhne nkarị.

²⁶ Ọ zihala a n'oro a, kanụ a, "Ị lánhakwadia nụ rime ẹli-ọhna berere."

*Pita kahiaru nye Jizọsi bụ
(Mat 16:13-20; Luk 9:18-21)*

²⁷ Jizọsi whọga, ya nụ ele sno apna a bna nụ kpakara ẹli-ọhna matị zị ndundu Sizaria Filipaj. Nga be zị n'apna, ọ sịkwa ele sno apna a, "Ele badnụ be naakaa nụ me bụ nyele?"

²⁸ Be saru a, "Agwna be naakaa Ọni Nye Wụ Mini, ele ke berere naakaa Ẹlajia, ele ke berere kaa otu nụ rime ele ọwhnurninya."

²⁹ Ọ sịkwa, "Anụ n'iwihuru anụ, anụ kanụ nụ m bụ m nyele?"

Pita saru a, "Ji n'iwihuru i bụ Karaisi wam."

³⁰ Ọ dọ be aka nụ nsni, kaa, "Ọ zá nye anụ kanụ nhne gbasiri m."

*Jizọsi kwuru ọka
gbasiri ẹnwu a*

(Mat 16:21-28; Luk 9:22-27)

³¹ Jizọsi panizo neezni be nhne, naakaa, "Nnwọ ke Badnụ jaatariri agịda awnhnụwhnu, ele okno badnụ nụ ele risi arịohna nụ ele zni iwu ele Ju jọjọ a, be gbu a, nga ọbochi ẹto whemernu, o jeehi n'ẹnwu lizo."

³² Ọ kwuru ka kpa nye ọbula jọoghohia. Pita kwuhala a, naabnanu a.

³³ Nga ọ tughnasarnu whnụ ele sno apna a, ọ bigbọ Pita, kanụ a, "Zne n'aznụ m, Setani, kwnornu nụ i neeche echiche lele badnụ, ọ bụo lele Chiokike."

³⁴ Ọ sukwu igbudu badnụ wam nụ ele sno apna a, ọ kanụ be, "Ọ buru nụ nye ọbula jooosno m n'aznụ, ọ jọjọ ẹhni a, vuru ọgba a sno m.

³⁵ Nye ọbula ke noopio ọ dọhia bụdnu a jootuwu a, kọvu nye ọbula ke jootuwu bụdnu a kwnornu m nụ izi ọma, ọ jọoznohia a.

³⁶ Mbnarna kịni bụ nhne badnụ jeenwe ọ buru nụ o rihia kpakara ọwa n'iru tuwhume bụdnu a?

³⁷ Kịni bụ nhne badnụ jeeji gbanwo bụdnu a?

³⁸ Nye ọbula ke iwagnerne m nụ ikwu-ọnu m jootu n'ebiri ewhere nụ aruru-ẹli ka, iwagnerne nye wam jootu Nnwọ ke Badnụ nga ọ jaava n'igwugwu ke Nda a, ya nụ ele enine izi a zị nsọ."

9

¹ Jizọsi kanụ be, "Me kanụ anụ ezi ọka, agwna ele gwuzo hna jọonwu ẹnwu tem be whnụ ẹli-eze Chiokike hne o ji iknernema va."

*Onwoghari Jizọsi
(Mat 17:1-13; Luk 9:28-36)*

² Nga ọbochi isunu whemernu, Jizọsi kwuru Pita, nụ Jemisi, nụ Ọni duru be preezne n'olu rugwu zị olu whọga ichne. Ọ nwoghari nụ ruwhnu be.

³ Iwo a noonwu va-a-a ke ọ zá nye zị n'ọwa ka jọosnuli iwo kị.

⁴ Be whnurnu Ẹlajia nụ Mozizi, be nụ Jizọsi nookwurita ọka.

⁵ Pita kanụ Jizọsi, "Nda-aj-kwu, ọ buru ọma a daziri hna, ngwa ma a wu ọro-ẹka ẹto, otu buru ke i, otu ke Mozizi, otu ke Ẹlajia."

⁶ Ogwnu turu be ke kpayaru ọ má nhne o nookwu.

⁷ Erumeru oligwe varu kpusni be, akpiri hiri nụ erumeru oligwe wam whuya, kaa, "Ka bụ Nnwọ m me whnurnu n'anya, anụ bnotenu a nsni."

⁸ Kpurugadnam, nga be leru anya gburugburu, ọ zá nye be whnurnu, okwolem Jizọsi kpoi.

⁹ Nga be hiri n'olu rugwu wam hiehna, ọ kasinu be rikne, be kanu nye ọbula nhne be whnurnu, tem Nnwọ ke Badnụ hi n'ẹnwu lizo.

¹⁰ Be bita nhne ka nụ mkpọma be. Be neesikwa n'esilawuru ẹhni be, "Kini bụ risi olizo n'ẹnwu?"

¹¹ Be sịkwa a, "Kini kpayaru ele zni iwu ele Ju jiri kaa nụ Ẹlajia jeebe ọsno va?"

¹² Jizọsi saru be, "Ọ bụ n'ezị nụ Ẹlajia jeebe ọsno va, bıkwata kpakara nhne lele kpa ọ zị nụ mbọm. Kini mernu be gbaru a n'okwukwo nsọ gbasiri Nnwọ ke Badnụ, nụ ọ jaata agịda awnhnụwhnu, be ju masi a?"

¹³ Kọvu me kanu anu nụ Ẹlajia valẹm, be mee a kpa o jiri masi be, lele kpa be gbaru a n'okwukwo nsọ gbasiri a."

*Jizọsi gworu nnwọ rukna
(Mat 17:14-21; Luk 9:37-43a)*

¹⁴ Nga Jizọsi nụ badnụ ẹto ele sno apna a vakwnusiri ele sno apna a ele berere, be whnurnu igbudu badnụ gbaru be gburugburu, whnụ masi ele zni iwu ele Ju hne be nọodogbuta.

¹⁵ Ngangam o du kpa be hna ẹhni k'agida nga be whnurnu a, be gbazne, bekwu a.

¹⁶ Jizọsi sịkwa ele sno apna a, "Kini bụ nhne anu nụ be nọodogbuta?"

¹⁷ Otu nyenum nụ rime igbudu badnụ wam saru a, "Nye-zni-nhne, m kwuyannu m ji nnwọ m rukna ke nwernu rẹnwu dnarnu mgbu.

¹⁸ Penupe obula o nwụgwuru a, o vudna a n'eli, o nọogbo okoto n'onu, naata rụkwurmuzi, rọknete ehnị. M kanu ele sno apna i ma be chihala a, kovu nu be nwée rikne."

¹⁹ Jizosi saru be, "Anu ebiri ke nwée okwnata mkpoma, me nu anu jaadazi du ngele? Me jeesinu anu ovu du ngele? Anu kwuyanụ m nnwo wam hna."

²⁰ Be kwuyanụ a nnwo rukna wam. Nga renwu ojo wam whnuru Jizosi, ngangam, o dọsi nnwo rukna wam rikne. O dna n'eli nọtunri a, o nọogbo okoto n'onu.

²¹ Jizosi sika nda a, "Ndaa nga nhne ka beteru eme a?"

O kaa, "Hite nga o bu nnwo matị.

²² Agida ige, o dọbnaru a nu rime bekwnu ma nu rime mini ma o gbu a. O buru nu o nwernu nhne i jeemeli, donu ai obirizi, yisinu ai aka."

²³ Jizosi kanu a, "I naakaa, o buru nu o nwernu nhne me jeemeli? Kpakara nhne jeemelinu nye nwernu okwnata ovu."

²⁴ Ngangam, nda nnwo watakiri wam siwama, "M kweru m, yisinu okwe ekwe m aka."

²⁵ Nga Jizosi whnuru nu agida badnu naagbaya, o bigbo renwu ojo wam kaa, "Ji renwu ke dnaru mgbu nu nsu inyo, m neenye i iwu, hi nu rime a whuya, i bnama nu rime a berere."

²⁶ Renwu ojo wam si okokoba, dọsi a rikne, hi nu rime a whuya. Nnwọ wam dna lele nye nwuru onwu, ke kpararu agida badnu jiri kaa, "O nwunam we."

²⁷ Kovu Jizosi nwugwuru a n'aka dolizo a, o lizo.

²⁸ Nga Jizosi bnanyaru n'oro, ele sno apna a sika a ichne, "Kini kpararu a nwene rikne chihala renwu ojo wam."

²⁹ O kanu be, "Renwu nu lele ka jowhoga nu nhne obula, okwolem n'okpukpe."*

Jizosi kwukwornu oka

gbasiri enwu a

(Mat 17:22,23; Luk 9:43b-45)

³⁰ Be hi nu pii whuya gawhe n'esilawuru Galili. O kwéle nye obula mahia hne be zi,

³¹ kwnornu nu o neezni ele sno apna a nhne, naakaa, "Be jeegweru Nnwọ ke Badnu resi n'aka ele badnu, be joogbu a, nga obochi eto whemernu, o jeeji n'enwu lizo."

³² Kovu nu be ghohiala oka wam, ogwnu kwéle be sika a nhne gbasiri a.

Nyele kakwo ibne a?

(Mat 18:1-5; Luk 9:46-48)

³³ Be vadu Kapanom, nga Jizosi bnaru n'oro, o sika be, "Kini bu nhne anu nookwu n'apna?"

³⁴ Kovu be mesnirni onu be, kwnornu nu be nọdogbuta n'apna nye kakwo ibne a n'esilawuru be.

³⁵ Jizosi daziri eli sukwu ele sno apna a nri nu ebo wam. O kanu be, "O buru nu nye obula noopio o bu nye risi, o jobu nye ipneaznu, nu nye neeznenu kpakara ele badnu izi."

³⁶ O kwuru otu watakiri gwuzote a n'esilawuru be, o jiri a n'aka a, kanu be,

³⁷ "Nye obula ke jaanaru otu nu rime watakiri ka nu rehna m, nanaru m, nye obula ke jaanaru m k'ezi, o buo me bu nye o nanaru k'ezi, o bu nye ziyaru m."

Nye za neemegidne ai

dagwunu ai

(Luk 9:49,50)

³⁸ Joni kanu a, "Nye-zni-nhne, a whnuru otu badnu hne o naachihala renwu ojo nu rehna i, a bnosni a, kwnornu nu o za noosno ai."

³⁹ Jizosi kaa, "Anu bnosni a, kwnornu nu o za nye joruru enu ndu-ehni nu rehna m, ke jaakaa m oka ojo ngwa ngwa."

⁴⁰ Nye za neemegidne ai dagwunu ai.

⁴¹ M naakanu anu ezi oka, nye obula ke jookwute anu otu okiko mini anu nwọ kwnornu nu anu bu ele Karaisi jaanahariri ogwo enu a."

Nhne jeeme badnu mehie

(Mat 18:6-9; Luk 17:1,2)

⁴² "Nye obula ke jeeme otu nu rime ele matị ka mehie, bu ele kweru nu me, o jaakanu a mma nu be gweru okne rugwu ogwe-wiri nyasi a n'ili, migbu a n'okne osimini."

⁴³ O buru nu aka i jeeme i, i mee mmehie, gbubime a, o jaakanu i mma o bna nu budnu kwó okwo vuru oru karu o nwernu aka i lawuru bna nu bekwnu eli renwu chni echni. [

⁴⁴ Kị bu hne rukpurukpuru be nwú onwu, bekwnu be chni echni.]

⁴⁵ O buru masi nu ochi i jeeme i, i mee mmehie, gbubime a, o jaakanu i mma o bna nu budnu kwó okwo nu mgworo karu o nwernu ochi lawuru i, be tubna i nu bekwnu eli renwu. [

⁴⁶ Kị bu hne rukpurukpuru be nwú onwu, bekwnu be chni echni.]

⁴⁷ O buru masi nu anya i jeeme i, i mee mmehie, gwupu a, o jaakanu i mma o bna n'eli-eze Chiokike nwernu otu anya karu o nwernu anya lawuru be tubna i nu bekwnu eli renwu.

⁴⁸ Kị bu hne rukpurukpuru be nwú onwu, bekwnu be chni echni.

* 9:29 Agwina okwukwu kwuru: *hite n'okpukpe nu ovu onu.*

49 “Lele kpa a ji arụa mee wiri sọ n'ọnu, ọ bụ kpa Chiokike neeji bẹkwu awghuwhnu mee ele ke a bụru ele agwa ọma.

50 “Arụa bụru ọma, kọvu arụa tuwhu ọso n'ọnu a, be jeeji kịni mee a ọ sọ n'ọnu? Anụ nwernu arụa nụ rime anụ ma anụ nụ ibne anụ ziri n'udno.”

10

Ogba nnam

(Mat 19:1-12; Luk 16:18)

1 Jizọsi whọga zne n'ike ẹli Judiya n'aznu Osimini Jodani kiyari, agida ele badnu jipiya kwno hne ọ zi. Lele kpa o mesi, o neezni be nhne.

2 Agwna ele Farisi vakwnusi a, sịkwa a, “Ọ bụru ọma n'iwu nyerukna gba nnwerne a nnam?” Be naakpa a iru.

3 Ọ sịkwa be, “Kini bụ nhne Mozizi nyernu anụ n'iwu?”

4 Be kaa, “Mozizi kweruru nyerukna gba ọkwukwo nnam nyee nnwerne a, chihala a.”

5 Jizọsi kanu be, “Kwnornu nụ mkpoma ọjo anụ kpararu Mozizi gbaru iwu ka n'okwukwo.

6 Kọvu hite n'ọpanizo okike ọwa, Chiokike kpuru be nyerukna nụ nyerinya.

7 Kwnornu nụ ka, nyerukna jaagharu nda a nū nne a, takwnusi n'ehni nnwerne a,

8 be lawuru jọgho otu anọ-ehni. Be buma badnu lawuru, kọvu otu anọ-ehni.

9 Nhne Chiokike knekọtaru, badnu tọtmana a.”

10 Nga be bnarnu nū rime ọro, ele sno apna a sịkwa a ajiji gbasiri ọka ka berere.

11 Ọ kanu be, “Nye ọbula ke jaagba nnwerne a nnam lū nnwerne berere, neemegidne a ọyi.

12 Ọ buri masi nū nnwerne gba nzi a nnam, gbọru nzi berere, o neeme masi ọyi.”

Jizọsi gọziri rumu takiri

(Mat 19:13-15; Luk 18:15-17)

13 Ele badnu nookwuyanu Jizọsi rumu takiri ma ọ kpatu be aka, kọvu ele sno apna a bigbọru ele kwuyaru be.

14 Nga Jizọsi whnurnu a, o we ehni k'agida, ọ kanu be, “Anụ gharu rumu takiri ma be vakwnusi m, anụ bnosi be, kwnornu nū ẹli-eze Chiokike bụ ke ele nū kpa.

15 Me kanu anụ ezi ọka, nye ọbula ke jeegweru ẹli-eze Chiokike lele nnwọ matị, ọ jaabna nū rime a rja rja.”

16 O kwuru be n'aka a lawuru, tukwasi be aka a, gọzi be.

Otu nye ọchichi

(Mat 19:16-30; Luk 18:18-30)

17 Nga Jizọsi whọgaru n'apna, otu nyenum gbakwnusi a, gbunu a mperne ọchi, sịkwa a, “Omamarna Nye-zni-nhne, kini bụ nhne me jeeme ma m kehja m budsonu kwó okwo?”

18 Jizọsi saru a, “Kini kpararu i noosukwu m nye ọma? Ọ zá nye bụ nye ọma, okwolem otu badnu, bụ Chiokike kpọi.

19 I maam kpakara nhne be nyernu n'iwu, i gbuko badnu, i méko ọyi, i znuko buznu, i gbako akebne aghalaghala, i mégbuko badnu, sọbisinu nda i nū nne i.”

20 Ọ kanu a, “Nye-zni-nhne, kpakara nhne ka bụ nhne me bitaru hite n'ikoro m.”

21 Jizọsi leri a anya ọma, kanu a, “Otu nhne gwnarnu i jeeme, la, re kpakara nhne i nwernu, kesi ele mboni, i jeenwe ẹkwnu n'oligwe, vaa, sno m.”

22 Ruwhnu gbaruru a n'ọka wam, ọ la, naagbaru ruwhnu, kwnornu nū o nwernu ẹkwnu k'agida.

23 Jizọsi leri anya gburugburu, kanu ele sno apna a, “Le kpa o jiri ra ehni ele nwernu ẹkwnu ọ bna n'eli-eze Chiokike!”

24 Ọka wam du ele sno apna a ehni, kọvu nū Jizọsi ka masinu be, “Rumu m, le kpa o jiri ra ehni ọ bna n'eli-eze Chiokike.

25 Ọ zinu anohia kameli ewheke ọ gawhe n'anya alanga karu ele nwernu ẹkwnu ọ bna n'eli-eze Chiokike!”

26 O du kpakara ele sno apna a ehni k'agida, be sịkwarita ehni be, “Ndakwanu nye be jọznohia?”

27 Jizọsi leri be anya kaa, “Hne badnu zi be jeemeli a, kọvu ọ bụo hne Chiokike zi. Be meli kpakara nhne hne Chiokike zi.”

28 Pita panizo naakanu a, “Le, a sigbasiri kpakara nhne a nwernu, snornu i.”

29 Jizọsi kanu, “Me kanu anụ ezi ọka, ọ zá nye ọbula ke sigbasiri ọro, mọbu rumu nwene rukna, mọbu rumu nwene rinya, mọbu nne, mọbu nda, mọbu rumu, mọbu ẹkwu kwnornu m nū izi ọma,

30 ke jaanahja karu riwhu nga riwhu n'ige ka, ọro nū rumu nwene rukna, nū rumu nwene rinya, nū nne, nū rumu, nū ẹkwu, be nū mmekpehni masi, nū budsonu kwó okwo n'ige wagwu nū ruwhnu.

31 Kọvu agida ele be ọsno jọobu ele ipne-aznu, ele ipne-aznu jọobu ele be ọsno.”

Jizọsi kwuru ọka gbasiru

enwu a ke mgba ẹto

(Mat 20:17-19; Luk 18:31-34)

32 Nga be zi n'apna neezne Jeruselem, Jizọsi neezne nū ruwhnu be, o du ele sno apna a ehni, ele snogwu a n'aznu ọotu ogwnu. O kwuru kwno nri nū badnu lawuru wam ichne, panizo naakanu be nhne jeeme a.

33 Ọ kanu be, “A neezne Jeruselem, be jeegweru Nnwọ ke Badnu nyewhete n'aka ele risi arịohna nū n'aka ele zni iwu ele Ju, be jaama a ikpe enwu, gweru a nyee n'aka ele bụo ele Ju.

³⁴ Be jeeme a nhne rumu, gbụ a ọnu mini, pnia nhne, gbu a, nga ọbuchi ẹto whemernu o jeehi n'ẹnwu lizọ."

Aririo rumu Zebidi
(Mat 20:20-28)

³⁵ Jemisi nū Jōni rumu Zebidi, vakwnusi Jizōsi, rjọ a, "Nye-zni-nhne, a nọorio ma i menu aị nhne ọbula a jọorio i."

³⁶ Ọ sịkwa be, "Kini bụ nhne anụ noopio me menu anụ?"

³⁷ Be kanụ a, "Mee kpa a jaadaziri otu n'akarikwnunga i, otu n'akarita i, n'igwugwu i."

³⁸ Jizōsi kanụ be, "Anụ maa nhne anụ nọorio. Anụ jọonwoli okiko ke me nọonwo? Mọbu be wuli anụ mini ke be nọowu m?"

³⁹ Be kanụ a, "A nwernu rikne."

Jizōsi kanụ be, "Okiko me nọonwo bụ ke anụ jọonwo, mini be wuru m bụ ke be jọowu anụ."

⁴⁰ Kọvu o dazị n'akarikwnunga m nū akarita m bụo ke m n'onyega. Ọ bụ ke ele Chiokike bjkwatannu a."

⁴¹ Nga ele sno apna a nri ke gwnarnu nurnu a, be wesanụ Jemisi nū Jōni ẹhni k'agida.

⁴² Jizōsi sukwukọta be, kanụ be, "Anụ magwu nū ele be gwnurnu n'ele risi ke ele bụo ele Ju neeme ele be nechi kpa o masiri be, ele kwu be ji aka rikne neechi ele zị nū mkpururu be.

⁴³ Kọvu o bụo kpm n'esilawuru anụ. Nye piuru o buru nye kwu n'esilawuru anụ jọbu nye neeznenu anụ izi.

⁴⁴ Nye piuru o buru nye mbom n'esilawuru anụ, jọbu ohi kpakara anụ.

⁴⁵ Kwnornu nū Nnwọ ke Badnụ vage ma be znenu a izi, kọvu ma o neeznenu ele berere izi, ma o gweru masi budsonu a nyee, ma o buru nhne ọgbahia agida badnụ."

Jizōsi gwọru Batimōsi
nye isni

(Mat 20:29-34; Luk 18:35-43)

⁴⁶ Be vadu Jeriko, nga Jizōsi nọowhoga nū Jeriko, ya nū ele sno apna a nū agida ele badnụ, Batimōsi nnwọ rukna Timōsi nye kpuru isni dazị nū ngeri apna nọorio nhne.

⁴⁷ Nga o nurnu nū o bụ Jizōsi nye Nazaretị neewhe, o panizo neesi okokoba, naakwnakwu a, "Jizōsi, Nnwọ Devidi, dōnu m obirizi."

⁴⁸ Agida ele badnụ bigbọru a ma o kpusime ọnu a, kọvu o siwama k'agida, "Ji Nnwọ Devidi, dōnu m obirizi."

⁴⁹ Jizōsi gwuzoru, kaa, "Anụ sukwu a."

Be sukwu nye isni wam, kanụ a, "Mkpoma si i rikne, lizọ, o noosukwu i."

⁵⁰ Ọ chjwhume iwo a, wulizo, kwnusi Jizōsi.

⁵¹ Jizōsi sịkwa a, "Kini bụ nhne i piuru me menu i?"

Nye isni wam kaa, "Nyenwe aị, mee ma m whnurnu m ọsno."

⁵² Jizōsi kanụ a, "La, ọkwnata mkpoma i znohialam ji."

Ngangam o bete o whnū ọsno, snornu Jizōsi n'apna.

11

Jizōsi bnaznernu
Jeruselem

(Mat 21:1-11; Luk 19:28-40; Jōn 12:12-19)

¹ Nga Jizōsi nū ele sno apna a naavadu Jeruselem ndundu, n'eli Bētifagi nū Bētani, be vadu nū Rugwu Olivu, o zizne badnū lawuru nū rime ele sno apna a.

² Ọ kanụ be, "Anụ zne nū mgbu matj ke zị nū ruwhnu anụ, ngangam anụ naabna nū rime a, anụ jowhnu nnwọ iyinya be kpogwu eriri, ke o ziko nye daziri n'olu a, anụ tōma a, tōya hna."

³ Ọ zị nye sịkwaru anụ, "Kini mernu anụ neeme nhne ka?" Anụ kaa, "Ọ zị Nyenwe aị mkpa, o jeegwehnahe a kịta."

⁴ Be znernu whnū nnwọ iyinya be kpogwu n'ọnu-mgbo ọro zị n'apna, be topiya a.

⁵ Ele gwuzogwu pji sịkwa be, "Kini bụ nhne anụ neeme, nọoto nnwọ iyinya wam?"

⁶ Be kanụ be nhne Jizōsi karu, be gharu be.

⁷ Be tọyanu Jizōsi nnwọ iyinya wam, wukwasi a iwo be n'olu a, o daziri n'olu a.

⁸ Agida ele badnū gbata iwo be n'apna, ele berere nkala isisi ke be gbuharu n'ohia.

⁹ Ele neezne nū ruwhnu nū ele noosno, neesi okokoba, naakaa, "Ozana!

Chiokike gozi nye ke naava nū rēwhna Nyenwe aị.

¹⁰ Nhne be goziri ogozi bụ ẹli-eze nda i Devidi! Ozana nū hne kakwo n'olu!"

¹¹ Jizōsi bna nū rime Jeruselem, bnazne Ọro Nso, nga o lekworu kpakara nhne anya, kpa o bụ ogbednachi, o whoga zne Bētani, ya nū nri nū badnū lawuru wam, ele sno apna a.

Jizōsi vuru isisi
be kwu figi ọnu
(Mat 21:18,19)

¹² N'ekile a, nga be hiri nū Bētani naava, wiri gwnurnu Jizōsi.

¹³ Nga o whnurnu isisi figi nū hne zị ikere ke nwernu ọkwukwo budsonu, o zne ma o zị nhne o jowhnu n'olu a. Nga o vaduru a ẹhni, o whnuna nhne ọbula okwolem ọkwukwo budsonu, kwnornu nū o bụo ige mkpuru figi.

¹⁴ Ọ kanụ isisi figi wam, "Ọ zá badnū ọbula jeeri mkpuru hi n'olu i berere." Ele sno apna a nurnu a.

Nhne Jizōsi mernu
n'Ọro Nso Chiokike

(Mat 21:12-17; Luk 19:45-48; Jōn 2:13-22)

¹⁵ Be vadu Jeruselem, Jizōsi bna Ọro Nsọ Chiokike panizo ọ chihala ele neere, nū ele nọozu ahia n'Ọro Nsọ Chiokike. O kpute ikpechi kpakara ele naagbanwo iwai ruwħnu n'eli nū ngadna ele neere nduru.

¹⁶ O kwéle badnū ọbula vuru nhne gawħe Ọro Nsọ Chiokike.

¹⁷ O neezni nhne, naakaa, “Be gbarū a n'okwukwo nsọ, kaa, 'Be jookwu ọro m ọro okpukpe ke kpakara mba.'”

Kovu anū mernu a ọ bụru ọbna ele buznu.”

¹⁸ Ele risi arjohna nū ele zni iwu ele Ju nurnu a, pio kpa be joogbu a. Kovu nū be tūru ogwnu o mee a nhne ọbula, kwnornu nū nhne o znirni duru agida ele badnū ẹhni.

¹⁹ N'ige ogbednachi, Jizōsi whōga n'eli-ohna Jeruselem, ya nū ele sno apna a.

Isisi figi wam kpōnwurnu
(Mat 21:20-22)

²⁰ Nga be neezne n'osisi, be whnū isisi figi wam nū ọ kpōnwunam dū ẹgwunugwu a.

²¹ Pita chenwanya, kanū a, “Nda-aj-kwu, le isisi figi wam i vuru ọnu kpōnwunam.”

²² Jizōsi sarū be, “Anū nwe ọkwwnata ovu nū Chiokike.

²³ N'ezi me kanū, nye ọbula ke jaakanū rugwu ka, 'Lizo, dnabna osimini,' ke nwée mkpōma lawūru, kovu nū o kwerruru nū nhne o kwuru jeeme, o jeemenu a kpm.

²⁴ Kam kparayā, me naakanū anū, nhne ọbula anū jōorio n'okpukpe, kweru nū anū nwehjalām a, ọ jōobu masi ke anū.

²⁵ Berere, nga anū gwuzoru neekpe okpukpe, anū gbarūnu nye ọbula nhne ojo o mernu anū, ma Nda anū ke zī n'oligwe gbarūnu anū kpakara nhne ojo anū. [

²⁶ Kovu ọ bụru nū anū jāagbarūnu badnū, Nda anū ke zī n'oligwe jāagbarūnu anū nhne ojo anū.”]

Rikne Jizōsi
(Mat 21:23-27; Luk 20:1-8)

²⁷ Be va kwno berere nū Jeruselem. Nga Jizōsi neeznegharī nū rime Ọro Nsọ Chiokike, ele risi arjohna nū ele zni iwu ele Ju nū ele okno badnū vakwnusiri a.

²⁸ Be sīkwa a, “Rikne kīni bū nhne i ji neeme kpakara nhne ka? Ọ bū nyele nyernu i rikne neeme i ji neeme be?”

²⁹ Jizōsi sarū be, “M jaasīkwa anū otu ajji, anū sa m, omekwo, m jaakanū anū rēwhna rikne me ji neeme kpakara nhne ka.

³⁰ Ọwu mini Jōni, o hiri n'oligwe mōbu n'aka badnū? Anū sa m.”

³¹ Be kwu a n'esilawūru be, kaa, “Ọ bụru nū a kaa, 'O hiri n'oligwe,' ọ jaasīkwa aī, 'Kīni mernu anū kwéle a?’”

³² Kovu ọ bụru nū a kaa, ‘O hi n'aka badnū...’ ” (Be nọotu ogwnu ele badnū kwnornu nū kpakara badnū kweru nū Jōni bū nye ọwhnurninya n'ezi.)

³³ Be sarū Jizōsi, “A máa.”

Jizōsi kanū be, “M jáaka masīnu anū rēwhna rikne me ji neeme kpakara nhne ka.”

12

Elulu ele ẹrnu ẹkwu vaiñi
(Mat 21:33-46; Luk 20:9-19)

¹ Jizōsi panizo nookwunu be ọka n'elulu, “Otu nyerukna kparū vaiñi, ọ gba a mgbugba gburugburu. O gwu igbodo hne be zōsna mkpuru isisi. O wuru ọro olu ele nse, o gweru ẹkwu wam yisi n'aka ele jeelekōta a, whōga zne n'eli berere.

² Nga ige ọ ghō mkpuru dūru, o ziznenu ele ẹrnu ẹkwu wam otu ohi, ma ọ nahia be agwna mkpuru hi n'ẹkwu wam.

³ Be nwūgwu a, pñā nhne, zihala a n'aka etekne.

⁴ O zizne kwno ọhi berere, be liwa nye kī risi, mee kwno a nhne iwhnerne.

⁵ O zizne kwno nye berere, be gbu nye kī, nū agida ele berere, be pñā agwna nhne, gbu agwna be.

⁶ “Nyerukna wam nwernu otu badnū ke gwnarnū, bū nnwō ọ whnurnu n'anya, o zizne a n'ipne-aznū, kaa, ‘Be jōosobisinu nnwō m.’”

⁷ “Kovu nū ele ẹrnu ẹkwu wam kwuritaru n'esilawūru be, ‘Ka bū nye jeeri mkpe nye nwe ẹkwu ka, anū va ma a gbu a, nhne mkpe a jōobu ke aī.’”

⁸ Be nwūgwu a gbu a, tuwhume a n'aznū ẹkwu wam.

⁹ “Kīni bū nhne nye nwe ẹkwu wam jeeme? Ọ jaava, gbumekwo ele ẹkwu wam, gweru ẹkwu wam nyewhete n'aka ele berere.

¹⁰ Anū gwnūna nhne be gbarū n'okwukwo nsọ,

‘Akaworugwu ke ele noowu ọro jūru, kiyam ghōlam risi nsūkala ọro.

¹¹ Ka bū ẹrnu Nyenwe aī, ọ bū nhne ndu-ẹhni n'anya aī?’”

¹² Be pio kpa be jōonwugwu a, kwnornu nū be mahjaru nū be bū ele o kwno tñu elulu ka. Kovu nū be tūru ogwnu agida ele badnū wam, be gharū a lahna.

Otu ntū-ẹli
(Mat 22:15-22; Luk 20:20-26)

¹³ Be ziznenu a agwna ele Farisi nū ele dagwūnu Erōdu ma be nwūgwu a n'ikwu-ọnu a.

¹⁴ Be vaa, kanū a, “Nye-zni-nhne, a magwū nū i kwu ezi ọka, i sō badnū anya, kwnornu nū i lé badnū anya nū ruwħnu, kovu i neezni apna Chiokike n'ezi ọka, ọ bụru ọma n'iwu a tū ntū nyee Siza, sōbu nū ọ būo ọma? A tū sōbu a tū?’”

¹⁵ Jizōsi mahjaru ruwħnu lawūru be. Ọ kanū be, “Anū kwno kīni naakpa m iru?”

Gweyanu m otu mkpuru iwai me ledu a anya.”

¹⁶ Be gweyanu a, o sika be, “Nyele nwe ruwhnu nu rewhna ka?”

Be kaa, “Siza nwe.”

¹⁷ Jizosi kanu be, “Anu nyee Siza nhne ke Siza, nyee masi Chiokike nhne ke Chiokike.”

O du kpakara be ehni nu hne o zi.

Ajji gbasiri olizo n'enu

(Mat 22:23-33; Luk 20:27-40)

¹⁸ Ele Sadusi, ka bu ele karu nu olizo n'enu za, vakwnusi Jizosi, sika a,

¹⁹ “Nye-zni-nhne, Mozizi gbaru n'okwukwo nyee ai, kaa, ‘O buru nu nwene rukna nyerukna nwu, ghasa nnwerne a, kovu nu o nwée rumu, nwene a rukna jooluru nnwerne a muihanu nwene a rukna rumu.’

²⁰ Rumu nne esau zi, ke mbom luru nnwerne nwuma, nwée nnwo,

²¹ ke ebo kwuru a, o nwu masi, o nwée nnwo, ke eto masi otu aka wam.

²² Ele rukna esau wam nwée nnwo, n'ipne-aznu kpakara be nu nwerinya wam nwukparu.

²³ N'olizo n'enu, nyerinya wam o joubu nnwerne nyee n'esilawuru be, kwnornu nu be esau luru a nu nnwerne?”

²⁴ Jizosi saru be, “Anu gahieru apna, anu ma a nhne be gbaru n'okwukwo nsu, mubu rikne ke Chiokike.

²⁵ Kwnornu nu nga be jeehi n'enu lizo, be lu nnwerne, be gbo nzi, kovu nu be nu lele ele enine izi n'oligwe.

²⁶ Nu nhne gbasiri olizo n'enu ke ele nwurnu onwu, anu gwnu a n'okwukwo Mozizi nu hne be gbaru nhne gbasiri isisi mati wam neerne bekwnu, kpa Chiokike jiri kanu a, ‘Mawa bu Chiokike ke Eberham, nu Chiokike ke Aziki, nu Chiokike ke Jekopu?’

²⁷ O buo Chiokike ke ele nwurnu onwu, kovu Chiokike ke ele zi budnu. Anu naagahie apna k'agida.”

Iwu ke kakwo ibne a

(Mat 22:34-40; Luk 10:25-28)

²⁸ Otu nu rime ele zni iwu ele Ju varu, nu hne be nesikwarita ehni be ajji, o mahiaru nu Jizosi sakwaru be nkari, o sika a, kaa, “Ndaa ke bu ke mbom nu kpakara nhne be nyernu n'iwu?”

²⁹ Jizosi saru a, kaa, “Ke mbom bu ka, ‘Anu bnote nsnj Izireli, Nyenwe ai Chiokike ai, Nyenwe ai bu otu.

³⁰ I jowhnu Nyenwe ai bu Chiokike i n'anya, hite nu kpakara mkpoma i, hite nu kpakara enine i, hite nu kpakara qiri i, hite nu kpakara iknerna i.’

³¹ Ke ebo bu ka, ‘I jowhnu nye agbatibi i n'anya lele ehni i.’ O za nhne berere be nyernu n'iwu ke kakwo ka.”

³² Nye zni iwu ele Ju wam kaa, “Owe! Nye-zni-nhne, i kalam n'ezi nu o bu otu Chiokike, nu o za nye berere, okwolem ya,

³³ nu o whnu a n'anya hite nu kpakara mkpoma i, hite nu kpakara oghohia i, hite nu kpakara iknerna i, nu o whnu nye agbatibi i n'anya lele ehni i, kakwo kpakara arjohna okporne bekwnu nu arjohna berere.”

³⁴ Nga Jizosi whnurnu nu o sakwayaru a lele nye nwernu akoniche k'ezi, o kanu a, “I zila ikere nu hne eli-eze Chiokike zi.”

Nga ka wheru, o zima nye berere nwernu rikne sika a ajji berere.

Karaisi bu nnwo nyele?

(Mat 22:41-46; Luk 20:41-44)

³⁵ Nga Jizosi neezni nhne n'Oro Nso Chiokike, o sikwaru, “Ndaa kpa ele zni iwu ele Ju jiri naakaa nu Karaisi bu Nnwu Devidi?”

³⁶ Enine Nso hiri n'onu Devidi kwu oka,

kaa,
‘Nyenwe ai kannu Nyenwe m,
Daziri eli n'akarikwnunga m,
tem du nga me jaabita ele irno i
nu mkpuru ochi i lawuru.’

³⁷ Devidi n'iwuru a noosukwa a Nyenwe a, ndaa kpa o jeeji buru nnwo Devidi?”

Anu zeru ele zni iwu

ele Ju

(Mat 23:1-36; Luk 20:45-47)

Agida ele badnu wam jiri snarnima nurnu ikwu-onu a.

³⁸ Kpa Jizosi neezni nhne, o kaa, “Anu zeru ele zni iwu ele Ju, ele o naamasu be o wo iwo awura ogologo naagahari, o naamasu be ele badnu neebekwu be ikwu n'ahia,

³⁹ nu o dazi nu risi ngadna n'oro ogbako ele Ju, ma nu ngadna kakwo mma n'ogbako iriri anu.

⁴⁰ Be bu ele neeridna oro ele rinya nzi be nwurnu, neekpe ogologo okpukpe ma ele badnu whnu be. Be jaata awhnuwhnu ke kakwo.”

Nkesi ke nwerinya

nzi a nwurnu

(Luk 21:1-4)

⁴¹ Jizosi daziri n'Oro Nso Chiokike kete ruwhnu nu hne be bitaru nhne ntu, o whnurnu agida ele badnu hne be notusi iwai nu nhne be notubna iwai. Agida ele kwu notusi k'agida.

⁴² Otu nyerinya, bu womboni ke nzi a nwurnu varu, tubna mkpuru iwai mati lawuru, ke whuyaru iwai mati.

⁴³ O sukwu ele sno apna a, kanu be, “Me kanu anu ezi oka, nwerinya ka bu womboni ke nzi a nwurnu, tusiri iwai kakwo ke kpakara ele berere tubnarnu hne be bi iwai.

⁴⁴ Kpakara be masiri aka n'agida ekwnu be nwernu gweboru tusi, kovu nu ya, womboni wam, tusikworu kpakara nhne o nwernu o jiri wuru."

13

Be joolulu Oro Nso

Chiokike

(Mat 24:1,2; Luk 21:5,6)

¹ Nga Jizosi whuyaru n'Oro Nso Chiokike, otu nu rime ele sno apna a karu, "Nye-zni-nhne, le kpa oro ele ka nu akaworugwu be jiri wu be nu mma."

² Jizosi saru a, "I whnuna kpakara oro kwu ele ka? Otu akaworugwu jogwuzo n'olu ibne a hna, be jaakwnadna kpakara be n'eli."

Mmekpehni nu

okpakna ehni

(Mat 24:3-14; Luk 21:7-19)

³ Nga o daziri eli n'olu Rugwu Olivu ke kegwu ruwhnu n'Oro Nso Chiokike, Pita nu Jemisi, nu Joni, nu Anduru, sikwa a ichne, kaa,

⁴ "Kanụ aị nḡa kpakara nhne ele ka jeeme. Kini jeegesi ige nhne ka jeemezu?"

⁵ Jizosi kanu be, "Anya du anu eli, o zi nye obula duhie anu."

⁶ Kwnornu nu agida ele badnu jaava nu rewhna m, naakaa, 'Mawa bu Karaisi,' be jooduwu agida ele badnu.

⁷ Nga anu jonu ogwnu nu otnutnu ogwnu, anu tuko ogwnu. Kpakara nhne ka jeebe osno mee, kovu okwukwo nhne yoduge.

⁸ Mba jeelizo megidne mba berere, eli-eze jeelizo megidne eli-eze berere, eli otne enye jaazi nu hne zi odo n'odo, okwnunyo jaazi. Kpakara nhne ka jonu lele opanizo igbugbu omumu nwo.

⁹ "Kovu anya du anu eli hne anu zi. Be jeegweru anu nyee n'aka ele ikpe zi odo n'odo, be jaapnia anu nhne n'oro ogbako ele Ju zi odo n'odo, anu joogwuzo nu ruwhnu ele risi nu ele eze kwnornu nu me, ma o buru nhne akebne.

¹⁰ Be jeeberu osno kpo okwo izi oma nu kpakara mba.

¹¹ Nga be nwugwuru anu gweya anu n'oro ikpe, anu beekwadia osno rigbu ehni anu n'oriri nhne anu jaakaa. Anu kwu nhne obula Chiokike karu anu kwu ige wam, kwnornu nu Enine Nso jookwunu anu onu anu.

¹² Nwene jeegweru nwene a nyee n'aka enwu, nda jeegweru nwo a nyemako. Rumu jeelizo megidne ele muru be, mee ma be nwu enwu.

¹³ Kpakara ele badnu joosno anu irno kwnornu nu me. Kovu be jooznohia nye obula ke jaaknata mkpoma, dazigidne du okwukwo kpakara nhne.

Awhnuwhnu ke

ele Jeruselem jaata

(Mat 24:15-28; Luk 21:20-24)

¹⁴ "Nga anu jowhnu nhne ruru oru ke zi nu hne o kwesile o zi, nye noogwnu nhne ka, ghohia, ele zi nu eli Judiya n'ige wam gbazne n'olu rugwu."

¹⁵ Nye ke zi n'olu oro, o hiednako, mibu bna nu rime oro zne kwahala nhne zi nu rime oro a.

¹⁶ Nye zi masi n'ekwu, o lahna aznu zne chiru iwo a.

¹⁷ Awhnuwhnu jaazinu ele rinya zi rime nu ele neechi nnwo rema n'ige wam.

¹⁸ Anu kpe okpukpe o buko n'ige okirika.

¹⁹ Kwnornu nu ige wam agida mmekpehni jaazi ke zikolele ke nga owa ke Chiokike kporu panizoru du kina, owe, o jaazi kwno berere.

²⁰ O buru nu Nyenwe ai mene obochi wam zi ichichi, o za badnu obula be jooznohiali. Kovu kwnornu nu ele o hohiaru, o mernu obochi wam ziri ichichi.

²¹ "N'ige wam, o buru nu badnu obula jaakanu anu. 'Le, Karaisi zi hna,' mibu 'O zi piri,' anu kweko.

²² Karaisi aghalaghalala zi odo n'odo, nu ele owhnurninya aghalaghalala zi odo n'odo jowo iwhe, neegesi nhne elekema nu nhne ndu-ehni zi odo n'odo, ma be duwhe ele Chiokike hohiaru, o buru nu o jeekwe omume.

²³ Kovu anya du anu eli, m bele m osno kwnonu anu kpakara nhne nga be yeemene eme.

Nnwọ ke Badnu wawa

(Mat 24:29-31; Luk 21:25-28)

²⁴ "N'ige wam, nga mmekpehni wam wemernu,

'Ehnam jaagba ochichiri,

enwa jeenye iwhe a,

²⁵ mbo ke oligwe jaadna,

kpakara iknernema ke zi oligwe

joohnio ohnio.'

²⁶ "N'ige wam be jowhnu Nnwọ ke Badnu hne o naava n'okne iknernema nu igwugwu.

²⁷ O jeezihala ele enine izi a be hite nu ruwhere eno k'owa chikota ele ke a Chiokike hohiaru, hite n'otu osotoma owa du n'osotoma berere.

Muhia nhne hite n'isisi

be kwu figi

(Mat 24:32-35; Luk 21:29-33)

²⁸ "Anu muhia nhne hite n'isisi figi. Nga nkala a zilam piali piali, nooruhia masi okwukwo ikne, anu mahia nu nduru-mini zi ndundu.

²⁹ Kpam masi, nga anu jowhnu kpakara nhne ka hne be beteru neeme, anu mahia nu n'ige wam zi ndundu, n'onu-mgbo.

³⁰ Me kanu anu ezi oka, ebiri ka jeewhe rja rja tem kpakara nhne ka mezu.

³¹ Oligwe nu owa jaagawhe, kovu kpakara ikwu-onu m jaagawhe rja rja.

*O za nye magwu
obochi wam*

(Mat 24:36-44)

³² “Kovu o za nye magwu obochi wam mabu otnu-ige wam, ele enine izi zi n'oligwe ma masi, Nnwọ wam ma masi. Okwolem Nda m kpoi bu nye magwu.

³³ Anya du anu eli, anu se nse, kpe okpukpe, kwnornu nu anu ma nga ige jaava.

³⁴ O nu lele hne badnu neezne nhne, nga o nqowhoga n'oro a, o nyewhete oro a n'aka ele phi a, ma be legidne a anya. O nyee kwno nye obula nhne o jorunu, nyee masi nye ke zi n'onu-mgbo iwu o se nse.

³⁵ Kam kpararu, anu neese nse, kwnornu nu anu ma nga nyenwe oro jaava, mabu n'anyasnu, mabu n'esilawuru abali, mabu ige ochichi kwnarnu ekwna, mabu n'osisi.

³⁶ Anu se nse, o zi o va kpurugadnam, whnu hne anu neezni anyarna.

³⁷ Nhne me naakanu anu bu nhne me naakanu kpakara badnu, anu se nse.”

14

*Be gbaru iznuznu
o gbu Jizosi*

(Mat 25:1-5; Luk 22:1,2; Jon 11:45-53)

¹ O gwnarnu obochi lawuru o du Iriri Ogawhe nu Iriri Bredi Whuge Qwhu. Ele risi arjohna nu ele zni iwu ele ju noopio apna be jjonwugwu Jizosi n'aghigo, ma be gbu a.

² Be karu, “Kovu o joubu n'Iriri ka, o zi a kpasu ohna.”

*Be teru Jizosi mono
nu Betani*

(Mat 26:6-13; Jon 12:1-8)

³ Nga Jizosi zi nu Betani n'oro Sajmoni nye rjaru nchnchna, o dazi neeri wiri. Otu nyerinya bnanyarnu, nye vu mono otute zi n'ite alabasisa gburu onu be ji eknarna nadi zi snam mee. O liwama ite wam, wusi mono otute wam nu risi Jizosi.

⁴ Agwna ele zi pii weru ehni k'agida naaka, “Kini kpararu be wuwuru mono otute ka etekne?”

⁵ Be zernu ere ya riwahu mkparu iwai eto nyee ele mboni.” Be naatamunu nwerinya wam.

⁶ Jizosi kanu be, “Anu gharu a! Ndaa nhne anu kwno neemekpa a ehni? O rnuonu ernu oma n'ehni m.

⁷ Ele mboni nu anu zi ige obula, ige obula anu pioru, anu nwernu rikne menu be nhne oma, kovu nu anu jenenwehia m ige obula.

⁸ O mernu nhne o nwernu rikne o mee. O beru osno te ehni m mono, bikwata m n'olili m.

⁹ Me kanu anu ezi oka, hne nu hne obula be kporu okwo izi oma ka nu kpakara owa, be jookwuhja nhne nwerinya ka mernu, ma o buru nhne be jeeji neechenwanya a.”

Judası kweruru o re Jizosi

(Mat 26:14-16; Luk 22:3-6)

¹⁰ Judası Isikarioti, otu nu rime nri nu badnu lawuru ele sno apna a, znekwnusiri ele risi arjohna, ma o gweru Jizosi nyee n'aka be.

¹¹ Nga be nurnu a, be nwudnarnu, be kwe o nyee a iwai. O bete o pio oghere o jeegweru Jizosi nyee be.

Jizosi nu ele sno apna a

riri Iriri Ogawhe

(Mat 26:17-25; Luk 22:7-14,21-23; Jon 13:21-30)

¹² N'obochi mbom ke Iriri Bredi Whuge Qwhu, nga be naakwa arjohna atnurnu Ogawhe, ele sno apna a sikwa Jizosi, “Ndaa hne i pioru ma a mekwatanu i ma i ri Iriri Ogawhe?”

¹³ O zihala badnu lawuru nu rime ele sno apna a, o kanu be, “Anu zne nu rime Jeruselem, otu nyerukna vugwu idudu mini jaavakwnusi anu, anu sno a.

¹⁴ Anu snornu a zne n'oro obula o bnazn-ernu, anu kanu nyenwe oro wam, ‘Nye-zni-nhne karu, Ndaa hne oro ele izne m zi, hne me nu ele sno apna m jeeri Iriri Ogawhe?’

¹⁵ O jeegesi anu otu onu-oro zi rude n'oro olu be mekwataru, bikwata masi. Anu mekwatanu ai pii.”

¹⁶ Ele sno apna a whoga, bna nu Jeruselem whnukpa kpakara nhne lele kpa Jizosi karu. Be mekwata Iriri Ogawhe.

¹⁷ N'ogbednachi, Jizosi nu nri nu badnu lawuru ele sno apna a snornu va.

¹⁸ Nga be daziri eli neeri wiri, Jizosi kaa, “N'ezi me kanu anu, otu badnu n'esilawuru anu, bu nye me nu a neeriko wiri, jeere m.”

¹⁹ O panizo noogbu be igbugbu n'ovu, be neesikwa a n'otu n'otu, “O bu mawa sa?”

²⁰ O kanu be, “O bu otu nyenum nu rime anu nri nu badnu lawuru, nye me nu a noosnukota wiri n'otu agbugba wiri.

²¹ Nnwọ ke Badnu jaala lele kpa be gbaru a n'okwukwo nsọ gbasiri a, kovu nu awhnwuhnu jaazinu nyerukna wam be jeehi n'aka a re Nnwọ ke Badnu. O buru oma o buru be muna nyerukna wam.”

Wiri Anyasnu Nyenwe ai

(Mat 26:26-30; Luk 22:14-20; 1 Kor 11:23-25)

²² Nga be zi neeri wiri, Jizosi gweru bredi, tunu Chiokike mmamma, nyawama a, nyee

ele sno apna a, kaa, “Anu gweru, ka bu ano-ehni m.”

²³ O gweru okiko, tu mmamma o nyee be, kpakara nwornu nu rime a.

²⁴ O kanu be, “Ka bu onarna m ke ogba-njo-ehni be noowusi kwnornu agida badnu.

²⁵ N'ezi me kanu anu, m joonwoma m manya hi n'isisi vai ni whuya rja rja tem du n'obochi me joonwo a ke ikne n'eli-eze Nda m.”

²⁶ Nga be gwnukparu eri, be whoga zne nu Rugwu Olivu.

Jizosi karu nu Pita

jogonahoru a

(Mat 26:31-35; Luk 22:31-34; Jon 13:36-38)

²⁷ Jizosi kanu be, “Kpakara anu jaagbakwo eso, kwnornu nu be gbaru a n'okwukwo nsq, kaa,

'M joogbu nye nooznu atnurnu, atnurnu a jaagbakeme.’

²⁸ Kovu nga me hiri n'enwu lizo, m jeebe anu osno zne Galili.”

²⁹ Pita kanu a, “O burubedi nu kpakara badnu gbakwo eso, kovu m jaagba eso.”

³⁰ Jizosi kanu a, “N'ezi me naakanu i, n'abali ka, nga okne ochichi naakwnana ekwna mgba lawuru, i jogonahoru m mgba eto.”

³¹ Kovu o kwusiri rikne k'agida kaa, “O buru nu o zi mkpa nu m joosno i nwu, m jogonahoru i rja rja.” Kpakara be kakwnornu kpam.

Jizosi kperu okpukpe

nu Gesemani

(Mat 26:36-46; Luk 22:39-46)

³² Be vadu nu hne be kwu Gesemani, Jizosi kanu ele sno apna a, “Anu daziri hna, me kpe okpukpe.”

³³ O kwuru Pita nu Jemisi nu Joni, o panizo o gbu a igbugbu nu o wute a nu mkpoma.

³⁴ O kanu be, “O noogbu m mkpoma m igbugbu k'agida du enwu, anu dazigidne hna, se nse.”

³⁵ O znetu nu ruwhnu, dna kpu ruwhnu n'eli kpe okpukpe, ma ige awhnuwhnu ka gawheru a, o buru nu o jeekwe omume.

³⁶ O kaa, “Papa, Nda m, i meli nhne dum, gwemenu m okiko awhnuwhnu ka, kovu o buo nhne me pioru, kovu nhne i pioru.”

³⁷ O va whnu hne be neezni anyarna, o kanu Pita, “Sajmoni, i neezni anyarna? I nwee rikne se nse otu otu-ige?”

³⁸ Anu se nse, kpe okpukpe, o zi anu dnabna nu rime onurna. Enine ke badnu zi bekwnu, kovu nu ano-ehni zila rikne.”

³⁹ O zne kwno berere kpe okpukpe, nookwu otu oka wam.

⁴⁰ O yahna berere whnu ele sno apna a hne be neezni anyarna kwnornu nu anya be zi rinya, be ma nhne be jaasa a.

⁴¹ O va ke mgba eto, o kanu be, “Anu zi koriri neezni anyarna, noozukwa inwe? O kwna kpam, o dulam, be neegweru Nnwq ke Badnu resi n'aka ele mmehie.

⁴² Anu lizo, ma a zne. Le nye neegweru m nyee zi ndundu.”

Be nwudneru Jizosi

(Mat 26:47-56; Luk 22:47-53; Jon 18:3-12)

⁴³ Ngangam Jizosi kpugwu oka wam n'onu, Judasi, otu nu rime nri nu badnu lawuru wam ele sno apna a varu, ya nu agida badnu ele ji ama-ogwnu nu okpiri hite nu hne ele risi arjohna nu ele zni iwu ele Ju nu ele okno badnu zi va.

⁴⁴ Nye reru a nyenem be nhne elekema, kaa, “Nye obula ke me joosnutu onu nye wam bu ya, anu nwugwu a, duru a zne.”

⁴⁵ Ngangam Judasi varu, o znekwnusi Jizosi, sukwu a, “Nye-zni-nhne.” O snutu a onu.

⁴⁶ Be tukwasi Jizosi aka, nwugwusi a rikne.

⁴⁷ Otu n'ele gwuzogwu ndundu mnjohiaru ama-ogwnu a, gbu nye izi nye risi arjohna, bihala a nsni.

⁴⁸ Jizosi kanu be, “Anu kpagwu ama-ogwnu nu okpiri whuya o nwugwu m lele m bu m nye neemegidne iwu eli?”

⁴⁹ Kpakara obochi me nu anu zi n'Oro Nso Chiokike hne me neezni anu nhne, anu nwuge m, kovu kpakara nhne ka mernu ma nhne be gbaru n'okwukwo nsq mezu.”

⁵⁰ Kpakara ele sno apna Jizosi ghasaru a gbawhu.

⁵¹ Otu wikoro snogwu Jizosi, nye ji iwo abochna kpusni ehni a. Be nwugwu a,

⁵² o sigbasi iwo abochna a, gbaru eto gbawhu.

Jizosi gwuzo nu ruwhnu

ele eze-ikpe

(Mat 26:26,57-68; Luk 22:54,55,63-71; Jon 18:13,14,19-24)

⁵³ Be duru Jizosi znekwnusi nye risi arjohna, kpakara ele risi arjohna nu ele okno badnu nu ele zni iwu ele Ju gbakoru.

⁵⁴ Pita snornu a nu hne zi ikere, bna nu rime ederezi nye risi arjohna, o daziri n'esilawuru ele nse, naanya bekwnu.

⁵⁵ Ele risi arjohna nu kpakara ele eze-ikpe pioru nhne be ji gbagidne Jizosi akebne ma be gbu a, be piohala.

⁵⁶ Agida ele badnu gbaru akebne aghalaghala gbagidne a, kovu nu akebne be buo otu.

⁵⁷ Agwna be lizo, gba akebne aghalaghala gbagidne a, naakaa,

⁵⁸ “A nurnu hne o karu, 'M jaakwnadna Oro Nso Chiokike ka be jiri aka wu, n'obochi eto m joowu Oro Nso berere ke be jile aka wu.’”

⁵⁹ Kovu nu akebne be dnakotala.

⁶⁰ Nye risi ariohna lizọru n'esilawuru be sịkwa Jizọsi, kaa, "Ọ zà nhne ị naasa? Kịni bụ akebbe ka ele badnụ ka naagbagidne ị?"

⁶¹ Kọvu Jizọsi kpusnirnu ọnu, ọ zà nhne ọ saru. Nye risi ariohna sịkwa kwno a, "Ọ bụ jịwa bụ Karaisi, Nnwọ Chiokike be goziri ọgozi?"

⁶² Jizọsi kaa, "Ọ bụ mawa, anụ jọwhnu masị Nnwọ ke Badnụ hne ọ dazị n'akarikwnunga Chiokike ke bụ Dikne, naava masị n'erumeru oligwe."

⁶³ Nye risi ariohna dọwama iwo a, kaa, "Ndaa nhne a kwno noopio ele akebbe berere?"

⁶⁴ Anụ nurnu okwulu wam o kwuru kwugidne Chiokike, kịni bụ echiche anụ?"

Kpakara be marnụ a ikpe ẹnwu, kaa, "O kwesiri ọ nwụ ẹnwu."

⁶⁵ Agwna be panizo ọ gbüsü a ọnu-mini, nụ o knesni a ruwhnu, nọogbo a aka, naakanụ a, "Whnunu aị ọwhnurninya." Ele nse dọnawhuru be Jizọsi, nọogbo aka.

Pita gọnahoru Jizọsi

(Mat 26:69-75; Luk 22:56-62; Luk 18:15-18,25-27)

⁶⁶ Nga Pita zị nụ ederezi, otu nnwọ oknornokno ele neeznenu nye risi ariohna izi varu.

⁶⁷ Nga ọ whnurnu Pita naanya bekwnu, o le a anya, kaa, "Ji n'iwhuru i nụ Jizọsi nye Nazareti zi."

⁶⁸ Kọvu ọ gọru kaa, "M máam, m ghóhiala m nhne ị naakaa." Ọ whọga zne n'ọnu-mgbo, okne ọchichi kwna ẹkwna.

⁶⁹ Woknornokno wam whnụ a, ọ naakanụ kwno ele gwuzo ndundu, "Nwerukna ka bụ otu nụ rime be."

⁷⁰ Pita gọ kwno berere.

Nga ige matị whemernu ele gwuzo ndundu kanụ Pita berere, "N'ezị, ị bụ otu nụ rime be, kwnornu nụ ị bụ nye Galili."

⁷¹ Ọ panizo nọogo ngugo, nọodu risi, naakaa, "M máam nyerukna ka anụ nookwu ọka a."

⁷² Ngangam, okne ọchichi kwnarnu ẹkwna ke mgba lawuru. Pita chenwanya ikwu-ọnu wam Jizọsi kwunnu a, "Nga okne ọchichi yáakwnana ẹkwna mgba lawuru, ị jọogonahoru m mgba ẹto." Nga o chenwanyarnu a, ọ kwna ẹkwna.

15

Jizọsi gwuzo nụ ruwhnu Paileti

(Mat 27:1,2,11-14; Luk 23:1-5; Jọn 18:28-38)

¹ N'ọnu ọsisi, ele risi ariohna nụ ele okno badnụ nụ ele zni iwu ele Ju nụ kpakara ele eze-ikpe gbarụ iznuznu, be kne Jizọsi eriri, duru a zne, gweru a nyewhete n'aka Paileti.

² Paileti sịkwa a, "Ị bụ eze ele Ju?"

Jizọsi saru a, "Owe! Ji n'iwhuru i karu kpam."

³ Ele risi ariohna noobno a agida nhne.

⁴ Paileti sịkwa kwno a berere, "Ọ zà nhne i naasa? Le agida nhne be noobno i."

⁵ Kọvu Jizọsi sála nhne ọbula. Ka duru Paileti ẹhni.

Be marnụ Jizọsi ikpe ẹnwu

(Mat 27:15-26; Luk 23:13-25; Jọn 18:39--19:16)

⁶ N'Iriri Ogawhe ọbula Paileti nęesigbasinu be otu nye ikelu, nye be rjoru a.

⁷ Otu nye zị n'ikelu be nookwu Barabasi nye zị n'ikelu ya nụ ele lizọru lusi ele risi ọchichi ọgwnu. O gburu badnụ n'ọgwnu wam.

⁸ Agida ele badnụ wam panizo nọorio Paileti ma o menu be lele kpa o ji neemenu be.

⁹ Paileti sịkwaru be, "Anụ piuru me sigbasinu anụ eze ele Ju?"

¹⁰ Ọ mahjari nụ ele risi ariohna kwuyannu a Jizọsi kwnornu ọwho-anya.

¹¹ Kọvu ele risi ariohna sigidnenu igbudu ele badnụ wam be kaa ọ sigbasinu be Barabasi, ọ bụo Jizọsi.

¹² Paileti sịkwaru berere, "Ọ bụ kịni nhne anụ piuru me mee nye wam anụ nookwu eze ele Ju?"

¹³ Be siwama okokoba berere, "Kpogidne a n'ogba."

¹⁴ Paileti sịkwa be, "Kini mernu? Kini bụ nhne ọjo ke o mernu?"

Be siwama okokoba ke kakwo, "Kpogidne a n'ogba."

¹⁵ Kpa Paileti piuru o mee nhne jaamasị agida ele badnụ wam, ọ sigbasinu be Barabasi. Nga ọ pnjakworu Jizọsi nhne, o gweru a nyewhete be ma be kpogidne a n'ogba.

Ele ọgwnu kpariri Jizọsi

(Mat 27:27-31; Jọn 19:2,3)

¹⁶ Ele ọgwnu duru Jizọsi bna n'ọbna nye ọchichi. Be sukwukọta kpakara odobiri ele ọgwnu.

¹⁷ Be wosi a iwo naachna odno odno, be kpa okpu igwnu, kpusi a nụ risi.

¹⁸ Be panizo neebekwu a, naakaa, "A bekwulem ji, Eze ele Ju."

¹⁹ Be gweru isisi nęeli a nụ risi, nọogbu a ọnu-mini, gbu mpnerne ọchi n'eli, kpọnu a risi eli.

²⁰ Nga be mekworu a nhne rumu, be tuma a iwo odno odno wam, wosi a kpakara iwo a. Be duru a zne ma be kpogidne a n'ogba.

Be kpogidnenu Jizọsi

n'ogba

(Mat 27:32-44; Luk 23:26-43; Jọn 19:17-27)

²¹ Be sigidne otu nye neewhe ewhe, kanu a, o vuru ọgba a. Nye ka bụ Saịmoni nye

Sirini, nda Alekizanda nu Rufosi, hne o hi n'aznu mba naabnanya Jeruselem.

²² Be duru Jizosi zne nu hne be kwu Golugota, ke bu "Hne Okpokoro Risi."

²³ Be nyega a manya be gwaru maa, kovu nu o nwona a.

²⁴ Be kpoigidne a n'ogba, ele ogwunu ke iwo a n'esilawuru be nga be vukworu ogbanuchi ke gesiri ke nye obula jeegwe.

²⁵ O bu nu otnu-ige tolu* n'osisi nga be kpoigidneru a n'ogba.

²⁶ Be gbaharu nhne be bnornu a, "Eze ele Ju."

²⁷ Be kpoigidneru ya nu ele rukna lawuru nooznu buznu n'olu ogba, otu badnu n'akarikwnunga a, nye ke berere n'akarita a. [

²⁸ Nhne be gbaru n'okwukwo nsq mezuru ke karu, "Be gwnukotarua ya n'ele aruru-eli.]"

²⁹ Ele naagawhe naakaja a, neewh-nuwhe risi be, naakaa, "Ngwanu! Ji nye jaakwnadna Oro Nsq Chiokike, wu kwno a n'obochi eto.

³⁰ Znqhia ehni i, hi n'olu ogba hiedna."

³¹ O bu masi kpa ele risi ariohna nu ele zni iwu ele Ju naakarai a n'esilawuru be, naakaa, "O znqhiaru ele berere, o nwée rikne znqhia ehni a.

³² Karaisi eze Izireli, hi n'olu ogba hiedna kipta, ma a whnu, kweru masi."

Ele be kpoigidneru be nu Jizosi n'olu ogba zi masi naakarai a.

Enwu Jizosi

(Mat 27:45-56; Luk 23:44-49; Jon 19:28-30)

³³ Hite n'esilawuru iwhnehnie,[†] ochichiri gbasnirni kpakara eli wam du n'otnu-ige ke eto.[‡]

³⁴ N'otnu-ige ke eto, Jizosi jiri okne nkoli siwama, "Eloi, Eloi lama sabatani," ke bu, "Chiokike m, Chiokike m, kini mernu i ghasaru m?"

³⁵ Agwna ele gwuzogwu ndundu, nga be nurnu a, be naakaa, "Bno nsnj, o noosukwu Elaija."

³⁶ Otu nyenum gbaru eso, gweru manya gbaru oka rusi sponji ke zi n'isisi nu rime a, nyee Jizosi ma o nwo, kaa, "Gharu a, a lesi ma Elaija jaava o gwedna a n'ogba."

³⁷ Jizosi gweru okne nkoli si okokoba, nwebime inwe.

³⁸ Ikpe obnosni ke Oro Nsq Chiokike gbawaru ebo hite n'olu du eli.

³⁹ Nga nye risi ogwunu nechi otu riwhu ele ogwunu gwuzo ndundu kela ruwhnu hne o zi, whnuru kpa o jiri kna inwe, o kaa, "N'ezi, nyerukna ka buri Nnwq Chiokike."

⁴⁰ Ele rinya zi ikere neelekiri nhne neeme, agwna be bu Meri Magidalini, nu Meri nne Jemisi ke mati nu Josis, nu Salomi.

⁴¹ Ele ka snornu Jizosi nga o zi nu Galili, ele neeznenu a izi. Nu agida ele rinya berere ele snornu a va Jeruselem.

Be liri Jizosi

(Mat 27:57-61; Luk 23:50-56; Jon 19:38-42)

⁴² Nga o duru ogbednachi, hne o bu obochi ojknernu, ke bu obochi begwu Obochi Ozukwa Inwe osno,

⁴³ Josefu nye Arimatiya varu, nye bu otu nu ele ikpe, bu masi nye be nosobisini, nye neese eli-eze Chiokike, nwerukna ka ji anya rikne znekwnusi Paleti rio a iznu Jizosi.

⁴⁴ O gbagwojiri Paleti anya nu Jizosi nwunam. O sukwu nye risi ogwunu wam sika a ma o nwuna.

⁴⁵ Nga o mahiaru n'onu nye risi ogwunu wam nu Jizosi nwunam, o kweru be vute Josefu iznu a.

⁴⁶ Josefu zuya ikpe marnu mma, nga o vudnarnu iznu a, o whu a n'ikpe marnu mma wam, vubna a nu rime ilili ke be gwuharu nu rime rugwu. O gweru otu rugwu kpusni onu ilili wam.

⁴⁷ Meri Magidalini, nu Meri nne Josis whnuru hne o liri a.

16

Jizosi lizoru n'enwu

(Mat 28:1-8; Luk 24:1-12; Jon 20:1-10)

¹ Nga Obochi Ozukwa Inwe wheru, Meri Magidalini nu Meri nne Jemisi, nu Salomi, zuyaru mpon neesi eknarna oma zi odo n'odo ma be zne te iznu Jizosi mpon.

² N'onu osisi n'obochi mbom n'ikwezu, be znernu n'ilili a nga ehnam waru.

³ Be nookwurita n'ehni be, "Nyele jookpumenu ai rugwu wam n'onu ilili?"

⁴ Nga be lelizoru anya be whnuru nu be vunenem rugwu wam. O zi rinya k'agida.

⁵ Be bna rime ilili whnu wikoro dazigwu n'akarikwnunga, o wogwu awura abochna, ogwunu turu be.

⁶ O kanu be, "Ogwunu tuko anu. Anu noopio Jizosi nye Nazareti, nye be kpoigidneru n'ogba. O lizolam, o zila hna. Le hne be bitaru a.

⁷ Kovu anu la, kanu ele sno apna a nu Pita, 'O belem anu osno neeze Galili, anu joowhnu a pii, lele kpa o kannu anu.' "

⁸ Be whoga, hi n'ilili wam gbahala, ehni naama be ririri nu ogbagwoji anya jigwu be, o za nye be kannu nhne obula, kwnornu nu ogwunu nqotu be.

* 15:25 otnu-ige tolu: okwukwo ke mbom kwuru ige awa ke eto

† 15:33 n'esilawuru iwhnehnie: okwukwo ke mbom kwuru

ige awa isunu ‡ 15:33 otnu-ige ke eto: okwukwo ke mbom kwuru ige awa tolu

*Jizọsi mernu Meri Magidalini
whnụ a anya
(Mat 28:9,10; Jọn 20:11-18)*

[
9 Nga Jizọsi hiri n'ẹnwu lizọ n'ọnu ọsisi n'ọbochi mbom n'ikwezu, o beru ọsno gesi ẹhni a Meri Magidalini, nye ọ chihalaru renwu ojo ẹsau nụ rime a.

10 O zne kanụ ele nụ Jizọsi dazigwu nụ mbom hne be zị naagba mkpe, naakwna ẹkwna.

11 Nga be nurnu nụ Jizọsi zị bụdnu, nụ ya n'iwhuru a whnurnu a, be kwéle.

12 Nga ka wheru, Jizọsi mernu badnụ lawuru whnụ a n'ozizi berere nga be neezne aznụ mba.

13 Be lahna zne kanụ ele gwnarnụ, be kwéle nhne be kwuru masị.

14 Omekwo, Jizọsi whụya iwhne hne nri nụ otu badnụ wam ele sno apna a zị neeri wiri. Ọ bnanụ be mbna kwnornu n'ókwe ekwe be nụ mkpoma osi rikne be, ke mernu be kwéle ikwu-ọnu ele whnurnu a nga o hiri n'ẹnwu lizọ.

15 Ọ kanụ be, "Anụ zne nụ kpakara ọwa kpọnu kpakara badnụ okwo izi ọma.

16 Nye kweruru, be wụ a mini, bụ nye be jọoznohia a, nye ke kwéle, be jaama a ikpe.

17 Nhne elekema ele ka joosno ele kweru, be jaachihala renwu ojo nụ ẹwhna m, be jookwu ọka nụ riro ikne zị ọdo n'odo.

18 Be jaachị agwọ n'aka, ọ bụru nụ be nwọ nhne ọbula ke jaakpaya ẹnwu, ọ zá nhne o jeeme be, be jootukwasi ele nrịria aka, mee ẹhni bụru be ọma."

*Jizọsi larụ n'oligwe
(Luk 24:50-53; Ẹrnu 1:9-11)*

19 Nga Nyenwe aị Jizọsi kwukwonnu be ọka, be gwelizọ a la n'oligwe, ọ daziri ẹli n'akarikwnunga Chiokike.

20 Ele sno apna a whogaru nọokpo okwo izi ọma hne ọbula, Nyenwe aị noosno be, nọornu ẹrnu, neegesi nụ ikwu-ọnu Chiokike bụ ezi ọka, hite n'ẹrnu ndu-ẹhni zị ọdo n'odo ke be nọornu.]

Izi ọma lele kpa Lukwu gbarụ a n'ọkwukwo

Nhne gbasiri ọkwukwo ka

Izi ọma lele kpa Lukwu gbarụ a n'ọkwukwo neegesi Jizọsi lele Nye Ọznohia Izireli nù Nye Ọznohia ke kpakara ele badnụ zì n'ọwa. Lukwu gbarụ nù Enine Nyenwe aì sukwuru Jizọsi ma o zni "ele mboni izi ọma." Lukwu nye dibia snornu ele sno apna Jizọsi n'izi ọma be znirni, ma Pọlu nye izi Jizọsi. Ọ sikhahiaru nhne n'ọnu ele whnurnu Jizọsi nga ọ zì n'ọwa. Ka mernu o nwernu ọnu rikne ọ gbanụ Tiofilọsi ọkwukwo. Lukwu kwuru nhne gbasiri bụdnụ Jizọsi, hite n'omumu a, ige ọ bụ wikorọ, ọnu a, ọnu a, olizọ n'ẹnwu tem dū nga Jizọsi larū oligwe.

Nhne zì n'ọkwukwo ka

Omumu Jizọsi nù wikorọ a (1:1--2:52)

Owuwu mini Jizọsi nù ọmurna a (3:1--4:13)

Ọnu Jizọsi nù rime Galili (4:14--9:50)

Ọnu Jizọsi nù apna nga o neezne Jeruselem (9:51--19:27)

Ọnu Jizọsi nù rime Jeruselem (19:28--20:47)

Ọka Jizọsi kwuru gbasiri nhne ke jeeme nù ruwhnu (21:1-38)

Ọnu Jizọsi nù olizọ n'ẹnwu a (22:1--24:53)

Nye gbarụ ọkwukwo ka: Lukwu nye dibia

Risi nhne o kwno gba a: O gesi ọtutnu zuru ozu gbasiri bụdnụ nù ọnu Jizọsi Karaşi, obirizi a n'ehni ele be neemegbu, nù ọznohia ke ele bụo ele Ju.

¹ Tiofilọsi, agida ele badnụ yisiri aka be n'ọgba ọkwukwo gbasiri nhne be mernu n'esilawuru aì,

² lele kpa be nyernu aì n'aka a bita. Ele nyernu aì bụ ele hiri n'ọpanizo gweru anya be whnụ be, bụru ele izi ikwu-ọnu Chiokike.

³ Ọ bụru ọma hne me snornu kpakara nhne nkari hite nù mbom, me gbanụ ì ọkwukwo nù ekere nù ekere, Tiofilọsi zì igwugwu,

⁴ mee ma ì mahia nù kpakara nhne be jiri ikwu-ọnu ọnu zni ì bụ nhne kwesiri ọkwnata mkpoma.

Omumu Joni Nye Wụ Mini

⁵ N'ige Erodu bụ eze Judiya, otu nye ọkwa arịohna zì, be kwu Zakaraya, ke hi n'oro Abija, nnwerne a bụ Elizabeti nye hi n'ebnurnu Erodi.

⁶ Be lawuru bụ ele ọma nù ruwhnu Chiokike, be naabita kpakara nhne Nyenwe aì nyernu n'iwu, be nwée ọru.

⁷ Kọvu nù be nwée nnwọ, kwnornu nù Elizabeti bụ nyerinya rekpa nnwọ a mesnirni emesni. Be lawuru menem okno badnụ.

⁸ Otu ọbochi, ige ele otu Zakaraya nọornu ọnu, Zakaraya zì nọornu ọnu nye arịohna nù ruwhnu Chiokike,

⁹ lele kpa ọnu arịohna jiri zì, ọ dnab-narnu nù ọ bụ ya jọokporne isensi n'oro Nsọ Nyenwe aì.

¹⁰ Kpakara ele Ju neekpe okpukpe n'ederezi ige ọ nọokporne isensi.

¹¹ Enine izi Nyenwe aì mernu Zakaraya whnụ a anya hne o gwuzo n'akarikwunaga ojo arịohna hne be nọokporne isensi.

¹² Nga Zakaraya whnurnu a, mkpoma larū a mini, ogwnu tumako a.

¹³ Enine izi wam kanu a, "Ogwnu tuko ì, Zakaraya, Chiokike nuna m okpukpe ì. Elizabeti nnwerne ì joomunu ì nnwọ rukna, ì jookwu rewhna a Joni.

¹⁴ Ì joonwudna, mkpoma jọoso masi ì n'ọnu, agida ele badnụ jeenwe snarnima kwnornu ọmumu a.

¹⁵ Ọ jọobu nye kwu n'anya Nyenwe aì. Ọ joonwo manya mọbu nhne ọbula ke bna n'anya rja rja. Enine Nsọ Chiokike jeejihia nù rime a, hite nù rime ruwho nne a.

¹⁶ O jeeme agida ele Izireli hiehnakwnusi Nyenwe aì Chiokike be.

¹⁷ O jeezne nù ruwhnu Nyenwe aì n'enine nù rikne Elajia. O jeeme ele nda tuhmasna mkpoma hne ruwu be zì, ma ele zá noobno nsnì bna n'apna akoniche ele ọma, o jiknurnu Nyenwe aì ele kwesiri a."

¹⁸ Zakaraya sika enine izi wam, "Ndaa nhne me jeeji mahia ka? Le, me nù nnwerne m menem okno badnụ k'agida."

¹⁹ Enine izi wam saru a, "Mawa bụ Gebureli, nye noogwuzo nù ruwhnu Chiokike. Chiokike ziyaru m me kanu ì ọka ka nù o zni ì izi ọma ka.

²⁰ Le, ì jaadna mgbu, ì jeeenwe rikne kwu ọka tem dū ọbochi kpakara nhne ka jeeme, kwnornu nù ì kwéle ikwu-ọnu m ke jeemezu n'ige a."

²¹ Ele badnụ wam zì neese Zakaraya n'ederezi, be naari nhne kpayaru ọ gburu ọkwnu n'oro Nsọ Chiokike.

²² Nga ọ whuyaru, o nwée rikne o kwunu be ọka. Be mahia nù ọ whnurnu ọwhnurninya n'oro Nsọ Chiokike, o neewhenu be aka, kọvu o nwée rikne kwunu be ọka.

²³ Nga ige ọnu a zuru n'oro Nsọ Chiokike, Zakaraya lahna ọro a.

²⁴ Nga nhne ka mekworu, Elizabeti nnwerne a turu rime, o tugwa ẹni a ẹnwa isne nù rime ọro.

²⁵ Ọ kaa, "Ka bụ nhne Nyenwe aì mennu m, o gesilem ruwhnu ọma a, ma o kwnos-nama iwahnerne m n'esilawuru ele badnụ."

*Be kwuru ọka gbasiri
omumu Jizọsi*

²⁶ N'ēnwa isunu a,* Chiokike ziznenu enine izi Gebureli zne n'ēli Nazareti ke zị nū Galili,

²⁷ znekwnusi otu nnwọ oknornokno máa nyerukna be kwu Meri, nye Josefu ke hi n'ēbnurnu Devidi kweru o lụ.

²⁸ Enine izi wam zne hne o zị, kaa, “M bekwulem o, jị nye Nyenwe aị dagwumu, i bu nye owa oma.”

²⁹ Mkpoma larụ Meri mini nga o nurnu ikwu-ōnu a, o naagbadi nū mkpoma a o kpa ibekwu ke nū kpa.

³⁰ Kọvu enine izi wam kanụ a, “Meri, ogwunu tũko i, Chiokike menu i oru k'agida.

³¹ I jootu rime, mụhia nnwọ rukna, i jookwu a Jizọsi.

³² O jọbu nye kwu, be jookwu a Nnwọ Nye Kakwo Nhne Dum Olu. Nyenwe aị Chiokike jeenye a ngadna eze nda a, Devidi.

³³ O jaachị ọro Jekọpu tim tọm, ẹli-eze a jóokwo okwo.”

³⁴ Meri sarụ enine izi wam, “Ndaa kpa be jeeme nhne ka, hne me máa nyerukna?”

³⁵ Enine izi wam sarụ a, “Enine Nsọ jaadnakwasi i, iknernema ke Nye Kakwo Nhne Dum Olu jookpusni i. Be jookwu nnwọ wam zị nsọ ke i joomu Nnwọ Chiokike.

³⁶ Le, Elizabeti nwene i rinya zị rime ommu n'okno badnụ a, o bu nye be nookwu nnwerne nwée nnwọ, ka bu ẹnwa isunu a.

³⁷ O zá nhne nyjri Chiokike.”

³⁸ Meri sarụ, “Le, m bu m nnwọ izi ke Nyenwe aị, o menu m lele kpa i kwuru.” Enine izi wam gharụ a la.

Meri znenu o lekasi

Elizabeti

³⁹ Ige wam, Meri jiknenu wara wara zne n'otu ẹli rugwu ke zị nū Judiya.

⁴⁰ O bna n'oro Zakaraya bekwusi Elizabeti.

⁴¹ Nga Elizabeti nurnu ibekwu Meri, nnwọ zị a nū rụwho wulizoru olu. Enine Nsọ jipiyaru Elizabeti.

⁴² O gweru okne nkọli kwu oka kaa, “I bu nye owa oma n'esilawuru ele rinya, nnwọ ke i joomu bu masị nye owa oma.

⁴³ M bu m nye ruwhnu oma nū nne ke Nyenwe m jaava lekasi m.

⁴⁴ Kwnornu nū kpa me nurnu ibekwu i, nnwọ zị m nū rụwho wulizoru olu nū snarnima.

⁴⁵ I bu nye owa oma kwnornu nū i kweru nhne Nyenwe aị kwuru nū o jeemezu a.”

Meri gwnurnu eri ojija

⁴⁶ Meri kaa,

“Mkpoma m ja Nyenwe aị,

⁴⁷ ovu m nnonwudna onwudna kwnornu nū Chiokike Nye Oznohia m,

⁴⁸ kwnornu nū o chenwanyarnu nnwọ izi a ovu hieru ẹli.

Hite nū kịtna kpakara ele ebiri jookwu m nye owa oma,

⁴⁹ kwnornu nū Chiokike Nye bu Dikne mennu m nhne hna ezi,

rẹwhna a zị nsọ.

⁵⁰ Chiokike nọdonu ele nọtu ogwunu a obirizi,

hite n'otu ebiri dū ebiri berere.

⁵¹ O ji aka dikne a mee nhne hna ezi, o chisaru kpakara ele oknomokno nū kpakara mmuma be.

⁵² O gwednarnu ele eze nū ngadna eze be, o gwelizoru ele ovu hieru ẹli.

⁵³ O nyejilem ele wiri nọogwunu rụwho, kọvu o gbatarụ ele eze aka.

⁵⁴ O yinu nye izi a Izireli aka, o chenwanyarnu o dọnu a obirizi,

⁵⁵ ke o kweru Eberham nū ẹbnurnu a mkwina tim tọm,

lele kpa o kanụ ele nda aị.”

⁵⁶ Meri daziri n'oro Elizabeti ẹnwa ẹto, lahana ọro a.

Ommu Jōni Nye Wu Mini

⁵⁷ Ige ommu nnwọ Elizabeti duru, o mụhia nnwọ rukna.

⁵⁸ Ele agbatibi† a nū rumu nwene a nurnu nū Nyenwe aị dọnu a obirizi k'agida, be snornu a nwudna.

⁵⁹ O dū n'ọbochi ẹsato, be varụ o kpa nnwọ wam nka. Be noopio o jita a rẹwhna Zakaraya ma o buri ogbo nda a,

⁶⁰ kọvu nne a karụ, “Ọza, rẹwhna a bu Jōni.”

⁶¹ Be kanụ a, “O zá nye naaza rẹwhna ka n'esilawuru ele ke i.”

⁶² Be whenu nda a aka, jikwa a rẹwhna be jookwu nnwọ wam.

⁶³ O kaa be nyee a nhne ogba okwukwo, o gbagwojuru be anya nga o gbasiri, “Rẹwhna a bu Jōni.”

⁶⁴ Ngangam, ọnu a kpumernu, riro a tọma, o bete nookwu oka, naaznarni Chiokike.

⁶⁵ Ogwunu turu kpakara ele agbatibi be, be wheke ọnutnu ka kpakara ẹli rugwu Judiya.

⁶⁶ Nye ọbula ke nurnu a zị nẹchenwu, be nẹsikwa, “Okpa badnụ kini bu nhne nnwọ ka jọbu?” Kwnornu nū be whnurnu nū aka Nyenwe aị zị n'ẹhni a.

Zakaraya gwnurnu

eri ojija

⁶⁷ Enine Nsọ jipiyaru Zakaraya nda Jōni, o whnụ ọwhnurninya, kaa,

⁶⁸ “Ojija zinu Nyenwe aị, Chiokike ke Izireli, kwnornu nū o lekasiri ma o gbahia ele ke a.

⁶⁹ O gweyarụ nye dikne jọoznohia aị

hite n'oro nnwọ izi a Devidi,

⁷⁰ lele kpa o kwuru hite n'onu ele ọwhnurninya a zị nsọ agida ige wheru ewhe.

* 1:26 Ka bu kpa Elizabeti turu rime. † 1:58 agbatibi: ele ya nū a wuta ndundu

- 71 O jooznohia aị hite n'aka kpakara ele sno aị irno.
- 72 O donnu ele nda aị obirizi, o chenwanyarnu ogba-njo-ehni nsọ a.
- 73 O kwesiri Eberham nda aị mkwna rikne,
- 74 O dọhia aị n'aka ele irno aị, ma a kpenu aị n'énwe ogwnu,
- 75 ma a ziri nsọ nu ele mee mma nu ruwhnu a kpakara budnu aị.
- 76 Ji, nnwọ m matị, be jookwu i nye owhnurninya ke Nye Kakwo Nhne Dum Olu, kwnornu nu i jeezne nu ruwhnu Nyenwe aị neemekwatanu a apna.
- 77 I jeeme ele ke a mahia ozoahia, hite n'ogbarunu be mmehie be.
- 78 Hite n'obirizi nu ovu oma ke Chiokike aị, o jeeme ehnam noomukwasi aị hite n'oligwe,
- 79 iwhne joomukwasi ele zi n'ochichiri nu ele zi n'oyinyo ke enwu, noodumako ochi aị n'apna udno.”
- 80 Nnwọ wam nooso oso, gbasị rikne nu enine, o wu n'eli-ikpa tem du nga be gesiri a ele Izireli.

2

Omumu Jizosi (Mat 1:18-25)

- 1 N'ige wam, eze Siza Ogositosi yiri iwu be gbasị rewhna kpakara ele wu n'eli ele Rom neechi n'okwukwo.
- 2 (Ka bu ogba rewhna n'okwukwo ke mbom nga Kwirinosi bu nye neechi Siriya.)
- 3 Nye obula la n'eli a zne gba rewhna n'okwukwo.
- 4 Josefu hiri n'eli Nazareti ke zi nu Galili zne Betlehem nu Judiya, eli be murnu Devidi, kwnornu nu o hi n'eburnu oro Devidi.
- 5 O znernu ma be gbasị rewhna ya nu Meri n'okwukwo, bu nwerinya o kweru nu o joolu, nye zi rime omumu.
- 6 Nga be zi nu Betlehem, ige Meri joomu nnwọ duru.
- 7 O mụhia oziri nnwọ rukna a, o whu a n'ikpe nute a nu rime nhne be biganu anohia wiri, kwnornu nu o za oro zinu be n'oro ele izne.

Ele nooznu atnurnu nu ele enine izi

- 8 Ele nooznu atnurnu zi n'eli wam nu rime ohia neese atnurnu be n'abalị.
- 9 Enine izi Nyenwe aị mernu be whnu a anya, igwugwu Nyenwe aị mukwasiri be, ogwnu turu be k'agida.
- 10 Kovu enine izi wam kanu be, “Ogwnu tuko anu. Anu bno nsnị, m gweyanu m anu izi oma ke snarnjima ke jaazinu kpakara ele badnu.

11 Tnawa, n'eli Devidi be murnu anu Nye Oznohia, Karaịsi Nyenwe aị.*

12 Ka bu nhne anu jeeji mahia a, anu joowhnu nnwọ ikne be whuru n'ikpe nute nu rime nhne be biganu anohia wiri.”

13 Ngangam, agida ele enine izi whuyaru snornu enine izi wam naaznarni Chiokike, naakaa,

14 “Qson'anya dum buru ke Chiokike nu hne kakwo n'olu, udno ziri n'owa n'esilawuru ele nhne be naamasị a.”

15 Nga ele enine izi wam lahnarnu oligwe, ele nooznu atnurnu wam kanu ehni be, “Anu va ma a zne Betlehem whnu nhne mernu ke Nyenwe aị kanu aị.”

16 Be gweru eso gweru izne zne whnu Meri nu Josefu, nu nnwọ ikne wam be nuteru nu rime nhne be biganu anohia wiri.

17 Nga be whnurnu a, be tnasa nhne enine izi kwuru gbasiri nnwọ ikne ka.

18 O duru kpakara ele nurnu nhne ele nooznu atnurnu wam kwuru ehni.

19 Kovu Meri bitaru kpakara nhne ka nu mkpoma a, neechinwu a.

20 Ele nooznu atnurnu wam lahnarnu, noogwnu eri, naaja Chiokike kwnornu nu nhne be nurnu, whnu masi lele kpa enine izi wam kanu be.

Be jiri Jizosi rewhna

21 N'obochi esato, be va o kpa nnwọ wam nka, be jita rewhna a Jizosi, bu rewhna enine izi wam kwuru a su be turu rime a.

Be kwubnarnu Jizosi Oro Nso Chiokike

22 Ige duru ma Josefu nu Meri mee ma be ziri richna lele kpa Iwu Mozizi kwuru, be kwuru nnwọ wam zne Jeruselem, chete a nu ruwhnu Nyenwe aị.

23 Lele kpa be gbaru a n'iwu Nyenwe aị, “Be jaabitānu Nyenwe aị nnwọ rukna obula be beru oso mu nsọ.”

24 Be kwa arjohna lele kpa iwu Nyenwe aị kwuru, “Nduru lawuru mōbu rumu weresi lawuru.”

25 Otu nwerukna zi nu Jeruselem, nye rewhna a bu Simioni, nye mee mma, nye nootu ogwnu Chiokike. O bu nye neese oznohia ke Izireli, Enine Nso zi n'ehni a.

26 Enine Nso kanu a nu o joonwu enwu tem o whnu Karaịsi Nyenwe aị.

27 Enine Nso duru a zne n'Oro Nso Chiokike nga ele murnu Jizosi varu o menu a lele kpa Iwu Mozizi kwuru.

28 Simioni kwuru nnwọ wam n'aka a, znarni Chiokike, kaa,

29 “Nyenwe m, kweru ma nnwọ izi i la n'udno, lele kpa i kweru m mkwna,

* 2:11 **Karaịsi:** Karaịsi bu Nye Oznohia wam Chiokike kweru mkwna o zia.

³⁰ kwnornu nū anya m whnūnam ọznohia ị,
³¹ ke ị b̄kwataru n'anya kpakara ele
 badnū,

³² iwhne ke jookpume nhne gbasiri ị nyee
 ele b̄to ele Ju,
 nū igwugwu ke ele ke ị Izireli.”

³³ Nhne be kwuru gbasiri nnwọ ikne ka
 duru nda a nū nne a ẹhni.

³⁴ Simiṣi ọzi be, kanū Meri, nne a,
 “Nnwọ ka j̄oburu nhne jaakpahia ọdidna nū
 olizọ agida badnū n'Izireli, b̄uru masi nhne
 elekema be jookwu ọka megidne.

³⁵ O jookpume echiche agida ele badnū.
 K̄ovu nhne igbugbu j̄oduwa mkp̄oma ị lele
 ama-ogwuu.”

³⁶ Otu nwerinya ọwhnurninya z̄i, nye
 r̄whna a b̄u Ana, adna Fan̄eli, ke hi
 n'ẹbnurnu Asa wh̄ya. Nwerinya ka nū nzi a
 wuru awha ẹsau kp̄oi,

³⁷ K̄ovu ọ menem okno badnū ke gbarū
 nri awha ẹsato nū ẹno, ọ b̄u nnwerne nzi a
 nw̄urnu ọnwu. Ọ z̄a n̄owhoga n'Ọro Ns̄o
 Chiokike iwhnehnie nū abali, ọ z̄i neekpe
 okpukpe, noovu ọnu.

³⁸ Ọ bnanyarnū n'ige wam, ọ t̄unu
 Chiokike mmamma, kwu ọka gbasiri nnwọ
 ikne wam, kanū kpakara ele neese ọgbahia
 ke Jeruselem.

*Be kwuru Jiz̄osi
 lahna Nazar̄eti*

³⁹ Nga Josefū nū Meri mekworu kpakara
 nhne iwu Nyenwe āi kwuru, be lahna Galili
 zne ẹli ke be, Nazar̄eti.

⁴⁰ Watak̄iri wam nooso, gbas̄i rikne,
 ak̄oniche jih̄aru nū rime a, oru Chiokike z̄i
 masi a n'ẹhni.

*Wikoro Jiz̄osi z̄i
 n'Ọro Ns̄o Chiokike*

⁴¹ Ele m̄urnu a neezne Jeruselem kpakara
 awha n'Iriri Ọgawhe.†

⁴² Nga Jiz̄osi gbarū nri nū awha law̄uru, be
 zne Iriri Ọgawhe lele kpa be mesi.

⁴³ Nga be mekworu Iriri wam, be bete ọ
 lahna ọro be, k̄ovu wikoro Jiz̄osi daz̄iri nū
 Jeruselem, k̄ovu ele m̄urnu a m̄aa.

⁴⁴ Be neechē nū ọ z̄i n'igbudu badnū, be
 zne izne otu ọbochi, be noopio a n'esilaw̄uru
 ele enyi be nū r̄umu nwene be.

⁴⁵ Nga be wh̄n̄na a, be hiehna nū
 Jeruselem noopio a.

⁴⁶ N'ọbochi ke ẹto, be wh̄n̄u a n'Ọro Ns̄o
 Chiokike, hne ọ daz̄i n'esilaw̄uru ele zni
 iwu ele Ju, noobno nsn̄i nhne be nookwu,
 neesikwa be aj̄ji.

⁴⁷ Kpakara ele n̄urnu ikwu-ọnu a nū ak̄o z̄i
 nū nhne ọ sarū be, o duru be ẹhni.

⁴⁸ Nga ele m̄urnu a wh̄n̄urnu a, o du be
 ẹhni, nne a kanū a, “Nnwọ m, k̄ini kp̄yaru

ị jiri mee me nū nda ị kpa? Me nū nda ị ji
 anya-mini noopio i.”

⁴⁹ Ọ s̄ikwa be, “Kini kp̄yaru anū noopio
 m? Anū m̄aa nū m j̄ornu ẹnu Nda m?”

⁵⁰ K̄ovu be gh̄oyage nhne ọ kannū be.

⁵¹ Jiz̄osi snornu be la Nazar̄eti, noobnonu
 be nsn̄i. K̄ovu nne a b̄itaru kpakara nhne ka
 nū mkp̄oma a.

⁵² Jiz̄osi nooso n'ak̄oniche nū dimkpa,
 neenwe oru nū ruwhnu badnū nū Chiokike.

3

*Ikwu-ọnu J̄oni
 Nye W̄u Mini*

(Mat 3:1-12; Mak 1:1-8; J̄on 1:19-28)

¹ N'awha ke nri nū isne ke ọchichi Taber̄osi
 Siza, nga P̄ontiosi Paj̄leti n̄eechi Judiya, nga
 Er̄odu n̄eechi Galili, nwene a rukna Filipu
 n̄eechi Ituria nū Tirakonitisi, Lisanas̄i n̄eechi
 Abilini,

² Anas̄i nū Kayafasi b̄u ele risi ar̄jhna,
 ige wam ikwu-ọnu Chiokike d̄uru J̄oni, nnwọ
 Zakaraya nsn̄i n'ẹli-ikpa.

³ O zne nū kpakara ẹli ke z̄i Osimini
 J̄odani gburugburu, n̄okpo okwo naakaa ele
 badnū t̄uhnasna mkp̄oma ma be w̄u be mini,
 ma Chiokike gbarūna be mmehie.

⁴ Lele kpa be gbarū a n'okwukwo ns̄o hite
 n'ọnu Azaya nye ọwhnurninya, kaa,
 “Ak̄p̄iri otu badnū n̄okpo okwo n'ẹli-ikpa,
 anū mekwata apna Nyenwe āi,
 anū mee apna a sn̄i as̄i.

⁵ Be jeemesni kpakara ngwulangwu,
 be jaakwnadna kpakara rugwu nū
 rugwu mat̄i.

Kpakara apna z̄i mgbah̄irigodo jaasn̄i as̄i,
 kpakara apna z̄i ndagwurugwu jaaz̄i
 snam.

⁶ Kpakara ele badnū j̄owhnu ọznohia
 Chiokike.”

⁷ J̄oni kanū igbudu badnū n̄owhokwnusi
 a ma ọ w̄u be mini, “Anū ẹbnurnu agw̄o,
 nyele kannū anū gbanah̄oru ovu owe ẹhni
 Chiokike ke naava?”

⁸ Anū m̄inya mkp̄uru ke neeges̄i nū anū
 t̄uhnasnarnu mkp̄oma. Anū k̄aa nū Eberham
 b̄u nda anū. Kwnornu me kanū anū ezi
 ọka, Chiokike nwernu rikne mee kpakara
 akaworugwu ka gh̄o r̄umu Eberham.

⁹ Be b̄italam eh̄nigwe n'ikw̄nu kpakara
 isisi, isisi ọbula ke m̄inyala mkp̄uru ọma, be
 joogbudna a, t̄ubna nū rime b̄ekw̄nu.”

¹⁰ Ele badnū wam s̄ikwa a, “Kini b̄u nhne a
 jeeme?”

¹¹ J̄oni sarū be, “Nye nwernu iwo law̄uru,
 o kesi nye nw̄ee otu, nye nwernu wiri, mee
 masi k̄pam.”

† 2:41 *Iriri Ọgawhe*: Iriri Ọgawhe b̄u ige ele Ju neechenwanya nga Chiokike d̄ohiaru be n'ọhi n'aka ele Ij̄ipiti. Okwnehala 12:1-27; Ditaronomi 16:1-8.

¹² Ele ọna ntụ varu ma Jóni wu be mini, be sịkwa a, “Nye-zni-nhne, kịni bu nhne a jeeme?”

¹³ Jóni saru be, “Anu náhja ele badnu iwai kakwo kpa be nyernu anu iwu.”

¹⁴ Ele ogwu sịkwa a, “Kini bu nhne a jeeme?”

O kanu be, “Anu mee ele badnu nhne rikne, mọbu bno ele badnu nhne aghalaghala, ogwo ọnu anu ji anu ruwho.”

¹⁵ Ele badnu neele anya nu Jóni bu Karaịsi.

¹⁶ Jóni kanu be, “M ji m mini wu anu mini, kọvu nu nye kakwo m rikne vawa, nye me kwésile o whudnahie toma eriri okoro-ochi a lawuru. Nye wam jeeji Enine Nso nu bekwnu wu anu mini.

¹⁷ Nye nhne ọwhusna ikpa zi n'aka a, o ọowhusna ikpa a nkari, chibna ikpa a n'obna, kọvu o jeeji bekwnu chni echni kpone ruznurnuznu ikpa.”

¹⁸ Jóni ji agida ikwu-ọnu zi ichne ichne zni izi ọma, naariasno be tuhnasna mkpoma.

¹⁹ Kọvu nu Jóni bigbọru Eze Erọdu kwnornu Erodiasi nnwerne nwene a, nu agida nhne ojo berere ke Erọdu mernu.

²⁰ Erọdu tükwasiri n'olu nhne ojo ka, nga o yisiri Jóni ikelu.

Owuwu mini Jizosi

(Mat 3:13-17; Mak 1:9-11)

²¹ Nga Jóni wukparu ele badnu mini, o wuru Jizosi mini masi.* Nga Jizosi neekpe okpukpe, oligwe kpumernu.

²² Enine Nso whekwasiri a lele nduru, otu akpiri hiri n'oligwe dna kaa, “Ji bu Nnwọ m, me whnurnu n'anya, nhne i masiri m.”

Osnusno ọmumu Jizosi

(Mat 1:1-17)

²³ Nga Jizosi gbaru nri awha ẹto, o panizo ọnu izi ọma a, ele badnu naari nu o bu nnwọ Josefu,

nnwọ Hili,

²⁴ nnwọ Matati,

nnwọ Livaị, nnwọ Meliki,

nnwọ Janai, nnwọ Josefu,

²⁵ nnwọ Matatayasi, nnwọ Emosi,

nnwọ Nahum, nnwọ Ẹsili,

nnwọ Nagai,

²⁶ nnwọ Matị,

nnwọ Matatayasi, nnwọ Sẹmeni,

nnwọ Josẹki, nnwọ Joda,

²⁷ nnwọ Jonani, nnwọ Resa,

nnwọ Zerubabeli, nnwọ Seateli,

nnwọ Neri,

²⁸ nnwọ Meliki,

nnwọ Adị, nnwọ Kosam,

nnwọ Ẹlimadam, nnwọ Ẹr,

²⁹ nnwọ Josua, nnwọ Eleza,

nnwọ Jorim, nnwọ Matati,

nnwọ Livaị,

³⁰ nnwọ Simiọni,

nnwọ Juda, nnwọ Josefu,

nnwọ Jonam, nnwọ Ẹliakim,

³¹ nnwọ Mela, nnwọ Mena,

nnwọ Matata, nnwọ Natani,

nnwọ Devidi,

³² nnwọ Jesi,

nnwọ Obedi, nnwọ Boazi,

nnwọ Salimoni, nnwọ Nasoni,

³³ nnwọ Aminadabu, nnwọ Ram,

nnwọ Hezironi, nnwọ Perezị,

nnwọ Juda,

³⁴ nnwọ Jekọpu,

nnwọ Aziki, nnwọ Eberham,

nnwọ Tera, nnwọ Nahọ,

³⁵ nnwọ Sẹrugị, nnwọ Ru,

nnwọ Pelegi, nnwọ Ẹbe,

nnwọ Sela,

³⁶ nnwọ Kaịnani,

nnwọ Afazadi, nnwọ Sẹm,

nnwọ Noa, nnwọ Lamẹki,

³⁷ nnwọ Metusela, nnwọ Inoku,

nnwọ Jaređi, nnwọ Mahalaleli,

nnwọ Kaịnani,

³⁸ nnwọ Enosi,

nnwọ Sẹti, nnwọ Adam,

nnwọ Chiokike.

4

Ornurna Jizosi

(Mat 4:1-11; Mak 1:12,13)

¹ Enine Nso jihiaru nu rime Jizosi nga o hiri nu Osimini Jodani hiehna, Enine Nso duru a zne n'eli-ikpa.

² O zi n'eli-ikpa nri ọbochi ẹno, Ekwensu naarna a ornurna, o za nhne o riri kpakara ọbochi wam, omekwo, wiri gwnurnu a.

³ Ekwensu kanu a, “O buru nu i bu Nnwọ Chiokike, kanu akaworugwu ka o ghọ brẹdi.”

⁴ Jizosi saru a, “Be gbaru a n'okwukwo nsọ, kaa, ‘O buọ brẹdi bu nhne badnu kpọi jeeri ziri bđnu.’”

⁵ Ekwensu duru a pnezne n'olu rugwu gerisi a kpakara ẹli-eze k'owa n'ige matị.

⁶ O kanu a, “M jeenyi i kpakara rikne ka nu igwugwu be, kwnornu nu be nyernu m be, m jeenyi a nye obula masiri m.

⁷ O buru nu i jọkponu m risi ẹli, kpakara a jọbu ke i.”

⁸ Jizosi saru a, “Be gbaru a n'okwukwo nsọ, kaa, ‘I jọkponu Nyenwe i, Chiokike i risi ẹli, o bu ya kpọi bu nye i jeekpenu.’”

⁹ Ekwensu duru a zne nu Jeruselem, mee o gwuzoru n'olu towa Oro Nso Chiokike, kanu a, “O buru nu i bu Nnwọ Chiokike, gbudna ẹhni i n'eli hna.

¹⁰ Be gbaru a n'okwukwo nsọ, kaa, ‘O jeenyi ele enine izi a iwu gbasiri i ma be chekwata i nkari.

* 3:21 Nhne ka mernu tutu Erọdu yisiri Jóni n'ikelu.

11 Be jeegheru i n'aka be,
ma i gharu o kpobi i ochi nu rugwu."'
12 Jizosi saru a, "Be gbakwnornu a
n'okwukwo nso, kaa, 'I rna Nyenwe i,
Chiokike i ornurna.'"'
13 Nga Ekwensu rnakworu a ornurna, o
gharu a ige matj.

*Jizosi panizoru ernu a
(Mat 4:12,17; Mak 1:14,15)*

14 Jizosi lahna Galili nu rikne Enine Nso,
be tnusi otnutnu a kpakara ohna.
15 O zni nhne kpakara n'oro ogbako ele Ju,
kpakara ele badnu naaznarni a.

*Be juru Jizosi nu Nazareti
(Mat 13:53-58; Mak 6:1-6)*

16 Jizosi zne nu Nazareti hne o soru, o bna
n'oro ogbako ele Ju n'Obochi Ozukwa Inwe ele
Ju lele kpa o mesi, o lizo ma o gwnu okwukwo
nso.
17 Be nyee a okwukwo Azaya nye
owhnurninya, o kpume a whnu hne be gbaru,
18 "Enine Nso Nyenwe aj zi n'ehni m,
kwnornu nu Chiokike aj teru m mono,
o zni ele mboni izi oma.

O ziyaru m o kpo okwo ogbahia ele zi
n'oro ikelu,
mee ele isni whnurnu osno,
nu o dphia ele be neemegbu,
19 nu o kpo okwo awha Nyenwe aj
jooznohia ele ke a."

20 O kpusni okwukwo wam nyehnata nye
neezne izi, daziri eli. Kpakara ele zi n'oro
ogbako ele Ju legidne a anya.

21 O panizo naakanu be, "Be mezuru nhne
okwukwo nso kwuru n'anya anu tna."

22 Kpakara ele badnu kwuru a oka oma,
ikwu-onu oma a duru agida be ehni, be
neesikwa, "Ka o buo nnwo Josefu?"

23 Jizosi kanu be, "N'eziz anu jootnunu m
elulu ka, 'Wodibia digba ehni i, kpakara nhne
a nurnu i mernu nu n'eli Kapanom, mee be
hna n'eli i.'"'

24 "Me kanu anu ezi oka, nye owhnurninya
nwée oso anya n'eli a.

25 Kovu me kanu anu, agida ele nnwerne
nzi be nwurnu zi n'eli Izireli n'ige Elaija,
nga Chiokike mesnirni oligwe, mini zoge
awha eto nu enwa isunu, ke kpharu okne
okwnunyo dnarnu nu kpakara eli.

26 Be ziznege Elaija znekwnusi nye obula
nu rime be, okwolem otu nnwerne nzi a
nwurnu ke zi nu Zerefati* ke zi ndundu
Sajdoni.

27 Agida ele nchnichna zi masi n'eli Izireli
n'ige Elisia nye owhnurninya, o za nye be
mernu o ziri richna, okwolem Nemanj nye
Siriya."

28 Onuma jiharu kpakara ele zi n'oro
ogbako ele Ju mkpoma nga be nurnu nhne ka.

29 Be lizo, chihala a n'eli be, duru a zne
n'onu rugwu hne be wukwasiri eli be ma be
kwnadna a n'eli.

30 Kovu o hiri n'esilawuru be whoga.

*Jizosi chihalaru renwu ojo
(Mak 1:21-28)*

31 Jizosi zne Kapanom n'eli Galili, n'Obochi
Ozukwa Inwe neezni ele badnu nhne.

32 Ehni duru be nu nhne o neezni,
kwnornu nu o neezni nhne lele nye nwernu
rikne n'aka Chiokike.

33 Otu nwerukna ke renwu ojo nwugwu zi
n'oro ogbako ele Ju wam, o gweru okne nkoli
si lulo,

34 "Kini bu nhne aj nu ji nwekogwu, Jizosi
nye Nazareti? I varu ma i gbumekwo aj? M
maam nye i bu, i bu nye nso ke Chiokike."

35 Jizosi bigboru a, kanu a, "Kpusni onu i, hi
nu rime a whuya." Renwu ojo wam vudna a
n'eli nu ruwhnu ele badnu wam, hi nu rime
a whuya, o mekasila a nhne.

36 O duru kpakara ele badnu ehni, be
neesikwarita ibne be, "Ka bu iznizni kini?
Nwerukna ka nwernu rikne o ji notunu
renwu ojo oka, be whuya masi."

37 Otutnu gbasiri a gbasaru kpakara eli zi
be gburugburu.

*Jizosi gworu ele badnu
(Mat 8:14-17; Mak 1:29-34)*

38 Jizosi hi n'oro ogbako ele Ju wam whuya,
bna n'oro Sajmoni. Nne nnwerne Sajmoni
naarja ehni orne bekwnu, be riasno Jizosi o
yinu a aka.

39 O zne gwuzoru nu ngeri okpata a, bigbo
ehni orne bekwnu wam, o sigbasi a. O lizo
ngangam neeznenu be izi.

40 Nga ehnam dnarnu, be kwuyanu Jizosi
kpakara ele naarja ehni igbugbu zi odo n'odo,
o tukwasi be aka a otu otu, gwokpakara be.

41 Renwu ojo hi nu rime agida ele badnu
whuya, neesi lulo. "Ji bu Nnwok Chiokike."

Kovu Jizosi bigboru be, o kwéle be kwu oka,
kwnornu nu be magwu nu ya bu Karaishi
wam.

*Jizosi znirni izi oma
n'oro ogbako ele Ju*

(Mak 1:35-39)

42 Nga chiboru, o zne nu hne koru owu. Ele
badnu noopio a, nga be pioharu a, be kwéle
o gharu be whoga.

43 Kovu Jizosi kanu be, "M jeezne n'eli ele
ke berere zni be izi oma eli-eze Chiokike,
kwnornu nu ka bu nhne Chiokike kwno
ziya m."

44 O neezni izi oma nu kpakara oro ogbako
ele Ju zi nu rime Judiya.

* 4:26 Zerefati: Ka buo eli Izireli.

5

Ele mbom sno apna Jizosi

(Mat 4:18-22; Mak 1:16-20)

¹ Otu obochi Jizosi gwuzo n' ngeri Osimini Genezareti, agida ele badnu naadnagidne a, n' onu ikwu-onu Chiokike.

² O whnu ogbo lawuru zi nu ngeri mini, ele noogbu aznu whogaru nu rime be n' osnu igbo be.

³ Jizosi bna n' otu ogbo ke bu keru Sajmoni, kanu a o nubna matj nu rime mini, o daziri eli nu rime ogbo wam neezni ele badnu nhne.

⁴ Nga o znikworu nhne, o kanu Sajmoni, "Nubna ogbo nu rime mini wusi igbo i, gbu aznu."

⁵ Sajmoni saru a, "Nda-aj-kwu, a doligburu ehni a n' ernu kpakara abali ka, o zia nhne obula a gburu, kovu kwnornu nu ikwu-onu i, m jowusi igbo."

⁶ Nga be wusiri igbo, be gbu agida aznu, ke mernu igbo bete nodoka.

⁷ Be whenu ele ibne be aka ele zi n' ogbo berere, be va yinu be aka. Be va gbujj ogbo lawuru wam n' aznu, be bete neemi.

⁸ Nga Sajmoni Pita whnurnu nhne mernu, o dna n' eli n' ochi Jizosi kaa, "Nyenwe aj, hi nu hne me zi whoga kwnornu nu m bu m nye ojo."

⁹ Aznu be gburu duru be ehni k' agida.

¹⁰ O bu masi kpa o duru Jemisi nu Joni rumu Zebidi ehni, ele be nu Sajmoni sno noogbu aznu. Jizosi kanu Pita, "Ogwu tuko i, hite nu kitna i j' obu nye j' okwuhia badnu."

¹¹ Be kwohia ogbo be n' onu mini, sigbasi kpakara nhne snornu Jizosi.

*Jizosi gworu
nye nchnchna*

(Mat 8:1-4; Mak 1:40-45)

¹² Nga Jizosi zi rime eli-ohna, otu nwerukna naarija nchnchna vakwnusiri a. Nga o whnurnu Jizosi, o dna n' eli nu ruwhnu a, rjasno, kaa, "Nyenwe aj, o buru nu i pioru, i nweru rikne mee m ziri rchna."

¹³ Jizosi d' snima aka a, kpatu a, kaa, "M pioru m, ziri rchna." Ngangam, nchnchna wam whogaru n' ehni a.

¹⁴ Jizosi doru a aka nu nsnj kanu a, "O za nye obula i kanu, kovu la, gweru ehni gesi i nye okwa arjohna, gweru nhne Mozizi nyernu n' iwu kwa arjohna ma o buru nhne akebe nyee be nu i zi rchna."

¹⁵ Kovu otnutnu a gbasaru k' agida, ke kpararu agida ele badnu naava n' onu ikwu-onu a, ma o gw' nriia be.

¹⁶ Agida ige Jizosi whoga, zne hne koru owu, neekpe okpukpe.

*Jizosi gworu nye ehni a
d' onwuru odonwu*
(Mat 9:1-8; Mak 2:1-12)

¹⁷ O du n' otu obochi, nga Jizosi neezni nhne, ele Farisi nu ele zni iwu ele Ju ele hi nu kpakara mgbu ke zi n' eli Galili nu Judiya nu Jeruslem va, be dazi, rikne Nyenwe aj zi n' ehni a, o noogwo ele nriia.

¹⁸ Ele rukna vuyanu a otu nye ngeri ehni a d' onwuru odonwu, nye dnanyi n' olu okpata, be pio kpa be joovubna nu ruwhnu Jizosi.

¹⁹ Nga be nw' ee rikne du a ehni kwnornu nu agida ele badnu wam, be pne n' olu oro, hi nu hne be d' kahalaru nhne vudna a n' olu okpata o dnanyi n' esilawuru igbudu badnu wam nu ruwhnu Jizosi.

²⁰ Nga Jizosi whnurnu okwnata m' kpoma be, o kaa, "Nwerukna, be gbarunam ji kpakara mmehie i."

²¹ Ele Farisi nu ele zni iwu ele Ju neeskwa nu m' kpoma be, "Nwerukna ka bu nyele ke nookwulu Chiokike? Ndaa nye nweru rikne o gbaru mmehie, hne o bu' o Chiokike kpoi?"

²² Jizosi mahjaru nhne be naari nu m' kpoma be, o sika be, "Kini k' pahjaru anu naari oriri ka nu m' kpoma anu?"

²³ Ndaa ke zi ewheke nu o kaa, 'Be gbarunam ji kpakara mmehie,' s' obu o kaa, 'Lizo zne izne?'

²⁴ M pioru m anu mahja nu Nnw' o ke Badnu nweru rikne n' owa o gbaru mmehie." O kanu nwerukna wam ngeri ehni a d' onwuru odonwu, "M ka m ji, lizo, vuru okpata i, la oro i."

²⁵ Ngangam, o lizo nu ruwhnu be, chiri etere o dnanyi n' olu a, la n' oro a, naazarni Chiokike.

²⁶ Ehni du kpakara be, be tu ogwu znarni Chiokike, naakaa, "A whnurnam nhne ikne tna."

Jizosi sukwuru Liva

(Mat 9:9-13; Mak 2:13-17)

²⁷ Nga nhne ka mekworu, Jizosi whogaru whnu otu nye ona nt' u be kwu Liva, hne o dazi n' oro nt' u, Jizosi kanu a, "Sno m."

²⁸ Liva lizo, sigbasi kpakara nhne snornu a.

²⁹ Liva sinu Jizosi okne iriri n' oro a, agida ele ona nt' u nu ele berere snornu be neeri wiri.

³⁰ Ele Farisi nu ele zni iwu ele Ju sika be sno apna a, "Kini mernu anu noosno ele ona nt' u nu ele mmehie neeri wiri?"

³¹ Jizosi saru be, "Mkpa dibja ziko naakpa ele ehni buru oma, okwolem ele nriia.

³² M vage m o sukwu ele oma, kovu ele mmehie ma be tuhmasna m' kpoma."

Ajji gbasiri ovu onu

(Mat 9:14-17; Mak 2:18-22)

³³ Be kanu a, "Ele sno apna Joni noovu onu neekpe okpukpe ige obula, ma ele sno ele Farisi neeme masi k' pam, kovu ele sno apna i neeri, n' onwo."

³⁴ Jizọsi saru be, “Ele varu hne be nọolu nnwerne ikne be joovu onu hne be nu nye nọolu nnwerne ikne zi?”

³⁵ Kọvu ọbochi vawa, nga be jaanahoru be nye nọolu nnwerne ikne, ọ bu nga be joovu onu n'ọbochi wam.”

³⁶ Jizọsi tnu nu be elulu ka, “O za nye joodokaru mkpekele ikpe ikne dnu sni n'iwu ọknani, o mene kpam, ọ joodoka ke ikne, ikpe ikne nu ke ọknani jaadnabna.

³⁷ O zi masi nye jeegweru manya ikne gbasị n'olori akpuko ọknani, o mene kpam, manya ikne wam jaagbawama olori akpuko ọknani, manya nu olori akpuko whume etekne.

³⁸ Kọvu be gbasị manya ikne n'olori akpuko ikne.

³⁹ O za nye ke nworu manya ọknani noopio ke ikne, kwnornu nu ọ karu ke ọknani kama.”

6

Ajji gbasịri

Ọbochi Ozukwa Inwe

(Mat 12:1-8; Mak 2:23-28)

¹ O du otu Ọbochi Ozukwa Inwe, Jizọsi nu ele sno apna a naagawhe n'esilawuru ekwu ikpa, ele sno apna a bete nọogho ikpa, naata, naarıria a n'aka be.

² Agwna ele Farisi sika, “Kini mernu anu neeme nhne kwesile n'iwu n'Ọbochi Ozukwa Inwe?”

³ Jizọsi saru be, “Anu gwnuna nhne Devidi mernu nga wiri gwnuru a, ya nu ele sno a?”

⁴ O bnazernu n'oro nso Chiokike, gweru bredi be bitaru nu ruwhnu Chiokike ke ele arjohna bu ele kwesiri o ri, ri a, nyee masi ele nu ya sno.”

⁵ Jizọsi kanu be, “Nnwọ ke Badnu bu Nyenwe Ọbochi Ozukwa Inwe.”

Nwerukna aka

dɔnwurnu ɔdonwu

(Mat 12:9-14; Mak 3:1-6)

⁶ O du n'Ọbochi Ozukwa Inwe berere, Jizọsi bna n'oro ọgbako ele Ju neezni nhne, otu nwerukna aka dɔnwurnu ɔdonwu zi pji.

⁷ Ele Farisi nu ele zni iwu ele Ju noopio nhne be jeeji bno Jizọsi nhne, be needne a ma be jowhnu ma ọ jogwo nriria n'Ọbochi Ozukwa Inwe.

⁸ Kọvu nu Jizọsi mahjaru nhne be naari nu mkpoma be. O kanu nwerukna wam aka dɔnwurnu ɔdonwu, “Lizọ, gwuzoru nu ruwhnu kpakara ele badnu.” O lizọ, gwuzoru.

⁹ Jizọsi kanu be, “Me sika anu, ọ buru oma n'iwu o mee nhne oma n'Ọbochi Ozukwa Inwe sibu o mee nhne buo oma, ọ znhia budnu sibu o gbu ogbu?”

¹⁰ O lezute be anya, kanu nwerukna wam, “Dɔsnima aka i.” O dɔsnima aka a, aka a buru oma lele kpa ọ zi nu mbom.

¹¹ Kọvu ovu weru be ehni k'agida, be bete neesikwarita ehni be nhne be jeeme Jizọsi.

Jizọsi hghiaru nri nu

badnu lawuru ele izi

(Mat 10:1-4; Mak 3:13-19)

¹² N'ige wam Jizọsi whogaru zne nu rugwu zne kpe okpukpe, o neekpenu Chiokike tem chi bo.

¹³ Nga chi buru, o sukwukota ele sno apna a, horu nri nu badnu lawuru nu rime be, sukwu be ele izi.

¹⁴ Ka bu rehna be, Saimoni, nye o sukwuru Pita, nu Anduru nwene a, Jemisi, Jni, Filipo, Batolomi,

¹⁵ nu Matiyu, Tmosi, Jemisi nnwo Alifayosi, Saimoni nye zi n'esilawuru ele noonwu bekwnu nu mkpoma,

¹⁶ nu Judasi nnwo Jemisi, nu Judasi Isikarioti, nye reru a.

Jizọsi znirni nhne

gwọ nriria

(Mat 4:23-25)

¹⁷ Nga ya nu be hiri nu olu rugwu hiedna, be gwuzoru n'eli etekne, agida ele sno apna a nu agida ele badnu ele hiri nu kpakara Judiya, nu Jeruselem ma ele wu nu ngeri mini eli Taya nu Saidoni varu gbako nu hne be zi.

¹⁸ Kpakara ele ka varu ma be nuru ikwu-onu a, ma Jizọsi gwọ be nriria be. O gworu ele renwu ojo nwu gwu.

¹⁹ Kpakara ele badnu wam noopio ma be kpatu a aka, kwnornu nu rikne hiri n'ehni a nọogwo kpakara be nriria be.

Ovu ọso n'onu nu

nhne igbugbu ke mkpoma

(Mat 5:1-12)

²⁰ Jizọsi gwelizo anya a olu le ele sno apna a, kaa,

“Owa oma zinu anu ele mboni, kwnornu nu anu jeenwe eli-eze Chiokike.

²¹ Owa oma zinu anu ele wiri nọogwnu kitna, kwnornu nu ruwho jeeji anu.

Owa oma zinu anu ele naakwna ekwna kitna, kwnornu nu be jomu rumu.

²² Owa oma zinu anu nga ele badnu snornu anu irno,

nga be jaachihala anu n'ogbako be, kpari anu,

kaa nu anu bu ele ojo kwnornu Nnwọ ke Badnu.

²³ “Anu nwudna onwudna, anu tne eri snarnima, ogwo ernu anu zi agida n'oligwe. Kwnornu nu ọ bu kpa ele nda be mernu ele qwhnurninya.

²⁴ Kọvu nu awhnuwhnu jaazinu anu ele eze,

kwnornu nū anū rilem iru ke anū.

²⁵ Awhnūwhnu jaazīnu anū ele neeriji rūwhu kītna,

kwnornu nū wiri jōogwnu anū.

Awhnūwhnu jaazīnu anū ele nōomu rūmu kītna,

kwnornu nū anū jaakwna ekwna, gba masi mkpe.

²⁶ Awhnūwhnu jaazīnu anū nga kpakara ele badnū naakaa anū okā oma,

o bū kpa ele nda be mernu ele owhnurninya aghalaghala.

Whnū ele irno anū n'anya

(Mat 5:38-48; 7:12a)

²⁷ “Kovu me naakanū anū, anū ele nōonu ikwu-ōnu m, anū whnū ele irno anū n'anya, anū menu ele snornu anū irno nhne oma.

²⁸ Anū gōzi ele nōovu anū ōnu, kpenu ele neemegbu anū okpukpe.

²⁹ O būru nū nye obula gbōru i aka nū nti, chetenu a berere masi. O būru nū nye obula chinahoru i iwu olu i, chīta masi a iwo rime i.

³⁰ Nyega nye obula nōorio i nhne, o būru nū nye obula nahōru i nhne i, i kāa o nyehnata i.

³¹ Lele kpa anū piuru ma ele badnū menu anū, anū menu be kpm.

³² “O būru nū anū whnūru ele wam n'anya bū ele nōowhnu anū n'anya, kīni bū mbnarna anū nwernu? O būbedi ele mmehie nōowhnu ele whnūru be n'anya n'anya.

³³ O būru masi nū anū neemenu ele neemenu anū nhne oma nhne oma kpōi, kīni bū mbnarna anū nwernu? Ele mmehie neeme kpm.

³⁴ O būru nū anū gbaznisiri ele anū jaanahia nhne n'aka be nhne kpōi, mbnarna kīni anū nwernu? Ele mmehie naagbaznisi ele mmehie be jaanahōru nhne n'aka be nhne.

³⁵ Kovu anū nōowhnu ele irno anū n'anya, anū menu be nhne oma, anū gbaznisi be nhne, lé anya nū anū jaanahia nhne obula n'aka be. Ige wam ogwo ernu anū jaazi agida, anū jōobu rūmu Nye Kakwo Nhne Dum Olu, kwnornu nū Chiokike neemenu ele nwée mkpōma mmamma nū ele ojo imerne oma.

³⁶ Anū nwe mkpōma obirizi lele kpa Nda anū nwernu mkpōma obirizi.

O kpe ele berere ikpe

(Mat 7:1-5)

³⁷ “Anū kpé ikpe, ma Chiokike gharū o kpe anū ikpe. Anū máa nye obula ikpe, ma Chiokike gharū ama anū ikpe. Anū gbarūnu ele mernu anū nhne ojo, ma Chiokike gbarūnu anū masi.

³⁸ Anū nyega, be jeenyega masi anū. Nhne otutu būru oma, be bnjarnu aka, yuyo ke jiwheru ejiwhe, bū nhne Chiokike jeenye i ke ji nū nsnūnu i jéenwe rikne vuli. Kwnornu nū nhne anū jiri tūnu nye berere bū nhne be jeeji tūnu anū.”

³⁹ Jizōsi tñunu be elulu ka, “Nye isni o nwernu rikne noodu nye isni? Be lawūru be jáadnabna nū rime olulu?

⁴⁰ Nye sno apna nye-zni-nhne jáakawo nye zni a nhne. Kovu nye obula mkhīaru nhne nkari jōonu lele nye znirni a nhne.

⁴¹ “Kīni kpahīaru i neele nhne matī ke zī n'anya nwene i, kovu i zá naari ōriri gbasiri igwe-isisi ke zī n'anya i?

⁴² Ndaa kpa i jeeji kanū nwene i, ‘Nwene, sete me gweme nhne matī ke zī n'anya i, nga i whnūna igwe-isisi ke zī i n'anya?’ Ji nye ruwhnu lawūru, beru osno gweme igwe-isisi ke zī n'anya ke i, ige wam i jōowhnsna osno o gweme nhne matī ke zī n'anya nwene i.

Isisi nū mkpūru a

(Mat 7:16-20; 12:33-35)

⁴³ “O zá isisi oma obula ke jaamī mkpūru ojo, isisi ojo nwée rikne mīi mkpūru oma.

⁴⁴ Be mahia isisi hite nū mkpūru a. Ele badnū zá nōogho mkpūru figi hite n'isisi akūkara, mōbu mkpūru vajni n'igwnu-ōgna.

⁴⁵ Badnū oma neegwehīa nhne būru oma hite n'ekwnu oma ke zī nū mkpōma a. Badnū ojo hite n'ekwnu ojo ke mkpōma a neegwehīa nhne ojo. Kwnornu nū ōnu nookwu hite nū nhne ke zī nū mkpōma a.

Ntū-ēli lawūru

(Mat 7:24-27)

⁴⁶ “Kīni kpayaru anū noosukwu m, ‘Nyenwe ai, Nyenwe ai,’ kovu anū zá neeme nhne me kwuru?

⁴⁷ Nye obula ke vakwnusiri m, nūru ikwu-ōnu m, neeme masi be, m jeegesi anū nye o yiri.

⁴⁸ O yiri otu nwerukna noowu ōro, o gwubna ēli nkari, tū ntū-ēli a n'olu rugwu. Nga mgba-mini ēli gbarū, kwna ōro wam, o nwée rikne kwnadna ōro wam, kwnornu nū be wusiri a rikne.

⁴⁹ Kovu nye obula ke nūru ikwu-ōnu m o zá neeme be, yiri otu nwerukna wuru ōro a n'olu rīzna, ke gwūmigwo ēli nkari, mini-ēli gba, kwna ōro wam, o dna girigidim, tū ogwnu.”

7

Jizōsi gwōru nnwō izi

nye risi ogwnu

(Mat 8:5-13)

¹ Nga Jizōsi kwukworu kpakara okā ka nū nsnī ele badnū wam, o bna Kapanōm.

² Otu nye ogwnu nēchi otu riwhu ele ogwnu nwernu otu nnwō izi zī a mkpa k'agida, ke zī n'ōnu ēnwu.

³ Nga o nūru nhne gbasiri Jizōsi, o ziz-nenu a ele okno badnū ele Ju, rīasno a ma o va gwō nnwō izi a.

⁴ Nga be vakwnusiri Jizōsi, be rīasnosi a rikne, “Nwerukna ka kwesiri nye i jeemenu nhne nū kpa.

5 Nwerukna ka whnurnu eli aị n'anya, o wunnu aị ọro ogbako."

6 Jizọsi snornu be zne.

Nga ọ zị ndundu n'oro a, nye ogwnu wam ziznenu a ele enyi a, kanu a, "Nyenwe aị, i dogbu ehi n'ọ va, m kwesile m nye i va ọro a.

7 Ka mernu me kwesige ehi m n'ụ nye kwesiri ọ vakwnusi i. Kọvu kwu oka kpọi, be jọgwo nnwọ izi m.

8 Kwnornu n'ụ m b'ụ nye zị n'ochichi, m nweru m ele ka m, n'ụ ele me ka. Me kanu nye ka 'Zne,' o zne, kanu nye berere 'Vaa,' ọ va. Me kanu nnwọ izi m 'Mee ka,' o mee a."

9 Nga Jizọsi nurnu oka ka, o duru a ehi, ọ tuhnasa, kanu igbudu badnu wam sno a, "Me kanu anu ezi oka, m whunulele m okwnata ovu hna kpa n'Izireli."

10 Ele wam o ziyaru lahna n'oro a, be whnu n'ụ be gwọlam nnwọ izi wam.

Jizọsi gwọru nnwọ rukna nwerinya nzi a nwurnu

11 Kpa ige matị whemernu, Jizọsi zne otu ohna be kwu Neni, ele sno apna a n'ụ igbudu badnu snornu a zne.

12 Kpa be naabna n'ohuhna eli-ohna wam, ele badnu vu iznu, otu nnwọ nwerinya nzi a nwurnu nweru, agida ele eli wam sno a.

13 Nga Nyenwe aị whnurnu a, ọ dọnu a obirizi, kanu a, "I kwnama ekwna."

14 O znekwensi ele vu okpata-iznu wam, kpatu a aka, be gwuzoru. Jizọsi kaa, "Wikoro rukna, m ka m ji, lizo."

15 Nye wam nwurnu onwu lizo, daziri eli nookwu oka, Jizọsi kwuru a nyehnata nne a.

16 Kpakara ele badnu tu ogwnu naaja Chiokike. Be kaa, "Otu nye owhnurninya hna ezi whuyalam n'esilawuru aị, Chiokike valẹm o yinu ele ke a aka."

17 Osusu gbasiri Jizọsi gazu kpakara Judiya n'ụ kpakara eli zị a gburugburu.

Jizọsi n'ụ Jọni Nye Wụ Mini

(Mat 11:2-19)

18 Ele sno apna Jọni kanu a kpakara nhne ka. O sukwu badnu lawuru n'ụ rime be,

19 be zne sika Nyenwe aị, "Ọ b'ụ j'wa b'ụ nye ke jaava, sọba a le anya nye berere?"

20 Nga be vakwnusiri Jizọsi, be kaa, "Jọni Nye Wụ Mini ziyaru a sika i, 'Ọ b'ụ j'wa b'ụ nye ke jaava, sọba a le anya nye berere?'"

21 Ige wam Jizọsi gwọru agida ele nriria zị ọdo n'odo, rẹnwu ojo hiri n'ụ rime ele badnu whuya, ele isni whnurnu osno.

22 Ọ saru ele izi wam, "Anu lahna kanu Jọni kpakara nhne anu whnurnu n'ụ ke anu nurnu. Ele isni whnurnu osno, ele mgworo znernu izne, be neeme ele nchnichna ziri rjchna, ele nsij inyo nnonu nhne, ele nwurnu onwu lizoru n'enwu, be neezni ele mboni izi oma.

23 Chiokike jọgozi nye obula ke jula m kwnornu nhne me mernu."

24 Nga ele izi Jọni laru, Jizọsi bete naakanu igbudu badnu wam nhne gbasiri Jọni. "Kini b'ụ nhne anu znernu ọ whnu n'eli-ikpa? Ekere achara ruwhere noovu?"

25 Ọ b'ụ kini nhne anu znernu ọ whnu? Nwerukna wogwu iwo marnu mma sa? Le, ele noowo iwo marnu mma, ele wu budnu oriri n'ụ onwunwo zị n'oro ele eze.

26 M ka m, risi kini b'ụ nhne anu znernu ọ whnu? Nye owhnurninya sa? Owe! Me kanu anu, ọ b'ụ nye kakwo nye owhnurninya.

27 Ka b'ụ nye wam be gbaru nhne n'okwukwo nsọ gbasiri a, 'M jeezizne nye izi m n'ụ ruwhnu i, nye jeemekwata apna n'ụ ruwhnu i.'

28 Me kanu anu, n'esilawuru ele ele rinya murnu, ọ zā nye kakwo Jọni, kọvu nye zikaru matị n'eli-eze Chiokike kakwo Jọni."

29 (Nga kpakara ele badnu, ma ele onu n'ụ nurnu nhne Jizọsi kwuru, be kwuru n'ụ apna Chiokike zị snam, kwnornu n'ụ Jọni wuru be mini.)

30 Kọvu ele Farisi n'ụ ele zni iwu ele Ju juru mmuma Chiokike, kwnornu n'ụ Jọni wuge be mini.)

31 Jizọsi sika be, "Ndaa nhne me jeeji sninu ebiri ka? Be n'ụ lele kini?"

32 Be n'ụ lele rumu takiri dazigwu n'ahia noosukwu ibne be ikwu, kaa, 'A kwannu anu eri, anu tnege eri,

A gwnu eri mkpe anu kwnage ekwna.'

33 Jọni Nye Wụ Mini varu, o rile wiri, nwoge manya, anu kaa, 'O nweru rẹnwu ojo.'

34 Nnwọ ke Badnu varu, neeri wiri, nnonwo manya, anu kaa, 'Nye ka b'ụ nye okne wiri n'ụ nye nwọ okne manya, enyi ele onu n'ụ nye ele mmehie.'

35 Kọvu nhne ele magwu Chiokike neeme neegesi n'ụ akoniche Chiokike ziri ezi."

Be teru Jizọsi mọno

36 Otu nye Farisi sukwuru Jizọsi wiri n'oro a, o zne n'oro nye Farisi wam daziri n'ikpechi neeri wiri.

37 Otu nwerinya ke wu budnu mmehie n'eli wam mahjaru n'ụ Jizọsi neeri wiri n'oro nye Farisi, o zne zuya mọno otute zị n'ite alabasita.

38 O gwuzoru n'aznu Jizọsi naakwna ekwna n'ochi a, anya-mini a nqowu n'ochi Jizọsi. O gweru rukeri-ize a kwnosnama be, snutu ochi a onu, gweru mọno otute wam te ochi a lawuru.

39 Nga nye Farisi wam sukwuru Jizọsi wiri whnurnu a, ọ kaa n'ụ mkpoma a, "Ọ b'uru n'ụ nwerukna ka b'ụ nye owhnurninya, o znernu a mahja n'ụ nwerinya ka naakpatu aka b'ụ nye mmehie."

⁴⁰ Jizōsi sarū a, “Saīmoni, o nwernu nhne me jaakanū i.”

Ọ kaa, “Kanū m, Nye-zni-nhne.”

⁴¹ Jizōsi kanū a, “Otu nwerukna ke naag-baznisi ele badnū iwai nwernu ele rukna lawūru ji a ọgwo. Otu nyenum ji a riwhu mkpūru iwai isne, nye berere ji nri isne.

⁴² Be lawūru nwée nhne be jeeji nọokwu ọgwo, o gbarūnu be ọgwo wam be ji a. Nyele n'esilawūru be jọowhnu a n'anya karūkwo?”

⁴³ Saīmoni sarū, “M che m nū ọ bụ nye wam ọ gbarūnu ọgwo zị agịda.”

Jizōsi kanū a, “I kperu ikpe ọma.”

⁴⁴ Jizōsi tūhnasna hne nwerinya wam zị kanū Saīmoni, “I whnūnu nwerinya ka? M varū m ọro i, i nyége m mini me sñu ọchi m, kọvu o ji anya-mini a sñu ọchi m lawūru, gweru rukeri-ize a kwnosnama be.

⁴⁵ I snúge m ọnu, kọvu nwerinya ka, hite n'ige me varū, zị noosnutu ọchi m lawūru ọnu.

⁴⁶ I tége risi m mọno, kọvu ọ wūsiri mọno ẹknarna ọma n'ọchi m lawūru.

⁴⁷ Kam kpayaru, me kanū i, lele kpa be gbarūnu a agịda mmehie, ọwhnun'anya a zị agịda. Nye be gbarūnu nhne matị nwernu ọwhnun'anya zị matị.”

⁴⁸ Jizōsi kanū nwerinya wam, “Be gbarūnam jì mmehie i.”

⁴⁹ Ele nū Jizōsi dazị neeri wiri nookwurita n'ehni be, “Nye ka bụ nyele ke naagbaru mmehie?”

⁵⁰ Jizōsi kanū nwerinya wam. “Ọkwnata mkpọma j zñohialam jì, la n'udno.”

8

Agwna ele rinya ke snornu Jizōsi

¹ Nga ka mekworu, Jizōsi znernu hite n'otu ẹli matị dū n'ẹli agịda berere nọokpo okwo izi ọma ẹli-eze Chiokike. Nri nū badnū lawūru wam ele izi a sno a,

² ma agwna ele rinya be gwọru rẹnwu ojo nū nriria zị ọdo n'odo, Meri, nye be kwu Magidalini, nye Jizōsi chihalaru rẹnwu ojo ẹsauru nime a,

³ Joana nnwerne Kuza, nye neelegidne ọro Erọdu, ele rinya berere sno a bụ Suzana nū agịda ele berere. Ele rinya ka neeyinu be aka nū mkpa be hite nū nhne hi n'aka be whuya.

Elulu nye ọgha mkpūru (Mat 13:1-9; Mak 4:1-9)

⁴ Kpa igbudu badnū naagbakọ hne Jizōsi zị, hite n'agịda ẹli-ọhna, ọ tñunu be elulu ka.

⁵ “Otu nye ẹrnu ẹkwu znernu agha mkpūru. Kpa ọ naagha mkpūru, agwna mkpūru dna nū ngeri apna, ele badnū zọ be ọchi, rụmu ọnnu tūturu be ta.

⁶ Agwna be dnarnū n'olu rugwu, nga be furu, be chnanwụ kwnornu nū be nwée mini.

⁷ Agwna mkpūru berere dnarnū n'esilawūru igwnu, igwnu wam sohia kpagbu be.

⁸ Agwna mkpūru berere dnarnū n'ẹli bụru ọma, be so, mīnya mkpūru, otu riwhu kakwo kpa be kparū be.”

Nga o kwukworu ọka ka, ọ kaa, “Nye nwernu nsnị o ji ọ nū nhne, ọ nūrnū.”

Nhne o kwno tñu elulu (Mat 13:10-17; Mak 4:10-12)

⁹ Ele sno apna a sịkwa a risi elulu ka.

¹⁰ Jizōsi kanū be, “Be mernu ma anū mahia nhne tugwaru otugwa ke ẹli-eze Chiokike, kọvu be jookwunu ele berere ọka n'elulu, ma,

'Be neele anya, kọvu be jọowhnu ọsno, be noobno nsnị, kọvu be jọoghohia.'

Risi elulu nye ọgha mkpūru wam

(Mat 13:18-23; Mak 4:13-20)

¹¹ “Ka bụ risi elulu wam. Mkpūru wam bụ ikwu-ọnu Chiokike.

¹² Mkpūru ke zị nū ngeri apna nū lele ele nūrnū ikwu-ọnu Chiokike, Ekwensu va gweme ikwu-ọnu wam nū mkpọma be, ma be gharū o kweru, be zñohia be.

¹³ Ele ke zị nū rugwu nū lele ke nūrnū ikwu-ọnu wam gweru snarnima nwūgwu a, kọvu nū be nwée ẹgwugwnu, be kweru ige matị, kọvu nga nhne ọkpa iru varū, be dnah-nala aznū.

¹⁴ Mkpūru ke dnarnū n'esilawūru igwnu nū lele ele nūrnū ikwu-ọnu wam, kọvu kpa be nooso, ọriri nū ẹkwu nū nhne ọso n'ọnu k'owa ka, kpagbu be, ọ ghọ nhne mīna mkpūru.

¹⁵ Kọvu ele ke dnarnū nū hne ẹli bụru ọma bụ ele ke ji mkpọma ọma be nū ezi ọka, bīta ikwu-ọnu ka nga be nūrnū a, be hite n'ọsnuta mkpọma mīnya mkpūru.

Tonji zị olu nhne tonji (Mak 4:21-25)

¹⁶ “Ọ zá nye nọomusi tonji bīta a nū mkpūru-ruru ọkpata, mọbu kpusni a nhne, tñunuma, ọ bīta a n'olu nhne be bīta tonji, ma ele naabnanya ọro whnūnu iwhe a.

¹⁷ Nhne ọbula be tugwaru otugwa jọowhuya iwhe, be jookpume kpakara nhne be kpusnirni okpusni ma ele badnū whnūnu be.

¹⁸ Kam kpayaru, anya dū anū ẹli nhne anū nọonu. Be jeenyi nye ọbula ke nwernu, kọvu nye nwée, be jaanahọru a ọ bụbedi, ke ọ riri nū o nwernu.”

Nne Jizōsi nū rụmu nne a (Mat 12:46-50; Mak 3:31-35)

¹⁹ Nne Jizōsi nū rūmu nne a varū ma be whnū a anya, kōvu nū be nwée rikne zne ndundu kwnornu igbudu badnū wam.

²⁰ Be kanū Jizōsi, “Nne i nū rūmu nne i gwuzogwu n’ederezi noopio ọ whnū i.”

²¹ Jizōsi sarū be, “Nne m nū rūmu nne m bụ ele nūrnu ikwu-ọnu Chiokike, neeme be.”

*Jizōsi bigbōru
ruwhere osimini*

(*Mat 8:23-27; Mak 4:35-41*)

²² Otu ọbochi Jizōsi kanū ele sno apna a, “Anū ngwa ma a whe aka osimini kiyari.” Be bna nū rime otu ọgbo zneba.

²³ Kpa be neezne, Jizōsi znirni anyarna. Okne ruwhere neewhe, mini nōowubna nū rime ọgbo, ọgbo noopio o mii.

²⁴ Ele sno apna a vakwnusi a, kpatnenya a, kaa, “Nda-aj-kwu, mini neeri aj.”

O lizō, bigbō ruwhere wam nū abakamini wam, be whebi, ọhna dna bii.

²⁵ Jizōsi sīkwa ele sno apna a, “Ndaa hne ọkwnata mkpōma anū zī?”

Be tū ogwnu, o ji be anya, be neesikwarita ibne be, “Nye ka bụ nyele? Ọ nōotunu ruwhere nū abaka-mini ọka, be bnonu a nsni.”

*Jizōsi gwōru nye
rēnwu ojo nwūgwu*

(*Mat 8:28-34; Mak 5:1-20*)

²⁶ Jizōsi nū ele sno apna a kwōru ọgbo be zne n’eli ele Gerasa ke zī n’aznū Osimini Galili.

²⁷ Nga Jizōsi hiri n’ogbo whūya, otu nye rēnwu ojo nwūgwu hi n’eli wam kwnusi a. Nwerukna ka gbulem ọkwnu o wó iwo, o wú n’oro, ọro a bụ n’illili.

²⁸ Nga ọ whnūrnu Jizōsi, o si lūlo dna n’eli n’ochi a, siwama n’okne nkōli, “Kini bụ me nū jī nwekōgwu, Jizōsi Nnwō ke Chiokike Kakwo Nhne Dum Olu? Bikno, i tá m awhnūwhnu.”

²⁹ O kwuru kpa kwnornu nū Jizōsi nyernu rēnwu ojo wam iwu o hi nū rime a whūya. Agida ige be kpagidnenu nwerukna wam, be tū a ijigba ọchi nū aka, be neese a nse, ọ gbajikwo ijigba, rēnwu ojo chibna nū hne kōru owu.

³⁰ Jizōsi sīkwa a, “Kini bụ rēwhna i?”

Ọ kaa, “Lijoni,”* kwnornu nū agida rēnwu ojo bnarū nū rime a.

³¹ Be riasno Jizōsi ọ chibna be n’olulu awhnūwhnu.

³² Odokwnu ezni zī nū ndundu naata wiri n’olu rugwu, rēnwu ojo riasno Jizōsi o kweru be zne bna nū rime ezni wam, ọ karū be zne.

³³ Rēnwu ojo wam hiri nū rime nwerukna wam whūya, bna nū rime ezni wam, odokwnu ezni wam gbadna ngwulangwu wam, dnabna nū rime mini, rinwū nū rime mini.

³⁴ Nga ele nōozu ezni wam whnūrnu nhne mernu, be gbawhu, zne tnūsinu ele zī nū rime eli-ọhna ma nū ẹkwu.

³⁵ Ele badnū whōga zne whnū nhne mernu, be vakwnusi Jizōsi, whnū nwerukna wam rēnwu ojo whōgaru nū rime a hne ọ dazī eli n’ochi Jizōsi, woru iwo, echiche a zuru ozu, ogwnu tū be.

³⁶ Ele whnūrnu nhne mernu kanū ele badnū kpa be gwōru nwerukna wam rēnwu ojo nwūgwu.

³⁷ Kpakara ele wu n’eli Gerasa gburugburu kanū Jizōsi ọ whōga n’eli be, kwnornu nū ogwnu nōotu be. Ọ bna nū rime ọgbo lahna.

³⁸ Nwerukna wam rēnwu ojo whōgaru nū rime a riasno a ma o snornu a la, kōvu Jizōsi chihala a, kanū a,

³⁹ “La n’oro i, kanū ele badnū nhne Chiokike mennu i.”

Nwerukna wam la, nōotnusa kpakara n’eli-ọhna nhne Jizōsi mennu a.

*Nnwō rinya matī nū
nwerinya ntū ọvnarna*

(*Mat 9:18-26; Mak 5:21-43*)

⁴⁰ Nga Jizōsi lahnarnū, igbudu badnū nabnanyarnū a, kwnornu nū be neele anya a.

⁴¹ Otu nwerukna rēwhna a bụ Jarjosi, nye risi ọro ọgbako ele Ju, vakwnusiri a, dna n’eli n’ochi Jizōsi, riasno a ọ va ọro a.

⁴² Ọ riasno a kwnornu nū o nwernu otu nnwō rinya kpōi, ke gbarū nri nū awha lawūru, nye zī n’onu ẹnwu.

Kpa Jizōsi neezne n’apna, igbudu badnū snornu a naadnagidne a.

⁴³ Otu nwerinya ke naarija ntū ọvnarna nri nū awha lawūru, zī n’esilawūru igbudu badnū wam, tuwhukwo kpakara nhne o nwernu n’aka ele dibia, kōvu ọ zá nye nwernu rikne gwō a.

⁴⁴ Ọ varū n’aznū Jizōsi kpatū ọnu iwo a aka, ngangam, ọvnarna a gbabiri.

⁴⁵ Jizōsi sīkwa, “Nyele kpatūru m aka?”

Kpakara be gōru. Pita kaa, “Nda-aj-kwu, igbudu badnū ka naadnagidne i.”

⁴⁶ Kōvu Jizōsi karū, “Otu badnū kpatūru m aka, m maam nū rikne hiri n’ehni m whōga.”

⁴⁷ Nga nwerinya wam whnūrnu nū o nwée rikne tugwa, ẹhni naama a ririri, ọ dna n’eli n’ochi Jizōsi, kahia nū ruwhnu igbudu badnū wam nhne mernu ọ jiri kpatū iwo a aka, nū kpa be gwōru a ngangam.

⁴⁸ Jizōsi kanū a, “Nnwō m rinya, ọkwnata mkpōma i znōhialam jī, la n’udno.”

⁴⁹ Kpa Jizōsi kpū ọka n’onu, otu badnū hiri n’oro Jarjosi va, kanū Jarjosi nye nnwō a naarija aria, “Nnwō i rinya nwūnam. I kpáknama Nye-zni-nhne ẹhni berere.”

⁵⁰ Nga Jizōsi nūrnu a, ọ kanū Jarjosi, “I tūko ogwnu, kweru kpōi, be jōgwō a.”

* 8:30 Lijoni ke bụ agida ele ọgwu.

⁵¹ Nga ọ vaduru n'oro, o kwéle nye obula snornu a bna nū rime oro, okwolem Pita, Jōni nū Jemisi, nū nda nū nne nnwọ rinya wam.

⁵² Kpakara ele badnū zị naakwana ẹkwna, naagbanū nnwọ rinya wam mkpe. Jizōsi kanū be, "Anū kwnáma ẹkwna, nnwọ rinya ka nwúna ọnwu, o neezni anyarna."

⁵³ Be mụ a rụm, kwnornu nū be magwū nū nnwọ rinya wam nwurnu ọnwu.

⁵⁴ Kọvu nū Jizōsi nnwugwuru a n'aka, kaa, "Nnwọ, lizo."

⁵⁵ Enine a hiehnarnu, o lizo ngangam. Jizōsi kanū be, be nyee a nhne, ma o ri.

⁵⁶ O duru ele murnu a ẹhni, kọvu Jizōsi kanū be, be káhjanu nye obula nhne mernu.

9

*Jizōsi zihalaru nri
nū badnū lawuru*

(Mat 10:5-15; Mak 6:7-13)

¹ Jizōsi sukwukọta ele izi nri nū ẹbo wam n'otu, nyee be rikne nū rikne ọchichi ọ chihala renwu ojo nū ọ gwọ nrịria.

² O zihala be zne kpọ okwo ẹli-eze Chiokike, gwọ ele nrịria.

³ O kanū be, "Anū jí nhne obula kpa anū neezne. Anū jí mkpara mọbu rẹkpa, mọbu brẹdi, mọbu iwai, anū chí iwo lawuru.

⁴ Oro obula anū bnarnū, anū daziri pji tem anū whọga n'ẹli-ọhna wam.

⁵ O buri nū ele badnū nábnanyana anū, anū whọga n'ẹli-ọhna wam, lịsname rịzna ke zị n'ọchi anū, ma ọ buri nhne akebne megidne be."

⁶ Be whọga, zne hite n'otu ẹli zne ẹli berere, nọkpo okwo izi ọma, nọgowo ele nrịria kpakara ọhna.

Ọ gbagwojiri Erọdu anya

(Mat 14:1-12; Mak 6:14-29)

⁷ Nga Erọdu nye nẹchi Galili nurnu kpakara nhne neeme, ọ gbagwojiri a anya, kwnornu nū agwna ele badnū naakaa nū Jōni hilem n'ẹnwu lizo,

⁸ ele berere naakaa nū Ẹlajia whųyaru iwhe, ele berere naakaa nū otu nū rime ele ọwhnurninya gbaka hiri n'ẹnwu lizo.

⁹ Erọdu kaa, "M biri m Jōni risi, nyele bu nye ka me nọonu nhne gbasiri a?" O pio ọ whnū Jizōsi.

Jizōsi nyernu

pokwu badnū isne wiri

(Mat 14:13-21; Mak 6:30-44; Jōn 6:1-14)

¹⁰ Nga ele izi wam hiehnarnu, be kanū Jizōsi nhne be mernu. O kwuru be whọga ichne, zne ẹli Bẹtesaida.

¹¹ Nga igbudu badnū wam mahjaru, be snornu a. O kwubnanya be, kwunu be ọka gbasiri ẹli-eze Chiokike, gwọ masị ele nrịria.

¹² N'ogbednachi nga chi neej, nri nū badnū lawuru wam vakwnusi Jizōsi, kanū

a, "Zihala ele ka ma be zne nū rime ẹli-ọhna ma nū rime ẹkwu, zuru nhne oriri, dnanyi n'abalị a, kwnornu nū a zị nū hne kọru owu."

¹³ Jizōsi sarū be, "Anū nyee be nhne be jeeri."

Be sarū a, "Nhne a nwernu hna kwolem ike brẹdi isne nū aznū lawuru, okwolem ma a jeezne zuya wiri a jeenye igbudu badnū ka."

¹⁴ Pokwu ele rukna isne zị pii.

Kọvu Jizōsi kanū ele sno apna a, "Anū mee ma be daziri ẹli nū mkpuru nri badnū isne, mkpuru nri badnū isne."

¹⁵ Ele sno apna a mee kpam, nye obula daziri ẹli.

¹⁶ Jizōsi gweru ike brẹdi isne wam nū aznū lawuru wam, le anya n'oligwe, tū mmamma, nyawama be. O nyee be ele sno apna a, be nyee igbudu badnū wam.

¹⁷ Kpakara be ri, riji rụwho, ele sno apna a tụtukota rụnnuruvnu ke gwarnū, nri nū nkita lawuru jihjaru.

Pita kahjaru nye Jizōsi bu

(Mat 16:13-19; Mak 8:27-29)

¹⁸ Otu ọbochi, nga Jizōsi neekpe okpukpe ichne, ele sno apna a nū ya zị, ọ sịkwa be, "Ele badnū be naakaa nū me bu nyele?"

¹⁹ Be sarū a, "Agwna be naakaa, Jōni Nye Wụ Mini, ele berere naakaa, Ẹlajia, ele berere masị naakaa, otu nū rime ele ọwhnurninya gbaka hiri n'ẹnwu lizo."

²⁰ Kọvu Jizōsi sịkwa be, "Anū n'iwuhuru anū, anū kanū nū m bu m nyele?"

Pita sarū a, "Ị bu Karaịsi ke Chiokike."

Jizōsi kwuru ọka

gbasiri ẹnwu a

(Mat 16:20-28; Mak 8:30--9:1)

²¹ Jizōsi dọ be aka nū nsnị be kánū nye obula.

²² O kanū be, "Nnwọ ke Badnū jaatariri agida awhnūwhnu, ele okno badnū nū ele risi arjohna nū ele neezni iwu ele Ju jọjọ a, be gbu a, nga ọbochi ẹto whemernu, o jeehi n'ẹnwu lizo berere."

²³ O kanū kpakara be, "O buri nū nye obula jooosno m n'aznū, o jọjọ ẹhni a, vuru ogba a kpakara ọbochi sno m.

²⁴ Kwnornu nū nye obula ke noopio ọ znọhia budsonu a, jootuwu a, kọvu nye obula ke jootuwu budsonu a kwnornu m, jooznohia a.

²⁵ Mbnarna kiji bu nhne badnū jeenwe ọ buri nū ọ rihja kpakara ọwa n'iru, kọvu tuwhume budsonu a?

²⁶ Nye obula ke iwheerne m nū ikwu-ọnu m jootu, Nnwọ ke Badnū jootu iwheerne nye wam nga ọ jaava n'igwugwu a nū n'igwugwu ke Nda a nū ke ele enine izi nsọ.

²⁷ N'ezì me kanụ anụ, agwna ele gwuzo hna jónwu ẹnwu tem be whnụ ẹli-eze Chiokike."

Onwoghari ke Jizọsi
(*Mat 17:1-8; Mak 9:2-8*)

²⁸ Nga obochi ẹsato whemernu kpa Jizọsi kwuru ikwu-ọnu ka, o kwuru Pita, Jóni nù Jemisi yisinu ẹhni a zne n'olu rugwu kpe okpukpe.

²⁹ Kpa o zì neekpe okpukpe, ruwhnu a gbanwornu, iwo naacha va-a-a, neeke eke lele amụma.

³⁰ Ngangam, be whnụ ele rukna lawuru nù ya nookwurita ọka, be bụ Mozizi nù Ẹlajia.

³¹ Be whụyaru n'igwugwu, be nù Jizọsi kwu ọka gbasiri ẹnwu a ke jeemezu nù Jeruselem.

³² Anyarna turu Pita nù ele nù ya zì, kọvu nga anya dnornu be, be whnurnu igwugwu Jizọsi nù ele rukna lawuru be nù a gwuzo.

³³ Kpa be nọowhoga hne Jizọsi zì, Pita kanụ a, "Nda-aj-kwu, o buru ọma a daziri hna. Ngwa ma a wu oro-ẹka ẹto hna, otu ke i, otu ke Mozizi, otu Ẹlajia." (Ọ máa nhne o joo kwu.)

³⁴ Kpa o kpu ọka ka n'ọnu, erumeru oligwe whụyaru kpusni be, ogwnu turu be kpa be zì n'erumeru oligwe wam.

³⁵ Otu akpìri hiri n'erumeru oligwe wam, kaa, "Ka bụ Nnwọ m, nye me hōhiaru, anụ bnotenu a nsni."

³⁶ Nga akpìri wam kwukworu, be whnurnu Jizọsi nsnunu a. Ele sno apna a bítaru nhne be whnurnu nù mkpọma be, ọ zà nye be kannụ nhne be whnurnu ige wam.

Jizọsi gworu
wikoro rukna

(*Mat 17:14-18; Mak 9:14-27*)

³⁷ N'ekile a, nga be hiri nù rugwu wam hiedna, igbudu badnụ vakwnusiri Jizọsi.

³⁸ Otu nwerukna hiri n'igbudu badnụ wam siwama lulo, "Nye-zni-nhne, bikno le nnwọ m rukna anya, kwnornu nù ọ bụ otu nnwọ me nwernu.

³⁹ Rẹnwu ojo nwugwu a, o si lulo, o vudna n'ẹli nọodo a, ọ nọogbo okoto n'ọnu, o gbu ọkwnu sù ọ sigbasi a, ma o gbu a.

⁴⁰ M riasno ele sno apna i ma be chihala a, kọvu be nwée rikne."

⁴¹ Jizọsi sarụ be, "Anụ ebiri ka nwée ọkwната mkpọma, ele mkpọma hiri aghi, me nù anụ jaadazì dụ ngele? Me jeesinu anụ mkpọma dụ ngele?" Ọ kanụ nwerukna wam, "Kwuya nnwọ i rukna hna."

⁴² Nga nnwọ rukna wam naava, rẹnwu ojo wam vudna a n'ẹli, dọsi a rikne. Kọvu Jizọsi bigbọru rẹnwu ojo wam, gwọ a, kwuhnata a nda a.

⁴³ Rikne ẹrnu Chiokike duru kpakara be ẹhni.

Jizọsi kwukwnornu ọka
gbasiri ẹnwu a

(*Mat 17:22,23; Mak 9:30-32*)

Kpakara nhne o neeme noodu ele badnụ ẹhni, Jizọsi kanụ ele sno apna a,

⁴⁴ "Anụ bno nsnì nhne me naakanụ anụ. Be jeegweru Nnwọ ke Badnụ resi n'aka ele badnụ."

⁴⁵ Kọvu be ghóyage nhne o nookwu. O bụ nhne tugwaru otugwa n'anya be, be máa nhne ọ bụ. Ogwnu kwéle be sịkwa a nhne gbasiri a.

Nyele kakwo ibne a?

(*Mat 18:1-5; Mak 9:33-37*)

⁴⁶ Ele sno apna a bete neesigha ọka n'esilawuru be nye kakwo ibne a.

⁴⁷ Nga Jizọsi mahiaru nhne zì be nù mkpọma, o kwuru otu watakiri gwuzote a nù ngeri a.

⁴⁸ Ọ kanụ be, "Nye ọbula ke jaanarnu watakiri ka nù rẹwhna m, nanarnu m, nye ọbula ke nanarnu m, nanarnu nye ziyaru m. Kwnornu nù nye kakwo matì n'esilawuru anụ, nye wam bụ nye kakwo."

Nye zá neemegidne anụ,
dagwunu anụ

(*Mak 9:38-40*)

⁴⁹ Jóni kanụ a, "Nda-aj-kwu, a whnurnu otu badnụ ke naachihala rẹnwu ojo nù rẹwhna i, a bnosni a, kwnornu nù ọ zá noosno aj."

⁵⁰ Jizọsi kaa, "Anụ bnósi a, kwnornu nù nye zá neemegidne anụ, dagwunu anụ."

Otu mgbu kwéle
ọ nabnanya Jizọsi

⁵¹ Kpa ige nọodu ọ jaala oligwe, Jizọsi kpebitem o zne Jeruselem.

⁵² O zihala ele izi nù ruwhnu a, be zne otu ẹli Sameria ma be mekwatanu a nhne.

⁵³ Kọvu ele ẹli wam kwéle ọ nabnanya a, kwnornu nù ọ nù lele nù o neezne Jeruselem.

⁵⁴ Nga ele sno apna a Jemisi nù Jóni whnurnu ka, be sịkwa a, "Nyenwe aj, i pi-oru ma a sukwudna bekwnu n'oligwe rnegbukwo kpakara be?"

⁵⁵ Kọvu nù Jizọsi tũhnasarnu, bigbọ be.

⁵⁶ [Ọ kaa, "Anụ máa enine anụ nwernu. Nnwọ ke Badnụ váge ma o gbu badnụ, kọvu ọ znohia budson badnụ."] Be whe zne ẹli berere.

Nhne o joowhu ele
sno apna Jizọsi

(*Mat 8:19-22*)

⁵⁷ Kpa be neezne nù apna, otu nwerukna kanụ a, "M joosno i hne ọbula i neezne."

⁵⁸ Jizọsi kanụ a, "Edu nwernu mkpewu hne be dnanyi, ọnunu oligwe nwernu ajikwu hne be zukwa inwe, kọvu Nnwọ ke Badnụ nwée hne ọ jaabita risi a."

⁵⁹ Ọ kanụ nye berere, "Sno m."

Kòvu nwerukna wam kaa, “Nyenwe aị, kweru me beru ọsno lite nda m.”

⁶⁰ Jizọsi kanụ a, “Gharụ ele nwurru ọnwu ma belite ele nwurru ọnwu ibne be, kòvu zne kpọ kwọ izi ọma ẹli-eze Chiokike.”

⁶¹ Nye berere kwno kaa, “Nyenwe aị, m joo no i, kòvu kweru m me beru ọsno zne bekwu ele ọro m ikwu ipne-aznụ.”

⁶² Jizọsi kanụ a, “O zà nye ọbula ke yisiri aka nù mfama ẹkwu ke anọ ọro nọpnuhari, daziri neele anya n'aznụ, kwesiri ẹli-eze Chiokike.”

10

Jizọsi zihalaru nri badnụ ẹsau nù ebo

¹ Nga ka mekworu, Jizọsi hòhiaru nri badnụ ẹsau nù ebo, ma o zihala be ebo ebo nù rime ẹli-ọhna nù mgbu ọbula o jaabna.

² O kanụ be, “Ogwwe nhne ẹkwu zị agịda, kòvu nù ele ẹrnu zị ele nù ele. Kam kpayarụ, anụ rịo Nyenwe ogwe nhne ẹkwu ma o zizne ele ẹrnu n'ẹkwu a.”

³ Anụ zne, m neezizne anụ lele rụmu atnurnu n'esiawuru edu.

⁴ Anụ jị rẹkpa iwai, mọbu rẹkpa, mọbu okoro-ọchi, anụ békwa nye ọbula n'apna.

⁵ “Nga anụ bnarnụ ọro ọbula, anụ beru ọsno kaa, ‘Udno zinu ọro ka.’”

⁶ O bụru nù nye udno zị n'ọro wam, udno anụ jaazinu a, o bụru nù nye udno zila, udno anụ jaahiehnakwnusi anụ.

⁷ Anụ dazigidne n'ọro wam, neeri, nọonwo nhne be jeenye anụ. Ka bụ kwnornu nù nye ẹrnu kwesiri ọgwo ẹrnu a. Anụ znékọ n'ọro n'ọro.

⁸ “Nga anụ bnarnụ ẹli-ọhna ọbula ke be nabnanyarnụ anụ, anụ ri nhne ọbula be jeenye anụ.

⁹ Anụ gwọ ele nrịria zị pji, anụ kanụ be, ‘Eli-eze Chiokike zị anụ ndundu.’”

¹⁰ Kòvu nù ẹli ọbula anụ bnarnụ ke be nabnanyana anụ, anụ zne n'apna a, kaa,

¹¹ “O bụbedi rịzna ẹli anụ ke takwnusiri n'ọchi aị, a lịsnaru a megidne anụ. Kòvu anụ mahja nù ẹli-eze Chiokike zị ndundu.”

¹² Me kanụ anụ, Chiokike joodonu ẹli Sodom obirizi karụ ẹli wam n'ọbochi ikpe.

Eli-ọhna kwé ekwe (Mat 11:20-24)

¹³ “Awhnụwhnu jaazinu i, jị Korazini. Awhnụwhnu jaazinu i, jị Betsaida. Kwnornu nù ẹrnu ndu-ẹhni ke be rnurnu nù rime anụ, o bụru nù be rnụ be nù ẹli Taya nù ẹli Sajdoni, be znernu ọtuhnasna mkpọma agịda ige wheru ewhe, daziri n'ikpe mkpe nù retnu.

¹⁴ Kòvu be joodonu Taya nù Sajdoni obirizi n'ikpe karụ anụ.

¹⁵ Jịwa masị, Kapanom, be jeegwelizọ i olu dū oligwe? Be jeegwedna i ẹli, dū békwnu ẹli rẹnwu.

¹⁶ “Nye noobnonu anụ nsnị noobnonu m nsnị, nye juru anụ nọọju m. Nye ọbula ke juru m nọọju nye ziyaru m.”

Nri badnụ ẹsau nù ebo wam hieharu

¹⁷ Nri badnụ ẹsau nù ebo wam jiri snarnima hiehna, kaa, “Nyenwe aị, ele rẹnwu ojo bnnonu aị nsnị nù rẹwhna i.”

¹⁸ Jizọsi kanụ be, “M whnurnu m Ekwensu hne o hi n'oligwe dna lele amuma.

¹⁹ M nyernu m anụ rikne o zokwasi agwo nù akpị ọchi nù o megbu kpakara rikne ke nye irno, o zà ke nwernu rikne mekasi anụ nhne rja rja.

²⁰ Kòvu mkpọma sọ anụ n'ọnu kwnornu nù rẹnwu ojo noobnonu anụ risi, kòvu anụ nwudna nù be gbarụ rẹwhna anụ n'okwukwo n'oligwe.”

Jizọsi nwudnaru (Mat 11:25-27; 13:16,17)

²¹ Ige wam Jizọsi nwudnaru k'agịda nù rime Enine Nso, kaa, “Meka, Nda, Nyenwe oligwe nù ọwa, kwnornu nù i bígwaru nhne ka n'anya ele akọ nù ele marụ nhne, kòvu i kpumennu be rụmu takiri. Owe! Nda, meka, kwnornu nù o bụru ọma kpam n'anya i.

²² “Nda m yisiri kpakara nhne n'aka m. O zà nye magwụ nye Nnwọ wam bụ, okwolem Nda. O zà nye magwụ masị nye Nda bụ, okwolem Nnwọ wam, nù ele Nnwọ wam piuru o kpumenu a.”

²³ Ige wam o tughnasna hne ele sno apna a zị, kanụ be ichne, “Owa ọma zinu anya ke whnurnu nhne anụ whnurnu.

²⁴ Me kanụ anụ, agịda ele ọwhnurninya nù ele eze piuru o whnụ nhne anụ nọowhnu kòvu be whnuna, nù o nurnu nhne anụ nọonu, kòvu nù be nuna.”

Elulu nye Sameria ọma

²⁵ Otu mgba, nye ogwnu iwu lizọru naakpa Jizọsi iru, sịkwa a, “Nye-zni-nhne, kịni bụ nhne me jeeme ma m kehja m bụdnu kwọ okwo?”

²⁶ Jizọsi sarụ a, “Kịni bụ nhne be gbarụ n'iwu? Ndaa kpa i nọogwnu a?”

²⁷ O sarụ, “I jeegweru kpakara mkpọma i nù kpakara mkpuru ovu i, nù kpakara iknerna i nù kpakara echiche i whnụ Nyenwe aị Chiokike i n'anya. Whnụ masị nye agbatibi i n'anya lele ẹhni i.”

²⁸ Jizọsi kanụ a, “I sakwaharu a, mee kpam, i jaazị bụdnu.”

²⁹ Kòvu o piuru o mee ẹhni a nye ọma, o sịkwa Jizọsi, “Nyele bụ nye agbatibi m?”

³⁰ Jizọsi sarụ a, “Otu nwerukna hiri nù Jeruselem neeze Jeriko, o dnabna n'aka ele

buznu. Be woru iwo a, li a nhne, gbawhu, sigbasi a n'onu enwu.

³¹ O dnabna nu otu nye ariohna neewhe n'apna wam, nga o whnrnu a, o garu ngeri berere znernu hne o znezne.

³² Kpam masi, otu nye Livai, nga o vaduru hne o zi, whnu a, o garu ngeri berere znernu hne o znezne.

³³ Kovu otu nye Sameria neewhe n'apna wam, vaduru hne o zi, nga o whnrnu a, o donu a obirizi.

³⁴ O znekwnusi a, wusi a mono nu manya, knesi enya a. O vukwasị nwerukna wam n'olu anọ ọro a, kwuzne a n'oro ele izne, legidne anya nkari.

³⁵ N'ekile a, o nyee nyenwe ọro ele izne wam iwai, kanu a, 'Legidne a anya nkari, me hiehna, m jookwu i nhne obula i mewhuru nu risi.'

³⁶ "N'esilawuru badnu eto ka, ndaa nye i cheru gesiri nu nye wam dnabarnu n'aka ele buznu bu nye agbatibi a?"

³⁷ Nye ogwnu iwu wam kaa, "Nye wam ke donu a obirizi."

Jizosi kanu a, "Zne, mee kpam."

Jizosi znernu ọro

Mata nu Meri

³⁸ Nga be neezne n'apna, Jizosi nu ele sno apna a va otu eli-ohna, zne n'oro Mata nye gbamanu a ọro a.

³⁹ Mata nwernu otu nwene rinya rewhna a bu Meri, Meri znernu daziri eli n'ochi Nyenwe ai, nonu ikwu-onu a.

⁴⁰ Kovu echiche Mata jiharu n'ernu o nonu, o vakwnusi Jizosi kaa, "Nyenwe ai, o gbasi la i nu nwene m rinya sigbasiri me nunsnu m nonu ernu? Kanu a ma o yisinu m aka."

⁴¹ Jizosi saru a, "Mata, Mata, i naari ọri, neemekpa ehni i ehni kwnornu agida nhne.

⁴² Kovu otu nhne zi mkpa. Meri horulam nhne ke ka mma, o za nye jeenwe rikne nahoru a ya."

11

Jizosi znirni nhne

gbasiri okpukpe

(Mat 6:9-13; 7:7-11)

¹ O du otu obochi Jizosi zi neekpe okpukpe n'otu hnanum, nga o kpekworu, otu nu ele sno apna kanu a, "Nyenwe ai, zni ai kpa be kpe okpukpe lele kpa Joni znirni ele sno apna a."

² O kanu be, "Nga anu neekpe, anu kaa, 'Nda ai,

rewhna i buru nhne zi nsọ.

Eli-eze i va.*

³ Nyee ai wiri tna, ke joozunu ai obochi tna.

⁴ Gbarunu ai mmehie ai,

lele kpa a jaagbarunu ele mehieu ai.

I yisi ai nu rime nhne onurna.' "†

⁵ O kanu be, "O buru nu otu nu rime anu nwernu enyi, o znekwnusi a n'esilawuru abali, kaa, 'Enyi m, gbaznisi m ike bredi eto.

⁶ Otu enyi m berere vakwnusiri m, m nwé m nhne me jeenye a.'

⁷ "Enyi a hi nu rime ọro sa a, 'I kpakna m ehni. M tnsilem ọro, me nu rumu m dnanyi n'okpata. M jeenwe rikne lizo nye i nhne obula.'

⁸ Me kanu anu, o bu n'ezi nu o jelizo nye a kwnornu nu o bu enyi a, kovu kwnornu nu iwhnerne za nootu nye ọro, o jeelizo nye a.

⁹ "Kpam masi, me kanu anu, anu rio, be jeenye anu, anu pio, anu joopiohia, anu znu aka n'onu-mgbo, be jaagbamanu.

¹⁰ Kwnornu nu nye obula ke nono, nonoiohia, nye noopio, noopiohia, nye nooznu aka nu mgbo be jaagbamanu a.

¹¹ "Ndaa nye bu nda n'esilawuru anu, nye nnwo a nonoio aznu, o nyee a agwo? ‡

¹² Mbu o rio a ekwna ochichi, o nyee a akpi?

¹³ O buru anu ele jogburu ehni anu nu bujo mahiaru o nyee rumu anu nkesi buru oma, o ko buru Nda anu ke oligwe, o bu nu o jeenye ele nonoio a Enine Nso?"

Jizosi nu Belizibolu

(Mat 12:22-30; Mak 3:20-27)

¹⁴ Jizosi naachihala renwu ojo ke dnarnu mgbu. Nga renwu ojo wam whogaru, nwerukna wam ke dnarnu mgbu kwuru oka, o du kpakara ele badnu ehni.

¹⁵ Kovu agwna be kaa, "O ji rikne Belizibolu nye risi ele renwu ojo naachihala renwu ojo."

¹⁶ Ele berere naakpa a iru, kaa, o gesi be nhne elekema hi n'oligwe.

¹⁷ Jizosi mahiaru mkpoma be, o kanu be, "Eli-eze obula kewama megidne ehni a, o jootubiri etekne, ọro obula kewama megidne ehni a, o jaadna.

¹⁸ O buru nu Setani kewama megidne ehni a, eli-eze a jogwuzoli. M nookwu ka kwnornu nu anu kanu m ji m rikne Belizibolu naachihala renwu ojo.

¹⁹ Kitna, o buru nu m ji m rikne Belizibolu naachihala renwu ojo, ele sno anu ji rikne nyele naachihala be? Be j obu ele ikpe anu.

²⁰ Kovu o buru nu m ji m aka Chiokike naachihala renwu ojo, eli-eze Chiokike dlam anu ehni.

²¹ "Nga nye dikne woru mgwna ogwnu a, neese ọro a, ekwnu a zi n'udno.

* 11:2 Agwna nhne be gbaru kwuru be mee nhne i noopio n'owa lele kpa be mee a n'oligwe † 11:4 Agwna nhne be gbaru kwuru dphia n'aka nhne onurna ‡ 11:11 Agwna nhne be gbaru kwuru bredi

²² Kọvu nga nye kakwo a rikne varu, megbu a, o nahoru a kpakara mgwna ogwnu a ke o tükwasiri mkpọma, kesa ekwnu a.

²³ “Nye dágwunu m, neemegidne m, nye snóné m chikota nhne, nọobosa ọbosa.

Renwu ojo hiehnarnu
(Mat 12:43-45)

²⁴ “Nga renwu ojo hiri nu rime badnu whoga, o zneghari n’eli chna chna chna, noopio hne o joozukwa inwe. O buru nu o whnuna, o kaa, ‘M jaalahna n’oro me hiri whuya.’

²⁵ Nga o vaduru, o whnu nu be zasnarnu oro wam bikwata nhne nkari.

²⁶ O jeezne chiri renwu ojo esau ibne a ele nwernu risi rikne karo a, be wuru nu rime nye wam. Onodi ipne-aznu nye wam johnasi bujo karu kpa o zi nu mbom.”

Nye owa oma n’ezi

²⁷ Kpa Jizosi zi nookwu oka ka, otu nwerinya siwama n’igbudu badnu wam, “Ruhwo ke vuru i nu rema ke i nwornu bu nhne be goziri ogozi.”

²⁸ Jizosi saru, “Ele owa oma karukwo bu ele nonu ikwu-onu Chiokike, neeme be.”

Nhne elekema ke Jona
(Mat 12:38-42)

²⁹ Kpa igbudu badnu wam gbakoru hne Jizosi zi, o kanu be, “Ebiri ojo ka noopio nhne elekema, o za nhne elekema be jeenye be, okwolem nhne elekema Jona.

³⁰ Lele kpa Jona bu nhne elekema ke ele Ninive, o bu kpa Nnwọ ke Badnu jobunu ebiri ka.

³¹ Eze nyerinya Seba jeelizo ya nu ele ebiri ka bna n’ikpe, o jaama be ikpe, kwnornu nu o hiri n’osotoma k’owa va nurnu akoniche Solomoni. Kovu le, nhne kakwo Solomoni zi hna.

³² Ele Ninive jeelizo, be nu ebiri ka bna n’ikpe, be jaama be ikpe, kwnornu nu be tuhnasarnu mkpoma n’okpo okwo Jona. Kovu le, nhne kakwo Jona zi hna.

Iwhne ke ehni
(Mat 5:15; 6:22,23)

³³ “O za nye jomusi tonji bita a nu hne tugwaru otugwa, mọba bita nu mkpururu nkita. Tnunu, be bita a n’olu nhne be bita tonji, ma ele naabnanya oro whnurnu iwhne a.

³⁴ Anya bu iwhne ke ehni. O buru nu anya i buru oma, kpakara ehni i jobu iwhne iwhne. Kovu o buru nu anya i buo oma, kpakara ehni i jaagba ochichiri.

³⁵ Anu ledukom anya o zi iwhne ke zi anu n’ehni bo gho ochichiri.

³⁶ Ka kpayarụ, o buru nu kpakara ehni i bu iwhne iwhne, o za ngeri ke gbaru ochichiri, kpakara ehni i jobu iwhne lele nga tonji nomukwasị i iwhne a.”

Ele Farisi nu
ele zni iwu ele Ju

(Mat 23:1-36; Mak 12:38-40)

³⁷ Nga Jizosi kwukworu oka ka, otu nye Farisi sukwu a, o va snornu a ri wiri, o snornu a zne, o daziri n’ikpechi.

³⁸ Nye Farisi wam whnurnu nu Jizosi kwoge aka bete ri wiri, o du a ehni.

³⁹ Nyenwe ai kanu a, “Kitna anu ele Farisi beru nso nu aznu okiko nu agbugba wiri, kovu nu owho-anya nu agwa ojo jiharu nu rime anu.

⁴⁰ Anu ele iwhnirniwhno! O buo otu badnu wam mernu rime okiko nu aznu a?

⁴¹ Anu gweru nhne zi nu rime agbugba wiri donu ele mboni obirizi, kpakara nhne jaazinu anu richna.

⁴² “Awhnuwhnu zinu anu ele Farisi, kwnornu nu anu nokwu otu nga nu nri ke kpakara mkporo okwukwo nwernu eknarna oma ke ekwu, kovu anu juru ikpe zi snam nu owhnun’anya Chiokike. O zi mkpa nu anu znernu eme nhne ka nu ke berere.

⁴³ “Awhnuwhnu zinu anu, ele Farisi, kwnornu nu anu whnurnu risi ngadna n’oro ogbako anu n’anya, o naamasị anu ele badnu neebekwu anu ikwu n’ahia.

⁴⁴ “Awhnuwhnu zinu anu, ele Farisi, kwnornu nu anu nu lele ilili ke ele badnu ma nọozo ochi n’olu a.”

⁴⁵ Otu nye ogwnu iwu saru Jizosi, “Nye-zni-nhne, oka ka i nookwu naakpasị ai iwhnerne.”

⁴⁶ Jizosi saru nye ogwnu iwu wam, “Awhnuwhnu jaazinu anu ele ogwnu iwu, kwnornu nu anu noovute ele badnu ivu rinya be vuru, kovu anu n’iwhuru anu jeegweru otu mkpaka anu yinu be aka.

⁴⁷ Awhnuwhnu zinu anu, kwnornu nu anu noowu ilili ele owhnurninya, ele nda anu oknani gburu.

⁴⁸ Anu bu ele akebne nu ele kwnagidnerneru nhne ele nda anu oknani mernu, be gburu ele owhnurninya, anu wu ilili be.

⁴⁹ Chiokike nu nhne omuma a karu, ‘M jeeziznue be ele owhnurninya nu ele izi, be joogbu agwna be, be jaakpakna ele berere ehni.’

⁵⁰ Kam kpayarụ, ebiri ka jaata awhnuwhnu kpakara ovnarna ele owhnurninya be gburu hite n’opanizo owa,

⁵¹ hite n’ovnarna Ebeli du n’ovnarna Zakaraya, nye be gburu n’iketa ojo arjohna nu hne zi nso. Owe! Me kanu anu, ebiri ka joooku kpakara ogwo ovnarna ka.

⁵² “Awhnuwhnu zinu anu ele ogwnu iwu, kwnornu nu anu gwemernu snambị ke naagbama onuhna akoniche, anu bnage, anu kwele ele pioro o bna be bna.”

⁵³ Nga Jizosi hiri nu pii whoga, ele Farisi nu ele zni iwu ele Ju nookwunu a onu rikne, nesisikwa ajji agida nhne.

⁵⁴ Be needne, noopio ma be j̄onu nhne be jeeji bno a nhne.

12

*O d̄o aka n̄u n̄sn̄i
gbas̄iri ruw̄hnu law̄uru
(Mat 10:26,27)*

¹ Nga igbudu ele badn̄u gbak̄oru hne Jiz̄osi z̄i ke mernu be n̄ozo ibne be ochi, Jiz̄osi beru osno naakan̄u ele sno apna a, “An̄u neeze nhne wh̄u br̄edi ke ele Farisi, ke b̄u ruw̄hnu law̄uru.

² Kwnornu n̄u be jookpume kpakara nhne be kpusnirni okpusni, kpakara nhne be tugwaru otugwa j̄owhuya iw̄hne.

³ Nhne an̄u kwuru n̄'ochichiri, be jookwuh̄a n̄'iw̄hnehnie, ke an̄u t̄ukasiri n̄u n̄sn̄i n̄u rime ̄oro mat̄i, be jookwuh̄a n̄'olu ̄oro.

*Nye an̄u kwesiri
̄o t̄u ogw̄nu
(Mat 10:28-31)*

⁴ “Ele enyi m, me kan̄u an̄u, an̄u t̄u ogw̄nu ele noogbu an̄o-̄ehni, ele nw̄ee rikne o mee nhne berere.

⁵ K̄ovu me kan̄u an̄u nye an̄u j̄ootu ogw̄nu a, an̄u t̄u ogw̄nu nye wam ke nwernu rikne gbu an̄o-̄ehni, t̄ubna enine n̄u rime b̄ekw̄nu. Owe! Me kan̄u an̄u, an̄u t̄u ogw̄nu a.

⁶ Be z̄a neere w̄onzna isne mkp̄uru iw̄ai mat̄i law̄uru? K̄ovu Chiokike z̄a neechezu otu n̄u ruw̄hnu a.

⁷ N'ezi, be gwn̄urnu kpakara rukeri-ize ke risi an̄u ̄onu. Ogw̄nu t̄u an̄u, an̄u z̄i okne ̄onu ah̄ia kar̄u agida w̄onzna.

*O kwuh̄ia n̄u ̄o j̄u Karaisi
(Mat 10:32,33; 12:32; 10:19,20)*

⁸ “Me kan̄u an̄u, nye ̄obula ke jookwuh̄a m n̄u ruw̄hnu ele badn̄u, Nnw̄o ke Badn̄u jookwuh̄a nye wam n̄u ruw̄hnu ele enine izi Chiokike.

⁹ K̄ovu nye ̄obula ke j̄oogonahoru m n̄u ̄o m̄aa nye me b̄u n̄u ruw̄hnu ele badn̄u, m j̄oogonahoru a n̄u ruw̄hnu ele enine izi Chiokike.

¹⁰ Nye ̄obula ke kwuru ̄oka ̄ojo megidne Nnw̄o ke Badn̄u, be jaagbar̄unu a, k̄ovu nye ̄obula ke kwuru kwugidne Enine Nso, be j̄aagbar̄unu a.

¹¹ “Nga be jookwuru an̄u zne n̄'oro ̄ogbako ele Ju, n̄u ruw̄hnu ele ̄ochichi n̄u ele risi, kpe an̄u ikpe, mkp̄oma l̄ak̄o an̄u mini kpa an̄u j̄oogoru ̄onu an̄u m̄obu nhne an̄u jookwu.

¹² Enine Nso jeezni an̄u n'ige wam nhne an̄u jookwu.”

*Elulu nye eze
iw̄hnirniw̄hno*

¹³ Otu badn̄u n'esilaw̄uru igbudu badn̄u wam, kan̄u Jiz̄osi, “Nye-zni-nhne, kan̄u nwene m rukna ma o keme mkpe āi.”

¹⁴ Jiz̄osi sar̄u a, “Enyi m, nyele mernu m nye ikpe m̄obu nye ke mkpe n'esilaw̄uru an̄u?”

¹⁵ ̄O kan̄u be, “Anya d̄u an̄u ̄eli gbas̄iri kpakara ̄owho-anya, kwnornu n̄u b̄udnu badn̄u h̄ige n'agida ̄ekw̄nu o nwernu wh̄uya.”

¹⁶ Jiz̄osi t̄n̄unu be elulu ka, “̄Ekwu otu nye eze m̄irni agida mkp̄uru.

¹⁷ Nye eze wam naar̄i n̄u mkp̄oma a, ‘Ndaa nhne me jeeme? M nw̄ee m ̄obna hne me jaab̄ita mkp̄uru m.’

¹⁸ “̄O kaa, ‘Ka b̄u nhne me jeeme, m jaakwnadna kpakara ̄obna m, wu ̄obna ikne ke z̄i rude, m jaab̄ita kpakara mkp̄uru m n̄u ̄ekw̄nu m n̄u rime be.

¹⁹ M jaakan̄u ̄ehni m, I nwernu agida ̄ekw̄nu i kpab̄itaru agida aw̄ha, zukwaru inwe, ri, nw̄o, mkp̄oma s̄o i n'̄onu.’

²⁰ “K̄ovu Chiokike kann̄u a, ‘J̄i nye iw̄hnirniw̄hno, be noopio b̄udnu i n'aka i n'abal̄i ka. Nyele jeenwe kpakara nhne i kpab̄itannu ̄ehni?’”

²¹ “Ka b̄u kpa ̄o jaaz̄inu kpakara ele kpab̄itannu ̄ehni be ̄ekw̄nu, k̄ovu be nw̄ee ̄ekw̄nu n̄u ruw̄hnu Chiokike.”

*An̄u kwnata Chiokike
mkp̄oma*

(Mat 6:25-34)

²² Jiz̄osi kan̄u ele sno apna a, “Ka b̄u nhne me kwno naakan̄u an̄u, an̄u rigbuko ̄ehni an̄u n'̄oriri gbas̄iri b̄udnu an̄u, nhne an̄u jeeri, m̄obu gbas̄iri ̄ehni an̄u, iwo an̄u joowo.

²³ B̄udnu kakwo wiri, ̄ehni kakwo iwo.

²⁴ An̄u le r̄umu ̄onunu, be gh̄a mkp̄uru, be z̄a neegwe nhne n'̄ekwu, be nw̄ee ̄obna hne be b̄ita mkp̄uru, k̄ovu Chiokike n̄ozo n̄u be. An̄u z̄i okne ̄onu ah̄ia kar̄ukwo r̄umu ̄onunu.

²⁵ Ndaa badn̄u n'esilaw̄uru an̄u ke nwernu rikne t̄ukwasi nhne n̄u b̄udnu a hite n'̄origbu ̄ehni a?

²⁶ H̄ne ̄o b̄u n̄u an̄u nw̄ee rikne mee nhne mat̄i n̄u kpa, k̄ini mernu an̄u naar̄igbu ̄ehni an̄u gbas̄iri nhne ke berere?

²⁷ “An̄u lek̄om atna kpa be nooso. Be z̄a n̄oogobu ̄ehni be n'̄ernu, be kwn̄e ikpe. K̄ovu me kan̄u an̄u, ̄o b̄ubedi Solom̄oni n'iw̄huru a n̄u kpakara igwugwu a, ȳige eyi lele otu n̄u rime be.

²⁸ ̄O b̄uru n̄u Chiokike noowosi achara ke z̄i n'̄ekwu iwo, b̄u ke z̄i tna, ekile be kp̄orne be n̄u b̄ekw̄nu, ̄o k̄o b̄uru an̄u, o joowosi an̄u iwo, an̄u ele ̄okwnata ovu mat̄i.

²⁹ An̄u t̄ukwasi mkp̄oma an̄u n̄u nhne an̄u jeeri m̄obu nhne an̄u j̄onwo, an̄u rigbu ̄ehni an̄u gbas̄iri a.

³⁰ Kwnornu n̄u kpakara nhne ka b̄u nhne ele m̄aa Chiokike noopio, Nda an̄u magwu n̄u kpakara nhne ka z̄i an̄u mkpa.

³¹ K̄ovu an̄u pio ̄eli-eze Chiokike, o j̄ootukwasinu an̄u kpakara nhne ka masi.

Ekwnu ke zi n'oligwe
(Mat 6:19-21)

³² “Anụ tị ogwnu, ogbori atnuru matị, kwnornu nụ ọ masiri Nda anụ o nyee anụ ẹli-eze a.

³³ Anụ re nhne anụ nwernu kesi ele mboni. Anụ mehianu ẹhni anụ rẹkpa iwai ke ká aka, anụ kpabita ẹkwnu n'oligwe ke kwó okwo, hne nye buznu nwée rikne zne, akịka zá naata ẹkwnu zị pji.

³⁴ Kwnornu nụ hne ẹkwnu anụ zị bụ hne mkpoma anụ jaazị masị.

Ele izi anya duru ẹli

³⁵ “Anụ jikneru nọornu ẹrnu, ele tọnji be noonwu onwu.

³⁶ Lele ele neese nyenwe be zneru iriri ọlulu nnwerne ikne ma o hiehna, nga o hieru, znu aka n'onu-mgbo, be gbamanụ a ọo wara wara.

³⁷ Owa oma zinu ele izi wam nyenwe be jowhnu hne be neese nse nga o hiehnarnu. Me kanụ anụ ezi oka, ọ jọosuru ajnị n'ikwnu, kanụ be, be daziri ẹli ri wiri, ọ bụru nye izi be.

³⁸ Owa oma zinu ele izi wam, ọ bụru nụ nyenwe be varu n'esilawuru abali mọbu n'onu ọsisi, ọ jowhnu nụ be zị neese nse.

³⁹ Kọvu anụ mahja nụ ọ bụru nụ nye nwe ọro mahjaru ọtnu-ige nye buznu jaava, o béekwele be lịwa ọro a.

⁴⁰ Kam kpayaru, anụ neese masị nse, kwnornu nụ Nnwọ ke Badnu jaava ige anụ tuge anya a.”

Ọhi ke kwesiri

ọ kwnata mkpoma

(Mat 24:45-51)

⁴¹ Pita sịkwa a, “Nyenwe aị, ị nọotnunu aị elulu ka, sọbu kpakara badnu.”

⁴² Nyenwe aị saru a, “Nyele bụ ọhi wam ke be kwesiri ọ kwnata mkpoma, nye nyenwe a mernu nye risi ọro a, ma o neenye ele ọhi wiri n'ige kwesiri?”

⁴³ Nye risi ọro wam jọobu nye ọwa oma ọ bụru nụ nyenwe a jaava whnu nụ o mernu nhne kwesiri.

⁴⁴ Me kanụ anụ ezi oka, nyenwe a jeeme a nye jeelekota kpakara ẹkwnu a.

⁴⁵ Kọvu ọ bụru nụ ọhi wam jaakaa nụ mkpoma a, ‘Nda m kwu gbulem ọkwnu,’ o bete naaligbu ele ọhi rukna nụ rinya, neeri, nọonwo manya, manya noogbu masị a.

⁴⁶ Nda kwu ọhi wam jaava n'ọbochi ọ tuge anya a nụ n'ige ọ máa. O joogbubi a ichichi lawuru, mee ya nụ ele kwé ekwe takọ awhnuwhnu.

⁴⁷ “Nye izi ke marnu nhne nda a kwu pioru, o jiknerune o mee a, be jaapnia agida mbinihini.

⁴⁸ Kọvu nye ke máa, ke mernu nhne kwesiri be ta a awhnuwhnu, be jaapnia a mbinihini matị. Kwnornu nụ nye be nyernu

agida nhne, bụ nye be joopio agida nhne n'aka a. Nye be nyernu agida nhne o legidne anya, be joopio nhne zị agida karukwo n'aka a.

Jizosi, nhne neegweya
okewa

(Mat 10:34-36)

⁴⁹ “M varu m o gweya bẹkwnu n'owa, nhne me noopio ọ bụ nụ o noonwu kitna.

⁵⁰ M nwernu m mini be jowu m, m joozukwa inwe tem be mezu a.

⁵¹ Anụ cheru nụ m gweyarụ m udno n'owa? Ọza! Me kanụ anụ, m gweyarụ m okewa.

⁵² Hite nụ kitna zne nụ ruwhnu, badnu isne zị n'otu ọro jeekewa, badnu ẹto megidne badnu lawuru, badnu lawuru megidne badnu ẹto.

⁵³ Be jeekewa

Nda megidne nnwọ a rukna,
nnwọ rukna megidne nda a,
nne megidne nnwọ a rinya,
nnwọ rinya megidne nne a,
nne nzi megidne nnwerne nnwọ a,
nnwerne nnwọ megidne nne nzi a.”

Anụ ghobia ige ka

(Mat 16:2,3)

⁵⁴ Jizosi kanụ igbudu badnu wam, “Nga anụ whnuru runwurnu oligwe hi n'odidna ẹhnam, ngangam anụ kaa, ‘Mini joozo,’ mini zo masị.

⁵⁵ Nga anụ whnuru ruwhere ndidna hne o neewhe, anụ jaakaa, ‘O jeerne bẹkwnu,’ ọ ziri kpaam.

⁵⁶ Anụ ele ruwhnu lawuru! Anụ magwu kpa be le ọwa nụ ruwhnu oligwe anya gwnu nhne ọ jọobu. Kọvu ndaa kpa anụ máa ige ka?”

Ji nụ nye irno i mee udno

(Mat 5:25,26)

⁵⁷ “Kini mernu anụ máa nhne bụru oma nụ omume?”

⁵⁸ Nga ji nụ nye kwu i neezne ikpe zị n'apna, gbalị ma ji nụ a mee udno n'apna, ọ bula kpaam, ọ jooonuru i nyee nye risi ikpe, nye risi ikpe nyewhete i nye neelekota ele ikelu, ọ tũana a n'oro ikelu.

⁵⁹ Me kanụ ị, ị jowhuya pii tem ị kwuhata kpakara iwai ipne-aznu i jigwu.”

13

Tuhnasna mkpoma hite nụ
mmehie mọbu nwu ẹnwu

¹ Agwna ele zị nụ pii kanụ Jizosi nhne gbasiri ele Galili ele Pailetị jiri ọvna na be gwasị n'arịohna be.

² Jizosi saru be, “Anụ che nụ ele Galili ka bụ ele mmehie kakwo ele Galili berere kwnornu nụ be taru awhnuwhnu kpa?”

³ Me kanụ anụ, ọza. Kọvu okwolem ma anụ tũhnasnamu mkpọma, anụ jọnwu lele be.

⁴ Mọbu anụ che nụ nri nụ badnụ ẹsato ele ọro olu ke zị nụ Saịlom dnagburu, nụ be bụ ele ikpe marnụ karụ ele berere ele zị nụ Jeruselem?

⁵ Me kanụ anụ, ọza. Kọvu ọ bụru nụ anụ tũhnasnamu mkpọma, anụ jọnwu lele be.”

Elulu isisi figi

⁶ Jizọsi tũnu be elulu ka, “Otu nwerukna kpasiri figi n'ekwu a, o zne noopio mkpuru n'olu a, kọvu ọ whnũna mkpuru ọbula.

⁷ Ọ kanụ nye neelekwa ẹkwu figi wam, 'Ka bụ awha ẹto me naava hna noopio mkpuru n'olu isisi figi ka, kọvu m zà nọowhnu mkpuru ọbula. Gbudna a! Ndaa ke o noolulu ẹli n'etekne?'

⁸ “Ọ saru a, Nda-ai-kwu, 'Gharu a otu awha berere, m joogwu ẹli gburugburu wusi a nsni anọ.

⁹ Ọ bụru nụ ọ mĩnya mkpuru, ọ bụru ọma, kọvu ọ bụru nụ ọ mĩnyage mkpuru, i gbudna a.' ”

Jizọsi gwọru nrịria n'Ọbochi Ozukwa Inwe

¹⁰ N'otu Ọbochi Ozukwa Inwe, Jizọsi zị neezni nhne n'oro ọgbako ele Ju,

¹¹ otu nwerinya zị nụ nrịria nri awha nụ ẹsato, ke kpararu nụ o gbewhu egbewhu, o nwée rikne gwuzoro kwem rịa rịa.

¹² Nga Jizọsi whnũru a, o sukwu a, kanụ a, “Nwerinya, nrịria i lalam.”

¹³ Ọ tũkwasi a aka a lawuru, ngangam, nwerinya wam gwuzoro kwem, znarni Chiokike.

¹⁴ Kọvu ovu weru nye risi ọro ọgbako ele Ju ẹhni k'agida kwnornu nụ Jizọsi gwọru nrịria n'Ọbochi Ozukwa Inwe. Ọ kanụ ele badnụ wam, “A nwernu ọbochi isunu a ji nọornu ẹru, anụ va ma be gwọ anụ nrịria n'ọbochi ele ka, kọvu ọ bụo n'Ọbochi Ozukwa Inwe.”

¹⁵ Nyenwe ai saru a, “Anụ ele ruwhnu lawuru, anụ zà nọotoma ehni anụ mọbu iyinya anụ n'Ọbochi Ozukwa Inwe zne nyee a mini?

¹⁶ Nwerinya ka ke bụ nnwọ rinya Ebereham nye Ekwensu knernu eriri nri awha nụ ẹsato ka, ọ bụo ọma be tọma a eriri ka ma o nwernu ẹhni a n'Ọbochi Ozukwa Inwe?”

¹⁷ Nga o kwuru ka, iwhnerne tũ kpakara ele noogwuzogidne a. Kọvu igbudu badnụ wam nwũdnarnu kwnornu agida ẹru ndu-ẹhni ọ nọornu.

Mkpuru mọsitadi nụ nhne whụ brẹdi

(Mat 13:31-33; Mak 4:30-32)

¹⁸ Jizọsi sịkwa be, “Eli-eze Chiokike, o yiri lele kịni? Kịni bụ nhne me jeeji gbu esi a?

¹⁹ Ọ nụ lele mkpuru isisi be kwu mọsitadi ke badnụ kpasiri n'ekwu a. O so, ghọ isisi ke rụmu ọnwun oligwe nọornu aịkwa nụ nkala a.”

²⁰ Berere kwno, ọ kaa, “Ndaa nhne me jeeji sninu ẹli-eze Chiokike?”

²¹ Ọ nụ lele nhne whụ brẹdi ke nyerinya gweru gwasị n'agida ikpa tem kpakara a whụ.”

Onu-mgbo ke zị nwọronwo

(Mat 7:13,14,21-23)

²² Jizọsi neezne hi nụ otu ẹli-ọhna du ẹli-ọhna berere neezni nhne kpa o neezne Jeruselem.

²³ Otu badnụ sịkwa a, “Nyenwe ai, okwole badnụ ele nụ ele bụ ele be jọoznohia?”

Jizọsi saru be,

²⁴ “Anụ yisi ẹhni garu n'ọnu-mgbo ke zị nwọronwo, me kanụ anụ ezi ọka, agida ele badnụ joopio ọ bna, kọvu be jéenwe rikne bna.

²⁵ Nga nda kwu nwe ọro lizọru gbasni ọro, anụ joogwuzo n'ederezi nooznu aka, naarijasno, 'Nda-ai-kwu, bikno, gbamanu ai ọro.'

“Ọ jaasa anụ, 'M máam ele anụ bụ mọbu hne anụ hi va.'

²⁶ “Ige wam anụ jaakaa, 'A sno i ri wiri, nwọ nhne ọnwunwo, i znirni nhne n'ẹli ai.'

²⁷ “Kọvu ọ jaasa anụ, 'M máam ele anụ bụ mọbu hne anụ hi va. Anụ hi hne me zị whọga, anụ ele aruru-ẹli.'

²⁸ “Okwina ẹkwina nụ ọta rụkwurnu-ize jaazi nụ pji nga anụ jọowhnu Ebereham, Aziki nụ Jekọpu nụ kpakara ele ọwhnurninya n'ẹli-eze Chiokike, kọvu anụ bụru ele be chihalaru n'ederezi.

²⁹ Ele badnụ jeehi n'ọbosi ẹhnam nụ ọdidna ẹhnam, hi nụ rugwu nụ ọdidna va, daziri ẹli n'iriri ke ẹli-eze Chiokike.

³⁰ N'ezi ọka, agwna ele ipne-aznu jọbu ele be ọsno, agwna ele be ọsno jọbu ele ipne-aznu.”

Jizọsi whnũru Jeruselem n'anya

(Mat 23:37-39)

³¹ Ige wam agwna ele Farisi vakwnusiri Jizọsi kanụ a, “Hi nụ hna whọga, zne hne berere. Erọdu pioga o gbu i.”

³² Jizọsi saru be, “Anụ zne kanụ edu wam, m jaachihala renwu ojo, gwọ masi ele nrịria tna nụ ekile, n'ọbochi ke ẹto, m jọornuzo ẹru m.

³³ Kpa ọ zị, m jeezneriri tna nụ ekile nụ ọbochi ke sno a, kwnornu nụ o kwésile be gbu nye ọwhnurninya nụ hne bụo Jeruselem.

³⁴ “Chei! Jeruselem, Jeruselem, ji ke noogbu ele ọwhnurninya, ke ji akaworugwu nọolo ele be ziyannu i. Mgba ele kpa me pioru ọ chikota rụmu i lele kpa enwerne

oḥichì n̄echikota r̄umu a n̄u mkpururu aka nkwu a law̄uru, k̄ovu i kw̄ele.

³⁵ Le, be n̄esigbasinu an̄u ọro an̄u ma ọ t̄obiri etekne. Me kan̄u an̄u, an̄u j̄oowhnu m berere tem d̄u nga an̄u jaakaa, ‘Chiokike gozi nye wam ke naava n̄u r̄ewhna Nyenwe aì.’”

14

Jiz̄osi zì n'oro nye Farisi

¹ Ọ d̄u otu Ọbochi Ozukwa Inwe, nga Jiz̄osi zì n'oro otu nye Farisi be marn̄u r̄ewhna a neeri wiri, ele badn̄u zì needne a.

² Otu nwerukna ọchi a law̄uru n̄u aka a zaru aza zì n̄u ruwhnu a.

³ Jiz̄osi s̄ikwa ele Farisi wam n̄u ele zni iwu, “Ọ b̄uru ọma n'iwu ọ gw̄o nr̄iria n'Ọbochi Ozukwa Inwe, s̄obu ọ b̄uọ ọma?”

⁴ K̄ovu be k̄pusnirni ọnu be. Jiz̄osi nw̄ugwu nwerukna wam n'aka gw̄o a nr̄iria wam, zihala a.

⁵ Jiz̄osi s̄ikwa be, “Ọ b̄uru n̄u i nwernu nnw̄o rukna m̄obu ehni ke dnabnarn̄u ọmi n'Ọbochi Ozukwa Inwe, an̄u j̄eegweh̄ia a n'Ọbochi Ozukwa Inwe?”

⁶ Ọ z̄a nhne be saru a.

Badn̄u o gwedna ẹhni a ẹli n̄u ovu ọma

⁷ Nga Jiz̄osi wh̄n̄urnu k̄pa ele be sukwuru n̄oohoru risi ngadna be jaadazì, ọ tn̄unu be elulu ka,

⁸ “Nga badn̄u ọbula sukwuru ì ikwu iriri ọlulu nnwerne, ì d̄azì n̄u risi ngadna, kwnornu n̄u nye nwernu igwugwu kakwo i nwernu rikne va.

⁹ Ọ b̄uru k̄pam, nye sukwuru an̄u law̄uru jaavakwnusi i, kan̄u i, ‘Nye nwerukna ka ngadna ì.’ Ige wam ì jeeji iw̄hnerne daz̄iri n̄u ngadna ke zì ẹli ẹli.

¹⁰ K̄ovu nga be sukwuru i, daz̄iri ẹli n̄u ngadna ke zì ẹli ẹli. Nye wam ke sukwuru ì jaavakwnusi i, kan̄u ì, ‘Enyi m, zne n̄u ngadna ke ka mma.’ Ige wam ì jeenwe igwugwu n̄u ruwhnu ele varu p̄ji.

¹¹ Kwnornu n̄u be jeegwedna nye ọbula ke gweliz̄oru ẹhni a olu, nye ọbula ke gwednarn̄u ẹhni a ẹli, be jeegweliz̄o a.”

¹² Jiz̄osi kan̄u nye wam sukwuru a, “Nga ì siri wiri ọsisi m̄obu ke anyasnu, ì s̄ikwu ele enyi ì kp̄oi, n̄u r̄umu nwene ì m̄obu ele ibne ì ele eze, ì mee k̄pam, be jeeji wiri sukwu kwno ì, ige wam be kw̄ulam j̄i ọgw̄o.

¹³ K̄ovu nga ì mernu iriri, sukwu ele mboni, n̄u ele ọru, n̄u ele mgw̄oro n̄u ele isni,

¹⁴ be j̄oogozi ì. Ọ b̄u n'ezì n̄u be nw̄ee rikne kw̄u ì ọgw̄o, k̄ovu Chiokike j̄ookwuh̄nata ì nga ele ọma jeehi n'ẹnwu liz̄o.”

Elulu okne iriri (Mat 22:1-10)

¹⁵ Nga otu nye daz̄i neeri wiri n̄urnu a, ọ kan̄u Jiz̄osi, “Ọwa ọma z̄inu nye jeeri wiri n'ẹli-eze Chiokike.”

¹⁶ Jiz̄osi saru a, “Otu nwerukna siri okne iriri sukwu agda ele badn̄u.

¹⁷ N'ige iriri wam, o zihala nye izi a, ọ kan̄u ele be sukwuru, ‘Vaa, be mekwolem k̄pakara nhne.’

¹⁸ “K̄ovu k̄pakara be n'otu bete n̄orio be gharu be. Nye ke m̄bom kaa, ‘M z̄uru m ẹli ẹkwu, m jeezne lekwa a, bikno gwn̄usi m n'ele ì gharuru.’

¹⁹ ‘Nye berere kaa, ‘M z̄uru m nri ehni be knek̄otaru ẹbo, m neezne ọ t̄ule be, bikno gwn̄usi m n'ele ì gharuru.’

²⁰ “Nye berere kaa, ‘M luru m nnwerne ikne, m j̄eenwe rikne va.’

²¹ “Nye izi wam hiehna kan̄u nda a kwu k̄pakara nhne ka. Ige wam ovu weru nda nwe ọro wam ẹhni, ọ kan̄u nye izi a, ‘Wara wara, zne n̄u ngeri apna n̄u k̄pakara apna ke ẹli-ọhna kwubnanya ele mboni, n̄u ele ọru n̄u ele isni n̄u ele mgw̄oro.’

²² “Nye izi wam zne, hiehna, kaa, ‘Nda-aì-kwu, m mene m nhne ì karu me mee, k̄ovu oghere zì k̄oriri.’

²³ “Nda a kwu kan̄u a, ‘Zne n'apna ma n̄u ẹkwu, kwnagidne ele badn̄u ma be bnanya, ma ele badn̄u jih̄ia n'oro m.’

²⁴ Me kan̄u ì, k̄pakara ele wam me sukwuru ikwu n̄u m̄bom, ọ z̄a otu badn̄u n̄u rime be ke jeeri iriri m.”

Nhne nye sno apna Jiz̄osi j̄oowhnu

(Mat 10:37,38)

²⁵ Aḡida ele badn̄u sno Jiz̄osi neezne, ọ t̄uhnasna kan̄u be,

²⁶ “Ọ b̄uru nye ọbula vakwnusiri m, k̄ovu o sn̄one nda a n̄u nne a, n̄u nnwerne a, n̄u r̄umu a, n̄u r̄umu nne a rukna n̄u r̄umu nne a rinya irno, ma b̄udnu ke a masi, ọ j̄obuli nye sno apna m.

²⁷ Nye ọbula ke v̄urule ọgba a sno m, j̄obuli nye sno apna m.

²⁸ “Ndaa otu badn̄u n'esilaw̄uru an̄u ke noopio o wu ọro olu, o j̄eebe ọsno daz̄iri ẹli gwn̄u nhne o jeegwe a, ma o nwernu ìwai o jeeji wukwo a?”

²⁹ Kwnornu n̄u ọ b̄uru n̄u ọ wa ẹli, k̄ovu o nw̄ee rikne wukwo a, nye ọbula ke wh̄n̄urnu a joomu a r̄umu,

³⁰ kaa, ‘Nwerukna ka pan̄izoru o wu ọro, k̄ovu o nw̄ee rikne wukwo a.’

³¹ “M̄obu ndaa eze ke neezne ọgw̄nu megidne eze berere, ke j̄eebe ọsno daz̄iri ẹli t̄ule ma o nwernu rikne gweru nri pokwu ele ọgw̄nu gwuzogidne nye ch̄i nri pokwu law̄uru megidne a?”

³² Ọ b̄uru n̄u o nw̄ee rikne, nga nye wam zì ikere, o jeezine ele izi r̄jo nhne udno.

³³ Kpam masi, o zá nye obula nù rime anù ke jòobu nye sno apna m, o búrù nù o gharùla kpakara nhne o nwernu.

Arùá bnána iru
(Mat 5:13; Mak 9:50)

³⁴ “Arùá búrù oma, kòvu o búrù arùá tuwhu ọso n'ọnu a, be jeeji kịni mee a o sọ n'ọnu?”

³⁵ O búrù oma n'ẹli mọbu nù mkpomkpo. Be jootuwhu a n'ederezị.

“Nye nwernu nsnị o ji o nù nhne, o nùrnù.”

15

Elulu atnùrnù whuru owhu
(Mat 18:12-14)

¹ Ele oma ntù nù ele mmehie gbakọru nọonu ikwu-ọnu Jizọsi.

² Kọvu ele Farisi nù ele zni iwu ele Ju naatamu, be kaa, ‘Nwerukna ka nanabnanya ele mmehie, ya nù be sno neeri wiri.’

³ Jizọsi tnùnu be otu elulu,

⁴ “O búrù nù otu badnù n'esilawùru anù nwernu otu riwhu atnùrnù, otu kpawhu ọri. O jáaghasa nri tolu nù tolu ke gwnarnù n'ohia zne pio otu ke kpawhuru akpawhu tem o piohja a?”

⁵ Nga o piohjaru a, o tükwasi a n'obe-aka a, nọonwudna.

⁶ O la ọro sukwu ele enyi a nù ele agbatibi a, kaa, ‘Anù snornu m nwùdna, nù m piohjaru m atnùrnù m ke kpawhuru ọri.’

⁷ Me kanù anù, o bụ kpa snarnịma jaazị n'oligwe nù risi otu nye mmehie ke tũhnasarnu mkpọma, kakwo nri tolu badnù nù tolu ele oma ke ọtũhnasna mkpọma zá mkpa.

Elulu mkpọru iwai
whuru owhu

⁸ “O búrù nù nyerinya nwernu nri mkpọru iwai, otu whunahọru a. O joomusi tọnji, za ọro a, piosi a rikne tem o piohja a.

⁹ Nga o piohjaru a, o sukwu ele enyi a nù ele agbatibi a, kaa, ‘Anù snornu m nwùdna, m piohjaru m iwai m me tuwhuru.’

¹⁰ Me kanù anù, o bụ kpa snarnịma jaazị nù ruwhnu ele enine izi Chiokike nù risi otu nye mmehie ke tũhnasarnu mkpọma.”

Elulu nnwọ whuru owhu

¹¹ Jizọsi tnù kwno elulu berere, kaa, “Otu nwerukna nwernu rọmu rukna lawùru.

¹² Ke matị kanù nda a, ‘Nda m, kesi m mkpe ke m.’ Nda a keme ẹkwnu a n'esilawùru be lawùru.

¹³ “Nga obochi ele nù ele whemernu, nnwọ ke matị chikota kpakara ẹkwnu a, lizọ, zne mba zị ikere, daziri pji lulukwo kpakara ẹkwnu a nù bụdnù ojo.

¹⁴ Nga o mewhukworu kpakara nhne o nwernu, okne ọknunyo dnarnù n'ẹli wam, o bna nù mkpa.

¹⁵ O zne yisi ẹhni n'ernu n'aka otu nye ẹli wam, nye wam zizne a o znù ezni n'ohia.

¹⁶ O masiri a o ri ọri ezni, kọvu o zá nye nyernu a.

¹⁷ “Nga anya dornu a nù risi, o kaa, ‘Kpakara ele nda m gornu ẹrnù nwernu wiri be ri, nootuwhu agwna a, kọvu m zị m hna nọonwu n'ogwnu wiri.

¹⁸ M jeelizo, lahnakwnusi nda m, m jaakanù a, Nda m, m mehielem megidne oligwe ma ji.

¹⁹ M kwésile m be kwu m nnwọ i berere, kọvu me búrù otu nù rime ele i gornu ẹrnù.’

²⁰ Ngam, o lizọ, znekwnusi nda a.

“Kọvu nga o zị hne zị ikere, nda a whnùrnù a, dọnu a obirizi k'agida, gba ẹso kwnusi a, bnagidne a, snutu a ọnu.

²¹ “Nnwọ wam kanù nda a, ‘Nda m, m mehielem megidne oligwe ma ji. M kwésile m be kwu m nnwọ i berere.’

²² “Kọvu nda a kanù ele izi a, ‘Wara wara, anù chiya iwo ke kakwo mma, anù wosi a, gbasị a arị mkpaka n'aka a, anù wosi a okoro-ọchi n'ọchi a.

²³ Anù tọya nnwọ ehni be znùrnù ọznu gbu a, mee iriri ma a nwùdna.

²⁴ Kwnornu nù nnwọ m ka nwùrnù ọnwu, kọvu o zị bụdnù, o whuru owhu, be piohja a.’ Be bete nọonwudna.

²⁵ “Kpa nhne ka neeme, ọpnarna a zị n'ẹkwu. Nga o vaduru ọro ndụndu nù eri nù eri be neetne,

²⁶ o sukwu otu nye izi sịkwa nhne be neeme.

²⁷ O saru a, ‘Nwene i rukna hiehnarnu, nda i gbulem nnwọ ehni be znùrnù ọznu, kwnornu nù o whnùrnù a n'ẹhni siri rikne.’

²⁸ “Ovu weru nwene a rukna ke sọru a ẹhni k'agida, o kwéle o bna n'ọro. Nda a vakwnusi a, rjasno a.

²⁹ O saru nda a, ‘Le, agida awha me zị nọornunu i ẹrnù lele ọhi, o zá ige me mernu risi rikne nù nhne i nyernu n'iwu. Kọvu i nyélele m otu nnwọ owu me nù ele enyi m ri.

³⁰ Kọvu nga nnwọ i ka ke mewhukworu kpakara ẹkwnu i, ya nù ele rinya ewhere varu, i gbunnu a nnwọ ehni be znùrnù ọznu.’

³¹ “Nda a kanù a, ‘Nnwọ m, me nù ji zị ige dum, kpakara nhne me nwernu bụ ke i.

³² A kwesiri o nwùdna, kwnornu nù nwene i rukna ka nwùrnù ọnwu, kọvu o zị bụdnù, o whuru owhu, kọvu be piohjaru a.’”

16

Elulu nye neelekota ẹkwnu

¹ Jizọsi kanù ele sno apna a, “Otu nye eze nwernu nye neelekota ẹkwnu a, be kanù nye eze wam nù nye neelekota ẹkwnu a noolulu kpakara ẹkwnu a.

²O sukwu a, sɔkwa a, 'Kini bu ɔtutnu ka me nɔonu gbasiri i? Vaa ma a piakota kpakara nhne i nɔornu, kwnornu nu i jeelekɔtama ɛkwnu m berere.'

³"Nye neelekɔta wam kanu ɛhni a, 'Kini bu nhne me jeeme? Nda ma a kwu neegweme n'ɛrnu. M nwée m iknernema me jeeji rnu ɛrnu rikne, iwhnerne o bu nye ɔrio nɔotu m.

⁴M maam nhne me jeeme, nga me whɔgaru n'ɛrnu, ele badnu jeekweru me bnanya ɔro be.'

⁵"O sukwu ele jigwu nda a kwu ɔgwo n'otu n'otu. O sɔkwa nye mbom, 'I ji nda m kwu kini?'

⁶"O kaa, 'Otu riwhu obele mon.'

"Nye neelekɔta ɛkwnu wam kanu a, 'Gweru ɔkwukwo, daziri eli, gbasiri nri isne wara wara.'

⁷"O sɔkwa nye ke ɛbo, 'I ji nda m kwu iwai ele?'

"O kaa, 'Otu pokwu ɔtutu ikpa wheti.'

"O kanu a, 'Gweru ɔkwukwo gbasiri riwhu ɛsato.'

⁸"Nda kwu nye neelekɔta wam ke kparu agwa ojo znarni a, kwnornu nu o mernu lele nye nwernu echiche. Kwnornu nu rumu ke ɔwa ka nwernu echiche o mee nhne gbasiri be kakwo rumu ke iwhne.

⁹Me kanu anu, anu gweru ɛkwnu k'owa ka mee ele badnu enyi, nga ɛkwnu anu jookwome, be kweru anu bnanya n'oro kwɔ okwo."

¹⁰"Nye be kwesiri o kwnata mkpoma nu nhne mati, kwesiri be kwnata a mkpoma nu nhne hna ezi. Nye bu masi badnu ojo nu nhne mati bu badnu ojo nu nhne hna ezi.

¹¹O buru nu anu buo ele be kwnata mkpoma n'ɛkwnu k'owa, nyele jeenye anu ezi ɛkwnu?'

¹²O buru nu anu buo ele be kwnata mkpoma n'ɛkwnu nye berere, nyele jeenye anu ɛkwnu ke aka anu?'

¹³"O za phi ke nwernu rikne buru phi nda kwu lawuru. O buru kpan, o joosno otu irno, whnu ke berere n'anya. Mɔbu o joosobisinu otu k'agida, ledna ibne a anya. Anu jobuli phi Chiokike nu phi ɛkwnu."

Agwina ikwu-ɔnu Jizosi
(Mat 11:12,13; 5:31,32; Mak 10:11,12)

¹⁴Nga ele Farisi ele whnurnu iwai n'anya nurnu ikwu-ɔnu ka, be mu Jizosi rumu.

¹⁵Jizosi kanu be, "Anu bu ele nɔogwenu ɛhni anu nu anu bu ele ɔma nu ruwhnu ele badnu, kovu Chiokike magwu mkpoma anu. Nhne zi okne ɔnu n'anya ele badnu bu nhne ruru ɔru n'anya Chiokike.

¹⁶"Nhne be nyernu n'iwu nu ele ɔwhnurninya zi tem Joni, hite n'ige wam, be nɔokpo okwo izi ɔma eli-eze Chiokike, nye ɔbula neeyisi ɛhni ma o bna nu rime a.

¹⁷O zi ewheke nu oligwe nu ɔwa jaagawhe kakwo otu nhne ke zikakworu mati n'iwu jaadna.

¹⁸"Nye ɔbula ke jaagba nnwerne a nnam, lu nyerinya berere neeme ɔyi, nyerukna ɔbula ke luru nnwerne be gbaru nnam neeme ɔyi.

Nye eze nu Lazarosi

¹⁹"Otu nye eze zi, ke noowo iwo odno odno nu abochna marnu mma, wu budnu iriri kpakara ɔbochi.

²⁰Otu nye mboni be dnanyitaru n'ogodo ɔnu-mgbo a, nye rewhna a bu Lazarosi, nye ɛnya kpuru kpakara ɛhni.

²¹O nɔogwenu a ma be nyee a ruwnuruvnu wiri ke hi n'ikpechi nye eze wam dna. Rumu nkita varu naarasna ɛnya a.

²²"Ige duru nu nye ɔrio wam nwurnu, ele enine izi vuru a zne hne Ebereham zi. Nye eze wam nwu masiri, be lite a.

²³Nu rime bekwnu eli renwu hne o zi nɔowhnuji anya, o le anya n'olu whnu Ebereham nu hne zi ikere nu Lazarosi zi n'akwankɔ a.

²⁴Nye eze wam sukwu a, 'Nda a Ebereham, donu m obirizi, zizne Lazarosi o rusi ɔnu mkpaka a nu mini meji riro m, kwnornu nu m nɔowhnuji anya nu rime bekwnu ka.'

²⁵"Kovu Ebereham saru a, 'Nnwɔ m, chenwanya nu nga i zi budnu i riru nhne ɔma, kovu Lazarosi naaharu nhne buo ɔma. Kitna be naakasi a mkpoma, kovu i nɔowhnuji anya.

²⁶Be gweme kpakara nhne ka, be gwuru otu olulu hna ezi n'iketa a nu anu, ke kpararu ele noopio o hi nu hna vakwnusi anu jeenwe rikne, o zi masi nye nwernu rikne hi hne anu zi vakwnusi ai.'

²⁷"Nye eze wam saru, 'Bikno, nda, zizne Lazarosi ɔro nda m,

²⁸kwnornu nu m nwernu rumu nne rukna isne, o do be aka nu nsnɔ, ma be gharu o va hne ɔwhnuji anya ka.'

²⁹"Ebereham saru a, 'Be nwernu Mozizi nu ele ɔwhnurninya, be bnonu be nsnɔ.'

³⁰"Nye eze wam karu, 'Oza, nda Ebereham, o buru nu badnu hi n'ɛnwu lizo znekwnusi be, be jootuhnasna mkpoma.'

³¹"Ebereham kanu a, 'O buru nu be jooobnonu Mozizi nu ele ɔwhnurninya nsnɔ, be jootuhnasna mkpoma o bubedi nu badnu hiri n'ɛnwu lizo.'

17

Mmehie, ɔkwnata mkpoma nu ɛrnu

(Mat 18:6,7,21,22; Mak 9:42)

¹Jizosi kanu ele sno apna a, "Nhne neeme ma badnu mee mmehie jaavariri, kovu awhnuwhnu jaazinu nye o jeehi n'aka a va.

² O jaakanụ nye wam mma o bụru nụ be gweru okne rugwu ogwe-wiri nyasi a n'ili tūbna n'osimini karu o mee ma otu nū rime ele ka zị matị mehie.

³ Anụ ledu anya nū nhne anụ neeme.

"O bụru nū nwene i rukna mmehie i, bigbō a, o bụru nū o tūhnasna mkpōma a, gbarūnu a."

⁴ O bụru nū o mehieru i mgba ẹsau n'obochi, tūhnasna masị mgba ẹsau, kaa 'M tūhnasna nū m, gbarūnu a.'

⁵ Ele sno apna a kanụ Nyenwe aị, "Mejitenu aị okwnata mkpōma."

⁶ Jizōsi saru be, "O bụru nū anụ nwernu okwnata mkpōma lele mkpūru mōsitadi, anụ jaakanụ okne isisi ka, 'Be whome i kpasị i n'esilawūru osimini,' o jooononu anụ nsni."

⁷ "O bụru nū otu badnū nū rime anụ nwernu otu nye izi ke nōornu ẹkwu a mōbu nōoznu atnūru a, nga o hiri ẹkwu hiehna, o jaakanū a, 'Vaa daziri ẹli, ri wiri?'"

⁸ Ōza! Kōvu o jaakanū a, 'Mesinu m wiri, woru iwo i, sete m me rikwo wiri, omekwo, i ri ke i.'

⁹ Be zá naakanū nye izi meka nū o mernu nhne be karu o mee.

¹⁰ O bụ kpa o zīnu anụ, nga anụ mernu kpakara nhne be karu anụ mee, anụ kaa, 'A bụ ele izi etekne, a nrūnu ẹnu aị.'"

Jizōsi gworu nri ele nchnịchna

¹¹ Nga Jizōsi zị nū apna neezne Jeruselem, o naagawhe n'esilawūru Sameria nū Galili,

¹² kpa o naabna nū rime otu ẹli-ohna, nri ele rukna nchnịchna kwnusiri a. Be gwuzoru nū hne zị ikere,

¹³ be gweru okne nkōli siwama, "Nda-aj-kwu, Jizōsi, dōnu aị obirizi."

¹⁴ Nga Jizōsi whnūru be, o kaa, "Anụ zne gesi ele arjōhna ẹhni anụ." Kpa be neezne, be gworu be nchnịchna wam.

¹⁵ Nga otu nyenun nū rime be whnūru nū be gwōlam a, o lahna, gweru okne nkōli naaja Chiokike.

¹⁶ O dna n'ẹli n'ochi Jizōsi tūnu a mmamma. Nwerukna ka bụ nye Sameria.

¹⁷ Jizōsi sīkwa a, "Be gwōla nri badnū? Ndaa badnū tolu ele berere?"

¹⁸ O zá nye varu o tūnu Chiokike mmamma, okwolem nye izne ka?"

¹⁹ Jizōsi kanū a, "Lizō, la, okwnata mkpōma i dōhialam i."

Ige ẹli-eze Chiokike (Mat 24:23-28,37-41)

²⁰ Agwna ele Farisi sīkwa Jizōsi nga ige ẹli-eze Chiokike jaava. Jizōsi saru be, "Ẹli-eze Chiokike jáava lele kpa ele badnū neele anya a."

²¹ O zá nye jaakaa, 'Le o zị hna,' mōbu 'Pjari,' kwnornu nū ẹli-eze Chiokike zị nū rime anụ."

²² Ige wam Jizōsi kanū ele sno apna a, "Ige vawa nga o jōogwnu anụ o whnū otu rime obochi ke Nnwō ke Badnū, kōvu anụ jōowhnu a."

²³ Ele badnū jaakanū anụ, 'Le, Nnwō ke Badnū zị pii,' mōbu 'O zị hna.' Anụ snó be zne.

²⁴ Lele kpa amūma oligwe neehi n'otu ọsotoma oligwe mūkesi n'osotoma berere, bụ kpa obochi ke Nnwō ke Badnū jaazi.

²⁵ Kōvu o jeeberu ọsno ta agida awhnūwhnu, ebiri ka jōju a.

²⁶ "Lele kpa o nū n'obochi Noa, o bụ kpa o jōonu n'obochi Nnwō ke Badnū."

²⁷ Ele badnū zị neeri, nōonwo, nōolu nnwerne, nōogbo nzi, dū n'obochi Noa bnaznenu nū rime ogbo, mgba-mini ẹli gbukwo kpakara be.

²⁸ "O bụ masị kpm n'obochi Lōtu, kpakara be zị neeri, nōonwo, neere, nōozu ahia, naakpa mkpūru, noowu ọro."

²⁹ Kōvu n'obochi Lōtu whogaru nū ẹli Sodom, Chiokike wūdarnu bēkwnu nū rugwu bēkwnu lele mini ozuzo, gbukwo kpakara be.

³⁰ "O bụ kpa o jaazi n'obochi be jookpume Nnwō ke Badnū."

³¹ N'obochi wam, nye obula ke zị n'olu ọro a, o bná nū rime ọro a zne kwahala nhne a, kpm masị, nye ke zị n'ẹkwu lánna aznū kwnornu nhne obula.

³² Anụ chenwanya nnwerne Lōtu.

³³ Nye obula ke noopio o zñohia būdnu a, jootuwu a, nye nootuwu būdnu a, jōoznohia a.

³⁴ Me kanū anụ, n'abalị wam, badnū lawūru jaadnanyị n'okpata, be gweru otu gharu ibne a.

³⁵ Ele rinya lawūru jaazi neegwe wiri, be gweru otu, gharu ibne a. [

³⁶ Ele rukna lawūru jaazi n'ẹkwu, be gweru otu ghasa ibne a."]

³⁷ Ele sno apna a sīkwa a, "Ndaa pō, Nyenwe aị?"

Jizōsi saru be, "Idele jaaziri hne obula iznu nwūru ọnuw zị."

18

Nwerinya nzi a nwūru nū nye ikpe

¹ Jizōsi tūnu be otu elulu neezni be kpa be kpe okpukpe kpakara ige neegweme aka.

² O kaa, "Otu nye ikpe zị n'otu ẹli, nye zá nōotu ogwnu Chiokike mōbu sō badnū anya."

³ Otu nyerinya nzi a nwūru zị masị n'ẹli wam, o neezne ọro nye ikpe ka, naariaso a, 'Bikno, kpenu m ikpe ọma megidne nye neemegbu m.'

⁴ "O kwéle o yinu a aka gbu okwnu. Omekwo, o kanū ẹhni a, 'O bụ n'ezí nū m

zá m n̄otú ogwnu Chiokike, m̄obu s̄o badn̄u anya.

⁵ K̄ov̄u kwnornu n̄u nwerinya ka nzi a nw̄urnu naakpakna m ẹ̀hni, m jeekpenu a ikpe ọ́ma, ọ́ z̄i rikne gw̄u m kwnornu n̄u ọ́ naava ige ọ́bula.”

⁶ Nyenwe āi kaa, “An̄u bno nsn̄i nhne nye ikpe ọ́jo wam kwuru.

⁷ Chiokike, ọ́ j̄oosnohia ele ke a, ele ọ́ ọ́h̄iaru, b̄u ele naakwnakwu a iwhnehnie n̄u abal̄i? O j̄oogbu ọ́kw̄nu ọ́ d̄oh̄ia be.

⁸ Me kan̄u an̄u, ọ́ j̄oosnohia be wara wara. K̄ov̄u nga Nnw̄o ke Badn̄u jaava, ọ́ j̄oowhnu ele kwesiri ọ́kw̄nata mkp̄oma n'ọ́wa?”

Elulu nye Farisi

n̄u nye ọ́na nt̄u

⁹ Jiz̄osi tn̄unu ele kwnatar̄u mkp̄oma n'imerne ọ́ma be, k̄ov̄u ledna ele berere anya elulu ka.

¹⁰ “Ele rukna law̄uru znernu Ọ́ro Ns̄o Chiokike zne kpe okpukpe, otu nye Farisi n̄u otu nye ọ́na nt̄u.

¹¹ Nye Farisi gwuzoru ichne kpenu ẹ̀hni a okpukpe, kaa, ‘Chiokike, meka n̄u m b̄uo m nye ọ́wh̄o-anya, m̄obu nye ọ́jo, m̄obu nye neeme ọ́yi lele ele berere. Meka n̄u m b̄uo m nye ọ́jo lele nye ọ́na nt̄u ka.

¹² M noovu ọ́nu mgba law̄uru n'ikwezu, m n̄okwu otu n̄u nri nga kpakara nhne me nwernu.’

¹³ “K̄ov̄u nye ọ́na nt̄u wam gwuzoru n̄u hne z̄i ikere, o nw̄ee rikne gweliz̄o a anya le oligwe, k̄ov̄u ọ́ kwa aka n̄u mkp̄oma, o wute a, kaa, ‘Chiokike, d̄onu m me nye mmehie obirizi.’”

¹⁴ Jiz̄osi kaa, “Me kan̄u an̄u, nye ọ́na nt̄u ka n̄u Chiokike mernu udno s̄u ọ́ lar̄u ọ́ro a, ọ́ b̄uo nye Farisi, kwnornu n̄u be jeegwedna nye ọ́bula ke gweliz̄oru ẹ̀hni a olu, nye ọ́bula ke gwednarn̄u ẹ̀hni a ẹ̀li, be jeegweliz̄o a.”

Jiz̄osi ọ́ziri r̄umu tak̄iri

(Mat 19:13-15; Mak 10:13-16)

¹⁵ Agwna ele badn̄u nookwuyan̄u Jiz̄osi r̄umu tak̄iri be ma ọ́ kpatu be aka. Nga ele sno apna a whn̄urnu be, be bnan̄u be mbna.

¹⁶ K̄ov̄u Jiz̄osi sukwuru r̄umu tak̄iri vakwnusi a, kaa, “An̄u ghar̄u r̄umu tak̄iri ma be vakwnusi m, an̄u bn̄osni be, kwnornu n̄u ẹ̀li-eze Chiokike b̄u ke ele n̄u kpa.

¹⁷ Me kan̄u an̄u ezi ọ́ka, nye ọ́bula ke j̄eegweru ẹ̀li-eze Chiokike lele nnw̄o mat̄i, ọ́ j̄aabna n̄u rime a r̄ia r̄ia.”

Otu nye ọ́chichi

(Mat 19:16-30; Mak 10:17-31)

¹⁸ Otu nye n̄echi ele Ju s̄ikwaru Jiz̄osi, “Nye zn̄i-nhne ọ́ma, k̄ini b̄u nhne me jeeme ma m keh̄ia m b̄udnu kw̄o okwo?”

¹⁹ Jiz̄osi sar̄u a, “K̄ini kpayar̄u i noosukwu m nye ọ́ma? Ọ́ zá nye b̄u nye ọ́ma, okwolem otu badn̄u, b̄u Chiokike kp̄oi.

²⁰ I maa m nhne be nyernu n'iwu, ‘I méko ọ́yi, i gb̄úko badn̄u, i zn̄úko buznu, i gb̄áko akebne aghalaghala, s̄obisinu nda i n̄u nne i.’”

²¹ Nye ọ́chichi wam kaa, “M b̄itaru m kpakara nhne hite n'ige me b̄u wikoro.”

²² Nga Jiz̄osi n̄urnu nhne ka, ọ́ kaa, “I jeeme otu nhne kp̄oi. La, re kpakara nhne i nwernu, kesi ele mboni, i jeenwe ẹ̀kw̄nu n'oligwe, vaa, sno m.”

²³ Nga nye ọ́chichi wam n̄urnu ka, o wuteru a k'aḡida, kwnornu n̄u o nwernu ẹ̀kw̄nu k'aḡida.

²⁴ Jiz̄osi le a anya, kaa, “Ọ́ b̄u nhne rar̄u ẹ̀hni k'aḡida n̄u ele nwernu ẹ̀kw̄nu ọ́ bna n'ẹ̀li-eze Chiokike.

²⁵ N'ezi, ọ́ z̄inu an̄oh̄ia be kwu kameli ewheke ọ́ gawhe n'anya alanga kar̄u ele nwernu ẹ̀kw̄nu ọ́ bna n'ẹ̀li-eze Chiokike.”

²⁶ Ele n̄urnu ọ́ka ka, s̄ikwa, “Ndakwan̄u nye be j̄oosnohia?”

²⁷ Jiz̄osi sar̄u, “Nhne rar̄u ẹ̀hni hne badn̄u z̄i, be meli kpakara nhne hne Chiokike z̄i.”

²⁸ Pita kan̄u a, “Le, a sigbasiri kpakara nhne snornu i.”

²⁹ Jiz̄osi kan̄u be, “Me kan̄u an̄u ezi ọ́ka, ọ́ zá nye ọ́bula ke sigbasiri ọ́ro, m̄obu nnwerne, m̄obu nwene, m̄obu ele m̄urnu a, m̄obu r̄umu, kwnornu ẹ̀li-eze Chiokike,

³⁰ ke j̄aanah̄ia kar̄ukwo n'ige ka, n'ige ke jaava, b̄udnu kw̄o okwo.”

Jiz̄osi kwuru ọ́ka gbas̄iri

ẹ̀nwu a ke mgba ẹ̀to

(Mat 20:17-19; Mak 10:32-34)

³¹ Jiz̄osi kwuru nri n̄u badn̄u law̄uru wam, kan̄u be, “A neezee Jeruselem, kpakara nhne ele ọ́whnurninya gbar̄u n'okwukwo gbas̄iri Nnw̄o ke Badn̄u jeemezu.

³² Be jeegweru a nyewhete n'aka ele b̄uo ele Ju. Be jeeme a nhne r̄umu, nyee a mkpar̄i, gb̄u a ọ́nu mini,

³³ pn̄ia a nhne, gb̄u a. N'ọ́bochi k'ẹ̀to, o jeehi n'ẹ̀nwu liz̄o.”

³⁴ Ele sno apna a gh̄oyage kpakara nhne ka. Be kpusnirni ọ́ka ka n'anya be. Be máa risi nhne o nookwu.

Jiz̄osi gworu nye ọ́risi

(Mat 20:29-34; Mak 10:46-52)

³⁵ Nga Jiz̄osi naavadu Jeriko, otu nye isni daz̄i n̄u ngeri apna n̄oorio nhne.

³⁶ Nga ọ́ n̄urnu aḡida badn̄u neewhe, ọ́ s̄ikwa be nhne neeme.

³⁷ Be kan̄u a, “Jiz̄osi nye Nazar̄eti neewhe hna.”

³⁸ O siwama l̄ulo, “Jiz̄osi, Nnw̄o Devidi, d̄onu m obirizi.”

³⁹ Ele be Jiz̄osi ọ́sno bigb̄oru a, o kpusni ọ́nu a, k̄ov̄u, o siwama k'aḡida, “Ji Nnw̄o Devidi, d̄onu m obirizi.”

⁴⁰ Jiz̄osi gwuzoru, kaa, be kwuyan̄u a ya. Nga ọ́ var̄u, Jiz̄osi s̄ikwa a.

41 “Kini bu nhne i piuru me menu i?”

Nye isni wam kaa, “Nyenwe ai, mee ma m whnuru m osno.”

42 Jizosi kanu a, “Whnuru osno, okwnata mkpoma i gwolam ji.”

43 Ngangam, o bete o whnu osno, snornu Jizosi n'apna, naaznarni Chiokike. Kpakara ele whnuru a znarni Chiokike.

19

Jizosi nu Zakiyosi

1 Jizosi bnazne nu rime Jeriko, neewhe n'esilawuru a.

2 Otu nye risi ele ona nturu rehna a bu Zakiyosi zi pii, o bu nye baru aba.

3 O noopio kpa o jowhnu Jizosi, kovu o nwée rikne kwnornu nu o bu nye zi ichichi n'esilawuru igbudu badnu.

4 O gba eso zne nu ruwhnu, pne n'olu isisi sikamo ma o whnu Jizosi nga o jeewhe nu apna wam.

5 Nga Jizosi duru nu piyam, o le anya n'olu, kanu a, “Zakiyosi, hiedna wara wara, kwnornu nu m jaadazi n'oro i tna.”

6 Zakiyosi mee wara wara hiedna, nabnanya a nu mkpoma oso n'onu.

7 Kpakara ele badnu whnuru a, be bete naatamu, kaa, “Nwerukna ka znernu o buru nye izne n'oro nye mmehie.”

8 Zakiyosi lizo kanu Nyenwe ai, “Nyenwe ai, m jeekewa kpakara nhne me nwernu eli lawuru, kesi ele mboni, nye obula ke me hoggburu, m jookwunnata a eli eno.”

9 Jizosi kanu a, “Oznobia varu n'oro ka tna, kwnornu nu nwerukna ka bu masi nnwo Ebereham.

10 Kwnornu nu Nnwō ke Badnu varu o pio nu o znobia ele whuru owhu.”

Elulu nri mkpuru iwai

be kwu minasi*

(Mat 25:14-30)

11 Kpa be zi noobno nsni, Jizosi zne nu ruwhnu tnuu be otu elulu, kwnornu nu o zi Jeruselem ndundu, ele badnu wam naari nu eli-eze Chiokike jowhuya iwhe kina.

12 O kaa, “Otu nwerukna be marnu rehna a znernu mba zi ikere ma be chni a eze su o hiehna eli a.

13 Hne o zne, o sukwu nri ele ohi a, nyee be nri mkpuru iwai, kanu be, ‘Anu zu ahia tem m hiehna.’

14 “Kovu ele eli wam snornu a irno, be zizne izi kaa, ‘A chola nwerukna ka buru eze ai.’”

15 “Be chni a eze, o hiehna. O sukwu ele ohi a ele o nyernu iwai ma o mahia mbnarna be nwehiaru nu iwai o nyernu be.

16 “Nye ke mbom varu, kaa, ‘Nyenwe ai, mkpuru iwai i nyernu n nwehiaru nri mkpuru iwai mbnarna berere.’”

17 “Nyenwe a kanu a, ‘I mekwaru nkari, ohi oma. Kwnornu nu i kwesiri be kwnata i mkpoma nu nhne mati, nēchi nri mba.’”

18 “Nye ke ebo varu, kaa, ‘Nyenwe ai, mkpuru iwai i nwehiaru mkpuru iwai isne berere.’”

19 “Nyenwe a saru a, ‘Buru nye neelekota eli-ohna isne.’

20 “Nye ke eto varu kaa, ‘Nyenwe ai, le iwai i, m knernu m iwai i n'ikpe tugwatanu i ya.

21 Ogwnu i turu m, kwnornu nu i bu nye anya rikne. I neegweru nhne buo ke i, neegwe nhne n'ekwu hne i kpala mkpuru.’

22 “Nyenwe a saru, ‘M jeeji nhne hi n'onu i kpe i ikpe, ji ohi ojo. I magwu nu m bu m nye anya rikne, I neegweru nhne buo ke m, m neegwe nhne n'ekwu me kpala mkpuru.’

23 Kini mernu i yisige iwai m n'aka ele oro iwai? Kpa me hiehnarnu, m znernu m anahoru iwai m nu mbnarna a.’

24 “O kanu ele gwuzo ndundu, ‘Anu nahia a iwai ki nyega nye wam ke nwernu nri.’

25 “Be kanu a, ‘Nda-ai-kwu, o nwernu nri.’

26 “O saru be, ‘Me kanu anu, nye obula ke nwernu be jeenye a, o nwehnasiru, kovu nye ke nwée, be jaanahoru a o bubedi ke o nwernu.’

27 Kina, ele irno m ele kwege me buru eze be, anu kwuya be hna gbumekwo kpakara be nu ruwhnu m.’”

Jizosi bnaznenu

Jeruselem

(Mat 21:1-11; Mak 11:1-11; Jon 12:12-19)

28 Nga Jizosi kwukworo oka ka, o beru be osno neezne Jeruselem.

29 Nga o vaduru Betifagi nu Betani nu Rugwu Olivu o zizne ele sno apna a lawuru, kanu be,

30 “Anu zne nu mgbu mati ke zi nu ruwhnu anu, kpa anu naabna, anu jowhnu otu nnwo iyinya be kpogwu pii, ke o za nye daziri n'olu a, anu toma a, toya hna.

31 O buru nu badnu obula sika anu, ‘Kini mernu anu notoma a,’ anu kanu a, ‘O zi Nyenwe ai mkpa.’”

32 Ele o dusiri zne whnu lele kpa Jizosi kanu be.

33 Kpa be notoma nnwo iyinya wam, ele nwe a sika be, “Kini mernu anu notoma nnwo iyinya wam?”

34 Be saru be, “O zi Nyenwe ai mkpa.”

35 Be toyanu a Jizosi, wukwasi iwo be n'olu a, dazita Jizosi n'olu a.

36 Kpa Jizosi neezne, ele badnu naagbasa iwo be n'apna.

* 19:10 minasi: Jizosi tnuu elulu mkpuru iwai be kwu minasi. N'ige mbom, ogwo eru obochi bu otu mkpuru iwai etekne. Otu minasi hna lele otu riwhu mkpuru iwai.

³⁷ Nga ọ vaduru hne apna larụ Rugwu Olivu, igbudu badnụ ele sno apna a bete n̄onwudna, n̄ootunu Chiokike mmamma n'okne nk̄oli kwnornu aḡida ẹrnu ndu-ẹhni be whn̄rnu.

³⁸ Be naakaa,
“Chiokike ọzi eze

ke naava n̄u r̄whna Nyenwe āj,
Udno n'oligwe,
oznarni z̄inu Chiokike n̄u hne kakwo n'olu.”

³⁹ Agwna ele Farisi ele sno igbudu badnụ wam kan̄u Jiz̄osi, “Nye-zni-nhne, bigb̄o ele sno apna i ma be kpusni ọnu.”

⁴⁰ Jiz̄osi sar̄u be, “Me kan̄u an̄u, ọ b̄uru n̄u ele ka kpusni ọnu be, akaworugwu ele ka jeesi l̄ulo.”

*Jiz̄osi kwnanu
Jeruselem ẹkwna*

⁴¹ Jiz̄osi vadu Jeruselem nd̄undu, whn̄u a, kwnanu a ẹkwna.

⁴² Ọ kaa, “Ọ b̄uru n̄u i mah̄iaru ọbochi tna nhne jeegweyan̄u an̄u udno, k̄ovu anya an̄u kpuru isni.

⁴³ Ọbochi vawa nga ele irno an̄u jaadazigidne an̄u, gbagidne an̄u n'apna ọbula.

⁴⁴ Be j̄ozopia an̄u n̄u r̄umu tak̄iri an̄u, be joolulu ẹli ka n̄u ele wu n̄u rime a, be j̄eesigbasi otu akaworugwu n'olu ibne a hna, kwnornu n̄u an̄u m̄aa ige Chiokike var̄u ọ znohia an̄u.”

*Nhne Jiz̄osi mernu
n'Ọro Ns̄o Chiokike*

(Mat 21:12-17; Mak 11:15-19; J̄on 2:13-22)

⁴⁵ Jiz̄osi bnazne Ọro Ns̄o Chiokike, ch̄ihala ele neere ah̄ia p̄ji.

⁴⁶ Ọ kan̄u be, “Be gbar̄u a n'okkwukwo ns̄o, kaa,
'Oro m j̄oobu ọro okpukpe,'
k̄ovu an̄u mernu a ọ b̄uru ọbna ele buznu.”

⁴⁷ Jiz̄osi z̄i neezni nhne kpakara ọbochi n'Ọro Ns̄o Chiokike. Ele risi ar̄iohna n̄u ele zni iwu ele Ju n̄u ele okno badn̄u Izireli needne kpa be joogbu a.

⁴⁸ K̄ovu be m̄aa nhne be jeeme, kwnornu n̄u kpakara ele berere z̄i k̄oriri noobno ns̄ni n̄u nhne o nookwu.

20

*Rikne Jiz̄osi
(Mat 21:23-27; Mak 11:27-33)*

¹ Ọ d̄u otu ọbochi nga Jiz̄osi z̄i n'Ọro Ns̄o Chiokike neezni izi ọma, ele risi ar̄iohna n̄u ele zni iwu ele Ju, be n̄u ele okno badn̄u Izireli var̄u.

² Be kan̄u a, “Kan̄u āj r̄whna rikne i ji neeme kpakara nhne ka. Nyele nyernu i rikne ka?”

³ Jiz̄osi sar̄u be, “M jaas̄ikwa an̄u otu ājji mas̄i, an̄u kan̄u m,

⁴ ọwu mini J̄oni, o hiri n'oligwe m̄obu n'aka badn̄u va?”

⁵ Be kwu a n'esilaw̄uru be, kaa, “Ọ b̄uru n̄u a kaa, 'O hiri n'oligwe,' ọ jaas̄ikwa āj, 'K̄ini mernu an̄u kw̄ele a?’”

⁶ “K̄ovu a kaa n̄u o hi n'aka badn̄u, kpakara ele badn̄u ka j̄otugbu āj aka-worugwu, kwnornu n̄u be kweru n̄u J̄oni b̄u nye ọwhnurninya.”

⁷ Be sar̄u a, “A m̄aa hne o hi va.”

⁸ Jiz̄osi kan̄u be, “M j̄aaka mas̄inu an̄u r̄whna rikne me ji neeme kpakara nhne ka.”

*Elulu ele ẹrnu ẹkwu vāini
(Mat 21:33-46; Mak 12:1-12)*

⁹ Jiz̄osi tn̄unu ele badn̄u elulu ka, “Otu nyerukna kpar̄u vāini, gweru ẹkwu wam yisi n'aka ele jeelek̄ota a, wh̄oga gbu ọkwnu.”

¹⁰ Nga ige ọ gh̄o mkpuru d̄uru, o zizne otu nye izi o znekwnusi ele ẹrnu ẹkwu wam ma be nyee a agwna mkpuru vāini. K̄ovu ele ẹrnu ẹkwu wam pn̄ia a nhne, zila a n'aka etekne.

¹¹ O zizne kwno nye izi berere, ele ẹrnu ẹkwu wam l̄i a nhne, kpas̄i a iwhterne, zila a n'aka etekne.

¹² O zizne kwno nye izi ke ẹto, be mekasi a nhne, tuwhu a n'ederezi.

¹³ “Ige wam nye nwe ẹkwu vāini wam kar̄u, 'Ndaa nhne me jeeme? M jeezizne nn̄wo m me whn̄rnu n'anya, eleghi anya be j̄ooso a anya.’

¹⁴ “K̄ovu nga ele ẹrnu ẹkwu wam whn̄rnu a, be kan̄u ẹhni be, 'Ka b̄u nye jeeri mkpe nye nwe ẹkwnu ka, an̄u va ma a gbu a, a jeekeri mkpe a.’

¹⁵ Be tuwhu a n'azn̄u ẹkwu wam gbu a.
“K̄ini b̄u nhne nye nwe ẹkwu wam jeeme ele ojo wam?”

¹⁶ Ọ jaava gbumekwo ele ẹrnu ẹkwu ojo wam, gweru ẹkwu wam nyewhete n'aka ele berere.”

Nga ele badn̄u wam n̄rnu ọka ka, be kaa, “Chiokike kw̄é.”

¹⁷ Jiz̄osi le be anya, s̄ikwa be, “K̄ini b̄u risi nhne be gbar̄u n'okkwukwo ns̄o?
'Akaworugwu ke ele noowu ọro j̄uru

k̄iyam gh̄lam risi ns̄ukala ọro.’
¹⁸ Nye ọbula ke jaadnakwas̄i akaworugwu ka, jaagbawa ibekala ibekala, k̄ovu nye ọbula ke akaworugwu ka jaadnakwas̄i, o jeegweri a lele r̄tnu.”

¹⁹ Ele zni iwu ele Ju n̄u ele risi ar̄iohna p̄io kpa be j̄onwugwu Jiz̄osi ngangam, kwnornu n̄u be magwu n̄u ọ tn̄unu be elulu ka. K̄ovu be n̄otu ogwnu ele badn̄u.

*Otu nt̄u-ẹli
(Mat 22:15-22; Mak 12:3-17)*

²⁰ Be zizne ele naadna ndịdna ele mernu lele n'ụ be bụ ele ezi ọka. Be noopio kpa be jeeji nwụgwu Jizọsi hite n'ikwu-ọnu a ma be gweru a nyewhete n'aka nye ọchichi.

²¹ Be sịkwa Jizọsi, "Nye-zni-nhne, a magwụ n'ụ i kwu ezi ọka neezni nhne kwesiri, ị zà neele badn'ụ anya n'ụ ruw'nhu, ọvụ i neezni apna Chiokike n'ezị ọka.

²² Ọ b'uru ọma a t'ụ n'ụ nyee Siza s'ọbu ọ b'ụ ọma?"

²³ Jizọsi whn'uru aghigho ke mkp'oma be, ọ kan'ụ be,

²⁴ "An'ụ gesi m otu mkp'uru ịwai. Nyele nwe ruw'nhu ka n'ụ nhne be gbakwas'iri n'olu a?"

²⁵ Be sar'ụ a, "Siza nwe."

Jizọsi kan'ụ be, "An'ụ nyee Siza nhne ke Siza, nyee mas'ị Chiokike nhne ke Chiokike."

²⁶ Be nwée nhne be jeeji nwụgwu a hite n'ikwu-ọnu o kwuru n'ụ ruw'nhu ọhna. Ọsisa ọ sar'ụ be jiri be anya, be daz'iri bii.

Ajji gbas'iri olizọ n'ẹnwu

(Mat 22:23-33; Mak 12:18-27)

²⁷ Agwna ele Sadusi, ka b'ụ ele kar'ụ n'ụ olizọ n'ẹnwu z'ila, vakwnusiri Jizọsi, s'ikwa a ajji,

²⁸ "Nye-zni-nhne, Mozizi gbar'ụ n'okwukwo iwu nyee a'ị, 'Ọ b'uru n'ụ nyerukna nw'uru s'igbasi nnwerne a, hne be nwée r'umu, nwene a rukna j'ooluru nnwerne nwene a wam m'uhianu nwene a rukna r'umu.'

²⁹ R'umu nne ẹs'au n'ụ a'ị z'ị, ke mb'om l'uru nnwerne, nw'uma hne o nwée nnw'ọ.

³⁰ Nye ke ẹbo l'uru a,

³¹ nye ke ẹto l'ụ a, otu aka wam kpa r'umu nne ẹs'au wam l'uru nwerinya wam, kpakara be nwée nnw'ọ, be nw'ukwo.

³² N'ipne-azn'ụ nwerinya wam nw'ụ mas'ị.

³³ K'itna, n'ọbochi olizọ n'ẹnwu, nwerinya wam j'obu nnwerne nyele n'esilaw'uru be, kwnornu n'ụ be ẹs'au l'uru a?"

³⁴ Jizọsi sar'ụ be, "Ele badn'ụ k'ọwa ka n'olu nnwerne, neekesi nzi.

³⁵ Ọv'ụ ele kwesiri o keh'ia igwe n'olizọ n'ẹnwu ma be z'ị b'udnu n'ige ke jaava, be l'ụ nnwerne, be gb'ọ nzi.

³⁶ Be j'ónwu ẹnwu berere, kwnornu n'ụ be n'ụ lele ele enine izi. Be b'ụ r'umu Chiokike kwnornu n'ụ be hiri n'ẹnwu liz'ọ.

³⁷ Ọv'ụ Mozizi neegesi n'ụ ele nw'uru ọnwu jeehi n'ẹnwu liz'ọ, hite n'ụ nhne ọ gbar'ụ n'okwukwo gbas'iri isisi mat'ị wam neerne bekw'nu. O sukwuru Nyenwe a'ị 'Chiokike ke Ebereham, Chiokike ke Aziki, n'ụ Chiokike ke Jek'ọp'ụ.'

³⁸ Chiokike b'ụ Chiokike ke ele z'ị b'udnu, ọ b'ụ ke ele nw'uru ọnwu, kpakara ele badn'ụ z'ị b'udnu n'anya Chiokike."

³⁹ Agwna ele zni iwu ele Ju kar'ụ, "Nye-zni-nhne, ị sakwar'ụ nkari."

⁴⁰ Ọ z'ima nye nwernu rikne s'ikwa a ajji berere.

Kar'isi b'ụ nnw'ọ nyele?

(Mat 22:41-46; Mak 12:35-37)

⁴¹ Jizọsi kan'ụ be, "Ndaa kpa be naakaa n'ụ Kar'isi b'ụ Nnw'ọ Devidi?"

⁴² Kwnornu n'ụ Devidi n'iw'uru a kwuru n'okwukwo Eri Ọma,

'Nyenwe a'ị kan'ụ Nyenwe m,

Daz'iri ẹl'ị n'akarikwnunga m

⁴³ tem d'ụ nga me jaab'ita ele irno i

lele nhne ị j'ootukwasi ọchi ị law'uru.'

⁴⁴ Devidi sukwuru a 'Nyenwe m,' ndaa kpa o jeeji b'uru kw'no nnw'ọ a?"

An'ụ zeru ele zni iwu

ele Ju

(Mat 23:1-36; Mak 12:38-40; Luk 11:37-54)

⁴⁵ Kpa kpakara ele badn'ụ wam z'ị noobno nsn'ị, Jizọsi kan'ụ ele sno apna a,

⁴⁶ "An'ụ neeze ele zni iwu ele Ju. Ọ na-mas'ị be o wo awura ogologo naagaghari, ọ naamas'ị be ele badn'ụ neebekwu be ikwu n'ah'ia, be n'ohoru risi ngadna n'oro ọgbako ele Ju, ma ngadna kakwo mma n'ọgbako iriri an'ụ.

⁴⁷ Be b'ụ ele neeridna oro ele rinya nzi be nw'uru, neekpe ogologo okpukpe ma ele badn'ụ whn'uru be. Be jaata aw'nhw'nhu ke kakwo."

21

Nkesi nwerinya

nzi a nw'uru

(Mak 12:41-44)

¹ Jizọsi leri anya whn'ụ ele eze n'otusi nhne nkesi be n'ụ hne be n'otusi ịwai n'oro Ns'ọ Chiokike.

² Ọ whn'ụ otu w'omboni nzi a nw'uru hne o n'otusi mkp'uru ịwai mat'ị law'uru.

³ Jizọsi kaa, "Me kan'ụ an'ụ ezi ọka, nwerinya ka b'ụ w'omboni nzi a nw'uru t'usiri kar'ukwo kpakara ele n'otusi ịwai.

⁴ Kpakara ele badn'ụ ka mas'iri aka n'ag'ida ẹkw'nu be nwernu gweb'oru t'usi, ọv'ụ nwerinya mboni ka t'ukpar'ụ kpakara nhne o nwernu."

Be joolulu Oro Ns'ọ

Chiokike

(Mat 24:1,2; Mak 13:1-2)

⁵ Agwna ele sno apna a nookwu, naajakiri Oro Ns'ọ Chiokike n'ụ akaworugwu be jiri a wu mma, ya n'ụ nkesi be jiri ch'ọ Oro Ns'ọ Chiokike mma. Ọv'ụ Jizọsi kaa,

⁶ "Kpakara nhne an'ụ n'ow'nhu, ige vawa nga otu akaworugwu j'ogwuzo n'olu ibne a, be jaakwnadna kpakara be n'ẹl'ị."

Mmekp'ehni n'ụ

okpakna ẹhni

(Mat 24:3-14; Mak 13:3-13)

7 Be sịkwa a, “Nye-zni-nhne, ndaa nga nhne ka jọbu? Kịni jọbu nhne jeegesi nga nhne ka jeeme?”

8 Jizọsi saru be, “Anya du anu eli, anu kwé be duhie anu. Agida ele badnu jaava nu rewhna m, naakaa, ‘O bu mawa, ige valem,’ kovu anu snó be.

9 Nga anu jonu otnutnu ogwnu nu omegidne, ogwnu tuko anu. Kpakara nhne ka jeebe osno mee, kovu okwukwo nhne yoduge.”

10 O kanu be, “Mba jeelizo megidne mba, eli-eze jeelizo megidne eli-eze.”

11 Okne eli otne nye jaazi nu hne zi ichne ichne, okwnunyo nu nriria ojo jaazi nu hne zi ichne ichne. Nhne zi ogwnu nu okne nhne elekema jeehi n'oligwe va.

12 “Kovu su kpakara nhne ka mee, be jounwugwu anu, kpakna anu ehni, gweru anu nyee n'aka ele ikpe be kpe anu ikpe n'oro ogbako ele Ju, be yisi anu n'oro ikelu. Anu joo gwuzo nu ruwhnu ele eze nu ele ochichi kwnornu nu rewhna m.

13 Ka jọbu oghere anu jeeji gba akebne zi oma.

14 Kovu anu beru osno rigbu ehni anu kpa anu jeeji goru onu anu.

15 Kwnornu nu m jeeysi oka nu akoniche ke ele irno anu jeeuwe rikne gwuzogidne mọbu megbu anu.

16 Ele murnu anu jeegweru anu nyewhete, rumu nne anu nu rumu nwene nu ele enyi, be joogbu agwna anu.

17 Kpakara ele badnu joosno anu irno kwnornu nu me.

18 Kovu otu rukeri-ize ke risi anu jaadna n'eli mọbu whu etekne.

19 Anu gwuzosi rikne ma anu znohia budnu anu.

Be joolulu Jeruselem

(Mat 24:15-21; Mak 13:14-19)

20 “Nga anu jowhnu ele ogwnu ele irno gbaru Jeruselem ngaramanga, anu mahia n'olulu a zi ndundu.

21 Ige wam ele zi nu judiya gbazne n'olu rugwu, ele zi n'eli-ohna whoga, ele zi n'ekwu be lagna nu rime eli-ohna.

22 Kwnornu nu ka bu ige o ta awnhnuwhnu ma kpakara nhne be gbaru n'okwukwo nsq mezu.

23 Awhnuwhnu jaazinu ele rinya zi rime nu ele neechi nnwo rema n'ige wam. Okne awnhnuwhnu jaadnakwasị eli ka, Chiokike jjonwudna ovu owe ehni a megidne ele badnu ka.

24 Be jeegweru ama-ogwnu gbu agwna badnu, be jodoru ele berere lele ele ikelu zne kpakara mba. Ele buo ele Ju joozodna Jeruselem tem ige be zu.

Nnwọ ke Badnu vawa

(Mat 24:29-31; Mak 13:24-27)

25 “Nhne elekema jaazi n'ehnam nu enwa nu mbo. N'owa mkpoma ola mini jaazi n'esilawuru kpakara mba, be jootu ogwnu abaka-mini nu ruwhere osimini.

26 Ele badnu jootubo kwnornu ogwnu nu nhne be n'owhnu jeeme n'owa, kwnornu nu kpakara iknernema ke oligwe jooohnio ohnio.

27 Ige wam be jowhnu Nnwọ ke Badnu hne o naava n'erumeru k'oligwe, n'iknernema nu okne igwugwu.

28 Nga kpakara nhne ka beteru neeme, anu lizo, gwelizo risi anu olu kwnornu nu ige oznohia anu zi ndundu.”

*Muhia nhne hite n'isisi
be kwu figi*

(Mat 24:32-35; Mak 13:28-31)

29 Jizosi tnyu be elulu ka, “Anu le isisi figi nu kpakara isisi berere.

30 Nga anu n'owhnu nu be nooruhia okwukwo budnu, anu mahia nu nduru-mini zi ndundu.

31 Kpam masi, nga anu jowhnu kpakara nhne ka neeme, anu mahia nu eli-eze Chiokike zi ndundu.

32 “Me kanu anu ezi oka, ebiri ka jeeuwe su kpakara nhne ka mee.

33 Oligwe nu owa jaagawhe, kovu ikwu-onu m jaagawhe rja rja.

Odo aka nu nsni

34 “Anya du anu eli, anu kwé okne nhne oriri nu nhne onwunwo nu oriri ke budnu ka, jihia mkpoma anu, ke jeeme obochi wam vakwnusi anu nu nga anu tuge anya a.

35 Kwnornu nu o jaavakwnusi kpakara ele zi n'owa lele mbjta be sninnu anohia.

36 Anu neese nse ige obula, anu kpe okpukpe ma anu nwe rikne gbanahoru kpakara nhne ka jeeme, nu o gwuzo nu ruwhnu Nnwọ ke Badnu.”

37 Jizosi zi neezni nhne kpakara obochi n'Oro Nso Chiokike, n'ige ogbednachi o whoga zne Rugwu Olivu zukwaru inwe nu o dnanyi tem chi bo.

38 Kpakara ele badnu neezne Oro Nso Chiokike n'onu osisi ma be nurnu nhne o neezni.

22

Be gbaru iznuznu

o gbu jizosi

(Mat 26:1-5; Mak 14:1,2; Jon 11:45-53)

1 Ige Iriri Brędi Whuge Owlu ke be kwu Ogawhe zi ndundu.

2 Ele risi arjohna nu ele zni iwu ele Ju noopio oghere be jeeji gbu Jizosi, kpa be n'otu ogwnu ele badnu.

Judasị kweruru

o re jizosi

(Mat 26:14-16; Mak 14:10,11)

³ Ekwensu bna nù rime Judasì nye be kwu Isikarioti, nye bụ otu nù rime ele sno apna a nri nù ẹbo wam.

⁴ Judasì znekwnusi ele risi ariohna nù ele risi ele neese Oronso Chiokike, gba iznuznu kpa o jeenye be Jizosi.

⁵ Ovu sọru be n'ọnu, be kwe o nyee a iwai.

⁶ Judasì kweru, o noopio kpa o jeenwe oghere o gweru Jizosi nyee be nga ele badnu máa.

Be jiknernu o ri

Iriri Ogawhe

(Mat 26:17-25; Mak 14:12-21; Jón 13:21-30)

⁷ O dũ n'ọbochi ke Iriri Brẹdi Whúge Ọwhu, nga be naakwa ariohna atnurnu Ogawhe.

⁸ Jizosi zizne Pita nù Jóni, "Anũ zne bkwatanu aĩ Iriri Ogawhe."

⁹ Be sịkwa a, "Ndaa hne i pioru a bkwata a?"

¹⁰ Jizosi kanũ be, "Kpa anũ naabna n'ẹli ka, anũ jọowhnu otu nwerukna vugwu idudu mini, anũ snornu a bna n'oro ke o jaabna.

¹¹ Anũ kanũ nyenwe oro wam, 'Nye-zni-nhne kaa a sịkwa i, Ndaa oro ele izne hne me nũ ele sno apna m jeeri Iriri Ogawhe?'

¹² O jeegesi anũ otu ọnu-oro zĩ rude n'oro olu, be mekwatarũ, anũ mekwata kpakara nhne."

¹³ Be zne whnũ kpakara nhne lele kpa Jizosi kannũ be. Be mekwata Iriri Ogawhe.

Wiri Anyasnu Nyenwe aĩ

(Mat 26:26-30; Mak 14:22-26; 1 Kọr 11:23-25)

¹⁴ Nga ige dũru, Jizosi nũ ele izi a dazĩri neeri wiri.

¹⁵ O kanũ be, "N'ezi o gwnũsiri m rikne me nũ anũ rikọ Iriri Ogawhe ka sị me ta awhnũwhnu.

¹⁶ Kwnornu me kanũ anũ, m jéeri kwno a berere tem o mezu n'ige ẹli-eze Chiokike."

¹⁷ Jizosi gweru okiko, tũnu Chiokike mmamma, kaa, "Anũ gweru ka, keme n'esisilawũru anũ.

¹⁸ Kwnornu me kanũ anũ, m jónowoma manya hi n'isisi vajni whũya rĩa rĩa tem ẹli-eze Chiokike va."

¹⁹ O gweru brẹdi, tũnu Chiokike mmamma, nyawama a, nyee be, kaa, "Ka bũ anọ-ẹhni m me nyernu kwnornu anũ, anũ neeme ka neechenwanya m."

²⁰ Kpam masị, nga wiri anyasnu wheru, o gweru okiko, kaa, "Okiko ka bũ ogbanjọ-ẹhni ikne ke ọvnarna m, ke me wũsiri kwnornu anũ.

²¹ Kọvu anũ le, nye neere m nũ me dazigwu n'ikpechi neeri wiri.

²² Nnwọ ke Badnũ jaala lele kpa Chiokike kpebiri a, kọvu awhnũwhnu jaazĩnu nyerukna wam be jeehi n'aka a re Nnwọ ke Badnũ."

²³ Be neesikwarita ẹhni be nye jeeme nhne ka.

Nye kakwo ibne a

²⁴ Ele sno apna a bete nọdogbuta nye kakwo n'esisilawũru be.

²⁵ Jizosi kanũ be, "Ele eze ele bũo ele Ju neechi ele ke be n'aka rikne, ele nwernu rikne hne be zĩ kaa nũ be bũ enyi ele badnu.

²⁶ Kọvu o kwésile o zĩ kpam n'esisilawũru anũ. Nye kakwo ibne a n'esisilawũru anũ jónu lele watakĩri, nye noodu anũ lele nye izi.

²⁷ Kwnornu nyele kakwo, nye neeri wiri n'ikpechi sọbu nye neezne izi? O bũ nye dazĩ ẹli neeri wiri. Kọvu m zĩ m n'esisilawũru anũ lele nye izi.

²⁸ "Anũ dazigidnernu m n'ornurna m.

²⁹ M jeenye anũ rikne o chĩ ẹli-eze lele kpa Nda m nyernu m,

³⁰ ma anũ snornu m ri wiri, nwọ masị nũ ẹli-eze m, dazĩri nũ ngadna eze neekpe ẹbnurnu nri nũ ẹbo ke Izireli ikpe.

Jizosi karũ nũ Pita

jọogonahoru a

(Mat 26:31-35; Mak 14:27-31; Jón 13:36-38)

³¹ "Sajmoni, Sajmoni, le, Ekwensu rjoru o yọ i lele kpa be yọ ikpa.

³² Kọvu m kpennu m jĩ okpukpe, Sajmoni, ma ọkwnata mkpoma i ziri kwem. Nga i tũhnasarnu, kwnagidne rĩmu nda i."

³³ Kọvu Pita sarũ, "Nyenwe aĩ, m jiknernu m o sno i zne ikelu mọbu nwũma."

³⁴ Jizosi sarũ a, "Pita, me kanũ i, sũ okne ọchichi kwna ẹkwna tna, i jọogonahoru m mgbá ẹto."

Rẹkpa matĩ, rẹkpa nũ

ama-ogwnu

³⁵ Jizosi sịkwa be, "Nga me zihalaru anũ, anũ jile rẹkpa iwai, mọbu rẹkpa, mọbu okoro-ọchi, o nwernu nhne kọru anũ?"

Be sarũ a, "O zá nhne kọru aĩ."

³⁶ O kanũ be, "Kọvu kĩtna, nye nwernu rẹkpa iwai gweru a, nye nwernu rẹkpa berere, gweru a, o bũru nũ i nwée ama-ogwnu, re iwo olu i, zũru otu.

³⁷ Kwnornu nũ be gbarũ a n'ọkwukwo nsọ, 'Be gwnũkotaru ya nũ ele mmehie,' be jeemezu nhne ka. Owe! Nhne be gbarũ gbasiri m jeemezu."

³⁸ Ele sno apna a kaa, "Nyenwe aĩ, le ama-ogwnu lawũru."

Jizosi kanũ be, "O joozu."

Jizosi kperu okpukpe

nũ Rugwu Olivu

(Mat 26:36-46; Mak 14:32-42)

³⁹ Jizosi whọga zne nũ Rugwu Olivu lele kpa o mesị, ele sno apna a snornu a.

⁴⁰ Nga o vaduru piĩ, o kanũ be, "Anũ kpe okpukpe o zĩ anũ dnabna nũ rime ọrnurna."

41 Ọ whọga zne nụ ruwhnu matị, gbu mp-nerne ọchi n'ẹli kpe okpukpe, kaa,

42 “Nda m, ọ bụru nụ ọ masịri i, gwemenu m okiko awhnụwhnu ka, ọvụ ọ bụo nhne m pioru, ọvụ nhne i pioru.”

43 Enine izi hi n'oligwe varu gba inwe.

44 Hite n'igbugbu, o kpe okpukpe k'ezi, ruhara baru a nụ lele okne ọkpurukpu ọvna naadnasa n'ẹli.

45 Nga o kpe kworu okpukpe, ọ lah-nakwnusi ele sno apna a, whnụ nụ be neezni anyarna hite nụ nhne igbugbu nụ rikne gwuru be.

46 Ọ sịkwa be, “Kini mernu anụ neezni anyarna? Anụ lizọ kpe okpukpe ọ zị anụ dnabna nụ rime ọvna.”

Be nwudneru Jizọsi

(Mat 26:47-56; Mak 14:43-50; Jọn 18:3-11)

47 Kpa Jizọsi kpu ọka n'ọnu, Judasi, otu nụ rime ele sno apna a nri nụ ẹbo wam, duru igbudu ele badnụ va, o zneknwusi Jizọsi, snutu a ọnu.

48 Ọvụ Jizọsi sịkwaru a. “Judasi, i ji osnutu ọnu neere Nnwọ ke Badnụ?”

49 Nga ele sno Jizọsi whnuru nhne neeme, be kaa, “Nyenwe aị, a gweru ama-ogwunu aị lụ ọgwunu sa?”

50 Otu nyenum n'esilawuru be, ji ama-ogwunu gbu, bihala nnwọ izi nye risi arịohna nsnj akarikwunga a.

51 Ọvụ Jizọsi saru be, “Ozulem!” Ọ kpatu nsnj nwerukna wam aka, gwọ a.

52 Jizọsi kanu ele risi arịohna nụ ele risi ele neese Ọro Nso Chiokike nụ ele okno badnụ, ele varu ọ nwugwu a, “Anụ ji ama-ogwunu nụ okpiri va lele nụ m bụ m nye neemegidne iwu ẹli.

53 Me nụ anụ zị kpakara ọbochi n'Ọro Nso Chiokike, anụ nwée rikne nwugwu m. Ọvụ ka ige ke anụ, ige rikne ọchichiri nẹchi.”

Pita gọnahoru Jizọsi

(Mat 26:57,58,69-75; Mak 14:53,54,66-72; Jọn 18:12-18,25-27)

54 Kpa be nwugwu Jizọsi, be duru Jizọsi zne n'oro nye risi arịohna, Pita snornu nụ be nụ hne zị ikere.

55 Nga be kpawhnsiri bekwunu n'esilawuru ederezi, Pita snornu be daziri ẹli nụ ngeri bekwunu.

56 Otu nnwọ oknornokno ele neezne izi whnuru Pita hne ọ zị nụ ngeri bekwunu. O legidne a anya, kaa, “Nwerukna ka nụ Jizọsi sno.”

57 Pita gọ, kaa, “Nwerinya, m máam nye ọ bụ.”

58 Ige matị wheme, otu nwerukna whnuru a, kaa, “I bụ otu nụ rime be.”

Pita saru a, “Nwerukna, m búla m.”

59 Nga otu awa whemernu, nye berere kwusi a rikne kaa, “N'ezi ọka, nwerukna ka nụ ya sno, kwnornu nụ ọ bụ nye Galili.”

60 Pita saru, “Nwerukna, m máam nhne i nookwu.” Kpa ọ kpụ ọka n'ọnu, okne ọchichi kwnarnu ẹkwna.

61 Nyenwe aị tughnasna legidne Pita anya. Pita chenwanya ikwu-ọnu Nyenwe aị kwunnu a, “Sụ okne ọchichi kwna ẹkwna tna, i jọgonahoru m mgba ẹto.”

62 Pita whọga ederezi kwna ẹkwna mkpuru ovu k'agida.

Jizọsi zị nụ ruwhnu

ele eze-ikpe

(Mat 26:67,68; Mak 14:65)

63 Ele neese nse bete naapnia Jizọsi nhne nọomu a ruwu.

64 Be gweru ikpe knesi a anya, kaa, “Whnunu aị ọwhnurninya, nyele gbọru i aka?”

65 Be kwu nhne berere zị ichne ichne, kpasị a iwhnerne.

Jizọsi gwuzo nụ

ruwhnu ele eze-ikpe

(Mat 26:59-66; Mak 14:55-64; Jọn 18:19-24)

66 Nga chi bọru, ele okno badnụ ele Ju, nụ ele risi arịohna nụ ele zni iwu ele Ju, gbakoru n'otu, be kwuyanụ be Jizọsi n'ikpe be.

67 Be kaa, “Ọ bụru nụ i bụ Karaịsi, kanu aị.”

Jizọsi saru be, “Ọ bụru nụ me kanu anụ, anụ jéekweru m.

68 Ọ bụru me sịkwa anụ ajiji, anụ jáasa.

69 Ọvụ hite nụ kịtna zne nụ ruwhnu, Nnwọ ke Badnụ jaadazị n'akarikwunga ke Chiokike ke bụ Dikne.”

70 Be sịkwa a, “Ọ bụ jịwa bụ Nnwọ Chiokike?”

Ọ saru be, “Anụ karu nụ m bụ m.”

71 Be kaa, “A píole akabne berere, a nurnu nhne hi n'ọnu a whuya.”

23

Jizọsi gwuzo nụ

ruwhnu Paịleti

(Mat 27:1-2,11-14; Mak 15:1-5; Jọn 18:28-38)

1 Ele iznuznu ikpe ele Ju lizọ duru Jizọsi zne nụ ruwhnu Paịleti,

2 be bete noobno a nhne, be kaa, “A whnuru nwerukna ka hne o nooduwhe ele ke aị, o nookwu be tükwadia ntụ nye Siza, naakaa masị nụ ọ bụ Karaịsi, eze aị.”

3 Paịleti sịkwa a, “I bụ eze ele Ju?”

Jizọsi saru a, “Owe! Jị n'iwuhuru i karu kpm.”

4 Paịleti kanu ele risi arịohna nụ igbudu badnụ wam, “Ọ zá nhne ojo me whnuru nụ rime nwerukna ka.”

5 Ọvụ be kwusiri a rikne, “O neegweya ọnu gharu ọnu n'esilawuru ele Ju zị nụ

Judiya hite nù nhne o neezni. O panizoru a nù Galili tem o vadu hna.”

Jizōsi gwuzo nù ruwhnu Erōdu

⁶ Nga Paileti nurnu a, o sika be ma nwerukna ka o bu nye Galili.

⁷ Nga o mahiaru nù Jizōsi hi n'eli ke Erōdu nechi, o ziznenu a Erōdu nye zi nù Jeruselem n'ige wam.

⁸ Mkpoma sora Erōdu n'onu k'agida nga o whnurnu Jizōsi, kwnornu nù o noopio o whnu a agida ige wheru ewhe. Hite nù nhne o nurnu gbasiri a, o neele anya nù Jizōsi joornu ernu ndu-ehni nù ruwhnu a.

⁹ Kam kpayarū, Erōdu sika Jizōsi agida aiji, kovu nù Jizōsi sala a oka obula.

¹⁰ Ele risi arjohna nù ele zni iwu ele Ju gwuzoru pi noobno Jizōsi agida nhne.

¹¹ Erōdu nù ele ogwnu a mee Jizōsi nhne rumu, kpasị a iwhnerne. Be wosi a iwo marnu mma, zihnaznenu a Paileti.

¹² Paileti nù Erōdu buru enyi hite n'obochi wam, kwnornu nù be bu ele irno nù mbom.

Be marnu Jizōsi ikpe enwu

(*Mat 27:15-26; Mak 15:6-15; Jon 18:39--19:6*)

¹³ Paileti sukwukota ele risi arjohna nù ele nechi echi nù kpakara ele badnu,

¹⁴ o kanu be, “Anu kwuyannu m nwerukna ka nù o bu nye nooduhie ele badnu, m lebnana m anya nù kpakara nhne anu bnornu nwerukna ka nù ruwhnu anu, o za nhne me whnurnu bu risi nhne anu noobno a.

¹⁵ Erōdu masi whnuge nhne ojo obula nù rime a, kwnornu nù o zihnayarnu ai ya, o za nhne kwesiri enwu ke o mernu.

¹⁶ M jaapnia nhne, gharu a, o la.” [

¹⁷ N'ige Iriri Ogawhe obula, Paileti neesigbasinu be otu nye ikelu.]

¹⁸ Kpakara igbudu badnu gweru otu nkoli siwama, “Gbu nwerukna ka, sigbasinu ai Barabasi.”

¹⁹ (Be yisiri Barabasi n'oro ikelu kwnornu nù o yiri aka n'ele megidnenu nye nechi echi, o gburu badnu.)

²⁰ Paileti pioru ma o sigbasi Jizōsi, o riasno igbudu badnu wam.

²¹ Kovu be siwama koriri, “Kpogidne n'ogba, kpogidne a n'ogba.”

²² Paileti sika be ke mgba eto, “Kini mernu? Kini bu nhne ojo ke o mernu? M whnuge m nhne ojo ke o mernu ke kwesiri enwu. M jaapnia nhne, sigbasi a, o la.”

²³ Kovu be zi koriri neesi lulo n'okne nkoli be kpogidne a n'ogba, be nwehiaru nhne be neesi.

²⁴ Paileti marnu Jizōsi ikpe, o nyee be nhne be pioru.

²⁵ O sigbasinu be nye wam zi n'oro ikelu nye megidnenu ele nechi echi, gbu masi badnu, nye be rioru a. O gweru Jizōsi nye-whete be.

Be kpogidnenu Jizōsi n'ogba

(*Mat 27:32-44; Mak 15:21-32; Jon 19:17-27*)

²⁶ Be duru Jizōsi zne, n'apna be sigidne Saimoni nye Sirini, nye hi n'aznu mba naabnanya, be vukwasị a ogba, ma o vuru a snornu Jizōsi n'aznu.

²⁷ Agida ele badnu snornu a, ma ele rinya ele naakwanu Jizōsi ekwina.

²⁸ Jizōsi tuhnasnarnu, kanu be, “Ele rinya Jeruselem, anu kwnanu m ekwina, kovu anu kwanu ehni anu nù rumu anu ekwina.

²⁹ Kwnornu nù ige vawa nga be jaakaa, ‘Ele rinya nwée nnwo bu ele owa oma, nù ele muge nnwo nù ele chige rumu rama.’

³⁰ Ige wam,

Ele badnu jaakanu rugwu, ‘Dnagidne ai, nù rugwu matị ‘Kpusni ai.’

³¹ O buru nù ele badnu mee kpa nga isisi zi budnu, ndaa kpa o joonu nga o kporu bekwnu?”

³² Be kwuru ele ojo lawuru berere ma be gbu be nù Jizōsi.

³³ Nga be vaduru nù hne be kwu Okpokoro Risi, be kpogbu a, ya nù ele ojo wam, otu badnu n'akarikwnunga a, nye ke berere n'akarita a.

³⁴ Jizōsi kaa, “Nda m, gbarunu be kwnornu nù be ma nhne be neeme.”

Be keru iwo a n'esilawuru be, nga be vukworu ogbanuchi.

³⁵ Ele badnu gwuzoru neelekiri, ele risi ele Ju noomu a rumu. Be kaa, “O znohiaru ele berere, o znohia ehni a, o buru nù o bu Karaisi wam, nye Chiokike hohiaru.”

³⁶ Ele ogwnu noomu a rumu. Be nyee a manya gbaru oka,

³⁷ be kaa, “O buru nù i bu eze ele Ju, znohia ehni i.”

³⁸ Be gbaru nhne gbasiri a n'olu ogba a, “Ka bu Eze ele Ju.”

³⁹ Otu nyenum nù rime ele be kpogidnenu ya nù be, noogo a ngugo. “Kwa i bu Karaisi, znohia ehni i, znohia masi ai.”

⁴⁰ Nye ke berere bigbo a, kaa, “I tu ogwnu Chiokike, i zi n'otu ikpe wam.

⁴¹ A naata awhnwhnu kwesiri ai, kwnornu nù a nanahia ogwo ernu ai. Kovu nwerukna ka mene nhne ojo obula.”

⁴² O kanu Jizōsi, “Jizōsi, chenwanya m nga i jaava chi lele eze.”

⁴³ Jizōsi saru a, “Me kanu i ezi oka, me nù ji jaazi tna nù Paradasi.”

Enwu Jizōsi

(*Mat 27:45-56; Mak 15:33-41; Jon 19:28-30*)

⁴⁴ Hite n'esilawuru iwhehnie,* ọchichiri gbasnirni kpakara ẹli wam dụ n'ọtnu-ige ke ẹto,†

⁴⁵ kwnornu nọ ẹhnam gbarụ ọchichiri. Ikpe ke bnosnirni hne zị nsọ n'Ọro Nsọ Chiokike gbawarụ nga lawuru.

⁴⁶ Jizọsi gweru okne nkọli siwama lulo, "Nda m, m neeyisi enine m n'aka i." Nga o kwuru ka, ọ kna inwe.

⁴⁷ Nga nye nẹchi otu riwhu ele ọgwu whnurnu nhne mernu, ọ znarni Chiokike, kaa, "N'ezị, nwerukna ka bụ nye mee ọma."

⁴⁸ Nga ele gwuzo neelekiri whnurnu nhne mernu, be kwa aka nọ mkpọma, whọga.

⁴⁹ Kọvu kpakara ele magwu Jizọsi nọ ele rinya ele snornu a hite nọ Galili gwuzo nọ hne zị ikere, nọowhnu nhne neeme.

Be liri Jizọsi

(*Mat 27:57-61; Mak 15:42-47; Jon 19:38-42*)

⁵⁰ Otu nwerukna rẹwhna a bụ Josefu, nye bụ otu nọ ele ikpe, nye be nọoso anya, nye ọma.

⁵¹ Ọ bụ nye ikpe, kọvu o snọge be kwekorita nọ nhne be kpebiri nọ nhne be mernu, nye hi nọ Arimatiya ke zị nọ Judiya, nye neese nga lge ẹli-eze Chiokike jaava.

⁵² O znekwnusi Pajleti, rjọ a iznu Jizọsi.

⁵³ O vudna iznu Jizọsi n'olu ọgba, gweru ikpe marnu mma whu a, lite a nọ rime ilili ke zị nọ rime rugwu ke ọ zā nye be liru nọ rime a nọ mbọm.

⁵⁴ Ọ bụ ọbochi ojiknernu, Ọbochi Ozukwa Inwe ele Ju gwnarnu matị ọ panizo.

⁵⁵ Ele rinya wam hi nọ Galili va snornu Josefu whnụ kpa ilili a nọ, nọ kpa ọ dnanyitaru a Jizọsi.

⁵⁶ Be lahna ọro, gwakọta mọno otute nwernu ẹknarna ọma be jeete iznu a.

Be zukwa inwe n'Ọbochi Ozukwa Inwe lele kpa nhne be nyernu n'iwu kwuru.

24

Jizọsi lizọru n'ẹnwu

(*Mat 28:1-10; Mak 16:1-8; Jon 20:1-10*)

¹ N'ọnu ọsisi n'ọbochi mbọm n'ikwezu, ele rinya wam gweru mọno otute wam be gwakotaru ke nwernu ẹknarna ọma, zne ilili Jizọsi.

² Be whnurnu nọ be vumernu akaworugwu be jiri kpusni ọnu ilili wam.

³ Be bnazne nọ rime ilili, be whnuge iznu Nyenwe a Jizọsi.

⁴ Be gwuzoro naari nhne ka bụ, ngangam, ele rukna lawuru wogwu iwo abọchna noogbu amuma gwuzoro nọ ngeri be.

⁵ Ọgwu turu ele rinya wam, be dna kpu ruwhnu n'ẹli, kọvu ele rukna wam kanu

be, "Kini kpayarụ anọ noopio nye zị budson n'esilawuru ele nwurnu ọnwu?"

⁶ Ọ zla hna, o hilem n'ẹnwu lizo. Anọ chenwanya nhne ọ kannu anọ nga ọ zị nọ Galili,

⁷ nọ be jeegweru Nnwọ ke Badnu nyega ele mmehie, be kpogidine a n'ogba, n'ọbochi ke ẹto, o jeehi n'ẹnwu lizo."

⁸ Ele rinya wam chenwanya ikwu-ọnu a.

⁹ Be hi n'ilili wam lahna, kanu nri nọ otu badnu ele sno apna a nọ ele berere nhne be whnurnu.

¹⁰ Ele rinya wam bụ Meri Magidalini, nọ Joana, nọ Meri nne Jemisi, be nọ ele rinya berere kanu ele izi wam ọka ka.

¹¹ Kọvu be kwége nhne ele rinya kwuru, be naari nọ ọ bụ ọka etekne.

¹² Pita lizo, gba ẹso zne n'ilili, o whudna, whnụ ikpe iznu, ọ zā nhne berere ọ whnurnu. Ọ lahna ọro naari nhne mernu.

N'apna zne Emaọsi

(*Mak 16:12,13*)

¹³ N'ọbochi wam, ele sno apna a lawuru neezne ẹli Emaọsi, nhne nọ lele maili ẹsau.

¹⁴ Be nookwurita kpakara nhne mernu.

¹⁵ Kpa be neezne nookwu nhne ka, Jizọsi n'iwuhuru a kpayabeturu ndundu, snornu be neezne.

¹⁶ Be whnụ a, kọvu be máa nọ ọ bụ Jizọsi.

¹⁷ Jizọsi sika be, "Kini bụ nhne anọ nọotnurni kpa anọ neezne?"

Be gwuzoro bii, gbaru ruwhnu.

¹⁸ Otu nọ rime be rẹwhna a bụ Kilopasi, sika a, "Okwole jiwa bụ nye izne ke zị nọ Jeruselem nye máa nhne mernu ọbochi ele nọ ele ka wheru ewhe?"

¹⁹ Jizọsi sika a, "Kini bụ nhne kọ?"

Be kaa, "Nhne gbasiri Jizọsi nye Nazareti, nwerukna ka bụ nye ọwhnurninya Chiokike, ọ bụ dikne n'ikwu-ọnu ma nọ ọnu nọ ruwhnu Chiokike ma nọ ruwhnu ele badnu.

²⁰ Ele risi arjohna nọ ele risi a j gweru a nyee ma be kpe ikpe ẹnwu, be kpogidine a n'ogba.

²¹ Kọvu a leri anya nọ ọ bụ nye jaagbahia Izireli. Ke kakwo, tna bụ ọbochi ẹto a kpa nhne ka mernu.

²² Agwna ele rinya a j nọ be zị kpasiri a j ọgwu tna. Be znernu n'ilili a n'ọnu ọsisi,

²³ kọvu be whnuge iznu a. Be va kanu a j nọ be whnurnu ọwhnurninya ele enine izi, ke kannu be nọ ọ zị budson.

²⁴ Agwna ele a j nọ be zị znernu ilili a, whnụ masi lele kpa ele rinya wam kwuru, kọvu be whnuge iznu a."

²⁵ Jizọsi kanu be, "Anọ bụ ele iwahnirni-whno, anọ zla gnarnagnarna nọ okweru nhne kpakara ele ọwhnurninya kwuru.

* **23:44** n'esilawuru iwhehnie: ọkwukwo ke mbọm kwuru ige awa isunu † **23:44** ọtnu-ige ke ẹto: ọkwukwo ke mbọm kwuru ige awa tolu

²⁶ O zị mkpa nụ Karaisi jaata kpakara awghnūwhnu, bna n'igwugwu a."

²⁷ Jizōsi kōwamanu be nhne be gbarū n'okwukwo nsō gbasiri eñni a, hite n'okwukwo Mozizi nū ele owhnurninya.

²⁸ Kpa be vaduru ẹli wam be neezne, Jizōsi mee lele o neewhe ruwhnu,

²⁹ be sigidne a, kaa, "Snornu aị daziri, obochi zneminem." O snornu be daziri.

³⁰ O snornu be daziri ẹli n'ikpechi wiri, o gweru bredi, tū mmamma, nyawama a, bete neenye be.

³¹ Anya be kpume, be mahia a, kovu o whume n'anya be.

³² Be kwukwarita n'ehni be, "O nū lele nū bekwnu neerne nū mkpoma aị nga o nookwunu aị oka n'apna, nōkowanu aị okwukwo nsō."

³³ Be lizō ngangam lahna Jeruselem. Be whnū ele sno apna a nri nū otu wam, hne be gbakogwu nū otu nū ele berere.

³⁴ Be naakaa, "O bụ n'ezi, Nyenwe aị hilem n'ẹnwu lizō, o mernu Sajmoni whnū a anya."

³⁵ Badnū lawuru wam kōwanu be nhne mernu n'apna, nū kpa be jiri mahia Nyenwe aị nga o nyawarū bredi.

Jizōsi mernu ele sno apna a whnū a anya

(Mat 28:16-20; Mak 16:14-18; Jon 20:19-23; Ernu 1:6-8)

³⁶ Kpa be zị nookwu oka ka, Jizōsi gwuzoru n'esilawuru be, kanū be, "Udno zīnu anū."

³⁷ Ogwnu tūru be k'agida, be che nū be whnurnu renwu.

³⁸ Jizōsi kanū be, "Kini mernu ogwnu nōotu anū? Kini mernu anū neenwe mkpoma lawuru nū mkpoma anū?"

³⁹ Anū le aka m lawuru nū ochi m lawuru. O bụ mawa. Anū kpatū m aka whnurnu, renwu nwée anō-ehni nū okpukpu, lele kpa anū whnurnu me nwernu."

⁴⁰ Nga o kwuru ka, o gesi be aka a lawuru nū ochi a lawuru.

⁴¹ Be nwée rikne kweru kwnornu ovu oso n'onu nū otun'anya, o sika be, "Anū nwernu wiri o riri hna?"

⁴² Be nyee a otu aznū be siri esi,

⁴³ o gweru a ri nū ruwhnu be.

⁴⁴ O kanū be, "Ka bụ nhne me kannū anū nga me nū anū zị. Kpakara nhne be gbarū n'okwukwo nsō gbasiri m n'iwu Mozizi jeeme, ma ke ele owhnurninya nū Eri Oma."

⁴⁵ O kpume echiche be ma be ghoia nhne be gbarū n'okwukwo nsō.

⁴⁶ O kanū be, "Ka bụ nhne be gbarū n'okwukwo nsō, nū Karaisi jaatariri awghnūwhnu, nū o jeehi n'ẹnwu lizō n'obochi ke eto,

⁴⁷ nū be jeeji rewhna a kpō okwo otuhasna mkpoma nū rime kpakara mba, ma

Chiokike gbarū mmehie be. Be jeehite nū rime Jeruselem panizo nōokpo okwo.

⁴⁸ Anū bụ ele akebe kpakara nhne ka.

⁴⁹ M jeeziyanu anū nhne Nda m kweru nū mkwna, kovu anū daziri nū Jeruselem tem rikne ke hi n'oligwe dnakwasị anū."

Jizōsi larū n'oligwe

(Mak 16:19,20; Ernu 1:9-11)

⁵⁰ Jizōsi duru be whoga zne n'eli Bētani, o chilizo aka lawuru olu, gozi be.

⁵¹ Kpa o zị nōogozị be, be gwelizō a la n'oligwe.

⁵² Be kpōnu a risi ẹli, lahna Jeruselem, snarnima jihia mkpoma be.

⁵³ Be dazigidne n'Ọro Nsō Chiokike nōotunu Chiokike mmamma.

**Izi óma lele kpa
Jóni
gbarù a n'òkwukwo
Nhne gbasìri òkwukwo ka**

Izi óma lele kpa Jóni gbarù a n'òkwukwo gwehíaru Jizòsi iwihne lele Ikwu-Ònu Chiokike, nye “ghòru badnú, va wuru n'èsilawùru aì” (1:14). Lele kpa òkwukwo wam kwuru, be gbarù izi óma ka ma ele badnú kweru nù Jizòsi bù Nye Òznohia wam, Nnwò Chiokike, hite n'òkwnata mkpòma nù rẹwhna a, be nwehíja bùdnu (20:31).

Jóni mernu a mahíja nù Jizòsi bù Ikwu-Ònu Chiokike. Èrnu ndu-èhni Jizòsi gesiri nù ò bù Nye Òznohia wam Chiokike kweru mkwna. Òkwukwo ka gesiri nù agwna ele badnú kweru nù Jizòsi ghò ele sno apna a, kòvu ele berere kwéle nù a, be buru ele neemegidne Jizòsi dù n'ènwu a.

Jóni kwusiri nhne gbasìri nkesi bùdnu kwó okwo rikne hite nù Karaìsi, nookwu nù Jizòsi bù apna, ezi óka nù bùdnu. Nù òkwukwo Jóni, a whnùrnu nù nhne a nòowhnu anya kpakara òbochi lele mini, brèdi, iwihne, nye znù atnùrnu nù atnùrnu a, isisi nù mkpùru a, neegesi nhne ke Enine.

Nhne zì n'òkwukwo ka

Ópanizo (1:1-18)

Jóni Nye Wù Mini nù ele sno apna Jizòsi mbòm (1:19-51)

Èrnu Jizòsi nù óhna (2:1--12:50)

Òbochi ipne-aznù nù rime Jeruselem (13:1--19:42)

Olizò n'ènwu nù òwhuya iwihne Nyenwe aì (20:1-31)

Ò whùyarù iwihne nù Galili (21:1-25)

Nye gbarù òkwukwo ka: Jóni

Risi nhne o kwno gba a: Ma ele badnú kweru nù Jizòsi bù Karaìsi wam, ma hite n'òkwnata mkpòma nù rẹwhna a, be nwehíja bùdnu.

Ikwu-ònu ke ghòru badnú

¹ Nù mbòm hne Ikwu-ònu wam zì, Ikwu-ònu wam nù Chiokike zì nù mbòm, Ikwu-ònu wam bù Chiokike.

² Ya nù Chiokike zì nù mbòm.

³ Be keru kpakara nhne hite n'aka a, ò zá nhne ke be keru hne ò zìla.

⁴ Ikwu-ònu wam bù risi bùdnu, bùdnu wam bù masì iwihne ke badnú.

⁵ Iwihne wam nòomu nù rime òchichiri, òchichiri nwéé rikne nwegidne a.*

⁶ Chiokike ziyaru otu nyerukna rẹwhna a bù Jóni.

* 1:5 nwéé rikne nwegidne a: mòbu nwéé rikne ghòhia a. Ele Izi 3:22

⁷ Jóni varù lele nye akebne ke iwihne wam, ma kpakara ele nùrnu izi a kweru n'iwihne wam.

⁸ Jóni búo iwihne wam, kòvu ò bù nye akebne iwihne wam.

⁹ Ka bù iwihne wam n'èzi bù ke varù n'òwa, ke neenye kpakara ele badnú iwihne.

¹⁰ Ikwu-ònu wam zì n'òwa, ò bù n'èzi nù Chiokike keru ówa hite nù rime a, kòvu ówa máa nye ò bù.

¹¹ Ò vakwnusiri ele ke a, kòvu ele ke a nábnyanya a.

¹² Kòvu kpakara ele nabnanyarnù a, kwerumakò nù rẹwhna a, o nyernu be rikne be buru rùmù Chiokike.

¹³ Be múge ele ka lele kpa be mùrnu ele badnú. Be múge be hite n'èchiche ke badnú, mòbu hite nù nda k'òwa, kòvu Chiokike bù Nda be.

¹⁴ Ikwu-ònu wam ghòru badnú, va wuru n'èsilawùru aì. A whnùrnu igwugwu a, bù igwugwu ke Nnwò Nda a mùrnu kpòì, oru nù ezi óka jìhíaru nù rime a.

¹⁵ Jóni gbarù akebne gbasìri a, siwama, kaa, “Ka bù nye me nookwu óka a nù o snogwu m n'aznú, kòvu ò kakwo m, kwnornu nù ò zì sù be mùrnu m.”

¹⁶ Hite n'oru a zì agída, a nwernu ngozi tùkwasi nù ngozi.

¹⁷ Chiokike hiri n'aka Mozizi nyee iwu, Chiokike nyee masìri oru nù ezi óka hite n'aka Jizòsi Karaìsi.

¹⁸ Ò zá nye whnùleru Chiokike anya. Nnwò Nda a mùrnu kpòì, nye bù Chiokike, nye zì n'akwankò ke Nda a, mernu ele badnú mahíja Nda a.

Jóni karù nù ò búo

Karaìsi

(Mat 3:1-12; Mak 1:1-8; Luk 3:1-18)

¹⁹ Ka bù akebne Jóni gbarù nga ele risi ele Ju zì nù Jeruselem ziznèrnu ele arìohna nù ele Lìvaj be síkwa a, “Ì bù nyele?”

²⁰ Jóni sarù be, ò góla ègo, kòvu o kwusiri a rikne, kaa, “M búla m Karaìsi.”

²¹ Be síkwa a, “Ì bù kò nyele? Ì bù Èlajia sa?”

Jóni kaa, “Óza.”

Be síkwa a, “Ì bù Nye Òwhnurninya wam?”†

Ò sarù be, “Óza.”

²² Be kaa, “Kanù aì nye ì bù, ma a mahíja nhne a jaakanù ele dusiri aì. Kìni bù nhne i kwuru gbasìri èhni i?”

²³ Jóni sarù be,

“M bù m akpìri nye nòokpo okwo n'èli-ìkpa, ‘Anù mekwata apna Nyenwe aì ma ò snìrni asni; lele kpa Azaya nye òwhnurninya kwuru.”

²⁴ Ele izi ele Farisi ziyaru,

† 1:21 Nye Òwhnurninya wam: Gwnù Ditaronomi 18:15; Èrnu

²⁵ sɔkwaru Jóni, “Í búo Karaísi, mɔbu Ẹlajja, mɔbu Nye Ọwhnurninya wam, kíni mernu ì nọowu ele badnu mini?”

²⁶ Jóni saru be, “M ji m mini nọowu ele badnu mini, kọvu otu nyenum gwuzo n’esilawuru anu, nye anu máa.”

²⁷ O snogwu m n’aznu, kọvu m kwésile m ọ tọma eriri okoro-ọchi a.”

²⁸ Kpakara nhne ka mernu nu Ẹtani n’ọbosi ẹhnam ke aznu Osimini Jodani kiyari, hne Jóni nọowu ele badnu mini.

*Jizosi, Nnwọ
Atnurnu Chiokike*

²⁹ N’ekile a, Jóni whnurnu Jizosi hne o naavakwnusi a, ọ kaa, “Anu le, ka bu Nnwọ Atnurnu ke Chiokike, nye noovume mmehie k’owa.”

³⁰ Ka bu nye wam me nookwu ọka nga me karu, “Otu nyenum sno m n’aznu, kọvu ọ kakwo m, kwnornu nu ọ zì sù be murnu m.”

³¹ M máam nye ọ bu, kọvu m nọowu ele badnu mini ma ele Izireli mahija nye ọ bu.”

³² Ka bu akebne Jóni gbaru, “M whnurnu m Enine Nso hi n’oligwe lele nduru dnakwasì a, daziri n’olu a.”

³³ Kọvu nu m máam nye ọ bu. Chiokike nye ziyaru m me wu ele badnu mini kannu m, “Í jọowhnu Enine Nso hi n’oligwe dnakwasì otu badnu dazigidne nu ya, nye wam bu nye jeeji Enine Nso nọowu ele badnu mini.”

³⁴ Me nu iw huru m whnurnu a, gba akebne nu nye ka bu Nnwọ Chiokike.”

*Ele mbom sno
apna Jizosi*

³⁵ N’ekile a, Jóni nu ele sno apna a lawuru gwuzo.

³⁶ Nga ọ whnurnu Jizosi hne o neewhe, ọ kaa, “Anu le Nnwọ Atnurnu ke Chiokike.”

³⁷ Ele sno apna a lawuru wam nurnu a, be snornu Jizosi.

³⁸ Jizosi tujnasnarnu whnu nu be noosno a n’aznu, ọ sika be, “Kini bu nhne anu noopio?”

Be kaa, “Rabai” (ke bu, Nye-zni-nhne), “Ndaa hne i wu?”

³⁹ Jizosi saru be, “Anu va whnurnu.” Ọ bu nhne nu lele ọtnu-ige ke ẹno n’iwhnehnie,[‡] be snornu a zne whnurnu hne o wu, be nu a daziri kpakara ọbochi wam.

⁴⁰ Otu nu rime ele nurnu nhne Jóni kwuru ke snornu Jizosi bu Anduru nwene rukna Sajmoni Pita.

⁴¹ Ngangam, o piohjaru nwene a rukna, Sajmoni, ọ kanu a, “A whnuna m Mezaya” (ke bu Karaísi).

⁴² O kwuznenu Jizosi Sajmoni.

Jizosi legidne Pita anya kaa, “Í bu Sajmoni nnwo Jóni, be jookwu i Kifasi,” be tujnasna a, Pita, ke bu rugwu.

*Jizosi sukwuru Filipu
nu Nataneli*

⁴³ N’ekile a, Jizosi kpebi o zne Galili, o piohja Filipu, ọ kanu a, “Snornu m zne.”

⁴⁴ Filipu, Anduru nu Pita hi nu eli Ẹtesaída.

⁴⁵ Filipu pohja Nataneli, ọ kanu a, “A whnurnu nye wam Mozizi nu ele ọwhnurninya gbaru nhne gbasiri a n’okwukwo nso, Jizosi nye Nazareti, nnwo Josefu.”

⁴⁶ Nataneli sika a, “Eli Nazareti, o nwernu nhne oma ọbula ke jeehi n’eli Nazareti whuya?”

Filipu saru a, “Vaa, whnurnu.”

⁴⁷ Nga Jizosi whnurnu Nataneli naavakwnusi a, o kwu nhne gbasiri a, “Ka bu nye Izireli n’ezi, nye aghigho zila nu rime a.”

⁴⁸ Nataneli sika a, “Nda kpa i jiri mahija m?”

Jizosi saru a, “M whnurnu m ji nu mkpururu isisi figi su Filipu sukwuru i.”

⁴⁹ Nataneli saru a, “Nye-zni-nhne, i bu Nnwọ Chiokike. I bu eze Izireli.”

⁵⁰ Jizosi sika a, “Í kweruru kpọi kwnornu nu m karu m nu m whnurnu m ji nga i zì mkpururu isisi be kwu figi? Í jọowhnu nhne ke kakwo ka.”

⁵¹ Ọ kanu be, “Me kanu anu ezi ọka, anu jọowhnu hne oligwe kpumernu, nu ele enine izi Chiokike neepnezne, neehidna n’olu Nnwọ ke Badnu.”

2

*Jizosi mernu mini
gho manya*

¹ N’ọbochi ke ẹto, ọlulu nnwerne zì n’eli Kana n’eli Galili, nne Jizosi zì masì pi.

² Be sukwuru Jizosi nu ele sno apna a n’ọlulu nnwerne wam.

³ Nga manya be nọonwo kworu, nne Jizosi kanu a, “Be nwema manya.”

⁴ Jizosi saru a, “Ọ gbásìla m, sì nwerinya. Ige m yóoduge.”

⁵ Nne a kanu ele neezne izi, “Anu mee nhne ọbula ọ karu anu mee.”

⁶ Idudu mini isunu gwuzo ndundu be jiri rugwu kpu, ke ele Ju ji nọosnu nhne lele kpa omen’eli be jiri ziri, ke otu jeeri nri lawuru mọbu nri ẹto galoni mini.

⁷ Jizosi kanu ele neezne izi, “Anu gbajite be nu mini.” Be gbaji be mini du n’onu be.

⁸ Ọ kanu be, “Anu kwuhja agwna mini wam gweznenu nye risi ngadna iriri.”

Be gweznenu a.

⁹ O detu mini wam ke ghoru manya riro. O máa hne manya wam hi, kọvu ele neezne izi ele gbaru mini wam magwu. O sukwu nye nọolu nnwerne,

¹⁰ ọ kanu a, “Nye ọbula neekesi manya kakpa mma n’oziri, nga ele izne nwọkparu

[‡] 1:39 Ọtnu-ige ke ẹno n’iwhnehnie: ọkwukwo ke mbom kwuru ige nri awa

manya, o ke manya ojo. Kòvu ì òbitaru manya kaka mma dù kítina.”

¹¹ Ka bú ẹ̀rnu ndu-ẹ̀hni mbòm Jizòsi rnùrnu. Ọ rnùrnu a nù Kana n'ẹ̀li Galili, o gesi igwugwu a, ele sno apna a kwnata a mkpòma.

¹² Nga ka whemernu, Jizòsi nù nne a, nù rùmu nne a, nù ele sno apna a zne Kapanòm, be dazìri pìi ọ̀bochi ele nù ele.

*Nhne Jizòsi mernu
n'Oro Nso Chiokike*

(Mat 21:12,13; Mak 11:15-17; Luk 19:45,46)

¹³ Iriri Ọgawhe ele Ju zì ndùndu, Jizòsi zne Jeruselem.

¹⁴ Ọ whnùrnu ele neere atnùrnu nù ehni nù nduru nù ele naagbanwo ìwai dazìgwu n'ìkpechi n'Oro Nso Chiokike.

¹⁵ O gweru eriri mee mbìmbini, chíhala kpakara be, ma ehni ma atnùrnu. O kpute ikpechi kpakara ele naagbanwo ìwai ruwhnu n'ẹ̀li, chísakwo ìwai be.

¹⁶ Ọ kanù ele neere nduru, “Anù whọga hna, anù méma ọ̀ro Nda m ọ̀ro ahia.”

¹⁷ Ele sno apna a chenwanya nhne be gbarù n'òkwukwo nsò, “Nhne gbasìri Ọro Nso Chiokike neerne lele bẹ̀kwu nù rime m.”

¹⁸ Ele Ju sika a, “Ndaa ẹ̀rnu ndu-ẹ̀hni ke ì jòornu ke neegesi nù ì nwernu rikne mee nhne ì neeme?”

¹⁹ Jizòsi sarù be, “Anù kwnadna Ọro Nso ka, m joowulizò a n'ọ̀bochi ẹ̀to dai.”

²⁰ Ele Ju sarù a, “Be jiri nri awha ẹ̀no nù isunu wu Ọro Nso ka, ì joowu a n'ọ̀bochi ẹ̀to?”

²¹ Kòvu Jizòsi kwuru ọ̀ka gbasìri ẹ̀hni a lele Ọro Nso Chiokike.

²² Nga Jizòsi hiri n'ẹ̀nwu lizò, ele sno apna a chenwanya nù o kwuru ọ̀ka ka, be kweru nhne ọ̀kwukwo nsò kwuru nù nhne Jizòsi kwuru.

²³ Kpa Jizòsi zì nù Jeruselem nù Iriri Ọgawhe, agida ele badnù kweru nù ya kpa be whnùrnu agida ẹ̀rnu ndu-ẹ̀hni o nọ̀ornu.

²⁴ Kòvu Jizòsi kwéle o nyee be ẹ̀hni a, kwnornu nù o magwù kpakara badnù nkari nkari.

²⁵ Ọ zila mkpa nù be kanù a nhne gbasìri nye ọ̀bula, kwnornu nù o magwù nhne zì nù mkpòma be.

3

Jizòsi nù Nikodimòsi

¹ Otu nwerukna be kwu Nikodimòsi, otu nù rime ele Farisi, nye risi ele Ju,

² vakwnusiri Jizòsi n'abalì. Ọ kaa, “Rabaj, a magwù nù ì bú Nye-zni-nhne ke Chiokike ziyaru, kwnornu nù o zá nye jòornuli ẹ̀rnu ndu-ẹ̀hni ì nọ̀ornu okwolem ma Chiokike dagwunu a.”

³ Jizòsi sarù, “Me kanù ì ezi ọ̀ka, o zá nye joowhnu n'ẹ̀li-eze Chiokike anya, o búru nù be múgele a berere.”*

⁴ Nikodimòsi sika a, “Ndaa kpa be jòomu badnù berere nga o mernu okno badnù? Ọ jaabna nù ruwho nne a berere, be mú a?”

⁵ Jizòsi sarù a, “Me kanù ì ezi ọ̀ka, o zá nye jaabna n'ẹ̀li-eze Chiokike o búru nù be múgele a hite nù mini nù Enine.

⁶ Nye ke badnù etekne murnu bú anọ-ẹ̀hni, nye Enine murnu bú enine.

⁷ Ọ gbágwójì ì anya nù m karù m nù be joomuriri anù berere.

⁸ Ruwhere neewhe hne o masigwu a, ì nọ̀onu imerne a, kòvu ì máa hne o hí mọ̀bu hne o neezne. Nye ọ̀bula ke be murnu hite n'Enine nù kpm.”

⁹ Nikodimòsi sika a, “Ndaa kpa be jeeme nhne nù kpa?”

¹⁰ Jizòsi sarù a, “Ì bú nye-zni-nhne n'ẹ̀li Izireli, kòvu ì máa nhne ka.

¹¹ Me kanù ì ezi ọ̀ka, a nookwu nhne a magwù, a naagba akebne nhne ke a whnùrnu, kòvu anù kwé o nahọru akebne aì.

¹² Anù kwé nhne me kwuru gbasìri nhne k'owa. Ndaa kpa anù jeekweru o búru me kanù anù nhne k'oligwe?

¹³ Ọ zá badnù ọ̀bula ke znernu oligwe nù mbòm, okwolem Nnwò ke Badnù nye hiri n'oligwe hiedna.

¹⁴ Lele kpa Mozizi gwelizòru agwò n'olu isisi n'ẹ̀li chna chna chna, o bú kpa be jeegwelizò Nnwò ke Badnù olu,

¹⁵ ma nye ọ̀bula ke kweru nù ya jeenwe búdnù kwó okwo.

¹⁶ Kwnornu nù Chiokike whnùrnu owa n'anya kpa, o gweru Nnwò o murnu ya nù nsnunu a kpò nyega, ma nye ọ̀bula ke kweru nù ya jónwu ẹ̀nwu, kòvu o jeenwe búdnù kwó okwo.

¹⁷ Kwnornu nù Chiokike zíyage Nnwò a n'owa o búru nye kpe k'owa, kòvu ma o búru Nye Oznohia k'owa.

¹⁸ Be jéekpe nye ọ̀bula ke kweru nù Nnwò wam ikpe, kòvu nye ọ̀bula ke kwége bú nye be kperu ikpe, kwnornu nù o kwége nù Nnwò Chiokike murnu ya nù nsnunu a.

¹⁹ Ka bú ikpe wam be kperu owa, iwihne varù n'owa, ele badnù whnùrnu ọ̀chichiri n'anya karù iwihne, kwnornu nù be nọ̀ornu ẹ̀rnu ojo.

²⁰ Nye ọ̀bula ke nọ̀ornu ẹ̀rnu ojo bú nye irno ke iwihne, o jáava nù rime iwihne o zì iwihne kpume ẹ̀rnu ojo a.

²¹ Kòvu nye ọ̀bula ke nọ̀ornu ẹ̀rnu owa jaava nù rime iwihne ma iwihne gesi nù ẹ̀rnu a bú nhne o rnùrnu hite nù Chiokike.”

*Jizòsi nù Jóni
Nye Wù Mini*

* 3:3 be múgele a berere: mọ̀bu be múgele a hite n'oligwe.

²² Nga ka mekworu, Jizòsi nù ele sno apna a zneru n'èli Judiya, ya nù be dazìri ige matì, ò wù ele badnù mini.

²³ Jóni masì zì nòowu mini n'Enòni ke zì Salìm ndundu, kwnornu nù agìda mini zì pìi. Ele badnù neeznekwnusi a, ò nòowu be mini.

²⁴ (Be yéeyisige Jóni n'òro ikelu n'ige ka.)

²⁵ Agwna ele sno apna Jóni nù otu nye Ju nòdogbuta nhne gbasìri òsnusnu nhne lele kpa omen'èli ele Ju jiri ziri.

²⁶ Be vakwnusi Jóni kanù a, “Nye-zni-nhne, nwerukna wam jì nù a zì n'aznù Osimini Jòdani kíyari, nye ì gbarù akebbe gbasìri a, ò nòowu ele badnù mini, agìda ele badnù neeznekwnusi a.”

²⁷ Jóni sarù be, “Ò zá nye òbula ke jeenwe nhne ke Chiokike késile a.

²⁸ Anù bù ele akebbe m nù m karù m, ‘M búo m Karaìsi, kòvu be beru òsno ziya m nù ruwhnu a.’

²⁹ Nye nòolu nnwerne ikne bù nye nwe nnwerne ikne, kòvu enyi nye noolu nnwerne ikne, nye noogwuzo noobno nsni, mkpòma nòoso a n'ònu nù ò nurnu nkòli nye wam nòolu nnwerne ikne. Ò bù kpa snarnìma m jiri zu owu kítna.

³⁰ Ò jaazì naaba aba, kpa me jaazì naaya èli èli.”

Nye ke hiri n'oligwe va

³¹ Nye wam ke hiri n'oligwe va kakwo kpakara badnù, nye hi n'òwa bù nye ke òwa, ò nookwu nhne ke òwa. Nye hiri n'oligwe kakwo kpakara badnù.

³² Ò nookwu nhne ò whnurnu nù nhne ò nurnu, kòvu ò zá nye neekweru izi a.

³³ Nye òbula ke jeegweru izi a naakahìa nù Chiokike bù nye ezi òka.

³⁴ Nye Chiokike ziyaru nookwu ikwu-ònu Chiokike, kwnornu nù Chiokike nyéne a Enine a n'apna zì matì.

³⁵ Nda whnurnu Nnwò a n'anya, gweru kpakara nhne yisi n'aka a.

³⁶ Nye òbula ke kweru nù Nnwò wam nwernu búdnù kwò okwo, nye òbula ke zá noobnonu Nnwò wam nsni, jéenne búdnù, kòvu ovu owe èhni Chiokike jaazì nù risi a òkwunokwunu.

4

Jizòsi nù nwerinya Sameria

¹ Ele Farisi nurnu nù Jizòsi neewehìa ele sno apna a, nòowu be mini karù Jóni,

² ò bù n'èzi nù Jizòsi wùge ele badnù mini, kwolem ele sno apna a.

³ Nga Jizòsi nurnu a, ò whùya nù Judiya naalahna Galìli.

⁴ Ò zì mkpa nù ò jaagawhe n'esilawuru èli Sameria.

⁵ Ò vadu n'otu èli-òhna Sameria be kwu Saìka, ke zì ndundu otu èli Jekòpu nyernu nnwò a rukna Josefu.

⁶ Òmi Jekòpu zì pìi. Inwe gwuru Jizòsi kwnornu nù izne wam, ò dazìri èli nù ngeri òmi wam n'iwnehnie.*

⁷ Otu nwerinya Sameria varù ò tũru mini n'òmi, Jizòsi kanù a, “Kesi m mini.”

⁸ (Ele sno apna a zneru nù rime èli-òhna ò zù wiri.)

⁹ Nwerinya Sameria wam kanù a, “Ì bù nye Ju, m bù m nye Sameria, ndaa kpa ì nòorio m mini?” (Ele Ju nù ele Sameria mèkòta nhne.)

¹⁰ Jizòsi sarù a, “Ò búru nù ì magwu nkesi Chiokike, nù nye ke nòorio ì mini, ì jòorio a ma ò kesi ì mini ke búdnù.”

¹¹ Nwerinya wam kaa, “Nda-aj-kwu, ì nwéé nhne ì jeji nòotu mini, òmi ka miri emi k'agìda, ndaa hne ì jeegwehìa mini búdnù ka.

¹² Ì kakwo nda aj Jekòpu nye nyernu aj òmi ka, ò nwòrnù mini hi nù rime a, ma rùmu a, ma rùmu anòhia a?”

¹³ Jizòsi sarù a, “Nye òbula ke jòonwo mini ke hi n'òmi ka, akpìri jòokpo a bèkwnu berere,

¹⁴ kòvu nye òbula ke jòonwo mini ke me jeenye a, akpìri jòokpo a bèkwnu berere. Mini ke me jeenye a jòoghò risi mini ke jaagba dù búdnù kwò okwo.”

¹⁵ Nwerinya wam kaa, “Nda-aj-kwu, kesi m mini ka ma akpìri gharù ò kpò m bèkwnu, ma m gharù m ò va ò tũ mini n'òmi ka.”

¹⁶ Jizòsi kanù a, “Zne, sukwu nzi ì, va hna.”

¹⁷ Nwerinya wam kaa, “M nwéé m nzi.”

Jizòsi kanù a, “Ì kwukwaru nkari nù ì nwéé nzi,

¹⁸ kwnornu nù ì gbòlam nzi isne, nye ke jì nù a wu kítna búo nzi ì. Ì kwuru ezi òka nù ì nwéé nzi.”

¹⁹ Nwerinya wam kaa, “Nda aj-kwu, m whnurnu nù ì bù nye òwhnurninya.

²⁰ Ele nda aj kpòru risi èli n'òlu rugwu ka, kòvu anù ele Ju karù nù hne be kwesiri ò kpò risi èli bù nù Jeruselem.”

²¹ Jizòsi kanù a, “Nwerinya, kweru nhne me naakanù ì, ige vawa nga ele badnù jòokponu Nda risi èli n'òlu rugwu ka mòbu nù Jeruselem.

²² Anù ele Sameria máa nye anù nòokponu risi èli, aj ele Ju magwu nye a nòokponu risi èli, kwnornu nù òznòhia hi n'aka ele Ju va.

²³ Kòvu ige vawa, owe, ige wam valèm masì, nga ele nòokponu Nda risi n'èli n'èzi jòokponu a risi èli n'enine nù n'èzi òka. Ka bù ele Nda pioru kpònu a risi èli.

²⁴ Chiokike bù enine, ele nòokponu a risi èli jòokporirine a risi èli n'enine nù n'èzi òka.”

* 4:6 n'iwnehnie: òkwukwo ke mbòm kwuru òtmu-ige ke isuru

²⁵ Nwerinya wam kanụ a, “M maam nù Mezaya, nye be kwu Karaịsi, jaava. Nga ọ varụ, ọ jaakanụ aị kpakara nhne.”

²⁶ Jizọsi kanụ a, “Me nye nookwunu ị ọka, bụ ya.”

²⁷ Ige wam ele sno apna Jizọsi hiehna, o jiri be anya nù ya nù nyerinya nookwurita ọka. Kọvu ọ zá nye sịkwaru, “Kini bụ nhne i noopio?” mọbu, “Kini mernu i nookwunu nwerinya ka ọka?”

²⁸ Nwerinya wam sigbasi idudu mini a, lahna nù rime ẹli-ọhna, kanụ ele badnụ.

²⁹ “Anụ va whnurnu nwerukna ke kannụ m kpakara nhne me mernu. Nye ka ọ jọoburu Karaịsi sa?”

³⁰ Be gbahala nù rime ẹli-ọhna znekwnusi Jizọsi.

³¹ Kọvu ele sno apna a zị naariaso Jizọsi, kaa, “Nye-zni-nhne, ri wiri.”

³² Jizọsi kanụ be, “M nwernu m wiri ke anụ máa.”

³³ Ele sno apna a n̄esikwarita ẹhni be, “O nwernu nye gweyannụ a wiri sa?”

³⁴ Jizọsi kanụ be, “Wiri m bụ ọ bita echiche nye ziyaru m nù ọ rñkpa ẹrnu o nyernu m.

³⁵ Anụ naakaa, ‘O gwarnarñ ẹnwa ẹno, anụ gwe nhne n’ekwu.’ Kọvu me kanụ anụ, anụ le anya n’ekwu, mkpuru chnanam ma be ghọru nhne n’ekwu.

³⁶ Nye neegwe nhne n’ekwu nwernu ọgwo ẹrnu, ọ chibna ele badnụ lele mkpuru ma be nwehia bũdnu kwó okwo. Kpam, nye ke kparụ mkpuru nù nye ke gweru nhne n’ekwu jeenwekọta snarnjma.

³⁷ Nhne be kwuru bụ ezi ọka, ‘Otu badnụ kpasiri mkpuru, nye berere ghọru mkpuru.’

³⁸ M ziznernu m anụ ghọru mkpuru n’ekwu ke anụ rñuge ẹrnu nù rime a. Ele berere rñurnu ẹrnu, anụ nwehia mbnarna n’ẹrnu be.”

³⁹ Agida ele Sameria ele wu nù rime ẹli-ọhna wam kweru nù Jizọsi kwnornu nù nhne nwerinya wam kwuru, “O kanụ m kpakara nhne me mernu.”

⁴⁰ Nga ele Sameria vakwnusiri a, be riasno a ma ya nù be daziri, Jizọsi daziri pị ọbochi lawuru.

⁴¹ Agida ele berere kweru kwnornu nù izi oma o zirnri be.

⁴² Be kanụ nwerinya wam, “A kweru kịtna, ọ búo nù nhne i kannụ aị, kọvu kwnornu nù a nurnu nhne o kwuru, a magwụ nù nye ka bụ Nye Ọznohia ke ọwa n’ezi.”

*Jizọsi gwọru nwo
rukna nye risi*

⁴³ Nga ọbochi lawuru wam whemernu, ọ whọga pị zne Galili.

⁴⁴ Jizọsi n’iwuhuru a karụ, “Nye ọwhurninya nwée igwugwu n’ẹli a.”

⁴⁵ Nga ọ vaduru ẹli Galili, ele zị nù Galili naakweru a kwnornu nù be zernu Iriri Ọgawhe nù Jeruselem, be whnurnu kpakara nhne o mernu n’Iriri Ọgawhe wam.

⁴⁶ Jizọsi lahna nù Kana ke Galili hne o mernu mini ghọ manya. Otu nye risi ọchichi ke nnwọ a rukna zị n’ẹhni igbugbu nù Kapanom.

⁴⁷ Nga ọ nurnu nù Jizọsi hiri nù Judiya va Galili, o znekwnusi a, kanụ a, ọ va gwọ nnwọ a rukna ẹhni igbugbu, nye zị n’ọnu ẹnwu.

⁴⁸ Jizọsi kanụ a, “Anụ jéekweru kwekọlam ma anụ whnurnu ẹrnu ndu-ẹhni nù ẹrnu rikne.”

⁴⁹ Nwerukna wam kaa, “Nda-ai-kwu, snornu m zne, ọ zị nnwọ m nwụ.”

⁵⁰ Jizọsi kanụ a, “La, nnwọ ị rukna zị bũdnu.”

Nwerukna wam kweru nhne Jizọsi kanụ a, la.

⁵¹ Nga ọ zị n’apna, ele izi a kwnusi a, kanụ a, “Nnwọ ị rukna zị bũdnu.”

⁵² O sịkwa be ige ẹhni bũru nnwọ a rukna oma, be kanụ a, “N’otnu-ige ke mbom n’iwnehnie† n’ekile wheru ewhe, ẹhni orne bẹkwu wam sigbasiri a.”

⁵³ Nda nnwọ wam chenwanya nù ọ bụ ige wam Jizọsi kannụ a, “Nnwọ ị rukna zị bũdnu.” Kam kpararụ, ya nù kpakara ele ọro a kweru.

⁵⁴ Ka bụ ẹrnu ndu-ẹhni ke ẹbo Jizọsi rñurnu nga o hiri nù Judiya va Galili.

5

Ogwugwo n’Olulu Mini

Betisaida

¹ Nga ka whemernu, Jizọsi znernu iriri ele Ju nù Jeruselem.

² Otu olulu mini zị ngeri Ọnu-Mgbo Aturnu nù Jeruselem ke nwernu mgbe-mgbe ọro isne, ke ele Hiburu nookwu Betizata.

³ Agida ele nrịria naadnanyị nù ngeri a, ele isni, nù ele mgworo, nù ele ngeri ẹhni be dọnwurnu ọdonwu. [Be zị neese ma be gbarụ mini wam.

⁴ Kwnornu nù enine izi Nyenwe aị neehiedna hite n’ige dụ n’ige gbarụ mini wam. Nye nrịria ọbula ke beru ọsno dnabna nù rime mini wam nga enine izi gbarụkparu a, ẹhni a jọoburu oma hite nù nrịria ọbula ọ naaria.]

⁵ Otu nwerukna ke naarija nrịria nri awha ẹto nù ẹsato zị pị.

⁶ Nga Jizọsi whnurnu a hne ọ dnanyị, ọ mahjaru nù ọ zị nù nrịria gbu ọkwu, ọ sịkwa a, “I pioru be gwọ ị nrịria ị?”

⁷ Nye nrịria wam saru a, “Nda-ai-kwu, m nwée m nye jeeyisi m nù rime olulu mini

† 4:52 Otnu-ige ke mbom n’iwnehnie: ọkwukwo ke mbom kwuru ige awa ke ẹsau

nga be gbaruru mini, kpa me neezne, nye berere beru m ọsno dnabna.”

⁸ Jizọsi kanu a, “Lizọ, chiri etere i, zne izne.”

⁹ Ngangam, be gwọru nwerukna wam. O chiri etere a, zne izne.

Nhne ka mernu n'Obochi Ozukwa Inwe.

¹⁰ Ka mernu ele Ju kanu nwerukna wam Jizọsi gwọru nriria, “Tna bu Obochi Ozukwa Inwe, o megidnerneru n'iwu nu i nẹchiri etere i.”

¹¹ Nwerukna wam saru be, “Nwerukna ke gwọru m nriria kannu m, 'Chiri etere i, zne izne.’”

¹² Be sika a, “Nyele bu nye ke karu ji chiri etere i zne izne?”

¹³ Kọvu nu nwerukna wam be gwọru ma naye Jizọsi bu, kwnornu nu Jizọsi bnanam n'esilawuru igbudu badnu wam whoga.

¹⁴ Omekwo, Jizọsi piohuru a n'Oro Nso Chiokike, o kanu a, “Le, be gwọru i nriria i, i me ma mmehie, o zi nhne ojo ke kakwo ka dnakwasị i.”

¹⁵ Nwerukna wam whoga kanu ele risi ele Ju nu o bu Jizọsi gwọru a nriria a.

Budnu hi nu Nnwọ

Chiokike

¹⁶ Ele Ju bete o mekpa Jizọsi ehni kwnornu nu o gwọru nriria n'Obochi Ozukwa Inwe.

¹⁷ Jizọsi kanu be, “Nda m nọornu ọnu kpakara ige, o bu masi kpa me nọornu.”

¹⁸ Ikwu-ọnu ka mernu ele risi ele Ju ovu owe ehni k'agida, be noopiosi rikne o gbu Jizọsi, o buo nu o luluru Obochi Ozukwa Inwe be kpọi, kọvu nu o karu nu Chiokike bu Nda a, naakaa nu ya nu Chiokike hna n'otu.

¹⁹ Jizọsi kanu be, “Me kanu ezi oka, o za nhne ke Nnwọ nwernu rikne o mee n'ehni a, kọvu o neeme nhne o whuru Nda a neeme. Kwnornu nu Nnwọ nọornu nhne Nda a nọornu.”

²⁰ Nda whuru Nnwọ a n'anya, neegesi a kpakara nhne o neeme. O jeegesi a nhne ke kakwo ka ke jaagbagwoji anu anya.

²¹ Lele kpa Nda neeme ele nwuru ọnu hi n'enwu lizo, nyee be budnu, o bu masi kpa Nnwọ neenye ele masiri a budnu.

²² Nda za neekpe nye obula ikpe, kọvu o yisiri kpakara ikpe n'aka Nnwọ a.

²³ ma kpakara ele badnu sobisinu Nnwọ a lele kpa be nọsobisinu Nda. Nye obula ke za nọsobisinu Nnwọ, za nọsobisinu Nda nye ziyaru a.

²⁴ “Me kanu anu ezi oka, nye obula ke nọonu ikwu-ọnu m kweru nu nye wam ke ziyaru m, nwernu budnu kwó okwo. Be jáama a ikpe, kọvu o hilem n'enwu whe nu budnu.”

²⁵ Me kanu anu ezi oka, ige wawa, ige wam valẹm masi, nga ele nwuru ọnu jọnu nkọli ke Nnwọ Chiokike, ele nuru a jaazi budnu.

²⁶ Kwnornu lele kpa Nda nwernu budnu nu rime a, o bu masi kpa o mernu Nnwọ nwernu budnu nu rime a.

²⁷ O nyernu Nnwọ rikne o kpe ikpe, kwnornu nu o bu Nnwọ ke Badnu.

²⁸ “O gbáwoji anu anya nu ige wawa, nga ele zi n'ilili jọnu nkọli a,

²⁹ be jeehi n'ilili lizo, ele mernu mma jeelizọ n'enwu ziri budnu, ele mmehie jeelizọ n'enwu buru ele be jaama ikpe.

³⁰ “M nwée m rikne mee nhne obula nu rikne ke aka m. M neekpe ikpe kpa Nda m kannu m me kpe. Ka neegesi nu ikpe m zi snam, kwnornu nu m za neeme nhne me pioru, kọvu kwekọlam nhne nye ziyaru m pioru.”

Akebne gbasiri Jizọsi

³¹ “O buru nu me naagbanu ehni m akebne, akebne m buo ezi.

³² Kọvu o zi nye naagbanu m akebne, m magwu m nu akebne a zi kwem.

³³ Anu ziznerneru ele izi znekwnusi Jóni, o kwuru nhne gbasiri ezi oka.

³⁴ Ka za neegesi nu m neegweru akebne ke badnu, m nookwu nhne ka ma anu nwehia ọznobia.

³⁵ Jóni nu lele tonji ke noonwu, nọomuke, anu kpebiri o nwudna ige matị n'iwhe a.

³⁶ “M nwernu m nhne akebne ke kakwo akebne Jóni gbaru. M nọornu ọnu ke Nda m nyernu m, ọnu wam naagbanu m akebne, neegesi nu Nda m ziyaru m.”

³⁷ Nda m nye ziyaru m naagbanu m akebne. Anu nulele nkọli a mọbu whnu ruwhnu a.

³⁸ Anu za naabita ikwu-ọnu a nu mkpoma anu, kwnornu nu anu kwéle nu nye wam o ziyaru.

³⁹ Anu tusa ehni nyosna nhne be gbaru n'okwukwo nso anu, anu neechu nu anu jeenwe budnu kwó okwo hite nu nye be gbaru nu rime a, be naagbanu m akebne.

⁴⁰ Kọvu anu kwé o vakwnusi m, ma anu nwehia budnu kwó okwo.

⁴¹ “M za m nanarnu ọznarni hite n'aka badnu.”

⁴² M magwu m anu, anu nwée ọwhnun'anya Chiokike nu mkpoma anu.

⁴³ M ji m rewhna Nda m va, anu kwéle m, kọvu o buru nu nye berere jiri rewhna a va, anu jeegweru a.

⁴⁴ Ndaa kpa anu jeekwe, hne anu noopio ọznarni ke badnu, kọvu anu nwée rikne pio ọznarni ke hi n'aka nye ke bu Chiokike kpọi va.

⁴⁵ “Anu chékọ nu m joobno anu nhne nu ruwhnu Nda m. Kọvu o bu Mozizi nye anu kwnataru mkpoma, joobno anu nhne.”

⁴⁶ O buru nu anu kweruru Mozizi n'ezị, anu jeekweru m, kwnornu nu o gbaru nhne gbasiri m.

47 Kõvu hne anu kwége nhne Mozizi gbaru n'ókukwo nsò, ndaa kpa anu jeekweru nhne me nookwu?"

6

Jizõsi nyernu pokwu badnu isne wiri

(Mat 14:13-21; Mak 6:30-44; Luk 9:10-17)

1 Nga ka mekworu, Jizõsi whe aznu Osimini Galili (ka bu Osimini Taberasi).

2 Agida ele badnu snornu a, kwnornu nu be whnurnu ernu ndu-ehni o rnurnu, nga o gworu ele nriria.

3 Jizõsi pnezne n'olu rugwu daziri eli, ya nu ele sno apna a.

4 Ige Iriri Ogawhe ele Ju zi ndundu.

5 Nga Jizõsi lehnataru anya whnu agida ele badnu naavakwnusi a, o kanu Filipu, "Ndaa hne a joozuwa wiri a jeenye igbudu ele ka?"

6 Ka bu ma o kpa Filipu iru, kwnornu nu o magwu nhne o jeeme.

7 Filipu saru a, "O buru nu a zu bredi riwhu mkpuru iwai lawuru, o jeezu ma nye obula ri matj matj."

8 Otu nu rime ele sno apna a, Anduru, nwere rukna Saimoni Pita, kaa,

9 "Otu wikoro matj zi hna nye ji ike bredi balj* isne nu aznu matj matj lawuru. O za nhne kam bu n'esilawuru igbudu ele badnu ka."

10 Jizõsi kanu be, "Anu kanu be daziri eli." Agida achara zi pii. Kpakara ele badnu wam daziri eli, be hna lele pokwu ele rukna isne.

11 Jizõsi gweru bredi wam, tu mmamma, nee kpakara ele wam dazigwu eli. O gweru aznu wam mee kwno kpm. Be ri, riji ruwho be.

12 Nga be rikworu, Jizõsi kanu ele sno apna a, "Anu tutukota kpakara ruvnuruvnu ke gwnarnu, o za ke whu."

13 Be tutukota kpakara ruvnuruvnu a, ke jiri nri nu nkita lawuru hite n'ike bredi balj isne wam ke ele badnu riri.

14 Ele zi nga Jizõsi rnurnu ernu ndu-ehni ka karu, "N'ezi oka, ka bu nye owhurninya wam ke jaava n'owa."

15 Nga Jizõsi whnuru nu be noopio o chni a eze nu rikne, o hi n'esilawuru be whoga, ya nu nsnunu a zne n'olu rugwu.

Jizõsi znernu izne n'olu mini

(Mat 14:22,33; Mak 6:45-52)

16 N'ogbednachi, ele sno apna a zne osimini.

17 Be bna n'ogbo neewhe aznu osimini kiyari neezne Kapanom. Jizõsi yaavage hne be zi tem du n'abali.

18 Okne ruwhere nu abaka-mini neewhe n'olu mini.

19 Ele sno apna a kwõ ogbo nhne nu lele maili eto mõbu eno nga be whnurnu Jizõsi naavakwnusi be, neezne izne n'olu mini. Be tu ogwnu k'agida.

20 Kõvu Jizõsi kanu be, "Anu tuku ogwnu, o bu mawa."

21 Be kweru a, o bnakwnusi be nu rime ogbo, ngangam ogbo be du n'eli wam be neezne.

Ele badnu noopio Jizõsi

22 N'ekile a, agida ele badnu ele zi n'aznu osimini kiyari mahiaru nu otu ogbo matj zi pii whogalam vuru ele sno apna Jizõsi kpoi. Jizõsi snõge be.

23 Ogbo ele ke berere hiri nu Taberasi ya nu ngeri hne ele badnu wam riri bredi, nga Nyenwe a tũkparu mmamma.

24 Nga ele badnu wam whnurnu nu Jizõsi zila pii, ma ele sno apna a, be bna n'ogbo wam zne Kapanom noopio Jizõsi.

Jizõsi bu Wiri ke Budnu

25 Nga ele badnu wam whnurnu a n'aznu osimini kiyari, be sikwa a, "Nye-zni-nhne, ndaa nga i varu hna?"

26 Jizõsi saru be, "Me kanu anu ezi oka, anu noopio m kwnornu nu anu rijiri ruwho nu bredi me nyernu anu, o buo kwnornu nu anu whnurnu ernu ndu-ehni.

27 Anu dogbu ehni anu n'ernu kwnornu nu wiri ke nooro oro, tũnuma, anu dogbu ehni anu n'ernu kwnornu nu wiri ke jaazi tem du budnu kwõ okwo, ke Nnwõ ke Badnu neenye anu. Ya bu nye Chiokike nyernu rikne o mee kpm."

28 Be sikwa Jizõsi, "Kini bu nhne a jeeme ma a rnu ernu Chiokike?"

29 Jizõsi saru be, "Ka bu ernu Chiokike, anu kweru nu nye wam o ziyaru."

30 Be sikwa a, "Kini bu ernu ndu-ehni i jeeji gesi ma a whnurnu, kweru? Kini bu nhne i jeeme?"

31 Ele nda a oknani riri mana n'eli chna chna chna, lele kpa okukwo nsõ kwuru, 'O nyernu be bredi ke hi n'oligwe va, be ri.'

32 Jizõsi kanu be, "Me kanu anu ezi oka, o buo Mozisi nyernu anu bredi ke hi n'oligwe va, kovu Nda m neenye anu ezi bredi ke hi n'oligwe va.

33 Kwnornu nu bredi ke Chiokike neenye bu nye wam ke hi n'oligwe va, bu nye neenye ele owa budnu."

34 Be kaa, "Nda-a-kwu, neenye a bredi ka kpakara ige."

35 Jizõsi kanu be, "Mawa bu bredi ke neenye budnu, nye vakwnusiri m, wiri jõogwnu a rja rja, nye kweru nu me, akpiri jõokpo a bekwnu rja rja.

36 M karu m, anu whnurnu m, kovu anu kwége.

* 6:9 balj Ka bu ikpa be ji neeme bredi.

³⁷ Nye obula ke Nda m nyernu m jaavakwnusi m, m jáachihala a rja rja.

³⁸ Kwnornu nu m hiri m n'oligwe hiedna mee echiche nye ziyaru m, o buo o mee echiche m.

³⁹ Ka bu echiche nye ziyaru m, me tuwhu nye obula ke o nyernu m, kovu me mee ma be hi n'enwu lizo n'obochi ipne-aznu.

⁴⁰ Kwnornu nu ka bu nhne Nda m noopio, nye obula ke jowhnu Nnwọ wam, kweru nu a, jeenwe budnu kwó okwo, m jeeme nye wam hi n'enwu lizo n'obochi ipne-aznu."

⁴¹ Ele Ju bete o takpo megidne a, kwnornu nu o karu, "Mawa bu Brędi ke hiednarnu n'oligwe."

⁴² Be kaa, "Nye ka o buo Jizosi nnwo Josefu? A magwu nda a nu nne a, ndaa kpa o naakaa nu o hi n'oligwe hiedna?"

⁴³ Jizosi kanu be, "Anu takpoma n'esilawuru ehni anu.

⁴⁴ O za nye jaavakwnusi m okwolem ma Nda m nye ziyaru m jodoru a vakwnusi m, m jeeme o lizo n'enwu n'obochi ipne-aznu.

⁴⁵ Ele owhnurninya gbaru a n'okwukwo nsọ, 'Chiokike jeezni kpakara ele badnu nhne.' Nye obula ke bnoteru Nda nsni mphia nhne n'aka a, jaavakwnusi m.

⁴⁶ O za nye obula ke whnuleru Nda anya nu mbom, kwekolam nye wam ke hi hne Chiokike zi whnurnu Nda anya.

⁴⁷ Me kanu anu ezi oka, nye obula ke kweru nwernu budnu kwó okwo.

⁴⁸ Mawa bu wiri ke budnu.

⁴⁹ Ele nda anu oknani riri mana n'eli chna chna chna, be nwu.

⁵⁰ Kovu wiri ke hi n'oligwe hiedna, nye obula ke riri a, jonwu enwu.

⁵¹ Mawa bu wiri ke zi budnu ke hi n'oligwe hiedna. O buru nu badnu obula ri wiri ka, o jaazi budnu tim tom. Anọ-ehni m bu wiri ke me jeenye owa ma be ziri budnu."

⁵² Ka kpayaru odogbuta whuyaru n'esilawuru ele Ju. Be kaa, "Nwerukna ka, o jeenye ai anọ-ehni a ma a ri?"

⁵³ Jizosi kanu be, "Me kanu anu ezi oka, okwolem ma anu riri anọ-ehni ke Nnwọ ke Badnu, nwọ onarna a, anu jeenwe budnu nu rime anu.

⁵⁴ Nye obula ke jeeri anọ-ehni m, nwọ masi onarna m nwernu budnu kwó okwo.

⁵⁵ Kwnornu nu anọ-ehni m bu wiri n'ezi, onarna m bu masi nhne be nwọ onwo n'ezi.

⁵⁶ Nye obula ke jeeri anọ-ehni m, nwọ onarna m, wu nu rime m, m wu masi m nu rime a.

⁵⁷ Lele kpa Nda ke zi budnu ziyaru m, m zi m budnu kwnornu nu Nda m, kpam masi, nye obula ke jeeri anọ-ehni m jaazi budnu kwnornu me.

⁵⁸ Ka bu wiri wam ke hi n'oligwe hiedna, o buo kpa nda anu oknani riri mana be nwu.

Nye obula ke jeeri wiri ka jaazi budnu tim tom."

⁵⁹ Ka bu nhne Jizosi kwuru nga o neezni nhne nu oro ogbako ele Ju zi nu Kapanom.

Ikwu-onu ke budnu kwó okwo

⁶⁰ Nga agida ele sno apna a nurnu oka a, be kaa, "Ikwu-onu ka siri rikne, nyele jeemeli a?"

⁶¹ Nga Jizosi mahjaru nu ele sno apna a naatakpo gbasiri oka ka, o kanu be, "Ka o mernu ovu we anu ehni sa?"

⁶² Ndaa kpa o jonu nga anu jowhnu Nnwọ ke Badnu lahna hne o zi nu mbom?

⁶³ Enine neenye budnu, badnu etekne nwée rikne mee nhne obula. Oka me nookwunu anu bu enine bu masi budnu.

⁶⁴ Kovu agwna anu kwége." Jizosi magwu hite n'oziri ele kwé ekwe nu nye jeere a.

⁶⁵ O kanu be, "Ka kpayaru me jiri kanu anu nu o za nye jaavakwnusi m, okwolem ma Nda m nyernu a rikne o mee kpam."

⁶⁶ Hite nu nhne Jizosi kwuru, agida ele sno apna a lahna aznu kwnornu nu ikwu-onu ka, be snóge a berere.

⁶⁷ Jizosi sikwa nri nu badnu lawuru wam ele sno apna a, "Anu jaalahna masi?"

⁶⁸ Sajmoni Pita, kaa, "Nyenwe ai, a jaalakwnusi nyele? I nwernu ikwu-onu ke neenye budnu kwó okwo.

⁶⁹ Kitna, a kweru, mahja masi nu i bu nye nsọ ke Chiokike."

⁷⁰ Jizosi kanu be, "Me hohiaru anu nri nu ebo, kovu otu nyenum nu rime anu bu ekwensu."

⁷¹ O nookwu gbasiri Judasi, nnwo Sajmoni Isikarioti, kwnornu nu Judasi jeere a, o bu n'ezi nu o bu otu nu rime nri nu badnu lawuru wam ele sno apna Jizosi.

7

Jizosi nu rumu nne a

¹ Nga ka mekworu, Jizosi neezneghari nu rime Galili. O chola o zne Judiya kwnornu nu ele Ju noopio o gbu a.

² Ige Iriri Oro Igwugwu ele Ju zi ndundu.

³ Rumu nne Jizosi kanu a, "Whoga hna zne Judiya ma ele sno apna i whnurnu ernu i nqornu.

⁴ Nye piuru ma ele badnu mahja nye o bu rnu ernu tugwaru otugwa. Mee ma owa whnurnu ernu i nqornu."

⁵ Rumu nne a kwuru ka kwnornu nu be kwéle nu ya.

⁶ Jizosi kanu be, "Ige m yóoduge, kovu ige anu zi n'aka anu.

⁷ Ele owa jeenwe rikne sno anu iro, kovu be snornu m irno, kwnornu nu m naakaa nu ernu be buo owa.

⁸ Anu zne n'Iriri ka, m jáava n'Iriri ka kitna, kwnornu nu ige m yóoduge."

⁹ Nga Jizosi kwukworu kpa, ọ dazigidne nù Galili.

*Jizosi znernu Iriri
Oro Igwugwu*

¹⁰ Nga rùmu nne a znernu Iriri wam, Jizosi snornu be zne Iriri wam nù mgwugwa, ọ bụo nù ruwhnu ọhna.

¹¹ Ele Ju zì noopio a n'Iriri wam, be n̄esikwa, "Ndaa hne ọ zì?"

¹² Agida ele badnù n̄otnurita n'esisilawuru be, be naakaa, "Ọ bụ nye ọma." Ele berere naakaa, "Ọza, o nooduwhu ele badnù."

¹³ Kọvu ọ zá nye nookwuhia nhne gbasiri a nù ruwhnu ọhna, kwnornu nù be n̄otu ogwu ele risi ele Ju.

¹⁴ N'esisilawuru Iriri wam, Jizosi znernu n'Oro Nso Chiokike bete neezni nhne.

¹⁵ Nhne o neezni jiri ele risi ele Ju anya, be kaa, "Nwerukna ka m̄ulele nhne, ndaa kpa o jiri mahia nhne?"

¹⁶ Jizosi saru be, "Nhne me neezni b̄uo ikwu-ọnu ke m, kọvu ke nye ziyaru m.

¹⁷ Nye ọbula ke jeeme echiche nye ziyaru m, nye wam jaamahia ma nhne me neezni ma o hi n'aka Chiokike m̄obu o hi n'aka ke m.

¹⁸ Nye nookwu nhne aka ke a, noopio igwugwu ke ẹhni a, kọvu nye noopio igwugwu nye ziyaru a bụ nye ezi ọka, aghigho zila nù rime a.

¹⁹ Ọ b̄uo Mozizi nyernu anu iwu? Kọvu ọ zá otu nù rime anu ke naabita iwu. K̄ini mernu anu noopio o gbu m?"

²⁰ Ele badnù wam kaa, "I bụ nye renwu oju n̄wugwu. Nyele noopio o gbu i?"

²¹ Jizosi kanu be, "M nr̄urnu m otu ẹrnu ndu-ẹhni, o ji anu anya.

²² Mozizi nyernu anu iwu ọ kpa r̄umu anu nka (ọ bụ n'ezi nù ọkpa nka hige n'aka Mozizi, kọvu o hi n'aka ele gbaka), anu naakpa r̄umu anu nka n'Ọbochi Ozukwa Inwe.

²³ Ọ b̄uru nù anu naakpa r̄umu anu nka n'Ọbochi Ozukwa Inwe, ma anu b̄ita Iwu Mozizi, ndaa kpa ovu ji neewe anu ẹhni kwnornu nù m gw̄oru m nye nr̄iria n'Ọbochi Ozukwa Inwe?"

²⁴ Anu k̄pe ikpe hite nù nhne anya n̄owhnu, kọvu anu kpe ikpe b̄uru ọma."

Jizosi, ọ bụ ya bụ Mezaya?

²⁵ Agwna ele zì nù Jeruselem kaa, "Ka ọ b̄uo nye be noopio o gbu?"

²⁶ Le, o nookwu ọka n'ọhna, ọ zá nye nookwu nhne ọbula megidne a. Ele risi aji be magwu nù nye ka bụ Karaisi n'ezi?"

²⁷ Kọvu nga Karaisi jaava, ọ zá nye jaamahia hne o jeehi va. Kọvu k̄pakara aji magwu hne nwerukna ka hi va.

²⁸ Kpa Jizosi neezni nhne n'Oro Nso Chiokike, o gweru okne nkoli siwama lulo, kaa, "Anu magwu nye me b̄u, anu magwu masi hne me hi va, kọvu m v̄age m nù rikne

aka m, nye ziyaru m b̄u ezi ọka. Anu m̄aa nye ọ b̄u.

²⁹ Kọvu m maam nye ọ b̄u, kwnornu m hi m hne ọ zì va, ya ziyaru m."

³⁰ Be pio kpa be ọjonwugwu a, kọvu ọ zá nye t̄ukasiri a aka, kwnornu nù ige a ȳoduge.

³¹ Kọvu agida ele badnù n'esisilawuru igbudu badnù wam kweru nù ya, be kaa, "Nga Karaisi jaava, ọ ọjornu ẹrnu ndu-ẹhni kakwo ke nwerukna ka n̄ornu?"

*Be ziznernu ele nse
be nwudne Jizosi*

³² Ele Farisi nurnu nhne igbudu ele badnù wam nookwu gbasiri a, be nù ele risi ar̄ohna zizne ele neese Oro Nso Chiokike ma be n̄wugwu Jizosi.

³³ Jizosi kaa, "Me nù anu jaazi ige mat̄i, omekwo, m lakwnusi nye ziyaru m.

³⁴ Anu joopio m, anu j̄owhnu m, kwnornu nù anu j̄enwe rikne va nhne me naala."

³⁵ Ele risi ele Ju s̄ikwa ẹhni be kaa, "Ndaa hne o jeezne hne a j̄oopiah̄ali a? O jeezne hne ele Ju wu n'esisilawuru ele Giriki, zni ele Giriki nhne?"

³⁶ K̄ini b̄u risi nhne o nookwu? O karu, 'Anu joopio m, kọvu anu j̄owhnu m, hne me neeze anu j̄enwe rikne va.' "

Osimini ke neenye b̄udnu

³⁷ N'okne ọbochi ipne-aznu ke Iriri wam, Jizosi gwuzoru, gweru okne nkoli siwama, kaa, "Nye ọbula ke akp̄iri n̄okpo b̄ekwnu, ọ vakwnusi m, n̄w̄ornu mini.

³⁸ Lele kpa ọkwukwo nso kwuru, 'Nye ọbula ke kweru nù me, osimini ke mini b̄udnu jeehi nù rime ruwhu a naagbahia.' "

³⁹ Jizosi kwuru ka kwnornu nù Enine Nso ke ele kweru nù ya jaanahia. N'ige wam be ẹnyene Enine Nso, kwnornu nù be ẹnyene Jizosi igwugwu.

*Okewa n'esisilawuru
ele badnù*

⁴⁰ Agwna ele zì n'igbudu ele badnù wam, nga be nurnu ikwu-ọnu ka, be kaa, "N'ez̄i, nwerukna ka b̄u nye ọwhurninya wam."

⁴¹ Ele berere kaa, "Ọ b̄u Karaisi."

Kọvu ele berere kaa, "Karaisi o jeehi nù Galili va?"

⁴² Ọkwukwo nso kwuru nù Karaisi jeehi nù avnr̄umu Devidi va, nù be j̄oomu a nù B̄etilehem, ẹli-ọhna hne Devidi wuru."

⁴³ Ka k̄payaru okewa n'esisilawuru igbudu ele badnù wam kwnornu nù Jizosi.

⁴⁴ Agwna be piuru ọ nwudne a, kọvu ọ zá nye t̄ukasiri a aka.

*Okwe ekwe ke ele risi
ele Ju*

⁴⁵ Omekwo, ele neese Oro Nso Chiokike lahnakwnusi ele risi ar̄ohna nù ele Farisi, be s̄ikwa be, "K̄ini mernu anu n̄w̄uyagele a?"

⁴⁶ Ele nse wam saru be, “O za nye kwuleru oka lele kpa nwerukna ka kwuru.”

⁴⁷ Ele Farisi sikwa be, “O duhie masila anu sa?”

⁴⁸ O nwernu otu nye Farisi mōbu ele risi ele Ju ke kweru nu ya sa?

⁴⁹ Ele ka maa nhne obula gbasiri iwu, ovu onu Chiokike zi nu risi be.”

⁵⁰ Otu nye Farisi rewhna a bu Nikodimosi, nye znekwnusiri Jizosi n'abali, kanu be,

⁵¹ “Iwu aj za naama badnu ikpe si o nuna nhne hi n'onu a, nu nhne o mernu.”

⁵² Be saru a, “I bu masi nye Galili sa? Lekasi nu nhne be gbaru n'okwukwo nso, o za nye owhnurninya ke hi nu Galili whuya.”

[

⁵³ Be gbasia, nye obula la n'oro a.

8

Nwerninya be nwugwuru

n'oyi

¹ Jizosi znernu nu Rugwu Olivu.

² N'onu osisi, o lahana n'Oro Nso Chiokike, kpakara ele badnu gba a gburugburu, o daziri eli bete neezni be nhne.

³ Ele zni iwu ele Ju nu ele Farisi kwuyanu a otu nwerinya be nwugwuru n'oyi, be gwuzote a n'esilawuru be.

⁴ Be kaa, “Nye-zni-nhne, a nwugwuru nwerinya ka hne ya nu nyerukna dnanyi.”

⁵ N'iwu aj, Mozizi karu be gweru akaworugwu tugbu a. Kini bu nhne i kwuru?”

⁶ Be kwuru ka naakpa a iru ma be bno Jizosi nhne.

Kovu Jizosi whudnahie eli gweru mkpaka a gba nhne nu rizza.

⁷ Be zi koriri nesisikwa a, o lizo, kanu be, “Nye obula n'esilawuru anu ke mekolele mmehie beru osno tu a akaworugwu.”

⁸ O whudnahie eli berere naagba nhne nu rizza.

⁹ Nga be nurnu a, be hite nu nye okno badnu du nu nye mati, otu otu be whoga kwo. O gwnata Jizosi nu nwerinya wam.

¹⁰ Jizosi lizo, sikwa a, “Nwerninya, ndaa ele noobno i nhne? O za nye gwnarnu ke jaama i ikpe?”

¹¹ Nwerninya wam kaa, “O za, su Nda-aj-kwu.”

Jizosi kanu a, “M mage m masi m ji ikpe, kovu la, i mema mmehie berere.”]

Jizosi, iwhne ke owa

¹² Jizosi kakwnonu be, “Mawa bu iwhne ke owa. Nye obula ke joosno m jeenwe iwhne ke budnu, o jeezne izne n'ochichiri.”

¹³ Ele Farisi kaa, “I naagbanu ehni i akebne kina, nhne i nookwu buo ezi oka.”

¹⁴ Jizosi saru be, “O bubedi nu m naagbanu ehni m akebne, nhne me nookwu bu ezi oka, kwnornu nu m magwu m hne me hi nu hne me neezne.

¹⁵ Anu neekpe ikpe lele badnu. M za m neekpe nye obula ikpe.

¹⁶ O buru nu me kpe ikpe, ikpe m ziri ezi kwnornu nu me nu nsunu m za n'ikpe, me nu Nda m nye ziyaru m zi.

¹⁷ Be gbaru a n'iwu anu, nu akebne badnu lawuru gbaru bu ezi oka.

¹⁸ M gbanu m ehni m akebne, Nda m nye ziyaru m gbakwnonu m akebne.”

¹⁹ Be sikwa a, “Ndaa hne Nda i zi?”

Jizosi saru be, “Anu maa m, anu maa masi Nda m. O buru nu anu magwu nye me bu, anu znernu amahia Nda m.”

²⁰ Jizosi kwuru kpakara nhne ka nga o neezni nhne n'Oro Nso Chiokike, nu rime hne be naabita igbe iwai. O za nye tukwasiri a aka megidne a kwnornu nu ige a yavage.

Anu jeezneli hne me

neezne

²¹ Jizosi kanu be berere, “M jaala, anu joopio m, anu joonwu nu rime mmehie anu. Anu jeeuwe rikne va hne me jaala.”

²² Ele risi ele Ju kaa, “O kaa nu a jaauali hne o naala. O joogbu ehni a sa?”

²³ Jizosi kanu be, “Anu hi hna, kovu m hi m n'olu va. Anu bu ele owa ka, kovu m buo m nye owa ka.

²⁴ O bu nhne me jiri kanu anu nu anu joonwu nu rime mmehie anu. O buru nu anu kwege nu m bu m nye me bu, anu joonwu nu rime mmehie anu.”

²⁵ Be sikwa a, “I bu nyele?”

Jizosi kanu be, “M bu m nye me karu nu m bu m n'oziri.

²⁶ M nwernu m agida nhne me jookwu n'ikpe megidne anu. Kovu nye ziyaru m bu ezi oka, m jaakanu owa nhne me nurnu hite n'onu a.”

²⁷ Be ghoyage nhne o nookwu gbasiri Nda.

²⁸ Ka kparyu, Jizosi kannu be, “Nga anu jeegwelizo Nnwō ke Badnu olu, ige wam anu jaamahia nu m bu m nye me bu. O za nhne ke me neeme nu rikne aka ke m, kovu m neezni kpakara nhne Nda m znirni m.

²⁹ Nye wam ziyaru m dagwuru m, o gharula me nu nsunu m rja rja, kwnornu nu m neeme nhne naamasia a kpakara ige.”

³⁰ Agida ele nurnu nhne Jizosi kwuru kweru nu ya.

Badnu nwernu ehni a n'ezi

³¹ Jizosi kanu ele Ju ele ke kweru nu ya, “O buru nu anu dazigidne n'ikwu-onu m, anu jooburu ele sno apna m n'ezi.

³² Anu jaamahia ezi oka, ezi oka wam jeeme anu nwernu ehni anu.”

³³ Be saru Jizosi, “A bu rumu Ebereham, a bukolele phi n'aka badnu obula. Ndaa kpa i naakaa nu a jeenwernu ehni aj?”

³⁴ Jizosi saru be, “Me kanu anu ezi oka, nye obula ke neeme mmehie bu phi ke mmehie.

³⁵ Qhi zá naadazigidne n'oro tim tòm, kòvu nnwò nwe ọro ọkwuokwuu.

³⁶ Q bụru nù Nnwò jeeme anụ nwernu ẹhni anụ, anụ jeenwernu ẹhni anụ n'ezì.

³⁷ M magwụ m nù anụ bụ rụmu Ebereham, kòvu anụ noopio o gbu m, kwnornu nù anụ kwége ikwu-ọnu m.

³⁸ M naakanụ anụ nhne Nda m gesiri m, kòvu anụ neeme nhne nda anụ kannụ anụ."

³⁹ Be sarụ a, "Ebereham bụ nda aì."

Jizọsi kanụ be, "Q bụru nù Ebereham bụ nda anụ n'ezì, anụ jọornu ẹrnu Ebereham rnurnu.

⁴⁰ Nhne me mernu bụ ọ kanụ anụ ezi ọka me nurnu n'ọnu Chiokike, anụ noopio o gbu m. Ebereham méne kpam.

⁴¹ Anụ neeme nhne anụ nda anụ mernu."

Be kaa, "Chiokike bụ Nda a nwernu kpọi. A bụo rụmu ọyi."

Rumu ke Ekwensu

⁴² Jizọsi kanụ be, "Q bụru nù Chiokike bụ Nda anụ n'ezì, anụ znernu ọwhnu m n'anya, kwnornu nù m hi m hne Chiokike zì whụya, va hna. M váge m nù rikne aka ke m, kòvu ya ziyaru m.

⁴³ Nhne mernu anụ ghóyage nhne me nookwu, ọ bụ nù anụ bnóge nsni n'ikwu-ọnu m.

⁴⁴ Anụ bụ rụmu nda anụ Ekwensu, anụ jọornu ẹrnu nda anụ noopio. Q bụ nye noogbu badnụ hite n'ọpanizo. Q zila n'ezì ọka, kwnornu nù ezi ọka zá nù rime a. Omen'eli a bụ ọ gha aghalaghala, kwnornu nù o bụ nye aghalaghala nù nda kpakara aghalaghala.

⁴⁵ Me nookwunu anụ ezi ọka, kòvu anụ zá neekweru m.

⁴⁶ Nyele n'esilawuru anụ jaama m ikpe mmehie? Q bụru nù me kanụ anụ ezi ọka, kñi mernu anụ kwége m?

⁴⁷ Nye ọbula bụ ke Chiokike joojno nsni ikwu-ọnu Chiokike. Kòvu anụ jóobno nsni kwnornu nù anụ bụo ele ke Chiokike."

Jizọsi nù Ebereham

⁴⁸ Ele Ju sarụ Jizọsi, "A kwukwaru nkari nga a kwuru nù i bụ nye Sameria ke renwu ojo nwugwu."

⁴⁹ Jizọsi kanụ be, "Q zá renwu ojo nwugwu m, kòvu m neenye Nda m igwugwu, kòvu anụ zá neenye m igwugwu.

⁵⁰ M zá m noopio igwugwu ke m. O nwernu nye ke noopio igwugwu m, nye wam bụ nye ikpe.

⁵¹ Me kanụ anụ ezi ọka, ọ bụru nù nye ọbula bita ikwu-ọnu m, ọ jóowhnu ẹnwu anya rja rja."

⁵² Ele Ju kanụ a, "Kìtna hne a mahjaru nù renwu ojo nwugwu i. Ebereham nù kpakara ele ọwhnurninya nwurnu ẹnwu. I zì hna naakaa nù nye ọbula ke jaabita ikwu-ọnu i jónwuwu ọnwu rja rja.

⁵³ Nda aì Ebereham nwurnu ẹnwu. I kákwole Ebereham nù ele ọwhnurninya ele nwurnu ẹnwu. I che nù i bụ dì nyele?"

⁵⁴ Jizọsi sarụ, "Q bụru nù me nyee ẹhni m igwugwu, ọ zá nhne ọ bụ. Nda m nye anụ naakaa nù ọ bụ Chiokike anụ neenye m igwugwu.

⁵⁵ Q bụ n'ezì nù anụ máa nye ọ bụ rja rja. Kòvu m maam nye ọ bụ. Q bụru me kaa nù m máam nye ọ bụ, m jọoburu nye aghalaghala lele anụ, kòvu m magwụ m nye ọ bụ, m naabita ikwu-ọnu a.

⁵⁶ Nda anụ Ebereham nwernu ovu ọso n'ọnu nù ọ jóowhnu ọbochi m, ọ whnụ masi a, ọ nwúdnarnu."

⁵⁷ Ele Ju kanụ a, "I yóoduge nri awha isne, i whnurnu Ebereham n'ezì?"

⁵⁸ Jizọsi kanụ be, "Me kanụ anụ ezi ọka, m zì m sù be murnu Ebereham."

⁵⁹ Be chíri akaworugwu be jootugbu a, kòvu Jizọsi tugwa ẹhni a, hi n'Oro Nsọ Chiokike whoga.

9

Jizọsi gworu nye

be murnu n'isni

¹ Kpa Jizọsi neewhe, ọ whnụ otu nyerukna be murnu n'isni.

² Ele sno apna a sịkwa a, "Nye-zni-nhne, ọ bụ mmehie nyele mernu be murnu nwerukna ka n'isni? Mmehie ke a sọbu ke ele murnu a?"

³ Jizọsi kaa, "Isni kpuru a bụo kwnornu nù mmehie ke a mọbu ke ele murnu a. Kòvu o kpuru isni ma ẹrnu Chiokike whụya iwhe n'ẹhni a.

⁴ A jaazi nọornu ẹrnu nye wam ziyaru m kpa ọbochi gwarnu, kwnornu nù abali vava, nga ọ zá nye jeenwe rikne rnu ẹrnu.

⁵ Kpa me ziko n'owa, mawa bụ iwhe ke owa."

⁶ Nga o kwukworu ka, ọ gbusa ọnu-mini n'eli, gweru ọnu-mini wam me ọrura, o te ọrura wam n'anya nwerukna wam.

⁷ Q kanụ a, "Zne snụ ruwhnu i n'Olulu Mini Saìlom" (ke bụ nye be zizernu). Nwerukna wam zne, snụ ruwhnu a, hiehna nọowhnu ọsno.

⁸ Ele agbatibi a nù ele whnurnu hne ọ nọorio nhne nù mbom sịkwa, "Ka ọ bụo nwerukna wam dazì eli nọorio nhne?"

⁹ Agwna be kaa, "Q bụ ya."

Ele berere kaa, "Ọza, o yiri ya."

Kòvu nwerukna wam karụ, "Q bụ mawa."

¹⁰ Be sịkwa a, "Ndaa kpa anya i jiri kpume?"

¹¹ O sarụ, "Otu nwerukna be kwu Jizọsi mernu ọrura tesi n'anya m, kanụ m, 'Zne n'Olulu Mini Saìlom snụ ruwhnu,' kpa me snurnu, m whnurnu m ọsno."

¹² Be sịkwa a, "Nda hne ọ zì?"

Q kaa, “M máam.”

*Ele Farisi ñootule
ogwugwo wam*

¹³ Be kwuznenu ele Farisi nwerukna wam kpuru isni nù mbòm.

¹⁴ Jizòsi mernu òrura kpume anya nwerukna wam n'Òbochi Ozukwa Inwe.

¹⁵ Ele Farisi sikkwa nwerukna wam berere kpa o jiri ñowhnu òsno. O kanù be, “O yisiri òrura n'anya, m snù ruwhnu m, kítina, m ñowhnu òsno.”

¹⁶ Agwna ele Farisi kaa, “Nwerukna ka híge nù hne Chiokike zi va, kwnornu nù o zá naabíta iwu ke Òbochi Ozukwa Inwe.”

Ele berere kaa, “Ndaa kpa nye mmehie jeenwe rikne rnù ɛrnu ndu-ɛhni ele ka?” Ka vuyarù okewa n'ésilawùru be.

¹⁷ Ele Farisi sikkwa kwno nwerukna wam berere, “Ndaa nhne ì kwuru gbasìri nye wam kpumernu anya ì?”

O sarù be, “O bù nye òwhnurninya.”

¹⁸ Kòvu ele risi ele Ju kwége nù o kpuru isni nù mbòm kòvu ñowhnu òsno kítina tem be sukwu ele mürnu nwerukna wam.

¹⁹ Be sikkwa be, “Ka o bù nnwò anù, nye anù karù nù o kpuru isni nga anù mürnu a? Ndaa kpa o jiri ñowhnu òsno kítina?”

²⁰ Ele mürnu a sarù be, “O bù n'èzi nù o bù nnwò aì, nye a mürnu n'isni.

²¹ Kòvu a máa kpa o jiri ñowhnu òsno kítina mòbu nye kpumernu anya a. Anù sikkwahia a, o bù okno badnú, o jookwulinu ɛhni a.”

²² Ele mürnu a kwuru ka kwnornu nù be ñootu ogwnu ele risi ele Ju. Kwnornu nù ele risi ele Ju kwekòtaru nù nye obula ke jookwuhia nù Jizòsi bù Karaìsi, be jaachìhala a n'òro ògbako ele Ju.

²³ Ka kpaìhiaru ele mürnu a karù, “O bù okno badnú, anù sikkwa a.”

²⁴ Be sukwu kwno nwerukna wam be mürnu n'isni, be kanù a, “Nyee Chiokike òznarni, a magwù nù nwerukna ka bù nye mmehie.”

²⁵ Nwerukna wam kaa, “M máam ma o bù nye mmehie, ma o búo nye mmehie. Kòvu otu nhne bù ke me mahìaru, m kpuru m isni nù mbòm, kítina m ñowhnu òsno.”

²⁶ Be sikkwa kwno a, “Kìni bù nhne o mernu ì? Ndaa kpa o jiri kpume anya ì?”

²⁷ O sarù be, “M kannù m anù nù mbòm, anù kwéle o bno nsni. Anù pioru o nù a berere? Anù noopio o bùru ele sno apna a sa?”

²⁸ Be kpasì a iwhnerne, kaa, “I bù nye sno apna nye ka, a bù ele sno apna Mozizi.

²⁹ A magwù nù Chiokike kwunnu Mozizi óka, kòvu nye ka, a máa hne o hi va.”

³⁰ Nwerukna wam sarù be, “Ka bù nhne tù n'anya, anù máa hne o hi va, kòvu o kpumernu anya m.

³¹ A magwù nù Chiokike zá noobnonu ele mmehie nsni, kòvu o noobnonu ele ñòsobisinu a nsni bù ele neeme nhne naamasì a.

³² Ke ówa panìzoru, o zá nye nùleru nù o nweru nye kpumernu anya nye be mürnu n'isni.

³³ O bùru nù nwerukna ka híge n'aka Chiokike, o jéenwe rikne mee nhne obula.”

³⁴ Be sarù a, “Be mürnu ì, znùlizo ì nù rime mmehie. I jòobu nye jeezni aì nhne sa?” Be chìhala a nù rime òro ògbako ele Ju.

Isni ke Enine

³⁵ Nga Jizòsi nürnu nù be chìhalaru a, o pohia a, kaa, “I kweru nù Nnwò ke Badnú?”

³⁶ Nwerukna wam sikkwa Jizòsi, “Nda-aj-kwu, kanù m nye o bù ma m kweru m nù ya.”

³⁷ Jizòsi kanù a, “I whnùnam a, o bù nye nookwunu ì óka kítina.”

³⁸ Nwerukna wam kaa, “Nyenwe aì, m kweru m.” O kpònu a risi n'èli.

³⁹ Jizòsi kaa, “M varù m n'òwa o kpe ikpe, ma ele kpuru isni whnürnu òsno, ma ele ñowhnu òsno kpu isni.”

⁴⁰ Agwna ele Farisi zì hne o zì nürnu nhne o kwuru, be sikkwa a, “A bù ele isni masì?”

⁴¹ Jizòsi kaa, “O bùru nù anù kpuru isni, ikpe mmehie ba mána anù, kòvu anù karù nù anù ñowhnu òsno, anù bù ele ikpe mmehie marnù.”

10

*Jizòsi òmamarna nye
znu atnürnu*

¹ Jizòsi kaa, “Me kanù anù ezi óka, nye obula ke gála nù ònu-mgbo bna n'òro atnürnu, kòvu garù apna berere bna, bù nye buznu n'èzi.

² Nye ke garù n'ònu-mgbo bna n'òro atnürnu bù nye ñòoznu atnürnu.

³ Nye neese ònu-mgbo jaagbanù a òro, rùmu atnürnu a nürnu nkòli a, o sukwu rùmu atnürnu a nù rèwhna be, duru be whòga.

⁴ Nga o chìhiaru be, o beru be òsno, rùmu atnürnu a snòru a n'aznù, kwnornu nù be magwù nkòli a.

⁵ Be jóosno nye berere, kòvu be jaag-bawhu, kwnornu nù be máa nkòli nye izne.”

⁶ Ka bù elulu Jizòsi tnunnu be, kòvu be ghóyage nhne o naakanù be.

⁷ Jizòsi kanù be berere, “Me kanù anù ezi óka, mawa bù ònu-mgbo ke atnürnu.

⁸ Kpakara ele beru m òsno va bù ele buznu n'èzi. Atnürnu wam bnóne be nsni.

⁹ Mawa bù ònu-mgbo. Be jòoznohia nye obula ke jeehi nù rime m bna, o jaabna nù rime, whòga kwno n'ederezi, whnù òri o jaata.

¹⁰ Nye buznu varù ma o znu buznu, gbu ogbu, lulu nhne, kòvu m varù m ma be nwehìa bùdnu, bù bùdnu ke zuru ozu.

¹¹ “Mawa þú ǫmamarna nye znú atnúrnú. Ǫmamarna nye znú atnúrnú jiknernú ọ nwúnú atnúrnú a ẹnwú.

¹² Nye be gnornu ẹnu, nye atnúrnú wam búo ke a, ẹjesigbasi atnúrnú gbawhu nga ọ whnúrnú edu naava. Edu tagbu atnúrnú, chikeme kwo be.

¹³ Ọ gbarú ẹso kwnornu nù atnúrnú búo ke a, ọ bú nye be gnornu ẹnu, búdnú rúmu atnúrnú wam zílá a mkpa.

¹⁴ “Mawa þú ǫmamarna nye znú atnúrnú. M maam atnúrnú m, atnúrnú m magwú m masí.

¹⁵ Lele kpa Nda m magwú m, þú kpa me magwú Nda m. M nọotusanu rúmu atnúrnú m búdnú m.

¹⁶ M nwernu m rúmu atnúrnú berere ke zá n'ogbori atnúrnú ka, m jeegweya be. Be masí jọonu nkọli m, kpakara be jọoburu otu ogbori atnúrnú. Be jeenwe otu nye znú atnúrnú.

¹⁷ Ka þú nhne kpayarú Nda m jiri whnú m n'anya kwnornu nù m kweru m ọ túbíta búdnú m, ma m gwelizọ a berere.

¹⁸ Ọ zá nye nanahía m búdnú m. Mawa bítaru a hite nù mkpọma m. M nwernu rikne ọ bíta a, m nwe masíri m rikne ọ gwelizọ a. Ka þú nhne Nda m nyernu m n'iwu.”

¹⁹ Ka kpayarú okewa kwno n'esilawúru ele Ju.

²⁰ Agída be naakaa, “Rẹnwu ojo nwúgwu a, ọ bú nye ẹra. Kíni mernu anù noobno a nsní?”

²¹ Kọvu ele berere kaa, “Nye rẹnwu ojo nwúgwu, o jookwu ọka kpa? Ndaa kpa rẹnwu o jọokpumeli anya nye isní?”

Ókwe ekwe ke ele Ju

²² N'ige Iriri Onyewhete Oro Nsọ Chiokike dúrú nù Jeruselem, n'ige okirika,

²³ Jizọsi zì n'Oro Nsọ Chiokike neezne izne nù mgbemgbe ọro Solomóni.

²⁴ Ele Ju gba a gburugburu, znekwnusi a, kaa, “Í bítaru a n'ọchichiri ogologo ige, kawamanù aì ọ búru nù jìwa þú Karaísi.”

²⁵ Jizọsi sarú be, “M kannù m anù, kọvu anù kwége. Ẹnu ndu-ẹhni me nọornu nù rẹwhna Nda m naagbanù m akebne.

²⁶ Kọvu anù kwége kwnornu nù anù búo atnúrnú ke m.

²⁷ Atnúrnú ke m nọonu nkọli m, m maam be, be noosno m n'aznú.

²⁸ M neenye be búdnú kwó okwo, be jọonwu ría ría. Ọ zá nye nwernu rikne dọhala be n'aka m.

²⁹ Nda m nye nyernu m be kakwo kpakara nhne berere. Ọ zá nye nwernu rikne dọhala be n'aka Nda m.

³⁰ Me nù Nda m þú otu.”

³¹ Ele risi ele Ju títuru kwno akaworugwu be jọotu a.

³² Jizọsi kanú be, “M rnúrnú m agída ẹnu ndu-ẹhni nù ruwhnu anù ke Nda m nyernu m, ndaa ẹnu ke anù kwnornu nù a nọotu m akaworugwu?”

³³ Ele Ju sarú a, “A jọotu í akaworugwu kwnornu nù ẹnu ọma, kọvu kwnornu nù í kwuluru Chiokike hne í þú badnú etekne, í neeme ẹhni í Chiokike.”

³⁴ Jizọsi sarú be, “Ọkwukwo nsọ anù kwuru nù Chiokike sukwuru be chí.

³⁵ O sukwuru be chí þú ele nurnu ikwu-ọnu Chiokike, aghalaghala zílá nù nhne be gbarú n'ọkwukwo nsọ.

³⁶ Nda m họhiaru m, bíta m nsọ, ziya m n'ọwa. Ndaa kpa me nookwulu Chiokike kwnornu nù m karú m nù m þú m Nnwọ Chiokike?

³⁷ Anù kwé, ọ búru nù m zá m nọornu ẹnu Nda m.

³⁸ Kọvu ọ búru nù m nọornu ẹnu Nda m, ọ búbedi nù anù kwéle nù me, anù kweru n'ẹnu m, ma anù mahía nù Nda m zì nù rime m, me nù rime Nda m.”

³⁹ Be pio ọ nwudne a berere, kọvu o hi n'aka be whọgaru.

⁴⁰ Jizọsi lahna n'aznú Osimini Jọdani kíyari, hne Jóni wúru mini nù mbọm. Ọ dazírí þíi.

⁴¹ Agída ele badnú vakwnusi a, kaa, “Jóni rnúge ẹnu ndu-ẹhni, kọvu kpakara nhne Jóni kwuru gbasíri nwerukna ka þú ezi ọka.”

⁴² Agída be kweru nù ya þíi.

11

Ẹnwu Lazarọsi

¹ Otu nwerukna rẹwhna þú Lazarọsi, nye wu nù Bẹtani, dnarnú ẹhni igbugbu. Bẹtani þú hne Meri nù nwene a rinya Mata wu.

² Ka þú Meri wam ke wúsi Jizọsi mọno otute, gweru rukeri-ize a kwnosnama ọchi a, þú nye nwene a rukna Lazarọsi dnarnú ẹhni igbugbu.

³ Rúmu nne a rinya ziznenu Jizọsi izi kaa, “Nyenwe aì, enyi í ke í whnúrnú n'anya naaríja aríja.”

⁴ Nga Jizọsi nurnu a, ọ kaa, “Ẹhni igbugbu ka jọobu ẹnwu Lazarọsi, kọvu o jeenye Chiokike igwugwu ma be hite nù a neye Nnwọ Chiokike igwugwu.”

⁵ Jizọsi whnúrnú Mata nù nwene a rinya nù Lazarọsi n'anya.

⁶ Kọvu nga ọ nurnu nù Lazarọsi naaríja ẹhni igbugbu, ọ dazírí nù hne ọ zì ọbochi lawúru berere.

⁷ Omekwo, ọ kanú ele sno apna a, “Anù va ma a lahna Judiya.”

⁸ Ele sno apna a kanú a, “Nye-zni-nhne, o gbúle ọkwu ele Ju pioru ọ tų akaworugwu, í naalahna kọriri þíi?”

⁹ Jizọsi sarú be, “Otu ọbochi nwernu nri nù awa lawúru, nye ọbula ke zneru izne

n'iwihnehnie jòokpobi òchi, kwnornu nù ò nòowhnu iwihne k'òwa.

¹⁰ Kòvu ò büru nù ò zne izne n'abalì, ò jòokpobi òchi, kwnornu nù ò zì iwihne zì nù rime a."

¹¹ Nga Jizòsi kwukworu kpa, ò kaa, "Lazaròsi enyi aì neezni anyarna, kòvu m jeezne ma m kpatne a."

¹² Ele sno apna a kaa, "Nyenwe aì, ò büru nù ò neezni anyarna, èhni jòoburu a òma."

¹³ Kòvu nhne Jizòsi nookwu bür nù Lazaròsi nwunam. Kòvu be neeche nù ò bür ozni anyarna etekne.

¹⁴ Jizòsi kawhnomenu be, "Lazaròsi nwunam.

¹⁵ Mkpòma nòoso m n'ònu kwnornu anù, nù m zìla m hne ò nwürnu, ma anù kweru. Anù lizò ma a znekwnusi a."

¹⁶ Tòmosi, nye be kwu Didimòsi (ke bür ejima) kanù ele sno apna a ibne a, "Anù lizò ma a snornu a zne, ma a snornu a nwü ènwu."

Jizòsi, olizò n'ènwu nù bürnu

¹⁷ Nga Jizòsi vaduru, ò whnürnu nù be lilem Lazaròsi òbochi èno wheru ewhe.

¹⁸ Bètani dùla majìli lawüru hite nù Jeruselem.

¹⁹ Agìda ele Ju varù ò kasi Mata nù Meri mkpòma kwnornu ènwu nwene be rukna.

²⁰ Nga Mata nürnu nù Jizòsi vawa, ò whòga znekwnusi a, kòvu Meri dazìri n'òro.

²¹ Mata kanù Jizòsi, "Nyenwe aì, ò büru nù ò zì hna, nwene m rukna bò ò nwüna.

²² Kòvu m maam nù nhne òbula ò rìoru n'aka Chiokike, ò jeenye ò ya."

²³ Jizòsi kanù a, "Nwene ò rukna jeelizò berere."

²⁴ Mata sa a, "M maam nù ò jeelizò berere n'òbochi ipne-aznù."

²⁵ Jizòsi kanù a, "Mawa bür olizò n'ènwu nù bürnu. Nye òbula ke kweru nù me, ò bürubedi nù ò nwürnu ònwu, ò jaazì bürnu.

²⁶ Berere kwno, nye òbula ke zì bürnu kweru nù me jòonwu ènwu tim tòm. Mata, ò kweru nhne me nookwu?"

²⁷ Mata sarù, "Owe! Nyenwe aì, m kweru m nù jì bür Karàisi, Nnwò Chiokike ke varù n'òwa."

Jizòsi kwnarnù èkwna

²⁸ Nga Mata kwukworu ka, ò lahna, sukwu Meri nwene a rinya ichne kanù a, "Nye-zni-nhne zì hna, ò noosukwu ò."

²⁹ Nga Meri nürnu ka, ò lizò wara wara ma ò kwnusi Jizòsi.

³⁰ Jizòsi yáavaduge nù rime èli-òhna, ò zì kòriri nù hne Mata kwnusiri a.

³¹ Ele Ju be nù Meri zì n'òro naakasi a mkpòma, snornu a nga be whnürnu nù ò lizòru wara wara whòga. Be neeche nù ò neezne akwna èkwna n'ìlìli.

³² Nga Meri düru hne Jizòsi zì, whnù a, ò dna n'èli n'òchi a, kaa, "Nyenwe aì, ò büru nù ò zì hna, nwene m rukna bò ò nwuna."

³³ Ò metüru Jizòsi nù mkpòma nga ò whnürnu Meri nù ele Ju sno a naakwna èkwna, ò gbu a igbugbu nù mkpòma.

³⁴ Ò sìkwa be, "Ndaa hne anù vubiri a?"

Be kaa, "Nyenwe aì, va whnürnu."

³⁵ Jizòsi kwnarnù èkwna.

³⁶ Ele Ju kaa, "Le, ò whnürnu a n'anya k'agìda."

³⁷ Kòvu agwna be kaa, "Ò kpumernu anya nwerukna kpuru isni, ò bür nù ò jèenwe rikne mee Lazaròsi gharù ò nwü ènwu?"

Jizòsi mernu Lazaròsi hi n'ènwu lizò

³⁸ Ò gbu kwno Jizòsi igbugbu nù mkpòma, ò zne n'ìlìli be gwuru nù rime rugwu, be jiri rugwu kpusni ònu a.

³⁹ Jizòsi kaa, "Anù gweme rugwu ka."

Mata, nwene rinya nwerukna wam nwürnu ònwu kaa, "Nyenwe aì, ò jeenwe èknarna òjo, kwnornu nù tna bür òbochi èno be liri a."

⁴⁰ Jizòsi kaa, "Me kannù ò nù ò jòowhnu igwugwu Chiokike ò bür nù ò jeekweru kpo?"

⁴¹ Be vume rugwu wam. Jizòsi lelizò anya n'òlu, kaa, "Nda m, meka, kwnornu nù ò bnonem me nsni.

⁴² M magwù m nù ò noobnonu m nsni òge òbula, kòvu kwnornu nù ele ka zì hna m nookwu a ma be kweru nù jì ziyaru m."

⁴³ Nga ò kwukworu ka, ò gweru okne nkòli siwama, "Lazaròsi, whüya."

⁴⁴ Nwerukna wam nwürnu ònwu whüya, nye be jì ikpe iznu whü a aka lawüru nù òchi lawüru, nù ikpe be jiri whü ruwhnu a. Jizòsi kanù be, "Anù tòm a, ma ò la."

Be gbarù iznuznu ò gbu Jizòsi

(Mat 25:1-5; Mak 14:1,2; Luk 22:1,2)

⁴⁵ Agìda ele Ju ele varù elekwa Meri whnürnu nhne Jizòsi mernu, kweru nù ya.

⁴⁶ Kòvu agwna be lahna kanù ele Farisi nhne Jizòsi mernu.

⁴⁷ Ele Farisi nù ele risi arìohna kwu ikwu kaa, "Ndaa nhne a neeme? Nwerukna ka nòornu agìda ènu ndu-èhni.

⁴⁸ Ò bür nù a gharù a, ò neezne nù ruwhnu, kpakara ele badnù jeekweru nù ya. Ele Rom jaava lulu èli aì ma Oro Nso aì."

⁴⁹ Otu nyenum n'esilawüru be, rèwhna a bür Kayafasi, nye bür nye risi arìohna n'awha wam, kaa, "Anù máa nhne rìja rìja.

⁵⁰ Ò bür òma nù òtu badnù nwühianu kpakara badnù ènwu, ma kpakara mba gharù ò whu etekne."

⁵¹ N'èzi òka, ò kwùge nhne ka hite nù mkpòma a, kòvu lele nye risi arìohna n'awha

wam, o whnurnu owhnurninya nu Jizosi jonwuhianu ele Ju enwu.

⁵² O buo ele Ju kpoi, kovu kwnornu kpakara rumu Chiokike be chisaru nu kpakara owa, chikota be ma be buru otu.

⁵³ Hite n'obochi wam ele risi ele Ju bete o gba iznuznu kpa be joogbu Jizosi.

⁵⁴ Kam kpayaru, Jizosi zima neezne izne nu ruwuhu ohna n'esilawuru ele Ju, kovu o whoga zne hne zi ndundu n'eli-ikpa, bna n'otu eli be kwu Ifirem, ya nu ele sno apna a daziri pii.

⁵⁵ Ige Iriri Ogawhe ele Ju zi ndundu, agida ele Ju zne Jeruselem, zne o bita ehni be nsu o du Iriri Ogawhe be.

⁵⁶ Be noopio Jizosi, be gbako n'Oro Nso Chiokike, be nesisikwa ibne be, "Ndaa nhne bu echiche anu? O bu nu o jaava Iriri ka sa?"

⁵⁷ Ele risi arjohna nu ele Farisi nyernu iwu, kaa, nye obula ke magwu hne Jizosi zi kanu be ma be nwudne a.

12

Be teru Jizosi mono nu Betani

(Mat 26:6-13; Mak 14:3-9)

¹ O gwnarnu obochi isunu Iriri Ogawhe ele Ju du. Jizosi znernu Betani hne Lazarosi nwerukna wam o mernu o hi n'enwu lizo.

² Be sinu Jizosi wiri anyasnu, Mata neezne izi, Lazarosi bu otu nu ele Jizosi dazi neeri wiri.

³ Meri gweru otu olori mono otute zi gburu onu be jiri nadi zi snam mee, ke nwernu eknarna oma wusi n'ochi Jizosi, gweru rukeri-ize a kwnosnama a. Eknarna mono wam jihja rime oro.

⁴ Otu nu rime ele sno apna Jizosi be kwu Judasi Isikarijoti, nye jeere Jizosi, kaa,

⁵ "Kini mernu be rele mono otute ka riwhu mkpuru iwai eto, kesi ele mboni?"

⁶ O buo nu nhne gbasiri ele mboni neemetu a nu mkpoma mernu o jiri kwu kpa. Kovu kwnornu nu o bu nye buznu, ya neeji rekpa iwai be, neeri nhne zi a nu rime.

⁷ Jizosi saru a, "Gharu nwerinya ka, o bitaru ka kwnornu obochi be jeeli m.

⁸ Ji nu ele mboni zi kpakara ige, me nu ji jaazi kpakara ige."

Be gbaru iznuznu o gbu Lazarosi

⁹ Agida ele Ju nurnu nu Jizosi zi nu Betani, be va, o buo kwnornu Jizosi kpoi, kovu ma be whnurnu Lazarosi nye Jizosi mernu o hi n'enwu lizo.

¹⁰ Ele risi arjohna ma mmuma kpa be joogbu Lazarosi masi.

¹¹ Agida ele Ju gharuru ele risi ele Ju kweru nu Jizosi kwnornu Lazarosi.

Jizosi bnaznernu Jeruselem

(Mat 21:1-11; Mak 11:1-11; Luk 19:28-40)

¹² N'obochi ke sno a, agida ele badnu ele varu Iriri Ogawhe nurnu nu Jizosi vawa Jeruselem.

¹³ Be gburu igwugwu bukwa whoga zne kwnusi a, neesi lulo,

"Ozana! * Chiokike gozi nye naava nu rewhna Nyenwe a,

Chiokike gozi eze Izireli."

¹⁴ Jizosi pohja otu nnwo iyinya daziri n'olu a, lele kpa okwukwo nsu kwuru,

¹⁵ "I tuko znewu, ji adna Zayoni,

Le, eze i gba nnwo iyinya naava."

¹⁶ Ele sno apna a ghoyage n'ige wam, kovu nga Jizosi hiri n'enwu lizo n'igwugwu, be chenwanya nhne okwukwo nsu kwuru gbasiri a nu be mernu a nhne ka.

¹⁷ Agida ele badnu wam whnurnu nga Jizosi sukwuharu Lazarosi n'ilili, mee ma o hi n'enwu lizo. Be kaharu nhne mernu.

¹⁸ Ka kpayaru agida ele badnu znekwnusi a, kwnornu nu be nurnu nu o rnurnu ernu ndu-ehni ka.

¹⁹ Ele Farisi kanu ibne be, "Le, o za nhne a neemeli, kpakara owa sno a n'aznu."

Agwna ele Giriki noopio Jizosi

²⁰ Agwna ele Giriki znernu Jeruselem n'ige Iriri wam zne kpou Chiokike risi eli.

²¹ Be vakwnusi Filipu nye Betesaida nu eli Galili, kaa, "Nda-ai-kwu, a noopio o whnu Jizosi."

²² Filipu zne kanu Anduru, be lawuru zne kanu Jizosi.

²³ Jizosi saru be, "Ige wam valem ma be nyee Nnwu ke Badnu igwugwu.

²⁴ M kanu anu ezi oka, otu mkpuru ikpa zi etekne nga be kpasila a nu rime n'eli. Nga be kpasiri a, o nwuma, fuhja, mji agida ike ikpa berere.

²⁵ Nye obula ke noowhnu budnu a n'anya jootuwahu a, kovu nye sno budnu a irno n'owa ka jaabita a du budnu kwó okwo.

²⁶ Nye obula ke nponunu m ernu joosno m n'aznu. Hne me zi nnwo izi m jaazi pii. Nda m josobisinu nnwo izi m.

Jizosi kwuru oka gbasiri enwu a

²⁷ "Kitna mkpoma m naala mini. Ndaa nhne me jaakaa? M jaakaa, 'Nda m, i kwéko ige ka va'? Kovu ka bu risi nhne me kwnornu va.

²⁸ Nda m, nyee rewhna i igwugwu."

Otu nkoli hiri n'oligwe dna, kaa, "M nyene m a igwugwu, m jeenye kwno a igwugwu berere."

* 12:13 Ozana n'ikwu-onu ele Hiburu, ke bu "Znohia!"

29 Igbudu ele badnu wam gwuzo pji kaa, “Egbe oligwe gbaru.” Ele berere kaa, “Enine izi kwunnu a oka.”

30 Kovu Jizosi karu, “O buo kwnornu me nhne nkoli ka kwuru oka, o bu kwnornu anu.

31 Kitna bu ige be jeekpe owa ka ikpe, kitna be jeechihala nye risi ke owa ka.

32 Kovu me, o buru nu be gwelizo m olu n'owa, m jodoru kpakara badnu nyee ehni m.”

33 O kwuru ka ma o gesi okpa enwu o joonwu.

34 Igbudu ele badnu wam kaa, “A nuru hite n'iwu aj nu Karaisi jaazi tim tom. Ndaa kpa i naakaa nu be gwelizo Nnwọ ke Badnu olu? Nyele bu Nnwọ ke badnu?”

35 Jizosi kanu be, “Anu jeenwe iwihne ige mati, anu zne izne nu rime a, o zi ochichiri vakwnusi anu. Kwnornu nu nye neezne izne n'ochichiri ma nhne o neezne.

36 Anu tukwasi ovu n'iwihne kitna anu nwernu a, ma anu buru rumu ke iwihne.” Nga Jizosi kwukworu oka ka, o whoga, tugwa ehni a.

Okwe ekwe ke ele Ju

37 O bu n'ezi nu Jizosi nruru kpakara ernu ndu-ehni ka n'anya be, be kweruge nu ya.

38 Ka bu ma nhne Azaya nye owhnurninya kwuru mezu,

“Nyenwe aj, nyele kweru izi a ziri, ndaa nye Nyenwe aj kpumennu aka dikne a?”

39 Kwnornu nu be kwéle, Azaya kwuru nu hne berere,

40 “Chiokike mernu be kpu isni, mee mkpoma be buru nhne nwurnu onwu,

ma be gharu o ji anya be whnu osno, gweru mkpoma be ghohia, ma be tuhna, ma m gwọ m be.”

41 Ka bu nhne Azaya kwuru kwnornu nu o whnurnu igwugwu Jizosi, o kwu oka gbasiri a.

42 N'ige wam agida ele risi ele Ju kweru nu Jizosi, kovu kwnornu nu ele Farisi, be nwée rikne kwuhia nhne gbasiri a, o zi be chihala be n'oro ogbako ele Ju.

43 Be mernu kpa, kwnornu nu be whnurnu oznarni ke badnu n'anya kakwo oznarni ke Chiokike.

Ikwu-onu Jizosi jeekpe ikpe

44 Jizosi gweru okne nkoli siwama, kaa, “Nye obula ke kweru nu me, o kweruge nu me kpọ, kovu ma nu nye ziyaru m.

45 Nye obula ke neele m anya jowhnu nye ziyaru m.

46 M varu m n'owa lele iwihne, ma nye obula ke jeekweru nu me jaadazigidne n'ochichiri.

47 “Nye obula ke jounu ikwu-onu m, kovu za naabita be, m jeekpe a ikpe, kwnornu nu m vage m o kpe owa ikpe, kovu o znohia owa.

48 Nye ke zusu m, za naabita ikwu-onu m nwernu nye jeekpe a ikpe. Ikwu-onu me kwuru jeekpe a ikpe n'obochi ipne-aznu.

49 Kwnornu nu m kwúge m oka ke m, kovu Nda m nye ziyaru m nyernu m iwu nhne me jaakaa, nu nhne me jookwu.

50 M magwu m nhne o nyernu n'iwu bu budnu kwó okwo. Nhne me kwuru bu nhne Nda m karu me kwu.”

13

Jizosi snuru ochi ele sno apna a

1 N'obochi ke boru obochi Iriri Ogawhe, Jizosi magwu nu ige o jaaghasa owa ka lakwnusi Nda a dulam. O whnurnu ele ka ele zi n'owa n'anya. O whnurnu be n'anya du ipne-aznu.

2 Kpa be neeri wiri anyasnu, Ekwensu yisiri a nu mkpoma Judasi Isikarioti nnwo Sajmoni o re Jizosi.

3 Jizosi magwu nu Nda a yisilem kpakara nhne n'aka a, nu o hi hne Chiokike zi va, o naalahnakwnusi Chiokike.

4 O lizo n'olu wiri, wopu iwo olu a, gweru akata kne n'ikwnu a.

5 O wusi mini nu rime agbugba, bete nosnu ochi ele sno apna a, gweru akata o kne n'ikwnu nookwnosna be.

6 O va hne Sajmoni Pita zi, Pita sikwa a, “Nyenwe aj, i josnu ochi m?”

7 Jizosi saru a, “I ma nhne me neeme kitna, kovu omekwo, i jaamahia.”

8 Pita kaa, “I josnu ochi m rja rja.”

Jizosi saru a, “O buru nu m snuge m ochi i, me nu ji nwékọ nhne obula.”

9 Pita saru a, “O buru kpam, i snu ochi m kpọ, kovu snu ma aka m lawuru ma risi m.”

10 Jizosi saru a, “Nye hnarnu ehni zi richna kpam kpam, o kwésile o snu ehni a berere, okwolem o snu ochi a. Kpakara anu zi richna, kovu o buo kpakara anu.”

11 Kwnornu nu Jizosi magwu nye jeere a, bu nhne o kwno kaa nu kpakara be zi richna, okwolem otu badnu kpọ nye zila richna.

12 Nga o snukparu be ochi, o woru iwo olu a berere daziri eli nu hne o zi nu mbom. O sikwa be, “Anu ghohiaru nhne me mennu anu?”

13 Anu noosukwu m Nye-zni-nhne, nu Nyenwe anu, o bu ezi oka, kwnornu nu o nhne me bu.

14 Kitna, me bu Nyenwe anu nu Nye-zni-nhne snuru ochi anu, anu kwesiri o snurita ochi ibne anu.

¹⁵ M gesiri m anụ nhne atụ ma anụ mee kpa me mernu.

¹⁶ Me kanụ anụ ezi ọka, ọ zà ọhi ke kakwo nyenwe a, ọ zà nnwọ izi ke kakwo nye dusiri a izi.

¹⁷ Mkpoma jọoso anụ n'onu, ọ bụru nụ anụ mahjuru nhne ka, neeme be.

¹⁸ “M zà m nookwu kwnornu kpakara anụ. M magwụ m ele me hohiaru, kovu nhne ọkwukwo nsọ kwuru jeemezuriri, ‘Nye riri wiri m lizọru megidne m.’

¹⁹ M naakanụ anụ ezi ọka kịtna sị o mee, ma nga o jeeme anụ kweru nụ m bụ m ya.

²⁰ Me kanụ anụ ezi ọka, nye ọbula ke jaan-abnanya nye me ziznenu, nabnanyarnụ m, nye nabnanyarnụ m, nabnanyarnụ nye ziyaru m.”

*Jizọsi kwuru ọka
gbasiri o rure a*

(Mat 26:20-25; Mak 14:17-21; Luk 22:21-23)

²¹ Nga Jizọsi kwuru ka, o gbu a igbugbu nụ mkpoma k'agida, ọ kaa, “Me kanụ anụ ezi ọka, otu badnụ n'esisilawuru anụ jeere m.”

²² Ele sno apna a lehnata ẹhni be anya. Be máa nye ọ naakaa.

²³ Otu nye sno apna a Jizọsi whnurnu n'anya ke dazị Jizọsi ndundu n'ehni.

²⁴ Saimoni Pita kanụ a, “Sikwahia a nye ọ bụ.”

²⁵ Nye sno apna wam dnabnenu nụ mkpoma Jizọsi sịkwa a, “Nyenwe aị, ọ bụ nyele?”

²⁶ Jizọsi sarụ a, “Ọ bụ nye me jeerusi brẹdi ka nụ rime wiri nyee.” O gweru otu ibekala brẹdi, rusi a nụ wiri nyee Judasị, nnwọ Saimoni Isikarioti.

²⁷ Ngangam Judasị gweruru brẹdi wam, Ekwensu bna nụ rime a. Jizọsi kanụ a, “Ọ zị nhne i neeme, mee a wara wara.”

²⁸ Ọ zà nye zị pị neeri wiri mahjuru nhne Jizọsi nookwu.

²⁹ Hne ọ bụ Judasị vugwu rẹkpa iwai, agwina ele sno apna Jizọsi neeche nụ Jizọsi kannụ a o zne zuya nhne be jeeri n'Iriri wam, mọbu o kesi ele mboni iwai.

³⁰ Judasị narnụ brẹdi wam, ọ whọga ngangam. Ka neeme n'abalị.

Iwu ikne

³¹ Nga Judasị whọgaru, Jizọsi kaa, “Kịtna, be jeenye Nnwọ ke Badnụ igwugwu, be jeenye masị Chiokike igwugwu nụ rime a.

³² Ọ bụru nụ be nyee Chiokike igwugwu nụ rime a, Chiokike jeenye Nnwọ a igwugwu n'iwuhuru a. O jeeme a kịtna.

³³ Rụmu m, me nụ anụ jáazị gbu ọkwnu. Anụ joo pio m, kovu me kanụ anụ nhne me kannụ ele risi ele Ju, anụ jéenwe rikne va hne me neezne.

³⁴ “M neenye anụ iwu ikne, anụ whnụ ibne anụ n'anya. Lele kpa me whnurnu anụ n'anya, anụ jì ọgwọ ọ whnụ ibne anụ n'anya.

³⁵ Kpakara ele badnụ jaamahia nụ anụ bụ ele sno apna m, ọ bụru nụ anụ whnụ ibne anụ n'anya.”

*Jizọsi kwuru nụ Pita
jọogonahoru a*

(Mat 26:31-35; Mak 14:27-31; Luk 22:31-34)

³⁶ Saimoni Pita sịkwa a, “Nyenwe aị, i zne hnele?”

Jizọsi sarụ a, “Anụ jéenwe rikne sno m hne me neezne kịtna, kovu omekwo, anụ joo sno m.”

³⁷ Pita sịkwa a, “Kini mernu me jéenwe rikne sno i kịtna? M joonwumu i ẹnwu.”

³⁸ Jizọsi sarụ a, “I joonwu kwnornu m n'ezi? Me kanụ i ezi ọka, sụ okne ọchichi kwna ẹkwna, i jọogonahoru m mgba ẹto.”

14

Jizọsi bụ apna

¹ “Mkpoma lákwadia anụ mini. Anụ kweru nụ Chiokike, anụ kweru masị nụ me.

² Agida ọro jiri n'oro Nda m, m naala zne mekwatanụ anụ ọnodi. Ọ bụru ọ bụo kpa m, m znenu m ọkanu anụ.

³ Me zne mekwatanụ anụ ọnodi, m jee-hiehna, kwuru anụ yisi n'ehni m, ma me nụ anụ daziri n'otu hnanum.

⁴ Anụ magwụ apna hne me neezne.”

⁵ Tọmosi kanụ a, “Nyenwe aị, a máa hne i neezne, ndaa kpa a jaamahia apna a?”

⁶ Jizọsi sarụ a, “Mawa bụ apna nụ ezi ọka nụ bụdnu. Ọ zà nye jeezne hne Nda m zị okwokọlam ma o hiri nụ me.

⁷ Ọ bụru nụ i magwụ m n'ezi, i jaamahia Nda m masị. Hite kịtna anụ magwụ Nda m, anụ whnuna a anya.”

⁸ Filipu kaa, “Nyenwe aị, gesi aị Nda i, o joozunu aị.”

⁹ Jizọsi sarụ a, “Filipu, me nụ anụ zị ogol-ogo ige ka, i máa nye me bụ? Nye ọbula ke whnurnu m, whnurnam Nda m. Ndaa kpa i naakaa, ‘Gesi aị Nda.’

¹⁰ Ọ bụru nụ i kwége sa nụ m zị m nụ rime Nda m, Nda m zị nụ rime m? Ikwu-ọnu me nookwu bụo ke m. Nda m ke zị nụ rime m nọornu ẹnu a.

¹¹ Anụ kweru nga me karu nụ m zị m nụ rime Nda m, Nda m zị nụ rime m. Ọ bụru nụ ọ zà nhne berere, anụ kweru kwnornu nụ ẹnu ele ka.

¹² Me kanụ anụ ezi ọka, nye ọbula ke kweru nụ me jooonu ẹnu me nọornu. Owe! Ọ jooonu ẹnu ke kakwo ka kwnornu nụ m naalakwnusi Nda m.

¹³ Kpakara nhne anụ joooro nụ rẹwhna m, m jeeme a, ma be nyee Nda igwugwu hite nụ Nnwọ a.

¹⁴ Nhne obula anụ rjoru nụ rẹwhna m, m jeeme a.

Jizōsi kweru mkwna

Enine Nso

¹⁵ “O bụru nụ anụ whnurnu m n'anya, anụ jaabita nhne me nyernu n'iwu.

¹⁶ M jaariasno Nda m, o jeenye anụ Nye Okasi Mkpoma berere, nye jaadazinu anụ tim tom.

¹⁷ O bụ Enine ezi oka, ke owa jaanahjali, kwnornu nụ ele zị n'owa nwée rikne whnụ a mọbu mahja a. Kovu anụ magwu a, kwnornu nụ o wu nụ rime anụ, o jaadazigidnenu anụ.

¹⁸ M jaagharu anụ etekne, m jee-hiehnakwnusi anụ.

¹⁹ Ige matị owa jowhnu m, kovu anụ jowhnu m. M zị m budson, kam kpayaru anụ jaazị masị budson.

²⁰ N'obochi wam, anụ jaamahja nụ m zị m nụ rime Nda m, anụ nụ rime m, lele kpa me zị nụ rime anụ.

²¹ “Nye obula ke jaabita nhne me nyernu n'iwu, bụ nye whnurnu m n'anya. Nye whnurnu m n'anya bụ nye Nda m jowhnu n'anya, m jowhnu masị a n'anya, gweru ehni m gesi a.”

²² Judasị (o bụo Isikarioti) kaa, “Nyenwe aị, ndaa kpa i jeegesi aị ehni i, o bụo ele owa?”

²³ Jizōsi saru a, “Nye obula ke whnurnu m n'anya, jaabita ikwu-onu m. Nda m jowhnu a n'anya, me nụ Nda m jaavakwnusi a, aị nụ ya joowu.

²⁴ Nye obula ke whnuge m n'anya, jaabita ikwu-onu m. Ikwu-onu ke anụ nurnu bụo ke m. Be hi n'aka Nda m, nye ziyaru m.

²⁵ “M naakanu anụ ka kpa me nụ anụ zị.

²⁶ Kovu Nye Okasi Mkpoma wam, Enine Nso, nye Nda m jeeziyanu anụ nụ rẹwhna m, jeezni anụ kpakara nhne. O jeeme anụ chenwanya kpakara nhne me zirniri anụ.

²⁷ M nesisgbasinu anụ udno, m neenye anụ udno m, o bụo lele kpa owa neenye bụ kpa me neenye anụ. Mkpoma lakwadia anụ mini. Anụ tuko ogwnu.

²⁸ “Anụ nurnu kpa me karu nụ m jaala, kovu m jeehiehnakwnusi anụ. O bụru nụ anụ whnurnu m n'anya, anụ znernu onwudna, kwnornu nụ m naalakwnusi Nda m, kwnornu nụ Nda m kakwo m.

²⁹ M kannu m anụ kina hne o yeemege, ma nga o jeeme anụ kweru.

³⁰ M jaakanu anụ agida oka berere, kwnornu nụ nye nechi owa ka vawa. Kovu o nwée rikne hne me zị.

³¹ Kovu owa jaamahja nụ m whnurnu Nda m n'anya, bụ nhne kpayaru me neeme kpakara nhne lele kpa o nyernu m iwu. Anụ va ma a whoga hna.

15

Isisi vāini nū nkala a

¹ “Mawa bụ isisi vāini n'ezi, Nda m bụ nye ernu ekwu.

² Nkala obula ke mige mkpuru nụ rime m, o gbukwama a. O kwinasna nkala obula ke naami mkpuru ma o minya agida mkpuru, ma o ziri richna.

³ Anụ zị richna hite n'ikwu-onu me kwuru.

⁴ Anụ dazigidne nụ rime m, me nụ rime anụ. O zá nkala ke nwernu rikne mji mkpuru n'ehni a, okwolem ma o zị n'isisi, otu aka wam, anụ nwée rikne mji mkpuru, okwolem ma anụ dazigidnenu nụ rime m.

⁵ “Mawa bụ isisi vāini, anūwa bụ nkala a. Nye obula ke jaadazigidne nū rime m, me nū rime a, jaami agida mkpuru, kwnornu nū anū nwée rikne meli nhne obula hne me zila.

⁶ Nye obula ke dazigidnenu nū rime m, be jootuwu a lele nkala ke mige mkpuru. O kpownu, ele badnū chikota kpone a nū bekwnu.

⁷ O bụru nū anū dazigidne nū rime m, ikwu-onu m dazigidne nū rime anū, anū jorio nhne obula zị anū mkpa, o jooburu ke anū.

⁸ Ka bụ nhne neenye Nda m igwugwu, anū minya agida mkpuru, ke jeegesi nū anū bụ ele sno apna m.

⁹ “Lele kpa Nda m whnurnu m n'anya, bụ kpa me whnurnu anū n'anya. Anū dazigidne n'owhnun'anya m.

¹⁰ O bụru anū bita nhne me nyernu n'iwu, anū jaadazigidne n'owhnun'anya m, lele kpa me bitaru nhne Nda m nyernu n'iwu, m dazigidne n'owhnun'anya a.

¹¹ M naakanu anū nhne ka ma ovu oso n'onu m ziri nū rime anū, ma ovu oso n'onu anū zu ozu.

¹² Ka bụ nhne me nyernu n'iwu, anū whnurita ibne anū n'anya lele kpa me whnurnu anū n'anya.

¹³ O zá owhnun'anya ke kakwo ka, nū badnū tuwhuru budson a kwnornu ele enyi a.

¹⁴ Anū bụ ele enyi m, o bụru nū anū mee nhne me nyernu n'iwu.

¹⁵ M zá m noosukwu anū ele izi berere, kwnornu nū nnwo izi máa nhne nyenwe a neeme. Kovu m sukwuru m anū ele enyi m, kwnornu nū kpakara nhne me nurnu n'onu Nda m bụ nhne me kannu anū.

¹⁶ O bụo anū hohiaru m, kovu me hohiaru anū, bita anū ichne, ma anū zne minya mkpuru, ma mkpuru anū dazigidne. Ka jeeme, nhne obula anū jorio Nda m nū rẹwhna m, o jeenye anū.

¹⁷ Ka bụ nhne me nyernu n'iwu, anū whnurita ibne anū n'anya.

Owa snornu ele sno apna

Jizōsi irno

18 “O bǫru n’owa sno anu irno, anu chenwanya nu o beru osno sno m irno.

19 O bǫru nu anu bu ke owa, owa jowhnu anu n’anya lele nhne ke a. Kovu m hohiaru m anu hite n’owa, anu buo ke owa, ka kpararu owa snornu anu irno.

20 Anu chenwanya nhne me kannu anu, O za phi ke kakwo nyenwe a. O bǫru nu be kpaknarnu m ehni, be jaakpakna anu ehni masi. O bǫru nu be bitaru ikwu-omu m, be jaabita ke anu.

21 Be jeeme anu kparara nhne ka kwnornu nu anu kweru nu rewhna m, be ma nye ziyaru m.

22 O bǫru nu m vage m kwunu be oka, ikpe mmehie baamana be. Kitna be jeeji kini gohoru ehni be hite nu mmehie?

23 Nye obula ke snornu m irno, snornu Nda m irno.

24 O bǫru nu m rnuge m ernu n’esilawuru be ke o za nye berere rnurnu, ikpe mmehie baamana be. Kitna be whnurnu nhne me rnurnu, be sno me nu Nda m irno.

25 Ka bu ma nhne be gbaru n’okwukwo nso mezu, ‘Be snornu m irno hne o za nhne me mernu be.’

26 “Nga Nye Okasi Mkpoma wam varu, Enine ke ezi oka, Nye me jeeziya hite nu hne Nda m zi, nye hi hne Nda m zi va, o jaagbanu m akebne.

27 Anu jobu masi ele akebne m kwnornu nu me nu anu zi hite n’opanizo.

16

1 “M kannu m anu kparara nhne ka o zi anu dnahnala hite n’okwnata ovu anu.

2 Be jaachihala anu n’oro ogbako ele Ju, ige vawa nga nye obula ke gburu anu jeeche nu o nornu ernu Chiokike.

3 Be jeeme anu nhne nu kpa kwnornu nu be ma Nda m mibu me.

4 M kannu m anu nhne ele ka, ma nga be jeeme anu chenwanya nu m kannu m anu nhne gbasiri be. M kage m be nu mbom kwnornu nu me nu anu zi.

Ernu ke Enine Nso

5 “Kitna, m naalahna hne nye ziyaru m zi. Kovu o za nye n’esilawuru anu nesikwa m, ‘Ndaa hne i neezne?’

6 Kitna me kannu anu, o noogbu anu igbugbu nu mkpoma.

7 Kovu me kanu anu ezi oka, o kanu anu mma me lahna, kwnornu nu o buri m lage m, Nye Okasi Mkpoma wam jaavakwnusi anu. Kovu me la, m jeeziyanu anu ya.

8 Nga o varu, o jaabanu owa mbna kwnornu mmehie, nu ome mma nu ikpe.

9 O jaabanu owa mbna gbasiri mmehie, kwnornu nu be kwage nu me,

10 gbasiri ome mma, kwnornu nu m naalakwnusi Nda m, anu jowhnuma m anya berere,

11 gbasiri ikpe, kwnornu nu ikpe hieru nye risi nechi owa ka.

12 “Agida nhne zi ke me jaakanu anu, kovu anu jeenwe rikne vuru be kitna.

13 Kovu nga Enine ezi oka wam varu, o jooduru anu bna nu kparara ezi oka. O jookwu nhne aka ke a, kovu kparara nhne o joonu bu nhne o jaakanu anu. O jaakanu anu nhne ke jaava nu ruwhnu.

14 O jeenyne m igwugwu kwnornu o jeegeru nhne me kwuru kanu anu.

15 Kparara nhne Nda m nwernu bu ke m. O bu nhne me jiri kaa nu Enine Nso jeegeru nhne ke m kanu anu.

Nhne igbugbu nu snarnima

16 “Ige matj anu jowhnu m berere, omekwo, ige matj anu jowhnu m.”

17 Agwna ele sno apna a nesikwarita ibne be, “Kini bu risi nhne ka? O karu, ‘Ige matj anu jowhnu m, ige matj anu jowhnu m,’ berere, ‘M naalakwnusi Nda m.’”

18 Be nesikwarita ibne be, “Kini bu ige matj? A ma nhne o nookwu oka a.”

19 Jizosi whnurnu nu be noopio o sikwa a, o kanu be, “M karu m ige matj anu jowhnu m, omekwo, ige matj anu jowhnu m. O bu nhne anu nesikwarita n’esilawuru anu?”

20 Me kanu anu ezi oka, anu jaakwna ekwna, gba mkpe, kovu owa jowhnu. Anu jeenwe nhne igbugbu, kovu nhne igbugbu anu jooqho ovu oso n’onu.

21 Nga nyerinya nomu nnwo, o zi nu nhne igbugbu kwnornu nu rime neeme a, kovu nga o mudnarnu nnwo, o chezu kparara nhne igbugbu a, kwnornu snarnima nu o muru nnwo ikne n’owa.

22 Kpam masi, anu nwernu nhne igbugbu kitna, kovu m jowhnu anu anya berere, anu jeenwe snarnima, o za nye jeenwe rikne nahoru anu ovu oso n’onu anu.

23 N’obochi wam, anu jorio m nhne obula, me kanu anu ezi oka, Nda m jeenyne anu nhne obula anu jorio a nu rewhna m.

24 Tem du kitna, o za nhne obula anu rioru nu rewhna m. Anu ri, anu jenwehia, ma ovu oso n’onu anu zu ozu.

Mmeri megidne owa

25 “M ji m elulu kwunu anu oka, ige vawa nga me jookwunu anu oka n’elulu berere. M jookwunu anu oka zi snam nhne gbasiri Nda m.

26 N’obochi wam, anu jorio nhne nu rewhna m, m jaakaa nu m jorio Nda m nu risi anu.

27 Kwnornu nu Nda m niwhuru a whnurnu anu n’anya, kwnornu nu anu whnurnu m n’anya, anu kweru nu m hi m hne Chiokike zi va.

²⁸ M hi m hne Nda m zi va bna n'owa, kɪtna, m nɛsɪgbasi ɔwa naalahna hne Nda m zi.”

²⁹ Ele sno apna a kaa, “Kɪtna, ɪ nookwunu aɪ ɔka dnornu aɪ anya, ɪ zɑ nookwu n'elulu.

³⁰ Kɪtna a magwɔ nɔ ɪ magwɔ kpakara nhne. Ɔ zɑ mkpa nɔ nye ɔbula sɪkwa ɪ aɟɟi. Ka mernu a kweru nɔ ɪ hi hne Chiokike zi va.”

³¹ Jizɔsi saru be, “Anu kweru kɪtna?”

³² Ige vawa, ige wam valɛm, nga be jɛchisa kpakara anu, nye ɔbula n'oro ke a. Anu jɛsɪgbasi me nu nsnɔnu m, kɔvu m zɑ m nɔ nsnɔnu m, kwnornu nɔ me nɔ Nda m zi.

³³ “M kannu m anu nhne ka ma anu nwe udno nɔ rime m. N'owa anu jeenwe mnekpehni, kɔvu mkpɔma si anu rikne, m megbulem ɔwa.”

17

Jizɔsi kpennu ele sno apna a okpukpe

¹ Nga Jizɔsi kwukworu ɔka ele ka, o lelizo anya n'oligwe, kaa,

“Nda m, ige wam valɛm, nyee Nnwɔ ɪ igwugwu, ma Nnwɔ ɪ nyee ɪ igwugwu.

² I nyernu a Inknerna nɔ hne kpakara ele badnu zi, ma o kesi kpakara ele ke i nyernu a buɔnu kwɔ okwo.

³ Ka bu buɔnu kwɔ okwo, ma ele badnu mahɔa ɪ, ɪ bu ɔtu Chiokike ke bu ezi, nɔ Jizɔsi Karaɪsi nye ɪ ziyaru.

⁴ M nyernu m ɪ igwugwu n'owa hite n'ornuka ɛrnu ɪ nyernu m me rnu.

⁵ Kɪtna Nda m, nyee m igwugwu nɔ ruwhnu ɪ, bu igwugwu ke me nwernu su ɪ kpuru ɔwa.

⁶ “M mernu ele badnu mahɔa rɛwhna ɪ bu ele ɪ nyernu m hite n'owa. Be bu ele ke i. Ji nyernu m be. Be bitaru ikwu-ɔnu ɪ.

⁷ Kɪtna, be magwɔ nɔ kpakara nhne ɪ nyernu m hi n'aka ɪ va.

⁸ M nyernu m be ikwu-ɔnu ke ɪ nyernu m. Be gweru a, be magwɔ n'ɛzi nɔ m hi m hne ɪ zi whuya, be kweru nɔ ji ziyaru m.

⁹ M neekpenu be okpukpe. M zɑ m neekpenu ɔwa okpukpe, kɔvu ele wam ɪ nyernu m, kwnornu nɔ be bu ke i.

¹⁰ Kpakara nhne me nwernu bu ke i, kpakara nhne ɪ nwernu bu ke m masi, be bu igwugwu m.

¹¹ M zɪma m n'owa berere, kɔvu be zi n'owa, ma naavakwnusi ɪ, Nda zi nsɔ, bikwata be hite nɔ rikne ke rɛwhna ɪ, rɛwhna ke ɪ nyernu m, ma be ziri n'otu lele kpa a zi n'otu.

¹² Nga me nɔ be zi, m bitaru m be nɔ rɛwhna ɪ, bu rɛwhna ke ɪ nyernu m, m segidnenu m be. Ɔ zɑ nye whuru owu nɔ rime be, okwoklam nye wam whuzne owuzne, ma nhne be gbaru n'okwukwo nsɔ mezu.

¹³ “M naavakwnusi ɪ kɪtna, m nookwu nhne ka n'owa ma be nwernu ovu ɔso n'ɔnu m, ma ovu ɔso n'ɔnu be zu ozu.

¹⁴ M nyernu m be ikwu-ɔnu ɪ, ɔwa snornu be irno kwnornu nɔ be buo ke ɔwa, lele kpa me buo ke ɔwa.

¹⁵ M zɑ m naakaa ji gweme be n'owa. Kɔvu m nɔorio ɪ ma ɪ bita be zɔma n'aka nye ɔjo wam.

¹⁶ Be buo ke ɔwa, lele kpa me buo ke ɔwa.

¹⁷ Bita be nsɔ hite n'ɛzi ɔka ɪ, ikwu-ɔnu ɪ bu ezi ɔka.

¹⁸ Lele kpa ɪ ziyaru m n'owa, bu kpa me neezizne be n'owa.

¹⁹ M kwnornu be bita ɛhni m nsɔ, ma be bita be nsɔ n'ɛzi ɔka.

²⁰ “M zɑ m neekpenu be okpukpe kpɔi, kɔvu m neekpekɔtanu ele jeekweru nɔ me hite n'ikwu-ɔnu be.

²¹ M neekpe ma kpakara be ziri n'otu, Nda m, lele kpa ɪ zi nɔ rime m, me nɔ rime ɪ. Kpakara be ziri n'otu ma ɔwa kweru nɔ ji ziyaru m.

²² M nyernu m be igwugwu ke ɪ nyernu m, ma be ziri n'otu lele kpa a zi n'otu.

²³ Me ziri nɔ rime be, ji nɔ rime m, ma be zu ozu n'ɔzi n'otu, ma ɔwa mahɔa nɔ ji ziyaru m, nɔ ɪ whnurnu be n'anya lele kpa ɪ whnurnu m n'anya.

²⁴ “Nda m, ji nyernu m be, m noopio be daziri hne me zi, ma be whnɔ igwugwu m, ka bu igwugwu ke ɪ nyernu m kwnornu nɔ ɪ whnurnu m n'anya si ɪ kpuru ɔwa.

²⁵ “Nda ke mee mma, ɔwa maa nye ɪ bu, kɔvu m magwɔ m nye ɪ bu, ele ka magwɔ masi nɔ ji ziyaru m.

²⁶ M mernu m be mahɔa ɪ, m jaazi neeme kpam ma ɔwhnun'anya ke ɪ whnurnu m ziri nɔ rime be, ma me nɔ be buɔnu ɔtu.”

18

Be nwudnenu Jizɔsi

(Mat 26:47-56; Mak 14:43-50; Luk 22:47-53)

¹ Nga Jizɔsi kpekworu okpukpe ka, ya nɔ ele sno apna a whoga whe mini Kidirɔni. Be bna n'otu ɛkwu ke zi pii.

² Judasi nye reru a magwɔ pii, kwnornu nɔ Jizɔsi nɔ ele sno apna a neezne pii ige ɔbula.

³ Judasi chiri ele ɔgwɔ nɔ ele neese Oro Nsɔ Chiokike, ele ele risi arɔhna nɔ ele Farisi ziznenu, be vu tɔnji nɔ ɔwa, nɔ mgwɔna ɔgwɔnu.

⁴ Kpa Jizɔsi magwɔ kpakara nhne jaadnakwasɔ a, o znekwnusi be, sɪkwa be, “Anu noopio nyele?”

⁵ Be kaa, “Jizɔsi, nye Nazareti.”

Jizɔsi kaa, “Ɔ bu mawa.” Judasi nye reru a nɔ be gwuzo.

⁶ Nga Jizósi karu, “O bú mawa,” Be lahna aznu, dna n’eli.

⁷ Jizósi síkwa kwno be, “Ndaa nye anu noopio?”

Be kaa, “Jizósi, nye Nazareti.”

⁸ Jizósi kanu be, “M kannu m anu nu me bu ya. O buru nu anu noopio m, anu gharu ele ka ma be la.”

⁹ Ka bú ma nhne o kwuru mezu, “Kpakara ele i nyernu m, o zá otu ke me tuwhuru.”

¹⁰ Sajmoni Pita ji ama-ogwunu, o mñohia a, gbu nye izi nye risi arjohna, bihala a nsni akarikwnunga. Rëwhna nye izi wam bú Makósi.

¹¹ Jizósi kanu Pita, “Mñohnasi ama-ogwunu i n’obo a. O bú nu m jónwo okiko awhnuwhnu Nda m nyernu m me nwó?”

Jizósi gwuzo nu ruwhnu Anasi

(Mat 26:57,58; Mak 14:53,54; Luk 22:54)

¹² Ele ogwunu nu nye risi be, nu ele neese Oro Nso Chiokike nwudne Jizósi, be kne a eriri.

¹³ Be beru osno gwezne a nu ruwhnu Anasi, nda nnwerne Kayafasi, nye risi arjohna n’awha wam.

¹⁴ O bú Kayafasi nye kannu ele Ju nu o buru oma otu badnu nwuhianu kpakara be enwu.

Pita gonahoru Jizósi

(Mat 26:69,70; Mak 14:66-68; Luk 22:55-57)

¹⁵ Sajmoni Pita nu nye sno apna Jizósi ke berere snornu Jizósi. Nye risi arjohna magwu nye sno apna a ka, o snornu Jizósi bna n’ederezi nye risi arjohna.

¹⁶ Kóvu Pita daziri nu ngeri mgbo n’ederezi, nye sno apna wam ke nye risi arjohna magwu zne kanu nnwó rinya zi n’onu-mgbo, o kwubnanya Pita.

¹⁷ Nnwó rinya zi n’onu-mgbo kanu Pita, “I bú otu nu rime ele sno apna nwerukna ka.”

Pita saru, “M búla m.”

¹⁸ Iyi nootu, ele izi nu ele neese nhne kpawhúsi békwnu, be gwuzoru gburugburu békwnu wam naakwna iyi. Pita gwuzo masi n’esilawuru be, naakwna iyi.

Nye risi arjohna

nëesikwa Jizósi ajiji

(Mat 26:59-66; Mak 14:55-64; Luk 22:66-71)

¹⁹ Nye risi arjohna síkwa Jizósi ajiji gbasiri ele sno apna a, nu nhne o neezni.

²⁰ Jizósi saru a, “M kwuru m oka nu ogbo ohna, kpakara nhne me znirni bú n’oro ogbako ele Ju nu n’oro Nso Chiokike hne kpakara ele Ju naagbakó. O zá nhne me kwuru nu mgwúgwa.

²¹ I síkwa m ajiji, síkwa ele nurnu nhne me kwuru. Be magwu masi nhne me kwuru.”

²² Nga Jizósi kwuru ka, otu nye neese nhne gbo a aka, kaa, “Kini mernu i nookwunu nye risi arjohna oka kpa?”

²³ Jizósi saru a, “O buru nu m kwuru m nhne búo oma, gba akebne nhne ojo me kwuru. Kóvu o buru nu m kwuru m ezi oka, kini mernu i gboru m aka?”

²⁴ Anasi zizne a ke Kayafasi nye risi arjohna, hne o kne koriri eriri.

Pita gonahoru Jizósi

berere

(Mat 26:71-75; Mak 14:69-72; Luk 22:58-62)

²⁵ Kpa Sajmoni Pita gwuzo naakwna iyi, be síkwa a, “I búo otu nu rime ele sno apna a sa?”

Pita go, kaa, “M búla m.”

²⁶ Otu nu rime ele izi nye risi arjohna nwene nwerukna wam Pita bihalaru nsni a, gwelizu onu, síkwa a, “O búo ji nye me whnurnu n’ekwu wam?”

²⁷ Berere kwno, Pita go, ngangam, okne ochichi kwna ekwna.

Jizósi gwuzo nu

ruwhnu Paileti

(Mat 27:1,2,11-14; Mak 15:1-5; Luk 23:1-5)

²⁸ Be hi n’oro Kayafasi kwuru Jizósi zne n’obna nye ochichi, n’onu osisi. Ele Ju bnána nu rime n’obna kwnornu nu be noopio o bita ehni be richna ma be nwe rikne ri Iriri Ogawhe.

²⁹ Paileti whokwnusi be n’ederezi síkwa be, “Ndaa nhne anu noobno nwerukna ka?”

³⁰ Be saru a, “O buru nu o búo nye aghorome, a znéne okwuyanú i ya.”

³¹ Paileti kaa, “Anu kwuru a kpe a ikpe lele kpa iwu anu kwuru.”

Be kaa, “A nwé rikne gbu nye obula.”

³² Ka bú ma nhne Jizósi kwuru mezu ke gbasiri okpa enwu o jónwu.

³³ Paileti lahna n’obna, síkwa Jizósi, “I bú eze ele Ju?”

³⁴ Jizósi síkwa a, “Ki o bú echiche i, sobu ele berere kannu nhne gbasiri m?”

³⁵ Paileti sa a, “M bú nye Ju? O bú ele ke i nu ele risi arjohna be kwuyannu m ji. I mernu kini?”

³⁶ Jizósi kaa, “Eli-eze m búo ke owa ka. O buru nu o bú ke owa ka, ele izi m znernu olu ogwunu ma ele risi ele Ju gharu o gweru m nyee n’aka be. O zá, eli-eze m búo ke owa ka.”

³⁷ Paileti síkwa a, “Ke bú nu i bú eze?”

Jizósi saru a, “Jiwa karu nu m bú m eze. Ka bú risi nhne be kwnornu mu m nu nhne me kwnornu va nu rime owa, ma m gbanu m ezi oka akebne. Nye obula ke zi n’ezi oka noobnonu m nsni.”

³⁸ Paileti síkwa a, “Kini bú ezi oka?”

Be marnu Jizosi ikpe enwu

(Mat 27:15-31; Mak 15:6-20; Luk 23:13-25)

Paileti whokwnusi kwno ele risi ele Ju n'ederezi kanu be, "O za nhne ojo me whnrnu nu rime nwerukna ka rja rja.

³⁹ O bu omen'eli anu me sigbasinu anu otu nye ikelu n'ige Iriri Ogawhe. Anu pioru me sigbasinu anu eze ele Ju?"

⁴⁰ Kpakara be siwama, "Oza, o buo nwerukna ka, sigbasinu a! Barabasi." (Barabasi bu nye buznu.)

19

¹ Paileti kwuru Jizosi pnja nhne.

² Ele ogwnu kpa okpu igwnu kpusi a nu risi, be wosi a iwo odno odno.

³ Be znekwnusi a, kaa, "A bekwulem ji, Eze ele Ju." Be gbọ aka nu ruwhnu.

⁴ Paileti lahna kwno hne ele risi ele Ju zi, o kanu be, "Anu le, m jookwuyan anu ya, ma anu marnu nu o za nhne ojo me whnrnu nu rime a."

⁵ Jizosi woru iwo odno odno nu okpu igwnu whuya ederezi, Paileti kanu be, "Anu le nwerukna wam."

⁶ Nga ele risi arjohna nu ele neese Oro Nso Chiokike whnrnu a, be siwama, "Kpogidne a n'ogba, kpogidne n'ogba."

Paileti kanu be, "Anu kwuru a kpogidne a n'ogba n'aka anu. Kovu me kanu anu, o za nhne ojo me whnrnu nu rime a."

⁷ Ele risi ele Ju kwusi rikne, "A nwernu iwu, iwu a! kwuru nu o kwesiri enwu kwnornu nu o kanu nu o bu Nnwọ Chiokike."

⁸ Nga Paileti nrnu ka, o tu ogwnu k'agida.

⁹ O lahna kwno n'obna, o sika Jizosi, "Ndaa hne i hi va?" Kovu Jizosi sala a oka obula.

¹⁰ Paileti kanu a, "I za naasa m oka, o bu nu i ma nu m nwernu m rikne o sigbasi i mọbu o kpogidne i n'ogba?"

¹¹ Jizosi kaa, "I beenwene rikne megidne m o buru nu be nyene i rikne hite n'oligwe, nye kwuru m nyee n'aka i nwe mmehie ke kakwo."

¹² Nga Paileti nrnu ka, o gbalị o sigbasi Jizosi. Kovu ele risi ele Ju si olo, "O buru nu i sigbasi a, i buo enyi Siza. Nye obula ke neeme ehni a eze neemegidne Siza."

¹³ Nga Paileti nrnu nhne ka, o kwuhala Jizosi ederezi, daziri eli nu ngadna nu hne be jiri akaworugwu mee, be kwu n'onu Hiburu Gabata.

¹⁴ Nhne ka mernu n'iwihnehnie, n'otnu-ige ke nri nu ebo* n'obochi ojiknenu Ogawhe.

Paileti kanu be "Anu le eze anu."

¹⁵ Be siwama, "Gwepu a, gwepu a, kpogidne a n'ogba."

Paileti sika be, "Me kpogidne eze anu n'ogba?"

Ele risi arjohna saru a, "A nwée eze berere kwolem Siza."

¹⁶ Paileti nyewhete be Jizosi, ma be kpogidne a n'ogba.

Be kpogidneru Jizosi n'ogba

(Mat 27:32-44; Mak 15:21-32; Luk 23:26-43)

Ele ogwnu kwuru Jizosi.

¹⁷ Jizosi vuru ogba a, o whoga zne hne be kwu Hne Okpokoro Risi (ke bu n'onu Hiburu Golugota.)

¹⁸ Be kpogidne a n'ogba pii, ya nu ele rukna lawuru berere, otu badnu n'akarikwnunga a, nye ke berere n'akarita a. Jizosi ziri n'esilawuru be.

¹⁹ Paileti gbasiri nhne be joogwnu tukwasi a n'olu ogba a, "Jizosi, nye Nazareti, Eze ele Ju."

²⁰ Agida ele Ju gwnrnu a, kwnornu nu hne be kpogidneru Jizosi n'ogba zila ikere nu rime eli-ohna. Be gbaru nhne ogwnugwnu wam n'onu Hiburu, Latini nu Giriki.

²¹ Ele risi arjohna ele Ju kanu Paileti, "I gbasị 'Eze ele Ju,' kovu gbasị, 'Nwerukna ka karu nu o bu eze ele Ju.'"

²² Paileti saru be, "Nhne me gbaru dazim kpa me gbaru a."

²³ Nga ele ogwnu kpogidneru Jizosi n'ogba, be gweru kpakara iwo a keru n'esilawuru be, keme be nga eno, be gweru a otu otu. Be chiru iwo olu a ke be dowala odowa be duru hi n'olu du n'eli.

²⁴ Be kaa, "A jodowa iwo ka, kovu a joovu ogbanuchi ma a mahia nye jeenwe a." Ka bu ma nhne be gbaru n'okwukwo nso mezu, ke kwuru,

"Be keriri kpakara iwo m n'esilawuru be, be ji iwo m vu ogbanuchi."

Ka bu nhne ele ogwnu wam mernu.

²⁵ Ele gwuzo ndundu nu hne ogba wam zi bu nne Jizosi nu nwene rinya nne a, nu Meri nnwerne Kilopasi, nu Meri Magidalini.

²⁶ Nga Jizosi whnrnu nne a nu nye sno apna a wam o whnrnu n'anya, o kanu nne a, "Nwerinya, le nnwo i."

²⁷ O kanu nye sno apna a wam, "Le nne i." Hite n'ige wam, nye sno apna a wam kwuru a la n'oro a.

Enwu Jizosi

(Mat 27:45-56; Mak 15:33-41; Luk 23:44-49)

²⁸ Kpa Jizosi magwu nu be mezulem kpakara nhne, o mee ma nhne be gbaru n'okwukwo nso mezu, o kaa, "Akpiri nookpo m bekwnu."

²⁹ Otu idudu manya gbaru oka zi pii, be rusi sponji nu rime a, knesi a nu nkala hisopu, gwelizo nu mgbele-onu Jizosi.

* 19:14 Otnu-ige ke nri nu ebo: okwukwo ke mbom kwuru ige awa ke isunu

³⁰ Kpa Jizòsi nwòrnu manya wam, ò kaa, “Okwolem.” Ò pìyaya risi a nwùma.

Be òuru Jizòsi ara nù ikpurutu

³¹ Nhne ka mernu n'òbochi ojìkneru, ke bù òbochi ke sno Òbochi Ozukwa Inwe. Ò má síla ele risi ele Ju ò sigbasi iznu be n'òlu ògba n'Òbochi Ozukwa Inwe kwnornu nù ò bù okne òbochi. Be riasno Pàlleti ma be gbaji kpakara be òchi ma be vudna iznu be n'òlu ògba.

³² Ele ògwu wam zne gbaji òchi nye ke mbòm nù nye ke berere ele be kpògidneru be nù Jizòsi n'ògba.

³³ Kòvu nga be vaduru hne Jizòsi zì, be whnùrnu nù ò nwùnam, be gbájìle òchi a.

³⁴ Otu nye ògwu gweru ara ò Jizòsi nù ikpurutu, ngangam, òvnarna nù mini gbahja.

³⁵ Nye wam ke whnùrnu nhne ka gbarù akebne, akebne a bù ezi òka. Ò magwù nù ò nookwu ezi òka ma anù kweru.

³⁶ Kpakara nhne ka mernu ma nhne be gbarù n'òkwukwo nsò mezu, “Be jáagbaji otu òkpukpu a.”

³⁷ Nhne be gbarù n'òkwukwo nsò ke berere kwuru, “Ele badnù jeele anya nye wam be òuru ara.”

Be liri Jizòsi

(Mat 27:57-61; Mak 15:42-47; Luk 23:50-56)

³⁸ Omekwo, Josefu nye Arimatiya, zne rìò Pàlleti ma ò vuru iznu Jizòsi. Josefu bù nye sno apna Jizòsi nù mgwùgwa, kwnornu nù ò nòotu ògwu ele Ju. Pàlleti kweru, ò va vuru iznu a whòga.

³⁹ Nikòdimòsi nye znekwnusiri Jizòsi n'abalì, snornu Josefu, ò gweya mòno nwernu èknarna òma be gwarù nhne be kwu maa nù àlòsi, zì agìda.

⁴⁰ Ele rukna lawùru ka vuru iznu Jizòsi, whù a n'ìkpe marnù mma nù mòno wam, kwnornu nù kpam bù kpa ele Ju neeme iznu sì be lì.

⁴¹ Otu èkwu zì ndùndu hne be kpògburu Jizòsi, otu ililì be gwuru ikne zì nù rime èkwu wam, ò zá nye be liru nù rime a nù mbòm.

⁴² Kwnornu nù ò bù òbochi ojìkneru Òbochi Ozukwa Inwe ele Ju, ililì wam zì masì ndùndu, be lite Jizòsi nù rime a.

20

Ililì ke ò zá nye zì a

(Mat 28:1-8; Mak 16:1-8; Luk 24:1-12)

¹ N'ònu òsisi n'òbochi mbòm n'ìkwezu, ò gba kòriri òchichiri, Meri Magìdalini znernu ililì wam whnù nù be vumenem rugwu be jiri kpusni ònu ililì wam.

² Ò gba èso znekwnusi Sàjmoni Pita nù nye sno apna a wam Jizòsi whnùrnu n'anya. Ò kanù be, “Be vumenem iznu Nyenwe àj n'ìlilì, a máa hne be bítaru a.”

³ Pita nù nye sno apna a wam whòga, neezne n'ìlilì.

⁴ Be lawùru bete agba èso, kòvu nye sno apna a kiyari gbawhe Pita, beru Pita òsno gbadu ililì.

⁵ Ò whudnahie èli whnù ikpe marnù mma wam, kòvu ò bnáge nù rime.

⁶ Sàjmoni Pita va, bna nù rime ililì. Ò whnùrnu ikpe marnù mma wam dazì etekne,

⁷ n'ìkpe be jiri whù risi Jizòsi, ya nù ikpe be piakotaru be n'òtu ichne.

⁸ Nye sno apna a wam ke beru òsno va, bna nù rime ililì, ò whnùrnu, kweru masì.

⁹ (Be ghòyage nhne be gbarù n'òkwukwo nsò, nù ò jeehi n'ènwu lizò.)

¹⁰ Ele sno apna a wam lahna.

Jizòsi gesiri Meri Magìdalini èhni a

(Mat 28:9,10; Mak 16:9-11)

¹¹ Kòvu Meri gwuzoru n'ederesi ililì wam naakwna èkwna. Kpa ò naakwa èkwna, ò whudnahie le anya nù rime ililì wam.

¹² Ò whnù ele enine izi lawùru wogwu iwo abòchna dazì èli nù hne iznu Jizòsi zì nù mbòm, otu nù risi a, otu n'òchi a.

¹³ Be sìkwa a, “Nwerinya, kìnì neeme i èkwna?”

Ò kaa, “Be vumenem Nyenwe m, m máam hne be vubiri a.”

¹⁴ Nga ò kwuru ka, ò tùhnasna whnù Jizòsi, kòvu ò máa nù ò bù Jizòsi.

¹⁵ Jizòsi sìkwa a, “Nwerinya, kìnì neeme i èkwna? Ndaa nye i noopìo?”

Meri ke nù ò bù nye èrnu èkwu, ò kaa, “Nda-aì-kwu, ò büru nù ò bù jì vumernu a, kanù hne ì vubiri a, m jeezne vuru a.”

¹⁶ Jizòsi sukwa a, “Meri.”

Meri tùhnasna, kete a ruwhnu, siwama n'ònu Hiburu, “Raboni!” (ke bù Nye-zni-nhne).

¹⁷ Jizòsi kanù a, “Ì kpákwadia m aka, kwnornu nù m yáalakwnuznege m Nda m. Kòvu znekwnusi rùmu nda m, kanù be m naalakwnusi Nda m nù Nda anù, nù Chiokike m nù Chiokike anù.”

¹⁸ Meri Magìdalini zne kanù ele sno apna a nù ò whnùrnu Nyenwe àj, nù ka bù nhne ò kanù a.

Jizòsi gesiri ele sno apna a

èhni a

(Mat 28:16-20; Mak 16:14-18; Luk 24:36-49)

¹⁹ N'ògbednachi, n'òbochi mbòm wam n'ìkwezu, ele sno apna a gba kòru n'òtu òro tùgidne èhni be ònuhna, kwnornu be nòotu ògwu ele risi ele Ju. Jizòsi varù gwuzoru n'èsilawùru be, kaa, “Udno zìnu anù.”

²⁰ Nga ò kwuru ka, ò gesi be aka a lawùru nù ikpurutu a. Mkpòma sò ele sno apna a n'ònu kpa be whnùrnu Nyenwe àj.

²¹ Jizòsi kaa kwno berere, “Udno zìnu anù, lele kpa Nda m ziyaru m, ò bụ kpa me neezni anù.”

²² Nga ò kwuru ka, ò nwesi be inwe, kaa, “Anù nahòru Enine Nso.

²³ Ò buru nù anù gbarùnu ele badnù mmehie be, be jaagbarùnu be mmehie be, kòvu ò buru nù anù jáagbarùnu be, be jáagbarùnu be.”

Jizòsi nù Tòmosi

²⁴ Otu nù nri nù badnù lawùru wam sno apna Jizòsi, nye rewhna a bụ Tòmosi, nye be kwu Didimòsi nù be zìla nga Jizòsi varù.

²⁵ Ele sno apna a ele berere kanù a, “A whnùru Nyenwe aì.”

Tòmosi kanù be, “Okwolem ma m whnùru m anùnu ituru nù aka a lawùru, m yisi mkpaka aka m nù rime be, yisi aka m n'ikpurutu a, m jéekweru.”

²⁶ N'ikwezu a, ele sno apna Jizòsi gbakògwu kwno n'otu oro, tũgidne òhni ònhna, Tòmosi nù be zì masì. Be tũsnirni òro, kòvu Jizòsi varù gwuzoru n'esilawùru be, kaa, “Udno zìnu anù.”

²⁷ Ò kanù Tòmosi, “Yisi aka ì hna, le aka m lawùru, dnòsnima aka ì yisi n'ikpurutu m, ì nwéma mkpoma lawùru, kweru.”

²⁸ Tòmosi sarù a, “Nyenwe m nù Chiokike m.”

²⁹ Jizòsi kanù a, “Ì kweruru kwnornu nù ì whnùru m, ngòzi zìnu ele whnùge, kòvu be kweru.”

Risi òkwukwo ka

³⁰ Jizòsi rnùru agìda òru ndu-òhni berere nù ruwhnu ele sno apna a ke be gbáge n'òkwukwo ka.

³¹ Kòvu be gbarù ka ma anù kweru nù Jizòsi bụ Karaisi wam, Nnwò Chiokike, ma hite n'òkwnata mkpoma nù rewhna a, anù jeenwe bụdnu.

21

Jizòsi gesiri ele sno apna a

esau òhni a

¹ Omekwo, Jizòsi gesiri ele sno apna a òhni a n'apna berere, nù ngeri Osimini Taberasi.

² Saìmoni Pita, Tòmosi nye be kwu Didimòsi, nù Nataneli nye Kana ke Galili, nù rùmu rukna Zebidi, nù ele sno apna a lawùru berere zì.

³ Saìmoni Pita kaa, “M neezne ò gbu aznù.”

Be kanù a, “A joosno ì zne.” Kpakara be zne bna n'otu ògbo, kòvu ò zá nhne be gburu kpakara abalì wam.

⁴ N'ònu òsisi, Jizòsi gwuzoru n'ònu mini, kòvu ele sno apna a máa nù ò bụ Jizòsi.

⁵ Ò sìkwa be, “Rùmu takìri, ò zì aznù anù gbuhìaru?”

Be sa a, “Óza.”

⁶ Jizòsi kanù be, “Anù wùsi igbo anù n'akarikwnunga ògbo, anù jòowhnu aznù.” Be wùsi igbo be, be nwéé rikne d'òli igbo wam kwnornu nù be gburu agìda aznù.

⁷ Nye sno apna wam Jizòsi whnùru n'anya kanù Pita, “Ò bụ Nyenwe aì.” Kpa Saìmoni Pita nùru nù ò bụ Nyenwe aì, ò jeru ikpe a (kwnornu nù ò gba èto) dnabna mini.

⁸ Ele sno apna a ele berere kwòru ògbo, d'òru igbo wam aznù jiri va mkpomkpo èli. Be zá ikere nù mkpomkpo èli, nhne hne lele riwhu rula èto.

⁹ Nga be d'òru mkpomkpo èli, be whnùru esekere bèkwnu nù aznù nù zì n'òlu a nù brèdi zì pìi.

¹⁰ Jizòsi kanù be, “Anù gweya agwna aznù anù gburu.”

¹¹ Saìmoni Pita zne d'òru igbo wam nù mkpomkpo èli, aznù okpotokpo jiri a, otu riwhu nù nri isne nù èto, Igbo wam d'òkala, ò bụ n'èzi nù aznù zì agìda.

¹² Jizòsi kanù be, “Anù va ri wiri.” Ò zá nye sno apna a ke nwernu rikne ò nyipohia s'ìkwa a, “Ì bụ nyele?” Be magwù nù ò bụ Nyenwe aì.

¹³ Jizòsi gweru brèdi wam nyee be, ya nù aznù.

¹⁴ Ka mernu mgba èto Jizòsi gesiri ele sno apna a òhni a kpa ò hi n'ènwu lizò.

Jizòsi nù Pita

¹⁵ Nga be rikworu wiri, Jizòsi kanù Saìmoni Pita, “Saìmoni nnwò Jóni, ì whnùru m n'anya kakwo nhne ele ka?”

Ò sa a, “Owe, Nyenwe aì, ì magwù nù m whnùru m jì n'anya.”

Jizòsi kanù a, “Nyee atnùru m wiri.”

¹⁶ Jizòsi kanù a ke mgba lawùru, “Saìmoni, nnwò Jóni, ì whnùru m n'anya n'èzi òka?”

Ò sa a, “Owe, Nyenwe aì, ì magwù nù m whnùru m jì n'anya.”

Jizòsi kanù a, “N'òoznu atnùru m.”

¹⁷ Jizòsi kanù a ke mgba èto, “Saìmoni, nnwò Jóni, ì whnùru m n'anya?”

Ò gbu Pita igbugbu nù Jizòsi kannù ke mgba èto, “Ì whnùru m n'anya?” Ò kaa, Nyenwe aì, ì magwù kpakara nhne, ì magwù nù m whnùru m jì n'anya.

Jizòsi kanù a, “Nyee atnùru m wiri.”

¹⁸ Me kanù ì ezi òka, nga ì bụ wikoro, ì n'òosnu ajnì n'ikwnu ì zne hne òbula ò masìri ì. Kòvu, nga ì jeeme okno badnù, ì j'òdosni aka ì, nye berere snùsi ì ajnì, kwuru ì zne hne másìla ì.”

¹⁹ Jizòsi kwuru ka ma ò gesi kpa Pita j'òonwu ènwu, ma ò nyee Chiokike igwugwu. Jizòsi kanù a, “Sno m.”

Jizòsi nù nye sno apna a ke berere

²⁰ Pita tũhnasna whnũ nye sno apna a wam, nye Jizõsi whnũrnũ n'anya, nye dnabnenu Jizõsi nga be neeri wiri anyasnu wam, sũkwa a, "Nyenwe aĩ, nyele jeere i?"

²¹ Nga Pita whnũrnũ a, ọ kanũ Jizõsi, "Nyenwe aĩ, ndaa nhne i kwuru gbasĩri nwerukna ka?"

²² Jizõsi sarũ a, "Ọ bũru nũ m piuru m ọ zĩri bũdnu tem m va, ọ gbásĩla ì, sno m."

²³ Be tũsa a n'esilawuru ele sno apna Jizõsi nũ nye sno apna a ka jõonwu ẹnwu. Kõvu Jizõsi kála nũ ọ jõonwu ẹnwu, kõvu o karũ, "Ọ bũru nũ m piuru m ọ zĩri bũdnu tem m va, ọ gbásĩla ì."

²⁴ Ya bũ nye sno apna a ke kwuru kpakara nhne ka, nye gba masĩri a n'ọkwukwo, a magwũ nũ nhne ọ gbarũ bũ ezi ọka.

Okwukwo

²⁵ Agĩda nhne ele berere ke Jizõsi mernũ, ọ bũru nũ be gba kpakara be n'ọkwukwo, m che m nũ kpakara ọwa n'iwhuru a jéenwe rikne vuli kpakara ọkwukwo be jaagba.

Ernu Ele Izi

Nhne gbasiri okwukwo ka

Ernu Ele Izi sno izi oma lele kpa Lukwu gbaru n'okwukwo n'aznu. Risi oka a bu o gesi kpa ele sno apna Jizosi panizoru ernu izi oma be. Enine Nso duru be gbasia Izi Oma gbasiri Jizosi hite nu Jeruselem, nu kpakara Judiya nu Sameria, tem du n'osotoma owa (1:8). Nye gbaru okwukwo ka mernu ma ele n'ogwunu a mahia nu ele Chiokike (Kirisiteni) buo otu ele n'odo ochichi ke neemegidne ochichi ele Rom.

Be kewaru okwukwo ka nga eto, ke neegesi kpa be kporu okwo Izi Oma gbasiri Jizosi nu opanizo ogbako Chiokike. (1) Opanizo otu ele Chiokike nu Jeruselem nga Jizosi lahnarnu oligwe. (2) Ogbasa izi oma nu kpakara eli Palasitini. (3) Ogbasa izi oma du kpakara owa, du Rom.

Otu nhne zi okne mkpa nu *Ernu Ele Izi* bu ernu Enine Nso, nye nyernu be rikne n'obochi Pentikosi, nye zi koriri naagba ogbako Chiokike inwe nu ele risi a. Okwukwo *Ernu Ele Izi* neegesi iknerna ikwu-onu Chiokike nu budnu ele kweru nu omekorita ele ogbako Chiokike.

Nhne zi n'okwukwo ka

Ojiknerna o gba akebne (1:1-26)

Nhne Jizosi nyernu n'iwu ipne-aznu nu mkwna (1:1-14)

Nye gweruru onodi Judasi (1:15-26)

Akebne be gbaru nu Jeruselem (2:1--8:3)

Akebne nu rime Judiya nu Sameria (8:4--12:25)

Ernu Polu (13:1--28:31)

Ogaghari neezni izi oma ke mbom (13:1--14:28)

Ogbo ke zi nu Jeruselem (15:1-35)

Ogaghari neezni izi oma ke ebo (15:36--18:22)

Ogaghari neezni izi oma ke eto (18:23--21:16)

Polu nye ikelu nu Jeruselem, Sizeria nu Rom (21:17--28:31)

Jizosi kweru mkwna

Enine Nso

¹ Tiofilosi, n'okwukwo mbom ke me gbaru, m gbaru m kpakara nhne Jizosi mernu nu nhne o znirni hite n'ige o panizoru ernu a,

² tem du n'obochi be gweruru a la n'oligwe. Si o laru oligwe, o nyernu ele rukna wam o hohiaru iwu hite nu rikne ke Enine Nso.

³ Nga o takworu awhnuwhnu, o gesiri ele izi wam o hohiaru ehni a, nyee be agida nhne mesiri a rikne nu o zi budnu. Be whnurnu a, ya nu be kwu oka gbasiri eli-eze Chiokike nri obochi eno.

⁴ Nga be gbaroru n'otu, o nyernu be iwu ka, "Anu hiko nu Jeruselem whoga, kovu anu seru nkesi ke Nda m kweru mkwna, ke anu nurnu nhne me kwuru gbasiri a.

⁵ Joni jiri mini wu ele badnu mini, kovu be jeeji Enine Nso n'owu anu mini nga obochi ele nu ele whemernu."

Jizosi laru oligwe

(Mak 16:19-20; Luk 24:50-53)

⁶ Nga ele izi wam gbaroru n'otu, be sikwa Jizosi, "Nyenwe ai, i jeegweru ochichi ka nyehnata ele Izireli kina?"

⁷ Jizosi kanu be, "Nda m ji iknerna a bita ige nu obochi, o kwesige anu mahia a.

⁸ Kovu nu anu jaanahia rikne nga Enine Nso wam dnakwasiri anu, anu j'obu ele akebne m nu rime Jeruselem, ma nu kpakara Judiya, nu Sameria nu hne owa sotoru."

⁹ Nga o kwukworu oka ka, kpa be neele a anya, be gwelizo a la n'oligwe, erumeru gweme a n'anya be.

¹⁰ Kpa be zi neelegidne anya n'oligwe kpa o naala, ele rukna lawuru wogwu iwo abochina gwuzoru n'esilawuru be.

¹¹ Be kaa, "Ele rukna Galili, ndaa kpa anu gwuzo neele anya n'oligwe? Jizosi ka, nye be gweruru la oligwe, jaava berere lele kpa anu whnurnu a la oligwe."

Matayasi gweruru

onodi Judasi

¹² Ele izi wam lahna Jeruselem hite nu Rugwu Olivu, nhne nu lele izne otu Obochi Ozukwa Inwe.

¹³ Be zne Jeruselem, bna nu rime oro olu hne be wu. Pita, Joni, Jemisi, nu Anduru, Filipu nu Tomosi, Batolomi nu Matiyu, Jemisi nnwo Alifayosi, Saimoni nye zi n'esilawuru ele noonwu bekwnu nu mkpoma nu Judasi nnwo Jemisi.

¹⁴ Kpakara be zi n'otu neekpe okpukpe ige obula, be nu ele rinya wam nu Meri nne Jizosi nu rumu nne a.

¹⁵ N'obochi wam, Pita gwuzoru n'esilawuru ele sno apna Jizosi, be bu otu riwhu nu nri lawuru.

¹⁶ O kaa, "Rumu nda m, nhne be gbaru n'okwukwo nso ke Enine Nso kwuru hite n'onu Devidi gbasiri Judasi nye duru ele nwugwuru Jizosi, jeemezu.

¹⁷ Judasi bu otu badnu nu rime ai, be hohiaru a ma o kehia igwe n'ernu ai."

¹⁸ Judasi bu nye ji iwai be kwuru a n'ernu aruru-eli a zu otu eli, o dna, kpu ruwhnu n'eli, kpakara nhne zi a nu ruwhu wuhia.

¹⁹ Kpakara ele wu nu Jeruselem nurnu a, be kwu eli wam n'ikwu-onu be, Akelidama, ke bu Eli Ovnarna.)

²⁰ "Kwnornu nu be gbaru n'okwukwo Eri Oma, 'Oro a daziri etekne,

o zá nye wu nu nù rime a.'
 Be gba kwno a nu nhne berere,
 'Nye berere gweru onodi èrnu a.'
 21 Kìtna, o zì mkpa a hòru otu nyerukna
 n'esilawùru ele sno aì n'ìge Nyenwe aì Jìzòsì
 snornu aì whòga, bnanya masì n'esilawùru
 aì,
 22 hite n'òwu mini Jóni dù nga Jìzòsì larù
 n'òligwe. Nye wam jòoburu nye jòosno aì
 gba akebne nù Jìzòsì hiri n'ènwu lizò."
 23 Be hòhia ele rukna lawùru, Josefu nye
 be kwu Basabasì nye rẹwhna a berere bù
 Jòsitosì nù Matayasi.
 24 Be kpe okpukpe kaa, "Nyenwe aì, jì nye
 magwù mkpòma kpakara ele badnù, bikno,
 Nyenwe aì, gesi aì nye ì hòhiaru n'esilawùru
 ele rukna lawùru ka,
 25 nye jeegweru onodi èrnu nye izi ke Ju-
 dasì ghasarù zne hne o kwesiri."
 26 Be vu oghanuchi, oghanuchi wam
 dnakwasì Matayasi, be gwnùsì a
 n'esilawùru ele izi nri nù otu wam.

2

*Enine Nso varu
 n'òbochi Pentikosi*

1 Nga obochi Pentikosi zuru, kpakara be
 gbakòru n'otu o.
 2 Ngangam, imerne ke nu lele okne
 ruwhere hiri n'òligwe va, jìpiya kpakara o
 wam be zì.
 3 Be whnùru nhne nu lele riro bèkwu ke
 dazìri n'olu risi be otu otu.
 4 Enine Nso mejiharu be, be bete nookwu
 òka nu riro ele berere lele kpa Enine Nso
 wam nyernu be iknerna o kwu òka.
 5 Agwna ele Ju ele nòutu ogwnu Chiokike
 wu nu Jeruselem, ele hi nu kpakara mba ke
 zì nu mkpururu oligwe va.
 6 Nga be nùru mkpakpò ka, be gbakò, o
 turu be n'anya kwnornu nu be nùru kpa
 ele sno apna Jìzòsì nookwu òka nye obula nu
 ikwu-ònu ke a.
 7 Èhni nwùru be, be kaa, "Kpakara ele ka
 nookwu òka, be búo ele Galili sa?
 8 Ndaa kpa a nòonu be nookwu òka n'ikwu-
 ònu be jiri mù aì?
 9 Ele Patia, nu Midia, ele Elam, ele hi nu
 Mesopotemia, Judiya nu Kapadosia, nu ele
 hi nu Pontosi nu Esia,
 10 ele hi nu Firigia nu Pamfilia, ele hi nu
 Ijipiti nu ele hi agwna èli Libiya ke zì Sirini
 ndùndu, nu agwna ele hi nu Rom,
 11 ma ele Ju ma ele bnarnù okpukpe ele
 Ju, ele Kiriti nu ele Arabu, a nùru kpa be
 nookwu òka n'ikwu-ònu aì gbasìri èrnu ndu-
 èhni Chiokike."
 12 O gbagwojiri be anya, kpakara be
 nẹsikwa, "Ka bù kìnì?"

13 Kòvu ele berere mernu be nhne mkparì,
 be kaa, "Manya noogbu ele ka."

*Pita kwunnu igbudu badnu
 òka*

14 Pita gwuzoru ya nu nri badnu nu otu
 wam bete nookwunu ele badnu wam òka
 n'okne nkòli, kaa,
 "Ele Ju ibne m nu kpakara anu ele wu
 nu Jeruselem, anu bnote nsnì nu nhne me
 nookwu gbasìri nhne anu whnùru.
 15 O zá manya noogbu ele rukna ka lele
 kpa anu cheru, o bù òtnu-ìge tolu ke osisi.*
 16 Kòvu ka bù nhne nye owhnurninya Juwèli
 kwuru òka gbasìri a,
 17 Chiokike karù kpa,
 'Ka bù nhne me jeeme n'òbochi ipne-aznù,
 m jòowukwasi Enine m n'èhni kpakara
 ele badnù,
 rùmu anu ele rukna nu ele rinya jòokpo
 okwo ikwu-ònu Chiokike,
 rùmu ikoro anu jòowhnu owhnurninya,
 ele okno badnù anu jòoro mbòro.
 18 M jòowukwasi ele izi m rukna nu rinya
 Enine m n'òbochi wam,
 be jòowhnu owhnurninya.
 19 M jeegesi èrnu ndu-èhni n'òligwe
 nu nhne elekema n'òwa nu mkpururu
 oligwe,
 ovnarna nu bèkwu nu okne rùnwurnu
 bèkwunu.
 20 Èhnam jaagba oçhichiri,
 enwa jaachna ihie ihie lele ovnarna,
 ka jeeme sì okne obochi ke zì igwugwu
 ke Nyenwe aì va.
 21 Be jòoznohia nye obula ke noosukwu
 rẹwhna Nyenwe aì.
 22 "Ele Izireli, anu bnote nsnì n'òka ka,
 Chiokike jiri kpakara èrnu ndu-èhni nu
 nhne tù n'anya nu elekema ka n'esilawùru
 anu gesi nu ya ziyaru Jìzòsì nye Nazareti.
 Kpakara anu magwù kpa.
 23 Chiokike marnù ama kweru be gweru a
 nyega anu, anu gweru a nyee n'aka ele máa
 Chiokike, be kpogidne a n'ògba, gbu a.
 24 Kòvu nu Chiokike mernu o hi n'ènwu
 lizò, gweme nhne igbugbu ke ènwu
 kwnornu nu ènwu nwée rikne nwùgwu a.
 25 Ka bù nhne Devidi kwuru gbasìri a,
 'M whnùru m Nyenwe aì nu ruwhnu m
 kpakara ige.
 O zì n'akarikwnunga m,
 ovu jáala m mini.
 26 Ka kpayarù ovu sòru m n'ònu, riro m
 nwùdnarnu k'agida,
 anò-èhni m jaazì bùdnu n'olile anya.
 27 Kwnornu nu ì jéesìgbasi mkpùru ovu m
 n'ilili,
 i jéekwe nye nsò ke ì ro oro.
 28 I gesiri m apna ke bùdnu,

* 2:15 òtnu-ìge tolu ke osisi: òkwukwo ke mbòm kwuru ige awa ke èto

ruwhnu i mernu snarnjima jihja mkpoma m.’

²⁹ “Rumu nda m, m nookwunu anu oka n’anya rikne nhne gbasiri nda aj oknani bu Devidi, o nwurru enwu, be li a, ilili a zi hna du tna.

³⁰ O bu nye owhnurninya, o magwu nu Chiokike kwesiri a mkwna rikne nu o jeeme otu nye hi nu avnurru a daziri nu ngadna eze a.

³¹ O whnurru nu hne zi nu ruwhnu, o kwu oka gbasiri olizo n’enwu Karaisi, Chiokike jeesigbasi a n’ilili, ano-ehni a joro oro.

³² Chiokike mernu Jizosi ka hi n’enwu lizo. A bu ele akebne ezi oka ka.

³³ Be gwelizoro a olu n’akarikwnunga Chiokike, o nahjuru n’aka Nda a mkwna ke Enine Nso bu ke o wukwasiri aj, ke anu whnurru, nurru masi.

³⁴ Devidi lage olu nu rime oligwe, kovu o kwuru,

‘Nyenwe aj kanu Nyenwe m,

Daziri eli n’akarikwnunga m,

³⁵ tem du nga me jaabita ele irno i

lele nhne j jootukwasi ochi i lawuru.’

³⁶ “Kam kparayu, kpakara ele Izireli, anu mahia n’ezi oka nu o bu Jizosi ka, nye anu kpojidnenu n’ogba bu nye Chiokike mernu Nyenwe aj nu Karaisi.”

³⁷ Nga be nurru ka, o gburu be igbugbu k’agida nu mkpoma, be kanu Pita nu ele izi berere, “Rumu nda aj, kini bu nhne a jeeme?”

³⁸ Pita kanu be, “Nye obula hi nu mmehie a tuhna, ma be wu anu mini nu rewhna Jizosi Karaisi, ma Chiokike gbarunu anu mmehie anu. Ige wam anu jeenwehia nkesi Chiokike ke bu Enine Nso.

³⁹ Kwnornu nu mkwna Chiokike ka zinu anu, nu rumu anu, nu kpakara ele zi ikere, ele Nyenwe aj Chiokike joosukwu.”

⁴⁰ Pita ji agida ikwu-onu berere do be aka nu nsi, kaa, “Anu gweme ehni anu awhnurru ke ebiri ojo ka.”

⁴¹ Be wuru ele kweru izi oma ka mini. Be tukwasinu be pokwu badnu eto n’otu obochi.

*Mmekota ke
ele kweru ekwe*

⁴² Be dazigidne nu iznizni ele izi, snornu be mekota nhne, ri wiri nu neekpe okpukpe.

⁴³ Ele izi wam nurru agida ernu ndu-ehni nu elekema ke mernu ogwu tu ele badnu.

⁴⁴ Kpakara ele kweru ekwe dazikota n’otu, nekeri nhne n’otu.

⁴⁵ Be re ekwu be nu ekwu be nwernu, keme iwai n’esilawuru be lele kpa mpa kparu nye obula.

⁴⁶ Be dazigidne n’otu n’Oro Nso Chiokike kpakara obochi. Be neezne n’oro nu oro,

gweru mkpoma zi richna neeri wiri n’otu nu ovu oso n’onu.

⁴⁷ Be naaznarni Chiokike, neenwe ruwhnu oma nu hne ele badnu zi. Nyenwe aj n’ootukwasinu be ele badnu n’obochi n’obochi ele be jooznohia.

3

Pita gworo nye mgworo

¹ Otu obochi, Pita nu Joni znenu Oro Nso Chiokike n’otnu-ige ke eto n’iwnehnie,* ke bu ige okpukpe.

² Otu nyerukna ke dnarnu mgworo hite nga be nurru a, ele badnu nookwuru a zne n’Ogodo Onuhna Marnu Mma ke Oro Nso Chiokike kpakara obochi, ma o rjo nhne n’aka ele naabna Oro Nso Chiokike.

³ Nga o whnurru Pita nu Joni hne be naabna Oro Nso Chiokike, o rjo be nhne.

⁴ Pita nu Joni legidne a anya, Pita kaa, “Le aj anya.”

⁵ Nyerukna wam legidne be anya ma o jaanahia nhne n’aka be.

⁶ Pita kaa, “M nwee m siliva mabu golu, kovu m jeenye i nhne me nwernu, nu rewhna Jizosi Karaisi nye Nazareti, lizo, zne izne.”

⁷ O nwugwuru a n’akarikwnunga a, dolizo a olu, ngangam, ochi nyerukna wam nu ekenkele-ochi a lawuru nwehia rikne.

⁸ O wulizo olu, gwuzoro, bete neezne izne. O snornu be bna n’Oro Nso Chiokike, neezne izne, n’owulizo olu, naaznarni Chiokike.

⁹ Kpakara igbudu ele badnu wam whnurru a hne o neezne izne, naaznarni Chiokike.

¹⁰ Be mahia nu o bu nye orio wam naadazi n’Ogodo Onuhna Marnu Mma. O duru be ehni, tu be n’anya k’agida nu nhne mernu.

*Pita znirni izi oma
n’Oro Nso Chiokike*

¹¹ Kpa nye mgworo wam nwugwuru Pita nu Joni n’aka, ogwu tu kpakara ele badnu wam, be gbako nu mgbemgbe oro Solomonu.

¹² Nga Pita whnurru be, o kanu be, “Ele Izireli, ndaa kpa nhne ka noodu anu ehni, anu neele aj anya lele nu a ji rikne aka aj mabu ozi nso aj mee nyerukna ka zne izne.

¹³ Chiokike ke Eberham, nu ke Aziki, nu ke Jekopu, Chiokike ke ele nda aj oknani, nyernu Nnwọ a Jizosi igwugwu. Ya bu nye anu reru, anu gonahoru a nu ruwhnu Paileti, o bu n’ezi nu Paileti kweru o sigbasi a.

¹⁴ Anu gonahoru nye nso nu nye mee mma, gweru nye noogbu badnu.

¹⁵ Anu gburu nye nwe budnu. Kovu Chiokike mernu o hi n’enwu lizo, a bu ele akebne a.

* 3:1 otu-ige ke eto n’iwnehnie: okwukwo ke mbom kwuru ige awa ke tolu

16 Anụ le nwerukna ka anụ magwụ, ọ bụ ọkw nata ovu nụ rẹwhna Jizọsi nyernu a rikne. Ọ bụ rẹwhna Jizọsi nụ ọkw nata ovu nụ rẹwhna a nyernu nwerukna ka ọgwugwo zuru ozu, kpa anụ whnụrnu.

17 “Kịtna, rụmu nda m, m maam nụ nhne anụ nụ ele risi anụ mernu Jizọsi bụ nụ anụ maa ama.

18 Kọvu nụ Chiokike hiri n'ọnu kpakara ele ọwhnurninya agida ige wheru ewhe kwu nụ Karaịsi jaata awhnụwhnu, o mezuru nhne o kwuru.

19 Anụ tūhnasna, kete ruwhnu hne Chiokike zị, ma o kwnosnama kpakara mmehie anụ,

20 ma anụ nwehịa rikne ikne hite nụ ruwhnu Chiokike, ma o zianu anụ Jizọsi bụ Karaịsi nye ọ hōhiannu anụ.

21 Ọ jaadazị n'oligwe tem ige Chiokike jeeme kpakara nhne ziri ikne, lele kpa o kweru mkwna agida ige wheru ewhe hite n'ọnu ele ọwhnurninya a zị nsọ.

22 Kwnornu nụ Mozizi karu, ‘Nyenwe aị Chiokike anụ jeeziyanu anụ nye ọwhnurninya lele me, hite nụ ele ke anụ, anụ joobno nsnị nụ kpakara nhne ọ jaakanu anụ.

23 Nye ọbula ke jọobno nsnị nụ nhne nye ọwhnurninya wam kwuru, be jeekewahala a n'esilawuru ele ke Chiokike.’

24 “N'ezị ọka, kpakara ele ọwhnurninya hite nụ Sameli nụ ele sno a n'aznụ kwuru nhne gbasiri ọbochi ele ka.

25 Kpakara mkwna Chiokike hite n'ọnu ele ọwhnurninya a zinu anụ, anụ nwernu igwe nụ ọgba-njo-ehni Chiokike gbaru ya nụ ele nda anụ, lele kpa ọ kannu Ebereham, ‘M jongozi kpakara ele zị n'owa hite avnurnu i.’

26 Nga Chiokike gwelizoru Nnwọ a Jizọsi, o beru ọsno zianu anụ ya, ma ọ gozi anụ, ma anụ hi nụ rime apna ọjọ anụ yahna.”

4

Pita nụ Jōni zị nụ ruwhnu ele eze-ikpe

1 Kpa Pita nụ Jōni zị nookwunu ele badnụ ọka n'Ọro Nsọ Chiokike, ele arịohna nụ nye risi ele neese Ọro Nsọ Chiokike nụ ele Sadusi vakwnusiri be.

2 Ovu weru be ehni nụ ele izi lawuru wam neezni ele badnụ nụ Jizọsi hiri n'ẹnwu lizọ, ke neegesi nụ ele nwurnu ọnuwue jeehi n'ẹnwu lizọ berere.

3 Be nwudne be, yisi be ikelu tem chi bọ, kwnornu nụ ọbochi zneminem.

4 Kọvu agida ele nurnu izi ọma be kweruru, ọnu ọgwunugwu be bụ pokwu badnụ isne.

5 N'ekile a, ele risi ele Ju nụ ele okno badnụ nụ ele zni iwu ele Ju gbakoru nụ Jeruselem,

6 be nụ nye risi arịohna Anasi, nụ Kayafasi, nụ Jōni nụ Alekizanda, nụ ele ọro nye risi arịohna.

7 Be kwuya Pita nụ Jōni gwuzote be nụ ruwhnu be, be sịkwa be, “Ndaa rikne mọbu rẹwhna nyele hne anụ jiri neeme nhne ka?”

8 Enine Nsọ jipiharu nụ rime Pita, ọ kaa, “Ele risi nụ ele okno badnụ Izireli,

9 anụ n̄esikwa aị aiji tna kwnornu nụ nhne ọma ke be mennu nye mgworo ka nụ kpa be jiri gwọ a.

10 Kpakara anụ ma kpakara ele Izireli mahja, nụ nyerukna ka gwuzo hna nụ ruwhnu anụ n'ehni zuru ozu, bụ nye be gworo hite nū rikne ke zị nū rẹwhna Jizọsi Karaịsi nye Nazareti. Anụ kpogidnenu a n'ogba, kovu Chiokike mernu o hi n'ẹnwu lizọ.

11 Ya bụ

‘akaworugwu ke anụ ele noowu ọro juru, kiyam ghọlam risi nsukala ọro.’

12 “Ọznohia zị nū rẹwhna a kpoi. Kwnornu nū ọ zā rẹwhna berere nū mkpururu oligwe be nyernu ke badnū jeenwe ọznohia.”

13 Ọnu rikne Pita nū Jōni duru ele risi ikpe ehni. Be mahjuru nū be bụ ele ọ zā nhne be bụ, ele muge ọkwukwo. Be mahjuru kwno nū be nū Jizọsi ziri.

14 Ọ zā nhne be nwernu rikne kwu kwnornu nū be whnurnu nyerukna wam be gworo gwuzo nū ngeri Pita nū Jōni.

15 Be kanu be whoga n'oro ikpe, be gba iznuznu n'esilawuru be.

16 Be kaa, “Ndaa nhne a jeeme ele rukna ka. Kpakara ele wu nū Jeruselem magwu nū be nrurnu okne ọnu ndu-ehni ka, a nwée rikne gonahoru a.

17 Kovu a jeeke be gbasia ọtutnu ka n'esilawuru ele badnū, a dọ be aka nū nsnị be kwú ọka berere nū rẹwhna Jizọsi.”

18 Be sukwu ele rukna wam, kanu be, be kwúma ọka rja rja mọbu zni nhne nū rẹwhna Jizọsi.

19 Kovu Pita nū Jōni saru be, “Anu tule a ma ọ buru ọma nū anya Chiokike, a bnonu anu nsnị sobu a bnonu Chiokike nsnị.

20 Kwnornu nū a nwée rikne gharu ọ kwu nhne a whnurnu nū nhne a nurnu.”

21 Ele ikpe wam dọsi be aka nū nsnị rikne, sigbasi be la. Be nwée nhne be jeeji ta be awhnūwhnu kwnornu nū ele badnū naaznarni Chiokike nū nhne mernu.

22 Nyerukna be gworo ọnu ndu-ehni ka wheru nri awha ọno.

Ele Karaịsi kperu okpukpe

23 Nga be sigbasiri be, Pita nū Jōni lakwnusi ele ke be, kanu be nhne ele risi arịohna nū ele okno badnū kwuru.

24 Nga be nrurnu a, be yisi ọnu n'otu kw-nakwu Chiokike n'okpukpe, kaa, “Nyenwe aị Chiokike, nye keru oligwe nū ọwa, nū

okne osimini, nū kpakara nhne zī nū rime be.

²⁵ I jiri Enine Nsọ kwu ọka hite n'ọnu ọhi i Devidi, nda aị ọknani, kaa, 'Kini vuteru ele bụo ele Ju ọnuma
kini mernu ele badnụ naagba iznuznu etekne?'

²⁶ Ele eze k'owa ka gwuzoru
be nū ele nęechi ęchi, gba iznuznu megidne Nyenwe aị
megidne nye ke a o teru mọno.*

²⁷ N'ezī ọka, Erọdu nū Pontiosi Paịleti gbakọru n'otu n'eli ka, be nū ele bụo ele Ju nū ele Izireli, megidne Nnwọ nsọ i Jizọsi, nye i teru mọno.

²⁸ Be gbakọru ma be mee nhne i jiri rikne i nū echiche i kaa nū ọ bụ nhne be jeeme.

²⁹ Nyenwe aị, bikno, le be naakpasị aị ogwnu, nyega aị ele izi i, ọnu rikne a jeeji zni izi ọma i.

³⁰ Dọsnihala aka i nū ogwo ęhni igbugbu nū ọnu elekema nū ęnu ndu-ęhni hite nū rẹwhna ọhi i zī nsọ Jizọsi."

³¹ Nga be kperu okpukpe, hne be zī neekpe okpukpe znurnu biri biri. Enine Nsọ dnakwasị kpakara be, be bete nookwu ikwu-ọnu Chiokike n'ọnu rikne.

*Ele kweru neekeri
kpakara nhne n'otu*

³² Kpakara ele kweru ekwe bụ otu nū echiche be ma nū mkpọma be. Ọ zā nye kanụ nhne o nwernu bụ ke a, kọvu be neekeri kpakara nhne be nwernu.

³³ Ele izi wam jī ọnu rikne naagba akebne olizọ n'ęnwu Nyenwe aị Jizọsi. Chiokike tųkwasinu be agida ọru.

³⁴ Ọ zā nye ọbula n'esilawuru be nhne kọgwu. Ele nwernu ẹli mọbu ọro re be, gweya ịwai be reru a,

³⁵ be nyee a ele izi, ele izi keme ịwai wam lele kpa mkpa kparụ nye ọbula.

³⁶ Josefụ, nye Livaị be murnu nū Saiporosi, nye ele izi jiri Banabasi, ke bụ "Nnwọ ọsnuta mkpọma,"

³⁷ o re ẹli o nwernu, gweya ịwai a ịbita a n'ọchi ele izi.

5

Ananayasị nū Safira

¹ Kọvu otu nyerukna rẹwhna a bụ Ananayasị, ya nū nnwerne a Safira, reru ẹkwu be.

² Ya nū nnwerne a kwekọtaru ọ ịbita agwna ịwai, o gweya ke gwnarnụ ịbita n'ọchi ele izi.

³ Pita kanụ a, "Ananayasị, ndaa kpa Ekwensu jiharū mkpọma i, mee i i ghanụ Enine Nsọ aghalaghala, i ịbitaru agwna ịwai i reru ẹkwu.

⁴ Jīwa nwe ẹkwu sụ i reru a. Nga i reru a, ịwai wam zī n'aka i o mee kpa o jiri masị i. Ndaa kpa i jiri rị ọriri o mee nhne nū kpa? I ghanụ Chiokike aghalaghala, ọ bụo badnụ."

⁵ Nga Ananayasị nurnu ọka ka, ọ dna n'ẹli, nwuma. Ogwnu turu kpakara ele nurnu nhne mernu.

⁶ Rumu ikoro ele rukna va whụ a n'ikpe, vuru iznu a zne, lite a.

⁷ Nga nhne nū lele awa ẹto wheru, nnwerne a varu, kọvu o máa nhne mernu.

⁸ Pita sịkwa a, "Kanụ m, ka ọ bụ ọnu ịwai anụ reru ẹli wam?"

Ọ kaa, "Owe, ọ bụ ọnu ahia a."

⁹ Pita kanụ a, "Kini mernu jī nū nzi i kwekọtaru ọ rna Enine Chiokike ọrnuna? Ele rukna ele liri nzi i gwuzo n'ọnu-mgbo kịtna, be joovuru i zne."

¹⁰ Ngangam, ọ dna n'ẹli n'ọchi a, nwuma. Be vuru a whọga, lite a nū ngeri nzi a.

¹¹ Kpakara ọgbako Chiokike nū ele berere ke nurnu a turu ogwnu k'agida.

*Ele izi wam gwọru
ele nriria*

¹² Ele izi rnurnu agida ęnu ndu-ęhni nū ęnu elekema n'esilawuru ele badnụ. Kpakara ele kweru naagbakọ nū mgbe-mgbe ọro Solomoni.

¹³ Ọ zā nye berere nwernu rikne sno be, ọ bụ n'ezī nū ele badnụ naakaa be ọka ọma.

¹⁴ Kọvu agida ele badnụ snornu ele kweru ekwe, ele rukna nū ele rinya.

¹⁵ Ka mernu be kwuya ele naaria ęhni igbugbu, dnanyita be nū ngeri apna n'olu ọkpata be nū etere be, ma kpa Pita naagawhe enine a metụ agwna be.

¹⁶ Igbudu ele badnụ hi n'ẹli gbarụ Jeruselem gburugburu va kwuya ele ke be naari ęhni igbugbu, ma ele rẹnwu ojo nwugwu, be gwọru kpakara be.

Be kpakarnu ele izi ęhni

¹⁷ Ige wam okno-awuwa jihiaru nye risi arịohna nū ele nū ya sno, bụ ele otu Sadusi, mkpọma.

¹⁸ Be nwudne ele izi, yisi be ikelu nū ruwhnu ọhna.

¹⁹ Kọvu enine izi Nyenwe aị varu n'abali, gbamanụ be ọnuhna ikelu, kwuhia be.

²⁰ Ọ kanụ be, "Anụ zne gwuzoru n'Ọro Nsọ Chiokike, kanụ ele badnụ kpakara izi ke bụdnu ikne ka."

²¹ Ele izi wam zne n'Ọro Nsọ Chiokike ke chi bọru neezni ele badnụ nhne.

Nga nye risi arịohna nū ele nū ya sno varu, be sukwukọta ele eze-ikpe nū kpakara ele risi Izireli, zizne izi ma be kwuhianu be ele izi wam.

²² Ele be ziznenu ọro ikelu, whnuge be n'ọro ikelu. Be lahna kanụ ele dusiri be,

* 4:26 nye ke a o teru mọno: Ke bụ Mezaya, Karaịsi.

23 “Nga a dūru ọro ikelu, ọro tūru ọtu, kpakara ele nse neese ọnuhna, kọvu nga a gbamarnū ọro, ọ zá nye zị nū rime ọro.”

24 Nga nye risi ele neese Oro Nso Chiokike nū ele risi arịohna nūrnu a, ọ gbagwojiri be anya.

25 Ige wam otu badnū va, kanū be. “Anū le, ele rukna wam anū yisiri n'ikelu zị n'Ọro Nso Chiokike neezni ele badnū nhne.”

26 Nye risi ele neese Oro Nso Chiokike nū ele ya nū be neese Oro Nso zne kwuya ele izi wam, be méne be nhne rikne kwnornu nū be nọtut ọgwu ele badnū jootu be akaworugwu.

27 Be kwuya ele izi wam gwuzote be nū ruwhnu ele eze-ikpe. Nye risi arịohna sịkwa be,

28 kaa, “A dọru anū aka nū nsnj anū zní nhne nū rẹwhna Jizọsi. Anū mernu kpakara ẹli Jeruselem jihja n'iznizni anū, anū noovukwasi aj ẹnwu ọvnarna Nyerukna ka.”

29 Pita nū ele izi sarū be, “A kwesiri o bnonu Chiokike nsnj karū badnū.

30 Chiokike ke ele nda aj mernu Jizọsi hi n'ẹnwu lizọ, bụ nye anū gburu, kpogidne a n'olu ọgba.

31 Chiokike gwelizọru a olu n'akarikwnnunga a ma ọ bụru Nye Risi nū Nye Ọznohia, ma ele Izirẹli tūhnasna, ma Chiokike gbarūnu be mmehie be.

32 A bụ ele akebne nhne ele ka, ma Enine Nso, ke bụ nkesi Chiokike nyernu ele noobonu a nsnj.”

33 Nga be nūrnu ọka ka, ovu weru be ẹhni k'agida, be kpebi o gbu ele izi wam.

34 Kọvu otu nye Farisi rẹwhna a bụ Gamalieli, nye zní iwu ele Ju, nye ele badnū nọoso anya, gwuzoru n'esilawūru ele ikpe, kaa ele izi wam whọga n'ederezi.

35 Ọ kanū ele ikpe wam, “Ele Izirẹli, anya dū anū ẹli nhne anū noopio o mee ele rukna ka.

36 N'ige wheru ewhe, Tadiyosi whųyaru neeme ẹhni a nū ọ bụ nye zị rikne, riwhu badnū ẹno snornu a. Be gburu a, kpakara ele snornu a gbasarū, otu a nwūrnu.

37 Omekwo, Judasj nye Galili whųyaru n'ige be gwnūrnu ele badnū, ọ dọru agida ele badnū, be gburu a masi, kpakara ele snornu a gbasarū.

38 Kjtna me kanū anū, anū mée nhne ọbula megidne ele rukna ka. Anū sịgbasi be. Ọ bụru nū nhne ka bụ ẹnru aka ke badnū, ọ joowhu.

39 Kọvu ọ bụru nū o hi n'aka Chiokike, anū nwée rikne megbu be. Anū joowhnu nū anū nọolusi Chiokike ọgwu.”

Be kweru nhne o kwuru bụ ezi ọka.

40 Be sukwu ele izi wam, pnja be nhne, kanū be kwuma ọka berere nū rẹwhna Jizọsi, be sịgbasi be, be la.

41 Ele izi wam whọga nū ruwhnu ele ikpe, ovu nọoso be n'ọnu kwnornu nū Chiokike gwnųsiri be ele kwesiri ọ ta awhnųwhnu kwnornu nū rẹwhna Jizọsi.

42 Kpakara ọbochi be zị n'Ọro Nso Chiokike, neezne n'oro n'oro ele badnū nọokpo okwo izi ọma nū Jizọsi bụ Karajsi.

6

Ele ẹnru ẹsau

1 N'ige wam, nga ọnu ọgwunugwu ele kweru ekwe zị naaba aba, ọdogbuta whųyaru n'esilawūru ele Ju nookwu Giriki nū ele Ju nookwu Hiburu. Ele Ju Giriki kanū be lewhuru ele rinya be nzi be nwūrnu anya nū wiri be neeke n'ọbochi n'ọbochi.

2 Ele izi nri nū ẹbo wam sukwu kpakara ele sno apna Jizọsi n'otu, kaa, “Ọ bụo ọma a gharū nhne gbasiri ikwu-ọnu Chiokike neeke wiri.

3 Kjtna, rumu nda aj, anū hohia ele rukna ẹsau n'esilawūru anū ele nwernu agwa ọma, ele Enine Chiokike nū akoniche jihjaru, ma a yisi be nū nhne gbasiri nhne ka.

4 Kọvu aila jeegweru ẹhni aj yisi n'okpukpe nū ọkpo okwo ikwu-ọnu Chiokike.”

5 Kpakara be kweru nhne ele izi wam kwuru. Be hohia Sitivini, nyerukna ke ọkwnata ovu nū Enine Nso jihjaru, nū Filipu nū Porokorosi, Nikano, Timoni, Pamenasi nū Nikolasi, nye Antjoku nye bnarnū okpukpe ele Ju.

6 Be gwuzote be nū ruwhnu ele izi, be kpe okpukpe tūkwasị be aka.

7 Ikwu-ọnu Chiokike neezne nū ruwhnu. Ọnu ọgwunugwu ele sno apna Jizọsi nū rime Jeruselem zị koriri naaba aba. Agida ele ọkwa arịohna kwnata Chiokike mkpoma.

Be nwudneru Sitivini

8 Sitivini bụ nwerukna Chiokike gọziri ke nwernu rikne ọ rnų ẹnru ndu-ẹhni nū nhne elekema n'esilawūru ele badnū.

9 Kọvu nū agwna ele zị n'oro ọgbako ele Ju, ele be kwu Ele Nwernu Ẹhni be, nū ele Ju hiri nū Sirini nū Alẹkizandaria, lizọru megidne a. Be nū ele Ju hi nū Silisia nū Esia nū Sitivini bete neesigha ọka.

10 Kọvu nū be nwée rikne megidne Enine nū akoniche ke Sitivini ji nookwu ọka.

11 Be gno ele badnū be kaa, “A nūrnu hne ọ nookwulu Mozizi nū Chiokike.”

12 Ele ka kpakne ele badnū, be lizọ, be nū ele okno badnū nū ele zní iwu, vakwnusi Sitivini, nwudne a, kwuzne a nū ruwhnu ele eze-ikpe.

13 Be kwuya agwna ele jaagba akebne aghalaghala megidne a. Be kaa, “Nwerukna ka zịko nookwu ọka megidne Oro Nso nū Iwu Mozizi.

14 A nūrnu hne ọ naakaa nū Jizọsi nye Nazareti ka jaakwnadna Oro Nso Chiokike

ka, gbanwo kpakara omen'eli aị ke Mozizi nyernu aị."

¹⁵ Kpakara ele eze-ikpe legidne Sitivini anya, be whnụ nụ ruwhnu a nụ lele ruwhnu enine izi.

7

Ikwu-ọnu Sitivini

¹ Nye risi ariohna sịkwa Sitivini, "Nhne ka be nookwu megidne i, ọ bụ n'ezị?"

² Sitivini sarụ be, "Rumu nda m, nụ ele nda, anụ bnote nsnị. Chiokike ke zị igwugwu mernu Ebereham, nda aị ọknani, whnụ a anya nga ọ zị n'eli Mesopotemia, sụ o zneru wuru nụ Haranị.

³ Ọ kanụ a, 'Sigbasi ezi-nụ-oro i nụ eli i, zne n'eli ke me jeegesi i.'

⁴ "Ọ sigbasi eli Kalidia zne wuru nụ Haranị. Nga nda Ebereham nwurnu, Chiokike mernu o bnanya n'eli ka, hne anụ wu kịna.

⁵ N'ige wam Chiokike nyéne Ebereham agwna eli ka ma ọ bụru ke a, ọ bụbedi otu renu ọchi, kọvu Chiokike kweru a mkwna nụ o jeenye a eli ka, ma ọ bụru ke a nụ ẹbnurnu ele joosno a n'aznụ. Nga Chiokike kweru mkwna ka, Ebereham nwée rumu.

⁶ Ka bụ nhne Chiokike kannụ a, 'Rumu i joowu n'eli berere, hne be jọoburu ele ọhi, be jeeme be nhne ojo riwhu awha ẹno.'

⁷ Kọvu Chiokike karụ, 'M jeekpe ele wam be jọoburu ọhi ikpe, omekwo, be jeehi n'eli wam whụya, be jọokponu m risi eli nụ hna.'

⁸ Chiokike mernu ọgba-njọ-ẹhni ọkpa nka ziri n'esilawuru ya nụ Ebereham. Ebereham kparụ Aziki nnwọ a nka nga ọ gbarụ ọbochi ẹsato kpa be murnu a, Aziki kpa Jekọpu nka, Jekọpu kpa nri nụ rumu a lawuru ele nda aị ọknani nka.

⁹ "Ele nda aị ọknani kwnosiri nwene be Josefu awụwa, be rezne a Ijipiti lele ọhi, kọvu Chiokike dagwunu a,

¹⁰ dọhia a nụ kpakara mkpa a. Nga Josefu gwuzo nụ ruwhnu Fero, eze Ijipiti, Chiokike nyernu a ruwhnu ọma nụ akoniche. Fero mernu a nye risi ọchichi kpakara Ijipiti nụ kpakara ọro eze.

¹¹ "N'ige wam ọknunyo dnarnụ nụ kpakara eli Ijipiti nụ Kenanị, ke vuyarụ agịda awhnụwhnu. Ele nda aị ọknani nwée wiri.

¹² Nga Jekọpu nurnu nụ wiri zị nụ Ijipiti, o zizne ele nda aị ọknani pji nụ mbom.

¹³ Nga be zneru ke mgba lawuru, Josefu mernu rumu nne a mahja a, Fero mahja masi ezi-nụ-oro Josefu.

¹⁴ Nga ka mekworu, Josefu ziznenu Jekọpu nda a izi, kanụ a, o kwuru kpakara ezi-nụ-oro a va Ijipiti, be bụ nri badnụ ẹsau nụ isne.

¹⁵ Jekọpu zne Ijipiti hne ya nụ ele nda aị ọknani zị nwụ.

¹⁶ Be vuru iznu be zne Sẹkem hne be liri be n'ilili ke Ebereham zunahoru avnurnu Hamọ n'iwai.

¹⁷ "Nga ige Chiokike jeemezu mkwna o kweru Ebereham duru, ọnu ogwnugwnu ele ke aị zị nụ Ijipiti zịlam agịda.

¹⁸ N'ipne-aznụ, eze berere ke máa Josefu bete nęechi Ijipiti.

¹⁹ Ọ mernu ele nda aị ọknani nhne rikne, gho be aghigho, mee be tuwhu rumu be, ma be nwuma.

²⁰ "Ọ bụ n'ige ke nụ kpa bụ nga be murnu Mozizi, nnwọ marnụ mma nụ ole anya, be legidne anya n'oro nda a ẹnwa ẹto.

²¹ Nga be ghasarụ a n'ederezi, adna Fero kwuru a, znulizo a lele nnwọ a rukna.

²² Be znirni a kpakara nhne ọmumu nụ akọ ele Ijipiti, Mozizi buri dikne n'ikwu-ọnu nụ dimkpa nụ rikne.

²³ "Nga Mozizi gbarụ nri awha ẹno, o kpebi o zne lekasi rumu nda a, ele Izireli.

²⁴ O whnụ hne otu nye Ijipiti neemegbu nye Izireli, o zne megwnahjanu nye Izireli, gbu nye Ijipiti.

²⁵ O che nụ ele ke a jọoghohia nụ Chiokike jeehi n'aka a dọhia be, kọvu be ghọhiage.

²⁶ Ke chi a bọru, ọ whnurnu rumu Izireli lawuru nọolu ogwnu, o zne bno be, ọ kaa, 'Le, anụ bụ rumu nwene, kini mernu anụ nọolu ogwnu?'

²⁷ "Kọvu nye ke mejoru nwene a kwnahala Mozizi, sịkwa a, 'Nyele mernu i nye risi nụ nye ikpe aị?'

²⁸ I noopio o gbu m lele kpa i gburu nye Ijipiti n'ekile sa?'

²⁹ Nga Mozizi nurnu ka, ọ gbawhu, zne wuru nụ Midia lele nye izne, hne ọ murnu rumu rukna lawuru.

³⁰ "Nga nri awha ẹno whemernu, enine izi Chiokike mernu ọ whnụ a anya nụ riro bẹkwnu isisi matị n'eli-ikpa zị Rugwu Sajna ndundu.

³¹ Nhne Mozizi whnurnu a jiri anya, o znedu isisi matị wam ndundu, ọ nurnu nkọli Nyenwe aị,

³² 'Mawa bụ Chiokike ele nda i ọknani, Chiokike ke Ebereham, nụ Aziki nụ Jekọpu.' Mozizi turu ogwnu k'agịda, o nwée rikne legidne anya.

³³ Nyenwe aị kanụ a, 'Tuma okoro-ọchi i, kwnornu nụ hne i gwuzo bụ eli nsọ.

³⁴ M leru m anya, whnụ awhnụwhnu ele ke m n'Ijipiti. M nurnu m ọsnu-idne be, m hiednana m ma m znohia m be. Kịna, va, m jeezizne i Ijipiti.'

³⁵ "Ka bụ Mozizi wam be juru kaa, 'Nyele mernu i nye risi nụ nye ikpe aị?' Ya bụ nye Chiokike ziznenu lele nye risi nụ nye ọznohia, hite nụ oyi aka enine izi wam ke mernu ọ whnụ a anya n'isisi matị wam neerne bẹkwnu.

³⁶ O duhja be hite nu Ijipiti hne o nrũnu enru ndu-ehni nu nhne elekema, ma n'Okne Osimini Ihie, ma nu eli-ikpa nri awha eno.

³⁷ "O bu Mozizi kannu ele Izireli, 'Chiokike jeeziyanu anu nye owhnurninya lele me, hite nu ele ke anu.'

³⁸ O bu Mozizi ka bu nye zi n'esilawuru agida ele wam n'eli-ikpa, ya nu ele nda aj oknani, ma enine izi wam nye kwunnu a oka nu Rugwu Saina. O nahjuru ikwu-onu ke zi budnu ke Chiokike, ma o nyewhete aj ya n'aka.

³⁹ "Kovu ele nda aj oknani bnogele a nsni, be kwnahala a n'otu nko, nu be jaalahna Ijipiti.

⁴⁰ Be kanu Eroni, 'Menu aj rumu chi berere ke joodu aj. A ma nhne mernu Mozizi wam nye kwuhjuru aj n'Ijipiti.'

⁴¹ Nga wam be mee chi lele nnwo ehni, kwanu a arjohna, kwu ikwu iriri, kwnornu nu nhne be jiri aka be kpu.

⁴² Kovu Chiokike dasĩnu be aznu, nye-whete be ma be kpenu mbog ke oligwe, lele kpa be gharu a n'okwukwo ele owhnurninya, 'Ele Izireli, anu kwannu m arjohna nu nhne nkesi

nri awha eno n'eli-ikpa?

⁴³ Anu vulizoru oro Moloکو anu vulizo mbog Refani, ke bu chi anu kpuru, kponu be risi eli.

M jeezihala anu whe Babiloni.'

⁴⁴ "Ele nda aj oknani vu Oro-Eka ruwhnu Chiokike n'eli-ikpa. Be wuru a lele kpa Chiokike kannu Mozizi wu a, lele odi ke be gesiri Mozizi.

⁴⁵ Omekwo, ele nda aj oknani ele nahoru Oro-Eka wam n'aka ele nda be, vuru a zne be nu Josua, nahoru ele mba wam eli be, bu ele Chiokike chihalaru nu ruwhnu be. Oro-Eka wam zi tem du ige Devidi.

⁴⁶ Devidi nahjuru ruwhnu oma n'aka Chiokike, o rjo Chiokike o gharu a ma o wutenu Chiokike Jekoru oro.

⁴⁷ Kovu Solomoni bu nye wunnu a oro wam.

⁴⁸ "Kovu Nye Kakwo Nhne Dum Olu za noowu n'oro badnu wuru, lele kpa nye owhnurninya kwuru,

⁴⁹ 'Ka bu nhne Nyenwe aj kwuru,

Oligwe bu ngadna eze m, owa bu nhne otukwasi ochi m lawuru,

Ndaa okpa oro ke anu joowunu m?

Ndaa hne me jeezukwa inwe?

⁵⁰ O buo me keru kpakara nhne ka?'

⁵¹ "Anu ele risi rikne nu ele ke be kpaga nka nu mkpoma, anu mesirni nsni anu. Anu noogwuzigidne Enine Nso, lele kpa ele nda anu oknani mernu.

⁵² Ndaa nyenum n'esilawuru ele owhnurninya ke ele nda anu kpaknana ehni? Be gburu ele izi Chiokike ele kwuru n'ige

wheru ewhe nu nye mee mma jaava, kovu anu reru a, gbu a.

⁵³ Anu nahoru iwu Chiokike hite n'aka ele enine izi, kovu anu bitagele a."

Be turu Sitivini akaworugwu

⁵⁴ Kpa ele eze-ikpe bnornu nsni nhne Sitivini nookwu, onuma jihjuru be mkpoma, be ta rukwnurnu-ize megidne a n'ovu owe ehni.

⁵⁵ Enine Nso jipiyaru Sitivini, o lelizo anya n'oligwe whnu igwugwu Chiokike, nu Jizosi hne o gwuzo n'akarikwununga Chiokike.

⁵⁶ O kaa, "Anu le, m whnurnu m hne oligwe kpumernu, nu Nnwo ke Badnu hne o gwuzo n'akarikwununga Chiokike."

⁵⁷ Be siwama lulo, gweru aka kpusnime nsni be, kpakara be gbagidne a.

⁵⁸ Be tohala a n'aznu eli-ohna, gweru akaworugwu logbu a. Ele akebne chibita iwo be n'ochi otu nnwo ikoro rewhna bu Solu.

⁵⁹ Be logbu Sitivini, o kwnakwu Nyenwe aj, kaa, "Nyenwe aj Jizosi, narnu enine m."

⁶⁰ O gwute mpnerne ochi, gweru okne nkoli siwama lulo, "Nyenwe aj, bikno, i gwnu mmehie ka nu risi be." Nga o kwuru kpa, o nwuma.

8

¹ Solu bnjasiri aka n'enwu Sitivini.

Solu kpaknarnu ogbako Chiokike ehni

N'obochi wam, be bete naakpakna ogbako Chiokike ke zi nu Jeruselem ehni, kpakara ele kweru ekwe gbasu nu rime kpakara eli Judiya nu Sameria, okwolem ele izi bu ele gwnarnu nu Jeruselem.

² Agwna ele nqotu ogwnu Chiokike zne vuru iznu Sitivini lite, be kwanu a ekwna k'agida.

³ Kovu Solu gbalu o lulu ogbako Chiokike, o neezne hite n'oro du n'oro, pnuhia ele rukna nu ele rinya bu ele kweru ekwe tubna be n'oro ikelu.

Filipu znirni izi oma nu Sameria.

⁴ Kpa kpakara ele kweru nu Nyenwe aj gbasaru, be zne neezni izi oma kpa be neezne.

⁵ Filipu zne n'eli Sameria kpo okwo izi oma Karajsi pii.

⁶ Nga ele badnu nrnu nhne Filipu nookwu ya nu enru ndu-ehni o nornu, be bnotenu a nsni.

⁷ Renwu ojo hiri nu rime agida ele badnu neesi okokoba, be gworu agida ele ngeri ehni be donwurnu odonwu nu ele mgworo.

⁸ Okne snarnima dnarnu nu rime Same-ria.

⁹ Otu nwerukna rewhna a bu Saimoni wu nu eli wam, nye mernu anya ji ele Sameria

hite n'ernu aghigho. O karu nu o bu nye siri rikne.

¹⁰ Kpakara ele wu n'eli wam nqosobisinu a, hite nu nye mati du nu nye zi n'olu. Be naakaa, "Nwerukna ka bu okne iknernema Chiokike."

¹¹ Ernu aghigho a bu nhne o jiri mee anya ji be gbu okwnu.

¹² Kovu nga be kweru izi oma Filipu zirnri gbasiri eli-eze Chiokike nu rewhna Jizosi Karaisi, be wu be mini, ma ele rukna ma ele rinya.

¹³ Saijmoni masi kweruru, nga be wuru a mini, o dazitasi Filipu ndundu, ernu elekema nu ernu ndu-ehni o whnurnu jiri a anya.

¹⁴ Ele izi ele zi nu Jeruselem nurnu nu ele Sameria kweruru ikwu-onu Chiokike, be zine Pita nu Joni pii.

¹⁵ Nga be vaduru, be kpenu be okpukpe ma be nahoru Enine Nso.

¹⁶ Kwnornu nu Enine Nso yaadnakwasila nye obula n'esilawuru be. Be wu be mini nu rewhna Nyenwe ai Jizosi kpoi.

¹⁷ Pita nu Joni tukwasi be aka nu risi, be nahia Enine Nso.

¹⁸ Nga Saijmoni whnurnu nu be nyernu be Enine Nso hite n'otukwasi be aka, o nyee Pita nu Joni iwai,

¹⁹ kaa, "Anu nyee m rikne ka masi ma nye obula ke me tukwasiri aka m lawuru, o nahia Enine Nso."

²⁰ Pita kanu a, "Ji nu iwai i whu n'ohia, kwnornu nu i cheru nu i joozuhiali nkesi Chiokike n'iwai.

²¹ I nwee igwe nu ernu ai, kwnornu nu mkpoma i zila snam n'anya Chiokike.

²² Tuhnasna hite nu mmuma ojo i, kpe okpukpe, ma Nyenwe ai gbarunu i.

²³ Kwnornu nu m whnurnu m nu agida okwono-awuwa jiri nu rime mkpoma i, i bu nye ikelu ke mmehie."

²⁴ Saijmoni kanu Pita nu Joni, "Anu kpenu m okpukpe nu ruwhnu Nyenwe ai ma nhne anu kwuru gharu a dnakwasi m."

²⁵ Nga be gbaru ama, kpo okwo izi oma Nyenwe ai, Pita nu Joni lahana Jeruselem. Nu apna kpa be naala be zni izi oma nu eli-ohna zi nu Sameria.

Filipu nu nye chi-iwai

²⁶ Enine izi Nyenwe ai kanu Filipu, "Lizo, zne apna ke zi nu eli eli ke laru Jeruselem zne Gaza apna eli chna chna chna."

²⁷ Filipu lizo, zne. Otu nwerukna Itiopia bu okiri badnu lazne eli a. Nwerukna ka bu nye zi mkpa n'eli Itiopia, o bu ochi-iwai eze nyerinya Itiopia nye rewhna bu Kandasi. O zernu o kpenu Chiokike nu Jeruselem.

²⁸ O dazi nu rime ogbo-eli a, nqogwnu okwukwo Azaya nye owhnurninya.

²⁹ Enine Nso kanu Filipu, "Zne ndundu daziri n'ehni ogbo-eli wam."

³⁰ Filipu gba eso zne, nu kpa o nqogwnu hite n'okwukwo Azaya nye owhnurninya, o sika a, "I nqoghohia nhne i nqogwnu?"

³¹ O kaa, "Ndaa kpa me jeeji nqoghohia, okwolem ma o nwernu nye jookowanu m?" O sukwa Filipu, o pnekwnusi a, daziri eli nu rime ogbo-eli a.

³² Nhne be gbaru n'okwukwo nso o nqogwnu bu ka,

"O nu lele atnurnu be duru zne o gbu ogbu lele nnwo atnurnu ke dnarnu mgbu nu ruwhnu ele noko a rijini, o kwule oka.

³³ Be gwednarnu a n'eli, be gonahoru a n'ikpe zi snam,

O za nye jookwuli nhne gbasiri rumu a, kwnornu nu be gwemernu budnu a n'owa."

³⁴ Nwerukna wam sika Filipu, "Bikno, kanu m, ndaa nye nye owhnurninya ka nookwu nhne gbasiri a? O bu ehni a sobu nye berere?"

³⁵ Filipu bete nookwu oka, hite nu nhne be gbaru n'okwukwo nso ka, zni izi oma gbasiri Jizosi.

³⁶ Kpa be neezne, be vadu hne mini zi, okiri badnu wam kaa, "Le mini, kini jeeme be gharu o wu m mini?"

[

³⁷ Filipu kaa, "Be nwernu rikne wu i mini, o buru nu i jiri kpakara mkpoma i kweru." O kaa, "M kweru m nu Jizosi Karaisi bu Nnwo Chiokike."]

³⁸ Nwerukna wam kanu ogbo-eli a kwnusi, Filipu nu okiri badnu wam bna nu rime mini, o wu a mini.

³⁹ Nga be hiri nu mini whuya, Enine Nyenwe ai vuhala Filipu. Okiri badnu wam whnuna a berere, kovu, o la n'eli a nu ovu qso n'onu.

⁴⁰ Filipu whnu ehni a nu Azotosi. O zne nu kpakara eli nqokpo okwo izi oma tem o vadu Sizaria.

9

Otuhnasna mkpoma Solu (Ernu 22:6-16; 26:12-18)

¹ Solu zi koriri neemegidne ele noosno apna Nyenwe ai, naakpas be ogwnu o gbu be. O zneknusi nye risi arjohna,

² nahoru a okwukwo o jeenye kpakara oro ogbako ele Ju zi nu Damasikos, o buru nu o joowhnu nye obula ke noosno apna Nyenwe ai pii, ma o nwudne be, rukna nu rinya, ma o pnurnu be va Jeruselem.

³ Kpa o neezne, o gwnarnu mati o du Damasikos, ngangam, okne iwhne hiri n'oligwe mukwasi a gburugburu.

⁴ O dna n'eli, o nurnu otu akpiri naakanu a, "Solu, Solu, kini mernu i naakpakna m ehni."

⁵ O sika, "I bu nyele, Nyenwe ai?"

Akpìri wam kaa, “Mawa bụ Jizọsi, nye i naakpakna ẹhni.

⁶ Kọvu lizọ, bna nụ rime ẹli-ọhna, hne be jaakanụ nhne i jeemeriri.”

⁷ Ele rukna be nụ Sọlu sno nwée rikne kwu ọka, be nurnu akpìri wam, kọvu ọ zá nye be whnurnu.

⁸ Sọlu lizọ n'ẹli, kpume anya a, kọvu o nwée rikne whnụ nhne ọbula. Be duru a n'aka bna nụ rime Damasịkosi.

⁹ Ọ whnuna ọsno ọbochi ẹto, o ríle wiri, ọ nwóna mini.

¹⁰ Otu nye sno apna Nyenwe aị zị nụ Damasịkosi, nye rẹwhna a bụ Ananayasi, ọ whnurnu ọwhnurninya, hne Nyenwe aị sukuru a, “Ananayasi.”

Ọ naakwe, “Le m, Nyenwe aị.”

¹¹ Nyenwe aị kanụ a, “Jiknenu, zne n'apna be kwu Zirikwem, nụ ọro Judasi, sịkwa otu nye be kwu Sọlu, nye Tasosi. O neekpe okpukpe.

¹² Ọ whnurnu ọwhnurninya otu nwerukna rẹwhna a bụ Ananayasi, varụ tükwasi a aka a lawuru nụ risi ma ọ whnurnu ọsno berere.”

¹³ Ananayasi kaa, “Nyenwe aị, agida ele badnụ kannu m nhne gbasiri nwerukna ka, nụ kpakara nhne ojo o mernu ele ke i nụ Jeruselem.

¹⁴ O jiri rikne ele risi arịohna va Damasịkosi ma ọ nwudne kpakara ele naakwnakwu rẹwhna i.”

¹⁵ Nyenwe aị kanụ a, “Zne, kwnornu nụ m hōhiaru m a ma o znenu m izi, o jeeme ele bụo ele Ju nụ ele eze mahia rẹwhna m ma ele Izireli.

¹⁶ M jeegesi a kpakara awhnụwhnu ọ jaata kwnornu rẹwhna m.”

¹⁷ Ananayasi zne, bna n'oro wam, tükwasi aka a lawuru nụ risi Sọlu, kaa, “Nwene rukna Sọlu, Nyenwe aị Jizọsi, nye mernu ma i whnụ a anya n'apna nga i naava, ziyaru m ma i whnurnu ọsno berere, ma Enine Nso jihia nụ rime i.”

¹⁸ Ngangam, nhne nụ lele rụkporo aznụ dnahnala n'anya a, o bete ọ whnụ ọsno, o lizọ, be wụ a mini.

¹⁹ Nga o riri wiri, rikne bna a n'ẹhni.

Sọlu znirni izi ọma nụ Damasịkosi

Ọ daziri ọbochi ele nụ ele ya nụ ele sno apna Jizọsi nụ rime Damasịkosi.

²⁰ Ọ bna kpakara ọro ọgbako ele Ju bete neezni izi ọma gbasiri Jizọsi, nụ ọ bụ Nnwọ Chiokike.

²¹ O jiri kpakara ele nurnu a anya, be neesikwa, “Ka ọ bụo nwerukna wam noogbu kpakara ele naakwnakwu rẹwhna ka nụ Jeruselem? Ọ bụo ma ọ pnurnu be zne nyee ele risi arịohna bụ nhne o kwnornu va hna?”

²² Kọvu Sọlu gwuzosiri rikne neezni izi ọma, neegesi nụ Jizọsi bụ Karaịsi n'ezi ọka, ke gbagwojiri ele Ju zị nụ Damasịkosi anya.

²³ Nga agida ọbochi whemernu, ele Ju gba iznuznu o gbu a.

²⁴ Kọvu Sọlu mahiaru mmuma be. Ele Ju zị neese ọnu-mgbo iwihnehnie nụ abalı ma be gbu a.

²⁵ Kọvu ele noosno a jiri abalı znuhala a nụ rime nkita n'iketa mkpọ.

Sọlu nụ rime Jeruselem

²⁶ Sọlu zne Jeruselem, ọ gbalị ma o snornu ele sno apna Jizọsi, kọvu ogwnu turu be, kwnornu nụ be kwéhiala nụ ọ bụ nye sno apna Jizọsi.

²⁷ Banabasi varụ kwuru a kwuznenu ele sno apna Jizọsi, ọ kọwanu be kpa Sọlu whnurnu Nyenwe aị n'apna, nụ Nyenwe aị kwunnu a ọka. Ọ kanụ be kpa Sọlu znirni izi ọma n'anya rikne nụ Damasịkosi.

²⁸ Be nụ Sọlu daziri, o zne nụ rime kpakara Jeruselem, gweru anya rikne nọkpo okwo izi ọma nụ rẹwhna Nyenwe aị.

²⁹ Ya nụ ele Ju nookwu Giriki nọdogbuta, be pio o gbu a.

³⁰ Nga rumu nda nurnu nhne gbasiri a, be kwuru Sọlu zne Sizaria, zizne a Tasosi.

³¹ Kpakara ọgbako Chiokike ke zị nụ Judiya nụ Galili nụ Sameria zukwaru inwe n'udno. Enine Nso mernu be gwuzosi rikne, ba aba, kpa be noowu bndu nọotu ogwnu Nyenwe aị.

Pita nụ rime Lida nụ Jọpa

³² Kpa Pita neezneghari kpakara ọhna neelekasi rumu Chiokike, o zne lekasi ele zị nụ Lida.

³³ Ọ whnụ otu nwerukna rẹwhna a bụ Enjasi, nye ngeri ẹhni a dōnwurnu ọdonwu, nye zị n'olu ọkpata awha ẹsato.

³⁴ Pita kanụ a, “Enjasi, Jizọsi Karaịsi mernu i ẹhni si rikne, lizọ, gbakwata ọkpata i.” Ngangam, o lizọ.

³⁵ Kpakara ele wu nụ Lida nụ Sarōni whnurnu a, tūhnasna hne Nyenwe aị zị.

³⁶ Otu nwerinya rẹwhna a bụ Tabita (ke bụ Dọkasi), nye sno apna Jizọsi, zị nụ Jọpa. Ọ bụ nye neeme nhne ọma ige ọbula, neeyinu ele mboni aka.

³⁷ N'ige wam ọ rja ẹhni igbugbu, nwuma. Be hñja ẹhni a dọbita n'oro olu.

³⁸ Nga ele sno apna Jizọsi nurnu nụ Pita zị nụ Lida, Jọpa zila ikere nụ Lida, be zizne ele rukna lawuru, rjasno a, kaa, “Bikno, va wara wara.”

³⁹ Pita jiknenu, snornu be zne. Nga ọ vaduru be kwuzne a n'oro olu. Kpakara ele rinya nzi be nwurnu zị naakwna ẹkwna, neegesi a kpakara iwo Dọkasi dūnnu be nga ya nụ be zị.

⁴⁰ Pita chihala kpakara be ederezi, gwu mkpnerne-ochi n'ẹli, kpe okpukpe, ọ

tuhnasna hne iznu wam zi, kaa, “Tabita, lizo.” O sama anya a, nga o whnurnu Pita, o daziri eli.

⁴¹ Pita yisinu a aka, o gwuzoru. O sukwu ele kweru ekwe nu ele rinya nzi be nwurnu, gesi be ya nu budnu.

⁴² Otutnu gbasiri nhne ka gbasu nu kpakara Jopa, agida ele badnu kweru nu Nyenwe ai.

⁴³ Pita daziri agida obochi nu rime Jopa n'oro otu nye nornu ernu akpukpo ano be kwu Sajmoni.

10

Pita nu Koneliosi

¹ Otu nwerukna rewhna a bu Koneliosi zi nu Sizaria, nye risi ele ogwnu Rom be kwu Otu ele Itali.

² O bu nye notu ogwnu Chiokike, ya nu kpakara ele oro a neekpenu Chiokike. O neeyinu ele mboni Ju aka, neekpe okpukpe nyee Chiokike kpakara ige.

³ Otu obochi, n'otnu-ige ke eto n'iwnehnie* o whnurnu enine izi Chiokike n'owhnurninya hne o vakwnusiri a, kaa, “Koneliosi.”

⁴ Nga o leru anya, ogwnu turu a, o kaa, “O kini, Nyenwe ai?”

Enine izi kaa, “Chiokike nurnu okpukpe i, o chenwanyarnu ernu oyinu ele mboni aka i.

⁵ Kitna, zizne ele badnu be zne Jopa, be sukwu otu nwerukna rewhna a bu Sajmoni Pita.

⁶ O zi n'oro otu nwerukna rewhna a bu Sajmoni nye ernu akpukpo ano, nye oro a zi nu ngeri osimini.”

⁷ Nga enine izi wam ya nu a nookwu oka lahnarnu, Koneliosi sukwu ele izi a lawuru, nu otu nye ogwnu ke bu otu nu rime ele izi a, nye notu ogwnu Chiokike.

⁸ O kanu be nhne mernu, zizne be Jopa.

⁹ N'ekile a, kpa be naavadu Jopa ndundu, Pita zne n'olu oro n'iwnehnie† zne kpe okpukpe.

¹⁰ Nga wiri gwnurnu a, o pio nhne o jeeri, be zi neesi wiri, o whnurnu owhnurninya.

¹¹ O whnurnu hne oligwe kpumernu, nu nhne nu lele etere be dodnarnu nu nkala eno a du eli.

¹² Kpakara anohia obula ma agwo, ma onunu oligwe zi nu rime a.

¹³ Otu akpuri kanu a, “Pita, lizo, gbu, ri.”

¹⁴ Kovu Pita saru, “Oza, Nyenwe ai, kwnornu nu m rifele m nhne obula ruru oru, mabu ke zila richna.”

¹⁵ Akpuri wam kwu ke mgba lawuru, “Nhne obula Chiokike karu nu o zi richna, i kwula nhne zila richna.”

¹⁶ Nhne ka mernu mgba eto, kpakara be lahna nu rime oligwe.

¹⁷ Kpa Pita zi naagbadi risi owhnurninya ka, ele rukna wam Koneliosi ziyaru mahjaru oro Sajmoni, be gwuzoru n'ogodo onuhna.

¹⁸ Be jikwa, “O bu hna hne Sajmoni Pita zi?”

¹⁹ Nga Pita zi koriri naagbadi risi owhnurninya ka, Enine Nso kanu a, “Le, ele rukna eto noopio i.

²⁰ Jiknernu ehni i, snornu be zne, i sigha oka o sno be zne, kwnornu mawa ziyaru be.”

²¹ Pita hiedna n'olu oro, kanu be, “Me bu nye anu noopio. Ndaa nhne anu kwnornu va?”

²² Be kaa, “Koneliosi nye risi neechi ele ogwnu ziyaru ai, o bu nye mee mma nu nye notu ogwnu Chiokike. Kpakara ele Ju noso a anya k'agida. Otu enine izi Chiokike kannu a o sukwu i n'oro a, ma o nurnu nhne i jookwu.”

²³ Pita kwubnanya be oro, be dnanyi chi bo. N'osisi a, Pita nu agwna rumu nda ele zi nu Jopa snornu be zne.

Pita zi n'oro Koneliosi

²⁴ N'ekile a, o vadu Sizaria, hne Koneliosi nu rumu nwene a nu ele enyi a o sukwwuru zi neese a.

²⁵ Kpa Pita naabna n'oro, Koneliosi kwnusi a, dna n'eli n'ochi a, kpou a risi eli.

²⁶ Kovu Pita tolizo a, kanu a, “Lizo, kwnornu nu m bu m badnu etekne.”

²⁷ Pita nookwunu Koneliosi oka, be bna nu rime oro, o owhnu agida ele badnu gbakor.

²⁸ O kanu be, “Hite n'iwu ai, anu magwu nu nye Ju wee rikne meko nhne ya nu nye buo nye Ju mabu zne oro be. Kovu nu Chiokike karu me kwu badnu nhne zila richna mabu nhne ruru oru.

²⁹ Nga anu sukwwuru m, m wee m rikne sikwa ajji. Kitna, ndaa nhne mernu anu jiri sukwu m.”

³⁰ Koneliosi kaa, “Obochi eno wheru ewhe, m zi m neekpe okpukpe n'otnu-ige ke eto n'iwnehnie.‡ Ngangam, otu nwerukna wogwu iwo naacha va-a-a, gwuzoru nu ruwhnu m.

³¹ O kaa, ‘Koneliosi, Chiokike nurnu okpukpe i, o chenwanyarnu ernu oyinu ele mboni aka i.

³² Zizne ele badnu Jopa be sukwu otu nyerukna rewhna a bu Sajmoni Pita, o bu nye izne n'oro Sajmoni nye ernu akpukpo ano, nye wu nu ngeri osimini.’

* 10:3 otnu-ige ke eto n'iwnehnie: okwukwo ke mbom kwuru ige awa ke tolu † 10:9 iwnehnie: okwukwo ke mbom kwuru ige awa isunu ‡ 10:30 otnu-ige ke eto n'iwnehnie: okwukwo ke mbom kwuru ige awa ke tolu

³³ M ziyannu jì izi wara wara, i mek-waru nkarì va. Kìtna, kpakara aì zì nù ruwñnu Chiokike, neese ò nurnu kpakara nhne Nyenwe aì nyernu n'iwu jì kanu aì."

Ikwu-ònu Pita

n'òro Kòneliosi

³⁴ Pita bete o kwu òka, kaa, "M mahiaru m kìtna n'èzi òka nù Chiokike zá neele badnu anya nù ruwñnu.

³⁵ Kòvu Chiokike nookwubnanya nye òbula ke nòotu ogwnu a, nye neeme mma hite nù mba òbula.

³⁶ Anù magwu izi Chiokike ziznenu ele Izireli, nòokpo okwo izi òma udno hite nù Jizòsi Karaìsi, nye bu Nyenwe kpakara badnu.

³⁷ Anù magwu nhne mernu nù kpakara Judiya hite nù Galili, kpa Jòni znikworu izi òma òwu mini.

³⁸ Anù magwu masì nhne gbasìri Jizòsi nye Nazarèti, kpa Chiokike nyernu a Enine Nsò nù rikne. O znegharìri nù rime kpakara èli neeme nhne òma, nòogwo kpakara ele rēnwu òjo nwuḡwu, kwnornu nù Chiokike dagwunu a.

³⁹ "A bu ele akebne kpakara nhne o mernu n'èli ele Ju ma nù rime Jeruselem. Be kpogidne a n'ògba, gbu a.

⁴⁰ Kòvu Chiokike mernu ma o hi n'ēnwu lizò n'òbochi ke èto, mee ma ò whuya iwñne.

⁴¹ Ò búò kpakara ele badnu whnurnu a, kòvu ò bú aìwa ele akebne Chiokike hòhiaru. Aì nù a snornu ri wiri, nwò mini nga o hiri n'ēnwu lizò.

⁴² O nyee aì iwu a zne zni izi òma ka nyee ele badnu, a gba akebne nù ò bú ya nye Chiokike hòhiaru ò búru nye ikpe kpakara ele zì búdnu nù ele whnurnu ònwu.

⁴³ Kpakara ele òwhnurninya gbaru nhne gbasìri a, nù kpakara ele jeekweru nù ya, be jaagbarunu be mmehie be hite nù rikne ke zì nù rēwhna a."

Ele búò ele Ju

nahiaru Enine Nsò

⁴⁴ Kpa Pita zì nookwu òka, Enine Nsò dnakwasìri kpakara ele noobno nsnì nù izi òma.

⁴⁵ Ò gbagwojiri ele Ju kweru ekwe ele snornu Pita hi nù Jòpa va anya, nù Chiokike wukwasiri ele búò ele Ju Enine Nsò.

⁴⁶ Be nurnu kpa be naaznarnì Chiokike n'ikwu-ònu zì òdo n'òdo.

Pita kaa,

⁴⁷ "Ele ka nahiaru Enine Nsò lele aì, ò zì nye joobnosni ò wu be mini?"

⁴⁸ O nyee iwu be wu be mini nù rēwhna Jizòsi Karaìsi. Be riasno Pita ma ya nù be dazìri òbochi ele nù ele.

11

Pita kòwaru nhne o mernu

¹ Ele izi nù rùmu nda zì nù kpakara Judiya nurnu nù ele búò ele Ju nahiaru ikwu-ònu Chiokike.

² Nga Pita znernu Jeruselem, ele be kparu nka lizò kwugidne Pita,

³ kaa, "I znernu n'òro ele be kpáge nka, jì nù be rikò wiri."

⁴ Pita kanu be nhne mernu hite n'òziri dù okwukwo,

⁵ "Kpa me zì neekpe okpukpe nù èli Jòpa, m whnurnu m òwhnurninya, m whnurnu nhne nù lele etere be òdnarnu nù ngeri èno a hite n'òligwe, ò kwusi hne me zì.

⁶ M lebna anya n'òlu a, m whnù nù rime a anòhia, nù okne anòhia ojo, nù agwò nù ònunu oligwe.

⁷ M nurnu m otu akpìri naakanu m, 'Lizò, Pita, gbu, ri.'

⁸ "Kòvu m karu m, 'Óza, Nyenwe aì, ò zá nhne òbula ruru òru mòbu ke zìla rìchna bnaleru m ònu.'

⁹ "Akpìri wam kwu ke mgba lawuru, kaa, 'Nhne òbula Chiokike karu nù ò zì rìchna, i kwúla nhne zìla rìchna.'

¹⁰ Nhne ka mernu mgba èto, omekwo, kpakara be lahnarnu oligwe.

¹¹ "N'ige wam, ele rukna èto ele be ziyannu m hite nù Sizaria vaduru nù òro wam me zì.

¹² Enine Nsò kanu m me sígha òka, kòvu me snornu be zne. Rùmu nda m isunu ka hiri nù Jòpa snornu m zne Sizaria, kpakara aì bna n'òro Kòneliosi.

¹³ Ò kanu aì kpa ò whnurnu enine izi gwuzo n'òro a, ke kannu a, 'Zizne ele badnu zne Jòpa, be sukwu otu nwerukna rēwhna a bú Sajmoni Pita.

¹⁴ Ò jaakanu ì òka ke be jòoznohia jì nù ezi-nu-òro ì.'

¹⁵ Kpa me panìzornu nookwunu be òka, Enine Nsò dnakwasìri be lele kpa ò dnakwasìri aì n'òziri.

¹⁶ M chenwanya ikwu-ònu Nyenwe aì kwuru, 'Jòni jiri mini wu ele badnu mini, kòvu be jeeji Enine Nsò nòowu anu mini.'

¹⁷ Chiokike nyernu be nkesi wam o nyernu aì kpa a kweru nù Nyenwe aì Jizòsi Karaìsi. M bú nyele ke me joobnosnili Chiokike?"

¹⁸ Nga be nurnu nhne ka, be kpusni ònu be, be znarnì Chiokike, kaa, "Chiokike nyernu ele búò ele Ju obirizi òtuhnasna mkpòma ma be zìri búdnu."

Ogbako ke zì n'Antìoku

¹⁹ Kìtna, okne òkpakna èhni wam ke whuyaru kwnornu ènwu Sitivini mernu ele kweru ekwe gbasà dù Fonisia nù Sajporosi nù Antìoku. Be neezni ele Ju kpò izi òma.

²⁰ Kòvu agwna ele kweru ekwe, ele rukna hiri nù Sajporosi nù Sirini znernu Antìoku,

be nū ele b̄io ele Ju nookwu ọka, n̄okpo okwo izi ọma gbas̄iri Nyenwe āi Jiz̄osi.

²¹ Iknerema Nyenwe āi sno be, aḡida ele badn̄u kweru, t̄uhnasna hne Nyenwe āi zi.

²² Ọtutnu ka d̄uru ọgbako ke z̄i n̄u Jerusēlem n̄s̄i, be zizne Banabas̄i Ant̄iọku.

²³ Nga ọ varu, wh̄n̄u ernalu Chiokike n'esilawuru ele ke a, mkp̄oma s̄oru a n'onu, ọ kanu be yisi ẹhni gweru kpakara mkp̄oma be t̄ukwasi n̄u Nyenwe āi.

²⁴ Banabas̄i b̄u ọmama n̄u badn̄u ke nwernu Enine Nso n̄u ọtukwasi ovu. Aḡida ele badn̄u kweruru n̄u Nyenwe āi.

²⁵ Banabas̄i zne o pio S̄olu n̄u Tas̄osi.

²⁶ Nga o pioh̄aru a, o kwuya a Ant̄iọku. Be lawuru z̄i neezni aḡida ele badn̄u nhne n̄u Ant̄iọku otu awha. Be sukwuru ele sno apna Jiz̄osi "Kirisiteni" ọziri n'Ant̄iọku.

²⁷ N'ige wam, agwna ele ọwhnurninya hiri n̄u Jerusēlem zne Ant̄iọku.

²⁸ Otu nyenum n̄u rime be nye r̄ewhna a b̄u Agab̄osi, gwuzoru n̄u rikne Enine Nso wh̄n̄u ọwhnurninya n̄u okne ọkunyo jaazi n̄u kpakara ọwa. (Ọkunyo ka dnarn̄u nga Kalaudīosi neechi.)

²⁹ Ele sno apna Jiz̄osi kpebi n̄u nye ọbula jeezizne nhne kpa o nwernu rikne yisinu r̄umu nda ele z̄i n̄u Judiya aka.

³⁰ Ka b̄u nhne be mernu, be b̄ita iwai gwez-nenu ele risi ọgbako hite n'aka Banabas̄i n̄u S̄olu.

12

*Er̄odu gburu Jemisi,
tu Pita ikelu*

¹ N'ige ka Eze Er̄odu pan̄izoru ọ kpakna agwna ele z̄i n'ọgbako Chiokike ẹhni.

² O gweru ama-ogwnu gbu Jemisi nwene rukna J̄oni.

³ Nga ọ wh̄n̄urnu n̄u ọ s̄oru ele Ju ovu n'onu, o zne n̄u ruwhnu nwudne Pita. (Ka mernu n'ige Iriri Br̄edi Wh̄ige Ọwhu.)

⁴ Nga ọ nwudn̄ernu Pita, o yisi a n'oro ikelu, o gweru a nyewhete n'aka otu ele ọgwnu ẹno ẹno. Er̄odu neese o gweh̄ia a n'ikpe ọhna nga Iriri Ọgawhe whemernu.

⁵ Pita z̄i n'oro ikelu, k̄ovu ọgbako Chiokike neekpesi okpukpe rikne gbas̄iri a n̄u ruwhnu Chiokike.

Pita wh̄yaru n'oro ikelu

⁶ N'abal̄i ke ọbo obochi Er̄odu jeegweya n̄u ruwhnu ele ọhna, Pita z̄i neezni anyarna n'esilawuru ele ọgwnu lawuru ele neese a. Be t̄uru a ijigba lawuru, ele neese nhne gwuzo n'onu-mgbo.

⁷ Ngangam, enine izi Nyenwe āi varu gwuzoru, iwhe m̄ukwasi n̄u rime ọro ikelu. Enine izi wam kpatu Pita aka n̄u ngeri ẹhni,

ọ kanu a, "Liz̄o wara wara." Ijigba dnahnala n'aka Pita.

⁸ Enine izi wam kaa, "Suru āj̄ni i, woru okoro-ọchi i." Pita mee k̄pam, enine izi wam kanu a, "Woru iwo i, snornu m."

⁹ Pita snornu a whoga n'oro ikelu. O maa n̄u hne enine izi wam neeme b̄u nhne z̄i ire. O che n̄u ọ n̄owhnu ọwhnurninya.

¹⁰ Be whe ele nse ke mb̄om, n̄u ke ẹbo, be va n̄u ke ipne-aznu ke b̄u ọnu-mgbo rugwe bnarn̄u n̄u rime ẹli-ọhna. Ọnu-mgbo wam gbama n'aka a. Be whoga, be neezne n'otu apna, ngangam, enine izi wam ghasa Pita.

¹¹ Pita mah̄ia ẹhni a, ọ kaa, "K̄itna, m maam n̄u ọ b̄u n'ezi n̄u Nyenwe āi ziyaru enine izi a, d̄ohia m n'aka Er̄odu, d̄ohia m n̄u kpakara nhne ele Ju neele anya a."

¹² Nga ọ mah̄iaru nhne ka, o zne n̄u ọro Meri nne J̄oni Mak̄i. Aḡida ele badn̄u gbak̄oru p̄i neekpe okpukpe.

¹³ Pita znu aka n̄u ọnu-mgbo, otu nnwo rinya r̄ewhna a b̄u Roda zne ọ nakwe a.

¹⁴ Nga ọ mah̄iaru nk̄oli a, ovu ọso n'onu mernu o nw̄ee rikne gbama ọro, ọ gba ẹso zne kanu be n̄u Pita gwuzogwu n̄u ọhna.

¹⁵ Be kanu a, "Anya b̄io i ọma." K̄ovu o kwusi a rikne, be kanu a, "Ọ b̄u enine a."

¹⁶ K̄ovu Pita z̄i k̄oriri nooznu aka n'onu-mgbo. Nga be gbamarn̄u ọro, wh̄n̄u a, ọ gbagwojiri be anya.

¹⁷ O whenu be aka be k̄pusnime ọnu be. Ọ kanu be kpa Nyenwe āi gweh̄aru a n'oro ikelu. Ọ kanu be, "An̄u kanu Jemisi n̄u r̄umu nda m ele berere." Ọ whoga zne hne berere.

¹⁸ N'osisi, o mernu ele neese nhne anya aghari k'agida nhne mernu Pita.

¹⁹ Er̄odu kaa be pio a, k̄ovu be nw̄ee rikne pioh̄ia a, ọ kaa be s̄ikwa ele neese nhne aj̄ji, o nyee iwu be gbu kpakara be. Omekwo, Er̄odu hiri n̄u Judiya zne n̄u Sizaria daz̄iri ige mati.

Enwu Er̄odu

²⁰ Ele Taya n̄u Sāidoni mernu Er̄odu ovu owe ẹhni, be z̄iri n'otu zne ọ wh̄n̄u a, be mee ma Bilatosi nye neelekwa ọro eze gbagwas̄inu be. Be zne r̄iasno Er̄odu ma udno z̄iri, kwnornu n̄u ẹli be neenweh̄ia nhne oriri hite n'eli a.

²¹ N'ọbochi be h̄ohiaru, Er̄odu woru iwo eze a daz̄iri n̄u ngadna eze a, kwunu ele badn̄u wam ọka.

²² Be siwama l̄ulo, kaa, "Ọ b̄io badn̄u nookwu ọka ka, k̄ovu ọ b̄u otu chi."

²³ Ngangam, enine izi Nyenwe āi l̄idna Er̄odu kwnornu n̄u o nȳene Chiokike igwugwu. Rukpurukpuru ri a, ọ nw̄uma.

²⁴ Ikwu-ọnu Chiokike neezne n̄u ruwhnu, naagbasa, nooso oso.

* 12:25 be hi n̄u Jerusēlem hiehna kwuru J̄oni Mak̄i Ọkwukwo berere kwuru, be lahna Jerusēlem, be n̄u J̄oni Mak̄i.

²⁵ Nga Banabasi nù Sòlu rnùkworu èrnu be, be hi nù Jeruselem hiehna kwuru Jóni Makì.
*

13

Be zihalaru Banabasi nù Sòlu

¹ N'ogbako Chiokike ke zì nù Antjoku, ele neezni nhne nù ele owhnurninya zì, Banabasi, Simiòni nye be kwu Najja, Lusosi nye Sirini nù Mane, nye ya nù Eze Erodu soru, nù Sòlu.

² Kpa be zì neekpenu Nyenwe aì, noovu onu, Enine Nso kaa, "Anù kewamanù m Banabasi nù Sòlu, ma be zne rnù èrnu me kwnornu sukwu be."

³ Nga be vukworu onu, kpe okpukpe, be tukwasi be aka nù risi, zihala be.

Nù rime Saipurosi

⁴ Kpa Enine Nso zihalaru Banabasi nù Sòlu, be zne Selusia, hite nù pji zne Saiporosi.

⁵ Nga be dùru Salamisi, be kpò okwo ikwu-ònu Chiokike nù rime oòro ogbako ele Ju, be nù Jóni Makì nye izi be.

⁶ Be zne n'èli ohia esilawuru tem be dù èli-òhna Pafosi, be whnú otu nye èrnu aghigho rèwhna a bù Ba-jizosi, nye Ju kwuru èhni a nye owhnurninya.

⁷ O bù enyi nye nèchi èli ohia esilawuru wam nye rèwhna a bù Sajosi Pòlosi, nye nwernu akòniche. Nye oçhichi wam suk-wuru Banabasi nù Sòlu nù ruwhnu a ma o nurnu ikwu-ònu Chiokike.

⁸ Kòvu nye èrnu aghigho kaa, Èlimasi (ke bù rèwhna a nù ikwu-ònu Giriki), piuru o kwnama nye nèchi èli wam ma o gharù o kweru nù Jizosi.

⁹ Sòlu, nye rèwhna bù Pòlu, nye Enine Nso jihiaru a nù rime, lekwasiri a anya,

¹⁰ kaa, "Jì nnwò Ekwensu, nye irno kpakara nhne bùru oma. Jì nye kpakara èrnu aghigho nù aruru-èli jiri nù rime. Ijésigbasi o gbanwo apna ziri ezi ke Nyenwe aì?"

¹¹ Kìtna, le, aka Chiokike zì n'òlu risi megidne i, i jookpu isni, i jòowhnu iwhne ke obochi ige mati."

Ngangam, Èlimasi whnurnu nhne nù lele rijiriji nù oçhichiri n'anya a, o whòga noopio nye joodu a n'aka.

¹² Nye nèchi èli wam kweru nga o whnurnu nhne mernu, iznizni ikwu-ònu Chiokike jiri a anya.

Nù rime Antjoku ke Pesidia

¹³ Pòlu nù ele nù ya sno kwoòru ogo hiri nù Pafosi zne Pega nù rime Pamfilia, kòvu Jóni Makì gharuru be, lahna Jeruselem.

¹⁴ Be hi nù Pega va nù Antjoku ke Pesidia nù Obochi Ozukwa Inwe, be bna nù rime oòro ogbako ele Ju daziri èli.

¹⁵ Nga be gwnurnu hite n'Iwu Mozizi nù nhne ele owhnurninya gbarù, ele risi oòro ogbako zi be izi, "Rumu nda aì, o jaamasì aì o bùru nù anù jì izi okwata ovu anù jeezni ele ka."

¹⁶ Pòlu gwuzoru, whenu be aka, bete nookwu oka, "Ele Izireli ibne m, nù kpakara ele èli berere neekpenu Chiokike, anù bnote m nsnì.

¹⁷ Chiokike ke ele Izireli hòhiaru ele nda aì o knani, mee be okne mba nù ige be zì n'èli Ijipiti, Chiokike hiri n'èli Ijipiti kwuhja be n'aka rikne.

¹⁸ O nagidernu be nri awha èno n'èli-ìkpa.

¹⁹ O luluru mba èsau ke èli Kenani, gweru èli be nyee ele ke a ma o bùru ke be.

²⁰ Kpakara nhne ka mernu nhne nù lele riwhu awha èno nù nri isne.

"Omekwo, o nyee be ele ikpe, tem o dù ige Sameli nye owhnurninya.

²¹ Nga be piuru eze, Chiokike nyernu be Sòlu nnwò Kisi, ke hi n'avnurnu Benjamini, bùru eze nri awha èno.

²² Nga o gwemernu a, Chiokike mernu Devidi eze be, ka bù nhne Chiokike kwuru gbasiri a, 'M whnurnu m Devidi nnwò Jesi, nye nù lele mkpòma m, nye jeeme kpakara nhne me piuru o mee.'

²³ "Hite n'avnurnu nwerukna ka, Chiokike gwelizòru Nye Oznohia Jizosi, nyee Izireli lele kpa o kweru mkwna.

²⁴ Sì Jizosi panizoru èrnu a, Jóni beru osno kpò okwo ma kpakara ele Izireli tughnasna mkpòma ma be wù be mini.

²⁵ Kpa Jóni nòornukpa èrnu a, o kaa, 'Anù neechè nù m bù m nyele? M bùo m nye wam anù neele anya a. Kòvu o naava n'aznù m, m kwésige m owhudnahie tóma eriri okoro-òchi a lawuru.'

²⁶ "Rumu nda m, ele avnurnu Eberham nù kpakara ele èli berere ele neekpenu Chiokike, izi oznohia ka bù nhne be neezni aì.

²⁷ Ele wu nù Jeruselem nù ele risi be máa nù ya bù Nye Oznohia, be ghòhiage ikwu-ònu ele owhnurninya be nòogwnu kpakara Obochi Ozukwa Inwe. Kòvu be mernu nhne ele owhnurninya kwuru mezu nga be kperu a ikpe ènwu.

²⁸ O bù ezi nù be nwée nhne be jì ma a ikpe ènwu, be kaa Paileti gbu a.

²⁹ Nga be mezuru kpakara nhne be kwuru n'òkwukwo nsò gbasiri a, be vudna n'òlu oga, lite a.

³⁰ Kòvu Chiokike mernu o hi n'ènwu lizò.

³¹ O mernu ele snornu a hi nù Galili va Jeruselem whnù a anya. Be bù ele akebbe nyee ele Izireli.

³² "A neezni anù izi oma Chiokike kweru ele nda aì o knani mkwna.

³³ Chiokike mezunnu aị ọ́mụ be mkwna wam, hite nụ ome Jizọsi hi n'ẹnwu lizọ. Lele kpa be gbarụ Eri Ọma ke ẹbo, 'Jiwa bụ Nnwọ m, m mụrnu m jị tna.'

³⁴ "Nhne Chiokike kwuru gbasiri ome ma o hi n'ẹnwu lizọ, o jóoro oro, bụ ka, 'M jeenye i ngozi zị nsọ ke kwesiri ọkw nata ovu me kweru Devidi mkwna.'

³⁵ O kwuru nụ hne berere, 'I jéekwe ma nye nsọ ke i ro oro.'

³⁶ "Devidi mernu nhne Chiokike pioru o mee n'ige ke a, ọ nwụ, be lite a nụ ngeri ilili ele ke a, o ro.

³⁷ Kọvu nye wam Chiokike mernu o hi n'ẹnwu lizọ róge oro.

³⁸ "Rumu nda m, anụ mahia nụ ọ bụ hite nụ Jizọsi hne a nọkpo okwo ọgbaru mmehie.

³⁹ Hite nụ ya, kpakara ele kweru jeenwernu ẹhni be hite nụ kpakara mmehie. Ka bụ nhne Iwu Mozizi nwé rikne mee.

⁴⁰ Anya dụ anụ ẹli, ọ zị nhne ele ọwhnurninya kwuru be mezu n'ẹhni anụ,

⁴¹ 'Le, anụ ele ọnu ọjọ, o ji anụ anya, anụ nwụ ẹnwu, kwnornu nụ nhne me jọornu n'ọbochi anụ, bụ nhne anụ jéekweru, ọ bụbedi nụ nye berere kanụ anụ.' "

⁴² Kpa Pọlu nụ Banabasi nọowhoga n'oro ọgbako, be kanụ be va n'Ọbochi Ozukwa Inwe berere kwunu be ọka.

⁴³ Nga ọgbako gbasarụ, agida ele Ju nụ ele bnarnụ okpukpe ele Ju snornu Pọlu nụ Banabasi. Be nookwunu be ọka ma be dazigidne n'oru ke Chiokike.

⁴⁴ N'Ọbochi Ozukwa Inwe berere, kpakara ele zị n'ẹli wam znernu ọ nurnu ikwu-ọnu Nyenwe aị.

⁴⁵ Nga ele Ju whnurnu igbudu badnụ wam, ọwho-anya jihia n'ovu be, be kwu ọka megidne nhne Pọlu kwuru, kpasị a iwihnerne.

⁴⁶ Kọvu Pọlu nụ Banabasi jiri anya rikne kwu ọka, kaa, "O zị mkpa nụ a znernu ebe ọsno kwunu anụ ikwu-ọnu Chiokike, kọvu hne anụ juru a, gwnụ ẹhni anụ ele kwésile bụdnụ kwó okwo, a jaagharụ anụ, zneknwusi ele bụo ele Ju.

⁴⁷ Kwnornu nụ ka bụ nhne Nyenwe aị nyernu n'iwu, 'M ziznernu m anụ ma anụ bụru iwihne ke ele bụo ele Ju, ma anụ bụru apna ọznohia mmehie ke kpakara ọwa.' "

⁴⁸ Nga ele bụo ele Ju nurnu nhne ka, mkpọma soru be n'ọnu k'agida, be znarni zị ọma Nyenwe aị, ele be hōhiaru kwnornu bụdnụ kwó okwo kwuru.

⁴⁹ Ikwu-ọnu Nyenwe aị gbasarụ nụ kpakara ẹli.

⁵⁰ Kọvu ele Ju kpasu ele risi nụ rime ẹli nụ ele rinya kwu ele ẹli berere ele neekpenu

Chiokike, be bete ọ kpakna Pọlu nụ Banabasi ẹhni, be chihala be n'ẹli be.

⁵¹ Ele izi wam lịsnama rịzna ọchi be megidne be, zne Aịkoniom.

⁵² Ele sno apna Jizọsi zị nụ Antịoku nwụdna k'agida, Enine Nsọ jihia be.

14

Nụ rime Aịkoniom

¹ Nụ rime Aịkoniom, Pọlu nụ Banabasi znernu nụ rime ọro ọgbako ele Ju lele kpa be mesi, be kwu ikwu-ọnu Chiokike nụ rikne ke mernu agida ele Ju nụ ele bụo ele Ju gho ele kweru ekwe.

² Kọvu ele Ju ele kwé ekwe kpasuru ovu owe ẹhni ele bụo ele Ju megidne rumu nda aị.

³ Pọlu nụ Banabasi daziri pji gbu ọkwunu, be kwusi nhne gbasiri oru Nyenwe aị rikne. Nyenwe aị mesiri ẹnru izi ọma be rikne hite n'ẹnru ndu-ẹhni nụ ẹnru elekema ke be nọornu.

⁴ Kọvu ele ẹli wam kewarụ, agwna be danụ ele Ju, ele berere dagwunu ele izi wam.

⁵ Ele Ju nụ ele bụo ele Ju gba iznuznu, be nụ ele risi be mee be nhne rikne, ọ tū be akaworugwu nụ o gbu ele izi wam.

⁶ Kpa ele izi wam nurnu a, be gbazne Lisitira nū Dẹbi, ẹli ele Lajkonias, nū ẹli ke gbarụ a gburugburu,

⁷ hne be zị neezni izi ọma.

Nụ rime Lisitira nū Dẹbi

⁸ Otu nwerukna zị nū Lisitira nye dnarnu mgworo n'ochi lawuru, ọ bụ nye mgworo kpa be murnu a, o znekoze izne.

⁹ O dazị noobno sni nhne Pọlu nookwu, Pọlu le a anya whnụ nū o nwernu ọtukwasi ovu be jị ọ gwọ a.

¹⁰ Pọlu gweru okne nkoli si okokoba kaa, "Lizọ n'ochi i lawuru." Nwerukna wam gbu ẹnuru, bete neezne izne.

¹¹ Nga agida ele badnụ wam whnurnu nhne Pọlu mernu, be bete esi okokoba n'ikwu-ọnu ele Lajkonias, kaa, "Chi aị gholam badnụ va lekasi aị."

¹² Be jita Banabasi Zusi, be jita Pọlu Hẹmisi kwnornu nū ọ bụ ọnu nookwu ọka.

¹³ Nye naakwa arịohna Zusi ke ọro a zị nū ruwhnu ẹli-ọhna gweya ehni nū igwugwere n'ọnhna. Ya nū agida ele badnụ wam noopio ọ kwanụ ele izi wam arịohna.

¹⁴ Nga Pọlu nū Banabasi nurnu nhne be noopio o mee, be dọwa iwo be, gba ẹso bna n'esislawuru agida ele badnụ wam, neesi okokoba,

¹⁵ "Ele nwe m, ndaa nhne anụ kwno neeme nhne ka? A bụ badnụ etekne lele anụ. A varụ ọ kpọ okwo izi ọma ma anụ hi nū kpakara nhne ka bnána iru whuya, tūhnasnakwusi ke Chiokike zị bụdnụ, nye

mernu oligwe nū ọwa nū okne osimini nū kpakara nhne zị nū rime be.

¹⁶ N'ige wheru ewhe, Chiokike gharuru kpakara ele badnu ma be zne n'apna ke be, ¹⁷ ọvu, Chiokike mernu ẹni a whuru iwhe hite nū nhne ọma o neeme, o neenye anu mini ozuzo hite n'oligwe, nū mkpuru n'ige o kwesiri, o neenye anu wiri, mee snarnima jihja mkpoma anu."

¹⁸ O bu n'ezị nū ele izi wam kwuru ọka kpa, o bu nhne rarụ ẹni o mee be gharu o kwanu be arịohna.

¹⁹ Agwna ele Ju hiri nū Antjoku ke Pisidia nū Aikoniom va, be doru igbudu ele badnu wam yisi n'ehni be, be tu Polu akaworugwu, dọhala a nū rime ẹli be, be neeche nū o nwunam.

²⁰ Ọvu kpa rumu nda gharu a gburugburu, o lizo lahna nū rime ẹli-ọhna, ke chi boru ya nū Banabasị zne Dẹbi.

Be lahna Antjoku nū rime Siriya

²¹ Polu nū Banabasị zne zni izi ọma nū Dẹbi, be nwehia agida ele sno apna Jizosi. Be lahna Lisitira, hite pii zne Aikoniom, zne Antjoku nū rime Pisidia.

²² Be mee ele kweru ekwe gwuzosi rikne, kasi be mkpoma ma be dazigidne n'okwnata ovu, be kaa, "A jeehi nū rime agida awhnuwhnu bna n'eli-eze Chiokike."

²³ Nū rime ọgbako Chiokike ọbula, Polu nū Banabasị hohia ele okno badnu, hite nū okpukpe nū ovu onu chete be nū ruwhnu Nyenwe aị, nye be kwnataru mkpoma.

²⁴ Nga be znezuru ẹli Pisidia, be va nū Pamfilia.

²⁵ Be kpọ okwo izi ọma nū rime Pega, hite pii zne Atalja.

²⁶ Be hite n'Atalja kworu ọgbo lahna Antjoku, hne be gweru be nyewhete n'oru ke Chiokike nū ernalu be rnukworu * kịtna.

²⁷ Nga be vaduru nū rime Antjoku, be sukwukota ele ọgbako Chiokike kanu be kpakara nhne Chiokike jiri be rnu, nū kpa o gbamanu ele buo ele Ju onuhna ma be kweru.

²⁸ Be nū ele kweru ekwe daziri pii gbu okwnu.

15

Ọgbako ke zị nū Jeruselem

¹ Agwna ele rukna hiri nū Judiya va Antjoku bete neezni rumu nda, kaa, "Be nwée rikne znohia anu okwolem ma be kparu anu nka, lele kpa Iwu Mozizi kwuru."

² Polu nū Banabasị nū be ndodogbuta gbasiri nhne ka, be kwekota nū Polu nū Banabasị nū agwna ele zị nū Antjoku jeezne

Jeruselem whnu ele izi Karaisi nū ele okno badnu gbasiri nhne ka.

³ Ele ọgbako Chiokike zizne be, be zne nū rime Fonisia nū Sameria, be kwuhja kpa ele buo ele Ju tuhnasakwnusiri Chiokike. Otnutu kpa mernu kpakara rumu nda nwudna k'agida.

⁴ Nga be vaduru Jeruselem, ọgbako Chiokike, nū ele izi nū ele okno badnu nabnanyarnu be, be kanu be kpakara nhne Chiokike jiri be mee.

⁵ Ọvu agwna ele kweru ekwe ele otu ele Farisi gwuzoru, kaa, "Be jaakpariri be nka, kanu be bita Iwu Mozizi."

⁶ Ele izi nū ele okno badnu zne iznuznu ma be lebna anya nhne gbasiri ọka ka.

⁷ Nga be kwuru agida ọka gbu okwnu, Pita gwuzoru, kaa, "Rumu nda m, anu magwu kpa n'ige wheru ewhe kpa Chiokike hohiaru m n'esilawuru anu, zne zni ele buo ele Ju izi ọma ma be nurnu, kweru masi."

⁸ Chiokike nye marnu mkpoma kpakara badnu, gharu akebne gbasiri be. O nyernu be Enine Nso lele kpa o nyernu aị.

⁹ O kpoge ike n'esilawuru aị nū be, o snusarnu ovu be kwnornu nū be kweruru.

¹⁰ Kini kpayarū anu jaakpa Chiokike iru kịtna hite n'otukwasi ele kweru ekwe ivu ke aị nū ele nda aị oknani nwée rikne vuli.

¹¹ Oza, a kweruru, be znohia aị hite n'oru Nyenwe aị Jizosi lele be masi."

¹² Kpakara be daziri bii kpa be noobno nsnj nhne Banabasị nū Polu nookwu gbasiri kpakara ernalu-ehni Chiokike hiri n'aka be rnu n'esilawuru ele buo ele Ju.

¹³ Nga be kwukworu, Jemisi gwelizo onu kaa, "Rumu nda m, anu bnote m nsnj n'onu.

¹⁴ Sajmoni karu kpa Chiokike hiri nū mbom gesi ele buo ele Ju ruwhnu ọma a, o mernu agwna be buru ele ke a.

¹⁵ Ikwu-onu ele owhnurninya nū nhne ka dnakotaru n'otu, lele kpa okwukwo nso kwuru,

¹⁶ Nyenwe aị karu, Omekwo, m jaalahna, m jeegwulizo ọro Devidi dnarnu adna, m jeegweme mkpomkpo ọro a, wulizo a, m jeeme a o gwuzosi rikne berere.

¹⁷ M jeeme ka ma kpakara ele badnu pio Nyenwe aị, kpakara ele buo ele Ju ele me sukwuru ma be buru ke m.

Ka bu nhne Nyenwe aị nye mernu kpakara nhne kwuru.

¹⁸ O bu nye mernu ele badnu mahja kpakara nhne hite nū mbom."

¹⁹ Jemisi nookwuzne, "Echiche m bu ka, a kpakna ele buo ele Ju ẹni, bu ele tuhnasakwnusiri Chiokike.

²⁰ Ọvu a gbanu be okwukwo, kanu be, be ri wiri ọbula zila richna be kwaru arịohna

* 14:26 Gwnu Ernu Ele Izi 13:1,2.

nyee r̄enwu, be mékò ọ̀yí, be ríkò anọ̀ ọ̀bula be hígburu ẹ̀hígbu, be ríkò ọ̀vnarna.

²¹ Kwnornu nù be nọ̀ogwnu Iwu Mozizi agída ige wheru ewhe n'oro ọ̀gbako be nù kpakara Ọ̀bochi Ozukwa Inwe, be nọ̀okpo okwo ikwu-ọ̀nu Mozizi nù kpakara ẹ̀lì."

Ele izi gbanu ele buo

ele Ju ele ọ̀kwukwo

²² Ele izi nù ele okno badnu, be nù kpakara ọ̀gbako Chiokike, kpebi ọ̀ hohia agwna ele badnu n'esislawuru be zizne be Antioku, be nù Pọ̀lu nù Banabasi. Be hohia Judasi, nye be kwu Basabasi, nù Saĩlasi, ele rukna lawuru berere ele rumu nda nọ̀oso anya.

²³ Be gba ọ̀kwukwo izi ka zizne be, "Aija ele izi Karaĩsi nù ele okno badnu, rumu nda anu, neebekwu kpakara rumu nda ele buo ele Ju wu nù rime Antioku, Siriya nù Silisia. A bekwulem anu.

²⁴ A nurnu nù agwna ele rukna n'esislawuru aĩ varu kpakna anu ẹ̀hni, mee ovu la anu mini hite nu nhne be kwuru, be nuna nhne ka n'onu aĩ gbasiri a.

²⁵ A gbaru iznuznu n'otu, a kwekorita o zianu anu ele izi a hohiaru, be nù ele enyi aĩ a whnurnu n'anya, Banabasi nù Pọ̀lu,

²⁶ ele gweru budnu be nyee nù nhne oze budnu kwnornu nù n'ernu Nyenwe aĩ Jizosi Karaĩsi.

²⁷ A ziyannu anu Judasi nù Saĩlasi, ele jaakanu anu nù ruwhnu nù ruwhnu nhne a gbaru n'okwukwo.

²⁸ Aĩ nù Enine Nso kwekotaru, a tukwasi ivu berere, be gweme kpakara nhne ka zi mkpa.

²⁹ Anu riko wiri obula be kwaru arjohna nyee r̄enwu, anu riko ọ̀vnarna, anu riko anọ̀ obula be hígburu ẹ̀hígbu, anu mékò ọ̀yí. O jooburunu anu oma ọ̀ buru anu mee kpm. Anu dazikwaru nkari."

³⁰ Be zizne ele izi wam Antioku, nga be duru Antioku, be sukwukota kpakara ele kweru ekwe nyega be ọ̀kwukwo izi wam.

³¹ Nga ele badnu wam gwnurnu ọ̀kwukwo izi wam, ovu sora be n'onu k'agida kwnornu nù izi okwnagidne wam.

³² Judasi nù Saĩlasi, ele bu masi ele ọ̀whnurninya, kwu oka gbu okwun naagba be inwe.

³³ Be daziri ige mati, be zihnala be n'udno znekwnusi ele ziyaru be. [

³⁴ Kovu ọ̀ masiri Saĩlasi ọ̀ daziri pii.]

³⁵ Pọ̀lu nù Banabasi daziri ige mati nù Antioku be nù agida ele berere, be zne kpo okwo ikwu-ọ̀nu Nyenwe aĩ.

Polu nu Banabasi kewaru

³⁶ Omekwo, Pọ̀lu kanu Banabasi, "Ngwa ma a lahna, lekasi rumu nda aĩ nù kpakara ẹ̀lì-ohna hne a znirni izi oma Nyenwe aĩ, whnu kpa be naagbali."

³⁷ Banabasi piuru ma be nu Joni Makĩ snornu zne.

³⁸ Kovu Pọ̀lu kwége o snornu be, kwnornu a dazigidnege n'ernu wam, kovu ọ̀ ghasaru be nu Pamfilia.

³⁹ Be dogbuta ka k'agida, be kewa ẹ̀hni be. Banabasi kwuru Makĩ kwowhe mini zne Saĩporosi.

⁴⁰ Pọ̀lu hору Saĩlasi, rumu nda gweru be yisi n'oru ke Nyenwe aĩ, be whoga.

⁴¹ O gawhe Siriya nù Silisia naagba kpakara ọ̀gbako Chiokike inwe.

16

Timoti snornu Polu

nu Saĩlasi zne

¹ Pọ̀lu zne Debi nù Lisitira. Otu nye sno apna Jizosi zi pii, nye r̄whna a bu Timoti, nne a bu nyerinya Ju ke kweru ekwe, kovu nda a bu nye Giriki.

² Kpakara rumu nda ele zi nù Lisitira nù Aĩkoniom nookwu Timoti oka oma.

³ Pọ̀lu piuru o kwuru Timoti zne, ọ̀ kpa a nka. O mernu ka kwnornu nù kpakara ele Ju wu n'eli ka maam nù nda a buo nye Ju.

⁴ Kpa be neezne hite n'otu ẹ̀lì-ohna du n'eli-ohna berere, be nyee ele kweru ekwe iwu ke ele izi nu ele okno badnu zi nù Jeruselem nyernu, kanu be be bita kpakara iwu ka.

⁵ Kpakara ọ̀gbako Chiokike gwuzosi rikne n'okwnata ovu, naabahnasĩ n'obochi n'obochi.

Polu whnurnu ọ̀whnurninya

nu Torasi

⁶ Be gawhe n'esislawuru ẹ̀lì Firigia nù Galasia, kwnornu nù Enine Nso kwéle be kpo okwo izi oma nù ẹ̀lì Esia.

⁷ Nga be duru n'ike ẹ̀lì Misia, be pio o zne ẹ̀lì Bitinia, kovu Enine Jizosi kwéle be.

⁸ Kam kpayaru be jiri zne Misia nù Torasi.

⁹ Pọ̀lu whnu ọ̀whnurninya n'abali hne ọ̀ whnurnu otu nwerukna Masidonia, gwuzo nù ruwhnu a naarjasno a, "Bikno, va Masidonia yisinu aĩ aka."

¹⁰ Kpa Pọ̀lu whnurnu ọ̀whnurninya ka, ngangam a jiknurnu o zne Masidonia, kwnornu nù a kweru nù Chiokike sukwuru aĩ kpo okwo izi oma pii.

Lidiya nu ele oro a

¹¹ A kworu ogbo hite nù Torasi otu ngam zne Samotirasi, n'ekile a zne Niapolisi.

¹² A hite nu pii zne Filipai, ẹ̀lì ele Rom neechi ke bu risi ọ̀chichi ẹ̀lì Masidonia. A daziri obochi ele nu ele n'eli wam.

¹³ N'Obochi Ozukwa Inwe a whoga n'eli-ohna zne ngeri osimini, hne a leru anya nu a joowhnu hne be kpe okpukpe. A daziri ẹ̀lì bete o kwunu ele rinya ele gbakoru pii oka.

¹⁴ Otu nye bnoteru nsĩ bu Lidiya nye hi nù Tajira, nye neere iwo odno odno. O bu nwerinya neekpenu Chiokike, Nyenwe

aị kpume mkpoma a, o bno nsnị nhne Pọlu nookwu.

¹⁵ Nga be wụru a mini ya nụ kpakara ele ọro a, o sukwu aị, kaa, “Ọ bụru nụ anụ kweru nụ m bụ m nye kweru nū Nyenwe aị, anụ ya daziri n'oro m.” O kwagidne aị.

Pọlu nū Saịlasi n'oro ikelu

¹⁶ Otu obochi kpa a neezne hne okpukpe, otu ohi rinya nye renwu ojo nwu gwu zuru aị, nye nookwu nhne jeeme n'ige zi nū ruwuhu. Ọ naakpanụ ele nwe a agida iwai hite n'owhurninya.

¹⁷ Nnwọ rinya ka snornu aị nū Pọlu neesi okokoba, kaa, “Ele rukna ka bụ ele izi Chiokike ke Kakwo Nhne Dum Olu. Be negesi anụ apna anụ jeenwe oznohia.”

¹⁸ Ka bụ nhne o neeme agida obochi, tem ovu we Pọlu ẹhni, ọ tūhnasna kanụ renwu ojo wam, “M ji m rewhna Jizosi Karaịsi nyee i iwu, hi nū rime a whụya.” Renwu ojo wam hi nū rime a whụya ngangam.

¹⁹ Nga ele nwe a whnurnu nū apna be neeji naakpa iwai mesnirni, be pnurnu Pọlu nū Saịlasi zne n'esilawuru ahia n'aka ele neechi ẹli-ohna.

²⁰ Be gwuzote be nū ruwuhu ele risi, kaa, “Ele rukna ka bụ ele Ju, be neegweya mkpakpo nū rime ẹli-ohna aị.

²¹ Be neezni omen'eli ke megidnenu iwu aị ele Rom, ke a nwée rikne bitali mọbu mee nhne be neezni.”

²² Agida badnụ wam yisi aka megidne be, ele risi dọwa iwo Pọlu nū Saịlasi, nyee iwu be pnia be nhne.

²³ Nga be pnjakworu be nhne k'agida, be tūbna be nū rime ọro ikelu, kanụ nye risi ọro ikelu o legidne be anya nkarị.

²⁴ Nga nye risi ọro ikelu nurnu iwu ka, ọ tūbna be nū rime rime ọro ikelu, tūsi ọchi be nū rime igwe isisi.

²⁵ N'esilawuru abalị Pọlu nū Saịlasi bete neekpe okpukpe, nọogwnunu Chiokike eri ọznarni, ele ikelu berere noobnonu be nsnị.

²⁶ Ngangam, ẹli tneru enye, ke mernu ntụ-ẹli ọro ikelu mernu imerne. Ngangam, kpakara ọnhna gbamarnū, ijigba dnahnala n'ehni kpakara ele ikelu.

²⁷ Nye risi ọro ikelu wam tnenyarnu n'anyarna, nga ọ whnurnu kpakara ọro ikelu gbamarnū, o che nū kpakara ele ikelu gbawhulem, ọ mniornu ama-ogwnu a ma o gbu ẹhni a.

²⁸ Kọvu Pọlu siwama okokoba, kaa, “I mékasi ẹhni i nhne, kpakara aị zi hna.”

²⁹ Nye nye risi ọro ikelu wam kaa be nyee a tọnji, ọ gbabna rime ọro ikelu, ọ marnu rururu dna n'ẹli n'ochi Pọlu nū Saịlasi.

³⁰ O kwuhia be, sịkwa be, “Ele nwe m, kịni bụ nhne me jeeme ma be znohia m?”

³¹ Be kaa, “Kweru nū Nyenwe aị Jizosi, be jọznohia jị nū ele ọro i.”

³² Be kwunu a izi ọma Nyenwe aị, ya nū kpakara ele zi n'oro a.

³³ N'ige abalị wam, nye risi ọro ikelu wam kwuru be, snụ ẹnya be, otu ngam be wụ ya nū ele ọro a mini.

³⁴ Nye risi ọro ikelu wam kwuru Pọlu nū Saịlasi la n'oro a, nyee be wiri, mkpoma sọru a n'onu, ya nū ele ọro a, kwnornu nū be kweruru nū Chiokike.

³⁵ N'osisi, ele risi ẹli-ohna zizne ele badnụ be sịgbasi ele rukna wam la.

³⁶ Nye risi ọro ikelu wam kanụ Pọlu, “Ele risi nyernu iwu jị nū Saịlasi la. Anụ la n'udno.”

³⁷ Kọvu Pọlu kanụ ele wam be duyaru, “Be mágele aị ikpe nhne ojo ọbula, be pnia aị nhne n'ahia, hne a bụ ele Rom. Be tūbna aị n'oro ikelu. Kịtna, be neesigbasi aị nū mgwugwa? Óza! Ele ọchichi ele risi ẹli-ohna jaava hna, gbahia aị n'oro ikelu.”

³⁸ Ele wam znernu kanụ ele risi ẹli-ohna nhne Pọlu kwuru. Nga be nurnu nū be bụ ele Rom, ogwnu tūru be.

³⁹ Be zne rjasno be, gbahia be n'oro ikelu, kanụ be whoga nū rime ẹli be.

⁴⁰ Pọlu nū Saịlasi whoga n'oro ikelu, zne n'oro Lidiya. Be nū rumu nda whnụ, be kwunu be ikwu-onu ọsnuta mkpoma, gharu be, la.

17

Nū rime Tēsalonika

¹ Be gawhe nū rime Amfipolisi nū Apolonia, be vadu Tēsalonika, hne be whnurnu ọro ogbako ele Ju.

² Lele kpa omen'eli Pọlu zi, o zne n'oro ogbako ele Ju, n'Ọbochi Ozukwa Inwe ọbochi ẹto, ya nū ele badnụ kwurita ọka nhne zi n'okwukwo nsọ.

³ Ọ kwanu be, gesi be nū Karaịsi jaata awhnwuhnu, omekwo, o hi n'ẹnwu lizọ. Pọlu kanụ be, “Jizosi nye me nọokpo okwo a, bụ Karaịsi wam.”

⁴ Agwna be kweru, snornu Pọlu nū Saịlasi, ma agida ele bụo ele Ju neekpenu Chiokike nū agida ele rinya be marnū rewhna be.

⁵ Kọvu ele Ju kwnornu awqwa, chikota agwna ele ojo zi n'ahia, be lizọ megidne be. Okne mkpakpo dna n'ẹli wam. Be zne n'oro Jasoni ma be pnuhia Pọlu nū Saịlasi nyee ele wam.

⁶ Kọvu kpa be whnuge be, be pnurnu Jasoni nū rumu nda berere zne nū ruwuhu ele risi ẹli, neesi okokoba, kaa, “Ele rukna ka noovuya mkpaghasi kpakara ohna valẹm ẹli aị.

⁷ Jasoni bijkwataru be n'oro a. Be zá naabita iwu Siza, be naakaa eze berere zi, nye be nookwu Jizosi.”

⁸ Be ji ikwu-*onu* nu kpa mee okne mkpakpo dna n'eli-*ohna* ma n'esilawuru ele risi eli.

⁹ Ele risi eli mee Jasoni nu ele ya nu be sno kwu iwu, be sigbasi be la.

Nu rime Beria

¹⁰ Nga chi jiri, *rumu* nda zihala *Polu* nu Saɓɓasi zne Beria. Nga be duru, be zne n'oro ogbako ele Ju.

¹¹ Ele zi nu Beria nwernu ovu oma karu ele zi nu Tesalonika. Mkpoma be jiknernu o bno nsnj n'ikwu-*onu* ka, be nyosna rime okwukwo nso kpakara obochi ma be whnu nhne *Polu* nookwu o bu ezi oka.

¹² Agida ele Ju kweru, ma agida ele buo ele Ju, ka bu ele rinya be marnu rewhna be, nu ele rukna, kweru masi.

¹³ Kovu nga ele Ju ele zi nu Tesalonika nurnu nu *Polu* nokpo okwo izi oma Chiokike nu rime Beria, be va kpakne ovu ele badnu megidne *Polu*.

¹⁴ Ngangam, *rumu* nda zihala *Polu* zne ngeri osimini, kovu Saɓɓasi nu Timoti dazigidne nu Beria.

¹⁵ Ele rukna sno *Polu* snornu a du Atensi. *Polu* kanu be, be kanu Saɓɓasi nu Timoti kwnusi a wara wara. Ele rukna lahna Beria.

Nu rime Atensi

¹⁶ Kpa *Polu* neese ma Saɓɓasi nu Timoti vakwnusi a n'Atensi, o gburu a igbugbu kpa o whnurru nu kpakara ele eli wam neekpenu renwu zi odo n'odo.

¹⁷ Ya nu be kwurita oka n'oro ogbako ele Ju, ma ele Ju ma ele buo Ju ele neekpenu Chiokike. Ya nu kpakara ele o whnurru nu rime ahja kpakara obochi nookwurita oka.

¹⁸ Agwna ele zni nhne be kwu ele Epikuri nu ele Sitoiki nu *Polu* nodogbuta, ele ka kaa, "Ndaa nhne nye iwhnirniwhno ka nookwu?" Ele berere kaa, "O nookwu nhne gbasiri chi ikne." Be kwuru ka kwnornu nu *Polu* nokpo okwo izi oma gbasiri Jizosi nu kpa o hiri n'enwu lizo.

¹⁹ Be kwuru *Polu* zne n'ogbo ele Ariopagosi, kaa, "A piuru o mahja nhne gbasiri iznizni ikne i nookwu.

²⁰ Agwna nhne i nookwu bu nhne ikne nu nsnj aj, a piuru o mahja risi oka ka."

²¹ (Kpakara ele Atensi nu ele eli berere wu nu Atensi nootuwu ige be noobno nsnj nu otnutnu ikne obula varu.)

²² *Polu* gwuzoru nu ruwhnu ogbako ele Ariopagosi, kaa, "Ele rukna Atensi, m whnurru m nu anu nwernu ovu okpukpe n'apna obula.

²³ Kpa me neezne izne nu rime eli anu, m whnurru m nhne zi odo n'odo anu neekpenu, m whnurru m masi otu ojo arjohna be gbasiri nhne n'olu a, 'Nye Chi ke a ma.' Nye wam anu neekpenu, o bu

n'ezi nu anu ma, bu nye me nookwu oka gbasiri a.

²⁴ Chiokike ke keru owa nu kpakara nhne zi nu rime a, bu Nyenwe oligwe nu owa, o wu n'oro okpukpe ke ele badnu jiri aka be wu.

²⁵ Nhne badnu mernu nyee a zila mkpa, hne o bu ya neenye badnu budnu nu inwe nu kpakara nhne.

²⁶ Hite nu otu badnu o keru kpakara mba zi n'owa, mee be wuru nu kpakara owa. O jiri aka a kpa ike ige kwesiri nu hne ele badnu joowu n'owa.

²⁷ O mernu ka ma ele badnu pio a, dna ndidna gbasiri, pohja a. Kovu Chiokike zila ikere hne a zi.

²⁸ Lele kpa otu badnu kwuru, 'A zi budnu, neezne izne nu rime a.' Agwna ele nkarj okwukwo anu karu, 'A bu rumu a masi.'

²⁹ "Hne a bu rumu Chiokike, a cheko nu Chiokike nu lele nhne obula be pnjornu opnio lele golu mibu siliva, mibu akaworugwu ke badnu jiri nkarj aka a nu akoniche a pnjo.

³⁰ Chiokike lewhuru ige badnu ma nhne anya, kovu, kina, o nyernu iwu kpakara ele badnu hi nu nhne oju be whuya.

³¹ Kwnornu nu o bitaru otu obochi o jeeji ikpe zi snam kpe kpakara owa ikpe, hite n'aka otu badnu o hohiaru. O mernu ka whuya iwhne kwnornu nu o mernu o hi n'enwu lizo."

³² Nga be nurru *Polu* kwuru nhne gbasiri olizo n'enwu, agwna be mee a nhne rumu, kovu agwna be kaa, "A piuru o nurru nhne ka n'onu i berere."

³³ *Polu* whoga nu rime ogbako be.

³⁴ Agwna ele rukna snornu *Polu* kweru, n'esilawuru be bu Dionisiosi nye otu ele Ariopagosi. Otu nwerinya rewhna a bu Damarisi nu ele berere kweru masi.

18

Nu rime Korinti

¹ Nga ka wheru, *Polu* whoga nu Atensi zne Korinti.

² O whnurru otu nye Ju, rewhna a bu Akwila, nye be murru nu Pontosi, nye hiri n'Itali va, ya nu nnwerne a Prasila, kwnornu Kalaudiosi nye neechi nyernu iwu kpakara ele Ju whoga nu rime Rom. *Polu* zne o whnu be.

³ Ya nu be wuru, o snornu be rnu ernu ome tenti, kwnornu nu be nwernu otu aka ernu.

⁴ O nookwu oka n'oro ogbako ele Ju kpakara Obochi Ozukwa Inwe, naakanu ele Ju nu ele Giriki oka.

⁵ Nga Saɓɓasi nu Timoti hiri nu Masidonia va, *Polu* gweru kpakara ige yisi nu okpo okwo izi oma, naagba ama nu Jizosi bu Karaisi nyee ele Ju.

⁶ Nga be lizoru megidne *Polu*, kpari a, o lishnama iwo a kanu be, "Ovnarna anu dazim

nụ risi anụ, aka m zị rịchna. Hite kịtna, m jeeznekwnusi ẹli ele bụo ele Ju.”

⁷ O gharụ be, zne wuru n'oro otu nye bụo nye Ju neekpenu Chiokike, rẹwhna a bụ Taitosi Jositosi, nye ọro a n'oro ọgbako ele Ju gba.

⁸ Nye risi ọro ọgbako ele Ju wam, nye rẹwhna a bụ Kirisiposi, kweru nū Nyenwe aị, ya nū ele ọro a, nū agịda ele berere nū rime Kōrinti nūrnū izi ọma, kweru, be wū be mini.

⁹ Pọlu whnūrnū ọwhnurninya n'otu abalị, Nyenwe aị kanụ a, “Ogwunū tūko i, nọokpo okwo, i kpūsni ọnu i.

¹⁰ M dagwūnu m jī, ọ zā nye jeenwe rikne mekasi i nhne, m nwernu m agịda ele badnū n'ẹli ka.”

¹¹ Pọlu daziri n'ẹli wam otu awha n'ẹnwa isunu, neezni ele badnū ikwu-ọnu Chiokike.

¹² Nga Galio bụ nye nẹchi Akaya, ele Ju gbakọru n'otu mee mkpakpọ megidne Pọlu, be kwuru a zne n'oro ikpe.

¹³ Be kaa, “Nwerukna ka neezni ele badnū kpa be jeekpenu Chiokike ke megidnenu iwu aị.”

¹⁴ Pọlu noopio o kwu ọka nga Galio kanū ele Ju, “O bụru nū ka bụ nhne ojo ke megidnenu iwu ẹli, m joobnonu anū nsni.

¹⁵ Kọvu hne o bụ nhne gbasiri rẹwhna, n'ọka ke iwu anū, anū lebna anya nū rime a, m jeenwe rikne kpe ikpe gbasiri a.”

¹⁶ O chihala be n'oro ikpe.

¹⁷ Be nwudne Sositenisī, nye risi ọro ọgbako ele Ju, lī a nhne nū ruwhnu ọro ikpe. Kọvu o gbāsila Galio rja rja.

Pọlu lahnarnū Antịoku nū rime Siriya

¹⁸ Pọlu nū rūmu nda daziri nū Kōrinti agida ọbochi, ọ whọga, Prisila nū Akwila snornu a zne Siriya. O kọ rukeri-ize a nū Kēnkiria, kwornu mkwna o kweru ige wheru ewhe.

¹⁹ Be dū Efesosi, Pọlu ghasa Prisila nū Akwila. O bna nū rime ọro ọgbako ele Ju, ya nū ele Ju kwurita ọka.

²⁰ Be kanū a, ọ daziri gbu ọkwunū, kọvu o kwéle.

²¹ Nga ọ naala, ọ kanū be, “O bụru ọ masi Chiokike, m jeehiehnakwnusi anū.” O kwọru ọgbo whọga nū Efesosi.

²² Nga ọ dūru Sizaria, o zne Jeruselem bekwu ọgbako Karaịsi, hite pji zne Antịoku.

²³ O daziri ige matị pji, ọ whọga zne nū rime Galasia nū Firingia, naagba kpakara ele kweru ekwe inwe.

Pọlu nū rime Efesosi

²⁴ Otu nye Ju rẹwhna a bụ Apolosi, nye be nūrnū nū Alēkizandaria varū Efesosi, ọ bụ nye nkarị ọka, nye marnū nhne be gbarū n'ọkwukwo nsọ nkarị.

²⁵ Be znrūnu a n'apna ke Nyenwe aị. O jī onwunwu bẹkwunū mkpọma zni nhne gbasiri

Jizosi nū kpa o kwesiri, kọvu o magwū nhne gbasiri ọwu mini Jōni kpọi.

²⁶ O bete nookwu ọka n'anya rikne n'oro ọgbako ele Ju. Nga Prisila nū Akwila nūrnū a, be kwuru a la n'oro be, znikwata a n'apna Chiokike nkarị.

²⁷ Apolosi kpebi o zne Akaya, rūmu nda ele zī n'Efesosi gba ọkwukwo ma rūmu nda ele zī n'Akaya nabnanya a. Nga ọ dūru, o znekwnusi ele kwehiaru hite n'oru Chiokike, o yinu be aka.

²⁸ Hite n'anya rikne ke ọka a, o mernu ele Ju kpusni ọnu n'ohna, o mernu be mahija hite n'ọkwukwo nsọ nū Jizosi bụ Karaịsi.

19

Pọlu nū rime Efesosi

¹ Kpa Apolosi zī nū Kōrinti, Pọlu gawheru nū rime ẹli vadu Efesosi. O whnūrnū agwna ele sno apna Jizosi pji.

² O sika be, “Anū nahjala Enine Nsọ kpa anū kweruru?”

Be kaa, “A nūna rja rja ma ọ zī nhne be nookwu Enine Nsọ.”

³ Pọlu sika be, “Nda kpa be wūru anū mini?”

Be kaa, “Hite n'owuwu mini Jōni.”

⁴ Pọlu kaa, “Jōni wūru ele tūhnasarnu nū nhne ojo be mini, ọ kanū ele Izireli be kweru nū nye naava n'aznū a, nye wam bụ Jizosi.”

⁵ Nga be nūrnū a, be wū be mini nū rẹwhna Nyenwe aị Jizosi.

⁶ Pọlu tūkwasi be aka nū risi, Enine Nsọ dnakwasị be, be kwu ọka nū riro ikne, kwusa izi ọma Chiokike.

⁷ Be hna lele ele nri ele rukna lawūru.

⁸ Pọlu zne n'oro ọgbako ele Ju, ẹnwa ẹto ya nū be nọdogbuta, o jiri anya rikne kwu ọka gbalị ọ kanū ele Ju nhne gbasiri ẹli-eze Chiokike.

⁹ Kọvu agwna be mernu risi rikne, be kwéle o kweru, be kwu ọka ojo megidne apna Nyenwe aị nū ruwhnu agida ele badnū. Pọlu gharū be, kwuru ele sno apna Jizosi, ya nū be nookwurita ọka kpakara ọbochi n'oro ọmumu ọkwukwo Tairanosī.

¹⁰ Be mernu nhne ka awha lawūru ke mernu kpakara ele wa n'ẹli Esia nūrnū ikwu-ọnu Nyenwe aị, ma ele Ju nū ele bụo ele Ju.

¹¹ Chiokike nrūrnū ẹrnu elekema zī n'ichne hite n'aka Pọlu.

¹² Hite n'ẹhni a be neegwepiya wepe nū nkiti nhne gweznenu ele nriria zī ọdo n'ọdo jī, be gwọ be, rẹwhnu ojo hi n'ẹhni be whọga.

¹³ Agwna ele Ju ele naagaghari nẹchihala rẹwhnu ojo pio o jī rẹwhna Jizosi mee kpam. Be kanū rẹwhnu ojo, “M neenye i iwu nū rẹwhna Jizosi nye Pọlu nọokpo okwo a.”

¹⁴ Rūmu rukna ẹsau otu nye Ju, nye risi arjohna rẹwhna a bụ Sikeva, mernu kpa.

¹⁵ Kọvu rẹnwu ojo wam kanụ be, “M maam Jizosi, m maam Pọlu, kọvu anụ bụ ele kele?”

¹⁶ Nwerukna wam rẹnwu ojo wam wu nū rime a bna be, megbu kpakara be, mekasi be ẹhni. Be hi nū rime ọro wam vuru ọru, gbarụ ẹto gbawhu.

¹⁷ Kpakara ele Ju nū ele bụo ele Ju wu nū Efesosi nurnu nhne ka, ogwnu tū kpakara be. Be sọbisinu rẹwhna Nyenwe aị Jizosi k'agida.

¹⁸ Agida ele kweru ekwe varū kwuhja nhne be mernu nū ruwhnu ele badnū.

¹⁹ Agida ele amusu vuyarū kpakara ọkwukwo be, kpọ be bẹkwnu nū ruwhnu ele badnū. Be gwnụkota ọnu ahja be, pokwu mkpuru iwai siliva isne.

²⁰ Kpam ikwu-ọnu Chiokike gbasarū, jii iknernema gwuzosi rikne.

²¹ Nga nhne ka mekworu, Pọlu kpebi ọ gawhe Masidonia nū Akaya zne Jeruselem. Ọ kaa, “Me znekwo, m jeezne Rom.”

²² O zizne ele neeyinu a aka izi, Timoti nū Erasitosi, zne Masidonia. Ọ daziri ige matị n'ẹli Asia.

Ẹli ghara ghara n'Efesosi

²³ Okne ẹli ghara ghara dnarnū n'Efesosi kwnornu n'apna Nyenwe aị.

²⁴ Otu nye nọokpu siliva, nye rẹwhna a bụ Demetirisi, nye nọokpu ọro igbudu Djana, chi ele Efesosi, nye mernu ele ẹnu a nwe mbnarna k'agida.

²⁵ O sukwukota ele ẹnu a nū kpakara ele nū ya nwernu otu aka ẹnu, ọ kanụ be, “Anụ magwū nū a neenwehja agida iwai hite n'ẹnu aị.

²⁶ Anụ nọowhnu, nọonu nhne badnū ka be kwu Pọlu neeme. Ọ karū nū chi be jiri aka kpu bụo chi rja rja. O mernu agida ele badnū kweru ọka a, nū hna n'Efesosi ma nū kpakara ẹli Asia.

²⁷ Ọ bụo nū ẹnu aị joowhu dai, kọvu ogwnu nọotu aị nū ọro okne chi aị Djana jọoburu nhne etekne, igwugwu a whu, bụ chi ke kpakara ele Asia nū kpakara ọwa nọokponu risi ẹli.”

²⁸ Nga agida ele badnū wam nurnu a, ọnuma jihja be mkpoma, be bete neesi okokoba, “Djana ele Efesosi bụ dikne.”

²⁹ Mkpakpọ wam gbasia kpakara ẹli-ọhna. Agida ele badnū wam nwudne Gayosi nū Arisitakosi, ele rukna Masidonia be nū Pọlu sno neezne izi, pnurnu be zne ọgbakoro ẹli-ọhna.

³⁰ Pọlu pioru ma o zne nū ruwhnu ele badnū wam, kọvu ele kweru ekwe kwéle a.

³¹ Agwna ele nẹchị ẹchi ele enyi Pọlu zi izi, naariasno a, o gésikọ ẹhni a n'ọgbakoro.

³² Kọvu nū mkpakpọ zị nū rime ọro ọgbako wam, agwna badnū neesi otu nhne, ele berere neesi nhne berere, ele kakwo

n'esilawuru be máa nhne be kwnornu gbako.

³³ Agwna be kaa nū Alẹkizanda bụ nye risi mkpakpọ wam, ele Ju gwuzote a nū ruwhnu ọhna. Alẹkizanda whenu be aka ma o nwernu rikne kwu ọka, ma o gọhoru ọnu nū ruwhnu ele badnū.

³⁴ Kọvu nga be mahjaru nū ọ bụ nye Ju, be si okokoba n'otu ọnu lele awa lawuru, kaa, “Djana ele Efesosi bụ dikne.”

³⁵ N'ipne-aznū, nye gba ọkwukwo ẹli-ọhna mee be daziri bii, ọ kaa, “Ele rukna Efesosi, ele badnū magwū nū ẹli Efesosi bitaru ọro Djana nū igbudu a ke hiri n'olu dna.

³⁶ Badnū nwée rikne gọnahoru nhne ka. Anụ daziri bii, anụ mée nhne bụo ọma.

³⁷ Anụ kwuyaru ele rukna ka hna, ọ bụ n'ezi nū be znúge buznu n'ọro Djana, mọbu kpari chi aị.

³⁸ Ọ buru nū Demetirisi nū ele ẹnu a noobno nye ọbula nhne, ọbochi ikpe zị, ele risi ikpe zimako, be kpe ẹhni be ikpe nū ruwhnu ele ikpe.

³⁹ Ọ zị nhne berere anụ pioru, be jookwu a n'ọro ọgbako ikpe lele kpa iwu kwuru.

⁴⁰ Kwnornu nū ogwnu nọotu aị nū be jaakaa nū a mernu mkpakpọ nū nhne mernu tna. A nwée rikne kọwali risi mkpakpọ ka mọbu kaa nhne vuyarū a.”

⁴¹ Nga o kwukworu kpa, ọ gbasia ọgbako wam.

20

Pọlu znernu Masidonia nū Giri

¹ Nga mkpakpọ wam biri, Pọlu sukwukota ele kweru ekwe n'otu, kwunu be ọka ọsnuta mkpoma, ọ kanụ be, be dazikwaru nkari, o whoga zne Masidonia.

² O zne nū rime kpakara ẹli wam nookwu agida ikwu-ọnu ọsnuta mkpoma tem ọ vadu Giri.

³ Ọ daziri pji ẹnwa ẹto. Ele Ju naagba iznuznu nhne be jeerne a kpa o pioru o zne Siriya, o kpebi ọ lahna hite nū Masidonia.

⁴ Sopata nnwọ Pirosi nye Beria snornu a zne, ma Arisitakosi nū Sekundosia hi nū Tesalonika, Gayosi hi nū Dẹbi, Taiikosi nū Tirofimosi ele hi n'Asia, nū Timoti.

⁵ Ele ka beru ọsno neese aị nū Torasi.

⁶ Nga Iriri Brẹdi Whúge Ọwhu whemernu, a hi nū Filipai kwọru ọgbo zne ke ọbochi isne wheru dū Torasi. A daziri otu ikwezu.

Pọlu znernu Torasi

⁷ N'ọbochi mbom n'ikwezu, kpakara aị gbakoru ma a ri wiri n'otu, Pọlu bete nookwunu ele badnū ọka tem dū n'esilawuru abali, hne ọ bụ nū ọ naala n'osisi.

⁸ Agida tñji noonwu n'ọro olu hne a zị n'ọgbako.

⁹ Otu nnwọ ikoro rukna rẹwhna a bu Yutikọsi dazigwu ẹli n'olu mgbo-wekpeke. O bete neezni anyarna kpa Pọlu zị kọriri nookwu ọka, o hi n'olu ọro ke ikwnu ẹto dna n'ẹli n'anyarna. Be vulizọ a, kọvu ọ nwunam.

¹⁰ Pọlu gbadna ẹli, dnagidne a, bnagidne a, ọ kaa, "Ogwnu tũko anụ, ọ zị bụdnu."

¹¹ Ọlahna nụ rime ọro olu, nyawa brẹdi, ri, kpa o kwukworu ọka gbu ọkwnu tem ẹnam wasi, ọ la.

¹² Be kwula nnwọ ikoro rukna wam ọro nụ bụdnu, be snuta be ovu k'agida.

Hite nụ Torasi

zne Miletọsi

¹³ A bna ogbo kwọru zne Asọsi, hne a jookwuru Pọlu n'ogbo. Ọ kannụ aị a mee kpam, o jeeji ọchi zne pji.

¹⁴ Kpa o kwnusiri aị nụ Asọsi, a wuru a n'ogbo zne Mitelini.

¹⁵ N'ekile a, a hi nụ pji kwọru ogbo zne nhne zị Kịosi ndundu. N'ọbochi ke sno a, a dọ Samọsi n'ọbochi ke berere, a dọ Miletọsi.

¹⁶ Pọlu kpebiri ọ kwọru ogbo whe Efesọsi ma ọ gharu o tuwhu ige n'Esia. Ọ zị a wara wara ọ dọ Jeruselem, ọ bụru nụ o jeekwe o mee n'ọbochi Pẹntikosi.

Pọlu kwunnu ele okno badnụ

Efesọsi ọka

¹⁷ Pọlu zizne izi hite nụ Miletọsi zne Efesọsi kanu ele okno badnụ ogbako whnụ a.

¹⁸ Nga be vaduru, ọ kanu be, "Anụ magwu kpa me tuwhuru ige me nụ anụ zị, hite n'ọbochi me varu ẹli Esia.

¹⁹ M ji m ovu hieru ẹli nụ anya-mini ẹkwna rnụ ẹrnu lele nnwọ izi Chiokike, ọ bu n'ezi nụ ele Ju ji mmuma ojo be kpakna m ẹhni.

²⁰ Anụ magwu nụ ọ zá nhne ke jaabnanu anụ iru ke me tugwannu anụ kpa me neezni anụ izi oma, kọvu m znirni m nhne nụ ruwhnu ọhna nụ hite n'oro anụ zị ichne ichne.

²¹ Ma ele Ju ma ele bụo ele Ju, m dọru m anụ aka nụ nsnj, ma anụ hi nụ nhne ojo anụ tũhnasnakwnusi Chiokike, kweru nụ Nyenwe aị Jizọsi.

²² Hite n'obno nsnj nhne Enine Nsọ kwuru, m jeezne Jeruselem, m máam nhne jaadnakwasj m pji.

²³ Kọvu m magwu m nụ rime kpakara ẹli-ọhna, Enine Nsọ dọru m aka nụ nsnj, nụ ikelu nụ ọkpagbu neese m.

²⁴ Kọvu nụ kpakara nhne ka zá naakpa m, m zá m nọogwnu bụdnu m nụ nhne zị mkpa, ma m rnukwo m ẹrnu Nyenwe aị Jizọsi nyernu m me rnụ. Èrnu wam bu ọ kpo okwo izi oma oru Chiokike.

²⁵ "M znegharịri m n'esilawuru anụ zni izi oma ẹli-eze Chiokike. M magwu m nụ anụ jọowhnu m anya berere.

²⁶ Me kanu anụ tna, nụ ọ zá nye ikpe ọvnarna a jaama a.

²⁷ Kwnornu nụ ọ zá nhne bu echiche Chiokike ke me bítaru, gharu ọ kanu anụ.

²⁸ Anya dọ anụ ẹli n'ehni anụ, anụ legidne rumu atnrnu Chiokike ke Enine Nsọ yisiri n'aka anụ. Anụ znụ rumu atnrnu ogbako Chiokike jiri ọvnarna Nnwọ a zuru.

²⁹ M magwu m nụ me la, edu wanọhia jaava n'esilawuru anụ, be jọodonu rumu atnrnu wam obirizi.

³⁰ Ige vawa nga ele zị n'esilawuru anụ joolulu ezi ọka wam ma be duwhu ele kweru ekwe, mee be snornu be.

³¹ Anya dọ anụ ẹli, anụ chenwanya nụ m ji m agida anya-mini ẹkwna iwhehnie nụ abalị neezni anụ nhne awha ẹto.

³² "Kítna, m neeyisi anụ n'aka Chiokike nụ ezi ọka ke ikwu-ọnu oru a, ke nwernu rikne o wulizọ anụ olu lele ọro, nyee anụ ngọzi nhne okehja ke a n'esilawuru ele ọ bítaru nsọ.

³³ M nwége m ọwho-anya nụ hne siliva mọbu golu mọbu iwo nye obula zị.

³⁴ Anụ magwu nụ aka m lawuru rnūhiaru kpakara nhne ke zị m mkpa, nụ ke me nụ ele sno m.

³⁵ M gesiri m anụ nụ hite n'ẹrnu aka aị, a jeeyisinu ele zá rikne aka. Anụ chenwanya ikwu-ọnu Nyenwe aị, "Ọwa oma zinu nye neekesi nhne kakwo nye nanahọru nhne." "

³⁶ Nga Pọlu kwukworu ọka ka, ya nụ be gwute mpnerne ọchi n'ẹli kpe okpukpe.

³⁷ Kpakara be naakwna ẹkwna kpa be bnakwnusiri a, snutu a ọnu ipne-aznụ.

³⁸ Ẹhni nwurnu be n'ikwu-ọnu wam o kwuru nụ be jọowhnu a anya berere, Kpakara be snornu a zne, ọ bna n'ogbo.

21

Pọlu znernu Jeruselem

¹ Nga aị nụ be gbasaru, a kwọru ogbo zne Kọsi otu ruwhnu, n'ekile a, a dọ Rodisi, hite pji a zne Patara.

² A whnrnu otu ogbo neezne Fonisia, a bna ogbo kwọru whọga.

³ Nga a duru hne a nọwhnu Saiporosi, a gharu a n'akarita zne Siriya. A hiedna nụ Taya hne ogbo wam noovume ivu a.

⁴ A whnrnu agwna ele kweru ekwe pji, aị nụ be daziri otu ikwezu. Hite nụ rikne Enine Chiokike, be kanu Pọlu o znéko Jeruselem.

⁵ Kọvu nga ige aị zuru, a whọga. Kpakara be nụ nnwerne be, nụ rumu be snornu aị whọga n'ẹli-ọhna. Kpakara aị gwute mpnerne ọchi nụ ngeri osimiri kpe okpukpe.

⁶ A bekwurita ẹhni aị, a bna n'ogbo, be lahna ọro.

⁷ A kwọru ogbo aị hite nụ Taya zne Pitoli-masi, a zne bekwu rumu nda aị, aị nụ be daziri otu ọbochi.

⁸ N'ọbochi ke sno a, a vadu Sizaria. A bna n'oro otu nye nọokpo okwo izi oma Chiokike, nye rẹwhna a bu Filipu, a daziri n'oro a.

Filipu bụ otu nụ rime ele izi ɛsau wam be ɛhiaru nū Jeruselem.*

⁹ Filipu nwernu rụmu oknornokno ɛno yóogbola izi ele nọokpo okwo izi oma Chiokike.

¹⁰ Kpa a dazị n'oro a agida obochi, otu nye ọwhnurninya be kwu Agabọsi hiri nū Judiya va.

¹¹ Ọ vakwnusi aị, gweru ajnị Pọlu, kne ɛhni a ọchi n'aka, ọ kaa, “Ka bụ nhne Enine Nso kwuru, ‘Ọ bụ kpa be ele Ju jeekne nye nwe ajnị ka nū Jeruselem, gweru a nyewhete a n'aka ele bụo ele Ju.’”

¹² Nga a nurnu a, aị nū ele ɛli wam riasno Pọlu o znekwadia Jeruselem.

¹³ Pọlu kaa, “Ndaa kpa anụ naakwna ɛkwna neeme ma inwe gwu mkpoma m? Be jéekne m eriri kpọi nū Jeruselem, kọvu m kwelem ọ nwụ ɛnwu kwnornu rẹwhna Nyenwe aị Jizọsi.”

¹⁴ Kpa a nwée rikne mee ọ gbanwo ovu a, a gweme aka aị, kaa, “Chiokike mee nhne bụ echiche a.”

¹⁵ Nga a daziri ige matị pii, a jiknenu o zne Jeruselem.

¹⁶ Agwna ele sno apna Jizọsi ele zị nū Sizaria snornu aị, be duru aị zne n'oro otu nyerukna nye be kwu Masoni, nye Saiporosi, nye sno apna Jizọsi gbu ọkwu, a daziri nū n'oro a.

Pọlu vaduru Jeruselem

¹⁷ Nga a vaduru Jeruselem, rụmu nda aị kwubnanya aị nkari nkari.

¹⁸ Ke chi ọru, aị nū Pọlu snornu zne ọ whnụ Jemisi, kpakara ele okno badnụ ọgbako Chiokike zị masị pii.

¹⁹ Pọlu bekwu be, kanụ be otu otu kpakara nhne Chiokike mernu n'asilawuru ele bụo ele Ju hite n'ernu izi oma a.

²⁰ Kpa be nurnu a, be znarni Chiokike. Be kanụ Pọlu, “Nwene aị, agida pokwu ele Ju kweru ekwe, be zị koriri neerne ɛkwnu nū mkpoma be, naabita Iwu Mozizi.

²¹ Agwna ele badnụ kannu be nū i neezni kpakara Ju ele wu n'eli ele berere be sigbasi Iwu Mozizi, nū i neezni be kpá rụmu be nka, be snó omen'eli ele Ju.

²² Be jọonu nū i varu, ndaa kpa a jeeme?

²³ Bikno mee nhne a karu ji mee. Ele rukna ɛno zị n'asilawuru aị, ele kweru mkwna,

²⁴ snornu be zne mee mmemem ọbita ɛhni be rịchna, kwu ọgwo nhne be mewhuru, ma be nwernu rikne koma risi be. Kpakara badnụ jeeji ka mahia nū nhne be kwuru gbasiri i bụo ezi oka, nū ji n'iwuru i naabita Iwu Mozizi.

²⁵ Kọvu ele bụo ele Ju ele kweru ekwe, a ziznenu be ọkwukwo izi, kanụ be nhne

a kpebiri, be rikọ wiri be kwaru ariohna nyee rẹnwu, mọbu ọvnarna, mọbu anọ ọbula be ɛhgburu ɛhigbu, be mékọ ọyi.”

²⁶ Pọlu kwuru ele rukna wam, n'ekile a, ya nū be mernu mmemem ọbita ɛhni be rịchna. Ọ bna n'oro Nso Chiokike, kanụ ele badnụ ọbochi be jeemezu ọ bita ɛhni be rịchna, kwa masị ariohna nū risi kpakara be.

Be nwudnenu Pọlu

n'Oro Nso

²⁷ Ọ gwnarnu matị ọbochi ɛsau ọbita ɛhni be rịchna zute, agwna ele Ju hiri n'Esia whnurnu Pọlu n'oro Nso. Be kpakne igbudu badnụ wam, be nwudne Pọlu.

²⁸ Be siwama okokoba, “Ele Izireli, anụ yisi aka, ka bụ nwerukna wam naagaghari kpakara ọhna neezni ele badnụ nhne megidne ele Izireli, megidne Iwu Mozizi, ma oro Nso ka. Kịtna, o kwubnarnu ele bụo ele Ju n'oro Nso, meru hna zị nso.”

²⁹ Ka bụ kwnornu nū be whnurnu Tirofimosi nye Efesosi hne ya nū Pọlu sno nū rime ɛli-ọhna, be che nū Pọlu kwubnarnu a oro Nso.

³⁰ Okne mkpakpo dna nū kpakara ɛli-ọhna, ele badnụ gbakota n'otu, nwudne Pọlu, ọghala a nū rime oro Nso, gbasni mgbo.

³¹ Igbudu badnụ wam pioru o gbu Pọlu, kọvu izi duru nye risi ele ọgwu Rom nsnị nū kpakara Jeruselem neeme mkpakpo.

³² Ngangam, nye risi ọgwu ele Rom chiri ele neechi otu riwhu ele ọgwu nū ele ọgwu be, gbazne n'asilawuru igbudu badnụ wam. Nga be whnurnu a, ya nū ele ọgwu a, be sigbasi ọ li Pọlu nhne.

³³ Nye risi ọgwu wam znekwnusi Pọlu nwudne a, nyee iwu be tū a ijigba lawuru. Ọ sịkwa be, “Nyele bụ nwerukna ka, kini bụ nhne o mernu?”

³⁴ Agwna ele zị n'igbudu badnụ wam neesi otu nhne, ele berere neesi nhne berere. Okne mkpakpo dnarnu ke mernu nye risi ọgwu wam nwée rikne mahia risi nhne mernu. Ọ kanụ ele ọgwu be kwubna Pọlu rime hne ele ọgwu wu.

³⁵ Ya nū be snornu dū mgbamgba ọchi ọro,† ele ọgwu wam kwuru a, ọ zị ele badnụ wam mekasi nhne kwnornu ọvnarna chnarnu be n'anya.

³⁶ Be gbasnornu a, neesi okokoba, “Gbu nwerukna ka.”

Pọlu ọgoruru ọnu a

³⁷ Kpa be nookwubna Pọlu nū rime hne ele ọgwu wu, ọ kanụ nye risi ọgwu, “Me kanu i ọka sa?”

Nye risi ọgwu wam sịkwa a, “I jeenwe rikne kwu Giriki?”

* 21:8 Ernu Ele Izi 6:1-6 † 21:35 mgbamgba ọchi ọro: Ka bụ hne be pne neezne ọro olu.

38 Ì búo nye Ijipiti wam nye n'ige wheru ewhe vuyaru omegidne, nye duru pokwu badnu ɛno ele ogbu badnu bna n'eli-ikpa?"

39 Pɔlu kaa, "M bu m nye Ju, be murmu m nu Tasosi nu eli Silisia, m bu m nye eli ke zi okne mkpa. Bikno, me kwunu ele badnu ka oka."

40 Nye risi ogwnu wam nyee a rikne, Pɔlu gwuzoru nu olu mgbamgba ochi oro, whenu ele badnu wam aka. Nga be daziri bii, Pɔlu kwunu be oka ikwu-ɔnu ele Hiburu.

22

1 O kaa, "Ele rukna, rumu nda, nu ele nda, bikno, anu bno nsni kpa me nɔogoru ɔnu m nu ruwhnu anu."

2 Nga be nurnu kpa o nookwu oka n'onu ele Hiburu, be daziri bii k'agida, Pɔlu zne nu ruwhnu kaa,

3 "M bu m nye Ju, be murmu m nu Tasosi n'eli Silisia, kovu m soru m hna nu rime Jeruselem, lele nnwo okwukwo ke Gamalieli znukwaru nkari n'iwu ele nda ai, m ji m mkpoma orne bekwnu rnuhi Chiokike ernu lele kpa anu zi tna.

4 M kpaknarnu m ele sno apna ka ehni du n'ɛnwu. M nwudnenu m ele rukna nu ele rinya tubna be n'oro ikelu.

5 Nye risi arjohna nu kpakara ele eze-ikpe magwu nu m nookwu ezi oka. M naahiaru m n'aka be okwukwo izi be gbaznenu rumu nda ele Ju zi nu Damasikosi, m neezne pii ma m nwudne m ele badnu, tu be ijigba, purnu be va Jeruselem ma be ta be awhnuwhnu.

Pɔlu kwuru nhne

gbasiri otuhmasna a

(Èrnu 9:1-19; 26:12-18)

6 "Kpa me neezne, o gwarnu mati m du Damasikosi, n'iwhehnie, nu ibiri, okne iwhe hiri n'oligwe mukwasi m.

7 M dna n'eli, otu akpiri kannu m, "Solu, Solu, kini mernu i naakpakna m ehni?"

8 "M sikwa, 'I bu nyele, Nyenwe ai?"

"O kaa, 'M bu m Jizosi nye Nazareti, nye i naakpakna ehni.'

9 Ele rukna me nu be sno whurnu iwhe wam, kovu be nuge akpiri nye nookwunu m oka.

10 M sikwa, 'Ndaa nhne me jeeme, Nyenwe ai?'

"Nyenwe ai kaa, 'Lizo, zne nu rime Damasikosi, be jaakanu i kpakara nhne Chiokike karu ji mee.'

11 Isni kpuru m kwnornu okne iwhe wam, ele me nu be sno toru m n'aka, duru m zne Damasikosi.

12 "Otu nye rewhna a bu Ananayasi, nye nootu ogwnu Chiokike lele kpa iwu ai kwuru, nye kpakara ele Ju wu nu Damasikosi nɔoso anya,

13 o vakwnusi m, gwuzoru n'ehni m, kaa, 'Nnwɔ nda Solu, whurnu ɔsno, ngangam, m whurnu m ɔsno, le a anya.

14 "O kaa, 'Chiokike ke ele nda ai, hohiaru i ma i mahia echiche a, ma i whnu Nye Izi a ke mee mma, ma i nurnu kpa o nookwunu i oka n'akpiri ke a.

15 Ì joo bu nye akebe a, ma i kanu ele badnu nhne i whurnu nu nhne i nurnu.

16 Kɪtna, i dazima, lizo, ma be wu i mini, ma be snusnama mmehie i hite n'okpokwu rewhna a.'

Pɔlu, nye izi ele búo ele Ju

17 "M lahna nu rime Jeruselem, kpa me neekpe okpukpe n'Oro Nso, m whurnu m qwhnurninya.

18 M whurnu m Nyenwe ai, o kaa, 'Lizo, wara wara, whoga nu rime Jeruselem, kwnornu be jeekwe akebe i gbasiri m.'

19 "M kaa, 'Nyenwe ai, be magwu nu m znernu m n'otu oro ogbako ele Ju du n'oro ogbako, nwudne ele kweru nu rewhna i, li be nhne yisi be n'ikelu.

20 Nga be gburu Sitivini nye akebe i, m gwuzo m yisi aka n'ɛnwu a, m legidnenu m iwo ele gburu a.'

21 "O kaa, 'Whoga, kwnornu m jeezizne i hne zi ikere, nu eli ele búo ele Ju.' "

Pɔlu bu nye Rom

22 Ele badnu wam bnonu a nsni tem Pɔlu kwu ka, be bete neesi okokoba n'okne nkoli, kaa, "Gweme nwerukna ka n'owa, o kwesile o zi budnu."

23 Be neesi okokoba, neewhe iwo be n'olu risi be, nɔobolizo ruznurnuznu.

24 Nye risi ogwnu wam nyee ele ogwnu a iwu be kwubna Pɔlu rime hne ele ogwnu wu, be pnja a nhne ma be mahia nhne ele Ju kwno neesi okokoba megidne a.

25 Kpa be knernu a eriri ma be pnja nhne, Pɔlu kanu nye wam neechi otu riwhu ele ogwnu gwuzo pii, "O kwesiri n'iwu o pnja nye Rom nhne, nye be kpege ikpe nhne ojo o mernu?"

26 Nga nye ogwnu wam nurnu a, o znekwnusi nye risi ogwnu kanu a, "Anyu du eli nhne i neeme, nwerukna ka bu nye Rom."

27 Nye risi ogwnu wam znekwnusi Pɔlu sikwa a, "Kanu m, i bu nye Rom?"

Pɔlu kaa, "Owe."

28 Nye risi ogwnu wam kaa, "M kwuru m agida iwai si me ghuru nye Rom."

Pɔlu kaa, "M bu m nye be murmu lele nye Rom."

29 Ngangam, ele rukna wam noopio o sikwa Pɔlu ajji sigbasi a, ogwnu turu nye risi ogwnu nga o nurnu nu Pɔlu bu nye Rom, nu o turu a ijigba.

Pɔlu nu ruwhnu ele eze-ikpe

³⁰ Nye risi ogwnu pioru o mahja nhne bu ezi oka ele Ju kwno noobno Polu nhne, ke chi boru, o toma Polu ijigba, kanu ele risi arjohna nu kpakara ele eze-ikpe be gbako. O kwupiya Polu, gwuzote a nu ruwhnu be.

23

¹ Polu lebna anya n'esilawuru ele eze-ikpe wam, kaa, "Rumu nda m, ovu m zi snam nu ruwhnu Chiokike kpakara budnu m du tna."

² Nye risi arjohna be kwu Ananayasi kanu ele gwuzo Polu ndundu be gbọ Polu aka n'onu.

³ Polu kanu a, "Chiokike jooqbo i aka, ji mkpo be teru nznu. I dazi eli neekpe m ikpe lele kpa iwu kwuru, i noolulu iwu naakaa be gbọ m aka."

⁴ Ele rukna gwuzo Polu ndundu kaa, "I naakaja nye risi arjohna Chiokike?"

⁵ Polu saru be, "Rumu nda m, m maam nu o bu nye risi arjohna Chiokike. Be gbaru a n'okwukwo nso, kaa, 'I kwu nhne ojo megidne nye risi ele ke i.'"

⁶ Nga Polu whnurnu nu agwna ele eze-ikpe wam bu ele Sadusi, ele berere bu ele Farisi, o siwama, "Rumu nda m, m bu m nye Farisi, ele nda m oknani bu ele Farisi. Be kwuyaru m n'ikpe hna kwnornu okwnata mkpoma me nwernu n'olizo n'enwu ke budnu."

⁷ Kpa o kwuru ka, ele Farisi nu ele Sadusi bete nodugbuta, ogbako iznuznu ikpe wam kewa.

⁸ (Kwnornu nu ele Sadusi karu nu ele nwurnu onwu jeelizọ n'enwu, enine izi zila, nu enine zila masi, kovu ele Farisi kweru nu eto wam zi.)

⁹ Oqbugbo naala olu k'agida, agwna ele zni iwu ele otu Farisi gwuzoru kwusi oka rikne, kaa, "O za nhne ojo a whnurnu nu rime nwerukna ka, o buru nu enine mọbu enine izi kwunu a oka."

¹⁰ Odogbuta wam laru olu k'agida ke mernu ogwnu turu nye risi ogwnu nu be joodogbu Polu. O nyee ele ogwnu a iwu be zne n'esilawuru be gweme Polu, kwubna a nu rime hne ele ogwnu wu.

¹¹ N'abalj ke sno a, Nyenwe aj gwuzoru n'ehni Polu, kaa, "Ogwnu tuko i, kpa i gbaru akebne m hna nu Jeruselem, bu kpa i jaagba akebne m nu Rom masi."

Be gbaru iznuznu o gbu Polu

¹² N'osisi, ele Ju gbakoru n'otu gba iznuznu. Be duru risi nu be jeeri wiri mọbu nwọ nhne obula tem be gbu Polu.

¹³ Be kakwo nri ele rukna eno ele snornu gba iznuznu be gbu Polu.

¹⁴ Be znekwnusi ele risi arjohna nu ele okno badnu, kaa, "A duru risi n'otu nu a jeeri nhne obula tem a gbu Polu.

¹⁵ Kirta, bikno, ji nu ele eze-ikpe ziznenu nye risi ogwnu ele Rom izi, ma o kwuhja Polu, anu mee lele nu anu jaasikwahia nhne bu risi oka. A joogbu a su o vadu hna."

¹⁶ Nnwọ rukna wene rinya Polu nurnu iznuznu wam, o zne bna nu rime hne be bitaru Polu, kanu a.

¹⁷ Polu sukwu otu nye ogwnu neechi otu riwhu ele ogwnu, kanu a, "Kwuru nnwọ ikoro ka znekwnusi nye risi ogwnu, o nwernu nhne o jaakanu a."

¹⁸ Nye ogwnu wam kwuru a, duzne a nu hne nye risi ogwnu zi, kaa, "Polu nye ikelu sukwuru m, kaa me kwuya nnwọ ikoro ka hne i zi, kwnornu nu o nwernu nhne o jaakanu i."

¹⁹ Nye risi ogwnu wam toru a n'aka whoga, sikwa a, "Kini bu nhne i jaakanu m?"

²⁰ O kaa, "Ele risi ele Ju kwekotaru nu be jaakanu i kwuhjanu be Polu nu ruwhnu ele eze-ikpe ekile, be noogho aghigho, nu ele ikpe jaasikwahia nhne bu risi oka gbasiri a.

²¹ Kovu i bno be nsni, kwnornu nu nhne nu lele nri ele rukna eno jootugwa neese a. Be duru risi nu be jeeri wiri mọbu nwọ mini tem be gbu Polu. Be jiknenu o mee kpm, be neese nhne i jeekpebi."

²² Nye risi ogwnu wam kaa, "O za nye i kanu nu i tnusinu m." O zihala nnwọ ikoro wam.

Be ziznenu Polu znekwnusi Felikisi

²³ Nye risi ogwnu wam sukwu ele ogwnu a lawuru neechi otu riwhu ele ogwnu, kanu be, "Anu jiknenu riwhu ele ogwnu lawuru o zne Sizaria, nu ele gba iyinya nri esau, ele ama-ogwnu riwhu lawuru, be jiknenu o zne n'otnu-ige ke tolu n'abalj.*

²⁴ Anu gweya iyinya Polu jaagba, anu kwuzne a n'udno ke nye ochichi Felikisi."

²⁵ Nye risi ogwnu wam gba okwukwo izi nu kpa,

²⁶ Hite n'aka Kalaudiysi Lisiasi, nyee Nye zi Ogwnu, nye ochichi Felikisi, m bek-wulem ji.

²⁷ Ele Ju nwudnenu nwerukna ka noopio o gbu a, m nurnu m nu o bu nye Rom, m chiri ele ogwnu dokia a n'aka be.

²⁸ M pioru m o mahja nhne be noobno a, m kwuru a zne nu ruwhnu ele eze-ikpe be.

²⁹ M whnurnu m nu o za nhne o mernu be jeeji noogbu a mọbu tu a ikelu, nhne be noobno a bu nhne gbasiri iwu be.

³⁰ Nga be kannu m nu agwa ele Ju naagba iznuznu megidne a, m kpebi o ziyanu i ya. M kanu ele noobno a nhne be va gwnu iwu be megidne a nu ruwhnu i.

* 23:23 otu-ige tolu n'abalj: okwukwo ke mbom kwuru ige awa ke eto n'abalj

³¹ Ele ogwnu wam mee kpa be nyernu be iwu. Be kwuru Pọlu n'abalị wam zne Antipatirisi.

³² N'ekile a, ele ogwnu ji ọchi hiehna ọro, be sigbasi ele gba iyinya ma be kwuru Pọlu zne.

³³ Be kwuru a zne Sizaria, nyee nye ọchichi ọkwukwo izi wam, nyewhete a Pọlu masị.

³⁴ Nye ọchichi wam gwnu ọkwukwo izi wam, ọ sịkwa Pọlu ẹli o hi. Nga ọ whnurnu nu ọ hi nu Silisia,

³⁵ ọ kaa, "M jọonu ọnu i nga ele noobno i nhne varu." O nyee iwu be ịta Pọlu n'ọbna Erọdu hne be jeese a nse.

24

Pọlu nu ruwhnu Felikisi

¹ Nga ọbochi isne whemernu, nye risi arịohna Ananayasị nu agwna ele okno badnu nu otu nye nọogwnu iwu be kwu Tẹtulasi znernu Sizaria. Be gwuzo nu ruwhnu Felikisi, gwnuhia nhne be noobno Pọlu.

² Be sukwu Pọlu, Tẹtulasi bete noobno Pọlu nhne nu ruwhnu Felikisi, kaa, "Nye zị Ogwnu, hite n'ọchichi i nu akoniche i, a nwernu udno gbu ọkwu, i mernu agida nhne ọma n'ẹli aị.

³ A nakweru ka, n'ige ọbula nu kpakara ọhna aị hite n'otu mmamma a nọtunu i.

⁴ M chịoge m o tuwhu ige i, ma naarijasno i, i gweru ovu ọma i bno nsnị nu nhne a nookwu ige matị.

⁵ "A whnurnu nwerukna ka nu ọ bu nye naakpakna ele badnu ẹhni, o noovuya mkpakpo n'esilawuru ele Ju nu kpakara ọwa, ọ bu nye risi otu nye Nazareti.

⁶ O piuru o meru Oro Nso aị, a nwudne a. [A piuru o kpe a ikpe lele kpa iwu aị kwuru.

⁷ Kọvu nye risi ogwnu Lisiasị varu gweru anya rikne dọhoro a n'esilawuru aị.

⁸ Lisiasị nyee iwu ele noobno nhne va nu ruwhnu i.] Ọ buru nu i sịkwa a ajji, i jaamahia hite n'ọnu a kpakara nhne a noobno a."

⁹ Kpakara ele Ju yisi ọnu noobno Pọlu nhne nu ọ bu ezi ọka nhne Lisiasị kwuru.

Pọlu gọru ọnu a nu ruwhnu Felikisi

¹⁰ Nye ọchichi wam whenu Pọlu aka, o kwu ọka. Pọlu kaa, "M magwu m nu i bu nye ikpe ẹli ka agida awha. Mkpoma nọoso m n'ọnu ọ gọru ọnu m nu ruwhnu i.

¹¹ I jeenwe rikne pohia nu ọ kákwole nri ọbochi nu ẹbo me znernu nu Jeruselem ọ kpọ risi ẹli.

¹² Ele Ju whnúge me nu nye ọbula nọdogbuta nu rime Oro Nso, be whnúge hne me naakpakne mkpoma ele badnu mọbu n'oro ọgbako mọbu nu hne berere nu rime ẹli-ọhna.

¹³ Be nwée rikne kahia nhne be kwno noobno m nhne.

¹⁴ Kọvu m nookwu ka nu ruwhnu i, m neekpenu Chiokike ke ele nda aị hite nu osno apna be karu nu ọ búo ezi apna. M kweru m nu kpakara nhne be gbaru n'Iwu Mozizi nu ọkwukwo ele ọwhnurninya.

¹⁵ M nwernu m otu olile anya nu Chiokike kpa ele ka nwernu, nu ele mee mma ma ele ojo jeehi n'ẹnwu lizo.

¹⁶ Kwnornu nu m nwernu m olile anya ka, m naakpakna ẹhni m ẹhni ma m nwernu m ovu zị snam nu ruwhnu Chiokike ma nu ruwhnu badnu ige ọbula.

¹⁷ "Agida awha m zila m nu Jeruselem, m va gweyanu ele ke m iwai, kwa masị arịohna.

¹⁸ Kpa me neeme ka n'Oro Nso, be whnurnu m kpa me mezuru mmem ọbita ẹhni m rịchna, be whnúge m hne me nu ele badnu zị, ọ zá mkpakpo me naakpakne.

¹⁹ Kọvu agwna ele Ju hi n'Esia va zị pịi, be n'iwuru be kwesiri ọ zị hna nu ruwhnu i bno m nhne ọ buru nu o nwernu nhne be ji megidine m.

²⁰ Mọbu ele rukna ka zị hna kahia nhne ojo be piharu nu rime m nga me gwuzoru nu ruwhnu ele eze-ikpe,

²¹ okwolem otu nhne me kwuru nga me gwuzoru nu ruwhnu be, 'Anu neekpe m ikpe tna nu ruwhnu anu kwnornu nu m kweru m nu ele nwurnu ọnwu jeelizo n'ẹnwu bna nu budnu.' "

²² Felikisi nye magwu nhne gbasiri apna ka, mesni ikpe, kaa, "M jaawa ikpe nga nye risi ogwnu Lisiasị varu."

²³ O kanu nye ogwnu wam nẹchi otu riwhu ele ogwnu o legidne Pọlu anya, kọvu o nyee a oghere, kweru ele enyi a znenu a zị.

Pọlu nu ruwhnu Felikisi nu Durusila

²⁴ Nga ọbochi ele wheru, Felikisi nu nnwerne a Durusila nyerinya Ju varu. O dusi be sukwu Pọlu ma o bno nsnị kpa o jookwu nhne gbasiri ọkwonata ovu nu Karaisi Jizosi.

²⁵ Kpa Pọlu nookwu nhne gbasiri ome mma, badnu ojikwaru ẹhni a, nu ikpe ke jaava, ogwnu turu Felikisi, ọ kaa, "Bikno, la kịtna, m joosukwu i nga me nwernu oghere."

²⁶ O leru anya nu Pọlu jeenye a iwai, o noosukwu a ige ọbula ya nu a nookwurita ọka.

²⁷ Kpa awha lawuru whemernu, Pokjosi Fesitosi gweru ọndi Felikisi lele nye ọchichi. Felikisi mernu ma mkpoma so ele Ju n'ọnu, ọ sigbasi kọriri Pọlu n'oro ikelu.

25

Pọlu kweru o zne nu ruwhnu Siza

¹ Kpa Fesitōsi varu, ke obochi eto whemernu, o hi nu Sizaria zne Jeruselem.

² Ele risi ariohna nu ele risi ele Ju bno Pōlu nhne nu ruwhnu Fesitōsi. Be riasno a

³ o menu be nhne oma, o mee ma Pōlu va Jeruselem. Be kperu kpa kwnornu nu be gbalam iznuznu o gbu a n'apna.

⁴ Fesitōsi kaa, "Pōlu zi n'ikelu nu Sizaria, m jaalahna pii ige mati.

⁵ Ele risi anu snornu m zne Sizaria bno nwerukna ka nhne o buru nu o mernu nhne oju."

⁶ Fesitōsi dazi obochi esato mōbu nri berere, lahna Sizaria. N'obochi ke sno a, o daziri nu ngadna ikpe, kaa be kwuya Pōlu.

⁷ Nga Pōlu varu, ele Ju hi nu Jeruselem varu gwuzoru a ndundu, bete noobno a agida nhne tu ogwnu be nwée rikne gwuzote nkari.

⁸ Pōlu goru onu a, "O zá nhne oju me mernu megidne iwu ele Ju, mōbu Oro Nso Chiokike mōbu Siza."

⁹ Fesitōsi ma o mee nhne jōoso ele Ju n'onu, o sika Pōlu, "O jaamasị i o zne Jeruselem ma m kpe ji ikpe nu nhne be noobno i nu ruwhnu m pii?"

¹⁰ Pōlu kaa, "M gwuzo m nu ruwhnu oro ikpe Siza, hne be kwesiri o kpe m ikpe. O zá nhne oju me mernu ele Ju ke ji n'iwihuru i magwu.

¹¹ O buru nu m luluru m iwu, mōbu mee nhne me kwesiri enwu, m kwerulem o nwu enwu. Kovu nu nhne be noobno m buo ezi oka, o zá nye jeenwe rikne kwuru m nyee be, m jeezne nu ruwhnu Siza."

¹² Fesitōsi nu ele neezni a ezni gba iznuznu, o kaa, "I karu nu i jeezne nu ruwhnu Siza, i jeezne nu ruwhnu Siza."

Pōlu nu ruwhnu

Agiripa nu Bēnisi

¹³ Kpa obochi ele nu ele wheru, Eze Agiripa nu nwene a rinya Bēnisi varu Sizaria va o bekwu Fesitōsi.

¹⁴ Kpa be daziri agida obochi, Fesitōsi kanu eze nhne gbasiri Pōlu, "O zi otu nwerukna Felikisi sigbasiri n'ikelu hna.

¹⁵ Nga me zneru Jeruselem, ele risi ariohna ele Ju nu ele okno badnu bnornu Pōlu nhne, kaa, me kpe a ikpe enwu.

¹⁶ Kovu m kannu m be nu ele Rom zá neekpe nye obula ikpe enwu hna be béle osno mee ya nu ele noobno a nhne whnuta ruwhnu nu ruwhnu, ma o nwernu oghere goru onu a.

¹⁷ Nga be varu hna, m gbúgele m okwnu, ke chi boru m daziri nu oro ikpe, kaa be kwuya nwerukna wam.

¹⁸ Ele noobno a nhne nwée rikne bno a nhne oju obula me neeche be joobno a.

¹⁹ Kovu be nu Pōlu nōdogbuta nhne gbasiri okwa Chiokike be, nu otu nwerukna rēwhna

a bu Jizōsi, nye nwurnu onwu, kovu Pōlu naakaa nu o zi budnu.

²⁰ M máam nhne me jeeme dna ndidna gbasiri oka ka, m sika Pōlu ma o jaamasị a o zne Jeruselem, ma m kpe m a ikpe kwnornu nhne be noobno a.

²¹ Kovu Pōlu karu be bita a n'ikelu ma Siza kpe a ikpe. M nyee iwu be bita a n'ikelu tem m zizne a ke Siza."

²² Agiripa kanu Fesitōsi, "M jeeji nsni m nurnu nwerukna ka."

Fesitōsi kaa, "I jōonu a n'ekile."

Pōlu nu ruwhnu

Eze Agiripa

²³ N'ekile a, Agiripa nu Bēnisi jiri okne tne eri nu dudugna bnanya oro ogbako, ma ele risi ele ogwnu nu ele risi eli. Fesitōsi kaa be kwuya Pōlu, be kwuya Pōlu.

²⁴ Fesitōsi kaa, "Eze Agiripa, nu kpakara ele ai nu be zi hna, anu whnurnu nwerukna ka nye kpakara ele Ju zi hna nu Jeruselem dnarnu ikpo gbasiri a nu ruwhnu m. Be siwama okokoba nu o kwésile o zi budnu neezne nu ruwhnu.

²⁵ Kovu nu m pióhjala m nhne o mernu ke kwesiri be ji kpe a ikpe enwu. O kaa nu o jeezne nu ruwhnu Siza, m kaa nu m jeezizne a.

²⁶ Kovu m nwée m risi nhne me jaagbaznenu Siza okwukwo gbasiri a. O bu nhne mernu me kwuhjara a nu ruwhnu anu, ke kakwo nu ruwhnu i, Eze Agiripa, ma a dna ndidna oka ka, m jeenwe risi nhne me jaagba n'okwukwo.

²⁷ Kwnornu nu m kwésile m o zizne nye ikelu hne me nwée rikne kahja risi nhne be noobno a."

26

Pōlu nōogoru onu nu ruwhnu Agiripa

¹ Agiripa kanu Pōlu, "Ka bu oghere i nwernu i jookwu onu i."

Pōlu dnōsnima aka a, goru onu a,

² "Eze Agiripa, m gwnurnu m ehni m nye ruwhnu oma nu m jōogoru onu m nu ruwhnu i tna, hite nu kpakara nhne ele Ju noobno m.

³ Ke kakwo, kwnornu nu i magwu kpakara omen'eli ele Ju nu nhne a kwno nōdogbuta, m naariasno, bikno, nwe ndidi, bnote m nsni n'onu.

⁴ Kpakara ele Ju magwu kpa budnu m zi hite nga me bu nnwo ikoro. Be magwu hite nu mbom kpa me wuru kpakara budnu m nu rime eli m ma nu Jeruselem.

⁵ Be magwu, o buru be jeekwe agba akebne, nu hite nu mbom m bu m nye otu siri rikne nu okpukpe ai, m bu m nye Farisi.

⁶ Kijna, m gwuzogwu m n'ikpe kwnornu nu m nwernu m olile anya nu mkwna Chiokike kweru ele nda ai.

⁷ Ka bụ mkwna ke Chiokike kweru kpakara nri avnrnu nù ẹbo ke aị, kpa be neekpenu Chiokike iwhehnie nù abalị. Ọ bụ kwnornu ọkwnata ovu ka, Eze Agiripa, nhne ele Ju kwno noobno m nhne.

⁸ Ndaa kpa anù nwée rikne kwe nù Chiokike neeme ele nwurnu ọnwu hi n'ẹnwu lizo?

⁹ “Me n'iwuru m cheru nù m jeenwe rikne mee nhne megidne rẹwhna Jizosi nye Nazareti.

¹⁰ Ọ bụ nhne me mernu nù Jeruselem. M nahjuru m rikne n'aka ele risi arịohna yisi agida ele Chiokike n'ikelu, nga be noogbu be, m yisiri m aka m megidne be.

¹¹ Agida ige m zernu m hite n'otu ọro ọgbako ele Ju dọ berere ta be awnwhnu, mee ma be gọnahoru rẹwhna Jizosi, m vuru okne ọnuma ke mernu m zne n'ẹli ele berere kpakna be ẹhni.

Otuhnasna mkpoma Pọlu
(Èrnu 9:1-19; 22:6-16)

¹² “Ka bụ nhne me kwno neezne Damasikos nù rikne nù iwu ele risi arịohna.

¹³ N'apna n'esilawuru iwhehnie, Eze, m whnurnu m okne iwhehnie kpakpa iwhehnie ẹhnam hiri n'oligwe mukwasi me nù ele nù me sno.

¹⁴ Kpakara aị dna n'eli, m nurnu m otu nkoli kanu m n'onu ele Hiburu, 'Solu, Solu, ndaa nhne i kwno naakpakna m ẹhni, i nwée rikne gba ọchi n'igwu.’

¹⁵ “M sịkwa, ‘Ị bụ nyele, Nyenwe aị?’

“Nyenwe aị kaa, ‘M bụ m Jizosi nye ị naakpakna ẹhni.

¹⁶ Lizo, gwuzoru n'ochi ị lawuru. M mernu m ma ị whnụ m anya, ma m hohia m ị buri nye izi m, ị jaakanu ele berere nhne i whnurnu tna, nù nhne me jeegesi i nù ruwhnu.

¹⁷ M ọdodhia ị n'aka ele Izireli ma n'aka ele buo ele Ju ele me jeezizne i.

¹⁸ M jeezizne i ma i kpume anya be, mee be hi n'ochichiri bna n'iwhehnie, hite nù rikne Ekwensu tūhnasna hne Chiokike zị. Ngam, Chiokike jaagarunu be mmehie be, ma be nwehia oghere n'esilawuru ele Chiokike bitaru nsọ hite n'okwnata ovu nù me.’

Pọlu tnrnu ọtutnu ẹrnu a

¹⁹ “Eze Agiripa, m mēne m risi rikne n'owhnurninya wam hiri n'oligwe va.

²⁰ Hite nù rime Damasikos, Jeruselem nù kpakara Judiya, dọ ele buo ele Ju, m kporu m okwo be hi nù nhne ojo be tūhnasna, vakwnusi Chiokike, mee nhne neegesi nù be hiri nù mmehie be whya.

²¹ Ka bụ nhne mernu ele Ju nwugwuru m n'Oro Nso, ma be gbu m.

²² Kọvu Chiokike yinu m aka dọ tna, m gwuzo m hna naagba akebne nyee ele ezi

nù ele matị. Nhne me nookwu bụ nhne ele ọwhnurninya nù Mozizi kwuru jeeme.

²³ Be karu nù Karaisi jaatariri awnwhnu, kovu ọ jọbu nye mbom jeehi n'ẹnwu lizo, gesi ele Ju iwhehnie ke ọznohia ma ele buo ele Ju.”

²⁴ Kpa Pọlu zị nọgoru ọnu a kpa, Fesitosi gweru okne nkoli si okokoba, kaa, “Pọlu, ẹra naachna ị, okne ọmumu ọkwukwo ị neeme ẹra naagba ị.”

²⁵ Pọlu kaa, “O zá ẹra naagba m, Fesitosi Nye zị Ogwu. Nhne me nookwu bụ ezi ọka nù ọka nye anya dnornu.

²⁶ Eze, ị magwu kpakara nhne me ji m ọnu nookwu. M magwu m nù ị magwu kpakara be, kwnornu nù ọ zá nhne be mernu nù hne zị mgwuga.

²⁷ Eze Agiripa, i kwegwu nù nhne ele ọwhnurninya kwuru? M magwu m nù ị kwegwu.”

²⁸ Agiripa kanu Pọlu, “N'ige matị ka, i nwrnu rikne mee m buru nye kweru nù Karaisi?”

²⁹ Pọlu saru a, “N'ige matị mọbu ke kwu, okpukpe m hne Chiokike zị bụ ma ị nù kpakara ele noobno m nsnị tna buru nhne me bụ, ọ buo n'ijigba ka.”

³⁰ Eze nù nye ọchichi nù Benisi nù kpakara ele nù be dazị lizo.

³¹ Be whoga, zne nookwu n'esilawuru be, be kaa, “O zá nhne ojo nwerukna ka mernu be jeeji gbu a mọbu tu a ikelu.”

³² Agiripa kanu Fesitosi, “O buru nù nwerukna ka kwile nù ọ jeezne nù ruwhnu Siza, be zernu sigbasi a, ọ la.”

27

Pọlu kworu ọgbo zne Rom

¹ Nga be kpebiri nù a jeezne Itali, be gweru Pọlu nù agwna ele ikelu berere yisi n'aka otu nye neechi otu riwhu ele ogwu rẹwhna a bụ Jiljosi, nye ogwu ele otu Ogositosi.

² A bna ogbo hite n'Adiramitium ma a zne n'apna ẹli Asia, a kworu ogbo zne. Arisitakosi nye Tesalonika n'eli Masidonia snornu aị.

³ Ke chi ọru, a dọ Saldoni. Hite n'ovu ọma, Jiljosi sigbasi Pọlu o zne whnụ ele enyi a, be nyee nhne zị a mkpa.

⁴ A hite nù pji zne, kovu ruwhere neewhegidne aị, a kworu ogbo whe aznụ ẹli ọhia esilawuru Saiporosi.

⁵ A kwowhe osimini Silisia nù Pamfilia, vadu Mira nù rime Lisia.

⁶ Nye neechi ele ogwu whnurnu otu ogbo hi nù Alekhandaria ke neezne Itali, o yisi aị n'ogbo wam.

⁷ A kworu wohnernerne agida ọbochi, hite nù nhne osi rikne a vadu n'eli Sinidusi, ruwhere kwéle a zne nù ruwhnu, a kworu ogbo whe aznụ ẹli Kiriti whe Salimone.

⁸ A n̄okwo ɔgbo n̄u ngeri ɛli. Hite n̄u nhne osi rikne a d̄u hne be kwu “Ọnu Mini Udno,” ke z̄a ikere n̄u ɛli-ɔhna Lasia.

⁹ Kpa a tuwhuru agida ige, a whn̄urnu n̄u ɔ kwɔ ɔgbo k̄itna n̄u lele nhne aghom, kwnornu n̄u Ọbochi Okpusni Mmehie* gawhelem. P̄olu zni be ɛzni,

¹⁰ “Ele nwe m, m whn̄urnu m n̄u izne mini aɪ ka hite k̄itna j̄ooburu nhne aghom, ivu n̄u ɔgbo joolulu, ma b̄udnu ele badn̄u.”

¹¹ K̄ovu nye n̄echi ele ɔgwnu gnern̄u nsn̄i nhne nye n̄okwo ɔgbo n̄u nye nwe ɔgbo kwuru karu nhne P̄olu kwuru.

¹² Ẹli ngeri osimini wam b̄uɔ oma ɔ daz̄iri n̄ige okirika, agida ele kakwo kweru be kwɔma ɔgbo bna osimini ma be zne Fonikisi. Hna b̄u ọnu mini n̄’eli Kiriti ke keteru ruwhnu n̄u nkala lawuru n̄u ɔdidna ɛhnam.

Abaka-mini osimini

¹³ Ruwhere mat̄i hite n̄u ɛli ɛli bete nee-
whe, ele rukna wam neeze n̄u be jeeme
kpa be kwuru, be d̄olzo nkno ɔgbo kw̄oru
ɔgbo neezne n̄u ngeri Kiriti.

¹⁴ O gb̄ule ɔkwnu ruwhere siri rikne be
kwu rugwu ɔbosi ɛhnam bete ewhe hite n̄’eli
ɔhia esilawuru wam.

¹⁵ O whekwas̄i ɔgbo wam, a nw̄ee rikne
knekwali ɔgbo wam, a sigbasi a ma ruwhere
vuru a neezne.

¹⁶ A kw̄oru ɔgba whe azn̄u ɛli ɔhia esi-
lawuru mat̄i be kwu Kauda. Ọ rar̄u ɛhni o
vubna ɔgbo mat̄i aɪ n̄u rime ɔgbo aɪ.

¹⁷ Nga be vuru ɔgbo mat̄i wam, be gweru
eriri knegidne ɔgbo aɪ gburugburu. Be
n̄oɔtu ɔgwnu ɔ z̄i be dnabna n̄u rime r̄izna
r̄oto n̄u ngeri Libiya, be gwedna bala ɔgbo,
sigbasi ɔgbo ma ruwhere vuru a neezne.

¹⁸ Okne abaka-mini bete ewhe, ke chi b̄oru
be bete nootuwu ivu z̄i n̄’ɔgbo n̄u rime
mini.

¹⁹ N̄’ɔbochi ke sno a, be gweru aka be t̄ubna
nhne be ji n̄okwo ɔgbo osimini.

²⁰ Agida ɔbochi, a whn̄una ɛhnam m̄obu
m̄obu, ruwhere z̄i k̄oriri neewhesi rikne. A
nw̄ema nt̄ukwas̄i ovu n̄u o nwernu nye be
j̄oɔzn̄ohia.

²¹ Ele rukna wam daz̄i agida ɔbochi, r̄ile
wiri, P̄olu gwuzoru n̄u ruwhnu be, kaa, “Ele
nwe m, an̄u bn̄one nsn̄i nhne me kwuru, a
zn̄ekele ɔkwohala ɔgbo hite n̄u Kiriti, a zn̄ekele
owhu mwhu kpakara nhne ka.

²² K̄itna, an̄u nwe ovu siri rikne, ɔ z̄a nye
ɔbula n̄’esilawuru an̄u jootuwu b̄udnu a,
okwolem ɔgbo jooowu.

²³ Kwnornu n̄u enine izi Chiokike nye
nwe m, n̄u nye me neekpenu gwuzoru n̄u
nger i m abal̄i tna.

²⁴ Ọ kaa, ‘P̄olu, ɔgwnu t̄u i, i joogwu-
zor̄iri n̄u ruwhnu Siza, Chiokike hite n̄’oru

a nyenem j̄i kpakara b̄udnu ele j̄i n̄u be z̄i
n̄’ɔgbo.’

²⁵ Ele nwe m, an̄u nwe ovu siri rikne,
kwnornu n̄u m kwnatarn̄u m Chiokike
mkp̄oma n̄u o jeeme kpa ɔ kan̄u m.

²⁶ K̄ovu a jaakp̄otasi n̄’otu ɛli ɔhia esilawuru
n̄’osimini.”

Ọgbo wam kpuru

²⁷ N̄’ɔbochi ke nri n̄u ɛno n’abal̄i, abaka-
mini noovughari aɪ n̄u osimini Adiratiki.
N̄’esilawuru abal̄i ele n̄okwo ɔgbo neeze
n̄u a z̄i nd̄undu ngeri ɛli.

²⁸ Be gwedna eriri whn̄u n̄u mini z̄i otu
riwhu n̄u nri lawuru rula ɛli ɛli, ige mat̄i be
t̄u kwno a berere whn̄u n̄u ɔ b̄u nri tolu.

²⁹ Be n̄oɔtu ɔgwnu n̄’ɔgbo aɪ j̄oɔkp̄otasi n̄u
rugwu, be gwedna nkno ɛno hite n̄’azn̄u
ɔgbo, neekpe okpukpe ma iwhe wh̄uya.

³⁰ Ele n̄okwo ɔgbo noopu ma be gbawhu
n̄’ɔgbo, be gwedna ɔgbo mat̄i n̄u mini n̄oɔgho
agh̄igho lele be neezne b̄ita nkno n̄u ruwhnu
ɔgbo.

³¹ K̄ovu P̄olu kan̄u nye n̄echi ele ɔgwnu n̄u
ele ɔgwnu, “Ọ b̄uru ele n̄okwo ɔgbo d̄az̄ila n̄u
rime ɔgbo, be j̄oɔzn̄ohia an̄u.”

³² Ele ɔgwnu wam gbubi eriri knegwu ɔgbo
mat̄i wam, sigbasi a, o wheru zne.

³³ Kpa chi n̄oɔbo, P̄olu r̄iasno be ri wiri,
“An̄u neese ka b̄u nri ɔbochi n̄u ɛno, an̄u r̄ile
nhne ɔbula kpakara ige ka.

³⁴ Bikno, an̄u ri wiri, ɔ z̄i mkpa ma an̄u z̄iri
b̄udnu, otu rukeri-ize an̄u j̄aadnahala n̄u risi
an̄u.”

³⁵ Kpa o kwukworu ka, P̄olu gweru
br̄edi, t̄unu Chiokike mmama n̄u ruwhnu
kpakara be, nyawa a, bete neeri.

³⁶ Be yisi ɛhni, nye ɔbula n̄’esilawuru be ri
wiri.

³⁷ A z̄i riwhu badn̄u lawuru n̄u nri ɛsau n̄u
isunu n̄u rime ɔgbo.

³⁸ Kpa be rikworu wiri, be t̄ubna kpakara
ikpa z̄i n̄’ɔgbo ma ɔgbo z̄iri ewheke n̄’olu
mini.

³⁹ Nga chi b̄oru, ele n̄okwo ɔgbo m̄aa ɛli ka,
k̄ovu be whn̄urnu otu ọnu mini r̄izna r̄izna, be
kaa, ọ b̄uru o jeekwe omume be j̄oɔkwɔ ɔgbo
n̄’olu r̄izna.

⁴⁰ Be gbuhala nkno, sigbasi o dnabna n̄u
rime osimini, be kneme eriri kne nhne be
jeeji ɔ kwɔ ɔgbo. Be gweliz̄o bala n̄u ruwhnu
ɔgbo, ma ruwhere whekwas̄i a n̄u ruwhnu,
be neezne n̄u mkpomkpo ɛli.

⁴¹ Ọgbo dnakwas̄i olu r̄izna, mii n̄u
r̄izna, ruwhnu ɔgbo takwn̄usi nw̄ee rikne
wh̄uya, azn̄u a gbaja mpekele mpekele hite
n̄’abaka-mini.

⁴² Ele ɔgwnu pioru ma be gbu kpakara ele
ikelu, ɔ z̄i otu badn̄u gwu mini gbawhu.

* 27:9 Ọbochi Okpusni Mmehie m̄obu ɔwhaji-ɛli Ọkwukwo ke m̄bom kwuru ɔbochi ovu ọnu

⁴³ Kòvù nye n'èchi ele ògwù pìorù ò b'ita Pòlù b'udnù, kwéle be mee k'pam. Kòvù ò kanù k'pakara ele rukna wam ele marnù ò gwù minì be dnabna minì, beru òsno gwurù minì zne mkpòmko p'èli.

⁴⁴ Ò kanù ele berere snornu be, knernù aka n'ìsisi mòbù mpekele ògbo, k'pakara àj mernu k'pa dù olu èli.

28

N'èli Malìta

¹ Nga a dùrù n'èli n'udno, a nurnu nù èli òhia esilawùrù wam be kwu a Malìta.

² Ele nwe èli wam gesiri àj ovu òma k'ag'ida, k'pa minì noozò, iyi n'òotù, be k'pawhùsi bèkwù kwnornu àj.

³ Pòlù ch'ik'ota nkala isisi n'òotubna be nù rime bèkwù, otu okpu-èli bèkwù ch'ihiaru gbakwnusi Pòlù n'aka.

⁴ Ele nwe èli whnurnu hne agwò wam gbakwnusiri Pòlù n'aka, be kwu n'èhni be, "Nwerukna ka bù nye noogbu badnù, ò bù n'èzi nù ò whùyarù nù rime ògbo, nhne òjò a noosno a."

⁵ Kòvù Pòlù k'pabna agwò wam nù rime bèkwù. Ò zà nhne mernu a.

⁶ Be neese, neele anya nù ò jaaza, mòbù dna n'èli nwùma. Be se gbù òkwù, ò zà nhne búo òma be whnurnu, be gbanwo mkpòma be kaa, "Ò bù chi."

⁷ Hne z'ila ikere bù ag'ida èli nye risi èli wam be kwu Pubiliòsi. Ò kwubnanyarnù àj nkari, òbochi èto a z'ì n'òro lele ele izne.

⁸ Nda Pubiliòsi dnany' èli naarià èhni igbugbu ogori nù rùwhù òwuwu. Pòlù zne nù rime òro hne ò z'ì, kpenu a okpukpe, t'ukwasi a aka a lawùrù, gwò a.

⁹ Nga ka mernu, k'pakara ele berere n'èli wam naarià èhni igbugbu varù, Pòlù gwò k'pakara be.

¹⁰ Be nyee àj ag'ida nkesi, nga a bnarnù ògbo panìzo izne minì àj, be nyee àj ag'ida nhne z'ì àj mkpa.

Hite nù Malìta dù Rom

¹¹ Ke ènwa èto wheru, a kwòrù ògbo hi nù Alèkizandaria be kwu "Rùmu Ejima." Ògbo ka daz'iri hna n'òkirika.

¹² A vadu èli Sìrakosi daz'iri p'ii òbochi èto.

¹³ Hite nù p'ii, a kwòrù ògbo zne èli Regium, ke chi a b'òrù, ruwhere bete neewhe hite nù èli èli, n'òbochi lawùrù a vadu èli Puteòli.

¹⁴ A whnurnu agwna rùmu nda, be r'iasno àj daz'iri otu ikwezu p'ii. Ka bù k'pa a jiri vadu Rom.

¹⁵ Rùmu nda ele z'ì nù Rom nurnu nhne gbas'iri àj, be va hne z'ì ikere lele Ah'ia Ap'iusi nù Òro Èto Ele Izne, kwnusi àj. Nga Pòlù whnurnu be, ò t'unu Chiokike mmamma, mesi mkpòma rikne.

Pòlù nù rime Rom

¹⁶ Nga a vaduru Rom, be kweru Pòlù wuru ke a ichne ya nù nye ògwù neese a.

¹⁷ K'pa òbochi èto wheru, Pòlù suk'wuk'ota ele risi Ju ikwu. Nga be gbak'òrù, ò kanù be, "Rùmu nda m, ò bù n'èzi nù ò zà nhne òjò me mernu megidne ele ke àj mòbù omen'èli a nah'iaru n'aka ele nda àj, be mernu m nye ikelu nù rime Jeruselem, gweru m nyewhete n'aka ele Rom.

¹⁸ Be s'ik'waru m ajji, be pìorù ò sig'basì m kwnornu nù be whnurnu nù ò zà nhne òjò me mernu ke kwesiri ènwu.

¹⁹ Nga ele Ju kwéle, be mernu m, m kaa nù m jeezne nù ruwhnu Siza, ò bù n'èzi nù ò zà nhne me noobno ele ke m.

²⁰ Ò bù nhne me kwòno pio ma me nù anù kwurita òka, kwnornu be t'uru m ijigba ka kwnornu nù nhne wam k'pakara ele Izir'èli neele anya a."

²¹ Be sarù Pòlù, "Ò zà òkwukwo izi òbula a whnurnu hite nù Judiya gbas'iri jì, ò zà rùmu nda àj vuyarù òtmutnu mòbù òka òjò òbula gbas'iri jì.

²² Kòvù a j'òonu nhne i jookwu, kwnornu nù k'pakara ele badnù nookwu òka megidne otu wam i noosno."

²³ Be nù Pòlù yi j'igba, ag'ida be varù n'òbochi wam hne Pòlù zì. Hite n'òsisi dù abal'ì ò znirni be izi òma èli-eze Chiokike. Ò gbal'ì ma be jeekweru nhne gbas'iri Jiz'òsi. Pòlù kanù be k'pakara nhne be gbarù n'Iwu Mozizi nù nhne ele òwhnurninya gbarù n'òkwukwo nsò.

²⁴ Agwna be kweru ikwu-ònu a, kòvù ele berere kwéle.

²⁵ K'pa be naala, okewa z'iri n'esilawùrù be, Pòlù kwuru otu nhne ka, "Enine Nsò kwuru nkari hite n'ònu Azaya nye òwhnurninya nyee ele nda anù,

²⁶ 'Zne kanù ele ka,

Anù jaaz'ì n'òonu kp'oi, kòvù anù j'òoghohia. Anù jaaz'ì neele anya, kòvù anù j'òowhnu òsno.

²⁷ Kwnornu ovu ele ka z'ì r'inya,

nsn'ì n'yn'òrnu be,
anya be kpuru isni,
ò z'ì be whnù n'anya be,
nsn'ì be nurnu,
echiche be gh'òhia, be t'uhnasna mkpòma,
m gwò èhni igbugbu be.' "

²⁸ Pòlù kwukwo òka a, kaa, "Anù mah'ia nù òznohia Chiokike bù nhne be gweznenu ele búo ele Ju. Be j'òobno nsn'ì." [

²⁹ K'pa Pòlù kwukworu òka, ele Ju la, n'òodogbuta n'anya rikne n'esilawùrù èhni be.]

³⁰ Awha lawùrù Pòlù wuru n'òro ke a, n'òokwu ògwò òro, nanabnanya k'pakara ele naavakwnusi a.

³¹ Ò kp'ò okwo izi òma èli-eze Chiokike, zni nhne gbas'iri Nyenwe àj Jiz'òsi Kara'isi hite n'ònu rikne, ò zà nye noobnosni a.

Okwukwo izi Pọlu gbaznenu

Ele Rom

Nhne gbasiri okwukwo izi ka

Okwukwo izi Pọlu gbaznenu ele Rom bụ ma be jiknenu o nabnanya Pọlu nū Rom. Echiche a bụ ma o rnu ọnu n'esilawuru be ige matị, hite n'oyi aka be, o zne Sipeni. Okwukwo izi ele Rom neegesi kpa Chiokike nọogwu ele badnu ele ikpe mana, mee ya nū be ziri n'udno. Chiokike mernu ele badnu nū a ziri n'udno hite n'okwnata mkpoma ke zi nū Jizosi Karajisi. Nye Karajisi obula nwernu udno kwnornu nū Chiokike mernu badnu nwernu ẹhni a, whoga nū rikne ke mmehie nū ẹnwu. Pọlu kwuru nū ele Ju nū ele bụo ele Ju nwernu igwe n'oru Chiokike hite nū Jizosi Karajisi.

Nhne zi n'okwukwo ka

Opanizo (1:1-17)

Oznohia hite nū mmehie zi mkpa (1:18--3:20)

Apna Chiokike kwnornu oznohia (3:21--4:25)

Budnu ikne nū rime Karajisi (5:1--8:39)

Izirẹli zi nū mmuma Chiokike (9:1--11:36)

Agwa nye Karajisi (12:1--15:13)

Okwukwo nū obekwu ikwu (15:14--16:27)

¹ Mawa Pọlu, nye izi Karajisi Jizosi, nye Chiokike sukuru, ma m buru m nye izi Jizosi, hohia masi a ma m buru m nye zni izi oma a, naagba okwukwo izi ka.

² Ka bụ izi oma Chiokike kweru mkwna ogologo ige wheru ewhe hite n'onu ele qwhnurninya, lele kpa be gbarụ a n'okwukwo nsọ.

³ Izi oma ka gbasiri Nnwọ a, Nyenwe aị Jizosi Karajisi, nye ghoru badnu, be mu a n'avnurnu Devidi.

⁴ Chiokike gesiri nū Jizosi Karajisi bụ Nnwọ a, nga o mernu o hi n'ẹnwu lizọ hite nū rikne ke Enine Nsọ.

⁵ Hite n'aka a, Chiokike nyernu aị oru o buru ele izi kwnornu Karajisi, ma a sukuru kpakara mba ma be kweru nū ya, bno a masi nsni.

⁶ Kpakara anu ele zi nū Rom, zi n'esilawuru ele Chiokike sukuru ma be buru ke Jizosi Karajisi.

⁷ M naagbanu anu ele zi nū Rom okwukwo, ele Chiokike whnurnu n'anya, sukuru ma be buru ele ke a,

Oru nū udno ke Chiokike Nda aị nū Nyenwe aị Jizosi Karajisi dazinu anu.

Okpukpe ọtu mmamma

⁸ Ke mbom, m nọtunu Chiokike mmamma hite nū Jizosi Karajisi kwnornu anu, nū okwnata mkpoma anu gazuru ọwa.

⁹ Chiokike, nye me ji kpakara mkpoma m naakwanu, hite n'okpo okwo izi oma Nnwọ a, bụ nye akebe m, nū m neechenwanya anu ige obula.

¹⁰ Ige obula me neekpe okpukpe, m nọorio Chiokike ma hite n'echiche oma a, o nyee m oghere me va lekasi anu.

¹¹ Kwnornu nū m pioru m o whnu anu anya ma me nū anu keru ngozi ke enine, ke jeeme anu gwuzosi rikne.

¹² Ke bụ me va, a kasirita ẹhni aị ovu, okwnata ovu m jaakasi anu ovu, okwnata anu jaakasi m ovu.

¹³ Rumu nda m, m pioru anu mahia nū agida ige, m pioru m o va lekasi anu, kovu m nwée m rikne du kitna. M pioru m o rihia mkpuru ovu n'esilawuru anu lele kpa me rihjaru mkpuru ovu n'esilawuru ele bụo ele Ju.

¹⁴ Kwnornu nū m ji m kpakara ele badnu ogwo okpo okwo izi oma, ma ele Giriki, ma ele bụo ele Giriki, ele nwernu akọ, ma ele nwée akọ.

¹⁵ Ke bụ nū o zi m mkpa o zni anu ele zi nū Rom izi oma.

Iknernema ke izi oma

¹⁶ Iwhnerne izi oma ka za nọtunu m, o bụ rikne Chiokike du oznohia kpakara ele kweru, ele Ju ke mbom, nū ele bụo ele Ju.

¹⁷ Kwnornu nū ome mma ke Chiokike whuyaru iwhne n'izi oma, hite n'okwnata ovu du okwnata ovu, lele kpa be gbarụ a n'okwukwo nsọ, "Nye mee mma jeehi nū okwnata ovu a ziri budnu."

Onuma Chiokike megidne badnu

¹⁸ Kwnornu nū ovu owe ẹhni Chiokike hiri n'oligwe whuya iwhne megidne kpakara ele maa Chiokike, ele hi nū risi rikne aruru-eli be naakpagidne ezi oka.

¹⁹ Chiokike neewe ẹhni megidne be, kwnornu nū nhne be kwesiri o mahia gbasiri Chiokike whuyaru iwhne. O bụ Chiokike n'iwuru a gesiri be ẹhni a.

²⁰ Hite n'okike ọwa, nhne be whnu anya gbasiri Chiokike, nū rikne a zi okwnukokwnu, nū oyiyi a zi nsọ bụ ke badnu whnurnu anya, be whnurnu be nū kpakara nhne Chiokike keru, ke bụ nū badnu nwée nhne o ji gonahoru ẹhni a.

²¹ Be marnu Chiokike, kovu be nyéne a igwugwu kwesiri a, be tu mmamma, kovu echiche be bụ nhne etekne, mkpoma iwahnirniwhno be jihjaru n'ochichiri.

²² Be kaa nū be bụ ele nwernu akoniche, be bụ ele iwahnirniwhno.

²³ Tnnuma be jaakwanu Chiokike ke nwu onwu, be nọokpo risi eli nyee nhne be pnjornu

opnio lele badnu ke nonwu onwu, nu onunu, nu anohia nu agwo.

²⁴ Chiokike gweru be nyewhete n'aka nhne zila richna hite nu ome nhne ovu ojo be pioru, be gweru ehni be mee nhne tu iwhnerne n'esilawuru ehni be.

²⁵ Be gweru aghalaghala gbanwo ezi oka Chiokike, be nokpo risi eli nyee nhne be keru eke tnuma nye keru nhne n'iwuhuru a, nye nwe oznarni okwnukokwnu. Amim.

²⁶ Kam kpararu, Chiokike nyernu be n'aka ome nhne tu iwhnerne. Ele rinya gharu o mee nhne lele kpa omen'eli omekorita nyerukna nu nyerinya zi, be be neemekorita.

²⁷ Kpam masi, ele rukna sigbasiri o dnanyi ele rinya, be naadnanyitaru ehni be. Be neeme nhne tu iwhnerne n'esilawuru be, be naata awhnwuhnu nhne ojo be mernu.

²⁸ Kpa be kwéle o marnu Chiokike nu mkpoma be, Chiokike nyewhete be n'aka ovu ruru oru, ma be mee nhne be kwésile o mee.

²⁹ Aruru-eli zi odo nu odo jihiaru mkpoma be, mmehie, owho-anya, okne nhne ojo, n'taknarnama ovu, ogbu badnu, olu ogwnu, aghigho, nu osno irno, ozno izno.

³⁰ Ele naakaja ehni be, be snornu Chiokike irno, ele so anya, ele noolu onu, ele neechehia apna ikne kpa be jeeme nhne ojo, ele za noobnonu ele murnu be nsnj,

³¹ ele nwéle ogghohia, ele za naabita ogbanjo-ehni, ele nwéle ovu oma, ele za nonodonu ele berere obirizi.

³² Be magwu nu iwu Chiokike kwuru nu ele neeme nhne ojo ka nonwu enwu, o buo nu be neeme nhne ele ka kpoi, kovu be naadasinu ele neeme nhne ele ka n'ikwnu.

2

Ike zi snam ke Chiokike

¹ Ji badnu, i nwéle rikne gonahoru ehni i, ji nye neekpe nye berere ikpe, kwnornu nu hne i zi neekpe nye berere ikpe bu hne ikpe zi naama i, kwnornu nu i neeme otu nhne wam.

² A magwu nu Chiokike neekpe ikpe zi snam nu risi ele neeme kpakara nhne ka.

³ Ji badnu etekne ke neeme nhne ke i kwno neekpe ele berere ikpe, i che nu i jaagbanahoru ikpe Chiokike sa?

⁴ Mbu i neeledna okne ovu oma Chiokike anya, nu onabnanya a, nu ogologo onuta ovu a? N'ezi, Chiokike neemenu i nhne oma ka ma o dubna i nu otuhnasna ovu.

⁵ Kovu hite nu ovu rikne nu ovu kwéle onbiaji i, i naabitano ehni i awhnwuhnu ke kakwo n'obochi ovu owe ehni Chiokike nu okpume ikpe a zi snam.

⁶ Chiokike jookwu nye obula ogwo lele kpa enru a jiri zi.

⁷ Ele gwuzosi rikne neeme nhne oma, noopio igwugwu nu osobisi, nu nkoli budnu, Chiokike jeenye be budnu kwó okwo.

⁸ Kovu, ele noopio nhne ke aka be, ele kwéle ezi oka, ele noosno nhne ojo, Chiokike joochwukwasi be ovu owe ehni a nu onuma a.

⁹ Okne awhnwuhnu nu nhne igbugbu jaazinu kpakara ele neeme nhne ojo, ke mbom ele Ju, ma ele buo ele Ju.

¹⁰ Kovu igwugwu, osobisinu nu udno jaazinu nye obula neeme nhne oma, ke mbom ele Ju, nu ele buo ele Ju.

¹¹ Kwnornu nu Chiokike za neele badnu anya nu ruwhnu.

¹² Kpakara ele mernu mmehie hne be nwéle Iwu Mozizi nonwu hne Iwu zila, ele mehieru hne Iwu zi, Iwu jeekpe be ikpe.

¹³ O buo ele nonu Iwu bu ele zi snam nu ruwhnu Chiokike, kovu ele neeme nhne Iwu kwuru.

¹⁴ Nga ele buo ele Ju ele nwéle Iwu hiri n'ovu be mee nhne Iwu kwuru, kam bunu be Iwu, o bu n'ezi nu be nwéle Iwu.

¹⁵ Budnu be neegesi nu be gbagwu Iwu n'ovu be, ovu be naagbanu be akebne, noobno be nhne, mibu nonogomanu be.

¹⁶ Ka jobu n'obochi Chiokike jeekpe nhne tugwaru otugwa ke badnu ikpe, hite n'aka Karaisi Jizosi lele kpa izi oma me neezni kwuru.

Ele Ju nu Iwu

¹⁷ I noosukwu ehni i nye Ju, nonotukwasi ovu n'Iwu, neeji Chiokike naanya risi.

¹⁸ I magwu echiche a, i nahoru nhne ke kakwo mma, kwnornu nu i mularu a n'iwu.

¹⁹ I kwnataru ovu nu i bu nye noodu nye isni, iwhne ele zi n'ochichiri,

²⁰ nye neezni ele iwhnirniwhno nhne, nye neezni rumu takiri nhne, nye nwegwu akoniche zuru ozu, nu ezi oka.

²¹ Ji nye neezni ele berere nhne, i zní ehni i nhne sa? I neezni o za nye znu buznu, ji n'iwuhuru i znú buznu sa?

²² I kaa, "O za nye mee oyi," jiwa, i mee oyi sa? I snornu chi berere irno, kovu i znú buznu nu ruwhnu renwu?

²³ Ji nye ji iwu Chiokike noolu onu, o bu i za neeme Chiokike nhne iwhnerne hite n'olulu iwu a?

²⁴ Lele kpa be gbaru a n'okwukwo nsó, "Ele buo ele Ju naakaja rewhna Chiokike kwnornu anu ele Ju."

²⁵ O buru nu i bita iwu, okpa nka i bu nhne, kovu o buru nu i bitage iwu, okpa nka i bu nhne etekne.

²⁶ O buru nu ele buo ele Ju be kpáge nka, bita Iwu, be jeegweru be lele ele be kparu nka.

²⁷ Nye be kpáge nka n'anó-ehni kovu o bitaru Iwu jaama i ikpe, ji nye nwegwu Iwu

be gbarụ n'okwukwo nụ nye be kparụ nka, kọvu ị zá naabjita Iwu.

²⁸ Badnụ búo nye Ju n'anọ-ẹhni kpọi, ọkpa nka búo masị ke anọ-ẹhni kpọi.

²⁹ Nye Ju n'ezị bụ nye Ju n'ovu. Ọkpa nka bụ ke be kparụ n'ovu hite n'enine Chiokike, ọ búo n'Iwu be gbarụ n'okwukwo. Ọznarni badnụ wam híge n'aka badnụ, kọvu n'aka Chiokike.

3

*Chiokike kwesiri
ọ kwnata ovu*

¹ Kịni bụ nhne ele Ju nwernu kakwo ele búo ele Ju? Ọ zị mbnarna zị nụ ọkpa nka?

² Owe! K'agịda n'apna ọbula. Ke mbom, Chiokike nyernu ele Ju ikwu-ọnu a.

³ Ọ bụru nụ agwna be nwée ọkwnata ovu? O jeeme Chiokike bụru nye kwésile ọ tụtkwasi ovu?

⁴ Óza rịa rịa! Chiokike jọburiri nye ezi ọka, ọ bụbedi nụ kpakara badnụ jọburu ele aghalaghala. Lele kpa ọkwukwo nsọ kwuru, "Ma ị gesi nụ ị bụ nye nookwu ezi ọka, Ikpe jáama ị nga be neekpe i ikpe."

⁵ Ọ bụru nụ a mernu nhne búo ọma, ke jeegesi ome mma Chiokike ke zị snam, kịni bụ nhne a jookwu? Nụ Chiokike mernu nhne ojo nụ ọ ta aị awnụwhnu nụ ovu owe ẹhni sa? (M nookwu lele badnụ etekne.)

⁶ Óza rịa rịa! Ọ bụru nụ Chiokike búo nye mee mma, ndaa kpa o jeeji kpe ọwa ikpe?

⁷ Ọ bụru nụ aghalaghala m jeenye Chiokike igwugwu hite nụ ome ezi ọka a whụya iwhe, ndaa kpa be jaama m ikpe lele nye mmehie?

⁸ Ọ bụru nụ anụ neeché kpam, anụ jaakaa, "Ngwa ma a mee nhne ojo ma nhne bụru ọma va"? Agwna ele badnụ nyernu m mkparị, noobno m nụ ka bụ nhne me neezni ele badnụ. Be jaama be ikpe lele kpa o kwesiri.

Nye mee mma zá

⁹ Ndaa, a ka ele búo ele Ju mma? Óza rịa rịa. M karụ m nụ ele Ju ma ele búo ele Ju n'otu zị nụ mkpururu mmehie.

¹⁰ Lele kpa ọkwukwo nsọ kwuru, "Ọ zá nye bụ nye mee mma, ọ bụbedi otu.

¹¹ Ọ zá nye nwernu akoniche,
ọ zá nye noopio Chiokike.

¹² Kpakara ele badnụ dasịnnu Chiokike aznụ,

ọ zá iru be bnarnụ,
ọ zá nye neeme nhne ọma
ọ bụbedi otu.

¹³ Ọnu be nụ lele ilili gberu anya,
riro be nookwu ọka aghigho,

ọka ojo lele njulu agwo neehi nụ mgbele-ọnu be whụya.

¹⁴ Ọvu ọnu nụ okne ọnu ojo jihjiru be nụ mkpoma.

¹⁵ Ọchi be zị snarna snarna n'owusa ọvnarna.

¹⁶ Olulu nhne nụ nhne anya-mini noosno be n'apna be.

¹⁷ Be máa apna udno.

¹⁸ Ogwnu Chiokike zá be n'anya."

¹⁹ Kịna a magwụ nụ kpakara nhne Iwu kwuru zịnu ele zị nụ mkpururu Iwu, ma be kpusni kpakara ọnu ele badnụ, ma kpakara ọwa bna n'ikpe Chiokike.

²⁰ Kwnornu nụ ọ zá nye mee mma n'anya Chiokike hite nụ ome nhne Iwu kwuru, kọvu Iwu neeme ele badnụ mahjia nụ be mehieru.

*Ome mma hite
n'okwnata mkpoma*

²¹ Kọvu ome mma Chiokike whụyaru iwhe hne Iwu zila, ọ bụ ezi ọka nụ Iwu nụ ele ọwhnurninya naagbanu a akebne.

²² Ome mma Chiokike ka hiri n'okwnata ovu nụ Jizọsi Karaịsi zinu kpakara ele kwehjaru, kwnornu nụ ọkpa ike zila nụ rime a rịa rịa.

²³ Kwnornu nụ kpakara ele badnụ mehieru, be nwée rikne dụ igwugwu Chiokike.

²⁴ Kọvu nkesi ke oru Chiokike mernu kpakara badnụ bụru ele ikpe mámana hite n'ogbahia aị ke hi n'aka Karaịsi Jizọsi.

²⁵ Chiokike nyernu a lele nkesi ọwhaji-ẹli hite n'okwnata ovu, ka bụ ma Chiokike gesi ome mma a. N'ige wheru ewhe Chiokike jiri ogologo ọsnuta ovu lewhuru mmehie ke badnụ anya.

²⁶ O mernu kam ma o gesi ikpe a zị snam n'ige ka, ma ọ bụru nye mee mma nga ọ neegweru badnụ lele nye ikpe mámana hite n'okwnata ovu nụ Jizọsi.

²⁷ Ọ bụru kpam, ndaa hne mpako zị? Ọ zila! Kịni kpayaru a? Ọ bụ nụ hite n'obita nhne Iwu kwuru? Óza! Kọvu a kwnataru ovu.

²⁸ A nookwusi a rikne nụ be neegweru badnụ lele nye ikpe mámana hite n'okwnata ovu, ọ búo hite n'ernu ke Iwu.

²⁹ Chiokike, ọ bụ Chiokike ke ele Ju kpọi? Ọ búo Chiokike ke ele búo ele Ju sa? Owe! Ọ bụ ya.

³⁰ Hne ọ bụ otu Chiokike, ọ jọogwnu ele be kparụ nka lele ele ikpe mámana hite n'okwnata ovu be, nụ ele be kpála nka hite n'okwnata ovu be.

³¹ A jaakaa nụ ka neegesi n'Iwu bnáge nụ nhne hite n'okwnata ovu ka? Óza rịa rịa, kọvu a neeme Iwu gwuzosi rikne.

4

Okwnata ovu Eberham

¹ Ndaa nhne a jaakaa gbasiri Eberham nda aị? Kịni bụ nhne o piohjaru?

² Ọ bụru nụ be hiri n'ernu Eberham gwnjisi a nụ nye mee mma, o znernu anyaa

risi nù ka. Kòvu o nwéé rikne mee oknomo-kno nù ruwhnu Chiokike.

³ Okwukwo nsò kwuru kìnì? “Ebereham kweruru Chiokike, Chiokike gwnùsinu a nù ò bụ nye mee mma.”

⁴ Nye be kwòru ogwo ẹ̀nu a, ogwo ẹ̀nu a búla nkesi, kòvu nhne ò rnhìariu n'ẹ̀nu.

⁵ Kòvu nye nrúge ẹ̀nu, ke kwnataru Chiokike, nye nòogwnu ele ojo lele ele ikpe mána ovu, Chiokike jì òkwnata ovu a gwnù a nye mee mma.

⁶ Ka bụ nhne Devidi kwuru gbasìri nye ọwa ọma, nye Chiokike híge n'ẹ̀nu a gwnù nù nye mee mma,

⁷ “Nye ọwa ọma bụ nye Chiokike gbarùnu mmehie, nye be kpusnirni arùru-ẹ̀lì a.

⁸ Nye ọwa ọma bụ nye Chiokike zá nòogwnu mmehie a megidne a.”

⁹ Ngòzi ka, ò zìnu ele be kparù nka kpòì sa? Óza, ma ele be kpála nka. Kwnornu nù a karù nù Ebereham kweruru Chiokike, Chiokike gwnùsinu a nù ò bụ nye mee mma.

¹⁰ Ndaa hne nhne ka mernu? Ò nga be kparù a nka, sù ò bụ nga be kpála a nka? Ò bụ nga be kpála nka.

¹¹ Be kparù a nka ma ò bụru nhne elekema ke ome mma nù ò kwnataru Chiokike ovu nga be kpála a nka, ma ò bụru nda kpakara ele kweru, ma be gwnùsì be n'ele mee mma, ò bụ n'ezì nù be kpála be nka.

¹² Ò bụ masì nda ele be kparù nka, ò búla nù be kparù be nka kpòì, kòvu nù be noowu búdnù òkwnata ovu lele nda aì Ebereham wuru sù be kparù a nka.

Mkwana Chiokike

¹³ Mkwana Chiokike kweru Ebereham nù avnùru a nù be jeekehìa ọwa búò hite n'òbita Iwu, kòvu ome mma ke hiri n'òkwnata.

¹⁴ Ò bụru nù ele zì nù mkpururu Iwu jeekehìa mkwana wam, òkwnata ovu bụ nhne etekne, mkwana Chiokike kweru bnána iru.

¹⁵ Iwu neegweya ovu owe ẹ̀hni Chiokike. Hne Iwu zìla, ò zá nye jaadna Iwu.

¹⁶ Mkwana wam hiri n'òkwnata mkpòma. O mernu ò hite n'oru gwuzoru kwem nù rime kpakara rùmu Ebereham. Ò búò ele zì n'Iwu kpòì, kòvu ma ele sno òkwnata ovu Ebereham, kwnornu nù ò bụ nda kpakara aì.

¹⁷ Lele kpa be gbarù a n'òkukwo nsò, “M mernu m jì nda agìda mba.” Ò bụ nda aì n'anya Chiokike, nye ò kwnataru ovu, Chiokike ke naakpatne nye nwùru ọnu, nye neeme nhne zìgele a whùya iwhe.

¹⁸ Nga olile anya zìla a, Ebereham kwnataru ovu, ò bụru nda agìda mba, lele kpa òkukwo nsò kwuru, “Mkpuru ì jaazì agìda kpa.”

¹⁹ Òkwnata ovu a dnáge adna, nga ò whnùru nù anò-ẹ̀hni a bụ nhne nwùru ọnu, hne ò bụ otu riwhu awha, nù rẹkpanwò Sera nwùru ọnu.

²⁰ Kòvu òkwnata ovu a dnáge adna hite nù ókwe ekwe mọbu onwe mkpòma lawùru gbasìri nhne Chiokike kweru a mkwana, òkwnata ovu a mernu ò gwuzosì rikne naaznarnì Chiokike.

²¹ Ovu siri a rikne nù Chiokike nwernu rikne ò mezu nhne ò kweru mkwana.

²² Kam kpararù, “Chiokike gwnùsinu a nù ò bụ nye mee mma.”

²³ Nù be gwnùsiri a nù nye mee mma, búò nhne ke zìnu a kpòì.

²⁴ Ò zì masìnu aì ele be jòogwusi n'ele mee mma, ele kweru nù nye wam mernu Jizòsi Nyenwe aì hì n'ẹ̀nu lizò.

²⁵ Be nyernu a ma ò nwù kwnornu mmehie aì, ò hiri n'ẹ̀nu lizò ma Chiokike gwnùsì aì lele ele ikpe mámana.

5

Snarnìma nù udno

¹ Kìtna, hne Chiokike gwnùru aì lele ele ikpe mána hite n'òkwnata ovu, a nwernu udno nù Chiokike hite n'aka Nyenwe aì Jizòsi Karaìsi.

² Jizòsi bụ nye a hiri n'aka a, hite n'òkwnata ovu gwuzoru n'oru Chiokike. A nòonwudna ọnwudna nù a nwernu olile anya nù a jeekehìa igwugwu Chiokike.

³ Ò búò kam kpòì, a nòonwudna nù rime awhnùwhnu, kwnornu nù awhnùwhnu neegweya ọsnuta ovu,

⁴ ọsnuta ovu neegweya agwa ọma, agwa ọma gweya olile anya.

⁵ Olile anya aì jòòbu nhne etekne, kwnornu nù Chiokike wùkwasiri aì ọwhnùn'anya a n'ovu aì hite n'Enine Nsò, ke ò kesiri aì.

⁶ Kwnornu nù nga a nwéé rikne, Karaìsi nwùru kwnornu aì ele ojo máa Chiokike.

⁷ Ò bụ nhne siri rikne nù badnù jookwno nye ọma nwù ẹ̀nu. Kòvu badnù eleghi anya jeenwe rikne kwnornu nye mee mma nwù.

⁸ Kòvu Chiokike gesiri aì ọwhnùn'anya a ke bụ nù Karaìsi kwnornu aì nwùma kpa a zì kòriri nù rime mmehie.

⁹ Be hiri n'òvnarna a gwnù aì lele ele ikpe mána, ò jòoznohia aì n'ovu owe ẹ̀hni Chiokike.

¹⁰ Kwnornu nù a bụ ele irno Chiokike nù mbòm, kòvu aì nù Chiokike mernu udno hite n'ẹ̀nu Nnwò a. Kìtna, a bụ ele enyi Chiokike, ò jòoznohia a hite nù búdnù Nnwò a.

¹¹ Ò búò kam kpòì, kòvu a nòonwudna ọnwudna nù rime Chiokike hite nù Nyenwe aì Jizòsi Karaìsi, nye mernu aì nù Chiokike zìri n'udno.

Adam nù Karajisi

¹² Lele kpa mmehie hiri n'aka otu badnu bna nù rime owa, mmehie vuyaru enwu, enwu wam zuru kpakara owa, kwnornu nù kpakara badnu mehieru.

¹³ Mmehie zì n'owa sù be nyernu Iwu, kovu mmehie zìla ire nga Iwu zìla a.

¹⁴ Enwu hiteru n'Adam dù n'ige Mozizi n'echi kpakara badnu, ma ele mèhie lele kpa Adam mehieru. Adam bù nye bítala nhne Chiokike nyernu n'iwu.

Adam bù oyiyi nye wam jaava.

¹⁵ Kovu nkesi wam nuna lele mmehie. Kwnornu ò buri nù agida badnu nwurnu hite nù mmehie otu badnu, oru nù nkesi Chiokike zì agida kakwo, ke gazuru kpakara ele badnu hite n'oru otu nye wam bù Jizosi Karajisi.

¹⁶ Nkesi Chiokike zì ichne nù hne mmehie otu badnu zì. Ikpe snornu otu mmehie wam ke vuyaru omuma ikpe, kovu nkesi wam sno agida mmehie ke vuyaru ogwnusi badnu lele nye ikpe mánana.

¹⁷ Mmehie otu badnu ka, Adam, mernu enwu n'echi owa, kovu kpakara ele nahjaru nkesi oru zì agida ke Chiokike nù ome mma a, jeemegbu mmehie nù enwu hite nù otu badnu wam ke bù Jizosi Karajisi.

¹⁸ Owe! Otu mmehie Adam vuyaru omuma ikpe nù risi kpakara ele badnu, kovu, otu ernu ome mma Karajisi mernu ele badnu buri ele ikpe mánana n'anya Chiokike, ke nyernu be budi.

¹⁹ Hite nù risi rikne otu badnu kpakara ele badnu ghoru ele mmehie, otu aka wam masi, obno nsnì otu badnu jeeme kpakara ele badnu buri ele mee mma.

²⁰ Iwu varu ma nhne ojo zì agida, kovu hne mmehie zì agida, oru Chiokike baru aba k'agida.

²¹ Hne mmehie n'echi hite n'enwu, oru Chiokike n'echi hite n'ome mma ke noodubna nù budi kwó okwo hite nù Jizosi Karajisi Nyenwe aj.

6*Nwu nù mmehie, ziri budi nù Karajisi*

¹ Kìni bù nhne a jaaka? O bù ma a zì koriri nù neeme mmehie ma oru Chiokike ba owa?

² Oza rja rja! Ndaa kpa aj ele nwurnu onwu nù rime mmehie jaazi koriri budi nù rime a?

³ O bù nù anù máa sa, be wuru aj mini ma aj nù Karajisi Jizosi buri otu, nù be wuru aj mini ma aj nù Karajisi buri masi otu n'enwu a?

⁴ Hite nù mini be wuru aj, be likotaru aj nù Karajisi n'enwu a, ma a nù lele Karajisi nga o hiri n'enwu lizo hite n'igwugwu ke Nda, a joowu budi ikne.

⁵ Kwnornu nù ò buri nù aj nù a bù otu n'enwu a, kpm masi, aj nù a jòoburu otu n'olizo n'enwu a.

⁶ A magwu nù ehni oknani aj bù ke be kpogidneru ya nù Karajisi n'olu oga a, ma be lulu ehni mmehie, ma a gharu ò buri òhi ke mmehie.

⁷ Kwnornu nga badnu nwurnu, mmehie nwéma iknerema n'ehni a berere.

⁸ O buri a snornu Karajisi nwù enwu, a kweru nù a joosno a ziri budi.

⁹ A magwu nù Chiokike mernu Karajisi hi n'enwu lizo, ò jónwu kwno berere, enwu nwéma iknerema hne ò zì berere.

¹⁰ Enwu ò nwurnu, ò nwurnu kwnornu mmehie otu mgba, ò zì budi kítina, ò zinu Chiokike budi.

¹¹ Kpm masi, anù gwnu ehni anù lele ele nwurnu onwu kwnornu mmehie, kovu ele zì budi nyee Chiokike hite nù Karajisi Jizosi.

¹² Anù kwé mmehie n'echi anò-ehni anù, neeme anù noobno nsnì nhne ojo anò-ehni noopio.

¹³ Anù kwéko ò gweru ehni anù nyee mmehie ma ò buri nhne ernu ke risi rikne. Kovu anù gweru ehni anù nyee Chiokike, lele ele hiri n'enwu bna nù budi, anù gweru kpakara ehni anù nyee ma be buri nhne ernu ke nhne owa.

¹⁴ Kwnornu nù mmehie zá n'echi anù, anù zila nù mkpururu Iwu, kovu nù mkpururu oru ke Chiokike.

Ele òhi ke ome mma

¹⁵ Kìni bù ka? A jaazi neeme mmehie kwnornu nù a zá nù mkpururu Iwu, kovu mkpururu oru ke Chiokike? Oza rja rja.

¹⁶ Anù magwu nù nye anù noobno nsnì nhne o nookwu, anù bù ele òhi nye anù noobno nsnì. Anù bù òhi ke mmehie ke noodubna n'enwu, mba òhi obno nsnì ke noodubna n'ome mma.

¹⁷ Kovu oznarni zinu Chiokike, kwnornu nù mbom anù bù òhi ke mmehie, kovu anù bnornu nsnì hite nù mkpoma anù bna n'ezi oka wam anù nahjaru.

¹⁸ Be dohiaru anù nù mmehie anù, ma anù buri òhi ke ome mma.

¹⁹ M nookwu lele badnu, kwnornu nù anù zá rikne. Nù mbom, anù gweru ehni anù nyee nhne zila richna nù risi rikne o mee nhne ojo, kpm masi, anù gweru ehni anù buri òhi ome mma bna n'ernu zì nsò.

²⁰ Nga anù bù òhi ke mmehie, anù nwé igwe n'ome mma.

²¹ Ndaa mbnarna anù nwehjaru hite nhne kam notu iwernerne? Risi kpakara nhne kam, bù enwu.

²² Kovu kítina, be dohiaru anù nù rime mmehie, anù buri ele òhi ke Chiokike, mbnarna anù jeenwehia jeeme anù ziri nsò ke joodubna nù budi kwó okwo.

²³ Kwnornu nù ogwo ẹrnu mmehie bụ ẹnwu, ọvụ nkesi ke Chiokike bụ bụdnu kwó okwo hite nù Karajisi Jizọsi Nyenwe aị.

7

Nhne atụ ke ọlulu nzi

nù nnwerne

¹ Rụmu nda m, m nookwunu anụ ọka lele ele magwụ Iwu, anụ magwụ nù Iwu jigwu badnụ hne nye wam zị bụdnu.

² Nyerinya nwernu nzi zị n'iwu nga nzi a zị bụdnu, ọvụ ọ bụru nzi a nwụ, ọ zịma iwu jigwu a lele nye zị nù nzi.

³ Ka neegesi, ọ bụru nù nzi a zị bụdnu, nyerinya wam gbọ nzi berere, be jookwu a nye neeme ọyi. Ọvụ ọ bụru nù nzi a nwurnu ọnwu, iwu jigele a, ọ bụru nù ọ gbọru nzi berere. O méne ọyi.

⁴ Rụmu nda m, otu aka wam, bụ kpa ọ zịnu anụ. Anụ nwurnu ọnwu n'Iwu hite n'ẹhni Karajisi. Anụ bụ ke nye wam hiri n'ẹnwu lizo, ma anụ bụru mgwna ẹrnu ke bnarnụ iru n'aka Chiokike.

⁵ Nga a zị bụdnu n'anọ-ẹhni, nhne ojo ke Iwu Mozizi vuyarụ bụ nhne a noosno, kpakara nhne a mernu dubnarnụ aị n'ẹnwu.

⁶ Ọvụ kịtna, a nwernunem ẹhni aị n'Iwu, kwnornu nù a agbụrulam n'iwu wam jigwu aị, a kpenu Chiokike n'apna ikne ke Enine, ọ bụo n'apna ọknani ke Iwu be gbarụ n'ọkwukwo.

Iwu nù mmehie

⁷ Kịni bụ nhne a jookwu? Iwu wam ọ bụ mmehie sa? Óza rịa rịa. Ọvụ iwu mernu m mahịa mmehie. M znégele m amahịa nhne bụ a ọwho-anya ọ bụru n'Iwu kwúle, "I nwéko ọwho-anya."

⁸ Ọvụ mmehie hite nù nhne be nyernu n'iwu nwehịaru oghere ọ kpakne ọwho-anya zị ichne ichne. Kwnornu nù mmehie nwurnu ọnwu hne iwu zịla.

⁹ M zị m bụdnu hne iwu zịla, ọvụ nga nhne be nyernu n'iwu varụ, mmehie ziri bụdnu nù rime m, m nwụma.

¹⁰ Nhne be nyernu n'iwu ke kwesiri o gweya bụdnu, vuyanu m ẹnwu.

¹¹ Mmehie hite nù nhne be nyernu n'iwu duwhuru m, hite nhne be nyernu n'iwu, gbụ m.

¹² Iwu wam zị nsọ, nhne be nyernu n'Iwu zị masị nsọ, ọ zị kwem, ọ zị bụru ọma.

¹³ Ka o neegesi nù nhne bụru ọma vuyanu m ẹnwu? Óza rịa rịa. Ọ bụ mmehie ke kpararụ a. Mmehie gweruru nhne bụru ọma mee a o vuyanu m ẹnwu, ma mmehie whụya iwhe nù ọ bụ mmehie n'ezị. Hite nù nhne be nyernu n'iwu be jeegesi nù mmehie bụo ọma rịa rịa.

¹⁴ A magwụ nù Iwu bụ nhne enine. Ọvụ m bụ m badnụ etekne, nye be reru lele ọhi ke mmehie.

¹⁵ M máam nhne me neeme, kwnornu nù nhne me noopio o mee, m nwé m rikne mee a, ọvụ nhne me píole o mee, bụ nhne me neeme.

¹⁶ Nga me neeme nhne me píole o mee, ka neegesi nù Iwu wam bụru ọma.

¹⁷ Ọvụ ọ bụo me neeme nhne ka, ọvụ ọ bụ mmehie ke wu nù rime m.

¹⁸ M magwụ m nù ọ zá nhne ọma ọbula zị nù rime m (ke bụ n'anọ-ẹhni m). Kwnornu nù ọ naamasị m o mee nhne bụru ọma, ọvụ m nwé m rikne o mee a.

¹⁹ M mé m nhne ọma me pioru o mee, ọvụ nhne bụo ọma me píole o mee, bụ nhne me neeme.

²⁰ Ọ bụru nù me mee nhne me píole o mee, ka neegesi nù ọ bụo me bụ nye neeme a, ọvụ ọ bụ mmehie wam ke wu nù rime m.

²¹ M magwụ m nù iwu nọornu ẹrnu, nga me pioru o mee nhne bụru ọma, nhne ojo zị nù ruwhnu m.

²² Nù rime enine m, m noopio iwu Chiokike.

²³ Ọvụ m nọowhnu iwu berere nọornu ẹrnu nù rime m, iwu ke nọolusi iwu ke ovu ogwnu. O neeme m bụru ọhi iwu ke mmehie ke nọornu ẹrnu nù anọ-ẹhni m.

²⁴ M bụ m badnụ ke nọowhnuji anya. Nyele joodohia m n'anọ-ẹhni ke ẹnwu ka?

²⁵ A nọotunu Chiokike mmamma hite nù Nyenwe aị Jizọsi Karajisi.

Hite n'ẹchiche m, m bụ m ọhi ke iwu ke Chiokike, ọvụ, anọ-ẹhni m bụ ọhi iwu ke mmehie.

8

Budnu hite n'Enine

¹ Kịtna, ọ zá ikpe naama ele zị nù rime Karajisi Jizọsi. *

² Kwnornu nù iwu ke Enine ke neegweya bụdnu nù Karajisi Jizọsi, mernu m whọga n'ọhi iwu ke mmehie nù ẹnwu.

³ Nhne Iwu nwé rikne meli kwnornu nù anọ-ẹhni badnụ zịla rikne, Chiokike mernu a, o ziyaru Nnwọ a lele badnụ ke mmehie ma ọ bụru arịohna mmehie. Hite nù ya ọ ma bụdnu mmehie ke badnụ ikpe.

⁴ Chiokike mernu ka ma nhne ziri ezi ke Iwu zọ ozu nù rime aị ele noowu bụdnu lele kpa Enine noopio, ọ bụo kpa anọ-ẹhni noopio.

⁵ Ele noowu bụdnu n'anọ-ẹhni neeme nhne anọ-ẹhni noopio, ele noowu bụdnu n'Enine neeme nhne Enine noopio.

⁶ Nye anọ-ẹhni nẹchi nwurnu ọnwu, ọvụ nye Enine nẹchi nwernu bụdnu nù udno.

* 8:1 Agwna ọkwukwo ọknani kwuru: ele zá noowu bụdnu lele kpa mmehie pioru, ọvụ lele kpa enine noopio.

⁷ Kwnornu nū nye anọ-ẹhni nẹechi bụ nye irno Chiokike, o nwée rikne b́ta iwu Chiokike, n'ezi, o j́enwe rikne b́ta a.

⁸ Ele anọ-ẹhni nẹechi j́enwe rikne mee nhne j́ooso Chiokike n'ọnu.

⁹ Anọ-ẹhni zá nẹechi anụ, kọvu Enine, ọ b́ru nū Enine Chiokike wu nū rime anụ. Nye ọbula ke nwée Enine Karaįsi, b́to ke Karaįsi.

¹⁰ Ọ b́ru nū Karaįsi zị nū rime anụ, ọ b́ n'ezí nū anọ-ẹhni anụ nwurnu ọnwu kwnornu mmehie, kọvu enine anụ zị b́dnu kwnornu ome mma.

¹¹ Ọ b́ru nū Enine Chiokike ke mernu Jizọsi hi n'ẹnwu lizọ wuru nū rime anụ, nye wam ke mernu Karaįsi hi n'ẹnwu lizọ jeeme anọ-ẹhni anụ ziri b́dnu hite n'Enine a ke wu nū rime anụ.

¹² Kam kpayarụ, rụmu nda m, a jgwu ogwo o wu b́dnu aị, ọ b́to kpa anọ-ẹhni noopio.

¹³ Kwnornu nū ọ b́ru nū anụ wu lele kpa anọ-ẹhni anụ noopio, anụ j́onwu ẹnwu, kọvu ọ b́ru nū anụ jeehi n'enine gbu kpakara ẹnwu ojo ke anọ-ẹhni, anụ jaazị b́dnu.

¹⁴ Kpakara ele Enine Nsọ Chiokike nẹechi b́ru rụmu Chiokike.

¹⁵ Kwnornu nū Enine Chiokike nyernu anụ méne anụ ele ọhi, ke neeme anụ b́ru ele ogwnu. Kọvu Enine neeme anụ b́ru rụmu Chiokike, anụ jeenwe rikne kwnakwu a, "Papa, Nda m."

¹⁶ Enine Nsọ Chiokike naaghanụ enine aị abe nū a b́ rụmu Chiokike.

¹⁷ Ọ b́ru nū a b́ rụmu Chiokike, a b́ ele neekhia mkpe, ele neekhia mkpe Chiokike, ele be nū Karaįsi neekerikọta mkpe. Ọ b́ru a snornu a ta awhnụwhnu, a jooosno a kehia igwugwu a masị.

Igwugwu ke zị nū ruwhnu

¹⁸ M whnurnu m nū awhnụwhnu ke ige ka b́ nhne a j́eji t́sinu igwugwu ke be joo kpumenu aị.

¹⁹ Kpakara nhne be keru eke ji olile anya siri rikne neese nga be jeegesi rụmu Chiokike.

²⁰ Kwnornu nū nhne be keru eke ghọru nhne etekne, ọ b́to nū rikne aka ke be, kọvu kpa Chiokike mernu be, be zị kọriri neele anya,

²¹ nū nhne be keru eke jeenwernu ẹhni be whọga n'ẹhni oro oro, kehia igwe nū o nwernu ẹhni zị igwugwu ke be b́tannu rụmu Chiokike.

²² A magwụ dụ kítna nū kpakara nhne be keru eke nọosnu idne lele nye rime ọmumu nnwọ neeme.

²³ Kọvu ọ b́to nhne be keru eke kpọi, ma aị masị ele nwernu Enine ke b́ nkesi mbọm ke Chiokike, a nọosnu idne nū rime ovu aị,

neese nga Chiokike jeeme a b́ru rụmu a, ma ọ gbahia anọ-ẹhni aị.

²⁴ Kwnornu be znọhiaru aị hite n'olile anya, kọvu ọ b́ru a whnụ nhne a neele anya a, ọ b́ma olile anya n'ezi. Ọ zá nye neele anya nhne ke ọ whnụgwu anya.

²⁵ Kọvu ọ b́ru a neele anya nhne a zá nọowhnu anya, a jeeji nkasi ovu neese a.

²⁶ Kpam masị, Enine Nsọ neeyinu aị aka, ọ b́ ezi nū a zá rikne. Kwnornu nū a máa kpa a jeekpe okpukpe, kọvu Enine Nsọ Chiokike neekpehianu aị, hite n'osnu idne ke ọnu jóokwuli.

²⁷ Kwnornu nū Chiokike nye noonyosna mkpoma badnụ magwụ echiche Enine, ọ b́ Enine Nsọ nọorio arįrio nū risi ele nsọ lele kpa echiche Chiokike jiri zị.

A kakwo ele mmeri

²⁸ A magwụ nū Chiokike neeme kpakara nhne nọornuko ẹnru ọma n'otu kwnornu ele whnurnu Chiokike n'anya, ele o sukwuru ma be mee echiche a.

²⁹ Kwnornu nū ele Chiokike mahiamarnu, ọ b́taru be ichne, ma be nū lele Nnwọ a, ma Nnwọ wam b́ru Ọpnarna n'esilawuru agida rụmu nda.

³⁰ Ele Chiokike b́taru ichne, o sukwuru be, ele o sukwuru, o mee be ele ikpe mámana, ele o mernu ikpe ele mámana, o mernu be kehia igwugwu a.

³¹ Ndaa nhne a jookwu nū kpakara nhne ka? Ọ b́ru nū Chiokike dasị aị n'ikwnu, nyele jeemegidne aị?

³² Nye wam ke b́tala Nnwọ a, kọvu kesi aị ya, ndaa kpa o j́enye aị kpakara nhne?

³³ Nyele jooosno ele Chiokike h́hiaru nhne? Ọ b́ru Chiokike b́ru nye neeme ele badnụ ele ikpe mámana.

³⁴ Nyele b́ru nye naama aị ikpe? Ọ b́to Karaįsi Jizọsi, nye nwurnu ẹnwu, nye hiri n'ẹnwu lizọ, daziri n'akarikwnunga Chiokike nọorionu aị arįrio.

³⁵ Nyele jeekewa aị n'ọwhnun'anya ke Karaįsi? Ọ b́ mkpa, sọbu nhne osi rikne sa, sọbu okne ọkpagbu, sọbu ọknunyo, sọbu ọgba-eto, sọbu aghọm, sọbu ama-ogwnu?

³⁶ Lele kpa be gbarụ a n'okwukwo nsọ, "Kwnornu anụ, ẹnwu neechi aị aka nū ruwhnu kpakara ọbuchi, be nọopnughari aị lele atnurnu be noogbu ogbu."

³⁷ Óza! A nwernu omeri nū kpakara nhne ka hite nū nye wam ke whnurnu aị n'anya.

³⁸ Kwnornu nū m magwụ m nū ẹnwu mọbu b́dnu, mọbu enine izi, mọbu ẹnwu ojo, mọbu nhne ke zị kítna, mọbu nhne ke jaava, mọbu rikne ọbula,

³⁹ mọbu olu mọbu nhne zị nū rime ẹli, mọbu nhne berere be keru eke, j́enwe rikne kewama aị n'ọwhnun'anya ke Chiokike ke zị nū rime Karaįsi Jizọsi.

9

*Chiokike nū ele ke**o hōhoruru*

¹ M nookwu ezi ọka nū rime Karaịsi, ọ bụo aghalaghala, Enine Nso naagbanu ovu m akebne nū m zá m naagha aghalaghala.

² Anya-mini zị m nū mkpoma, nhne igbugbu zị m nū mkpoma kpakara ige.

³ O jaamasị m, ọ bụru nū Chiokike vuru m onu, kewama m nū hne Karaịsi zị, kwnornu rumu nda m, ele ẹli m,

⁴ ele Izireli. Chiokike mernu be bụru rumu a, o okpumennu be igwugwu a, ya nū be gbarū njo-ẹhni, o nyernu be Iwu, be nwernu okpukpe oma, nū kpakara mkwna Chiokike,

⁵ be bụ avnurnu kwu ele nda ọknani, Karaịsi hiri n'avnurnu be va n'anọ-ẹhni. Ọznarni zinu Chiokike ke nechi kpakara nhne ọkwnukokwnu. Amim.

⁶ O bụo nū Chiokike mézule ikwu-onu a, kwnornu nū ọ bụo kpakara ele hi n'avnurnu Izireli bụ rumu Izireli n'ezì.

⁷ Kpakara be bụo rumu Eberham n'ezì, ọ bụbedi nū be hi n'avnurnu Eberham. Kwnornu nū ọkwukwo nsọ kwuru, "Kovu be jọgwnu rumu i hite n'Aziki."

⁸ Ka bụ nū ọ bụo rumu be murnu n'anọ-ẹhni bụ rumu Chiokike, kovu ele be murnu lele kpa Chiokike kweru Eberham nū mkwna bụ rumu a n'ezì.

⁹ Kwnornu nū ka bụ nhne mkwna wam kwuru, "N'ige be karu aka, m jeehiehna, Sera jomu nnwọ rukna."

¹⁰ O bụo ka kpọi, rumu Ribeka nwernu otu nda, ke bụ nda ọknani aị Aziki.

¹¹ Sụ ọ murnu rumu ejima rukna lawuru wam, nga be mége nhne oma mọbu ke ọjo, ma nhne Chiokike kwuru gwuzosi rikne,

¹² ọ bụo hite n'ernu kovu kwnornu nū o sukwu ikwu a, Chiokike kannu Ribeka, "Nye ke okno badnu jeeznenu nye ke matị izi."

¹³ Lele kpa be gbarū a n'okwukwo nsọ, "M whnurnu m Jekọp n'anya, sno Isọ irno."

¹⁴ Ndaa nhne a jookwu? O bụ nū Chiokike bụ nye ndala sa? Óza rịa rịa.

¹⁵ Kwnornu nū ọ kannu Mozizi, "M jododonu nye me jododonu obirizi, obirizi, mee masinu nye masiri m oru."

¹⁶ Ka neegesi nū ọ bụo hite nū nhne badnu noopio mọbu nhne be nọornu, kovu ọ bụ obirizi Chiokike.

¹⁷ Kwnornu nū ọkwukwo nsọ kannu Fero, "Ka bụ nhne me kwno gwuzote i, ma m gesi m iknernema m n'ẹhni i, ma kpakara ọwa mahja rẹwhna m."

¹⁸ Chiokike nọdonu nye masiri a obirizi, neemenu nye o pioru ma o knesni mkpoma, knesni mkpoma a.

Ikpe nū obirizi Chiokike

¹⁹ Otu badnu jaakanu m, "Ndaa kpa Chiokike naama aị ikpe? Nyele nwernu rikne o gwuzogidne echiche a?"

²⁰ Ji badnu etekne, i bụ nyele naasa Chiokike ọka? Nhne be kpuru ọkpụ ọ jaasikwa nye kpuru a ajiji, "I kwno kini kpụ m kpa?"

²¹ O bụ nye nọokpu ite o nwée rikne n'ẹhni otu ọrura wam kpụ ite lawuru, otu bna n'ernu zị okne mkpa, ke berere be ji a rnụ ẹrnu kpakara ige?

²² O zị Chiokike n'aka o gesi ikpe nū ikn-ernema a, kovu, ọ zị kwno a n'aka o gesi ologo ọsnuta ovu n'ẹhni ele o neekpe ikpe, bụ ele ọ bítaru ma ọ la be n'iyi.

²³ O zị masị n'aka a ọ wụkwasi ọkwnamarna igwugwu a nū bụdu ele ọ bítannu obirizi a.

²⁴ Kwnornu nū a bụ ele o sukwuru, ọ bụo hite n'avnurnu ele Ju kpọi, kovu ma hite n'ẹli ele bụo ele Ju.

²⁵ Ka bụ nhne o kwuru n'okwukwo Hosiya, "M jookwu be ele ke m, ele wam bụo ele ke m, ele wam me whnúge n'anya, m jookwu be ele me whnurnu n'anya.

²⁶ O jọbu nū hne be zị kaa, nū be bụo ele ke m, jọbu hne be jookwu be rumu Chiokike ke zị bụdu."

²⁷ "Azaya siri okokoba gbasiri rumu Izireli, kaa,

O bụ n'ezì nū rumu Izireli nū lele rịzna ke ngeri osimini, ele be jọoznohia jaazị matị k'agịda.

²⁸ Kwnornu nū Jihova jeekpebi ikpe ọwa wara wara n'ome mma."

²⁹ Lele kpa Azaya kwuru nū mbom, "O bụru nū Chiokike ke Meli Nhne Dum dónu aị obirizi ghasanu aị agwna rumu, a znernu onu lele Sodom, a znernu onu lele Gómora."

Ele Izireli kwéle o nabnarnu izi oma

³⁰ Ndaa nhne a jookwu? O bụ nū ele bụo ele Ju ele zá noosno ome mma Chiokike, nwehjaru ome mma ke hi n'okwnata mkpoma?

³¹ Kovu ele Izireli, noosno iwu ome mma nwée nhne iwu ome mma karu, be pióhjala a.

³² Kini kpayarū ka? Kwnornu nū be jíge ọtukwasi ovu pio a, kovu lele nū ọ bụ n'ernu. Be dna n'olu rugwu nọokpobi ọchi.

³³ Lele kpa be gbarū a n'okwukwo nsọ, kaa, "Le, m bítaru m otu akaworugwu nū rime Zayoni ke jeeme ele badnu kpọbi ọchi, rugwu ke jeeme be dna.

Kovu nye ọbula ke tukwasiri a mkpoma, be jéekwe iwhnerne tū a."

10

¹ Rumu nda m, nhne noogwmu m nu mkpoma, m neekpe masinu Chiokike gbasiri ele ke m bu Izireli, bu ma be znohia be.

² M jaagbanu be akebe nu be nwegwu mkpoma o kpenu Chiokike, kovu be nwee oghohia.

³ Kwnornu nu be ma ome mma ke Chiokike, be bete noogwuzote ome mma ke be, be bitala ehni be nu mkpururu ome mma Chiokike.

⁴ Karaŋsi bu mbimambi Iwu, nye obula ke tukwasiri a mkpoma, jeenwehia ome mma.

*Oznohia zinu
kpakara badnu*

⁵ Ka bu nhne Mozizi kwuru gbasiri ome mma ke hi n'Iwu, "Nye obula ke bitaru Iwu jaazi budnu nu rime be."

⁶ Kovu ome mma ke hiri n'otukwasi mkpoma karu kpa, "I kwuko nu mkpoma i, 'Nyelejeezne oligwe?' (zne gwedna Karaŋsi).

⁷ Mabu, 'Nyelejeezne nu rime eli?' (zne gwelizo Karaŋsi n'enuw)."

⁸ Kovu ndaa nhne o kwuru? "Ikwu-onu wam zi i ndundu, o zi n'onu i ma n'ovu i." Kam bu ikwu-onu otukwasi ovu ke a nookpo okwo.

⁹ O buru nu i jeeji onu i kwuhia nu Jizosi bu Nyenwe ai, gweru mkpoma i kweru nu Chiokike mernu o hi n'enuw lizo, be jooznohia i.

¹⁰ Kwnornu nu badnu ji ovu a kweru, be gwnusi a nu nye ikpe mana, o ji onu a kwuhia, o nwehia oznohia.

¹¹ Okwukwo nsq kwuru kpa, "Iwhnerne za nootu ele kwnataru a ovu."

¹² O za nhne zi ichne hne nye Ju nu nye buo nye Ju zi. Chiokike bu Nyenwe kpakara badnu, nowukwasi ngozi a nu risi ele naakwnaku a.

¹³ Kwnornu nu be jooznohia kpakara ele noosukwu rehna Nyenwe ai.

¹⁴ Kovu ndaa kpa be joosukwu a, o buru nu be kwela nu ya? Ndaa kpa be jeekweru, o buru nu be nuna nhne gbasiri a sa? Mabu ndaa kpa be joonu, hne o za nye nookpo okwo izi oma?

¹⁵ Ndaa kpa be jooke okwo hne o za nye ziznenu be? Lele kpa be gbaru a n'okwukwo nsq, kaa, "Le kpa ochi be marnu mma bu ele neezni izi oma."

¹⁶ Kovu, o buo kpakara be kweru izi oma wam, kwnornu nu Azaya karu, "Nyenwe ai, nyele kweru izi a ziri?"

¹⁷ Ka neegesi nu okwata mkpoma jeehi nu onurnu izi oma va, onurnu jeehi n'okpo okwo izi oma Karaŋsi.

¹⁸ Kovu m neesikwa, o bu ezi nu be nuna izi oma wam? Be nurnu a. Lele kpa okwukwo nsq kwuru,

"Nkoli be gazuru kpakara owa,

ikwu-onu be duru hne owa sotoru."

¹⁹ M neesikwa kwno, o bu nu ele Izireli ma? Mozizi n'iwuhuru a beru osno kaa, "M jeeji ele mba o za nhne be bu mee anu nwe anya-kwu, m jeeji mba ke nwee akoniche kpasu anu iwe."

²⁰ Azaya kwusiri a rikne kaa, "Ele za noopio m, piohjaru m, m mernu m ele za neesikwa ajji gbasiri m whnu m anya."

²¹ Ka bu nhne o kwuru gbasiri Izireli, "Kpakara obochi, m gbasaru m aka m lawuru o kwubnanya ele risi rikne nu ele za noobno nsni."

11

Chiokike ghasala ele ke a

¹ M sika kwno, o bu nu Chiokike ghasaru ele ke a sa? Oza! Ma n'iwuhuru m bu nye Izireli, ke avnurnu Ebereham, eriri ruwho Benjamini.

² Chiokike ghasala ele ke a o mahiamarnu nu mbom. Anu magwu nhne okwukwo nsq kwuru nu hne Elajia naariasno Chiokike megidne Izireli,

³ "Nyenwe ai, be gburu ele owhnurninya i, be kwnadna ojo arjohna i, me nu nsnunu m gwnarnu, be noopio o gbu m."

⁴ Kini bu nhne Chiokike kannu a? "M bitannu m ehni m pokwu ele rukna esau, ele kponna Balj risi eli."

⁵ Kpam masi, n'ige ka, Chiokike, hite n'oru a hohiaru ele ke gwnarnu.

⁶ Kwnornu nu o bu oru a, o buo n'enu, o buru nu o bu hite n'enu, oru bua oru.

⁷ Kini kwno? Ele Izireli piohjala nhne be noopio, kovu ele wam o hohiaru piohjaru a, ovu kporu ele berere bekwnu.

⁸ Lele kpa be gbaru n'okwukwo nsq, kaa, "Chiokike nyernu be enine iwhnirniwhno be nweru anya, kovu be whnu osno, be nweru nsni, kovu be nu nhne, du tna."

⁹ Devidi karu, "Iri ri be ghq mbita nu nhne joogbu be, be dna n'olu a, ta awnhnuwhnu.

¹⁰ Isni kpu be, be whnu osno, ivu rinya nyigbu be okwnukokwnu."

Oznohia ele buo ele Ju

¹¹ M neesikwa, ele Izireli be darnu ma be la n'iyi sa? Oza rja rja. Kwnornu nu mmehie be, ele buo ele Ju nwehjaru oznohia, ke jeeme ele Izireli nwe anya-kwu.

¹² O buru nu mmehie be mernu kpakara owa nwe ngozi, be darnu mboni ma ele buo ele Ju nwehja ngozi, kpakara owa jeenwe agida ngozi nga be jeekweru nu Karaŋsi.

¹³ M nookwunu anu oka kina ele buo ele Ju. Hne me bu nye izi ele buo ele Ju, m jeeji ernu m kpa nganga.

¹⁴ Nyele ma, m nwernu rikne mee ele eli m nwe anya-kwu, ma m nwernu m rikne znoghia agwna be.

¹⁵ Kwnornu nu nga Chiokike ghasaru be, kpakara owa nu Chiokike mernu udno. Kini jeeme nga Chiokike jookwubnanya be? O jobu nu ele nwernu onwu jaazi budnu.

¹⁶ O buru nu mpekele bredi mbom be nyernu Chiokike zi nsq, kpakara ke gwnarnu zi nsq. O buru nu egwnugwnu isisi zi nsq, kpakara nkala a zi masi nsq.

¹⁷ O buru nu be o gbukwahalaru agwna nkala olivu, be gweru anu bu nkala olivu ohia nyakwnusi a, anu neeri nhne oma ke hi n'isisi olivu wam.

¹⁸ Anu menu nkala wam oknomokno, chenwanya nu o buo anu vu egwnugwnu, kovu egwnugwnu vugwu anu.

¹⁹ Kovu kwu kpa, "Be gbukwahalaru nkala isisi gweru aj nyakwnusi."

²⁰ Owe! Be gbukwahalaru be kwnornu nu be kwé ekwe, kovu, anu gwuzo kwnornu nu anu tukwasiri ovu. Anu vulizo ehni anu olu, trunuma, anu tu ogwnu.

²¹ Kwnornu nu o buru nu Chiokike gharula o ta nkala isisi olivu ke ruhjaru awhnwuhnu, o jaagharu o ta anu awhnwuhnu.

²² Le mkpoma oma nu nhne rikne ke Chiokike, nu o mesiri ele dnarnu adna rikne, kovu o donu anu obirizi, o buru nu anu jaadazigidne nu mkpoma oma a. O buru nu anu jaadazigidne nu mkpoma a, o joogbukwahala anu.

²³ O buru nu ele Ju jeehi n'okwe ekwe be whuya, Chiokike jaanyakwnusi be berere, kwnornu nu Chiokike nwernu rikne o nyakwnusi be.

²⁴ Anu bu nkala isisi olivu ohia, be Chiokike nyakwnusiri n'ehni isisi olivu be znurnu oznu, lele kpa o kwésile. O buru nu Chiokike mernu kpa, anu mahia nu o nwernu rikne nyakwnuhnasi nkala isisi olivu be znurnu oznu n'ehni isisi olivu kam be zi.

Obirizi Chiokike zinu kpakara badnu

²⁵ Rumu nda m, o nwernu nhne omimi me noopio anu mahia, ma anu gharu eche nu anu bu ele akó n'anya anu. Nhne omimi kam bu nu risi rikne rumu Izireli jaazi okwnukokwnu. Kovu o jaazi tem onu egwnugwnu ele buo ele Ju ele jaavakwnusi Chiokike zute.

²⁶ Kpam masi, be jooznoghia kpakara ele Izireli, lele kpa be gbaru a n'okwukwo nsq, "Nye Oznohia jeehi nu Zayoni va, o joovume kpakara mmehie rumu Jekopu.

²⁷ Me nu be jaagba njo-ehni, nga me vumernu mmehie be."

²⁸ Ele Ju bu ele irno izi oma. Ka bu mbarna ke anu ele buo ele Ju. Kovu be bu ele o hohiaru, whnu be n'anya kwnornu ele nda be oknani.

²⁹ Chiokike za naagbanwo echiche a n'ehni ele o hohiaru, gozi masi.

³⁰ Hne anu ele buo ele Ju zi, anu bnoge Chiokike nsni nu mbom, kovu kitna, anu nwernu obirizi Chiokike kwnornu ele Ju ele bnoge nsni.

³¹ Kpam masi, anu nwehjaru obirizi Chiokike mernu ele Ju bnoge Chiokike nsni ma be nwehja masi obirizi Chiokike.

³² Kwnornu nu Chiokike mernu kpakara ele badnu buru ele risi rikne ma be nwehja obirizi a.

Oznarni zinu Chiokike

³³ A! Le kpa ekwnu nu akoniche nu nhne omuma Chiokike hna omimi.

Kpa a nwée rikne nyosna a echiche a, badnu nwée rikne piohali apna a.

³⁴ "Nyele magwu mkpoma Nyenwe ai? Nyele nwernu rikne zni a ezni?"

³⁵ "Nyele nyeleru Chiokike nhne, ma Chiokike kwu a ogwo?"

³⁶ Ya keru kpakara nhne, kpakara nhne ke zi bu ke a, ya nwe kpakara nhne. Ozarni zinu a okwnukokwnu. Amim.

12

Budnu nye ernu Chiokike

¹ Rumu nda m, kam kpararu, m ji m obirizi Chiokike naarjasno anu, anu gweru ehni anu yisi n'aka Chiokike lele arjohna zi budnu, zi nsq, ke nooso Chiokike n'onu, bu ke anu kwannu Chiokike n'ezi.

² Anu nuko lele ele owa ka, kovu Chiokike gbanwo echiche anu ma o ziri ikne ikne, ma anu mahia nhne bu echiche Chiokike, echiche oma a, ke nooso a n'onu, ke zuru ozu.

³ Kwnornu nu oru Chiokike nyernu m, me kanu anu, o za nye vullizo ehni a olu n'oriri a karu kpa o kwesiri, kovu anya dno anu nu risi n'okpe ehni anu ikpe. Anu gweru okwnata ovu Chiokike tusinnu anu kpe ehni anu ikpe.

⁴ Lele kpa a nwernu agida nhne ke zi ehni, ke obula nwernu ernu ke a.

⁵ Kpam masi, o bu n'ezí nu a zi agida, a bu otu nu rime Karaísi, be knekotaru ai n'otu lele nhne zi odo nu odo n'otu ano-ehni.

⁶ Nye obula nwernu nkesi ke a lele kpa oru Chiokike nyernu a. O buru nu nkesi otu badnu bu whnu owhnurninya, nye wam gweru otukwasi ovu mee a.

⁷ O buru nu nkesi a bu o zne izi, o zne a, o buru o zni nhne, o zni nhne.

⁸ O buru o gba ele badnu inwe, o mee kpam. Nye nekesi ele berere nhne, o mee a nu mkpoma oma, nye noodu ele badnu,

o rnyisi erna a rikne. Nye nọdo obirizi, o gweru mkpoma oma mee a.

Iznizni gbasiru

Qwhnun'anya

⁹ Qwhnun'anya kwesiri o zi snam. Anụ sno nhne ojo irno, anụ knekwaru nhne oma aka rikne.

¹⁰ Anụ gweru qwhnun'anya rụmu nda whnụ ibne anụ n'anya nụ rime Karaịsi, anụ sobisinu ibne anụ karu ẹhni anụ.

¹¹ Anụ bụo ele ime mgwu, anụ rnyisi erna rikne, anụ gweru mkpoma zi snam neez-nenu Nyenwe aị ịzi.

¹² Anụ nwudna n'olile anya, anụ snuta mkpoma nụ rime okpagbu, neekpe okpukpe kpakara ige.

¹³ Anụ nụ ele nwée nhne kerita ẹkwnu anụ, anụ lekota ele izne.

¹⁴ Anụ nọgozi ele naakpagbu anụ, anụ nọgozi, anụ vuko be onu.

¹⁵ Anụ snornu ele nnonwudna onwudna, nwudnahoru, anụ snornu ele naagba mkpe, gba mkpe.

¹⁶ Nhne gbasiri ele berere metu anụ nụ mkpoma. Anụ buko ele oknomokno, anụ snornu ele ovu duru ẹli meko nhne. Anụ bụo ele ako n'anya anụ.

¹⁷ Anụ jiko nhne ojo kwu nye mernu anụ nhne ojo ogwo. Anụ mee nhne buru oma n'anya ele badnu.

¹⁸ Anụ nụ kpakara ele badnu ziri n'udno, o buru nụ o kwe omume, kpa anụ nwernu rikne.

¹⁹ Ele me whnuru n'anya, anụ megwnarnu, kovu gharu onuma Chiokike rny erna a, kwnornu nụ okwukwo nso kwuru, nụ Nyenwe aị kwuru, "Mawa nwe mmegwahia, m jeemegwnarnu."

²⁰ Kovu lele nhne okwukwo nso kwuru, "O buru nụ wiri nọogwu nye irno i, nyee a wiri,

o buru nụ akpiri nọokpo a bekwnu, kwute a mini, o nwornu,

kpam, i naaghakwasị esekere bekwnu n'olu risi a."

²¹ Anụ kwé nhne ojo megbu anụ, kovu anụ gweru nhne oma megbu nhne ojo.

13

Mkpururu ele ochichi

¹ Nye obula bita ẹhni a nụ mkpururu ochichi, kwnornu nụ o zá ele nechi ochichi ke Chiokike bitala, Chiokike bitaru kpakara ele nechi ochichi.

² Nye obula ke neemegidne ochichi neemegidne nhne Chiokike bitaru, nye mernu kpm jeegweyanu ẹhni a ikpe.

³ Ele neeme nhne oma zá nọtụ ogwu ele ochichi, kovu ele neeme nhne ojo jootu ogwu. I pioru ogwu ele nechi ẹchi gharu o tu i? Mee nhne buru oma, be jaaznari i.

⁴ Kwnornu nụ o bu nnwo izi Chiokike neeme nhne oma. Kovu o buru nụ i mee nhne ojo, ogwu a tu i, kwnornu nụ o vule ama-ogwu a etekne. O bu nnwo izi Chiokike, neemegwahianu a ovu owe ẹhni a n'ẹhni ele neeme nhne ojo.

⁵ Kam kpayarụ, i joobno nsni ele ochichi, o buo kwnornu nụ ovu owe ẹhni Chiokike kpai, kovu kwnornu nụ mkpoma i.

⁶ Ke bu anụ jootu ntụ-eli, kwnornu nụ ele ochichi bu rụmu izi Chiokike nornu erna zinu be, ele ji kpakara ige be nechi ochichi.

⁷ Anụ kwu ogwo anụ ji be, tu ntụ-eli o buru anụ ji ogwo ntụ-eli, tu ntụ ahia o buru nụ anụ ji ogwo ntụ ahia, so nye kwesiri anya, bisinu nye kwesiri.

Whnụ ibne anụ n'anya

⁸ Anụ ji nye obula ogwo, kovu anụ whnrita ẹhni anụ n'anya. Nye obula ke nọwhnu badnu ibne a n'anya mezuru Iwu.

⁹ Iwu wam, "I meko oyi, i gbuko badnu, i znuko buznu, i nweko qwho-anya." Ka nụ kpakara iwu berere jikogwu aka n'otu iwu ka, "Whnụ nye agbatibi i n'anya lele ẹhni i."

¹⁰ Nye obula ke whnuru nye agbatibi a n'anya jeeme a nhne ojo. Qwhnun'anya bu o mezu kpakara Iwu.

¹¹ Anụ mee kpa, anụ magwu nhne ige ka bu. Ka bu ige anụ jeetnanya n'anyarna, kwnornu nụ oznohia aị zi ndundu kitna karu nga a kweru nụ mbom.

¹² Chi jiminem, chi obubo zi masi ndundu, a gharu erna ochichiri, woru mgwana ogwu ke iwhne.

¹³ Ngwa ma a kpa agwa lele ele zi n'iwhne ke obochi, o buo ele okne iriri nụ ele era manya naagba, o buo nụ nhne rune nụ nhne tu iwhnerne, o buo olu ogwu, nụ anya-kwu.

¹⁴ Kovu anụ woru Nyenwe aị Jizosi Karaịsi lele iwo, anụ nyee anọ-ẹhni anụ oghere o mee nhne ojo ke nọogwu a.

14

Anụ kpé rụmu nda anụ

ikpe

¹ Anụ kwubnanya nye zá rikne nụ okwnata ovu, kovu anụ nụ a dogbuta kwnornu nhne o kweru.

² Okwnata ovu otu badnu kweru a, o ri kpakara nhne, kovu nye berere, okwnata ovu a zá rikne, neeri okwukwo ohia kpai.

³ Nye ke neeri kpakara nhne ledna nye zá neeri anya, nye zá neeri kpakara nhne kpé nye neeri kpakara nhne ikpe kwnornu nụ Chiokike nakweruru a.

⁴ I bu nyele ke neekpe ohi nye berere ikpe? O bu nyenwe a jaakaa ma o mekwahjaru mbu o mekwahjala. O jeemekwahja, kwnornu nụ Nyenwe aị jeeme a o gwuzoru kwem.

⁵ Otu badnu karu otu obochi zi mkpa k'agida n'esilawuru obochi berere, nye berere jaakaa nu kpakara obochi bu otu. Echiche nye obula ji a ruwaho.

⁶ Nye karu nu otu obochi zi mkpa k'agida neeme a n'osobisinu Nyenwe ai, nye neeri nhne obula n'osobisinu Nyenwe ai, kwnornu nu o n'otunu Chiokike mmamma nu wiri wam. Nye za neeri agwna nhne n'osobisinu Nyenwe ai, n'otunu Chiokike mmamma.

⁷ O za nye zinu ehni a budnu kpoi, o za nye ngonwunu ehni a enwu.

⁸ O buru nu a zi budnu, a zinu Nyenwe ai budnu, a nwurnu enwu, a nwunu Nyenwe ai, ma a zi budnu ma a nwurnu onwu, a bu ke Nyenwe ai.

⁹ Kwnornu nu Karaishi nwurnu, hi n'enwu lizo ma o buru Nyenwe ele zi budnu nu ele nwurnu onwu.

¹⁰ Jiwa, i kwno kini neekpe nnwo nda i ikpe? I kwno kini neeedna nnwo nda i anya? Kpakara ai joogwuzo nu ruwahu ngadna ikpe Chiokike.

¹¹ Lele kpa be gbaru a n'okwukwo nsq, "Nyenwe ai kwuru kpa, 'Kpa me zi budnu kpakara mpnerne ochi joogbunu m n'eli, kpakara riro jookwupiya nu mawa bu Chiokike.'"

¹² Kpakara ai n'otu n'otu jaakahia nhne a mernu nu ruwahu Chiokike.

¹³ A gharu o kpe ehni ai ikpe, tnunuma, i bita nhne jookpo nnwo nda i ochi, m'obu nhne jeeme o dna.

¹⁴ M magwu m nu hite nu mmekorita ke me nu Nyenwe ai Jizosi, o za nhne ke zila richna, o buru nu badnu kaa nu otu wiri zila richna, o zila richna hne o zi.

¹⁵ O buru nu nhne i riri jeemekasi nnwo nda i ehni, i za neezne izne n'owhnuun'anya. I kweko nhne i riri lulu nye Karaishi kwnornu nwu enwu.

¹⁶ I kweko be kaa nu nhne oma i bu nhne ojo.

¹⁷ Kwnornu nu eli-eze Chiokike buo nhne oriri nu onwunwo, kovu o bu ome mma, udno nu snarnima nu rime Enine Nsq.

¹⁸ Kwnornu nu nye neeznenu Karaishi zi kpa neeme nhne n'ososo Chiokike n'onu ma nu ruwahu ele badnu.

¹⁹ Ngwa ma a neeme nhne jeegweya udno, nu ke joowuli ai olu lele oro.

²⁰ I kwno wiri lulu eru aka Chiokike. Kpakara wiri zi richna, kovu o buo oma o ri nhne jeeme badnu dna.

²¹ O buru oma i gharu o ri wiri, m'obu nwu manya, m'obu mee nhne obula ke jeeme nnwo nda i dna.

²² Kpakara nhne i kweru nu rime nhne ele ka, dazinum ji nu Chiokike. Nye ikpe mage nu nhne o kweru bu nye owa oma.

²³ Kovu o buru nu mkpoma badnu marnu a ikpe nu nhne o riri, Chiokike jaama a ikpe ma o ri a, kwnornu nu o kwnatala mkpoma nu nhne o neeme. Nhne obula ke hige n'okwnata mkpoma bu mmehie.

15

Mee nhne jooso ele berere

n'onu

¹ Ai ele zi rikne nu okwnata mkpoma kwe-siri o vuru ekperi ele za rikne. O buo neeme nhne n'ososo ai n'onu.

² Nye obula menu badnu ibne a nhne buru oma, ke jooso a n'onu, ma o wulizo a olu lele oro.

³ Kwnornu nu Karaishi mene nhne jooso ehni a n'onu, lele kpa be gbaru a n'okwukwo nsq, "Nhne iwahnerne ele naakpasi i iwahnerne dnakwasiri m."

⁴ Kpakara nhne be gbaru n'okwukwo nsq n'obochi wheru ewhe zinu ai, neezni ai nhne, ma a nwernu olile anya hite n'ndidi nu ogba inwe ke okwukwo nsq nyernu ai.

⁵ Chiokike ke neenye ndidi nu ogba inwe mee anu nwernu enine oziri n'otu kpa anu noosno Karaishi Jizosi,

⁶ ma kpakara anu n'otu jeegweru otu onu znarni Chiokike nu Nda Nyenwe ai Jizosi Karaishi.

⁷ Anu kwubnanya ibne anu lele kpa Karaishi kwubnanyarnu anu ma anu znarni Chiokike.

⁸ M naakanu nu Karaishi ghoru nnwo izi ele Ju ma o gesi ezi oka Chiokike, mezu mkwana o kweru nda be oknani,

⁹ ma ele buo ele Ju nyee Chiokike igwugwu kwnornu obirizi a, lele kpa be gbaru a n'okwukwo nsq,

"Ka bu nhne me kwno znarni i n'esilawuru ele buo ele Ju, m joogwununu rewhna i eri."

¹⁰ O kaa, berere, "Anu snornu rumu Chiokike nwudna, anu ele buo ele Ju."

¹¹ O kaa, berere, "Anu ja Nyenwe ai, kpakara ele buo ele Ju, kpakara ele badnu gwnunu a eri ozarni."

¹² Berere kwno, Azaya karu, "Otu Badnu jeehi n'eburnu Jesi va, o jeelizo chi kpakara mbam, ele buo ele Ju jeelekwasi a anya."

¹³ Kitna, Chiokike ke olile anya gweru ovu oso nu udno mejite okwnata mkpoma anu nu rime a, ma olile anya anu nooso oso hite nu rikne Enine Nsq.

Polu nye izi ele buo ele Ju

¹⁴ Rumu nda m, m magwu m nu nhne oma zi nu mkpoma anu. Anu magwu kpakara nhne ka nkaru nkaru, ke jeeme anu nwernu rikne neeznitaru ehni anu nhne.

15 M ji m anya siri rikne gbanu anu okwukwo, ma anu chenwanya agwna nhne, kwnornu nu oru Chiokike nyernu m.

16 Chiokike mernu m nye izi Karaishi Jizosi, nye nonnunu ele buo ele Ju ernu, nye naakwa arjohna, nonkpo okwo izi oma Chiokike, ma ele buo ele Ju buru nhne arjohna Chiokike jeejweru, ke Enine Nso bitaru nso.

17 Kam kpayaru, m ji m ernu m naanya risi nu rime Karaishi Jizosi nhne gbasiri Chiokike.

18 M jookwu nhne berere karu nhne Karaishi mernu hite n'aka m, o duru ele buo ele Ju be buru ele noobnonu Chiokike nsnii hite n'ikwu-onu m nu ernu m.

19 Hite nu rikne nhne ogba akebne nu ernu ndu-ehni ke Enine Chiokike hite nu Jeruselem du Ilirikom, m nonkpo okwo izi oma gbasiri Karaishi n'apna zuru ozu.

20 O bu nhne zi nu mkpoma m o zni izi oma hne be nuna nhne gbasiri Karaishi, ma m gharu m o wu oro n'olu ntu-eli oro nye berere.

21 Lele kpa be gbaru a n'okwukwo nso, "Ele be kannu be nhne gbasiri a jowhurnu, ele nuna nhne gbasiri a joghohia."

22 Kam kpayaru, be kwéle me wakwnusi anu.

*Polu marnu mmuma
o zne Rom*

23 Kovu kitna, o za nhne me jorunu nu kpakara eli ka, o nonogwnu m o whnu anu anya agida awha ka.

24 M jeeme kpa kitna, m jowhnu anu kpa me neezne Sipeni. Anu jeeyinu m aka n'izne m, ma me nu anu dazikwole ige matj.

25 Kovu kitna, m neezne Jeruselem kwnornu ele ke Chiokike zi pji.

26 Kwnornu nu o masiri ogbako Chiokike ke zi nu Masidonia nu Akaya o gweya nhne be jeekesi ele mboni zi n'esilawuru rumu Chiokike ke zi nu Jeruselem.

27 O masiri be o yinu be aka, kovu ezi oka zi a bu ka, o bu ernu zimu be o yinu ele mboni wam aka, kwnornu nu ele Ju nu ele buo ele Ju neekerita ngozi ke enine, ele buo ele Ju kwesiri o kesi ele Ju ngozi ke ekwnu be.

28 Nga me nrukaru ernu ka, nyega be nhne be tuhianu, m jowhnu anu nga me neezne Sipeni.

29 M magwu m nu nga me jaava, m jeeji agida ngozi Karaishi va.

30 M naarjasno anu, rumu nda m, hite nu Nyenwe aj Jizosi Karaishi nu owhnun'anya ke Enine Nso, anu snornu m kpesi okpukpe rikne nu ruwhnu Chiokike kwnornu nhne me nonwhnu.

31 Anu kpe okpukpe ma be dokia m n'aka ele kwé ekwe zi nu Judiya, ma ele Chiokike zi nu Jeruselem nabarnu ernu m n'esilawuru be,

32 ma hite n'echiche Chiokike, m jeeji snarnima wakwnusi anu, ma me nu anu dazirikota nu mkpoma oma.

33 Chiokike ke udno dazinu kpakara anu. Amim.

16

Obekwu ikwu Polu

1 M neegesi anu nwene aj rinya Febi, ke nonnunu ogbako Chiokike ke zi nu Kenkiria ernu.

2 Anu bikno nabnanya a nu rewhna Nyenwe aj lele kpa rumu Chiokike kwesiri, anu yisinu a aka nu nhne obula zi mkpa, kwnornu nu o bu nye ovu oma neeyinu agida ele berere aka ma me masi.

3 Anu bekwu Prisila nu Akwila, ele ernu ibne m, ele me nu be sno nonnunu Karaishi Jizosi ernu.

4 Be gweru budnu be bita nu nhne oze budnu nu risi m, m nonntu be mmamma, o buo me nu nsnunu m kpoi, kovu kpakara ogbako Chiokike zi n'eli ele buo ele Ju nonntu masinu be mmamma.

5 Anu bekwu ogbako Chiokike zi n'oro be. Anu bekwu enyi m me whnurnu n'anya Epenetusi, nye mbom ke hi n'Esia kweru nu Karaishi.

6 Anu bekwu Meri nye rnunu anu agida ernu.

7 Anu bekwu Andronikusi nu Juniasi, ele Ju ibne m me nu be zi n'ikelu, be bu ele badnu marnu nkarj nkarj n'esilawuru ele izi, be beru m osno mahia Karaishi.

8 Anu bekwu Ampilatusi, nye me whnurnu n'anya nu rime Nyenwe aj.

9 Anu bekwu Uribanusi nye ernu ibne aj n'ernu Karaishi, nu Sitakisi enyi oma m.

10 Anu bekwu Apelesi nye be kparu iru, o whe nu Karaishi.

Anu bekwu ezi-nu-oro Arisitobulosi.

11 Anu bekwu Erodioti nye Ju ibne m. Anu bekwu ele ezi-nu-oro Nakisosi, ele zi nu rime Nyenwe aj.

12 Anu bekwu Terifena nu Terifosa ele ernu nu rime Nyenwe aj, nu nye me whnurnu n'anya bu Pesis nye ernu nu rime Nyenwe aj.

13 Anu bekwu Rufosi, nye ernu Nyenwe aj hohiaru. Anu bekwu nne a, nye bu masi nne m.

14 Anu bekwu Asikiritosi, Filegoni, Hemisi, Patirobasi, Hemasi nu kpakara rumu nda anu nu be zi.

15 Anu bekwu Filologosi nu Julia, nu Nerusi nu nwene a rinya, nu Olimpasi nu kpakara rumu Chiokike be nu be zi.

16 Anu gweru obekwu ikwu nso ke rumu nda bekwurita ehni anu. Kpakara ogbako Chiokike neebekwu anu.

Ezni ipne-aznu Polu

¹⁷ Rụmu nda m, anụ bikno, anya dū anụ ẹli gbasiri ele neegweya okewa nū naakpahie ọkwnata oву ele badnū anya, ele neezni nhne ke neemegidne iznizni anụ nahiaru. Anụ neeze be.

¹⁸ Kwnornu nū ele nū kpam zá nọornunu Karaịsi ẹrnu, kọvu rụwho be. Hite n'ọnu biri biri be nū ọka sọ n'ọnu, be nooduwu ele zị snam nū mkpọma.

¹⁹ Kpakara ọhna nurnu obno nsni anụ, ke mernu mkpọma sọ m n'ọnu k'agida kwnornu anụ. Kọvu m pioru m anụ buru ele nwernu akoniche hne nhne ọma zị, ele ikpe mana hne nhne ojo zị.

²⁰ N'ige matị Chiokike ke udno jọozogbu Ekwensu nū mkpururu ọchi anụ. Oru ke Nyenwe aị Jizọsi dazinu anụ.

²¹ Timoti nye ẹrnu ibne m neebekwu anụ, ya nū Lusọsi, nū Jasoni nū Sọsipata ele Ju ibne m.

²² Mawa, Tetiọsi, nye gbarụ ọkwukwo ka neebekwu anụ nū rime Nyenwe aị.

²³ Gayọsi nye me zị n'oro a, nye ọgbako Chiokike zị n'oro a, neebekwu anụ. Ọchi-ịwai ọhna bụ Erasitosi nū nwene aị rukna Kwatusi neebekwu anụ. [

²⁴ Oru ke Nyenwe aị Jizọsi Karaịsi dazinu kpakara anụ. Amim.]

²⁵ Ọznarni zinu Chiokike nye nwernu rikne mee anụ gwuzoru lele kpa izi ọma me neezni kwuru, nū ọkpo okwo Jizọsi Karaịsi, lele kpa okpume nhne gwnarnū agwna ke zị omimi ogologo ige wheru ewhe.

²⁶ Kọvu be kpumernu a hite nū nhne ele ọwhnurninya gbarụ n'ọkwukwo hite n'iwu Chiokike zị ọkwnukokwnu. O mernu kpakara mbam mahia, ma be kweru bnonu a nsni.

²⁷ Ọznarni zinu Chiokike nye nū nsnunu a bụ nye akọ hite nū Jizọsi Karaịsi ọkwnukokwnu. Amim.

**Ọkwukwo izi
ke Mbọm
Pọlu gbaznenu
Ele Kọrinti**

Nhne gbasiri ọkwukwo izi ka

Ọkwukwo izi Pọlu gbaznenu ele Kọrinti ke mbọm neelebna anya nù bụdnu nù ọkwunata mkpọma ke nye Karaịsi. O nookwu ọka gbasiri mkpa ke zị nù ọgbako Chiokike ke zị nù Kọrinti ke Pọlu miteru. Nù ige wam, Kọrinti bụ ẹli-ọhna ke zị mkpa n'ẹli Giriisi, ke bụ risi ọchichi ẹli Rom n'ọdoru-ẹli wam. Ele ẹli ka bụ ele be marnù rẹwhna be n'ahịa, ele mkpakọ, nù ele agwa ọjọ, ele nọkponu chi zị ichne ichne risi ẹli.

Pọlu nookwu gbasiri okewa nù agwa ọjọ ke zị nù rime ọgbako Chiokike pij. O kwuru nhne gbasiri bụdnu ọgbako Chiokike nù okpukpe, olizọ n'ẹnwu, ọlulu nzi nù nnwerne. O kwuru nù Izi Ọma nwernu ọsisa kpakara ajiji ele ka.

Nù risi 13, Pọlu gesiri nù ọwhnun'anya bụ ngọzi ke kakwo mma Chiokike nyernu ele badnù.

Nhne zị n'ọkwukwo izi ka

Ọpanizo (1:1-9)

Okewa nù rime ọgbako (1:10--4:21)

Agwa ọma nù bụdnu ezi-nù-ọro (5:1--7:40)

Ele Karaịsi nù ele naakwa rẹnwu (8:1--11:1)

Bụdnu ọgbako nù okpukpe Chiokike (11:2--14:40)

Olizọ n'ẹnwu Karaịsi nù ke ele kweru ekwe (15:1-58)

Nkesi ele Karaịsi nye ele zị nù Judiya (16:1-4)

Mmụma Pọlu nù okwukwo (16:5-24)

¹ Mawa, Pọlu, nye Chiokike sukuru hite n'echiche ma ọ bụru nye izi Karaịsi Jizọsi nù nnwọ nda aị Ọsitenisi,

² naagbaznenu anù, ọgbako Chiokike ke zị nù Kọrinti ọkwukwo. Anù bụ ele Chiokike sukuru ma anù be bụru ele ke a zị nsọ nù Karaịsi Jizọsi, anù nù kpakara ele zị nù hne ọbala be nọkpokwu rẹwhna Nyenwe aị Jizọsi Karaịsi, Nyenwe be nù Nyenwe aị.

³ Oru nù udnọ ke Chiokike Nda aị nù Nyenwe aị Jizọsi Karaịsi dazinu anù.

Otu mmamma

⁴ M nọotunu Chiokike m mmamma ige ọbala nù risi anù, o nyernu anù oru hite nù Karaịsi Jizọsi.

⁵ O mernu anù ba aba nù rime Karaịsi nù kpakara nhne, ma nù ikwu-ọnu nù nhne ọmuma anù.

⁶ Izi gbasiri Karaịsi gwuzosiri rikne nù rime anù.

⁷ Kam kpayarù, ọ zá nkesi ke enine kọgwu anù kpa anù neese ige be jookpume Nyenwe aị Jizọsi Karaịsi.

⁸ O jeeme anù gwuzoru kwem dū ọsoto, ma anù bụru ele nwée ọru n'ọbochi Nyenwe aị Jizọsi Karaịsi.

⁹ Chiokike, nye sukuru anù ma anù nù Nnwọ a Jizọsi Karaịsi Nyenwe aị nwekọta nhne, bụ nye kwesiri ọkwunata ovu.

Okewa nù rime

ọgbako Chiokike

¹⁰ Rumu nda m, m ji m rẹwhna Nyenwe aị Jizọsi Karaịsi naarjasno anù, anù bikno, anù kwekọrita n'otu nhne anù nookwu, okewa zọma n'esislawuru anù. Anù ziri n'otu n'echiche ma nù nhne anù neeme.

¹¹ Rumu nda m, agwana ele hi n'ezi-nù-ọro Kilo kannù m kpa o dnornu m anya, nù okno ọka zị n'esislawuru anù.

¹² Ka bụ nhne me naakaa, otu badnù naakaa, "M bụ m ke Pọlu," nye berere kaa, "M bụ m ke Apọlosi," nye berere kwno kaa, "M bụ m ke Pita," nye berere masi kaa, "M bụ m ke Karaịsi."

¹³ Be kewarù Karaịsi sa? Be kpogidnenu Pọlu n'olu ọgba kwnornu anù? Be wuru anù mini nù rẹwhna Pọlu sa?

¹⁴ M nọotunu Chiokike mmamma nù ọ zá nye me wuru mini kwekọlam Kirisiposi nù Gayosi.

¹⁵ Ọ zá nye jaakaa si nù me wuru a mini nù rẹwhna m.

¹⁶ (Owe, m wuru m ezi-nù-ọro Stefanasi mini, be gweme kpam, m máam ma m wuru m nye berere mini.)

¹⁷ Karaịsi ziyage m me wu mini, kovu o zni izi ọma. Ọ bụo hite n'ikwu-ọnu ke akoniche badnù, ọ zị ẹnwu Karaịsi n'olu ọgba bụru nhne etekne.

Karaịsi bụ akoniche

nù iknernema Chiokike

¹⁸ Kwnornu nù izi gbasiri ọgba bụ nhne etekne hne ele nọonwu ọnwu zị, kovu hne ele be nọoznohia zị, ọ bụ iknernema Chiokike.

¹⁹ Be gbarù a n'ọkwukwo nsọ, kaa,

"M joolulu akoniche ke ele akọ, tuwhu ọghohia ke ele marnù nhne."

²⁰ Ndaa hne nye akọ zị? Ndaa hne nye okne ọkwukwo zị? Ndaa hne nye agirigo ke ọwa ka zị? Chiokike mernu akoniche ke ọwa bụru nhne iwhnirniwhno.

²¹ Kwnornu nù hite n'akoniche Chiokike o kwéle ọwa mahia nye ọ bụ hite n'akoniche ke ọwa. Ọ sọru Chiokike n'ọnu o hite n'iwhnirniwhno ke ọkpo okwo izi ọma znọhia ele kweru ekwe.

²² Ele Ju noopio nhne elekema, ele Giriki noopio akoniche.

²³ Kovu a nọkpo okwo nù be kpogidnenu Karaịsi n'olu ọgba, ke bunu ele Ju rugwu

ọkpobi ọchi, hne ele bụo ele Ju zi, ọ bụ nhne iwahnirniwhno.

²⁴ Kọvu hne ele Chiokike sukwuru zi, ele Ju ma ele bụo ele Ju, Karaịsi bụ iknerna Chiokike nụ akoniche Chiokike.

²⁵ Kwnornu nụ iwahnirniwhno Chiokike kakwo akoniche ke badnụ, rikne ọgwugwu Chiokike kakwo iknerna ke badnụ.

²⁶ Rụmu nda m, anụ chenwanya nhne anụ bụ sụ Chiokike sukwuru anụ. Agida anụ bụ ele ọwa karu nụ be nwée akoniche, agida anụ bụ ele ọwa máa, agida anụ bụ ele híge ezi-nụ-oro eze whya.

²⁷ Kọvu Chiokike hōhiaru nhne iwahnirniwhno ke ọwa ma iwahnerne tū ele akọ. Chiokike hōhiaru nhne ele ọwa karu nụ ọ zīla rikne ma iwahnerne tū ele zī rikne.

²⁸ Chiokike hōhiaru nhne ele ọwa lednarnụ anya nū nhne zá nhne ọ bụ, mee nhne ke be kwuru nhne buri nhne etekne.

²⁹ O mernu ka ma badnụ ọbula gharu o mee oknomokno nū ruwhnu Chiokike.

³⁰ Chiokike mernu anụ nū Karaịsi Jizōsi buri otu, nye burunu aī akoniche nū rime Chiokike. Ya bụ ome mma aī nū ọzi nsọ aī nū ọgbahia aī.

³¹ Lele kpa be gbaru a n'okwukwo nsọ, “Nye ọbula ke jeeme oknomokno, o mee oknomokno nū nhne Nyenwe aī rnurnu.”

2

Izi ọma gbasiri Karaịsi nū ọgba a

¹ Rụmu nda m, nga me vakwnusiri anụ, m jile m okne ọka mọbu akoniche ke badnụ va kpọ okwo nhne tugwaru otugwa ke Chiokike.

² Kwnornu nū m píole m ọ marnu nhne ọbula kpa me nū anụ zi, kwekọlam nhne gbasiri Jizōsi Karaịsi, nye be kpogidnenu n'ọgba.

³ M jī m óza rikne nū ogwnu nū ẹhni ọznu biri biri va.

⁴ Nhne me znirni nū izi m bụo hite nū nkarị ọka ke akoniche ke badnụ, kọvu o gesi Enine nū iknerna a n'esilawuru anụ,

⁵ ma anụ buri ele kweru ekwe, ọ bụo kwnornu nū akoniche ke badnụ, kọvu n'iknerna Chiokike.

Akoniche Chiokike

⁶ Kọvu n'esilawuru ele sozuru osozu bụ hne a nookwu ọka akoniche, ọ bụo akoniche ke ọwa ka, mọbu ke ele nēchi ọwa ka. Ige matị, ọ zá nhne be jọbu.

⁷ A nookwu nhne gbasiri akoniche Chiokike ke tugwaru otugwa, ke Chiokike hōhiaru kwnornu igwugwu aī tūtu sū ọwa panjōru.

⁸ Ele ọchichi ke ọwa ka máa akoniche ka. Kwnornu nū ọ buri nū be marnu a, be bọ kpogidene Nyenwe igwugwu n'olu ọgba.

⁹ Kọvu kpa be gbaru a n'okwukwo nsọ,

“Anya whnūlele,
nsnī nūlele,

ọ bnána n'ovu badnū rja rja,

nhne Chiokike b̄tannu ele whnurnu a n'anya.”

¹⁰ Kọvu Chiokike hiri n'Enine a kpumenu aī nhne o tugwaru otugwa, kwnornu nū Enine noonyosna kpakara nhne, ma nhne miri emi ke Chiokike.

¹¹ Ọ zá nye magwū echiche ke mkpoma badnū, o kwolem enine ke zī nū rime badnū. Kpam masi, ọ zá badnū ke magwū echiche Chiokike, okwolem Enine Chiokike magwū kpakara nhne gbasiri Chiokike.

¹² A nāhage enine ke ọwa ka, kọvu a nahjuru Enine Chiokike ziyaru ma a mahja kpakara nhne Chiokike hiri n'ovu ọma a kesi aī.

¹³ Ka bụ nhne a nookwu, ọ bụo hite nū nhne ke badnū znirni aī nū akoniche ke badnū, kọvu nhne Enine znirni aī. A nọkowa ezi ọka ke enine hne ele nwernu Enine Chiokike zī.

¹⁴ Badnū ke nwée Enine Chiokike nwée rikne kweru nhne hi n'Enine Chiokike va, kwnornu nū be buri a nhne iwahnirniwhno, o nwée rikne nahja be kwnornu nū Enine Chiokike nọkowanu ele nwernu Enine.

¹⁵ Badnū ke nwernu Enine Chiokike neekpe kpakara nhne ikpe, kọvu ọ zá nye jeekpe a ikpe.

¹⁶ Lele kpa be gbaru a n'okwukwo nsọ,

“Nyele magwū echiche Nyenwe aī,
ma nye wam zni a ezni?”

Kọvu a nwernu echiche ke Karaịsi.

3

Ele ọnu Chiokike

¹ Rụmu nda m, m nwée m rikne kwunu anụ ọka lele ele nwernu Enine, kọvu m nookwunu anụ ọka lele badnū etekne, lele rụmu takiri nū rime Karaịsi.

² M jeeji mini-rẹma nọoznu anụ, ọ bụo wiri siri rikne, kwnornu nū anụ jēnwe rikne ri be. Tem dū k̄t̄na, anụ nwée rikne ri wiri siri rikne.

³ Anụ zī k̄riri n'anọ-ẹhni, kwnornu nū okwno-awụwa nū okno ọka zī n'esilawuru anụ, ka ọ zá neegesi nū anụ zī n'anọ-ẹhni? Anụ neeme lele badnū etekne.

⁴ Otu badnū naakaa, “M bụ m ke Pọlu.” Nye berere kaa, “M bụ m ke Apọlosi.” Anụ zá neeme lele badnū etekne?

⁵ Nyele bụ Pọlu? Nyele bụ Apọlosi? A bụ ele ọnu, ele anụ hiri n'aka be kweru. Nye ọbula nọornu ọnu ke Nyenwe aī nyernu a.

⁶ Mawa kpasiri mkpuru, Apọlosi wusi a mini. Kọvu Chiokike mernu mkpuru wam so oso.

⁷ Nye wam kpasiri mkpuru nū nye wam wusiri a mini bụ nhne etekne. Chiokike zị mkpa kwnornu nū ọ bụ ya mernu mkpuru wam so oso.

⁸ Nye wam kpasiri mkpuru nū nye wam wusiri a mini bụ otu. Nye ọbula jaanarnū ọgwọ ẹrnu a lele kpa ẹrnu a hna.

⁹ Kwnornu nū aị nū Chiokike nọornuko ẹrnu n'otu, anū bụ ẹkwu Chiokike. Anū bụ ọro Chiokike noowu.

¹⁰ Hite nū oru Chiokike nyernu m, m nọornu ẹrnu lele nye nka-owu ọro. M tūru m ntū-ẹli ọro, nye berere noowukwasị ọro n'olu a. Kọvu anya dū nye noowu ọro n'olu a ẹli.

¹¹ Kwnornu nū ọ zā ntū-ẹli berere badnū jeenwe rikne tū, kakwo ke Chiokike tūru, ke bụ Jizosi Karaịsi.

¹² Ọ bụru nū badnū ọbula jeeji golu, mọbu siliva, mọbu akaworugwu zị okne ọnu ahia, mọbu isisi, mọbu rụhiara, mọbu isisi ikpa wukwasị ọro n'olu ntū-ẹli ka,

¹³ ẹrnu a jọowhuya iwhne, kwnornu nū ọbochi Karaịsi jookpume a. Be jeeji bẹkwnu kpa ẹrnu nye ọbula iru, bẹkwnu jeegesi nhne nye ọbula jiri wu ọro a.

¹⁴ Ọ bụru nhne badnū jiri wu ọro n'olu ntū-ẹli wam gwuzogidne bẹkwnu, ọ jaanahia ọgwọ ẹrnu.

¹⁵ Kọvu ọ bụru nū bẹkwnu rne ẹrnu a, nhne whuru a, kọvu be jọoznohia a, kọvu lele nye hi nū bẹkwnu whuya.

¹⁶ Anū máa nū anū bụ Ọro Nsọ Chiokike, nū Enine Chiokike wu nū rime anū?

¹⁷ Ọ bụru nye ọbula lulu Ọro Nsọ Chiokike, Chiokike joolulu a. Ọro Nsọ Chiokike zị nsọ, anū bụ Ọro Nsọ a.

¹⁸ Ọ zā nye dukhie ẹhni a, ọ bụru nū nye ọbula neeche nū o nwernu akọ nū nhne ke ọwa ka, ọ ghọ nye iwhnirniwhno ma ọ bụru nye nwernu akoniche.

¹⁹ Kwnornu nū akoniche ke ọwa ka bụ nhne iwhnirniwhno n'anya Chiokike. Lele kpa be gbaru a n'okwukwo nsọ, "O jidnernu ele akọ n'aghigbo be."

²⁰ Be gba kwno a n'okwukwo nsọ, kaa, "Nyenwe aị magwū echiche ele akọ nū ọ bụ nhne etekne."

²¹ Ọ zị badnū ke ji nhne badnū etekne nwernu rikne mee nyaa risi. Kwnornu nū kpakara nhne bụ ke anū,

²² Pọlu mọbu Apolosi, mọbu Pita, ọwa ka, bụdnu nū ẹnwu, nhne zị kịtna mọbu ke zị nū ruwhnu, kpakara be bụ ke anū,

²³ anū bụ ke Karaịsi, Karaịsi bụ ke Chiokike.

4

Ele izi Karaịsi

¹ Ele badnū kwesiri ọ gwnū aị lele ele izi Karaịsi, ele Chiokike nyernu nhne tugwaru otugwa ke ezi ọka a n'aka.

² Nhne be pioru n'aka nye neelegidne nhne ọbula bụ be whnū a nū ọ bụ nye kwesiri ọkwonata ovu.

³ Nhne anū nookwu gbasiri m zā m mkpa, mọbu ikpe nye berere neekpe m, m jéekpe ẹhni m ikpe.

⁴ Ovu m zị snam, kọvu ka zā neegesi nū m bụ m nye ikpe mána. Nyenwe aị bụ nye neekpe m ikpe.

⁵ Kam kpayarū, anū kpé nhne ọbula ikpe hne ige yooduge, seru tem Nyenwe aị va, o jeeme kpakara nhne tugwaru otugwa n'ochichiri whuya iwhne. Ọ jaakahia kpakara nhne zị n'ovu badnū. Ige wam nye ọbula jaanahia ọznarni a n'aka Chiokike.

⁶ Rụmu nda m, m gweru m kpakara nhne ka tūsinu ẹhni m nū ẹhni Apolosi kwnornu anū, ma anū jiri aị mụhia nhne ele badnū nookwu, "Ọ zā nye mee nhne be gbáge n'okwukwo." Ọ zā nye ji otu badnū nyaa risi megidne ibne a.

⁷ Nyele mernu i, i ziri ichne hne ele berere zị? Kini bụ nhne i nwernu ke be késige i? Ọ bụru nū nhne i nwernu bụ nkesi, ndaa kpa i jeeji a nyaa risi lele nū ọ bụo nkesi?

⁸ Kịtna, rụwho jihjaru anū. Anū balam aba. Anū ghọlam eze, ọ bụ n'ezi a bụo ele eze. Ọ jaama mma ọ bụru nū anū bụ ele eze, ma a snornu anū bụru masị eze.

⁹ M che m nū Chiokike heteru aị ele izi aznū, lele ele be joogbu ogbu, nhne olekiri nyee ọwa, ma hne ele enine izi nū hne ele badnū zị.

¹⁰ A bụ ele iwhnirniwhno kwnornu Karaịsi, kọvu anū bụ ele nwernu akọ nū Karaịsi. A nwée rikne, kọvu anū nwernu rikne. Be lednarnū aị anya, kọvu anū nwernu igwugwu.

¹¹ Tem dū kịtna, wiri nọogwnu aị, akpịri nọokpo aị bẹkwnu, a gba ẹto, be mejoru aị, a nwée hne a bita risi.

¹² A nọodogbu ẹhni aị n'ẹrnu, a ji aka aị nọornu nhne a neeri. Be nọovu aị ọnu, a nọogozị, nga be kpagburu aị, a snuta ovu.

¹³ Nga be kpajaru aị, a ji ovu ọma sa ọka. A nū lele nhne mkpomkpo ke ọwa ka, tem dū kịtna, ele ọwa kwúge aị nhne ọbula.

¹⁴ M zā m naagba ọkwukwo ka ma iwhnerne tū anū, kọvu ma m zni m anū ezni lele rụmu ke m me whnurnu n'anya.

¹⁵ Kwnornu nū ọ bụru nū anū nwernu nri pokwu ele noodu anū nū rime Karaịsi, anū nwernu otu nda. M bụ m nda anū nū rime Karaịsi Jizosi kwnornu nū m gweyanū m anū izi ọma.

¹⁶ M naarijasno anū snornu ẹnu ọchi m.

¹⁷ Kam kpayarū, me neeziyanu anū Timoti. Ọ bụ nnwọ m me whnurnu n'anya ke kwesiri be kwnata a ovu nū rime Nyenwe aị. Ọ jeechenwanyanu anū kpa me noowu bụdnu m nū rime Karaịsi Jizosi, kpa me

neezi nū rime kpakara oḡbako Chiokike ke zī nū hne ọbula.

¹⁸ Agwna anū bụ ele oknomokno, anū neeche nū m jáava lekwa anū.

¹⁹ Ọ bụru nū Nyenwe aị kweru, m jaava kwnusi anū wara wara, m jaamahia nhne ele oknomokno wam jeeme. Ọ bụo nhne be jookwu kpọi, ma rikne be nwernu masị.

²⁰ Kwnornu nū ẹli-eze Chiokike bụo n'agida ikwu-ọnu kpọi, kọvu iknernema.

²¹ Ndaa nhne anū pioru? Me gweru mbịmbini va, sū ọ bụ ovu ọwhnun'anya nū enine zī wọhnerne?

5

Anū gweme nnwọ nda ke zila richna

¹ M ọọnu nū ome oyi zī n'esilawuru anū, ke zila n'esilawuru ele máa Chiokike, nū badnū nookwuru nnwerne nda a.

² Ndaa kpa anū neeme oknomokno nū kpa? Anū kwesiri ọ kwna ẹkwna, nwe ovu ojo, anū kwesiri ọ chíhala nyerukna ke mernu nhne ka n'esilawuru anū.

³ Ọ bụ n'ezi m zī m ikere hne anū zī n'anọ-ẹhni, kọvu me nū anū zī n'enine, m marnū m nye mernu nhne ojo ka ikpe lele nū me nū anū zī.

⁴ Kpa anū gbakoru nū rewhna Nyenwe aị Jizọsi, m joosno anū gbakọ n'enine, rikne Nyenwe aị Jizọsi jaadazinu aị masị.

⁵ Anū gweru nye wam yisi n'aka Ekwensu ma o lulu anọ-ẹhni a, ma be znọhia enine a n'ọbochi Nyenwe aị.

⁶ Anū méma oknomokno, kwnornu nū nhne whū brẹdi matị neeme kpakara brẹdi whū ọwhu.

⁷ Anū gweme mmehie ke nū lele nhne whū brẹdi ọknani ma anū ziri richna. Nga wam, anū jọonu lele brẹdi ikne ke nwée nhne whū brẹdi, lele kpa anū kwesiri. Kwnornu nū be jiri Karaisi Nnwọ Atnurnu Ọgawhe aị kwanu aị arjohna.

⁸ Ngwa ma a bīta Iriri ka, ọ bụo hite nū nhne whū brẹdi ke mmehie ọknani nū risi rikne, kọvu brẹdi ke nwée nhne whū brẹdi nū rime a, brẹdi ke zī richna ke nwernu ezi ọka nū rime a.

⁹ M gbannū m anū ọkwukwo, anū nū ele neeme oyi mékọta nhne.

¹⁰ M zá m nookwu gbasiri ele neeme oyi k'ọwa, ele ọwho-anya nū ele buznu nū ele naakwa renwu. Ọ bụru kpm, anū jọowhoga n'ọwa.

¹¹ Kọvu m naagbanū anū kītna, naakaa, anū nū nye ọbula ke kwuru ẹhni a nnwọ nda, kọvu o neeme oyi, ke nwernu ọwho-anya, nye naakwa renwu, mọbu nye naakaja badnū, nye okne manya, mọbu nye buznu mékọta nhne. Anū nū nye wam dázikota ẹli ri wiri.

¹² Ọ zá m mkpa me kpe ele zī n'ederezi ikpe. Ọ bụo anū kwesiri o kpe ele zī n'esilawuru anū ikpe?

¹³ Chiokike jeekpe ele zī n'ederezi ikpe. Lele kpa ọkwukwo nsọ kwuru, "Anū chíhala badnū ojo wam n'esilawuru anū."

6

O kwuru badnū zne ọro ikpe

¹ Ọ bụru nū otu badnū nwernu nhne megidne nnwọ nda, i ga ọla gba nnwọ nda i ọkwukwo n'oro ikpe, ele máa Chiokike kpe be ikpe, tnunuma, o jookwuru a zne n'esilawuru rumu Chiokike?

² Anū máa nū rumu Chiokike jeekpe ọwa ikpe sa? Ọ bụru nū anū jeekpe ọwa ikpe, anū nwée rikne kpe ikpe ọka matị n'esilawuru anū?

³ Ọ bụ nū anū máa nū a jeekpe ele enine izi ikpe? Ọ kọ bụru nhne ke budsona.

⁴ Ọ bụru nū ọka dnarnū ke gbasiri budsona ka, kīni mernu anū neekwe ele zī n'ederezi kpe anū ikpe? Ele ikpe ka bụ ele nwée ọso anya n'ogbako Chiokike.

⁵ Iwhnerne tū anū. M kweru m nū otu badnū ke nwernu akoniche zī n'esilawuru anū, nye jeenwe rikne kpe ikpe n'esilawuru rumu nda.

⁶ Tnunuma, otu nnwọ nda jookwuru nnwọ nda berere zne n'oro ikpe ma ele kwé ekwe kpe be ikpe.

⁷ Anū naagbari ẹhni anū ọkwukwo n'oro ikpe, ka neegesi nū anū dnarnū adna. O jáaka mma nū i bụ nye be mejọru? Ọ jáaka mma nū nhne whunahọru i?

⁸ Tnunuma, anū neeme ibne nhne ojo, anū znunahoru nnwọ nda anū nhne.

⁹ Ọ bụ nū anū máa nū ele ojo jéekheja ẹli-eze Chiokike? Anū dúwhu ẹhni anū, ele naagba ewhere, mọbu ele naakwa renwu, mọbu ele neeme oyi, ele rukna naadnanyi ele rukna ibne be,

¹⁰ mọbu ele buznu, mọbu ele ọwho-anya, mọbu ele okne manya, mọbu ele naakaja badnū, mọbu ele nọghogbu ele badnū jéekheja ẹli-eze Chiokike.

¹¹ Agwna anū nū kpm nū mbom. Kọvu be snumarnu mmehie anū, be gweru anū nyewhete n'aka Chiokike. Be mernu anū nū Chiokike ziri n'udno hite nū rewhna Nyenwe aị Jizọsi Karaisi nū Enine ke Chiokike aị.

Kwasinu Chiokike igwugwu

¹² "M nwernu m rikne mee kpakara nhne." Kọvu ọ bụo kpakara nhne naabna mbnarna. "M nwernu m rikne mee kpakara nhne." Kọvu m jọobu ọhi nhne ọbula.

¹³ "Wiri zinu rụwho, rụwho zī masinu wiri." Kọvu Chiokike joolulu kpakara be. Be jéji ẹhni badnū neeme oyi, kọvu kpenu Nyenwe

aj, Nyenwe aị jeeme ẹhni badnụ nwehija nhne zị mkpa.

¹⁴ Chiokike nye mernu Nyenwe aị hi n'ẹnwu lizọ, o jeeme masị anọ-ẹhni aị hi n'ẹnwu lizọ hite n'iknerna a.

¹⁵ O bụ nụ anụ máa nụ ẹhni anụ bụ nhne zị n'ẹhni Karaịsi? M jeegweru nhne zị n'ẹhni Karaịsi mee be bụru nhne zị n'ẹhni nyerinya ewhere? Óza rịa rịa.

¹⁶ O bụ nụ anụ máa nụ nye gweru ẹhni a yisi n'ẹhni nye ewhere, ya nụ a gholam otu anọ-ẹhni? Kwnornu nụ okwukwo nsọ kwuru, "Be lawuru jọburu otu anọ-ẹhni."

¹⁷ Kọvu nye gweru ẹhni a yisi nụ Nyenwe aị, ya nụ Nyenwe aị gholam otu n'enine.

¹⁸ Anụ gbanahọru ome ọyi. Kpakara mmehie berere badnụ mernu zị n'ọlu ẹhni, kọvu nye neeme ọyi megidnernu ẹhni a mmehie.

¹⁹ O bụ nụ anụ máa nụ ẹhni anụ bụ Oro Nsọ ke Enine Nsọ, nye wu nụ rime anụ, ke Chiokike nyernu anụ? Anụ nwée ẹhni anụ, Chiokike nwe anụ.

²⁰ O jiri ọnu ahịa gbahija anụ. Anụ gweru ẹhni anụ kwasịnu Chiokike igwugwu.

7

Ajji gbasiri olulu nzi nụ nnwerne

¹ Nhne gbasiri nhne anụ gbarụ n'okwukwo, "O bụru ọma nụ nyerukna nụ nyerinya dnányi lele nzi nụ nnwerne."

² Kọvu kwnornu nụ agịda ele neeme ọyi zị n'esilawuru anụ, o bụru ọma nyerukna obula luru nnwerne ke aka a, nụ nyerinya gbọru nzi ke aka a.

³ Nyerukna obula mee nhne kwesiri a lele nzi hne nnwerne a zị, nyerinya obula mee nhne kwesiri a lele nnwerne hne nzi a zị.

⁴ Nnwerne nwée rikne hne ẹhni a zị, kọvu nzi nwernu, kpam masị nzi nwée rikne hne ẹhni a zị, kọvu nnwerne a nwernu.

⁵ Anụ gónahoru ẹhni anụ ẹhni anụ, okwolem ma o bụ ige matị kpa anụ kwekotaru, ma anụ wu ọnu nụ kpe okpukpe. Omekwo, anụ ziri n'otu berere ma Ekwensu gharu o rna anụ ọrnarna, kwnornu nụ anụ nwée rikne jikwaru ẹhni anụ.

⁶ Ka bụ rikne me neenye anụ, o bụo iwu.

⁷ N'ezị ọka, o jaamasị m nụ kpakara badnụ jaadazị lele me. Kọvu nye obula nwernu nkesi ke Chiokike kesiri, otu nyenum kpa, nye berere nkesi berere.

⁸ Kịtna, m naakanụ ele lúge nnwerne mọbu ele gbóge nzi, mọbu ele rinya nzi be nwurnu, o jaaka mma anụ daziri etekne, lele kpa me daziri.

⁹ Kọvu o bụru nụ anụ jéenwe rikne jikwaru ẹhni anụ, anụ luru nnwerne mọbu gbọru nzi. O ka mma o luru nnwerne mọbu gbọru nzi, tñnuma ẹhni anụ jeerne bẹkwu.

¹⁰ Ele nwernu nzi mọbu nnwerne, m neenye anụ iwu Nyenwe aị, o bụo ke m. Nnwerne gbákwadia nzi a nnam.

¹¹ Kọvu, o mee kpam, o jaadaziri etekne mọbu o lahna ke nzi a, nzi gbákwadia nnwerne a nnam.

¹² M naakanụ ele ke gwnarnụ, o bụo Nyenwe aị, o bụru nụ nye Karaịsi obula nwernu nnwerne ke kwé ekwe, kọvu o kweru ya nụ a wugidne, o gbála a nnam.

¹³ O bụru nụ nyerinya Karaịsi obula nwernu nzi ke kwé ekwe, kọvu nzi a kweru ma be wugidne n'otu, o gbála a nnam.

¹⁴ Kwnornu nụ Chiokike nabanyarnụ nzi ke kwé ekwe kwnornu nnwerne a ke kweru ekwe. Chiokike naabanyarnụ nnwerne ke kwé ekwe kwnornu nzi a ke kweru ekwe. O bụru nụ o bụo kpam, rụmu takiri anụ jọburu ele zila rịchna, kọvu be zị nsọ kịtna.

¹⁵ Kọvu o bụru nụ o masị nye ke kwé ekwe o gba nnam, o mee kpam. O zá iwu ke ji nye Karaịsi, nzi mọbu nnwerne, n'ọnodi nụ kpa. Chiokike sukwuru aị ma a wuru n'udno.

¹⁶ Ndaa kpa i jiri mahija, jị nnwerne ke kweru ekwe, nụ i jọoznohia nzi i? Mọbu jị nzi ke kweru ekwe, ndaa kpa i jiri mahija nụ i jọoznohia nnwerne i?

Daziri n'ọnodi Chiokike sukwuru i

¹⁷ Kọvu nye obula daziri n'ọnodi o zị nga Chiokike sukwuru a, bụ ke Chiokike nyernu a. Ka bụ nhne me neezni nụ rime kpakara ogbako Chiokike.

¹⁸ O bụru nụ nye be kparụ nka nurnu ikwu Chiokike, o gwépuke nhne atụ ọkpa nka a. O bụru masị nụ nye be kpáge nka nurnu ikwu Chiokike, be kpála a nka.

¹⁹ Ọkpa nka nụ be kpáge nka zá nhne o bụ, nhne zị mkpa bụ obita iwu Chiokike.

²⁰ Badnụ obula daziri n'ọnodi o zị nga Chiokike sukwuru a.

²¹ I zị n'ohi nga Chiokike sukwuru i? O mékpa i ẹhni, kọvu o bụru nụ i nwernu oghere o whọga n'ohi, mee kpam.

²² Kwnornu nụ nye bụ ohi nga Nyenwe aị sukwuru a bụ nye nwernu ẹhni a nụ rime Nyenwe aị. Kpam masị, badnụ ke nwernu ẹhni a nga Nyenwe aị sukwuru bụ ohi Karaịsi.

²³ Chiokike jị ọnu ahịa gbahija anụ, anụ ghóko ohi ke badnụ.

²⁴ Rụmu nda m, badnụ obula daziri n'anya Chiokike n'ọnodi o zị nga Chiokike sukwuru a.

Ele nwée nzi mọbu nnwerne

²⁵ Nhne gbasiri ele rinya máa nyerukna, mọbu ele rukna máa nyerinya, m nwée m nhne Nyenwe aị nyernu n'iwu, kọvu m

neenye anụ nhne bụ echiche m, nye hite n'obirizi ke Nyenwe aị m kwesiri m ọtukwasi ovu.

²⁶ Mkpa karilam n'owa kịtna, m che m nụ ọ bụru oma ọ bụru nụ badnụ daziri kpa ọ zi.

²⁷ Ọ bụru nụ ị nwernu nnwerne? Ị ghásala a. I nwéé nnwerne sa? Ị lúko nnwerne.

²⁸ Ọ bụru nụ ị luru nnwerne ọ zá mmehie i mernu. Ọ bụru nyerinya máa nyerukna gbọ nzi, ọ zá nhne ojo ọ bụ. Kọvu ele nwernu nnwerne mọbu nzi jeenwe agida mkpa n'owa ka, m noopio ọ dọhia anụ nụ nhne ka.

²⁹ Rumu nda m, nhne me nookwu bụ ka, ige wam zị ndundu, hite kịtna ele nwernu nnwerne ziri lele nụ be nwéé nnwerne,

³⁰ ele naakwna ẹkwana lele nụ be zá n'anyamini, ele nọomu rumu lele nụ ovu zá nọoso be n'onu, ele nọozo ahịa lele nụ ọ zá nhne be zūhiaru,

³¹ ele ji nhne ọwa ka lele nụ ọ zá be mkpa. Kwnornu nụ ọwa ka n'ọnodi a jaagawhe.

³² M noopio ma nhne ọbula gharu ọ kpakna anụ ẹhni. Nyerukna ọbula ke nwéé nnwerne neeche echiche gbasiri ẹrnu Nyenwe aị, kwnornu nụ o piuru o mee nhne jaamasị Nyenwe aị.

³³ Kọvu nyerukna ke nwernu nnwerne neeche echiche gbasiri nhne ke ọwa ka, kwnornu nụ o piuru o mee nhne jaamasị nnwerne a,

³⁴ ke nọdoghari a n'apna lawuru. Nyerinya ke nwéé nzi mọbu ke máa nyerukna neeche echiche gbasiri ẹrnu Nyenwe aị, kwnornu nụ o piuru o gweru ẹhni a nụ enine a nye Nyenwe aị. Kọvu nyerinya ke nwernu nzi neeche echiche gbasiri nhne ke ọwa ka, kpa o jeeme nhne jaamasị nzi a.

³⁵ M nookwu nhne ka ma ọ bnanu anụ iru. M zá m noobnosni anụ. Kọvu m piuru m ma anụ mee nhne bụru oma nụ ke kwesiri ekwesi, ma anụ gweru kpakara ẹhni anụ yisi n'ẹrnu Nyenwe aị, gharu o le anya n'aznụ.

³⁶ Nhne ke gbasiri ele kwekotaru ọlulu, ọ bụru nụ badnụ ọbula whnurnu nụ ọ zá naakpakwa agwa nkari hne nyerinya o kweru ọ lụ zi, ọ bụru n'awha neezne, ọ luru a, be mége mmehie.

³⁷ Kọvu hne badnụ kpebiri n'ovu a, ọ zá nye naamadigne a nụ ọ jọolu nnwerne, o nwernu rikne gharu ọ lụ nnwerne wam, o mernu nhne kwesiri.

³⁸ Nye ke luru nnwerne mernu nhne oma, kọvu nye ke lúge rịa rịa mekakworu nụ nhne oma.

³⁹ Nyerinya gbọru nzi zị n'iwu kpa nzi a zị budsonu, kọvu hne nzi a nwurnu, ọ zá iwu ji a ma ọ gbọru nzi berere. Kọvu ọ jọbu nye magwu Nyenwe aị.

⁴⁰ Kọvu n'echiche m, ovu jọoso a n'onu ọ bụru ọ daziri etekne. M che m nụ m nwernu m Enine Chiokike.

8

Wiri be jiri kwanu

renwu arjohna

¹ Nhne ke gbasiri wiri be jiri kwanu renwu arjohna, ọ bụ n'ezi nụ, "Kpakara aị nwernu nhne omuma." Kọvu nhne omuma neegweya badnụ vulizo ẹhni a olu. Qwhnun'anya noowulizo badnụ olu lele ọro.

² Ọ buri nụ badnụ ọbula neeche nụ ọ magwu nhne, ọ máa kpa o kwesiri ọ mahia.

³ Kọvu Chiokike magwu ele whnurnu a n'anya.

⁴ Nhne gbasiri wiri be jiri kwanu renwu arjohna, a magwu nụ ọ zá nhne renwu ke ọwa ka bụ, kwnornu nụ chi berere zá, okwolem Chiokike kpọi.

⁵ Ọ buredi nụ agida nhne be nookwu "chi" zị n'oligwe mọbu n'owa, ọ bụ n'ezi nụ be zị agida "chi" nụ "nyenwe."

⁶ Kọvu hne a zị, otu Chiokike kpọi nye bụ Nda. O keru kpakara nhne, a zinu a budsonu. Otu Nyenwe aị Jizosi Karaịsi zị, nye be hiri n'aka a ke kpakara nhne, nye a zị budsonu n'aka a.

⁷ Kọvu ọ búo kpakara badnụ magwu ezi ọka ka. Agwna badnụ yiri risi nụ renwu dū kịtna, nga be riri wiri kị, be neeche nụ be ji a kwanu renwu arjohna. Echiche ovu be zá rikne, wiri be riri kparu be.

⁸ Kọvu wiri jéeme aị nụ Chiokike ziri ndundu. A rife wiri, ọ zá nhne o neegweme n'ehni aị, a ri wiri ọ zá nhne o neeyisi ẹhni aị.

⁹ Kam kpararu, anya dū anụ ẹli, i kwékwadia oghere i nwernu nụ ome kpa ọ masiri ị mee ele zá rikne n'okwnata ovu dnabna nū mmehie.

¹⁰ Ọ buri nū otu badnū ke mkpoma sile rikne whnurnu i hne ị dazị ẹli neeri wiri n'oro renwu, kwnornu nū i nwernu "nhne omuma," o jéanye a mkpoma siri rikne o ri nhne be jiri kwanu renwu arjohna?

¹¹ Nnwọ nda wam zá rikne, nye Karaịsi kwnornu nū a nwuma, joowhu etekne kwnornu nū nhne omuma ị.

¹² Kpam, anụ mehieru nnwọ nda anụ wam zá rikne, lulu ovu a, anụ mehielel Karaịsi masi.

¹³ Ọ buri nū wiri me jeeri jeeme nnwọ nda m mmehie, m jéeri ọkpna rịa rịa kpa me zị budsonu, ọ zị me mee nnwọ nda m dnabna nū rime mmehie.

9

Rikne nū ẹrnu ke nye izi

¹ Ọ bụ nū m nwéé m ẹhni sa? Me búo nye izi sa? Me whnúge Jizosi Nyenwe aị anya? Anụ búo nhne me rnūhiaru n'ẹrnu Nyenwe aị?

² Ọ buri nū ele berere whnúge m lele nye izi, anụ magwu nū m bụ m nye izi. Anụ

bụ nhne atụ ke neegesi nù m bụ m nye izi Nyenwe aị.

³ Nhne me naakanụ ele nookwulu m bụ ka,

⁴ a nwée rikne ri wiri mọbu nwọ mini n'ernu aị sa?

⁵ A nwée rikne mee nhne ele izi berere neeme? A nwée rikne luru otu nnwọ rinya Karaịsi lele nnwerne, o snornu aị zne izi lele ele izi ele berere nù rụmu nne Nyenwe aị nù Pita?

⁶ Okwokọla me nù Banabasị kwesiri ọ rnu ernalu sị a ri wiri?

⁷ Ndaa nye ọgwu ke nọolu ọgwu hite n'iwai ke hi nù rẹkpa a whụya? Ndaa nye jọornu ẹkwu, ma ọ jéeri mkpuru hi nù rime ẹkwu a? Ndaa nye nọoznu atnrnu ma ọ zá nọonwo mini-rẹma atnrnu a?

⁸ Me nookwu lele badnụ etekne sa? Ọ bụo nhne Iwu aị kwuru sa?

⁹ Kwnornu nù be gbarụ n'okwukwo Iwu Mozizi, "I knésni ọnu ehni ke nọozosna ikpa." Chiokike o nookwu nhne gbasiri ehni kpoi?

¹⁰ O kwuru nhne ka kwnornu aị. Be gbarụ a n'okwukwo kwnornu aị, nù nye nọotu ọnu-ẹli nù nye nọozosna mkpuru nwernu ọkwwnata ovu nù be jeeri mkpuru hiri n'ẹkwu.

¹¹ A kpasiri mkpuru ke enine nù rime anụ, ọ bụo nhne kwesiri nù a jọoghuru mkpuru etekne n'ehni anụ?

¹² Ọ bụru nù ele berere nwernu rikne kpa hne anụ zị, ọ bụ ayila jéenwe rikne karukwo hne anụ zị?

Kọvu a mége kpm, a nwernu ndidi nù kpakara nhne, ọ zị a bita nhne ọkpobi ọchi n'apna izi ọma Karaịsi.

¹³ Ọ bụ nù anụ máa nù ele nọornu ernalu n'Orọ Nsọ neeri nhne hi n'Orọ Nsọ whụya? Ọ bụ nù anụ máa masị nù ele nọornu ernalu n'ọjo arịohna neeri agwna nhne be jiri kwa arịohna?

¹⁴ Kpam masị, Chiokike nyernu iwu nù ele neezni izi ọma be ri wiri hiri n'izi ọma whụya.

¹⁵ Kọvu m mége m kpm. M zá m naagba ọkwukwo ka ma m nwernu rikne mee kpm. Kwnornu nù ọ jaakanụ m mma me beru ọsno nwụma ernalu tna, ọ zá nye mee igwugwu m nhne etekne.

¹⁶ M nwée m rikne nyaa risi nù m neezni izi ọma. Mkpa naakpa m bụ o zni izi ọma. Owe! Ọvu ọnu zinu m ọ bụru nù m znige m izi ọma.

¹⁷ Ọ bụ me gweru mkpoma m zni izi ọma ka, m nwernu m ọgwo ernalu, kọvu ọ bụru nù jíge m mkpoma m zni izi ọma, m nọornu ernalu Chiokike yisiri m n'aka.

¹⁸ Ọ bụru kpm, kịni bụ ọgwo ernalu m? Ọ bụ oghere o zni izi ọma gharu ọ whnụ ọnu ahia, gharu o gweru rikne me nwernu n'izi ọma mee nhne.

¹⁹ Ọ bụ n'ezi nù m bụo m ọhi nye ọbula, m nwernu m ẹhni, kọvu m mernu m ẹhni ọhi

kpakara badnụ ma m rihia m agida badnụ n'iru.

²⁰ Hne ele Ju zị, m bụ m nye Ju ma m rihia m ele Ju. Hne ele zị nù mkpururu iwu zị, m ziri lele nù m zị m nù mkpururu iwu (ọ bụ n'ezi nù m zá m nù mkpururu iwu), ma m rihia m be n'iru.

²¹ Hne ele zá nù mkpururu iwu, m ziri lele nye zá nù mkpururu iwu (ọ bụ n'ezi nù m léwhule m iwu Chiokike anya, m zị nù mkpururu iwu Karaịsi), ma m rihia m be n'iru.

²² N'esilawuru ele zá rikne n'okwnata ovu, m nù m lele be, ma m rihia m be n'iru. M bụ m kpakara nhne hne ele badnụ zị, m neeme kpa me nwernu rikne, ma m rihia m agwna be n'iru.

²³ M neeme kpakara nhne ka kwnornu izi ọma, ma m kehia m igwe nù ngozi a.

²⁴ N'ezi ọka, anụ magwu nù ele naagba ẹso naagba ẹso n'otu, kọvu otu badnụ kpoi naagbahia nhne ẹso. Anụ gba ẹso, ma anụ gbahia nhne n'eso.

²⁵ Nye ọbula ke naagba ẹso jooknekwaru ẹhni a nkari, ma be kpusi a okpu ọ gbahiaru n'eso ke jáazị ọkwwnkokwnu, kọvu a naagba ẹso ma a nwehia okpu-eze ke jaazị ọkwwnkokwnu.

²⁶ Ka kpariaru m zá m naagba ẹso lele nye ọ zá nhne o vu nù mkpoma, m zá m nọolu igbakwu lele nye nọolo ruwhere igbakwu.

²⁷ M naata ẹhni m awhnwhnu ma m nwernu m rikne nẹchi a, ọ zị me znikpa ele berere izi ọma, m bụru nye kwésile okpu-eze wam.

10

Ọ dọ aka nù nsni gbasiri ọkwa renwu

¹ Rụmu nda m, m pioru m anụ mahia, nhne mernu ele nda aị ọknanị ele snornu Mozizi kpa be zị nù mkpururu erumeru, kpakara be gawheru Osimini Ihie.

² Be wuru be mini nù rime erumeru nù osimini ke neegesi nù be sno Mozizi.

³ Kpakara be riri otu wiri enine wam.

⁴ Kpakara be nwornu otu mini enine wam, kwnornu nù be nwornu mini enine ke hiri nù rugwu wam snornu be, rugwu wam bụ Karaịsi.

⁵ Kọvu nhne gbasiri agwna be sóge Chiokike ovu n'ọnu, iznu be wusaru n'ẹli-ikpa wam.

⁶ Kpakara nhne ka bunnu aị nhne atụ ke nọodo aị aka nù nsni. Nhne ojo gwnụko aị lele kpa ọ gwururu be.

⁷ Anụ kwákọ renwu lele kpa agwna be kwaru, lele kpa ọkwukwo nsọ kwuru, "Ele wam daziri ẹli ri nhne, nwọ nhne ọnwunwo, be lizọ tne eri."

⁸ A mékọ oyi, lele kpa agwna be mernu, nri pokwu lawuru nù pokwu ẹto nwụ otu ọbuchi.

⁹ A kpáko Nyenwe aì iru, lele kpa agwna be mernu, agwò tagbu be.

¹⁰ Anù támu, lele kpa agwna be tamurnu, enine izi ke enwu gbu be.

¹¹ Kpakara nhne ka mernu be nù lele nhne atù, be gba be n'okwukwo nsò, ma be buru nhne jeezni aì ezni, aì ele zì budnu n'okwukwo owa ka.

¹² Nye obula ke neeche nù o gwuzogwu kwem, ledu anya, o zì o dna.

¹³ O zá ornurna ke vakwnusiri anù ke vakwnusilele badnu. Kòvu Chiokike kwesiri be kwnata a ovu, o jéekwe ornurna ke anù nwée rikne gwuzoli vakwnusi anù. Kòvu nga be naarna anù ornurna, Chiokike jeenye anù rikne o gwuzo, gbamanù anù apna anù jeji whùya nù rime a.

¹⁴ Nhne atù ele ka neegesi, ele me whnurnu n'anya, ma anù ghanahòru okwa renwu.

¹⁵ M nookwunu anù oka lele ele nwernu akòniche, anù tulekòm nhne me nookwu.

¹⁶ Okiko Iriri Nsò wam ke a nòotunu Chiokike mmamma, o búo ovrnarna Karaìsi nhne a neekeri nga a nòonwo nhne hi n'okiko wam? Brèdi wam a naanyawa, a zá neekeri anò-èhni Karaìsi nga a neeri brèdi wam?

¹⁷ Kwnornu nù otu brèdi zìnu kpakara aì. O bú n'èzi nù a zì agìda, kòvu a bú otu anò-èhni, a neeri otu brèdi wam.

¹⁸ Anù tule ele Izirèli, ele neeri nhne be jiri kwa arìohna, neekerikòta nhne n'otu n'òjo arìohna Chiokike.

¹⁹ Ndaa nhne me nookwu? O bú nù renwu mòbu wiri be kwanù renwu arìohna bú nhne obula?

²⁰ Oza! Nhne me naakaa bú nù nhne ele naakwanù renwu kwarù arìohna bú nhne be kwanù ele renwu ojo. O búo Chiokike. M chíoge m anù nù ele renwu ojo neekeri nhne n'otu.

²¹ Anù jéenwe rikne nwò okiko Nyenwe aì, nwò kwno okiko ele renwu ojo. Anù jéenwe rikne ri wiri n'íkpechi Nyenwe aì, ri kwno n'íkpechi renwu ojo.

²² Anù noopio o mee Nyenwe aì kwno awùwa? A nwernu iknernema karù a sa?

²³ "A nwernu rikne mee kpakara nhne," kòvu o búo kpakara nhne buru oma. "A nwernu rikne mee kpakara nhne," kòvu o búo kpakara nhne nòowulizo badnu olu lele owo.

²⁴ O zá nye lebna anya nù nhne ke a, kòvu nù nhne oma ke jeenyinu ele berere aka.

²⁵ Anù ri nhne obula be neere n'ahja, anù síkwa aiji kwnornu mkpuru ovu anù.

²⁶ Okwukwo nsò kwuru, "Chiokike nwe owa nù kpakara nhne zì nù rime a."

²⁷ O búru nù nye kwé ekwe sukwuru anù ma anù ri wiri, o masì anù o zne, anù ri

nhne obula o bítaru nù ruwhnu anù, anù síkwa aiji obula kwnornu mkpuru ovu anù.

²⁸ Kòvu o búru nù otu badnu kanù anù, "Be jiri wiri ka kwanù renwu arìohna," anù rìkò wiri wam kwnornu nù nye wam kannù anù kpa, ma kwnornu masì mkpuru ovu.

²⁹ O búo kwnornu mkpuru ovu anù, kòvu mkpuru ovu nye berere wam. Ndaa kpa rikne me nwernu o mee nhne jiri gbasì mkpuru ovu nye berere?

³⁰ O búru nù me ri wiri tñnu Chiokike mmamma, kìni mernu nye berere jaama m ikpe nù wiri me tñnu mmamma?

³¹ Kòvu, nhne obula anù neeme, anù neeri wiri mòbu anù nòonwo mini, anù mee kpakara nhne kwnornu igwugwu Chiokike.

³² Anù mékò nye obula dna, mòbu nye Ju mòbu nye búo nye Ju, mòbu ogbako Chiokike,

³³ lele kpa me naagbalì o mee kpakara nhne jaamasì kpakara badnu. M zá m neeche nhne gbasiri nhne oma ke m, kòvu nhne oma agìda badnu ma be znòhia be.

11

¹ Anù snornu m lele kpa me noosno Karaìsi.

Okpukpe nù ogbako Chiokike

² M naaja anù mma kwnornu nù anù neechenwanya m, naabita kpakara nhne me znirni anù.

³ Kìtna, m pioru m anù ghòhia nù Karaìsi bú risi nyerukna obula, nzi bú risi nwnerne, Chiokike bú risi Karaìsi.

⁴ Nyerukna obula ke neekpe okpukpe mòbu nòokpo okwo izi oma Chiokike kpusnime risi a, bú nhne iwhnerne nyee Karaìsi.

⁵ Nyerinya obula ke neekpe okpukpe mòbu nòokpo okwo izi oma Chiokike, gbesa risi a anya, neeme risi a nhne iwhnerne, o nù lele o kòpuru rukeri-ize risi a.

⁶ O búru nù nyerinya kpúsni risi a, o koma rukeri-ize a. Kòvu o bú nhne iwhnerne nù nyerinya jòoko rukeri-ize a, o kpusi risi a.

⁷ Nyerukna kpúsni risi a kwnornu nù o bú oyiyi ke neegesi igwugwu Chiokike. Kòvu nyerinya neegesi igwugwu ke nyerukna.

⁸ Kwnornu nù Chiokike híge nù nyerinya kpù nyerukna, kòvu hiri nù nyerukna kpù nyerinya.

⁹ O kpúge nyerukna kwnornu nyerinya, kòvu o kpuru nyerinya kwnornu nyerukna.

¹⁰ Kam kpayarù, kwnornu ele enine izi, nyerinya kwesiri o kpusni risi a, ke neegesi o zì nù mkpururu nzi a.

¹¹ Lele kpa budnu nù rime Nyenwe aì zì, nyerinya zì nyerukna mkpa, nyerukna zì masì nyerinya mkpa.

¹² Kwnornu kpa be kpuru nyerinya hite nù nyerukna, kpa masì, nyerinya murnu

nyerukna. Kpakara nhne hi n'aka Chiokike va.

¹³ Anụ kpekọm ma ọ bụru ọma nụ nyerinya jeekpe okpukpe gbesa risi a anya.

¹⁴ Iwu okike kwuru nụ nyerukna ke nwernu ogologo rukeri-ize bụnu a nhne iwhnerne.

¹⁵ Kọvu ọ bụru nụ nyerinya ke nwernu ogologo rukeri-ize, ọ bụ igwugwu a, kwnornu nụ rukeri-ize a bụ nhne Chiokike nyernu, o jeeji nookpusni risi a.

¹⁶ Kọvu ọ bụru nụ nye ọbula kwége kpm, nhne me jaakaa bụ, aị mọbu ọgbako Chiokike nwéee omen'eli berere karu kpm.

Wiri Anyasnu Nyenwe aị

(Mat 26:26-29; Mak 14:22-25; Luk 22:14-20)

¹⁷ Gbasiri nhne ke a nookwu kịtna, m jáaja anụ mma. Nhne anụ neeme nụ rime ọgbako anụ bụ nhne ọjọ, ọ bụo ọma rịa rịa.

¹⁸ Ke mbom, be kannu m nụ agida okewa zị n'esilawuru anụ, m neekweru agwna a.

¹⁹ O dnornu m anya nụ okewa jaaziri n'esilawuru anụ ma nye zị snam whuya iwhne.

²⁰ Nga anụ vakotaru n'otu, anụ váge o ri Wiri Anyasnu Nyenwe aị.

²¹ Kpa anụ neeri, nye ọbula neeri, ọ zá nye neese ibne a. Kam kpararu wiri n'ogwunu agwna badnu nga manya noogbu ele berere.

²² Anụ nwéee ọro, hne anụ jeeri wiri, nwọ manya? Anụ neeledna ọgbako Chiokike anya, kpasị ele nwéee nhne iwhnerne? Ndaa nhne anụ pioru me kwu gbasiri nhne ka? Me ja anụ mma sa? Óza! M jáaja anụ mma rịa rịa.

²³ M nahjaru m nhne me znirni anụ n'aka Nyenwe aị Jizosi. N'abalị wam be reru a, Nyenwe aị Jizosi gweruru brędi,

²⁴ tũnu Chiokike mmamma, nyawa a, kaa, "Ka bụ anọ-ẹhni m ke zinu anụ, anụ neeme ka neechenwanya m."

²⁵ Kpm masị, nga wiri anyasnu whemernu, o gweru okiko, kaa, "Ka bụ okiko ọgba-njọ-ẹhni ikne ke ọvnarna m. Nga ọbula anụ nnonwo a, anụ neeme ka neechenwanya m."

²⁶ Kpa anụ neeri brędi ka, nnonwo okiko ka, anụ nookwusa ẹnwu Nyenwe aị tem ọ va.

²⁷ Ka neegesi nụ ọ bụru nụ nye ọbula ri brędi Nyenwe aị mọbu nwọ nhne hi n'okiko, kpa o kwésige, ikpe anọ-ẹhni Nyenwe aị nụ ọvnarna a naama a.

²⁸ Nye ọbula beru ọsno nyosnama ẹhni a sụ o ri brędi wam mọbu nwọ nhne hi n'okiko wam.

²⁹ Kwnornu nụ nye ọbula ke jeeri mọbu nwọ nhne hi n'okiko wam hne ọ máa anọ-ẹhni Nyenwe aị, neeri, nnonwo ikpe nụ risi a.

³⁰ Kam kpararu, agida anụ zị nụ nrịria, agida anụ zá rikne, ele berere nwunam.

³¹ O bụru a beru ọsno nyosnama ẹhni aị, Chiokike jéekpe aị ikpe.

³² Kọvu Nyenwe aị neekpe aị ikpe, naata aị awhnuwhnu, ma a gharu o sno ele zị n'owa bụru ele ikpe marnu.

³³ Rumu nda m, nga anụ gbakoru n'otu neeri wiri Nyenwe aị, anụ sete ibne anụ.

³⁴ O bụru nụ wiri n'ogwunu nye ọbula, o ri wiri n'oro a, ọ zị ikpe Chiokike ma anụ kpa anụ gbakoru n'otu.

M jeemekwata nhne ke berere nga me varu.

12

Nkesi ke Enine Nso

¹ Rumu nda m, nhne gbasiri nkesi zị ọdo n'odo ke Enine Nso, m pioru m anụ mahia nhne gbasiri be.

² Anụ magwu nụ nga anụ bụ ele naakwa rẹnwu ke dnarnu mgbu, be duru anụ hie apna.

³ M neeme ma anụ mahia nụ ọ zá nye Enine Nso Chiokike noodu jeenwe rikne kaa, "Kosna Jizosi." O zá nye jeenwe rikne kaa nụ, "Jizosi bụ Nyenwe aị," okwokọlam ma Enine Nso hiri n'onu a kwu kpm.

⁴ Agida nkesi enine zị ọdo n'odo, kọvu otu Enine Nso.

⁵ Agida apna be jeezne izi, kọvu otu Nyenwe aị.

⁶ Agida ẹnru zị ọdo n'odo, kọvu otu Chiokike wam neenye rikne be jeeji nnonru ẹnru.

⁷ Enine Nso nyernu badnu ọbula nkesi ma ọ bụru mbnarna kpakara badnu.

⁸ O nyernu otu badnu izi akoniche, nyee nye berere izi oghohia nhne hite n'otu Enine wam.

⁹ Otu Enine wam nyee nye berere ọkwnata ovu, o nyee nye berere rikne ọ gwọ nrịria.

¹⁰ Enine wam masị nyee otu badnu rikne ọ nru ẹnru ndu-ẹhni, nyee nye berere rikne ọ kpọ okwo izi ọma, nyee nye berere rikne ọ mahia nhne zị ichne nụ hne enine zị ichne ichne, nyee nye berere rikne o kwu ọka nụ riro zị ichne ichne, nyee nye berere rikne ọ tũhnasna ikwu-ọnu.

¹¹ Kọvu ọ bụ otu Enine wam nnonru kpakara nhne, o neenye badnu ọbula nkesi zị ọdo n'odo lele kpa o jiri masị a.

¹² Ẹhni badnu bụ otu. Kọvu o nwernu agida nhne zị ọdo n'odo ke knekotaru a n'otu. O bụ masị kpa ọ zị n'anọ-ẹhni Karaisi.

¹³ Kwnornu nụ be jiri otu Enine wu aị mini bna n'otu anọ-ẹhni. A bụ ele Ju, ma a bụ ele bụo ele Ju, ọhi mọbu nye bụo ọhi, be mernu a nwọ otu Enine wam.

¹⁴ O bụo otu nhne zị n'ẹhni badnu, be zị agida.

¹⁵ Ɔ bũru nũ ọchi jaakaa, “Kwnornu nũ m bũla m aka, m bũla m nhne zĩ n'ẹhni,” kĩ jéeme a ọ gharũ ọ bũru nhne zĩ n'ẹhni badnũ.

¹⁶ Ɔ bũru nũ nsnĩ kaa, “Kwnornu nũ m bũla m anya, m bũla m nhne zĩ n'ẹhni,” kĩ jéeme a ọ gharũ ọ bũru nhne zĩ n'ẹhni badnũ.

¹⁷ Ɔ bũru nũ kpakara ẹhni bũ anya anya, ndaa kpa ọ jọonu nhne? Ɔ bũru nũ kpakara ẹhni bũ nsnĩ nsnĩ, ndaa kpa ọ jọonu ẹknarna nhne?

¹⁸ Kọvu Chiokike yisiri kpakara nhne zĩ n'ẹhni badnũ lele kpa ọ jiri masĩ a.

¹⁹ Ɔ bũru nũ kpakara be bũ otu nhne, ndaa hne ẹhni jaazĩ?

²⁰ Kĩtna, agĩda nhne zĩ n'otu ẹhni badnũ.

²¹ Kam kpayarũ, anya jáakanũ aka, “I zá m mkpa.” Mọbu risi kanũ ọchi, “I zá m mkpa.”

²² N'ezĩ, a jéenwe rikne gwuzoli ọ bũru nũ nhne ke zĩ n'ẹhni ke a neeche nũ be zá rikne zĩla.

²³ Nhne ke zĩ n'ẹhni aĩ ke a neeche nũ be nwéee igwugwu, bũ ke a neeledu anya gbasĩri be, ele ke tũ iwħnerne bũ ele ke a jĩ iwo nookpusni.

²⁴ Ngerĩ ẹhni aĩ ke marnũ mma a zá neeledu a anya. Chiokike n'iwħru a yisiri ẹhni aĩ n'otu, o nyernu nhne zĩ n'ẹhni ke nwéee igwugwu, igwugwu ke kakwo.

²⁵ Okewa kwésile ọ zĩ n'ẹhni, kọvu kpakara nhne zĩ ọdo n'ọdo n'ẹhni magwũ nhne gbasĩri ibne be.

²⁶ Ɔ bũru n'otu nhne zĩ n'ẹhni nọowħnu awħnũwħnu, kpakara ele ke berere sno a wħnũ awħnũwħnu. Ɔ bũru be znarnĩ otu, kpakara be sno a nwe ovu ọso n'ọnu.

²⁷ Kpakara anũ bũ ẹhni Karaĩsi, anũ n'otu n'otu bũ nhne zĩ n'ẹhni Karaĩsi.

²⁸ Chiokike bĩtaru kpakara nhne kpa o kwesiri n'ogbako a. Ɔ bĩtaru ke mbọm, ele izi, ke ẹbo, ele nọokpo okwo, ke ẹto, ele zni nhne, ele nọornu ẹrnu ndu-ẹhni sno be, nũ ele nwernu nkesi ọgwo nrĩria, mọbu ele neeyĩnu ele berere aka, ele nẹechi ẹchi, nũ ele nookwu ọka nũ riro zĩ ọdo n'ọdo.

²⁹ Kpakara be bũo ele izi, kpakara be bũo ele nọokpo okwo, mọbu ele neezni nhne. Ɔ bũo kpakara be nwernu rikne rnũ ẹrnu ndu-ẹhni,

³⁰ mọbu gwọ nrĩria zĩ ọdo n'ọdo, mọbu kwu ọka nũ riro zĩ ọdo n'ọdo, mọbu ọ tũħnasna ikwu-ọnu.

³¹ Kọvu nkesi ke kakwo mma gwnũ anũ lele wiri.

Kọvu me gesi anũ apna ke kakwo mma.

13

Owhnun'anya

¹ Ɔ bũru m nwernu m rikne kwu ọka nũ riro ele badnũ nũ ke enine izi, kọvu m nwéee m ọwhnun'anya, ọka m jọoburu ọgbugbo etekne mọbu igele warũ-awa.

² Ɔ bũru m nwernu m nkesi ke ọkpo okwo izi ọma, nũ ọghohia kpakara nhne zĩ omimi, nũ kpakara nhne ọmuma, ọ bũru nũ m nwernu m kpakara ọkw nata ovu ke joovume rugwu, kọvu m nwéee m ọwhnun'anya, ọ zá nhne me bũ.

³ Ɔ bũru me nyee ele mboni kpakara nhne me nwernu, mọbu nyee ẹhni m be gba bẹkwnu, kọvu m nwéee m ọwhnun'anya, ọ zá ọgwo ẹrnu me jeekehĩa.

⁴ Ɔwhnun'anya nwernu ọsnuta ovu, nũ ovu ọma. Ɔwhnun'anya kwnó awũwa, o méee oknomokno, ọ kpá nganga.

⁵ Ɔwhnun'anya méee nhne bũo ọma n'anya. O pío nhne ke aka ke a, o nwéee ovu owe ẹhni. Ɔwhnun'anya zá nọogwnu nhne ojo be mernu a.

⁶ Ɔwhnun'anya zá nọonwudna nũ nhne ojo, kọvu ezi ọka neeme ovu ọso a n'ọnu.

⁷ Inwe zá nọogwu ọwhnun'anya. O neekweru kpakara nhne, o nwernu olile anya nũ kpakara nhne, o needi kpakara nhne.

⁸ Ɔwhnun'anya zĩ ọkwnuokwnu. Ɔkpo okwo jeebi, riro zĩ ọdo n'ọdo jọokwusi. Ɔ bũru ọghohia, be jaagawhe.

⁹ Ɔghohia aĩ nũ ọkpo okwo aĩ zũ ozu.

¹⁰ Nga nhne ke zuru ozu varũ, nhne ke zũge ozu jaagawhe.

¹¹ Nga me bũ watakĩri, m nookwu ọka lele watakĩri, m naarĩ ọriri lele watakĩri, m ghọhiaru m nhne lele watakĩri, kọvu nga me sozuru nũ badnũ, m gweme kpakara agwa watakĩri n'ẹhni m.

¹² Kwnornu nũ kĩtna, a nọowħnu nhne nũ nyno ke nọotu ewħeke, kọvu nga wam a jọowħnu ruwħnu nũ ruwħnu. Kĩtna, m maam agwna nhne, nga wam m jaamakwo kpakara nhne lele kpa Chiokike magwũ m.

¹³ Kĩtna, nhne ẹto ka zĩ, ọkw nata ovu, olile anya, nũ ọwhnun'anya. Kọvu ọwhnun'anya kakwo kpakara be.

14

Ɔkpo okwo nũ riro ikne

¹ Anũ snornu apna ọwhnun'anya, nkesi ke Enine nọogwnu anũ lele wiri, ke kakwo ibne a, nkesi ke ọkpo okwo izi ọma.

² Nye nookwu ọka nũ riro zĩ ichne ichne zá nookwunu badnũ, kọvu Chiokike. Kwnornu nũ ọ zá nye nọogħohia nhne o nookwu, nhne o nookwu bũ nhne tugwaru otugwa hite nũ rikne Enine.

³ Kọvu nye nọokpo okwo izi ọma nookwunu ele badnũ ọka, noowulizọ ele badnũ olu lele ọro, neezni nhne, naakasi mkpọma.

⁴ Badnũ ke nookwu ọka nũ riro zĩ ichne ichne noowulizọ ẹhni a olu lele ọro, kọvu nye nọokpo okwo izi ọma noowulizọ ọgbako Chiokike olu lele ọro.

⁵ Ɔ jaamasĩ m ọ bũru nũ kpakara anũ jookwu ọka nũ riro zĩ ichne ichne. Kọvu ọ

ka mma, o buru nu kpakara anu kpo okwo izi oma Chiokike. Kwnornu nu nye nqokpo okwo izi oma Chiokike zi okne onu ahia kakwo nye nookwu oka nu riro ichne ichne, okwolem ma o zi nye jootuhnasnanu ogbako Chiokike nhne o nookwu, ma be wulizo ogbako Chiokike olu lele oro.

⁶ O buru me vakwnusi anu nookwu oka nu riro ichne ichne, mbnarna kini nhne anu jeenwe n'aka m, okwolernu o ma nookwu nhne Chiokike kpumennu m mofu nhne omuma mofu okpo okwo izi oma mofu zni nhne?

⁷ Nhne ke nwée budnu lele opi mofu obo, o za nye jaamahia nhne o nqogwnu n'eri o buru nu be gbúgele a kpa o buru oma.

⁸ O buru nu nye nqogbu okwodu gbúgele a nkari, o za nye jeejiknenu o zne ogwnu.

⁹ Kpam masi, o buru nu i kwúkwaala oka nkari, o za nye jooghohia nhne i nookwu, o buru nu i kwu oka nu riro zi ichne ichne. Ruwhere joovu oka i.

¹⁰ O bu n'ezi n'agida ikwu-onu zi n'owa. O za ke nwée nhne o naakasi.

¹¹ O buru nu m ghóhiage m nhne badnu nookwu, m bunu m nye wam nye eli berere, nye wam masi bunu m nye eli berere.

¹² O bu masi kpa o zinu anu. Hne nkesi ke Enine nqogwnu anu, anu gbalí nwehia masi nkesi ke jeewulizo ogbako Chiokike olu lele oro.

¹³ Nye nookwu oka nu riro zi ichne ichne, kpe okpukpe ma o tuhnasna ikwu-onu a.

¹⁴ O buru me kpe okpukpe kpa nu riro zi ichne ichne, enine m neekpe, kovu echiche m nwée igwe nu rime a.

¹⁵ Ndaa nhne me jeeme? M jeeji enine m nu echiche m kpe okpukpe, m jeeji masi enine m nu echiche m gwnu eri.

¹⁶ Kpa i naaznarni Chiokike nu rime enine, nye izne ke zi nu rime ogbako jeenwe rikne kwe Amim, kwnornu nu o máa nhne i nookwu.

¹⁷ I nqotunu Chiokike mmamma nkari nkari, kovu nhne i neeme za noowulizo nye wam olu lele oro.

¹⁸ M nqotunu Chiokike mmamma kwnornu nu m nookwu oka nu riro zi ichne ichne kakwo kpakara anu.

¹⁹ Kovu nu rime ogbako Chiokike, o buru oma me kwu mkpuru oka isne ke ele badnu jooghohia, zni be nhne, karu o kwu nri pokwu oka o za nye jooghohia.

²⁰ Rumu nda m, anu ghó rumu takiri nu n'oriri anu, kovu anu buru rumu takiri nu hne mmehie zi, anu buru dimkpa nu oghohia anu.

²¹ Be gbaru a n'okwukwo nsó, kaa, "M jeeji ikwu-onu ele eli berere, kwunu ele ka oka, m jeeji masi mgbele-onu ele eli berere kwunu ele ka oka,

kovu be kwéle o bnonu m nsni."

Ka bu nhne Nyenwe ai kwuru.

²² Riro zi ichne ichne bu nhne elekema ele kwé ekwe, o buo ke ele kweru ekwe. Okpo okwo izi oma Chiokike bu ke ele kweru ekwe, o buo ke ele kwé ekwe.

²³ O buru nu kpakara ogbako Chiokike gbako n'otu, kpakara anu nookwu oka nu riro zi ichne ichne, o buru ele izne mofu ele kwé ekwe wa n'esilawuru anu, be jaakaa nu kpakara anu bu ele era?

²⁴ Kovu o buru kpakara anu nqokpo okwo izi oma Chiokike, nye kwé ekwe mofu nye izne wa n'esilawuru anu, be jootu a mmehie a n'anya, kpakara nhne o nurnu jaama a ikpe.

²⁵ Nhne tugwaru otugwa ke zi n'ovu a jowhnuya iwhne. O jaadna kpo risi eli nyee Chiokike, kwuhia, "N'ezi oka nu Chiokike zi n'esilawuru anu."

Okpenu Chiokike n'ahiri n'ahiri

²⁶ Rumu nda m, nhne me nookwu bu ka, nga anu gbakoru n'otu, anu ji ogwnu eri, anu ji iznizni, nye berere jigwu nhne be kpumennu a, nye berere ji riro zi ichne ichne, nye berere nqotuhnasna nhne be nookwu. Kpakara nhne bu ma be wulizo ogbako Chiokike olu lele oro.

²⁷ O buru nye obula kwu oka nu riro zi ichne ichne, be jaazi badnu lawuru, mofu ke kakwo eto. Otu kwukwo, ibne a kwu, otu badnu tuhnasna nhne be nookwu.

²⁸ O buru nu o za nye jootuhnasna nhne be nookwu, nye wam nookwu nu riro zi ichne ichne daziri bii, nye wam kwunu ehni a oka, kwu masinu Chiokike oka.

²⁹ Badnu lawuru mofu eto kpo okwo izi oma Chiokike, ele berere tule nhne be neezni.

³⁰ Kovu o buru nu otu dazigwu eli nu rime ogbako nwehjaru izi n'aka Chiokike, nye nookwu oka daziri bii.

³¹ Kpakara anu jeenwe rikne kpo okwo izi oma Chiokike otu n'otu, ma kpakara anu muhia nhne, kpakara anu nwehia nkasi ovu.

³² Enine nye nqokpo okwo noobnonu nye nqokpo okwo nsni.

³³ Kwnornu nu Chiokike buo nye eyiriya, kovu nye udno.

Lele kpa o zi nu kpakara ogbako Chiokike, ele rinya daziri bii nu rime ogbako Chiokike. Be kwú oka, be buo ele risi lele kpa Iwu kwuru.

³⁵ O buru nu be pioru o mahia nhne obula, be sikwa nzi be n'oro. O bu nhne iwhnerne nu nyerinya jookwu oka nu rime ogbako Chiokike.

³⁶ Kini masi? Ikwu-onu Chiokike opanizoru nhne anu zi sa? Mofu o bu anu kpoi bu ele o vakwnusiri?

³⁷ Ọ bụru nụ nye ọbula neeche nụ ọ bụ nye nọokpo okwo izi ọma, mọbu nye nwernu nkesi enine, nye wam marnu nụ nhne me naagbanu anu n'okwukwo bu nhne Nyenwe aji nyernu n'iwu.

³⁸ Nye bnóge nsni nụ nhne ka, anu bnónu a nsni.

³⁹ Rumu nda m, kam kpayaru, okpo okwo izi ọma Chiokike nọogwunu anu lele wiri, anu nahiaru, bu ke anu gwuzogwu n'olu a.

⁴⁰ Anu gweru ovu duru eli mee kpakara nhne kwesiri n'apna buru ọma, ma n'ahiri n'ahiri.

15

Olizo n'enuw Karaisi

¹ Kitna, rumu nda m, m neechenwanyanu anu izi ọma wam me znirni anu, ke anu nahiaru, bu ke anu gwuzogwu n'olu a.

² Chiokike znohiaru anu hite n'izi ọma ka, ọ buru nụ anu bita nhne me znirni anu, okwolem ma anu kweru n'etekne.

³ M nyernu m anu nhne me nahiaru, ke zi okne mkpa, nū Karaisi nwurnu kwnornu mmehie aji, lele kpa be gbaru a n'okwukwo nsọ.

⁴ Be liri a, Chiokike mernu o hi n'enuw lizo n'obochi ke eto, lele kpa be gbaru a n'okwukwo nsọ.

⁵ O mernu Pita whnu a anya, omekwo, ele izi nri nū ẹbo wam whnu a anya.

⁶ Omekwo, o mernu nhne nu lele ele kakwo riwhu badnu isne whnu a anya otu mgba, ele bu rumu nda aji. Agwna be zi budnu du tna, kovu agwna be dnarnu n'anyarna enwu.

⁷ Omekwo, Jemisi whnu a anya, nu kpakara ele izi.

⁸ N'ipne-aznu, o mernu m m whnu a anya, me nye be murnu lele nnwo ka aka.

⁹ M bu m nye zikakworu matu n'esilawuru ele izi, m kwesile m be sukwo m nye izi, kwnornu nu m mekparu m ogbako Chiokike ehni.

¹⁰ Kovu hite n'oru Chiokike, m bu m nhne me bu. Oru o nyernu m buo n'etekne. Kovu m doligburu m ehni m n'ernu kakwo kpakara ele izi, ọ bu n'ezu nu ọ buo me nọornu, kovu oru Chiokike nọornu ẹnu nu rime m.

¹¹ Kam kpayaru, ọ bu me, mọbu be, a znirni izi ọma, kam bu nhne anu kweru.

Olizo n'enuw ele nwurnu enwu

¹² Ọ buru nū izi ọma aji bu nū Karaisi hiri n'enuw lizo, ndaa kpa agwna anu naakaa nū ele nwurnu onwu za neelizo n'enuw?

¹³ Ọ buru nū ele nwurnu onwu za neelizo n'enuw, o neegesi nū Karaisi hige n'enuw lizo.

¹⁴ Ọ buru nū Karaisi hige n'enuw lizo, izi ọma a znirni anu bu nhne etekne, okwnata ovu anu bu masi nhne etekne.

¹⁵ Tukwasi n'olu a, a bu ele akebe n'agha-laghala megidne Chiokike, a naagba akebe megidne Chiokike nū o mernu Karaisi hi n'enuw lizo, nye o mene o hi n'enuw lizo, ọ buru nū ele nwurnu onwu jeelizo n'enuw.

¹⁶ Kwnornu nū ọ buru nū ele nwurnu onwu jeelizo n'enuw, Karaisi hige n'enuw lizo.

¹⁷ Ọ buru nū Karaisi hige n'enuw lizo, okwnata ovu anu bu nhne etekne, anu zi koriri nū mmehie anu.

¹⁸ Kam neegesi nū ele dnarnu n'anyarna enwu bu ele kweru nū Karaisi whuru etekne.

¹⁹ Ọ buru nū okwoqolam nū budnu ka a zi bu hne a nwernu okwnata ovu nū Karaisi, a bu ele be kwesiri ọ donu obirizi kakwo kpakara ele wu n'owa.

²⁰ N'ezu oka, Chiokike mernu Karaisi hi n'enuw lizo, bu mkpuru mbom ke ele nwurnu onwu.

²¹ Kpa enwu hiri n'aka badnu va, kparam masi, olizo n'enuw hiri n'aka badnu va.

²² Kwnornu nū kpakara badnu nwurnu enwu nū rime Adam, kparam masi, Chiokike jeeme kpakara badnu ziri budnu nū rime Karaisi.

²³ Kovu nye ọbula n'ige ke a, Karaisi bu mkpuru mbom, omekwo, kpakara ele kweru nū Karaisi nga ọ jaava.

²⁴ Omekwo, okwukwo kpakara nhne jaava, nga Karaisi lugburu kpakara rikne, nū ele neechi echi, nū kpakara iknernema, o jeenyewhete Chiokike Nda eli-eze a.

²⁵ Kwnornu o jaachi tem ọ bita kpakara ele irno nū mkpururu ọchi a.

²⁶ Nye irno ipne-aznu o joolulu bu enwu.

²⁷ Kwnornu nū okwukwo nsọ kwuru, "Chiokike bitaru kpakara nhne nū mkpururu ọchi a." A magwu nū Chiokike za n'esilawuru kpakara nhne ka, nye bitaru kpakara nhne nū mkpururu Karaisi.

²⁸ Nga kpakara nhne daziri nū mkpururu Karaisi, Karaisi jaadazi nū mkpururu nye wam bitaru kpakara nhne nū mkpururu a, ma Chiokike buru nye neechi kpakara nhne.

²⁹ Ọ buru nū ele nwurnu onwu za neelizo n'enuw, mbnarna kini bu nhne ele be nọowu mini kwnornu ele nwurnu onwu jeenwe? Kini kparwu be nọowu be mini kwnornu ele nwurnu onwu?

³⁰ Ndaa nhne mernu a neeze budnu ige ọbula?

³¹ M zi m n'onu enwu kpakara ọbochi. Rumu nda m, m nookwu ka kwnornu nū m ji m anu naanya risi, anu zi nū rime Karaisi Jizosi Nyenwe aji.

³² Ọ buru lele badnu etekne me nū anohia ojo luru ogwunu nū Efesosi, ndaa nhne me jeenwehia? Ọ buru nū ele nwurnu onwu za neelizo n'enuw,

"Ngwa ma a ri, nwọ tna, kwnornu ekile a jponwu."

33 Anụ kwé be duwlu anụ. “Ele enyi oju noolulu agwa oma.”

34 Anya dno anụ nù risi, anụ mée mmehie. Agwna anụ máa Chiokike. M nookwu ka ma iwłnerne tų anụ.

Anọ-ehni a jeenwe

35 Kọvu agwna anụ jaakaa, “Ndaa kpa ele nwurru onwu jeelizọ? Ndaa anọ-ehni be jeenwe?”

36 Jị nye iwłnirniwhno. Nga i kpasiri mkpuru n'eli, o jóofu okwolem ma o beru osno nwu.

37 Nhne i kpasiri n'eli bu mkpuru etekne, mkpuru ikpa, mọbu mkpuru berere, o búo isisi.

38 Chiokike jeenye mkpuru wam ehni ke masiri a. O neenye mkpuru obula ehni ke a.

39 Kpakara anọ-ehni búo otu, badnu nwernu anọ-ehni, anohia nwernu anọ-ehni ke berere, onunu nwernu anọ-ehni ke berere, aznu anọ-ehni berere.

40 Anọ-ehni ke oligwe zi, anọ-ehni ke owa zi masi, oma mma ke oligwe zi, oma mma ke owa zi masi.

41 Mma ke ehnam zi ichne, enwa nwernu oma mma ke a, mma ke mbọ zi ichne, mma ke mbọ zi odo n'odo.

42 Kpam masi bu kpa olizo n'enwu zi, anọ-ehni ke be kpasiri n'enwu nwernu rikne ro oro, nga Chiokike gwelizoru a, o jóoro oro.

43 Be kpasiri a n'iwłnerne, Chiokike gwelizo a n'igwugwu, be kpasiri a n'inwe ogwugwu, Chiokike gwelizo a n'iknerna.

44 Be kpasiri a anọ-ehni etekne, Chiokike gwelizo a n'anọ-ehni ke enine. Anọ-ehni ke etekne zi, anọ-ehni ke enine zi masi.

45 Kwnornu be gbarų n'okwukwo nsọ, “Adam badnu mbom bu badnu ke zi budnu.” Kọvu Adam ke ipne-aznu bu Enine ke neenye budnu.

46 Anọ-ehni ke enine bége osno, kọvu anọ-ehni etekne, omekwo, ke enine sno a.

47 Adam ke mbom bu rızna ke owa, Adam ke ebo hi n'oligwe va.

48 Lele badnu be jiri rızna kpu, bu kpa ele ke rızna bu, ele ke oligwe nu lele nye wam hi n'oligwe va.

49 Lele kpa a vuru oyiyi ke badnu ke rızna, kpam masi bu kpa a joovuru ke oligwe lele badnu wam hi n'oligwe va.

50 Rumu nda m, ka bu nhne me nookwu, kwnornu anọ-ehni nu onnarna jeekehija eli-eze Chiokike. Nhne joonwu onwu jeekehija nhne joonwu onwu.

51 Le, me kanu anu nhne miri emi, o búo kpakara ai joonwu enwu, kọvu be jaagbanwo kpakara ai,

52 n'ige mati, n'otu nsnabi anya, nga okwodu ipne-aznu dnarnu. Kwnornu nu be joogbu okwodu, ele nwurnu onwu jeelizọ róge oro, be jaagbanwo ai.

53 Kwnornu nu anọ-ehni ke jooro oro jooworu anọ-ehni ke jóoro oro, anọ-ehni ke joonwu enwu jooworu anọ-ehni ke joonwu enwu.

54 Nga anọ-ehni ke jooro oro wokparu anọ-ehni ke jóoro oro, anọ-ehni ke joonwu onwu woru anọ-ehni ke joonwu onwu, nhne be gbarų n'okwukwo nsọ jeemezu, “Be megburu enwu.”

55 “Enwu, ndaa hne mmeri i zi?”

Enwu, ndaa hne nhne ogbugba i zi?”

56 Nhne ogbugba enwu bu mmehie, ikn-ernema mmehie bu iwu.

57 Kọvu a notunu Chiokike mmamma nye neenye ai mmeri hite nu Nyenwe ai Jizosi Karaisi.

58 Rumu nda m, ele me whurnu n'anya, anu gwuzosi rikne, anu kwéko be whome anu, anu gweru kpakara mkpoma anu notornu ernu Nyenwe ai ige obula, hne anu magwu nu ernu anu nu rime Nyenwe ai jooowhu etekne.

16

Otu iwai ke rumu Chiokike

1 Gbasiri iwai be jootunu rumu Chiokike ke zi nu Judiya, anu mee kpa me kannu ogbako Chiokike ke zi nu Galasia.

2 N'obochi mbom ke ikwezu, nye obula bita iwai ichne lele kpa o nwernu, o bitakwata a nkarj ma anu zoma o tu iwai nga me jaava.

3 Nga me varu m jaagba okwukwo izi nyee ele anu hohiaru, m zizne be gwezne nkesi anu nu Jeruselem.

4 O buru nu o buru oma, me nu be joosno zne.

Oriasno Polu

5 Nga me zne zuru Masidonia, m jaavakwnusi anu, kwnornu m jeezne Masidonia.

6 Me nu anu jaadazi ige mati mọbu tem okirika whe, ma anu yinu m aka m zne hne obula me jeezne.

7 M piole m o whnu anu ige mati, kọvu m pioru m me nu anu daziri gbu okwnu, o buru nu Chiokike kwe.

8 Kọvu m jaadazi hna nu Efesosi du obochi Pentikosi.

9 Kwnornu nu be gbamannu m okne onuhna ernu izi oma hna, kọvu agida ele neemegidne m zi masi.

10 O buru nu Timoti va, anu kwéko ogwnu tu a kpa o zi n'esilawuru anu, kwnornu nu o notornu ernu Nyenwe ai lele me.

11 O za nye ledna a anya, anu yinu a aka ma o lizo izne a n'udno, vakwnusi m. M neele anya ya nu rumu nda ai.

12 Nhne gbasiri nwene ai rukna Apolosi, m riasnornu m a agida ige ma ya nu rumu nda ai va lekasi anu, kọvu o jiknene o va kitna. O jaava nga o nwehjaru oghere.

¹³ Anụ sama anya anụ, anụ gwuzosi rikne n'okwnata ovu, ovu si anụ rikne, anụ ghọ ele dikne.

¹⁴ Anụ gweru owhnun'anya nụ kpakara ọnu anụ.

¹⁵ Anụ magwụ nụ ele ọro Stefanasi bụ ele mbom ghọru ele Karaịsi nụ Akaya. Be ji kpakara nhne be nwernu nọornu ele Chiokike ọnu. M naarịasno anụ,

¹⁶ anụ bīta ọhni anụ nụ mkpururu ele nụ kpa nụ nye ọbula ke ji mkpoma be snornu be nọornu ọnu.

¹⁷ Ovu sọru m n'ọnu nga Stefanasi nụ Fọtunatosi nụ Akajkosi varu, be mesirni owu anụ ke kọru m.

¹⁸ Be vulizọru ovu m nụ ovu anụ masi. Ele nụ kpa kwesiri be hnata be ama.

¹⁹ Ogbako Chiokike ke zị nụ Esia neebekwu anụ. Akwila nụ Prisila nụ ogbako Chiokike zị n'oro be ji rẹwhna Nyenwe aị neebekwu anụ k'agida.

²⁰ Kpakara rụmu nda ele zị hna neebekwu anụ. Anụ bekwurita ibne anụ lele rụmu nda.

²¹ Mawa, Pọlu, ji aka m naagba obekwu ikwu ka.

²² Be vū nye ọbula ke whnuge Nyenwe aị n'anya ọnu. Nyenwe aị, vaa.

²³ Oru ke Nyenwe aị Jizosi dazinu anụ.

²⁴ Owhnun'anya m nụ rime Karaịsi Jizosi dazinu kpakara anụ.

**Ọkwukwo izi
ke Ẹbo
Pọlu gbaznenu
Ele Kōrinti**

Nhne gbasiri ọkwukwo izi ka

Ọkwukwo izi Pọlu gbaznenu ele Kōrinti ke ẹbo bụ ke Pọlu gbarụ nga ọgbako Chiokike ke zị n'Ọrinti n'Ọrinti n'Ọrinti n'Ọrinti. Agwa ele zị n' rime ọgbako wam bnornu Pọlu nhne, kọvu Pọlu noopio ma ya n' be mee udno.

N' rime nhne mbom Pọlu gbarụ n'ọkwukwo, o nookwu ọka nhne gbasiri ọgbako Chiokike ke zị n' Kōrinti, n'okowa n' m'kpoma n'oso a n'onu k'agida kwnornu n' be t'huasarnu m'kpoma. O naarisno ọgbako Chiokike gbalị gweru m'kpoma be gweya nhne be jeekesi ele Karaịsi zị n' Judiya. N' ipne-aznū, Pọlu n'ogoru ọnu a lele ọmama n' nye izi Karaịsi, megidne agwa ele kwuru ẹhni be ọmama n' ele izi. Be naaka n' Pọlu b' nye izi aghalaghala.

Nhne zị n'ọkwukwo ka

Opanizo (1:1-11)

Pọlu n' ọgbako Chiokike zị n' Kōrinti (1:12--7:16)

Nkesi be nyernu ọgbako Chiokike zị n' Judiya (8:1--9:15)

Pọlu g'oru ọnu a lele nye izi (10:1--13:10)

Obekwu ikwu ipne-aznū (13:11-14)

¹ Mawa Pọlu, nye izi Jizōsi Karaịsi lele kpa o masiri Chiokike, n' nnwō nda a' Timoti, gbaznenu ọgbako Karaịsi ke zị n' Kōrinti n' kpakara ele ke Chiokike zị n' kpakara Akaya ọkwukwo.

² Oru n' udno ke Chiokike Nda a' n' Nyenwe a' Jizōsi Karaịsi dazinu anu.

*Pọlu n'otunu Chiokike
mmamma*

³ Oznarni zinu Chiokike b' Nda Nyenwe a' Jizōsi Karaịsi, Nda ke obirizi, Chiokike ke nkasi ova,

⁴ nye naakasi a' ọvu n' rime kpakara awhnūwhnu a', ma a nwernu rikne kasi ele berere z' n' awhnūwhnu ọbala ọvu hite n' ọkasi ọvu a nweh'aru n' aka Chiokike.

⁵ Lele kpa a snornu Karaịsi takọ agida awhnūwhnu a, o b' masi kpa Karaịsi naakasi a' ọvu k'agida.

⁶ O b'uru n' a z' n' m'kpa, o b' ma be snūta ọvu anu, znōhia masi anu. Okasi a' ọvu b' nkasi ọvu anu masi, okasi ọvu wam n'ornusi ẹrnu rikne neegweh'ia ndidi n' rime awhnūwhnu wam a n' ọwhnuzi.

⁷ Olile anya a' n' hne anu z' z' chīm chīm, kwnornu n' a maam n' kpa anu sno a' ta awhnūwhnu anu joosno masi a' nwe nkasi ọvu.

⁸ A pioru anu mahia nhne dnakwasiri a' n' Esia, nhne z' ogwnu ke dnakwasiri a' kakwo a' rikne, a nwema olile anya b'udnu.

⁹ A neeche n' be joogbu a'. K'ovu ka gesiri a' n' a kwesile o t'ukwasi ẹhni a' m'kpoma, k'ovu a t'ukwasiri Chiokike ọvu, nye neeme nye nw'urnu ọnwu hi n' ẹnwu lizọ.

¹⁰ O d'ohiaru a' n' aka ẹnwu t' ọgwnu, n'odohia a' k'oriri, a kwnataru ọvu n' hne o z' n' o jaazi k'oriri n'odohia a'.

¹¹ kpa anu z' neekpenu a' okpukpe. Agida ele badn' ọjotunu Chiokike mmamma kwnornu n' ruwhnu ọma o jeenye a', o jaaza okpukpe agida ele badn'.

Pọlu gbanwornu mmuma a

¹² Ka b' nhne a' ji naanya risi, nhne m'kpoma a' naagba akebe, a wuru b'udnu z' snam, z' masi nsọ ke hi n' aka Chiokike. O b'uo kpa akoniche ke badn' pioru, k'ovu hite n' oru ke Chiokike, a wuru b'udnu a' n' rime ọwa, ke kakwo n' hne anu z'.

¹³ A gbala ọkwukwo nhne anu j'ogwnuli m'bu j'oghohiali, k'ovu nhne anu j'oghohiali. M neele anya n' anu j'oghohiazu a,

¹⁴ lele kpa anu g'ohiaru a' mat' ma a kpa nganga kwnornu anu, anu kpa masi nganga kwnornu a' n' ọbochi Nyenwe a'.

¹⁵ Ka b' olile anya me vu n' m'kpoma n' mbom kpa me marn' mmuma o va, ma anu nweh'ia ngozi okpuku lawuru.

¹⁶ M marn' m mmuma o vakwnusi anu kpa me neezne Masidonia n' nga me jeehi Masidonia hiehna. Anu znernu eyinu m aka m zne Judiya.

¹⁷ Nga me neeme ka, m mernu m a ewheke ewheke sa? M marn' m mmuma kwnornu nhne an' ẹhni m pioru, o kaa, "Owe, owe" n' "Ọza, ọza"?

¹⁸ K'ovu kpa Chiokike b' nye ezi ọka, izi me znirni anu b'uo izi "Owe" n' "Ọza."

¹⁹ Kwnornu n' Jizōsi Karaịsi Nnwō Chiokike nye Sajlasi n' Timoti n' me gbasaru n' esilawuru anu b'uo nye "Owe" n' "Ọza." K'ovu kpakara nhne b' "Owe" hne o z'.

²⁰ Jizōsi neeji "Owe" neemezu kpakara mkwna Chiokike kweru. Hite n' rime Jizōsi a naaka, "Amim" neenye Chiokike igwugwu.

²¹ O b' Chiokike nye neeme a' n' anu gwuzosi rikne n' rime Karaịsi, Chiokike jiri aka a h'ohia a'.

²² nye bniasiri aka nyenwe n' risi a', nye kesiri a' Enine Nsọ n' rime m'kpoma a' neemesi nhne o b'itannu a' rikne.

²³ M noosukwu Chiokike nye akebe m, o magwu m'kpoma m, nhne mernu me vala Kōrinti b' m gharu o bigbo anu.

²⁴ A za neeme ẹhni a' lele n' o b' a' nwe anu, ele naakanu anu nhne anu jeekweru.

Tn̄n̄uma, aī n̄u an̄u n̄oornuko ɛ̄nu ma ovu s̄o an̄u n'ōnu. An̄u gwuzoru kwem n'ōkwnata mkp̄oma an̄u.

2

¹ Ka b̄u nhne me kpebiri n̄u mkp̄oma m, m jāavakwnusi an̄u berere mee nhne joogbu an̄u igbugbu.

² O b̄uru me mee nhne gbu an̄u igbugbu, nyele jeeme ovu s̄o m n'ōnu? Okwolem nye wam me mernu nhne gbu a igbugbu.

³ Kam kpararu, me gbann̄u an̄u ɔkwukwo n̄u mb̄om, ɔ zi nga me varu, ele wam kwesiri o mee ovu s̄o m n'ōnu mee m nhne gbu m igbugbu. Kwnornu n̄u m maam n̄u an̄u joosno m nw̄udna.

⁴ M zi m n'awhn̄uwhnu k'agida kpa me ji igbugbu mkp̄oma n̄u agida anya-mini gban̄u an̄u ɔkwukwo, ɔ b̄uo ma o gbu an̄u igbugbu, k̄ovu o gesi n̄u m whn̄urnu m an̄u n'anya k'agida.

Ogbaru nye mmehie

⁵ O b̄uru n̄u nye ɔbula mernu nhne igbugbu, o m̄ene me kp̄oi, k̄ovu nhne gburu kpakara an̄u igbugbu mat̄i, me kw̄i k'agida.

⁶ Awhn̄uwhnu nye wam taru n'aka agida ele badn̄u zulem.

⁷ Bikno, an̄u gbarunu a, kasi a mkp̄oma, ɔ zi igbugbu a nyigbu a, mee mkp̄oma dna mba.

⁸ An̄u mee a ma ɔ mah̄ia n̄u an̄u whn̄urnu a n'anya n'ezi.

⁹ Ka b̄u nhne me kwno gban̄u an̄u ɔkwukwo, ma m mah̄ia m ma an̄u gwuzosiri rikne, noobno nsn̄i kpakara nhne me kann̄u an̄u.

¹⁰ O b̄uru n̄u an̄u gbarunu badn̄u nhne o mernu, m gbarulam masi. M gbarulam, ɔ b̄uru n̄u ɔ zi nhne ɔbula ke zi n̄u ɔ gbarunu, ka b̄u nhne me mennu an̄u n̄u ruwhnu Karāisi,

¹¹ ma Ekwensu gharu o megbu aī, kwnornu n̄u a magwu kpakara aghigho a.

Mkp̄oma ɔla mini P̄olu n̄u Torasi

¹² Nga me vaduru Torasi o zni izi ɔma Karāisi, Nyenwe aī gbanann̄u m ɔnu-mgbo izi ɔma.

¹³ K̄ovu n̄u enine m kw̄e ozukwa inwe kwnornu n̄u m whn̄una m nn̄wo nda m Tajosi, m ghasaru m be zne Masidonia.

Omegbu hite n̄u Karāisi

¹⁴ K̄ovu Chiokike nwe kpakara mmamma, nye mernu a snornu Karāisi tne eri omeri a. O ji aī mee ele badn̄u mah̄ia Karāisi, nhne ke n̄u lele ɛknarna ɔma ke noozute penupe ɔbula.

¹⁵ Kwnornu n̄u a b̄u nhne ɛknarna ɔma Karāisi ke neezekwnusi Chiokike n'esilawuru ele be n̄oognohia n̄u ele noowhu owhu.

¹⁶ N̄u hne ele noowhu owhu zi, a b̄u ɛknarna ɛnwu, hne ele be n̄oognohia zi, a b̄u ɛknarna b̄udnu. Nyele j̄oornuli ɛnu ka hna rikne kpa?

¹⁷ A b̄uo ele je izi ɔma Chiokike n̄oovu ah̄ia lele agida ele berere, k̄ovu a b̄u ele ezi, nookwu ezi ɔka Karāisi n̄u ruwhnu Chiokike lele ele Chiokike ziyaru.

3

Ele ɛnu ɔgba-nj̄o-ɛhni ikne

¹ A naanya risi n̄u rime ɛhni aī berere sa? A neeme lele ele berere, noopio ɔkwukwo ɔ kah̄ia nhne a b̄u ke a jeenye an̄u, m̄bu ke hi n'aka an̄u?

² An̄u n'iwhuru an̄u b̄u ɔkwukwo izi aī, be gbaru an̄u n̄u mkp̄oma aī ke ele badn̄u magwu, n̄oognwu masi.

³ Ka neegesi n̄u an̄u b̄u ɔkwukwo izi ke Karāisi ke hi n'aka aī. Be jile nki gba a n'olu rugwu, k̄ovu be ji Enine Chiokike zi b̄udnu gbas̄i an̄u n'ano-ɛhni ke mkp̄oma.

⁴ Ka b̄u okne ɔtukwasi ovu aī n̄u Chiokike hite n̄u Karāisi.

⁵ O b̄uo n̄u a nwernu rikne n̄u rime aī ke a kwesiri ɔ rn̄u ɛnu ka, k̄ovu ozu ozu aī hi n'aka Chiokike va.

⁶ Chiokike mernu aī a b̄uru ele zuru ozu n'ɛnu ɔgba-nj̄o-ɛhni ikne, ɔ b̄uo ke mkpuru ɔkwukwo, k̄ovu ke enine, kwnornu n̄u mkpuru ɔkwukwo neegweya ɛnwu, k̄ovu enine neenye b̄udnu.

Igwugwu ke ɔgba-nj̄o-ɛhni ikne

⁷ O b̄uru n̄u ɛnu ke ɛnwu be gbakwasiri n'olu rugwu vuru igwugwu va, ke mernu r̄umu Izireli nw̄e rikne legidne Mozizi anya n̄u ruwhnu, ɔ b̄u n'ezi n̄u igwugwu a jaagawhe,

⁸ ndaa kpa igwugwu ke ɛnu Enine jaahna?

⁹ O b̄uru n̄u ɛnu ke noovuya ɛnwu nwernu igwugwu, le kpa ɛnu ke neegweya ome mma jaahna n'igwugwu karukwo.

¹⁰ N'ez̄i, nhne ke nwernu igwugwu nw̄ema igwugwu kwnornu n̄u nhne ke kakwo n'igwugwu wh̄yaru iwhne.

¹¹ O b̄uru n̄u nhne ke jaaz̄i ige mat̄i vu igwugwu, le kpa nhne ke jaaz̄i ɔkwunokwunu jaahna n'igwugwu karukwo.

¹² Kwnornu n̄u a nwernu oila anya ke n̄u kpa, a nwernu ɔnu rikne nookwu ɔka.

¹³ A n̄u lele Mozizi nye jiri ikpe kp̄usni ruwhnu a ma ele Izireli gharu ɔ whn̄u okwukwo ogbu marna marna ke naagawhe agawhe.

¹⁴ Mkp̄oma be zi k̄oriri n'ɔchichiri, tem du tna. Ikpe wam be jiri kp̄usni zi k̄oriri nga be n̄oognwu ɔgba-nj̄o-ɛhni ɔknani. Be kp̄umene

ikpe wam, Karaṣi kpōi nwernu rikne o kpume a.

¹⁵ Dụ tna, ige ọbula be nọogwu Iwu Moz-izi, ikpe wam nookpusni mkpoma be.

¹⁶ Kọvu ige ọbula nye ọbula zneknusiri Nyenwe aị, be jeegweme ikpe wam.

¹⁷ Nyenwe aị bụ Enine, hne ọbula Enine Nyenwe aị zị, badnụ jeenwernu ẹhni a.

¹⁸ Kọvu kpakara aị, ji ruwhnu be jile ikpe kpusni neele igwugwu ke Nyenwe aị lele nhne a nọowhnu nụ nyno, a naagbanwo hite n'otu igwugwu bna n'igwugwu berere. Enine Nyenwe aị neeme nhne ka.

4

Ekwnu ke zị nụ rime ite rịzna

¹ Kam kpayarụ, hne Chiokike nyernu aị ẹnu ka hite n'obirizi a, a jeeke inwe gwụ aị.

² Tnụnuma, a sigbasiri kpakara nhne ke tugwaru otugwa ke tų iwhnerne. A zá nọogho aghigho mọbu mee ikwu-ọnu Chiokike aghalaghala. A gwuzo nụ ruwhnu Chiokike nookwu ezi ọka, neegesi ele badnụ nụ a bụ ele ezi ọka.

³ Ọ bụru nụ be tugwaru izi oma a nọokpo okwo a otugwa, ọ bụ n'anya ele noowhu owhu.

⁴ Chi ke ọwa ka mernu mkpoma ele ke kwé ekwe gba ọchichiri. O mernu be whnuna iwhe ke izi oma nọomukwasi be, bụ izi oma igwugwu Karaṣi, nye bụ oyiyi ke Chiokike n'ezi.

⁵ Kwnornu nụ a zá nọokponu ẹhni aị okwo, kọvu a nọokpo okwo Jizosi Karaṣi bụ Nyenwe aị, aị n'iwuru aị bụ ele izi anụ kwnornu Karaṣi.

⁶ Chiokike wam ke karụ, "Iwhne nū n'ọchichiri," bụ otu Chiokike wam ke mernu iwhe a mụkwasi nū mkpoma aị, ma a mụhia igwugwu Chiokike ke a nọowhnu nū ruwhnu Karaṣi.

⁷ A nwernu ẹkwnu ka nū rime ite rịzna, ke neegesi nū rikne ke kakwo rikne hi nū Chiokike, ọ bụo nū rime aị.

⁸ Be naakpakna aị ẹhni n'apna ọbula, kọvu inwe zá nọogwu aị, a neenwe mkpoma lawuru, kọvu inwe zá nọogwu aị.

⁹ Ele irno naakpakna aị ẹhni, kọvu Chiokike ghásala aị etekne. Be mekasi aị ẹhni, kọvu a nwuna.

¹⁰ A wu n'ẹhni aị ẹnwu Jizosi ige ọbula, ma bụdnụ Jizosi whụya iwhe nū rime aị.

¹¹ Aị ele zị bụdnụ zị n'ọnu ẹnwu ige ọbula kwnornu Jizosi, ma bụdnụ a whụya iwhe n'ano-ẹhni aị ke nọonwu ọnwu.

¹² Kam kpayarụ, ẹnwu nọornu ẹnu nū rime aị, kọvu bụdnụ zị nū rime anụ.

¹³ Be gbarụ n'okwukwo nsọ, kaa, "M kwuru m ọka kwnornu nū m kweru m." A ji otu

enine ọkwnata ovu wam kwu ọka kwnornu nū a kweru ekwe.

¹⁴ A magwụ nū Chiokike wam ke mernu Jizosi hi n'ẹnwu lizọ, jeeme a snornu Jizosi hi n'ẹnwu lizọ masi, mee aị nū anụ gwuzoro nū ruwhnu a.

¹⁵ Kpakara nhne ka bụ kwnornu anụ, ma oru ke naabanụ anụ ọba dnu agida ele badnụ, ma be tnu Chiokike mmamma k'agida, neenye a igwugwu.

¹⁶ Kam kpayarụ, inwe zá nọogwu aị, ọ bụ n'ezi nū a naata ẹhni n'ano-ẹhni aị, kọvu badnụ ke enine aị zị ikne ikne hite n'ọbochi dū n'ọbochi.

¹⁷ Awhnụwhnu matị ka a naata neegweyanụ aị okne igwugwu ke zị ọkwnukokwnu ke kakwo kpakara awhnụwhnu.

¹⁸ A zá neele anya nhne a nọowhnu anya, kọvu nhne a whnụ anya. Kwnornu nū nhne a nọowhnu anya zị ige matị, kọvu nhne a zá nọowhnu anya zị ọkwnukokwnu.

5

Oro aị n'oligwe

¹ A magwụ nū ọ bụru nū ọro-eka ke ọwa ka, ke bụ ẹhni aị dnarnu, Chiokike wunnu aị ọro berere n'oligwe ke jaadazigidne, ke be jile aka badnụ wu, ke jaazị tim ttm.

² Kam kpayarụ, a nọosnu idne k'agida, ọ nọogwu aị ma a wuru nū rime ọro aị ke zị n'oligwe,

³ ma a woru a lele iwo, a jọbu ele gba ẹto.

⁴ Hne a zị kōriri n'ano-ẹhni ka, a zị nọosnu idne nū rime awhnụwhnu, ọ bụo nū a piuru ọ whọga n'ano-ẹhni ka, kọvu ma be wosi aị ano-ẹhni ke oligwe, ma Chiokike gbanwo ano-ẹhni aị ke nọonwu ọnwu nū ano-ẹhni ke zị ọkwnukokwnu.

⁵ Chiokike n'iwuru a kpuru aị ma a jikn-ernu ọ gbanwo ka, o nyernu aị Enine a ma ọ bụru nhne neemesi kpakara nhne jaava rikne.

⁶ Kam kpayarụ, mkpoma siri aị rikne ige ọbula. A mahiaru nū nga a zị n'oro aị n'ano-ẹhni, a zila hne Chiokike zị.

⁷ Kwnornu nū a noowu bụdnụ hite n'okwnata mkpoma, ọ bụo nū nhne anya nọowhnu.

⁸ Mkpoma siri aị rikne, ọ jaamasị aị a whọga n'ano-ẹhni ka, wuru hne Nyenwe aị zị.

⁹ Ke kakwo, a piuru o mee nhne jaamasị Chiokike, ma a wu hne Nyenwe aị zị, mọbu a zị n'owa ka.

¹⁰ Kwnornu nū kpakara aị joogwuzo nū ruwhnu ngadna ikpe Karaṣi, ma nye ọbula nahoru ọgwo ẹnu kpakara nhne a rnuru nga a zị bụdnụ, mọbu nhne oma mọbu nhne bụo oma.

Badnu nū Chiokike ziri n'udno

¹¹ Hne a mahjaru o tu ogwnu Chiokike, a naarijasno ele badnu be vakwnusi Chiokike. Chiokike mazuru ai, m neele anya nu anu mazuru ai masi n'ehiche anu.

¹² A za naaja ehni ai n'anya anu berere, kovu a neenye anu oghere ma anu gweru ai nyaa risi, ma anu mahja nhne anu jaasa ele ji nhne be n'ogwnu nu ruwhnu badnu naanya risi kakwo nhne zi nu mkpoma badnu.

¹³ Anu neeche nu a bu ele era naagba? O bu kwnornu Chiokike. Kovu o buru nu a bu ele anya dnornu, o bu kwnornu anu.

¹⁴ Qwhnun'anya Karaisi neeme a mee kpa a neeme. A magwu nu otu badnu nwuhianu kpakara badnu enwu, ka gesiri nu kpakara badnu snornu a n'enwu.

¹⁵ O nwuhianu kpakara badnu enwu, ma ele zi budnu gharu o wunu ehni be budnu, kovu wunu Nyenwe ai nye nwuhianu be enwu, ke hiri n'enwu lizo masi.

¹⁶ A za neele badnu anya nu ruwhnu lele kpa ele berere neele, o bu n'ezi nu o bu kpa a leru Karaisi nu mbom. Kovu a za neeme kpm kitna.

¹⁷ O buru nu nye obula zi nu rime Karaisi, o bu nye be kpughariri ikne, nhne oknani whelem, be ghōlam nhne ikne.

¹⁸ Kpakara nhne ka hi n'aka Chiokike va, nye hiteru nu Karaisi mee ma ai nu ya ziri n'udno, nyee masi ai ernu ma a mee ya nu ele badnu ziri n'udno.

¹⁹ Chiokike hiteru nu Karaisi neeme ma ya nu kpakara ele badnu ziri n'udno. Chiokike za n'ogwnu mmehie be megidne be. O nyernu ai ernu a mee ya nu ele badnu ziri n'udno.

²⁰ A bu ele naadnasni anya Karaisi, Chiokike zi nu rime ai naarijasno. A ji Karaisi naarijasno anu, anu mee ma anu nu Chiokike ziri n'udno.

²¹ Karaisi mene mmehie, kovu Chiokike mernu a o buru mmehie kwnornu ai, ma a hite nu rime a kehja igwe nu ome mma ke Chiokike.

6

¹ Lele ele be nu Chiokike sno n'ornu ernu, a naarijasno anu kwé oru Chiokike anu nahjaru buru nhne etekne.

² Ka bu nhne Chiokike kwuru, "M nurnu m anu n'ige o gesi anu ruwhnu oma, m yinu m anu aka n'obochi oznohia."

Anu bno nsnj, kitna bu ige o nahoru ruwhnu oma Chiokike, kitna bu obochi oznohia.

³ A piole badnu obula piohia nhne oju n'ernu ai, kpayaru a kwéle o bita nhne jokpobi badnu ochi n'ogodo apna.

⁴ Kovu nu kpakara nhne a neeme, a neegesi ehni ai lele ele ernu Chiokike hite n'osnuta mkpoma nu rime awhnuwhnu, nu nhne siri rikne, nu nhne igbugbu,

⁵ ma oli nhne, ma nu oro ikelu, nu mkpako, nu ernu rikne, ma nu oka anyarna abali, ma nu ogwnu wiri,

⁶ ma nu ozi richna, ma nu nhne omuma, nu ndidi, ma nu ovu oma, hite n'Enine Nso, n'ezi oka qwhnun'anya,

⁷ hite n'okwu ezi oka nu rikne Chiokike, ya nu mgwna ogwnu ke ome mma nu akarikw-nunga ma nu akarita.

⁸ A nwernu oson'anya agwna ige, agwna ige be ledna ai anya, agwna ige ele badnu kpari ai, agwna ige be znarni ai. Be neeme ai ele aghalaghala, kovu a bu ele kwu ezi oka.

⁹ A bu ele be ma, kovu kpakara ele badnu magwu ai. A nu lele ele n'ogwu onwu, kovu a zi koriri budnu, awhnuwhnu a naata nwée rikne gbū ai.

¹⁰ A bu ele mkpoma so n'onu, kovu a nwernu snarnima, ele mboni, kovu neeme ele berere ele eze. O za nhne a nwernu, kovu kpakara nhne bu ke ai.

¹¹ Anu ele Kōrinti, a kpumernu mkpoma ai kwunu anu ezi oka.

¹² Anu kpusnirni mkpoma anu megidne ai, o buo ai megidne anu.

¹³ Anu menu ai kpa a mennu anu, m nookwu lele nu anu bu rumu m, anu kpume mkpoma anu.

Odo aka nu nsnj gbasiri ele kwé ekwe

¹⁴ Anu nu ele kwé ekwe knékota ehni anu n'otu. Kini bu nhne ome mma nu aruru-eli nwekoru? Ndaa ozi n'otu ke iwhne n'ochichiri nwekoru?

¹⁵ Mōbu ndaa nhne Karaisi nu Ekwensu neekeko? Kini bu nhne nye Karaisi nu nye kwé ekwe nwekoru n'otu?

¹⁶ Ndaa okwerikota ke Oro Nso Chiokike nu renwu nwernu? Kwnornu nu a bu Oro Nso Chiokike ke zi budnu, lele kpa Chiokike kwuru,

"M joosno be wuru, zne izne n'esilawuru be. M jobu Chiokike be, be jobu ele ke m."

¹⁷ Kam kpayaru, "Anu hi nu rime be whya, ziri ichne, anu kpātu nhne zila richna aka, m jaanabnanya anu," ka bu nhne Nyenwe ai kwuru.

¹⁸ "M joburu Nda anu, anu joburu rumu m rukna nu rumu m rinya.

Ka bu nhne Nyenwe ai ke Meli Nhne Dum kwuru."

7

¹ Ele me whnurnu n'anya, hne a nwernu kpakara mkwna ka, a mee ehni ai ma

a zĩri riçhna ma n'ano-ehni ma nu rime enine, whoga nu kpakara nhne ke neemeru emeru, ma a zĩri nsõ kpam kpam noowu budnu ke nõotu ogwnu Chiokike.

Ovu oso n'õnu Põlu

² Anu gweru aĩ kwnornu nu o za badnu õbula a mejõru, mõbu lulu, mõbu megbu n'apna õbula.

³ Nhne me kwno nookwu ka buo ma ikpe ma anu, lele kpa me kwuru nu mbõm, anu zi aĩ mkpa nu mkpõma, ma a snornu anu zĩri budnu mõbu a snornu anu nwu enwu.

⁴ M tukwasiri m anu mkpõma k'agida, m ji m anu noolu õnu. Anu mernu mkpõma neesi m rikne, mkpõma nõoso m n'õnu nu rime awnhuwhnu.

⁵ Nga a vaduru Masidonia, a nwée ozukwa inwe n'ano-ehni, be kpaknarnu aĩ ehni n'apna õbula, ogwnu n'ederezi, ogwnu nu mkpõma.

⁶ Kõvu Chiokike ke naakasi ele inwe gwuru mkpõma kasiri aĩ mkpõma nga Tajtosi varu.

⁷ O buo kwnornu nu Tajtosi varu kpõi, kõvu nkasi mkpõma anu nyernu a. O kannu aĩ nhne gbasiri obirizi anu, nu nhne igbugbu nu nhne gbasiri m meturu anu nu mkpõma. Ka mernu mkpõma so m n'õnu k'agida.

⁸ O burubedi nu õkwukwo izi me gbaru vuteru anu nhne igbugbu, m nwée m mkpõma lawuru nu me gbaru a. Nu mbõm, o mernu m mkpõma lawuru, nga me whnrnu nu õkwukwo me gbaru vuteru anu nhne igbugbu ige mati.

⁹ Kĩtna, mkpõma nõoso m n'õnu, o buo nu m vuteru anu nhne igbugbu, kõvu kwnornu nu nhne igbugbu anu mernu anu tuhnasna mkpõma. Chiokike jiri nhne igbugbu anu rnũ ernu, ka neegesi nu o za nhne ojo a mernu anu.

¹⁰ Kwnornu nu nhne igbugbu ke Chiokike noodubna badnu o tuhnasna mkpõma du õznohia, ka nwée mkpõma lawuru. Kõvu nhne igbugbu ke owa noodubna n'enwu.

¹¹ Anu le kpa nhne igbugbu ke Chiokike kpahĩaru anu jiknenu o goru õnu anu. Nhne ka kpahĩaru ovu owe ehni, o ji anu anya, o neerne anu lele bekwnu, o meturu anu nu mkpõma, anu jiknenu o ta nye mmehie awnhuwhnu. Anu gesiri ehni anu lele ele ikpe mana.

¹² O buo n'ezi nu me gbaru õkwukwo izi wam, o buo kwnornu nye mernu nhne ojo mõbu nye o mejõru. Kõvu m gbaru m ma anu mahĩa nu ruwhnu Chiokike kpa anu noobnonu aĩ nsĩ.

¹³ Ka mernu mkpõma si aĩ rikne.

O buo nu mkpõma siri aĩ rikne kpõi, Tajtosi mernu mkpõma so aĩ n'õnu, kpa anu mernu a o nwudna nga o vakwnusiri anu.

¹⁴ M ji m anu noolu õnu nu ruwhnu a. Anu kpásiila m iwhnerne. A nookwunu anu ezi oka ige õbula, kpam masi, a jiri Tajtosi luu õnu nu ruwhnu anu, anu whnrnu nu o bu ezi oka.

¹⁵ Ka mernu õwhnun'anya o nwernu hne anu zi si rikne, nga o neechenwanya anu noobno nsĩ, kpa anu jiri ogwnu nu õznu biri biri nabnanya a.

¹⁶ Mkpõma nõoso m n'õnu nu m nwernu rikne tukwasi anu mkpõma.

8

Nkesi ke nye Karaĩsi

¹ Rũmu nda m, a pioru ma anu mahĩa nhne Chiokike jiri oru a rnũ nõõbako Chiokike ke zi nu Masidonia.

² O bu n'ezi nu be gawheru agida okpagbu, kõvu okne mkpõma oso n'õnu mernu be gweya agida nkesi, o bu n'ezi nu be bu ele owa nyĩrni.

³ M naagbanu be akebbe nu be nyernu kpa be nwernu rikne, n'ezi, kakwo kpa be nwernu rikne, hite nu mkpõma be.

⁴ Be rĩasnosi aĩ rikne ma be nwernu oghere yisi aka be n'oyinu ele Chiokike ke zi nu Judiya aka.

⁵ Be mernu nhne a tũla anya a, be beru osno gweru ehni be nyega Nyenwe aĩ, nyee kwno aĩ hite n'echiche Chiokike.

⁶ Kam kpayaru, a rĩasno Tajtosi nye panĩzoru ernu ka, rnũrnu a zne nu ruwhnu mee anu rnũzu ernu õwhnun'anya ka.

⁷ Anu nwernu kpakara nhne, okwnata ovu, nu ikwu-õnu, nu nhne omuma, nu ezi oka zuru ozu nu õwhnun'anya anu nwernu hne a zi. Anu buru masi ele zuru ozu nu oru ke nkesi.

⁸ M za m neenye anu iwu. Kõvu m kannu m anu kpa ele berere nwernu mkpõma o kesi be nhne, ma m mahĩa m ezi oka ke õwhnun'anya anu hite nu nhne anu jeenye be.

⁹ Anu magwu oru ke Nyenwe aĩ Jizõsi Karaĩsi, o bu n'ezi nu o bu nye eze, kõvu o mernu ehni a wõmboni kwnornu anu, ma o mee anu buru ele eze hite nõdna mboni a.

¹⁰ Ka bu ezni me neezni anu, o jõoburu oma o buru nu anu rnũzne ernu anu panĩzoru otu awha wheru ewhe. Anu bu ele mbõm panĩzoru ernu wam, ma ele mbõm jiknenu o rnũ a.

¹¹ Anu zne nu ruwhnu nõornu a, rnũkwo a masi. Anu zĩri gnarnagnarna nu o rnũkwo ernu wam hite nu nhne anu nwernu, lele kpa o zi nga anu marnu mmũma a.

¹² O buru nu anu nwernu mkpõma nkesi, Chiokike jaanarnu nkesi anu hite nu nhne anu nwernu, o buo hite nu nhne anu nwée.

¹³ A zá nookwu ma ele berere nwedna inwe ozukwa inwe, anụ bụru ele zị nụ mkpa, kọvu ma nye ọbula hnata n'otu.

¹⁴ Kịta, agịda nhne anụ nwernu anụ jeenye be nụ mkpa be. Ige berere, be jeenwe nhne be jeenye anụ nụ mkpa anụ, ma nye ọbula hnata n'otu.

¹⁵ Lele kpa be gbarụ a n'okwukwo nsọ, "Nye chikataru agịda nwée kakwo nye wam ke chikataru matị, ke ọ chikataru zunnu a."

Be ziznenu Taitosi

Kōrinti

¹⁶ M nọtunu Chiokike mmamma nye yisiri nụ mkpọma Taitosi, nhne gbasiri anụ lele kpa ọ zị nụ mkpọma m.

¹⁷ O kweruru, ọ bụo kwnornu nụ a kannu a, kọvu o jiknenu hite nụ mkpọma a ọ va.

¹⁸ A neeziya ya nụ otu nnwọ nda ke nwernu igwugwu nụ kpakara ọgbako Chiokike n'okpo okwo izi oma.

¹⁹ Tụkwasi nụ ka, ọgbako Chiokike hōhiaru a ma o snornu aị vuru nkesi ka zne Judiya. Ẹnu ka neenye Nyenwe aị igwugwu, neegesi nụ a nwernu mkpọma o yisi aka n'ẹnu ka.

²⁰ A neeze ẹhni aị ọ zị badnụ ọbula ma aị ikpe kpa a neeke agịda nkesi.

²¹ A naagbalị o mee nhne kwesiri ekwesi, ọ bụo n'anya Chiokike kpọi, kọvu ma n'anya ele badnụ.

²² A neeziya otu nnwọ nda berere yisinu be, bụ nye a kparụ iru agịda ige, whnụ nụ a nwernu rikne kwnata a mkpọma. Nụ olu ka, kịta, o jiknenu o yinu anụ aka, ke kakwo kpa ọ tükwasiri anụ mkpọma.

²³ Nhne gbasiri Taitosi, ọ bụ nye me nụ a nọornu ẹnu, neenyinu anụ aka. Rụmu nda ele ya nụ be sno bụ ele dnasini anya ọgbako Chiokike, be bụ igwugwu Karaịsi.

²⁴ Anụ gesi be ọwhnun'anya anụ ma kpakara ọgbako Chiokike whnụ nhne kpayarụ a jiri anụ luu ọnu n'ezi.

9

O yinu ele Karaịsi aka

¹ Ọ zá mkpa nụ me jaagbanụ anụ okwukwo gbasiri o yinu ele Chiokike ele zị nụ Judiya aka.

² M maam nụ anụ jiknenu o yinu be aka, m ji m anụ lunu ele zị nụ Masidonia ọnu. M kanu m be nụ rụmu nda aị ele zị nụ Akaya jiknenu o yi aka hite n'awha ke wheru ewhe. Nga be nurnu nụ anụ jiknenu o kesi nhne, mkpọma be kwnalizọru o mee kpam.

³ Kọvu m neeziya rụmu nda ka, ma ọnu a jiri anụ luu gharu ọ bụ nhne etekne. Lele kpa me kwuru, anụ bīta nhne nkesi anụ,

⁴ ọ zị ele Masidonia snornu m va whnụ nụ anụ jiknennu, ọ jọobunu aị nhne iwchnerne, ke kakwo iwchnerne jọtutu anụ k'agịda.

⁵ Kam kpayarụ, me riasno rụmu nda ele ka be beru ọsno va, ma be whnụ anụ jaabita nkesi anụ kweru mkwna sụ me va. Ka jeegesi nụ anụ nyernu hite nụ mkpọma anụ, ọ bụo nụ be kwnagidnenu anụ.

⁶ Anụ chenwanya nụ nye kpasiri mkpuru matị jọoghohia mkpuru matị, nye wam ke kpasiri agịda mkpuru jọoghohia agịda mkpuru.

⁷ Nye ọbula nyee lele kpa o kpebiri nụ mkpọma a, ọ bụo nụ mkpọma lawuru kwnornu nụ be karu be nyee. Chiokike whnurnu nye wam jiri mkpọma ọma a nyee n'anya.

⁸ Chiokike nwernu rikne o nyee anụ karukwo kpa ọ zị anụ mkpa, ma anụ nwernu nhne kpakara ige, nụ karukwo kpa anụ jeeji o mee nhne bụru ọma.

⁹ Lele kpa be gbarụ a n'okwukwo nsọ, kaa, "O neenye ele mboni k'agịda, ome mma a jaazi ọkwnukokwnu."

¹⁰ Chiokike, nye neenye nye ẹnu ẹkwu mkpuru ọkpukpa nụ wiri ele badnụ jeeri, jeeme kpakara mkpuru anụ so oso, mīnya agịda mkpuru hite nụ nkesi anụ nyernu hite nụ mkpọma ọma anụ.

¹¹ O jeeme anụ ba agịda nụ kpakara nhne, ma anụ bụru ele jeekesi ele badnụ nhne ige ọbula, ke jeeme ele badnụ tūnu Chiokike mmamma kwnornu anụ.

¹² Ẹnu ọma ka anụ nọornu zá neeme ele Chiokike riji rụwho kpọi, kọvu o neeme ele badnụ nọtunu Chiokike mmamma k'agịda.

¹³ Lele kpa ẹnu ọma ka neegesi nụ anụ bụ ele ezi ọka, ele badnụ jaaznarni Chiokike kwnornu nụ anụ noobno nsnj izi ọma Karaịsi ke anụ kwuhjaru, anụ neeji mkpọma ọma neekesi be nụ ele berere nhne.

¹⁴ Be jeeji mkpọma ọwhnun'anya be kpenu anụ okpukpe kwnornu oru Chiokike ke zị agịda hne anụ zị.

¹⁵ Ngwa ma a tūnu Chiokike mmamma kwnornu nkesi a ke ọnu jọkowali.

10

Pọlu gọru ọnu ẹnu a

¹ Mawa Pọlu, naariasno anụ, me nye be karu nụ m bụ m nye mési rikne nga me zị nū ruwhnu anụ, kọvu nye nwernu anya rikne hne anụ zila. M ji m ọzi wōhnerne nū mkpọma ọma Karaịsi, naariasno anụ, anụ bikno,

² anụ mée m, m bụru nye anya rikne hne anụ zị nga me varu, kwnornu nū m nwernu m rikne nwe anya rikne n'ehni ele nookwu nū a noowu bụdnu lele kpa ele ọwa noowu.

³ Ọ bụ n'ezi nū a zị n'ọwa, kọvu a zá nọolu ọgwnu lele kpa ele ọwa nọlu.

⁴ Kwnornu nū mgwna ogwnu aī būo ke badnū, kọvu ọ zī rikne nū Chiokike ke naakwnadna hne be wusiri rikne. A naakwnadna kpakara agirigo

⁵ nū kpakara nhne ke noovulizọ ẹhni a olu megidne ọmahia Chiokike, a nọodoru kpakara echiche n'ogwnu mee be bnonu Karaįsi nsni.

⁶ Nga anū ghoru ele bnazuru nsni, a jeejknernu ọ ta kpakara nye ọbula ke zá noobno nsni awhnūwhnu.

⁷ Anū neele kpakara nhne anya n'olu kpọi. Ọ zī nye ọbula n'esilawuru anū ke neeche nū ọ bụ nye Karaįsi? Nye wam che kwno echiche, kwnornu nū a bụ ele Karaįsi lele nye wam.

⁸ Ọ buri bedi nū me gweru rikne Nyenwe aī nyernu aī mee oknomokno k'agida, iwhnerne jọotu m. Nyenwe aī nyernu aī rikne o wulizọ anū olu lele ọro, ọ būo rikne ọ kwnadna anū akwnadna.

⁹ M'póle m o jī ọkwukwo izi me gbannū anū kpasī anū ogwnu.

¹⁰ Otu badnū jaakaa, “Ọkwukwo Pọlu naagba siri rikne, nọotu ogwnu, kọvu, nga aī nū a ziri, o nwée rikne, ikwu-ọnu a bụ nhne etekne.”

¹¹ Nye wam mahia nū ọ zá nhne zī ichne nū nhne a gbarū n'ọkwukwo nga a zī ikere nū nhne a jeeme nga aī nū anū zī.

¹² Kwnornu nū a zá nọogwnu ẹhni aī n'esilawuru ele jī ẹhni be nọotu nhne zī olu k'agida. Ele jī ẹhni be nọotunu n'ẹhni be, neekpe ẹhni be ikpe n'iwu ke be nyernu, bụ ele nwée akọnliche.

¹³ Kọvu nū oknomokno aī zá neewhe hne a nwernu rikne, oknomokno aī bụ n'ẹrnu Chiokike nyernu aī, bụ ke duru nū hne anū zī.

¹⁴ Hne ọ bụ nū ẹrnu aī zī n'esilawuru anū, a gáwhele a. A vuru izi ọma Karaįsi vakwnusi anū.

¹⁵ A zá neeji ẹrnu ele berere rnurnu naanya risi. Ẹrnu kam wheru hne Chiokike nyernu. Kọvu a neele anya nū ọkwwnata mkpọma anū jooso oso, ma a nwe rikne rnu agida ẹrnu n'esilawuru anū dū hne Chiokike nyernu aī.

¹⁶ Nga wam, a jeenwe rikne kpọ okwo izi ọma nū mba berere whe anū. Kọvu a jéeji ẹrnu ele berere rnurnu nyaa risi.

¹⁷ Lele kpa ọkwukwo nsọ kwuru, “Nye ọbula ke jeeme oknomokno, o mee oknomokno nū nhne Nyenwe aī rnurnu.”

¹⁸ Kwnornu nū nye naaja ẹhni a mma bụ nhne etekne, kọvu nye wam Nyenwe aī naaja mma bụ nhne.

11

Pọlu nū ele izi aghalaghalala

¹ Ọ jaamasī m ọ buri nū anū jeenwe rikne nagidne iwhnirniwhno m, bikno, anū gweru m.

² Mkpọma m zī nū hne anū zī lele Chiokike, anū nū lele nyerinya máa nyerukna zī snam me kweru ọ nīsi otu badnū, ke bụ Karaįsi.

³ Kọvu ogwnu nọotu m nū be joolulu mkpọma anū, lele kpa agwọ wam jiri aghigho rnawhu Ivu, mee anū gharu o gweru kpakara mkpọma anū kpenu Karaįsi.

⁴ Kwnornu nū anū jiri ẹso nahoru nye wam ke znirni anū Jizọsi berere būo Jizọsi ke a znirni anū, nū enine berere nū izi ọma berere ke būo ke a znirni anū.

⁵ Kọvu ọ būo nū m zī m matī kakwo ele izi ka anū kaa nū be ka m mma.

⁶ Nyele ma, m máam kpa be kwu ọka sọ n'ọnu, kọvu m magwū m nhne, a mernu ka whūya iwhne hne anū zī ige ọbula ma nū ọnodi ọbula.

⁷ M náge m anū nhne ọbula nga me znirni anū izi ọma Chiokike, m gwednarnū m ẹhni m ẹli ma anū buri ele be gwelizọru olu. Kí ọ bụ nhne ọjọ me mernu sa?

⁸ M nahiaru m ọgbako Chiokike berere nhne me jiri nọornu ẹrnu n'esilawuru anū.

⁹ Ige me nū anū zī, m kpáknage m anū ẹhni nū iwai nga me zī nū mkpa, rumu nda ele hi nū Masidonia va gweyaru kpakara nhne zī m mkpa. Lele kpa me neeme, m jọobu ivu nyee anū tna mọbu ekile.

¹⁰ Hite n'ezi ọka Karaįsi ke zī nū rime m, ọ zá badnū ọbula ke zī n'Akaya jeenwe rikne kpusni ọnu m, kpa me naanya risi.

¹¹ Ndaa nhne me jiri kwu kpa? Me whnuge anū n'anya sa? Chiokike magwū nū m whnurnu m anū n'anya.

¹² M jaazī kọriri neeme kpa me neeme, ma ele izi ka gharu o nwe oghere be noopio gweru luu ọnu, kaa nū be nū aī neeme otu nhne.

¹³ Be bụ ele izi aghalaghalala, be būo ezi, be jī ẹrnu be naagha ogha, ma be nū lele ele izi Karaįsi n'ezi.

¹⁴ O jī anū anya, Setani n'iwuhuru a gbanwornu ẹhni a lele enine izi ke iwhne.

¹⁵ Ọ būo okne nhne ọ buri nū ele ẹrnu a gbanwornu ẹhni be ma be nū lele ele ẹrnu ome mma. Be jeeji aka ẹrnu be kwū be ogwo ẹrnu.

Awhnūwhnu Pọlu lele nye izi Karaįsi

¹⁶ M nookwu kwno a berere, ọ zá nye kwu m nye iwhnirniwhno. Ọ buri nū ọ bụ nhne me bụ, anū gweru m kpam, ma m gweru m nhne matī luu ọnu.

¹⁷ Nhne me nookwu kịtna būo nhne Nyenwe aī pioru me kwu, ke gbasiri olu ọnu ka, m nookwu lele nye iwhnirniwhno.

¹⁸ Agida ele badnu noolu onu lele kpa ele badnu noolu, m jeeme kpa.

¹⁹ Anu bu ele ji ovu oso n'onu nagidne ele iwhnirniwhno, o bu n'ezi nu anu bu ele nweru akoniche.

²⁰ Anu nagidneru ele mernu anu lele ohi, nahoru anu nhne, kwnagharị anu, gwuzote ehi a, gbọ anu aka nu nti.

²¹ Ka nọtu m iwhnerne nu a nwée rikne mee anu kpa.

Kovu o buru nu nye obula luu onu nhne obula, m jeeme masi kpa. M nookwu lele nye iwhnirniwhno.

²² Be bu ele Hiburu? M bu m masi. Be bu ele Izireli? M bu m masi. Be bu ele hi n'avnuru Eberham? M bu m masi.

²³ Be bu ele eru Karaisi? Era naagba m sa? M bu m nye eru Karaisi kakwo be. M noru eru kakwo be. M lala m ikelu agida ige kakwo be, be pnjarnu m nhne k'agida kakwo be, agida ige o gwnarnu matị m nwu.

²⁴ Mgba isne ele Ju pnjarnu m nri eto nu tolu onu mbinibini.

²⁵ Ele Rom liri m isisi mgba eto, be turu m akaworugwu otu mgba, ogbo me zi nu rime a kpuru mgba eto, m daziri m nu rime mini iwhnehnie nu abali.

²⁶ Kpa me neeze izne ige obula, m neeze budnu nu rime mini, ma n'aka ele buznu, m neeze budnu n'aka ele Ju ma n'aka ele buo ele Ju. Nhne oze budnu nu rime eli-ohna, ma nu rime eli-ikpa, neeze budnu n'okne abaji, neeze budnu n'aka rumu nda aghalaghal.

²⁷ M noru eru, nodoli ndoli, ma n'oka anyarna abali, ma wiri ogwugwu nu akpiri okpo bekwu, m dazila m agida ige nwée wiri o riri, ma nu iyi otutu, m nwée m iwo o kpusni eto.

²⁸ Be gweme kpakara nhne ka, nhne naakpa m kpakara obochi bu nhne gbasiri ogbako Chiokike.

²⁹ Ndaa nye rikne gwuru ke rikne gwulam? Ndaa nye dnabarnu nu mmehie ke mkpoma lala m mini, neerne m bekwu?

³⁰ O buru nhne be luu onu, m jeji kpakara nhne neegesi nu m bu nye nwée rikne noolu onu.

³¹ Chiokike nu Nda Nyenwe aji Jizosi, nye nwe oznami okwnukokwu, magwu nu m nookwu ezi oka.

³² Nga me zi nu Damasikos, nye nechi eli, nye zi nu mkpururu Eze Aretasi, bitaru ele neese onu-mgbo eli-ohna, be nwudne m.

³³ Kovu be yisiri m nu rime nkita garu n'onunu zi nu mkpo eli-ohna kwuhala m n'eli a, o bu kpa me jiri gbawhunahoru a.

¹ M joolu onu, o bu n'ezi nu o za nhne zi nu rime a. Kovu m jookwu oka gbasiri nhne m whnuru nu nhne Nyenwe aji kpumennu m.

² M maam otu nye Karaisi nri nu awha eno wheru ewhe, nye be gwelizoru zne oligwe k'eto. (O buru nu o bu n'ano-ehni mbo o buo n'ano-ehni, m maam, Chiokike kpọi ma.)

³ Berere, m maam ma o bu n'ano-ehni ma o buo n'ano-ehni, Chiokike kpọi ma.) Nhne me magwu bu nu

⁴ be gwelizoru badnu ka zne Paradasi. O nuru nhne ke be jaagbali n'okwukwo, nhne onu badnu jeenwe rikne kwu.

⁵ M jeji nyerukna ka noolu onu, m jeji ehi m noolu onu, okwolem nhne neegesi nu m bu m nye nwée rikne.

⁶ O buru nu me luu onu m jobu nye iwhnirniwhno, kwnornu nu m nookwu ezi oka. Kovu m joolu onu, o jaamasị m badnu obula gweru m kakwo kpa o gweruru m hite nu nhne o whnuru me mernu nu ke o nuru me kwuru.

⁷ Lele kpa o buo oma me vulizo ehi m olu kwnornu okne nhne me whnuru, be nyernu m nhne igbugbu n'ehni m. O bu nye izi ke Setani, ma o kpakna m ehi ma m gharu m o luu onu.

⁸ M rjoru m Nyenwe aji nhne gbasiri a mgba eto, ma o gweme a n'ehni m.

⁹ Ka bu nhne o saru m, "Oru m zunnem ji, iknema m zuru ozu nga i nwée rikne." Kam kpayaru, mkpoma noso m n'onu me luu onu nu m nwée m rikne, ma rikne Karaisi whya iwhne nu rime m.

¹⁰ Kam kpayaru, m bu m nye nwée rikne. Ele badnu naakpasị m iwhnerne, be ta m ahnuwhnu, be kpagburu m. Kpakara nhne igbugbu me gawheru kwnornu Karaisi jiri m ruwho. Nga me nwée rikne, iknema zi m n'ehni.

Ele Kōrinti meturu Polu nu mkpoma

¹¹ Anu mernu m mee lele nye iwhnirniwhno. Anu bu ele kwesiri o kwu nhne oma gbasiri m, kwnornu nu ele izi anu wam, ke anu kaa nu be ka m mma, béle m osno. O bu n'ezi nu o za nhne me bu.

¹² Kwnornu n'ezi, nhne neegesi nhne nye izi whya iwhne n'esilawuru anu. Be bu eru elekema, nu eru ndu-ehni nu eru rikne zi odo nu odo me jiri ndidi ru.

¹³ Ndaa nhne me mernu ogbako Chiokike ele berere ke me méne hne anu zi? O bu nu m kwéle m o buru nhne ivu rinya hne anu zi? Anu gbaruru m nhne ojo ka.

¹⁴ Ka jobu mgba eto me jikneru o vakwnusi anu. M joburu ivu rinya hne anu zi. Anu zi m kpa, o buo nhne anu nweru. O buo rumu naakpabitanu ele muru be ekwu, kovu ele nda nu nne naakpabitanu rumu be ekwu.

¹⁵ O jaamasị m o nyega anụ nhne me nwernu. Owe! M jeenye iwuhuru m nụ risi anụ ma m yisinu m anụ aka. Ka o jeeme anụ bọ whnụ m n'anya, lele kpa me whnurnu anụ n'anya k'agida?

¹⁶ Anụ jeekweru, nụ m bụo m ivu rinya nyee anụ. Hne me bụ nye aghigho, m ji m aghigho nwudne anụ.

¹⁷ Ndaa? Ele me ziyannu anụ, m jiri be nahoru anụ nhne sa?

¹⁸ M riasnornu m Tajtosi o va, ya nụ nye Karaịsi berere, anụ jaakaa nụ Tajtosi nahoru anụ nhne? Me nụ ya a jile otu enine mee nhne lele nụ a bụ otu badnụ?

¹⁹ Anụ neeche nụ a noopio o goru ełni aj nụ hne anụ zị? Óza! A nookwu oka nụ ruwhnu Chiokike lele ele Karaịsi, kpakara nhne a neeme bụ ma anụ bụru ele zị kwem lele ele a whnurnu n'anya.

²⁰ Ogwnu nọtutu m nụ me vadu n'esilawuru anụ, m jowhnu nụ anụ zị ichne, ke bụo nhne me leru anya a. Anụ jowhnu masị nụ m zị m ichne, ke bụo nhne anụ leru anya a. Ogwnu nọtutu m nụ m jowhnu oknorno nụ okwno-awụwa, mkpoma bekwnu nụ okewa, onu-ojo, izno, oknomoko nụ mkpakpo.

²¹ Ogwnu nọtutu m nụ me va berere nụ Chiokike m jeegwedna m ełi nụ ruwhnu anụ, m jaakwa ekwna kwnornu agida ele mernu mmehie ke kwéle o tũhnasna, hite nụ nhne zá rịchna be mernu, ke bụ ome oyi n'apna tũ iwħnerne.

13

Qdo aka nụ nsnj ipne-aznũ

¹ Ka jọbu mgba ęto me naava lekasi anụ. "Kpakara nhne be bnornu badnũ, jeenweriri ele akebne lawuru mọbu ęto," lele kpa okwukwo nsọ kwuru.

² Lele kpa me kannũ anũ nga me varũ ke mgba lawuru, ele mehieu n'ige wheru ewhe, nũ kpakara ele berere, m nookwu a berere kpa me zị ikere, me va kwno, kpakara be jaata awħnũwhnu mmehie be.

³ Hne anũ noopio nhne ke neegesi nũ Karaịsi ji m nookwu oka, o bũo nye nwéé rikne n'esilawuru anũ kovu o jeegesi ikn-ernema a hne anũ zị.

⁴ O bũ n'ezị nũ be gburu a n'énwe rikne, kovu o zị bũdnu hite nũ ikn-ernema Chiokike. A bũ ele nwéé rikne nũ rime Karaịsi, kovu hne anũ zị a joosno a ziri bũdnu n'ikn-ernema Chiokike.

⁵ Anũ nyosnama ełni anũ lekasi ma anũ zị kpiri bũdnu n'okwnata mkpoma. O bũ nũ anũ máa Karaịsi Jizosi wu nũ rime anũ? Okwolem ma anũ dnarnũ adna.

⁶ M kweru m nũ anũ jaamahaja nũ a bũo ele dnarnũ adna.

⁷ A naarjasno Chiokike, anũ méé nhne ojo. O bũo ma ele badnũ kaa nũ a bũ ele oma, kovu ma anũ mee nhne ke kwesiri, o bũbedi nũ a nũ lele ele dnarnũ adna.

⁸ A jéenwe rikne mee nhne megidne ezi oka, kovu dasinu ezi oka n'ikwnu.

⁹ Mkpoma nọoso aj n'onu nga a nwéé rikne, kovu nũ anũ nwernu rikne. A neekpe ma anũ bũru ele zuru ozu.

¹⁰ Kam kpayarũ, me naagbanũ anũ okwukwo ka kpa me zị ikere, ma o bũru me va, m jéeme anũ nhne rikne hite n'ikn-ernema Nyenwe aj nyernu m, rikne o wulizọ anũ olu lele oro, o bũo o kwnadna anũ akwnadna.

Obekwu ikwu ipne-aznũ

¹¹ N'ipne-aznũ, rĩmu nda m, anũ dazikwaru nkari. Anũ gbalĩ dũ ozuzu. Anũ bnó nsnj nũ nhne me nọorio anũ, anũ bũru ele nwernu otu mkpoma, anũ wuru n'udno. Chiokike ke owhnun'anya nũ udno dazigidnenu anũ.

¹² Anũ bekwurita ibne anũ lele rĩmu nda.

¹³ Kpakara ele nsọ Chiokike neebekwu anũ.

¹⁴ Oru ke Nyenwe aj Jizosi Karaịsi, owhnun'anya ke Chiokike, nũ owugidne ke Enine Nsọ dazinu kpakara anũ.

**Ọkwukwo izi Ọlu
gbaznenu
Ele Galasia
Nhne gbasiri ọkwukwo izi ka**

Hite n'ọpanizo ọkwukwo izi Ọlu gbaznenu ọgbako Chiokike ke zị n'ọ Galasia, o mernu be mahia nhne lawuru ke zị mkpa. Ke mbom, bu ma be mahia nu o bu ezi nye izi Karaishi, ke ẹbo bu nu izi ọma o ọnokpo okwo a bu ezi ọka. Ka bu kwnornu nu agida ele badnu naakaa nu Ọlu bu nye izi aghalaghala nu nye ọnokpo okwo izi ọma aghalaghala.

Ọlu bu nye izi Karaishi n'ezị ọka, nye Nyenwe a nyernu ẹrnu o zni ele buo ele Ju izi ọma. Ọlu kannu Pita nu o bu nye ruwhnu lawuru, kwnornu nu o kwemana o snornu ele buo ele Ju ele za naabita Iwu Mozizi ri wiri nga o whuru ele hi nu Jeruselem va.

Ọlu kwusiri a rikne nu okwolem hite n'okwnata mkpoma nhne Chiokike jeeji znobia badnu. Ka whuyaru iwhe nu budnu Eberham, nye nahiaru mkwna Chiokike hite n'okwnata mkpoma.

Nhne zị n'okwukwo izi ka

Ezi nye izi nu ezi izi ọma (1:1-10)

Chiokike hohiaru Ọlu lele nye izi Karaishi (1:11-24)

Ọlu naagbanu izi ọma akebne (2:1-21)

Oznobia kwolem hite n'okwnata mkpoma (3:1--4:31)

Ele Enine Nso nu ọwhnun'anya noodu (5:1--6:10)

Odo aka nu nsni ipne-aznu (6:11-18)

¹ Mawa, Ọlu, nye izi Karaishi ke hige n'aka badnu mọbu nu rikne ke badnu, kovu hite nu Jizosi Karaishi nu Chiokike Nda, nye mernu Jizosi hi n'enuw lizo,

² nu kpakara rumu nda ele me nu be zị naagbaznenu kpakara ọgbako Chiokike ke zị nu Galasia ọkwukwo.

³ Oru nu udno ke Chiokike Nda a nu ke hi n'aka Nyenwe a Jizosi Karaishi dazinu anu.

⁴ Karaishi gweru budnu a nyee kwnornu mmehie a ma o dōhia a n'ige ojo ka lele kpa echiche Chiokike Nda a pioru.

⁵ Ọznarni zinu a ọkwukwokwnu. Amim.

Izi ọma berere zila

⁶ O gbagwojiri m anya nu anu ghasaru nye wam sukwuru anu bna n'oru ke Karaishi, zne izi ọma berere.

⁷ N'ezị, izi ọma berere zila, kovu agwna ele badnu naakpahie anu anya, noopio o gbanwo izi ọma Karaishi.

⁸ Kovu o buru a mọbu enine izi hi n'oligwe va zni anu izi ọma berere ke buo ke a znirni anu, Chiokike vu a onu ọkwukwokwnu.

⁹ Lele kpa a kwuru nu mbom, m nookwu kwno a berere, o buru nu nye ọbula zni

anu izi ọma ke zị ichne nu ke anu nahiaru, Chiokike vu a onu ọkwukwokwnu.

¹⁰ Ka o neegesi nu m noopio ruwhnu ọma ke badnu, buo ke Chiokike? M noopio nhne jaamasị badnu sa? O buru nu m noopio ruwhnu ọma ke badnu, m jobu nye izi Karaishi.

Chiokike sukwuru Ọlu

¹¹ Me kanu anu, rumu nda m, izi ọma me ọnokpo okwo a buo nhne hi n'aka badnu.

¹² M nahijage m a n'aka badnu, o buo badnu znirni m a, kovu Jizosi Karaishi kpumernu a nyee m.

¹³ Anu nuru kpa me wuru budnu nu mbom n'okpukpe ele Ju, nu kpa me kpakarnu ọgbako Chiokike ẹhni k'agida, gbalị ma o whu.

¹⁴ M be m ele Ju ibne m osno ele me nu be bu ebiri n'okpukpe ele Ju, m ji m kpakara mkpoma yisi n'omen'eli ele nda a ọknani.

¹⁵ Kovu Chiokike bitaru m ichne hite nu ruwho nne m, o sukwuru m hite n'oru a. Nga o masiri a,

¹⁶ o kpumennu m Nnwọ a, ma m nwernu m rikne zni ele buo ele Ju izi ọma gbasiri a. Ige wam, m znege ma me nu badnu ọbula tnu ọtnutnu gbasiri a.

¹⁷ M znege m Jeruselem zne o whnu ele be m osno buru ele izi, kovu m znernu m Arebia, m lahna Damasikos.

¹⁸ Nga awha ẹto whemernu, m znernu m Jeruselem zne mahia Pita, me nu a daziri nri nu ọbochi isne.

¹⁹ M whnuge m nye izi berere okwolem Jemisi wne Nyenwe a Jizosi.

²⁰ Nhne me gbannu anu n'okwukwo bu ezi ọka, Chiokike magwu nu o buo aghalaghala.

²¹ Omekwo, m zne n'eli ke zị nu rime Siriya nu Silisia.

²² O za nye Karaishi ke zị nu ọgbako Chiokike ke zị nu Judiya magwu nye me bu ruwhnu nu ruwhnu.

²³ Kovu nu be nuru ọtnutnu, "Nye wam ke naakpakna a ẹhni neezni izi ọma ọkwukwo mkpoma wam o gbaliri o mee ma o whu nu mbom."

²⁴ Be znarni Chiokike kwnornu m.

2

Ele izi berere

nabnanyaru Ọlu

¹ Nga nri nu awha eno whemernu, m lahna m Jeruselem, me nu Banabasi, m kwuru Tajtosi zne.

² M znernu m kwnornu nu Chiokike kpumennu m me zne. N'izuznu ke me nu ele risi gbaru ichne, m kwaru m izi ọma me znirni ele buo ele Ju, o zị ẹrnu me nruru mọbu ke me ọornu kina bo bu nhne etekne.

³ Tajtosi nye me nu a sno, o bu n'ezị nu o bu nye Giriki, be kwnagidnena a o kpa nka.

⁴ Agwna rụmụ nda aghalaghala gbebnarnụ va o nyosna kpa a jiri nwernu ẹhni aị nụ rime Karaịsi Jizọsi, be pioru ma a bụru ọhi iwu ele Ju.

⁵ A nyéga be oghere rịa rịa ma a bítannu anụ ezi ọka ke izi ọma chịm chịm.

⁶ Agwna ele nụ lele be bụ ele risi. Nhne ọbula be bụ zá m mkpa, kwnornu nụ Chiokike lé badnụ anya nụ ruwhnu n'ikpe. Ọ zá nhne ele ka tụtwasiri nụ izi me znirni.

⁷ Kọvu be whnurnu nụ Chiokike nyernu m izi ọma me zni ele bụo ele Ju, lele kpa o nyernu Pita ẹnu o zni ele Ju izi ọma.

⁸ Chiokike wam ke nọrnụ ẹnu n'izi ọma Pita znirni ele Ju lele nye izi, bụ masị nye nọrnụ ẹnu n'izi ọma me znirni ele bụo ele Ju lele nye izi.

⁹ Nga Jemisi nụ Pita nụ Jọni, ele nụ lele ele risi whnurnu nụ Chiokike nyernu m ẹnu ka zị ichne, be gbasịri me nụ Banabasị akarikwnunga ke neegesi nụ a bụ otu. Be kweru a zne zni ele bụo ele Ju izi ọma, be zne zni ele Ju izi ọma.

¹⁰ Nhne be nọorio kpọi bụ, a chenwanya ele mboni, kị bụ nhne me mernu wara wara.

Pọlu bigbọru Pita n'Antiọku

¹¹ Nga Pita vaduru Antiọku, m bigbọru m a nụ ruwhnu ọhna kwnornu nụ ọ dnahieru.

¹² Sụ ele Jemisi ziyaru va, Pita nụ ele bụo ele Ju neerikọ wiri. Kọvu nga be vaduru, o kwéle o sno be ri wiri, kwnornu nụ ogwnu ele be kparụ nka turu a.

¹³ Ele Ju ke gwnarnụ snornu a kpa ichne ichne kwnornu nụ ruwhnu lawwuru a, ke kpararu Banabasị sno be nụ ruwhnu lawwuru be.

¹⁴ Nga me whnurnu nụ be méne lele ezi ọka ke izi ọma, m kanụ Pita nụ ruwhnu kpakara be, “Ị bụ nye Ju, kọvu ị noowu bụdnu lele ele bụo ele Ju, ọ bụo lele nye Ju. Ndaa kpa ị naakwnagidne ele bụo ele Ju be snornu omen'ẹli ele Ju?”

Oznohia bụ hite n'oru

¹⁵ N'ezi, a bụ ele Ju hite n'omumu aị, a bụo ele mmehie lele kpa be nookwu ele bụo ele Ju.

¹⁶ Kọvu a magwụ nụ badnụ nụ Chiokike mernu udno hite n'okwnata mkpọma nụ Jizọsi Karaịsi, ọ bụo n'ome nhne iwu kwuru. A kweru nụ Karaịsi Jizọsi ma aị nụ Chiokike ziri n'udno hite n'okwnata mkpọma nụ Karaịsi. Ọ bụo n'ome nhne iwu kwuru, kwnornu nụ ọ zá nye ọbula bụ nye ọma hite n'ome nhne iwu kwuru.

¹⁷ Ọ bụru nụ nga a noopio ma aị nụ Karaịsi ziri n'udno, a whnụ ẹhni aị nụ a bụ ele mmehie lele ele berere, ka o neegesi nụ Karaịsi naadasị mmehie n'ikwnu? Chiokike kwé.

¹⁸ Ọ bụru nụ me panịzo noowu nhne me kwnadnarnụ akwnadna, ka neegesi nụ m bụ m nye noolulu iwu.

¹⁹ Kwnornu nụ hite n'iwu m nwurnu ẹnu hne iwu zị, ma m ziri m bụdnu nụ rime Chiokike.

²⁰ Be gweru m yisinu Karaịsi kpogidne aị n'olu ọgba a, m zá m bụdnu ke m, kọvu Karaịsi wu nụ rime m. Bụdnu ke me zị n'anọ-ẹhni bụ ke me zị n'okwnata mkpọma ke Nnwọ Chiokike, nye whnurnu m n'anya gweru bụdnu a nyee kwnornu m.

²¹ M zá m neelewhu oru Chiokike anya, kwnornu nụ ọ bụru nụ ome mma bụ hite n'iwu, ẹnu Karaịsi nwurnu bụ nhne etekne.

3

Iwu mọbu okwnata mkpọma

¹ Anụ ele Galasia iwahnirniwhno, nyele kpahieru anụ anya? Nụ ruwhnu anụ bụ hne me gesiri anụ nụ be kpogburu Jizọsi Karaịsi n'ogba.

² M pioru m ọ mahia otu nhne n'aka anụ. Anụ nahiaru Enine Nsọ hite n'ome nhne iwu kwuru, sọbu hite n'okweru nhne anụ nurnu?

³ Anụ bụ ele iwahnirniwhno kpa? Anụ panizoru n'Enine ke Chiokike, anụ naagbalị o wu bụdnu kịna hite nụ rikne ke aka anụ?

⁴ Kpakara awhnụwhnu anụ taru ọ bụ nhne etekne? N'ezi, ọ bụ kwnornu nụ nhne etekne?

⁵ Chiokike nyernu anụ Enine a, rnụ ẹnu ndu-ẹhni n'esilawuru anụ. Ọ bụ kwnornu nụ anụ mernu nhne iwu kwuru sọbu nụ anụ kweru nhne anụ nurnu?

⁶ Lele kpa Ebereham “kweruru Chiokike, Chiokike gwnụsinu a nụ ọ bụ nye mee mma.”

⁷ Anụ mahia nụ kpakara ele nwernu okwnata mkpọma bụ rụmụ Ebereham.

⁸ Okwukwo nsọ kwuru nụ hne zị nụ ruwhnu nụ Chiokike jeeme ma ya nụ ele bụo ele Ju ziri n'udno hite n'okwnata mkpọma, znirni Ebereham izi ọma, kaa, “Hite nụ rime i, m jọgozi kpakara mba ke ọwa.”

⁹ A whnurnu nụ Chiokike nọgozi kpakara ele ke jeekweru lele kpa Chiokike gọziri Ebereham, nye kweru nụ ya.

¹⁰ Ọvu ọnu zinu kpakara ele neeche nụ Chiokike jọgwunu be lele ele ikpe mána kwnornu nụ be naabita Iwu. Be gbaru a n'okwukwo nsọ, kaa, “Ọvu ọnu zinu kpakara ele zá naabita kpakara nhne be gbaru n'Iwu, neeme masị be.”

¹¹ O dnornu aị anya nụ ọ zá nye ya nụ Chiokike zị n'udno hite n'Iwu, kwnornu nụ okwukwo nsọ kwuru, “Nye mee mma jeehi n'okwnata mkpọma a ziri bụdnu.”

¹² Kọvu Iwu knóge aka n'òkwnata mkpọma, lele kpa òkwukwo nsọ kwuru, "Nye neeme kpakara nhne ka jaazị bụdnu nụ rime be."

¹³ Karaịsi gbahịaru aị hite n'aka ọvu ọnu ke iwu, ọ ọghonu aị ọvu ọnu. Ọkwukwo nsọ kwuru, "Be wuru nye ọbula be kpòkwnusiri n'olu isisi ọnu."

¹⁴ Karaịsi mernu ka ma ngọzi wam Chiokike kweru Ebereham mkwna bụru ke ele bụo ele Ju hite nụ Karaịsi Jizọsi, ma a hite n'òkwnata mkpọma nahọru mkwna Enine Chiokike.

Iwu nụ mkwna

¹⁵ Rụmu nda m, m jeeji nhne anya nọowhnu noogbu esni. Ọ zà nye nwernu rikne o lulu njo-ehni badnụ lawuru gbarụ, mọbu tükwasi nhne n'olu a.

¹⁶ Kịtna, Chiokike kweru Ebereham nụ nnwọ a mkwna wam. Ọkwukwo nsọ kwúge agida rụmu, kọvu "nnwọ i," ke bụ otu badnụ, nye bụ Karaịsi.

¹⁷ Nhne me nookwu bụ ka, iwu wam ke be nyernu riwahu awaha ẹno nụ nri ẹto kpa mkwna Chiokike kweru Ebereham wemernu, nwée rikne lulu mkwna Chiokike kweru mọbu mee a ọ gharu ọ zị ire.

¹⁸ Kwnornu nụ ọ bụru nụ nhne okehja ka kno aka n'iwu, ọ buma mkwna, kọvu Chiokike kwnornu n'oru a, o nyernu a Ebereham hite nụ mkwna.

¹⁹ Kịni bụ nhne be kwno nyee iwu? Be nyernu a kwnornu ọdnahie ke badnụ tem dụ nga Nnwọ wam jaawa bụ nye mkwna wam nọotu aka. Chiokike nyernu iwu hite n'aka ele enine izi, o nyee a nye ibno.

²⁰ Nye ibno zà mkpa hne otu badnụ zị, Chiokike bụ otu.

²¹ Ka o neegesi nụ iwu megidnenu mkwna Chiokike? Ọza rịa rịa! Kwnornu nụ ọ bụru nụ be nyernu iwu ke jeenye bụdnu, ome mma jọoburu hite n'iwu.

²² Kọvu ọkwukwo nsọ kwuru nụ kpakara ọwa bụ ọhi mmehie, ma nhne Chiokike kweru mkwna o nyee hite n'òkwnata mkpọma nụ Jizọsi Karaịsi bụru ke ele kweru ekwe.

²³ Tụtụ sụ ọkwnata mkpọma varu, a bụ ele ikelu ke iwu, be gbagidnenu aị ọnuhna dụ nga be kpumernu ọkwnata mkpọma.

²⁴ Iwu wam bụ nye neelegidne aị anya, kwuru aị vakwnusi Karaịsi, ma aị nụ Chiokike ziri n'udno hite n'òkwnata mkpọma.

²⁵ Kpa ọkwnata mkpọma varu, a zịma nụ mkpururu nye neelegidne aị anya, ke bụ iwu.

A bụ rụmu Chiokike

²⁶ Kpakara anụ bụ rụmu Chiokike hite n'òkwnata mkpọma nụ Karaịsi Jizọsi.

²⁷ Kpakara anụ ele be wuru mini bna nụ Karaịsi jooworu bụdnu ikne Karaịsi lele iwo.

²⁸ Ọ zà nhne zị ichne nụ hne nye Ju nụ nye Giriki zị, mọbu hne ọhi nụ nye bụo ọhi zị, mọbu hne nyerukna nụ nyerinya zị. Kpakara anụ bụ otu nụ rime Karaịsi Jizọsi.

²⁹ Ọ bụru nụ anụ bụ ele Karaịsi, anụ bụ rụmu Ebereham, ele jeekehja mkwna wam Chiokike kweru Ebereham.

4

¹ Nhne me nookwu bụ koriri ka, nye ọbula ke jeeri mkpe nda a hne ọ bụ watakiri, ọ zà nhne zị ichne hne ya nụ nye ọhi zị, ọ bụ n'ezi nụ ya nwe kpakara nhne.

² Ele berere jaazị neelegidne a anya, neezni a nhne, tem dụ ige nda a karu.

³ Kpam masị, nga a bụ rụmu takiri, a bụ ọhi renwu ojo matị matị ke ọwa.

⁴ Kọvu nga ige duru, Chiokike ziyaru Nnwọ a, nye nyerinya murnu nụ mkpururu Iwu Mozizi,

⁵ ma ọ gbahja ele zị nụ mkpururu iwu, ma a bụru rụmu Chiokike.

⁶ Kwnornu nụ anụ bụ rụmu a, Chiokike ziyaru Enine Nnwọ a nụ rime mkpọma aị, Enine ke naakwna, "Papa, Nda m."

⁷ Kam kpayarụ i buma ọhi, kọvu nnwọ, hne i bụ nnwọ, Chiokike mernu i bụru nye jeeri mkpe a.

Nhne meturu Polu nụ mkpọma

⁸ Nụ mbọm, nga anụ máa Chiokike, anụ bụ ọhi nhne bụo chi.

⁹ Kọvu kịtna, anụ magwu Chiokike, mọbu Chiokike magwu anụ. Ndaa kpa anụ jaalah-nakwnusi renwu ojo matị matị ke nwée rikne, ọ zà nhne be ji be neeme? Kịni kpayarụ anụ jọoburu kwno ọhi be berere?

¹⁰ Kịni kpayarụ anụ naabjta ọbochi zị ichne, ma ẹnwa, ma ige nụ awaha?

¹¹ Ogwnu anụ nọotu m. Ọ jọobu nụ ẹnu m nụ risi anụ bụ nhne etekne sa?

¹² Rụmu nda m, m naarjasno anụ, anụ nụ lele me, m nụ m lele anụ ele bụo ele Ju. Ọ zà nhne ọjọ ọbula anụ mernu m nga me znirni anụ izi ọma nụ mbọm.

¹³ Anụ chenwanya ọ bụ ẹhni igbugbu mernu me daziri zni anụ izi ọma nụ mbọm.

¹⁴ Ọ bụ n'ezi nụ ẹhni igbugbu m bunnu anụ nhne ọrnurna, anụ lédnag m anya mọbu zusa m. Kọvu anụ kwubnanyarnu m lele nụ m bụ m enine izi Chiokike, lele nụ m bụ m Karaịsi Jizọsi n'iwuhuru a.

¹⁵ Kịni mernu ovu ọso n'ọnu ke anụ nwernu nụ mbọm? M jaagbanu anụ akebne, ọ bụru nụ o kweru o mee, anụ znernu ahnahja mkpuru anya anụ lawuru chjta m be.

¹⁶ M ghọla nye irno anụ kwnornu nụ m kannu m anụ ezi ọka sa?

¹⁷ Kpakara ele neegesi nụ nhne gbasiri anụ neemetu be nụ mkpọma, be zà neeme a kwnornu nhne ọma anụ. Nhne be noopio

bụ ma be gweme anụ hne a zị, ma anụ menu be kpa be neemenu anụ.

¹⁸ O bụru oma o gweru mkpoma anụ neeme nhne bụru oma ige obula, o bụo nga me nụ anụ zị kpọi.

¹⁹ Rụmu takiri m, ele rime neeme m kwnornu be lele kpa rime neeme nyerinya noomu nnwọ. M zị m nụ nhne igbugbu ka tem oyiyi Karaịsi ziri nụ rime anụ.

²⁰ O kanụ m mma o bụru nụ me nụ anụ zị kịtna, m znernu m amahia kpa me znernu obita onu kwunu anụ oka. Kwnornu nụ mkpoma naala m mini hne anụ zị.

Haga nụ Sera

²¹ Anụ kanụ m, anụ ele noopio o zị nụ mkpururu iwu, anụ máa nhne iwu wam kwuru?

²² Kwnornu nụ be gbarụ a n'okwukwo nsọ, kaa nụ Eberham nwernu rụmu rukna lawuru, nnwerne ohi murnu otu, nnwerne ke bụo ohi murnu ke berere.

²³ Nnwọ ke nnwerne ohi murnu bụ ke o murnu kpa be murnu ele berere. Kovu nnwọ ke nnwerne ke bụo ohi murnu bụ nnwọ Chiokike kweru mkwna a.

²⁴ Ka bụ nhne oma atu, ele rinya lawuru ka bụ ogba-njọ-ehni lawuru. Otu bụ Haga, ke hi nụ rugwu Sajna, nye rụmu a bụ ele ohi.

²⁵ Haga nụ lele rugwu Sajna ke zị nụ Arebja, o nụ kwno lele eli Jerusalem tna, ke ya nụ kpakara rụmu a bụ ohi nụ mkpururu iwu.

²⁶ Kovu Jerusalem ke zị n'olu bụo ohi, o bụ nne aị.

²⁷ Kwnornu nụ be gbarụ a n'okwukwo nsọ, kaa,

“Nwudna, ji nyerinya ke nwée nnwọ,
ji nye muge nnwọ,
gweru okne nkoli siwama lulo, mkpoma so i n'onu,

ji nye rime nnwọ mélele,
kwnornu nụ nyerinya ke be ghasaru jeenwe agida rụmu,
kakwo nyerinya ke nwernu nzi.”

²⁸ Kịtna, rụmu nda m, lele Aziki, anụ bụ rụmu Chiokike kweru nụ mkwna.

²⁹ N'ige wam, nnwọ wam be murnu lele kpa be murnu ele berere kpaknarnu nnwọ wam be murnu hite nụ rikne Enine ehni. O zị kpori kpa kịtna.

³⁰ Kovu kịni bụ nhne okwukwo nsọ kwuru? “Chihala ohi nyerinya wam nụ nnwọ a, kwnornu nụ nnwọ nnwerne ohi nụ nnwọ nnwerne ke bụo ohi jéeri otu mkpe.”

³¹ Ke bụ nụ, rụmu nda m, a bụo rụmu nnwerne ohi, kovu a bụ rụmu nnwerne ke bụo ohi.

5

*A nwernu ehni aị
nụ rime Karaịsi*

¹ Karaịsi mernu a nwernu ehni aị. Kam kpayarụ, anụ gwuzosi rikne, anụ kwé anụ bụru kwno ohi berere.

² Anụ bnote nsni, mawa Polu naakanu anụ, anụ kwé be kpa anụ nka, kwnornu nụ anụ mee kpa, o zá mbnarna Karaịsi bnannu anụ rja rja.

³ Me kwu kwno a berere, nye obula ke kweru be kpa a nka jaabitariri kpakara iwu.

⁴ Anụ ele noopio be nụ Chiokike ziri n'udno hite n'iwu, anụ kewahalaru ehni anụ hne Karaịsi zị. Anụ zima n'oru Chiokike.

⁵ Kovu a neele anya nụ aị nụ Chiokike jaazị n'udno hite n'okwnata ovu. Ka bụ nhne a neese hite n'Enine.

⁶ Kwnornu nụ rime Karaịsi Jizosi, o zá nhne zị ichne nụ okpa nka nụ okpáge nka, kovu okwnata ovu aị ke noornu ernu n'owhnun'anya bụ nhne zị mkpa.

⁷ Anụ neemekwa nkari nụ mbom, nyele kpahieru anụ anya, kaa, anụ bnó nsni nhne ezi oka nookwu?

⁸ Nhne nụ kpa híge n'aka nye wam sukuru anụ.

⁹ “Nhne whụ brędi matị neeme kpakara brędi whụ owhu.”

¹⁰ M tukwasiri m Nyenwe aị mkpoma nụ anụ jéekwe anya hie anụ, anụ mee nhne berere. Kovu nye obula ke naakpakna anụ ehni jeeri nhne o kpasiri, nye o masiri a o bụru.

¹¹ Rụmu nda m, o bụru nụ m zị kpori m neezni nụ okpa nka zị mkpa, kịni kpayarụ be naakpakna m ehni? O bụru nụ m zị m nookwu nụ okpa nka zị mkpa, izi gbasiri ogba Karaịsi jọoburu rugwu okpobi ohi.

¹² O jaamasị m o bụru nụ ele wam naakpakna anụ ehni jowhoga, mee ehni be okiri badnụ.

¹³ Rụmu nda m, Chiokike sukuru anụ bụru ele nwernu ehni be. Kovu anụ kwékwadia o nwernu ehni anụ mee, anụ mee nhne anọ-ehni anụ noopio. Kovu anụ gweru owhnun'anya znenu ibne anụ izi.

¹⁴ Kpakara nhne be nyernu n'iwu chikotaru risi n'otu nhne ka, “I jowhnu nye agbatibi i n'anya, lele ehni i.”

¹⁵ O bụru nụ anụ jaazị naatagbu, noodoka ibne anụ, anya dū anụ eli o zị anụ gbukwo ehni anụ.

*Anụ kweru Enine
nechi anụ*

¹⁶ Nhne me naakaa bụ ka, anụ wuru budnu n'Enine, anụ jéemezu nhne anọ-ehni noopio.

¹⁷ Kwnornu nụ nhne anọ-ehni noopio neemegidne nhne Enine Chiokike noopio. Nhne Enine Chiokike noopio neemegidne nhne anọ-ehni noopio. Be neemegidne ibne be, anụ gharu o mee nhne anụ noopio.

¹⁸ Kọvu, ọ bụru nụ Enine noodu anụ, anụ zá nụ mkpuru iwu.

¹⁹ Ẹrnu ke anọ-ẹhni whụyaru iwihne, ke bụ, ome ọyi, ọgba ikoro, nhne zila rịchna,

²⁰ ọkwa ẹnwu nụ amusu, irno, ọlu ọgwnu, ọkpa ichne ichne, okwno-awụwa, ọnuma, aka-nchni, ọbna otu,

²¹ ọwho-anya, okne manya, okne otne eri, nụ nhne nụ kpa. Ka bụ nhne me nọdọ anụ aka nụ nsni kịta, lele kpa me dọru anụ nụ mbom, kaa nụ ele neeme nhne nụ kpa, jéekehia igwe n'eli-eze Chiokike.

²² Kọvu mkpuru ke Enine neegweya bụ ọwhnun'anya, snarnjma, udno, ndidi, ovu ọma, ọburu ọma, okwesi okwnata mkpoma,

²³ ọzi wọhnerne, badnụ nwụkwaru ẹhni a, ọ zá iwu ke megidnenu nhne nụ kpa.

²⁴ Ele ke Karaịsi Jizọsi bụ ele gweru anọ-ẹhni be nụ nhne nọgwnu be kpogidne n'olu ọgba.

²⁵ Ọ bụru nụ a zị bụdnu nụ rime Enine, ngwa ma a zne izne nụ rime Enine.

²⁶ Ngwa ma a gharu oknomokno, gharu naakpasu ibne a ọvu owe ẹhni, gharu enwe ọwho-anya hne ibne a zị.

6

A vurita ivu ibne aị

¹ Rumu nda m, ọ bụru nụ badnụ ọbula mee mmehie, anụ ele gwuzosiri rikne nụ rime enine gweru wọhnerne znikwata a nkari. Anya dọ masi anụ ẹli, ọ zị anụ dnabna n'ornurna.

² Anụ vurita ivu ibne anụ. Ọ bụru nụ anụ neeme kpam, anụ jeemezu iwu Karaịsi.

³ Ọ bụru nụ badnụ ọbula neeche nụ ọ bụ nhne nga ọ zá nhne ọ bụ, o nooduwhu ẹhni a.

⁴ Nye ọbula tule ẹrnu a, ige wam, o jeenwe rikne mee oknomokno n'ẹrnu a. Ọ zá nye ji ẹrnu a tọ n'ẹrnu nye berere,

⁵ kwnornu nụ nye ọbula jọornu ẹrnu zinu a.

⁶ Nye ọbula be znirni izi ọma ke Karaịsi whnụ nụ ya nụ nye znirni a nhne kehjaru nhne bụru ọma.

⁷ Anụ dúwhu ẹhni anụ. Kwnornu nụ ọ zá nye jọkpoli Chiokike mgbai. Mkpuru ọbula badnụ kpasiri bụ nhne ọ jọghoru.

⁸ Nye ọbula ke kparu mkpuru n'anọ-ẹhni a, jeehite n'anọ-ẹhni a ghọru ẹnwu, kọvu nye kparu mkpuru n'Enine, jeehi n'Enine a ghọru bụdnu kwó okwo lele mkpuru.

⁹ Anụ kwéko rikne gwụ anụ n'ome nhne bụru ọma, kwnornu nụ ige vawa nga a jọghoru mkpuru, ọ bụru nụ rikne gwúge aị.

¹⁰ Kam kpararu, lele kpa a nwernu oghere, a ziri neemenu kpakara ele badnụ nhne bụru ọma, ke kakwo, ele zị n'ezinụ-oro ke ọkwnata mkpoma.

Ọdo aka nụ nsni ipne-aznụ

¹¹ Kịta, m ji m aka m naagba ọkwukwo izi. Le kpa mkpuru ọkwukwo me naagba hna ezi.

¹² Ele neeme oknomokno n'anọ-ẹhni bụ ele naakaa be kpa anụ nka. Ka bụ ma be gharu ọ kpakna be ẹhni kwnornu ẹnwu n'ọgba Karaịsi.

¹³ Ọ bụbedi be ele be kparu nka zá naabita iwu. Be noopio be kpa anụ nka ma be mee oknomokno nụ nhne zị n'anọ-ẹhni anụ.

¹⁴ Chiokike kwéko me mee oknomokno hne ọ bụo n'ọgba Nyenwe aị Jizọsi Karaịsi, nye be kwnornu ẹhni a kpogidne ọwa n'ọgba hne me zị, kpogidne masi m n'ọgba hne ọwa zị.

¹⁵ Kwnornu nụ ọkpa nka nụ ọkpáge nka bụo nhne. Nhne bụ nhne bụ bụdnu ikne.

¹⁶ Udno nụ obirizi zinu kpakara ele noosu iwu ka nụ bụdnu be, be nụ kpakara ele bụ Izireli ke Chiokike.

¹⁷ Hite kịta zne ruwhnu, ọ zá nye kpakna m ẹhni berere, kwnornu nụ m vu m n'ẹhni m ẹnya ke neegesi nụ m bụ m nye izi Jizọsi.

¹⁸ Rumu nda m, oru ke Nyenwe aị Jizọsi Karaịsi dazinu enine anụ. Amim.

**Okwukwo izi Pōlu
gbaznenu
Ele Efesōsi**

Nhne gbasiri okwukwo izi ka

Nū *Okwukwo izi Pōlu gbaznenu ele Efesōsi*, o naakanū ogbako Chiokike nhne gbasiri olile anya be nwernu. Risi ikwu-ōnu Pōlu bụ nū Karaịsi nwurnu ẹnwu n'olu oḡba ma o znohia aị hite nū mmehie. Kōvu nū Chiokike mernu o hi n'ẹnwu lizo, o daziri ẹli n'akarikwnunga Chiokike n'oligwe, hne o zị ńechi owa. O jeechi masị owa ke vazne nū ruwhnu.

Karaịsi mernu ele Ju nū ele bụo ele Ju bụru otu, kwnornu nū o kwnadnarnū mkpō irno ke kewarū be (2:14). Ka neegesi nū Chiokike jeehite n'Enine a mee mkpōma ele Karaịsi bụru otu, mee be ziri n'udno n'esilawūru be, (4:3), ma ele Karaịsi bụru otu. Ka bụ nhne zị mkpa n'okwukwo izi, ka mernu Pōlu gbarū a k'agida neegesi nū o bụru oḡma ma ele Karaịsi ziri n'otu. A nwernu otu Nyenwe aị, okwnata mkpōma aị bụ otu, oḡwuwu mini aị bụ otu, ke neeme ele Karaịsi ḡhō otu an-ḡhni.

Nhne zị n'okwukwo izi ka

Obekwu ikwu (1:1-2)

Karaịsi nū ogbako a (1:3--3:21)

Būdnu ikne hite nū Karaịsi (4:1--6:20)

Ibekwu ipne-aznū (6:21-24)

Obekwu ikwu

¹ Mawa, Pōlu, nye izi Karaịsi Jizōsi hite n'echiche Chiokike, naagbaznenu ele Chiokike ke zị n'Efesōsi okwukwo, ele kwnagwū mkpōma nū Karaịsi Jizōsi.

² Oru nū udno ke hi n'aka Chiokike Nda aị nū Nyenwe aị Jizōsi Karaịsi dazīnu anū.

Ngōzi ke enine

³ A nōotunu Chiokike nū Nda Nyenwe aị Jizōsi Karaịsi mmamma, nye jiri kpakara ngōzi ke oligwe ke si aị n'enine nū rime Karaịsi.

⁴ Chiokike beru oḡsno ḡrukwo aị ma a bụru ele ke a kwnornu Karaịsi, sū o kpuru owa, ma a bụru ele zị nso, ele nwée oru nū ruwhnu a kwnornu oḡwnun'anya a.

⁵ O beru oḡsno ḡru aị, o kwubnanya aị lele rumu a hite nū Jizōsi Karaịsi lele kpa o jiri masị a.

⁶ Ngwa ma a ja Chiokike kwnornu agida oru a ke o nyernu aị etekne hite nū Nnwō a o whnurnu n'anya.

⁷ Chiokike gbahjaru aị hite n'ōvnarna Karaịsi wūsiri, nū o gbarū mmehie aị kwnornu n'oru a zị agida,

⁸ bụ ke o nyernu aị n'okwnamarna, ya nū akōniche nū oḡhohia a.

⁹ Chiokike mernu a mahja nhne miri emi ke echiche a lele kpa o jiri masị a hite nū Karaịsi. O marnū mmūma

¹⁰ o mezu echiche a ka nga ige a dūru. Ka bụ ma o gwebnanya kpakara nhne zị n'oligwe n'owa n'otu nū mkpururu risi Karaịsi.

¹¹ Chiokike ḡrukwo aị ma a bụru ele ke a nū rime Karaịsi, hne o beru oḡsno kpebi kpakara nhne lele kpa echiche a jiri zị.

¹² Chiokike mernu ka ma a znarnj a kwnornu igwugwu a. A bụ ele mbōm neele anya Karaịsi.

¹³ Anū bụ masị ele Karaịsi nga anū nurnu ezi oka wam, ke bụ izi oḡma ke oḡnohia anū. Anū kweru nhne anū nurnu, Chiokike ḡnjasiri anū iri Enine Nso nū anū bụ ke a lele kpa o kweru mkwna.

¹⁴ Enine Nso wam zị nū rime aị, a maam nū Chiokike jeenyeriri aị kpakara nhne bụru oḡma nga Chiokike jaagbahjakwo ele ke a. N'ige wam, a jaaznarnj Chiokike kwnornu igwugwu a.

Okpukpe Pōlu

¹⁵ Kam kpayarū, nga me nurnu nhne gbasiri okwnata mkpōma anū nū Nyenwe aị Jizōsi, ya nū oḡwnun'anya anū nwernu hne rumu Chiokike zị,

¹⁶ m ḡwépuḡam aka nū o tūnu Chiokike mmamma nū risi anū. M zị m neekpenu anū okpukpe kpakara ige.

¹⁷ M naarjasno Chiokike ke Nyenwe aị Jizōsi Karaịsi, Nda ke igwugwu, o mee anū nwehja enine akōniche, kpumenu anū ẹhni a ma anū mahja a nkari nkari.

¹⁸ M nōorio masị ma Chiokike kpume anya ke oḡvū anū, ma anū ḡhōhia olile anya o nyernu ele o sukwuru, nū ẹkwnu ngōzi zị igwugwu o kweru ele ke a nū mkwna.

¹⁹ M nōorio masị ma anū mahja ikn-ernema a ke nwée atū bụ ke o nyernu aị ele kweru nū Karaịsi. O bụ okne iknernema ka

²⁰ ke Chiokike jiri mee Karaịsi hi n'ẹnwu lizo, mee o daziri ẹli n'akarikwnunga Chiokike n'oligwe,

²¹ hne kakwo kpakara oḡchichi nū rikne nū iknernema nū ele nwe. Rẹwhna a kakwo kpakara nhne ke nwernu rẹwhna, o būo n'ige ka kpōi, kōvu n'ige ke jaava.

²² Chiokike bjaru kpakara nhne nū mkpururu ochi Karaịsi, mee a o bụru risi kpakara nhne ma oḡbako Chiokike naahja ngōzi.

²³ Oḡbako Chiokike bụ ẹhni Karaịsi, Karaịsi jihjaru n'ogbako Chiokike. Karaịsi bụ nye mezuru kpakara nhne n'apna oḡbula.

2

Hite n'ẹnwu bna nū būdnu

¹ Nū mbōm, anū nū lele ele nwurnu oḡnwu, ele be kewamarnū hne Chiokike zị kwnornu nū anū bnōne nsni, mee nhne oḡo.

²N'ige wam anụ wuru bụdnu ojo lele ele zi n'owa. Anụ snornu badnu ojo wam ke nēchi kpakara rēnwu ojo n'owa. Setani bụ rēnwu ojo wam ke nōornu ẹrnu nụ mkpoma ele zā noobnonu Chiokike nsñ kịta.

³Kpakara aị wuru bụdnu n'esilawuru be n'ige wheru ewhe lele kpa nhne nōogwnu anọ-ẹhni aị. A snornu ele berere mezu nhne echiche ojo aị pioru, kam kpayaru, a buri ele ke ovu owe ehni Chiokike dnakwasiri.

⁴Kovu Chiokike bụ nye obirizi k'agida. Qwhnun'anya a zi agida hne a zi.

⁵O bụ n'ezi nụ a bụ ele nwurru onwu nū rime mmehe, kovu Chiokike mernu aị nū Karaịsi ziri bụdnu nga o mernu Karaịsi hi n'ēnwu lizọ. Chiokike znōhiaru anụ kwnornu nū oru a.

⁶Chiokike mernu a snornu Karaịsi hi n'ēnwu lizọ. O mee aị nū Karaịsi Jizōsi daziri ẹli nū hne kakwo n'oligwe.

⁷Chiokike mernu ka ma kpakara ele badnu mahia n'ige vazne nū ruwhnu ẹkwnu ke oru a ke nwēe atụ ke o jiri ovu oma a gesi aị nū rime Karaịsi Jizōsi.

⁸Kwnornu nū Chiokike jiri oru a znōhia anụ hite n'okwnata mkpoma nū Karaịsi. O bụo kwnornu nhne obula ke anụ mernu. Qznōhia anụ bụ nkesi hi n'aka Chiokike.

⁹O bụo ẹrnu oma obula anụ rnurru, o zā nye ji a mee oknomokno.

¹⁰A bụ ẹrnu aka Chiokike. O kpuru aị ma aị nū Karaịsi Jizōsi ziri n'otu rnụ ẹrnu oma Chiokike beru osno kwabitanu aị.

A bụ otu nū Karaịsi

¹¹Anụ chenwanya nū mbom anụ ele bụo ele Ju hite nū omumu anụ. Anụ bụ ele ke ele Ju be kparu nka neeledna anya, nookwu anụ ele be kpáge nka. Okpa nka bụ ke be jiri aka kpa n'anọ-ẹhni.

¹²N'ige wam, be kewamarnu anụ hne Karaịsi zi, anụ bụo ele Izireli, ke kpayaru, anụ nwēe igwe nū mkwna Chiokike kweru o znōhia Izireli. Anụ wuru bụdnu n'owa ka lele ele nwēe olile anya, anụ máa Chiokike nū mbom.

¹³Anụ bụ ele be kewamarnu hne Chiokike zi nū mbom, kovu kịta, Chiokike mernu anụ nū Karaịsi ziri n'otu, mee masi anụ va nū ruwhnu a hite n'ovnarna Karaịsi wusiri kwnornu anụ.

¹⁴Karaịsi mernu udno ziri n'esilawuru ele Ju nū ele bụo ele Ju nga o mernu ele Ju nū ele bụo ele Ju otu badnu. O mernu ka nga o jiri anọ-ẹhni a kwnadna mkpo irno ke kewamarnu ele Ju nū ele bụo ele Ju.

¹⁵Karaịsi luluru iwu ele Ju hite n'ēnwu a ma o gweru ele Ju nū ele bụo Ju ele kweru mee otu badnu ikne, mee ma udno ziri n'esilawuru be.

¹⁶Karaịsi mernu ele Ju nū ele bụo ele Ju nū Chiokike ziri n'udno hite n'ēnwu o nwurru

n'olu ogba, mee be buri otu badnu. Ka gwemernu irno n'esilawuru ele Ju nū ele bụo ele Ju.

¹⁷Karaịsi varu zni anụ izi oma udno, anụ ele bụo ele Ju nū aị ele Ju masi.

¹⁸Hite nū Karaịsi, kpakara aị nwernu oghere o znekwnusi Chiokike Nda aị hite n'otu Enine.

¹⁹Kam kpayaru, anụ ele bụo ele Ju buma ele izne, kovu anụ gholam rumu Chiokike nū ele ezi-nụ-oro Chiokike.

²⁰O wukwasiri anụ lele oro n'olu ntụ-ẹli ele izi nū ele qwhnurninya, hne Karaịsi Jizōsi n'iwuru a bụ risi nsukala oro.

²¹Ya bụ ngalaba jigwu oro n'otu, oro wam noosopiya buri Oro Nso be bitaru nso nyee Nyenwe aị.

²²Be wukotaru anụ n'otu nū rime Karaịsi, ma anụ buri Oro Nso hne Enine Chiokike wu.

3

Polu nye ẹrnu ele bụo ele Ju

¹Kam kpayaru, mawa Polu, m bụ m nye ikelu kwnornu Karaịsi Jizōsi nū kwnornu risi anụ ele bụo ele Ju neekpenu Chiokike.

²N'zi, anụ nurnu nhne gbasiri kpa Chiokike nyernu m ẹrnu o mee anụ ele bụo ele Ju mahia oru a.

³Chiokike mernu m mahia nhne miri emi ke badnu máa nū mbom, lele kpa me gbaru a n'okwukwo matị nū mbom.

⁴Nga anụ gwnurru ka anụ jowhnu nū Chiokike mernu m ghōhia nhne miri emi gbasiri Karaịsi.

⁵N'ige wheru ewhe, Chiokike kpumene ele badnu nhne ka, kovu kịta Enine Chiokike kpumennu a ele izi nū ele qwhnurninya ele o hōhiaru.

⁶Nhne miri emi wam bụ anụ ele bụo ele Ju ele kweru nū ele Ju ele kweru ghoru otu anọ-ẹhni. Anụ joosno masi ele Ju kehia nhne Chiokike kweru be nū mkwna hite nū Karaịsi Jizōsi kwnornu nū izi oma.

⁷Chiokike nyernu m ẹrnu ke o zni izi oma ka kwnornu ovu oma a. O mernu ka hite nū rikne a nōornu ẹrnu nū rime m.

⁸O bụ n'ezi nū m kwésile m, kovu Chiokike nyernu m oru a n'esilawuru ele ke a, o zni anụ ele bụo ele Ju izi oma ke okne nhne gbasiri Karaịsi ke ele badnu nwēe rikne ghōhiali.

⁹O nyee kwno m ẹrnu o mee kpa ele badnu jaamahia kpa o jeeme nhne miri emi ka. Chiokike nye keru kpakara nhne kpusnirni nhne miri emi ka n'anya ele badnu agida ige wheru ewhe.

¹⁰Echiche a bụ ma kpakara rikne ke nēchi ẹchi n'oligwe mahia akoniche Chiokike ke hna ezi hite n'ogbako a.

¹¹ Ka bụ nhne Chiokike vu nụ mkpoma sụ ọ kpuru ọwa. Kịta, o mezuru a hite nụ Karaịsi Jizōsi Nyenwe aị.

¹² Aị nụ Karaịsi bụ otu, a kweru nụ ya, kam kpayarụ, a nwernu mkpoma siri rikne o zne nụ ruwhnu Chiokike, ẹnwe ogwnu.

¹³ M naarjasno anụ, anụ bikno kwé rikne gwụ anụ kwnornu awhnụwhnu me naatanụ anụ, ke jeegweyanụ anụ igwugwu.

Karaịsi whnurnu aị n'anya

¹⁴ Kam kpayarụ, me gwu mpnerne ọchi kpenu Chiokike Nda,

¹⁵ nye jiri kpakara ezi-nụ-oro ke zị n'oligwe nụ ọwa rẹwhna be.

¹⁶ M nọorio Chiokike ma o hite n'ekwuu ke ngozi a, nyee anụ iknernema hite n'Enine a ma mkpoma anụ si rikne,

¹⁷ ma Karaịsi hite n'okwnata ovu wuru nụ rime mkpoma anụ, ma anụ gba egwnugwnu, gwuzoru chīm chīm n'owhnnun'anya a.

¹⁸ M nọorio masị ma anụ nụ kpakara ele Chiokike mahija ọwhnnun'anya Karaịsi nwernu hne a zị, kpa ọ hna nụ rude, nụ ogologo a, nụ kpa ọ hna n'olu, nụ omimi a,

¹⁹ ma anụ mahija ọwhnnun'anya ka ke kakwo nhne badnụ etekne nwernu rikne ghọhiali. M nọorio ma Chiokike mejihija anụ nụ kpakara nhne Chiokike bụ.

²⁰ A ja Chiokike, nye nwernu rikne o mee kakwo kpa a nwernu rikne rjọ mọbu rj hite nụ iknernema a ke nọornu ọru nụ rime aị.

²¹ Ngwa ma aị ọgbako Chiokike ele o mernu aị nụ Karaịsi Jizōsi bụru otu, ja Chiokike hite n'otu ebiri dū n'ebiri berere, ọwa kwnurnu ọwa. Amj̄n.

4

A bụ otu nụ rime Karaịsi

¹ Mawa, nye ikelu kwnornu Nyenwe aị, naarjasno anụ, anụ wu bụdnu kwesiri ikwu Chiokike sukwuru anụ.

² Nhne ọbula anụ neeme, anụ gweru ovu hieru eli nụ ozi wōhnerne nū ndidi naabnanya ibne anụ kwnornu anụ whnurnu ẹhni anụ n'anya.

³ Anụ gbalj ọ bita ozi n'otu ke Enine hite noowu n'udno n'esislawuru anụ.

⁴ Ele Chiokike bụ otu anọ-ẹhni, a nahjaru otu Enine, lele kpa Chiokike sukwuru anụ n'otu olile anya.

⁵ A nwernu otu Nyenwe aị, ọkwnata mkpoma aị bụ otu, ọwuwu mini aị bụ otu.

⁶ A neekpenu otu Chiokike bụ Nda kpakara badnụ, nye neechi kpakara badnụ, ọ nọornu ọru hite nụ kpakara badnụ, nye zị nū rime kpakara badnū.

⁷ Karaịsi nyernu nye ọbula nū rime aị rikne ọ rnu ọru lele kpa o kpebiri a.

⁸ Lele kpa be gbarụ a n'okwukwo nsọ, "Nga ọ larū ọlu,

ọ dọru agida ele irno a n'ohi, be snornu a n'aznū,

o nyee ele badnū nkesi."

⁹ Kini bụ n'okwukwo nsọ kwuru nū ọ larū n'olu? Ọ bụ nū Karaịsi beru ọsno hiedna n'owa ka.

¹⁰ Nye wam hiednarnū n'owa bụ masị nye larū hne kakwo n'olu n'oligwe, ma o jihija kpakara nhne.

¹¹ Karaịsi bụ nye wam, nye nyernu ele badnū rikne ọ rnu ọru, mernu agwna badnū ele izi, ele berere ele ọwhnnurninya, ele berere ele naagaghari nọokpo okwo izi ọma, ele berere ele nọoznu atnurnu nū ele neezni nhne.

¹² O mernu ka ma o jiknurnu ele Chiokike ma be rnuu a ọru, ma ọgbako Chiokike nooso, gwuzosi rikne,

¹³ tem a dū n'ozu hite ke ọkwnata ovu, nū ọ mahija Nnwọ Chiokike, ma a bụru ele sozuru nū badnū, ele dūru nū nhne ọtutu ke zuru ozu nū rime Karaịsi.

¹⁴ Ige wam a jọbuma rumu takiri. Ele aghigho nū ele nooduwu ele badnū jéegweru iznizni aghalaghala ọbula ruwhere noovughari duwuh aị, lele kpa abaka-mini nū ruwhere noovughari ọgbo n'olu mini.

¹⁵ Tnūnuma, a gweru ọwhnnun'anya nookwu ezi ọka, ma a nooso lele Karaịsi Nyenwe aị nū nhne ọbula.

¹⁶ Karaịsi neeknekoṭa ele ke a n'otu, lele kpa rnkani jikotaru kpakara nhne zị n'ehni badnū n'otu. Ọ bụru nhne ọbula zị n'ehni nọornu ọru a, kpakara ẹhni jọburu nhne gwuzosiri rikne n'owhnnun'anya.

Budnu ikne nū rime

Karaịsi

¹⁷ Kam kpayarū, m ji m rẹwhna Nyenwe aị nọodo anụ aka nū nsi, anụ wuma bụdnu lele ele máa Chiokike, hite n'ori ọrii ke nwée mbnarna.

¹⁸ Ele ka nwée rikne ọ ghọhia nhne gbasiri Chiokike. Be kewamarnū be hne Chiokike zị kwnornu nū be máa Chiokike, be bụ ele risi rikne.

¹⁹ Iwhnerne o mee nhne bjo ọma tū be. Be bụ ele neeme nhne ojo ke gwnurnu be, ma be neeme nhne so ize n'anya lele kpa ọ nọogwnusi be rikne.

²⁰ Kọvu kị bjo nhne anū mūhiaru gbasiri Karaịsi.

²¹ N'ezị, anū nurnu nhne gbasiri a, be znirni anū ezi ọka zị nū Jizōsi.

²² Be znirni anū sigbasi bụdnu ọknani wam anū noowu. Badnū ọknani wam neeji kpakara nhne nọogwnu anū nooduwu anū, noolulu masị bụdnu anū.

²³ Kịta, anū gharū Chiokike ma ọ gbanwo echiche anū.

24 Anu wuru budnu ikne ke Chiokike nyernu anu, ma anu buru ele ke Chiokike, ele mee mma, ele zi masi nso n'ezi.

25 Kam kpayaru, anu ghama aghalaghala, nye obula kwunu ibne a ezi oka, kwnornu nu a nu lele nhne zi n'otu ehni.

26 O buru nu ovu we anu ehni, anu meko mmehie, anu kweko ovu owe ehni anu daziri tem ehnam dna.

27 Anu nyeko Ekwensu oghere nu budnu anu o rnawhu anu.

28 Nye buznu znuma buznu, o gweru aka a rnu ernu kwesiri ma o yinu ele zi nu mkpa aka.

29 Anu kwe oka buo oma hi n'onu anu whuya, kovu anu kwu oka buru oma ke jeeme badnu gwuzosi rikne n'okwnata mkpoma a. Ige obula, anu kwu nhne buru oma nu nsnj ele badnu ma be wulizo be olu lele oro.

30 Anu mee Enine Nso Chiokike ovu owe ehni, bu ke Chiokike jiri hnasi anu iri nu anu bu ke a tem du n'ige anu jeenwernukwo ehni anu.

31 Anu gweme kpakara mkpoma nlulu, nu onuma, nu ovu owe ehni, ya nu olu ogwunu nu okaja nu irno mkpoma.

32 Kovu anu nwe ovu oma, whnu ibne anu n'anya, naagarunu ibne anu lele kpa Chiokike gbarunu anu kwnornu Karaishi.

5

1 Lele rumu Chiokike whnurnu n'anya, anu wu budnu lele Chiokike.

2 Anu wuru budnu whnun'anya, lele kpa Karaishi whnurnu aj n'anya, gweru budnu a kwanu Chiokike arjohna ke nwernu eknarna oma kwnornu aj.

3 Anu kwe be whnu ewhere, mobu nhne zila richna, mobu anya-kwu n'esilawuru anu. Nhne ele ka kwesile ele Chiokike zi nso.

4 Anu kwu oka tu iwhnerne, mobu oka iwhnirniwhno, mobu oka bnana nu nhne, ke kwesile, tnunuma, anu tunu Chiokike mmamma.

5 Kwnornu nu anu magwu nu o za nye naagba ewhere, mobu nye zila richna, mobu nye anya-kwu, ke nu lele okwa renwu, nwernu igwe nu nhne oma ke eli-eze Karaishi nu Chiokike.

6 Anu kweko badnu obula gweru oka etekne rnawhu anu. Chiokike jaata ele za noobnonu a nsnj awhnuwhnu kwnornu nu nhne nu kpa.

7 Kam kpayaru, anu nu ele nu kpa meko nhne.

8 Anu zi n'ochichiri nu mbom, kovu knta anu bnarnu n'iwhne Nyenwe aj, anu wu budnu kwesiri ele zi n'iwhne.

9 Ele zi n'iwhne naamj mkpuru oma ke ovu oma, ome mma nu ezi oka.

10 Anu pioha, neeme masi nhne jaakpasu Nyenwe aj ovu oso n'onu.

11 Anu sno ernu ochichiri ke nwernu mkpuru bnage nu nhne keko nhne, kovu anu bigbo be, ma nhne ojo be mernu whuya iwhne.

12 Kwnornu nu o nootu iwhnerne o kwu nhne ele za noobnonu Chiokike nsnj neeme nu mgwugwa.

13 Kovu iwhne jeeme kpakara nhne whuya iwhne.

14 Kwnornu nhne obula ke iwhne kpumernu buma nhne zi nu mgwugwa. Kam kpayaru, be karu,

"Tnenya, zi nye neezni anyarna, ji nye nu lele nye nwurnu onwu, lizo, Karaishi joomukwasi i iwhne a."

15 Anya du anu eli kpa anu noowu budnu anu. Anu wu budnu lele ele iwhnirniwhno, kovu lele ele nwernu akoniche.

16 Anu gweru oghere obula anu nwernu rnu ernu oma, kwnornu nu ele badnu noornu ernu ojo k'agida n'ige ka.

17 Anu buo ele iwhnirniwhno, tnunuma, anu yisi ehni pioha, neeme masi nhne Nyenwe aj pioru.

18 Anu nwó manya ke naabna n'anya, ke joolulu budnu anu. Tnunuma, anu gharu Enine Chiokike ma o mejihja ovu anu.

19 Anu gweru eri oma, eri oznarni nu eri mkpoma oso n'onu kanu ibne anu oka, gweru kpakara mkpoma anu gwnunu Nyenwe aj eri,

20 nootunu Chiokike bu Nda mmamma ige obula kwnornu kpakara nhne nu rewhna Nyenwe aj Jizosi Karaishi.

21 Ele Chiokike bita ehni be nu mkpuru ibne anu kwnornu nu anu noosobisinu Nyenwe aj Karaishi.

Nzi nu nnwerne

22 Ele bu nnwerne anu bita ehni anu nu mkpururu nzi anu lele nu anu bitaru ehni anu nu mkpururu Nyenwe aj.

23 Kwnornu nu nzi bu risi nnwerne lele kpa Karaishi bu risi ogbako Chiokike. Ogbako Chiokike nu lele ano-ehni Karaishi. Karaishi bu Nye Oznohia ogbako a.

24 Lele kpa ogbako Chiokike zi nu mkpururu Karaishi, kpa masi, nnwerne obula bita ehni a nu mkpururu nzi a nu kpakara nhne.

25 Ele bu nzi, anu whnu nnwerne anu n'anya lele kpa Karaishi whnurnu ogbako a n'anya nwu kwnornu a,

26 ma o mee a o ziri nso, o gweruru ikwunu Chiokike nu mini snu a, mee a, o ziri richna.

27 Karaishi mernu ka ma o chetenu ogbako wam n'ehni a, lele nhne zi igwugwu, nwée rune, mobu ruwhnu doliri odili, mobu nhne ojo berere, tnunuma, ogbako ke zi nso, ke nwée otna.

28 Kpa masi, nzi kwesiri o whnu nnwerne a n'anya lele kpa o whnurnu ehni

a. Nye ọbula ke whn̄rnu nnwerne a n'anya whn̄rnu ẹhni a n'anya.

²⁹ Ọ zá badn̄ ọbula ke snornu ẹhni a irno, k̄ovu o n̄oznu, neelekwa ẹhni a anya nkari. Ọ b̄ masi kpa Karaṣi neelekwa ọgbako Chiokike,

³⁰ a b̄ nhne z̄i n'ẹhni Karaṣi.

³¹ Kam kpayar̄u, nyerukna jaaghar̄u nda a n̄ nne a, takwn̄si n'ẹhni nnwerne a, be law̄uru gh̄o otu badn̄u.

³² Ka b̄ nhne miri emi k'agida, k̄ovu m nookwu gbas̄iri Karaṣi n̄ ọgbako Chiokike.

³³ Nyerukna ọbula n'ẹsilaw̄uru an̄, whn̄ n̄ o whn̄rnu nnwerne a n'anya lele kpa ọ whn̄rnu ẹhni a, nnwerne masi, whn̄ n̄ ọ n̄oso nzi a anya.

6

*R̄umu tak̄iri n̄
ele m̄urnu be*

¹ R̄umu tak̄iri, an̄ noobnonu ele m̄urnu an̄ nsn̄i lele kpa Nyenwe aṣ̄ piuru, kwnornu n̄ ọ b̄uru ọma o mee kpm.

² Lele kpa be gbar̄u a n'okwukwo ns̄o, "S̄obisinu nda i n̄ nne i." Ke b̄ nhne mb̄om ke Chiokike nyernu n'iwu ke nwernu mkwna.

³ I mee kpm, nhne jaagakwan̄u i nkari, ma i z̄iri b̄udnu ogologo n'owa.

⁴ Ele b̄ nda, an̄ m̄ee nhne jaakpasu r̄umu an̄ ovu owe ẹhni. Tn̄unuma, an̄ gweru ikwu-ọnu Chiokike n̄oznu, neezni be.

Ele ọhi n̄u ele nwe be

⁵ Ele ọhi, an̄ noobnonu ele nwe an̄ nsn̄i, an̄ s̄o be anya, n̄otu ọgw̄nu be. An̄ gweru mkp̄oma an̄ neeme a lele an̄ neemenu a Karaṣi.

⁶ An̄ bn̄onu be nsn̄i, ọ b̄u ke anya n̄owhnu kp̄oi lele ele neeme nhne naamas̄i badn̄u, k̄ovu noobnonu be nsn̄i lele ele ọhi Karaṣi, ele neeme nhne Chiokike piuru hite n̄ mkp̄oma an̄.

⁷ An̄ gweru ovu ọma n̄ornu ẹrnu lele n̄ an̄ b̄ ọhi Nyenwe aṣ̄, b̄u ke badn̄u.

⁸ Kwnornu n̄ an̄ magw̄ n̄ Nyenwe aṣ̄ j̄ookwu nye ọbula ọgw̄o ẹrnu ọma a, ma ọhi m̄obu nye b̄u ọhi.

⁹ Kpm masi, an̄ ele nwe ọhi, an̄ mee masi ele ọhi an̄ kpm. An̄ kp̄as̄i be ogw̄nu, hne an̄ mah̄jaru n̄ Nyenwe an̄ n̄u be z̄i n'oligwe. Ọ zá neele badn̄u anya n̄ ruwhnu.

Mgw̄na ọgw̄nu Chiokike

¹⁰ Ka b̄ ọka ipne-azn̄u m, an̄ gbas̄i rikne n̄ Nyenwe aṣ̄ n̄ okne ikn̄ernema ke a.

¹¹ An̄ woru kpakara mgw̄na ọgw̄nu Chiokike nyernu an̄, ma an̄ nwernu rikne o gwuzogidne kpakara nhne ke Ekwensu neeziya.

¹² Kwnornu n̄ a zá n̄olu ọgw̄nu megidne ele badn̄u etekne. K̄ovu a n̄olu ọgw̄nu megidne kpakara ele ọchichi, megidne kpakara rikne, megidne kpakara ele nwe ọwa ke ọchichiri ka, megidne ele r̄enwu ọjo ke z̄i n'olu.

¹³ Kam kpayar̄u, an̄ woru kpakara mgw̄na ọgw̄nu Chiokike nyernu an̄ ma an̄ nwernu rikne o gwuzo n'ọbochi ọjo, n̄ga an̄ mezuru kpakara nhne, o gwuzoru ch̄im ch̄im.

¹⁴ An̄ jikn̄ernu ọ l̄u ọgw̄nu, an̄ suru ezi ọka n'ikwnu an̄ ke n̄u lele aj̄ni. An̄ woru ome mma ke n̄u lele mbno n̄ mkp̄oma an̄.

¹⁵ An̄ gweru masi oj̄ikn̄ernu ọ kp̄o okwo izi ọma ke udno woru n'ọchi lele okoro-ọchi.

¹⁶ T̄ukwas̄i n'olu ka, an̄ gweru ọkwnata mkp̄oma n̄ Chiokike ke n̄u lele ekpeke an̄ jeeji mesni kpakara mkpakw̄ b̄ekwnu ke Ekwensu naagba megidne an̄.

¹⁷ An̄ kpuru ọzn̄ohia n̄u risi an̄ ke n̄u lele okpu-ọgw̄nu. An̄ gweru ama-ọgw̄nu ke Enine neenye, ama-ọgw̄nu wam b̄ ikwu-ọnu Chiokike.

¹⁸ An̄ neekpe okpukpe lele kpa Enine noodu an̄ ige ọbula n'ọnodi ọbula. An̄ neese nse kpa an̄ neekpe okpukpe, an̄ gwuzosi rikne kpa an̄ neekpenu kpakara ele Chiokike okpukpe.

¹⁹ An̄ neekpenu m okpukpe masi ma Chiokike nyee m ikwu-ọnu ke me kwesiri o kwu ige ọbula me kpumernu ọnu m, ma m gweru ọnu rikne mee ele badn̄u mah̄ja nhne miri emi ke izi ọma,

²⁰ ke me b̄ nye izi a n'oro ikelu. An̄ kpenu m okpukpe ma m kp̄o m okwo izi ọma ẹnwe ogw̄nu lele kpa me kwesiri.

Obekwu ikwu ipne-azn̄u

²¹ Taīkikosi b̄ nnw̄o nda aṣ̄ a whn̄rnu n'anya nye be kwesiri ọ kwnata mkp̄oma n'ẹrnu Nyenwe aṣ̄ jaakan̄ an̄ kpakara nhne gbas̄iri m, ma an̄ mah̄ja kpa me n̄u, n̄u nhne me neeme.

²² Ka b̄ nhne me kwno neeziyanu an̄ ya, ma an̄ mah̄ja kpa a n̄u, ma ọ kasi an̄ mkp̄oma.

²³ Udno ke Chiokike Nda aṣ̄ n̄ Nyenwe aṣ̄ Jiz̄osi Karaṣi daz̄inu ele kweru n̄ Karaṣi, o mee an̄ whn̄u ibne an̄ n'anya kpa an̄ naakwnata mkp̄oma n̄ Karaṣi.

²⁴ Oru ke Chiokike daz̄inu kpakara ele whn̄rnu Nyenwe aṣ̄ Jiz̄osi Karaṣi n'anya n'ez̄i.

**Okwukwo izi Pölu
gbaznenu
Ele Filipaj**

Nhne gbasiri okwukwo izi ka

Pölu gbarü okwukwo izi ka nga o zi n'ikelu nqotunu ogbako Chiokike ke zi nü Filipaj mmamma kwnornu nkesi nü okpukpe be. Ogbako Chiokike ke zi nü Filipaj bü ogbako mböm Pölu miteru n'eli ele Iropu. O kannü ele Karaïsi zi nü Filipaj nü be kwesiri o ta awhnüwhnu lele kpa Karaïsi tarü, nü kpa Pölu naata awhnüwhnu ige wam. O büru kpam, ele Filipaj gweru a lele ngözi be nahïaru hite n'okwnata mkpöma be nwernu nü Karaïsi.

Agwna ele zi nü Filipaj nookwu nü ele badnü kwesiri o bita Iwu Mozizi, o büo kpam, nü be nwée öznohia. Pölu kanü be neeze ele nü lele nkïta (3:2-11). Snarnïma nü ovu oso n'önu jihïaru okwukwo izi ka, kwnornu nü Pölu mühiaru kpa o gweru önodi öbula o whnürnu ehni a mee nhne büru öma. Ovu söru a n'önu k'agïda kpa o chenwan-yarnü ovu öma ogbako Chiokike zi nü Filipaj gesiri a. Pölu kaa nü ele ke Chiokike kwesiri o wu n'udno, neeche echiche lele kpa Karaïsi neeche.

Nhne zi n'okwukwo izi ka

Obekwu ikwu nü okpukpe (1:1-11)

Nhne büdnu bünu Pölu (1:12-30)

Nhne atü ke Karaïsi (2:1-18)

Nhne gbasiri Timoti nü Epafroditusi (2:19-30)

Ele Chiokike nabnanyarnü (3:1---4:9)

Pölu nqotnu ele Filipaj mmamma (4:10-20)

Obekwu ikwu ipne-aznü (4:21-23)

¹ Pölu nü Timoti, ele izi Jizösi Karaïsi, naag-baznenu kpakara rümu Chiokike ke zi nü Karaïsi Jizösi ele wu nü Filipaj, be nü ele neeleköta be, nü ele ernu okwukwo.

² Oru nü udno ke hi n'aka Chiokike Nda aj nü Nyenwe aj Jizösi Karaïsi dazïnu anü.

Okpukpe nü ötu mmamma

³ M nqotunu Chiokike mmamma ige öbula me chenwanyarnü anü.

⁴ M ji m snarnïma neekpenu kpakara anü okpukpe ige öbula

⁵ kwnornu nü me nü anü bü ele ernu n'izi öma hite n'öbochi mböm tem dü kïtna.

⁶ M kwnatarü m ovu nü ka, nü nye wam ke panïzoru ernu öma nü rime anü, jöornuzu ernu wam tem dü n'öbochi Karaïsi Jizösi jaava.

⁷ O kwesiri me vuru nhne ka nü mkpöma gbasiri anü, hne anü zi nü ovu m, ma m zi m n'ikelu, ma m zi naagbanü izi öma akebbe, möbu naakwnagïdne a, kpakara

anü neekheja igwe n'oru Chiokike nyernu m.

⁸ Chiokike bü nye akebbe m, kpa o nqogwnu m ö whnü anü anya hite n'öwhnun'anya Karaïsi Jizösi.

⁹ Ka bü okpukpe m, ma öwhnun'anya anü n'ehni ibne anü naaba aba, hite nhne ömuma nü oghohia,

¹⁰ ma anü nwernu rikne ö mahïa nhne ke kakwo mma, ma anü zïri snam, nwée ötna tem dü n'öbochi Karaïsi jaava.

¹¹ Mkpuru ke ome mma ke hi nü Jizösi Karaïsi va jihïa nü rime anü, ma igwugwu nü öznarni büru ke Chiokike.

Ikelu Pölu mernu izi öma

gbasa

¹² Rümu nda m, m pioru ma anü mahïa nü nhne öbula ke dnakwasiri m, mernu izi öma gbasu.

¹³ Kpakara ele nse zi n'öro eze nü kpakara ele berere mahïaru nü m zi m n'ikelu kwnornu Karaïsi.

¹⁴ Ikelu be türu m mernu ele kakwo n'esilawuru rümu nda aj nü Nyenwe aj nwe önu rikne o kwu ikwu-önu Chiokike n'ovu siri rikne, be nwée ogwnu.

¹⁵ O bü n'ezi nü agwna be nqokpo okwo izi öma n'öwho-anya nü omegidne, kövu ele berere nqokpo okwo izi öma Karaïsi kwnornu ovu öma.

¹⁶ Ele ipne-aznü neeme kpam n'öwhnun'anya, kwnornu nü be magwü nü m zi m hna kwnornu izi öma.

¹⁷ Ele ke mböm nqokpo okwo Karaïsi kwnornu nhne be jeerihïa nü rime a, ö büo n'ezi öka, ma be mee nhne joogbu m igbugbu kpa me zi n'ikelu.

¹⁸ Kïni mee? Ma be kpöru okwo izi öma n'ezi öka möbu n'aghïgho, nhne zi mkpa bü be nqokpo okwo Karaïsi. Ka bü risi nhne me kwno nqonwudna.

M jaazïkoriri nqonwudna.

¹⁹ M maam nü kpa anü neekpenu m okpukpe, hite n'öyi aka ke Enine Jizösi Karaïsi, kpakara nhne dnakwasiri m jöoburu nhne jeeme m whüya n'ikelu.

²⁰ Ka bü nü olile anya m siri rikne, nü iwhtnerne jöotu m n'apna öbula, kövu m jeenwe ovu siri rikne ma kïtna ma ige öbula nü be jeegwelizö Karaïsi ölu n'ehni m, hite nü büdnu möbu n'enwu.

²¹ Kwnornu nü kpa me zi büdnu, m bü m ke Karaïsi, me nwü, ö bü mbnarna.

²² O büru me zïri büdnu n'anö-ehni, ö jöoburu ernu ke jaamj mkpuru. Ndaa ke me jeegweru? M máam ke ka mma.

²³ Nhne lawuru ka zi nqodoka m, ö nqogwnu m me la ma me nü Karaïsi dazïri, bü ke kakwo mma.

²⁴ Kövu ö zi mkpa me dazïri büdnu kwnornu anü.

²⁵ Ka dnornu m anya, m magwū m nū m jaadaziri, me nū anū jaazigidne, ma anū so oso, nwe snarnīma n'okwnata ovu anū.

²⁶ Ka bū me nū anū ziri, ovu ošo n'ōnu anū nū rime Karaīsi jaazī agida kwnornu m.

²⁷ Nhne nū nhne obula mene, anū wu būdnu ke kwesiri izi oma Karaīsi. Me va o whnū anū mōbu m vāge m, mōbu m nūrnū m nhne gbasiri anū hne me zī, m jaamahija nū anū gwuzosiri rikne n'otu enine, nōolu ogwū lele otu badnū kwnornu okwnata ovu ke izi oma.

²⁸ Anū kwé ele neemegidne anū kpasī anū ogwū n'apna obula. Ka jōbu nhne jeegesi be nū Chiokike joolulu be, kōvu Chiokike jooznohia anū.

²⁹ Kwnornu nū Chiokike nyernu anū ogwere, o būo o kweru nū Karaīsi kpōi, kōvu o tanū a awhnūwhnu.

³⁰ Me nū anū nōolu otu ogwū. Anū whnūrnū kpa me lūru ogwū wam n'ige wheru ewhe, kītna anū nōonu nū m zī koriri m naagba otna.

2

Badnū ogwedna ēhni a ēli

¹ O būru nū ogba inwe zīnu aī nū Karaīsi, o būru nū ošnuta mkpōma hite n'ōwhnūn'anya a, o būru nū omekōrita zī n'Enine Nso, o būru nū ovu oma obula nū obirizi,

² anū mee ma ovu ošo n'ōnu m zu ozu, anū nwe otu echiche, otu owhnūn'anya, anū ziri n'otu enine nū echiche.

³ O zā nye obula mee nhne kwnornu nhne o jeenwehija mōbu ovu ojo, kōvu hite nū badnū ogwedna ēhni ēli, nye obula kweru nū nye berere ka a mma.

⁴ O zā nye obula ke lebna anya nū nhne ke a kpōi, kōvu nū nhne gbasiri ele berere.

⁵ Nye obula nwe ovu ke Karaīsi Jizōsi.

⁶ Nye, o bū n'ēzi nū o bū Chiokike mēne a lele nhne anya rikne nū ya nū Chiokike hna.

⁷ O sīgbasiri kpakara nhne o nwernu, o gweru oṅodi ke nnwō izi, be mee a lele badnū etekne.

⁸ O whūya iwhe lele badnū etekne, o gwedna ēhni a ēli,

o bno nsnī dū n'ēnwu,
bū ēnwu ke olu ogba.

⁹ Kam kpayarū, Chiokike jiri gwelizō a olu kakwo kpakara nhne, nyega a rēwhna ke kakwo kpakara rēwhna,

¹⁰ ke bū nū rēwhna Jizōsi kpakara mpnerne ochi joogbu,
nhne ke zī n'oligwe, ma n'ōwa, ma nū mkpururu owa,

¹¹ kpakara riro jookwhija nū Jizōsi Karaīsi bū Nyenwe aī,
ma be nyee Chiokike Nda igwugwu.

Noonwu lele mbō

¹² Kam kpayarū, ele me whnūrnū n'anya, anū noobno nsni lele kpa anū neeme, o būo nū ruwhnu m kpōi, ke kakwo, nga me zīla ndūndu. Anū gweru ogwū nū oṅnu biri biri rnūhia oṅnohia anū.

¹³ Kwnornu nū o bū Chiokike nye nōornu ērnū nū rime anū, nye neeme anū kweru hite nū mkpōma anū, neeme nhne lele kpa echiche a jiri zī.

¹⁴ Kpa anū neeme kpakara nhne, anū gweme otamu nū agirigo,

¹⁵ ma anū būru ele nwēe otna, ele zī snam, rūmu Chiokike ele nwēe oru nū rime ebiri ele ojo ka hiri aghi, hne anū noonwu lele mbō n'ōwa.

¹⁶ Anū jikwaru ikwu-ōnu ke būdnu ka aka rikne, ma m gweru m anū mee oknomokno n'obochi Karaīsi, ke jeegesi nū m gbāge m eso etekne, mōbu o dogbu ēhni m n'ērnū būo nhne etekne.

¹⁷ O būbedi nū be jōowusi oṅnarna būdnu m lele arīohna manya n'omezu arīohna, lele kpa ērnū okwnata ovu anū bū arīohna anū kwannū Chiokike, ovu nōoso m n'ōnu, m sno m anū nōonwudna.

¹⁸ Anū n'iwihuru anū snornu m nwe ovu ošo n'ōnu nū oṅwudna.

Nhne gbasiri Timoti nū Epafroditusi

¹⁹ M neele anya nū Nyenwe aī jeekwe me ziyanu anū Timoti ige matī, ma ovu sō m n'ōnu nga me jōonu izi gbasiri anū.

²⁰ M nwēe m nye berere nū lele ya, nye nhne gbasiri anū neemetū nū mkpōma n'ēzi.

²¹ Kwnornu nū nye obula neele anya nū nhne ke a, o būo ke Karaīsi Jizōsi.

²² Kōvu anū magwū nū Timoti gesiri ēhni a lele nnwō nū nda a, o znenu m izi, snornu m rnū ērnū izi oma.

²³ M neele anya nū m jeeziya a ige matī kpa nhne jaaganū hna me zī.

²⁴ M kwnatarū m Chiokike ovu nū me n'iwihuru m java whnū anū ige matī.

²⁵ Kōvu m whnūrnū m nū o būru oma me zihnahie Epafroditusi, nnwō nda m, nū nye ērnū nū nye ogwū ibne m, nye bū masī nye izi anū, nye anū ziyannu m o lebna anya nū mkpa naakpa m.

²⁶ O nōogwnusi a rikne o whnū anū anya, kwnornu nū anū nūrnū nū o rīaru ēhni igbugbu.

²⁷ N'ēzi, o rīaru ēhni igbugbu, o gwnarnū matī o nwū. Kōvu Chiokike dōnnu a obirizi, o būo ya kpōi, kōvu ma me, o zī me nwe nhne igbugbu n'olu nhne igbugbu.

²⁸ Kam kpayarū, ovu nōoso m n'ōnu k'agida o ziya a. Nga anū jōowhnu a, ovu jōoso anū n'ōnu, mkpōma jāala m mini berere.

²⁹ Anụ gweru okne ovu oso n'ọnu nabnanya a nụ ọwụna Nyenwe aị, anụ sọ ele nụ lele ya anya k'agịda.

³⁰ Kwnornu nụ ọ gwarnu matị ọ nwụ nụ ọnu Karajisi. O gweruru bụdnu a n'aka a n'ọnu ọnu kpa anụ nwé rikne nny.

3

Ezi ome mma

¹ N'ipne-aznụ, rụmu nda m, anụ nwụdna ọnwudna nụ Nyenwe aị. Ọ zà noogbu m igbugbu ọ gbanu anụ otu nhne ka berere, ka bu ma ọ bụnu anụ oma.

² Anụ neezeru ọhni anụ kwnornu rụmu nkịta, ele aruru-ẹli wam, ele noogbuja anọ-ọhni.

³ Kwnornu nụ aị ele be kparu nka n'ezị, bu ele neekpenu Chiokike hite n'Enine a, ele ji Karajisi Jizosi naanya risi, ele zà n'ọtukwasi anọ-ọhni mkpoma.

⁴ O bu n'ezị nụ m nwernu m nhne nụ lele ka me ji n'ọtukwasi mkpoma. O bụru nụ badnu ọbula nwernu nhne o jiri tükwasi mkpoma n'anọ-ọhni, m nwernu m karükwo.

⁵ Be kparu m nka nga me gbaru n'ọbochi ọsato, nye Izireli, nye avnruru Benjamini, m bu m nye Hiburu n'ezị. Nụ nhne gbasiri iwu, m bu m nye Farisi,

⁶ nye nwernu bękwu nụ mkpoma, naakpakna ogbako Chiokike ọhni. Nụ nhne gbasiri ome mma ke hi n'iwu, m nwé m ọta.

⁷ Kọvu kpakara nhne ke bnannu m iru, bu nhne me gwnuru nụ nhne etekne kwnornu Karajisi.

⁸ Owe! M gwnuru m kpakara nhne lele nhne etekne ma m mahia m nhne ke kakwo bu ọ mahia Karajisi Jizosi Nyenwe m, nye me kwnornu nụ a whu mwhu kpakara nhne. M gwnuru m be lele nhne bnana nụ nhne ma m rihia m Karajisi nụ iru,

⁹ ma me nụ ya buri otu, hne me nwé ome mma ke aka m ke hiri n'iwu, kọvu ome mma ke hiri n'okwnata ovu nụ Karajisi, ka bu ome mma ke hi n'aka Chiokike hite n'okwnata ovu.

¹⁰ M piuru m ọ mahia Karajisi nụ ikn-ernema olizo n'enu a, ma m kehia m igwe n'awnuwhnu a, nụ lele ya n'enu a,

¹¹ ọ buri nụ o jeekwe omume, ma m du m n'olizo n'enu ke ele nwuru ọnu.

Ogbazne nụ ruwhnu

¹² Ka zà neegesi nụ m nwehiala m kpakara nhne ka, ọbu nụ m dula m ozu ozu. Kọvu m naagbalị ma m nwudne m nhne wam, ke bu nhne Karajisi kwno nwudne m.

¹³ Rụmu nda aị, m zà m n'ogwenu ọhni m nụ m ji m a n'aka. Kọvu ka bu nhne me neeme, m nechezu kpakara nhne ke zị m n'aznụ, n'odosni aka m nụ nhne ke zị m nụ ruwhnu.

¹⁴ M naagbalị neezne nụ ruwhnu, ma m gbahia m nhne n'eso, ke bu nhne Chiokike

kwno sukwu m zne oligwe kwnornu Karajisi Jizosi.

¹⁵ Kam kpararu, kpakara aị ele sozuru lele ele Karajisi nwernu mkpoma ka. O buri nụ nye ọbula n'esislawuru anụ rị nhne zị ichne, Chiokike jeeme a o dno anụ anya nkari nkari.

¹⁶ Ngwa ma a yisi ọhni jikwaru kpakara nhne a nwernu nkari.

¹⁷ Rụmu nda m, anụ snornu ele sno nhne atụ m, anụ hnata ele noowu bụdnu lele kpa a znirni anụ ama.

¹⁸ Lele kpa me kannu anụ agida ige, kpa me ji anya-mini ẹkwana naakanu anụ kitna, agida ele badnu noowu bụdnu lele ele irno ke oga Karajisi.

¹⁹ Okwukwo bụdnu be bu mwhu, chi be bu ruwho be, nhne iwhnerne bu igwugwu be. Kpakara mkpoma be tükwasiri nụ nhne zị n'owa.

²⁰ Kọvu a bu rụmu oligwe. A zị neese Nye Oznohia aị ke jeehi n'oligwe va, nye bu Karajisi Jizosi.

²¹ O jeegweru ikn-ernema wam o jiri megbu kpakara nhne, bita be nụ mkpururu ọchi a, gbanwo anọ-ọhni aị ka ke nwé rikne, mee a ọ nụ lele ke a n'igwugwu.

4

¹ Rụmu nda m, anụ bu ele me whuru n'anya, ele ọ n'ogwenu m ọ whu n'anya, anụ bu ovu oso n'ọnu m nụ ogwo ọnu m. Anụ gwuzosi rikne nụ Nyenwe aị, ele me whuru n'anya.

Ezni

² M naariaso Udia nụ Sintike, be ziri n'udno, kwnornu nụ anụ ele ke Nyenwe aị.

³ M naariaso masi i, nye ọnu ibne m, yinu ele rinya ka n'ọma ma be ziri n'udno. Kwnornu nụ be sno m dogbu ọhni be n'enu ọkpo okwo izi oma, be nụ Kilementi nụ ele ọnu ibne m ele berere, ele be gbaru ọwuna be n'okwuko ke bụdnu.

⁴ Anụ nwudna ọnwudna nụ Nyenwe aị ige ọbula. M kwu kwno a berere, anụ nwudna ọnwudna.

⁵ Anụ mee ma kpakara ele badnu mahia ovu oma anụ. Nyenwe aị zị ndundu.

⁶ Mkpoma lá anụ mini kwnornu nhne ọbula, kọvu anụ gweru okpukpe nụ ọtu mmama chete kpakara nhne naakpa anụ nụ ruwhnu Chiokike.

⁷ Udno Chiokike ke kakwo kpakara ọghohia chekwata ovu anụ nụ echiche anụ nụ rime Karajisi Jizosi.

⁸ N'ipne-aznụ, rụmu nda aị, anụ naari ọriri nhne bu ezi ọka, nhne ọbula bu nhne nwernu igwugwu, nhne ọbula ke buri oma, nhne ọbula ke zị rịchna, nhne ọbula ke be whuru n'anya, nhne ọbula ke nwernu

otnutnu oma, o buru nhne obula ke ka mma, ke kwesiri oznarni.

⁹ Kpakara nhne anu muiharu, ke anu nahiaru nu ke anu nurnu n'onu m, mofu ke anu whuru nu rime m, anu neeme be. Chiokike ke udno jaadazinu anu.

Polu tunu ele Filipaj

mmamma

¹⁰ M nonwudna onwudna nu Nyenwe ai kwnornu nu anu gwnakneru eru anu ke gbasiri m. Nhne gbasiri m neemetu anu nu mkpoma, kovu anu nwee oghere o gesi a.

¹¹ M za m nookwu ka kwnornu nu mkpa naakpa m, kovu nu m maam kpa o daziri nu ruwho ojiji n'onodi obula me whuru ehni m.

¹² M magwu m kpa o zi nu mkpa, m magwu m kpa o zi nu ige me nwejiri nhne. M muiharu m nhne tugwaru otugwa ke ruwho ojiji n'onodi obula, mofu agwu wiri mofu nu ruwho jiri eji, o nwernu agida nhne mofu lele nye nhne kogwu.

¹³ M jeemeli kpakara nhne hite nye wam ke neeme m gbasiri rikne.

¹⁴ O buru oma nu anu snornu m kehia igwe n'awhuruwhnu m.

¹⁵ N'ez, okwolem anu ele Filipaj bu ele yinnu m aka nga me panizoru neezni izi oma. Nga me hi nu Masidonia nonwhuya, o za ogbako Chiokike obula ke snornu m nu nhne gbasiri okesi nu onahoru nhne, okwolem anu.

¹⁶ O bubedi nga me zi nu Tesalonika, anu gweyanu m nkesi ige obula me zi nu mkpa.

¹⁷ Ka za neegesi nu m noopio nkesi, kovu m noopio nhne jeeme anu nwehia nhne buru oma.

¹⁸ M nahiaru m kpakara nhne anu ziyaru, tukwasi kwno n'olu a. Anu gweyanu m kpakara nhne ke zi m mkpa, ke me nahiaru m n'aka Epafroditusi. Kpakara be bu nhne nwernu ekarna oma, arjohna ke noso Chiokike ovu n'onu ke o nahoru.

¹⁹ Chiokike m jeenye anu kpakara nhne ke zi anu mkpa, hite n'agida ekwnu a ke zi igwugwu nu Karaishi Jizosi.

²⁰ Chiokike Nda ai nwe igwugwu du okwnukokwnu. Amim.

Obekwu ipne-aznu

²¹ Anu bekwu kpakara ele ke Chiokike ke zi nu Karaishi Jizosi. Rumu nda ele me nu be zi neebekwu anu.

²² Kpakara ele Chiokike zi nso neebekwu anu, ke kakwo ele zi n'ez-nu-oro Siza.

²³ Oru ke Nyenwe ai Jizosi Karaishi dazinu enine anu. Amim.

Ọkwukwo izi Pọlu gbaznenu Ele Kọlosi

Nhne gbasiri ọkwukwo izi ka

Kọlosi bụ ẹli-ọhna ke zị mkpa nù rime Esia Matị. Pọlu nye gbarụ ọkwukwo izi ka znélele Kọlosi, kovu ọ nurnu nù ele Karaịsi zị pji gwuzosiri rikne n'ọkwinata ovu be (1:3-7; 2:6,7). Be nurnu izi ọma hite n'ọnu otu nye be kwu Epafarasi nye wu pji (1:7; 4:12,13), kovu ya nù Pọlu zị nù ikelu (Failemoni 23) n'ige Pọlu gbarụ ọkwukwo izi ka (1:14; 4:3,10,18).

Agida ele zị nù ọgbako Chiokike ke zị nù Kọlosi bụo ele Ju (1:27), ke kpayarụ agida okpukpe zị ichne ichne nù omen'ẹli noopio o megu be. Pọlu pioru be mahia nù Karaịsi zị n'oligwe nẹchi kpakara rikne ke zị n'owa (3:1). Ka neegesi nù be jeekpenu Karaịsi kpoi.

Karaịsi bụ oyiyi ke Chiokike, nye be whnù anya.

Karaịsi bụ nye risi kpakara nhne Chiokike keru.

Ọ masiri Chiokike o mee kpakara nhne wuru nù rime Karaịsi.

O mernu ka ma ya nù kpakara nhne ziri n'udno (1:15,19,20a).

Nhne zị n'ọkwukwo izi ka

Obekwu ikwu (1:1,2)

Otu mmamma (1:3-14)

Badnù nù ẹrnu Karaịsi (1:15---2:19)

Budnu ikne nù rime Karaịsi (2:20---4:6)

Obekwu ikwu ipne-aznu (4:7-18)

¹ Mawa, Pọlu, nye izi Karaịsi Jizọsi lele kpa echiche Chiokike jiri zị, nù nnwọ nda aj Timoti,

² naagbaznenu rumu Nda aj ele zị nsọ, ele kwesiri ọkwinata mkpoma nù Karaịsi, ele ke zị nù Kọlosi ọkwukwo. Oru nù udno ke Chiokike Nda aj dazinu anụ.

Pọlu tịru mmamma

³ A nọtunu Chiokike mmamma, Nda Nyenwe aj Jizọsi Karaịsi, neekpenu anụ okpukpe ige ọbula.

⁴ Kwnornu nù a nurnu nhne gbasiri ọkwinata mkpoma anụ nù Karaịsi Jizọsi nù ọwhnun'anya anụ nwernu hne kpakara ele nsọ Chiokike zị.

⁵ Olile anya ke be bitannu anụ n'oligwe neenye anụ ọkwinata mkpoma nù ọwhnun'anya ka. Anụ nurnu nhne gbasiri olile anya ka n'ezi ọka ke izi ọma,

⁶ bụ izi ọma ke vakwnusiri anụ. Izi ọma ka naamija mkpuru, nooso masi nù kpakara ọwa, lele kpa o neeme n'esilawuru anụ hite n'ọbochi anụ nurnu a, ghohia masi oru Chiokike n'ezi.

⁷ Anụ nurnu izi ọma ka n'ọnu Epafarasi nye izi ibne aj a whnurnu n'anya, nye bụ nye ẹrnu Karaịsi nye kwesiri ọkwinata mkpoma n'ọnodi aj.

⁸ Ọ kannụ aj nhne gbasiri ọwhnun'anya anụ ke Enine Chiokike nyernu anụ.

⁹ Kam kpayarụ, hite n'ọbochi a nurnu nhne gbasiri anụ, a zị neekpenu anụ okpukpe, nọorio Chiokike ma anụ mahia echiche a nkarị nkarị hite nù kpakara akoniche nù oghohia ke Enine Chiokike neenye.

¹⁰ A nọorio ma anụ wuru budnu ke jeegweyanụ Nyenwe aj igwugwu, neeme nhne jaamasị Nyenwe aj n'apna ọbula, naamị mkpuru ọma zị ọdo n'odo. Ka jeeme anụ nooso, naamahia Chiokike nkarị nkarị.

¹¹ Anụ buri ele gbasiri rikne hite nù kpakara rikne nù iknernema ke zị igwugwu Nyenwe aj ma anụ nwehia ọsnuta mkpoma nù ndidi. Anụ gweru ovu ọso n'ọnu

¹² nọtunu Nda aj mmamma, nye mernu anụ nwernu igwe n'esilawuru rumu Chiokike zị nsọ n'ẹli-eze ke iwhne.

¹³ Kwnornu nù Chiokike dọhiaru aj n'aka nye wam nẹchi nù rime ọchichiri, kwubnanya aj n'ẹli-eze ke Nnwọ a, nye ọ whnurnu n'anya.

¹⁴ O nyernu aj ọgbahia ke bụ ọgbaru mmehie.

Karaịsi kakwo kpakara nhne

¹⁵ Karaịsi bụ oyiyi ke Chiokike, nye be whnù anya. Karaịsi bụ nye risi kpakara nhne Chiokike keru.

¹⁶ Chiokike keru kpakara nhne hite n'aka a, kpakara nhne ke zị n'oligwe nù ọwa, nhne anya n'ọwhnu nù nhne anya zà n'ọwhnu, be bụ ele dazị nù ngadna eze, mọbu ele nwernu rikne nù ele nẹchi ẹchi nù ele nwernu iknernema. Chiokike keru kpakara nhne hite n'aka a, ma kpakara nhne nyee a igwugwu.

¹⁷ Ọ zị tụtụ nhne ọbula, kpakara nhne jikọtaru n'otu nù rime a.

¹⁸ Ya bụ risi ẹhni a, ke bụ ọgbako Chiokike. Ya bụ ọpanizo nù mkpuru mbom ke ele hiri n'ẹnwu lizọ, ma ọ buri nye risi kpakara nhne.

¹⁹ Kwnornu nù ọ masiri Chiokike o mee ma kpakara nhne ọ bụ, wuru nù rime Karaịsi.

²⁰ O mernu ka ma ya nù kpakara nhne ziri n'udno, ma nhne ke zị n'owa ma nhne ke zị n'oligwe, ma ya nù be mee udno hite n'ọvnarna a ke ọ wusaru n'olu ọgba.

²¹ Nù mbom, anụ bụ ele zị ikere hne Chiokike zị nù ele irno n'ovu anụ kwnornu n'ẹrnu ojo anụ.

²² Kovu kịtna, o mernu anụ nù ya ziri n'udno hite n'ẹnwu Karaịsi nwurnu n'anọ-ẹhni, ma o gweru anụ chete nù ruwhnu a,

ele zì nsọ, nwée ọrụ mọbu nhne be bnornu be,

²³ Ọ bụrụ nū anū gwuzosi rikne n'ọkwnata ovu, ele gwuzo kwem, anū kwé nhne ọbula gweme anū n'olile anya izi ọma ke anū kweru. Ka bụ izi ọma ke anū nurnu, be kọru okwo a nū kpakara mkpururu oligwe, ke me Pọlu bụ nye izi a.

Ernu Pọlu

²⁴ M nnonwudna onwudna kịta kwnornu awnūwhnu me tarū nū risi anū, m ji m anọ-ẹhni m mezu nhne ke gwnarnū gbasiri awnūwhnu Karaịsi tarū, kwnornu ẹhni a, ke bụ ọgbako Chiokike.

²⁵ M ghọru m nye izi ọgbako Chiokike hite n'ernu Chiokike nyernu m me zni anū ikwu-ọnu Chiokike n'ozuzu oke a.

²⁶ Ikwu-ọnu Chiokike ka bụ nhne ke tugwaru otugwa agida ige nū agida ebiri, kịta, o kpumennu a ele nsọ a.

²⁷ Ọ masiri Chiokike o mee ele ke a mahia nhne tugwaru otugwa ke bụ nū ẹkwu ke zì igwugwu bụ ke ele bụo ele Ju. Ẹkwu ka bụ Karaịsi nū rime anū, bụ olile anya nū anū jeekehia igwe n'ebube a.

²⁸ A nọkpo okwo gbasiri Karaịsi, nọodo ele badnū aka nū nsni, neezni nye ọbula hite n'akōniche Chiokike nyernu aī, ma a gweru nye ọbula chete nū ruwhnu Chiokike nū ozu oke kwnornu Karaịsi.

²⁹ Kam kpayarū, m ji m kpakara rikne Karaịsi nyernu m ke nnonusi ẹrnu rikne, m nọdogbu ẹhni m n'ernu ka.

2

¹ M pioru m anū mahia kpa me nọdogbu ẹhni m n'ernu kwnornu anū nū ele zì nū Laodisia, nū kpakara ele whūlele m anya.

² Ka bụ ma be kwnagidne be n'ovu, ziri masi n'otu n'owhnu'anya, ma be nwehia kpakara ẹkwu ke oghohia ke zuru ozu, ka jeeme be mahia nhne tugwaru otugwa ke Chiokike, ke bụ Karaịsi.

³ Kpakara nhne ke tugwaru otugwa zì nū rime a, ke bụ akōniche nū nhne omuma.

⁴ M naakanū anū ka, anū kwé nye ọbula duwhu anū hite n'ikwu-ọnu ke nọso n'onu.

⁵ Ọ bụ n'ezì nū me nū anū zila n'anọ-ẹhni, kọvu me nū anū zì nū enine. Ọ nọso m kpa me nōwhnu nū anū noowu bụdnū lele kpa o kwesiri, noogwuzo kwem n'okwnata ovu ke zì nū Karaịsi.

Karaịsi neegweya bụdnū n'ezì

⁶ Lele kpa anū nahjaru Karaịsi Jizọsi lele Nyenwe aī, anū dazigidne noowu bụdnū nū rime a.

⁷ Anū gba ẹgwugwu nū rime a, anū wulizọ ẹhni anū lele ọro kpa ọ bụ ntụ-ẹli ọro, gbasī rikne n'okwnata ovu lele kpa be znirni anū, ọtu mmamma jihia ovu anū.

⁸ Anū kwé badnū ọbula duwhu anū hite nū ikwu-ọnu etekne nū aghigho ikwu-ọnu bnána nū nhne, ke knosiri aka n'omen'eli ke ele badnū nū renwu ọjọ matī matī ke ọwa ka, bụo ke Karaịsi.

⁹ Kwnornu nū kpakara nhne Chiokike bụ wu nū rime Karaịsi n'anọ-ẹhni a.

¹⁰ Chiokike mernu anū sozu nū badnū nū rime Karaịsi, nye bụ risi kpakara ele nwernu rikne nū ele ọchichi.

¹¹ Be kparū anū nka nū rime a, ke bụ ogweme mmehie anū, ọ bụo nka ke be jiri aka ele badnū kpa, kọvu nka ke Karaịsi n'iwuhuru a kparū.

¹² Hne be likotaru anū nū ya n'owuwu-mini, be gwelizokota anū hite n'okwnata ovu anū n'iknerna Chiokike, nye mernu Karaịsi hi n'enwu lizọ.

¹³ Anū bụ ele nwurnu ọnwu nū rime mmehie, anū bụ ele bụo ele Ju be kpala nka. Kọvu Chiokike mernu anū snornu Karaịsi ziri bụdnū, kpa ọ gbarūnu aī kpakara mmehie aī.

¹⁴ O dọkaru kpakara ọkwukwo be gbarū nū kpakara iwu ke megidnerna aī, o gweme be, kpogidne be n'ogba Jizọsi.

¹⁵ Chiokike nahuru kpakara ele ọchichi nū ele nwernu rikne iknerna, kpaš be iwherne nū ruwhnu ọhna, neegesi nū o megburu be hite n'ogba Jizọsi.

¹⁶ Kam kpayarū, anū kwé nye ọbula gweru nhne anū neeri mọbu nhne anū nnonwo, mọbu nū anū zá naabita mmemem okpukpe, mọbu ẹnwa ikne, mọbu Ọbochi Ozukwa Inwe, kpe anū ikpe.

¹⁷ Kpakara nhne ka bụ enine nhne ke jaava, kọvu risi nhne bụ Karaịsi.

¹⁸ Anū kwé nye ọbula ke ọ naamasị o gwedna ẹhni a ẹli nū okpenu ele enine izi mee anū buri ele kwésile, ọ bụ n'ezì nū nye wam ka nū ọ whurnu owhnurninya gbasiri be, ovu ke badnū a mernu a ọ buri nye nganga n'etekne.

¹⁹ Nye wam bụ nye gwemernu ẹhni a nū Karaịsi, nye bụ risi ẹhni, nye mernu kpakara rnkani nū rẹkpu ọchi nū aka knekota n'otu. Kpa ọ nọoznu kpakara ẹhni, o nooso lele kpa Chiokike neeme a nooso.

²⁰ Anū snornu Karaịsi nwu ẹnwu, o mernu anū nwernu ẹhni anū whoga nū rikne renwu ọjọ matī matī ke ọwa ka. Kini mernu anū noowu bụdnū lele nū anū bụ ke ọwa, naabita iwu be?

²¹ Bụ ke karū, "Anū kpá ka aka, anū rátu a riro, anū kpá kiyari aka."

²² Kpakara iwu ka gbasiri nhne ke joowhu kpa ele badnū jiri be rnū ẹrnu mọbu rikwo be, iwu ele ka kno aka nū nhne ele badnū nyernu n'iwu nū iznizni be.

²³ Kpakara iznizni nū kpa nū lele nhne nwernu akōniche, ke bụ okpenu Chiokike lele kpa badnū karū be kpenu a, ogwedna

ẹhni be n'ẹli, nù ome anọ-ẹhni nhne rikne, kọvu be nwée rikne bnosni echiche ojo ke ovu.

3

Owu budnu zị nsọ

¹ Hne ọ bụ nù anù nù Karaisi hiri n'ẹnwu lizọ n'otu, anù b́ta ovu anù nù nhne zị n'olu, hne Karaisi dazị n'ẹli n'akarikwnunga Chiokike.

² Anù neeche echiche nù nhne zị n'olu, ọ b́o nù nhne zị n'owa.

³ Kwnornu nù anù nwurnu ọnwu, budnu anù nù Karaisi bụ nhne tugwaru otugwa nù rime Chiokike.

⁴ Nga Karaisi nye bụ budnu anù jowhuya iwhe, anù joosno a whuya iwhe, kehia igwe n'igwugwu a.

⁵ Anù mee ma kpakara nhne ke bụ nhne ọwa nwu ẹnwu, kpakara ome ọyi, ọzi rịchna, ẹgwurnu nhne ojo, echiche ojo nù anyakwu, ke nù lele ọkwa renwu.

⁶ Kam kpayarù, ovu owe ẹhni Chiokike naadnakwasị kpakara ele zá noobno nsni.

⁷ Ka bụ kpa anù wuru budnu nga anù bụ ele ke ọwa.

⁸ Kọvu kịtna, anù gweme kpakara nhne ka nù rime anù, ovu owe ẹhni, ọnuma, irno ovu, ọkaja, nù ikwu-ọnu zifa rịchna nù mgbele-ọnu anù.

⁹ Ọ zá nye ọbula ghanù ibne a aghalaghala, hne anù gwemernu badnù ọknani wam nù kpakara ẹrnu ojo a.

¹⁰ Anù worulem badnù ikne lele iwo. Chiokike neeme anù ziri ikne ma anù mụhia nhne gbasiri nye kpuru anù.

¹¹ Ọ zá nhne zị ichne nù hne nye Giriki mọbu nye Ju zị, nye be kparù nka nù nye be kpáge nka, nye izne, nye nù lele anọhia,* ọhi mọbu nye b́o ọhi, kọvu Karaisi bụ kpakara nhne, nye zị masị nù rime kpakara badnù.

¹² Kam kpayarù, lele kpa ele Chiokike hohiaru, ele nsọ a, ele ọ whnurnu n'anya, anù woru obirizi, ovu ọma, ogwedna ẹhni anù ẹli, ọzi wọhnerne nù ọsnuta ovu lele iwo.

¹³ Anù naagidne ibne anù, gbarunu ibne anù nhne ọbula be mehieru anù. Anù gbarunu ibne anù lele kpa Chiokike n'iwuru a gbarunnu anù.

¹⁴ Tụkwasi n'olu kpakara nhne ka ọwhnun'anya, bụ nhne ke neeknegidne kpakara be n'otu n'apna ke zuru ozu.

¹⁵ Anù kweru ma udno ke Karaisi nẹchi ovu anù, lele ele bụ otu badnù, ele Chiokike sukwuru bna n'udno. Anù nọotu mmamma.

¹⁶ Anù kweru ma ikwu-ọnu Karaisi gweru ẹkwnu a wuru nù rime anù, kpa anù ji akoniche neezni ibne anù nhne, neezni be ezni. Anù nọogwnu eri ọma, eri ọznarni,

nù eri mkpọma ọso n'ọnu, gweru ovu anù nọotunu Chiokike mmamma.

¹⁷ Nhne ọbula anù neeme, ọ bụ n'ikwu-ọnu mọbu nhne aka neeme, anù mee kpakara nhne nù rẹwhna Nyenwe aị Jizọsi, nọotunu Chiokike Nda mmamma hite nù a.

Ezi-nu-oro nye Karaisi

¹⁸ Ele bụ nnwerne, anù b́ta ẹhni anù nù mkpururu nzi anù, kpa o kwesiri ele noosno Nyenwe aị.

¹⁹ Ele bụ nzi, anù whnù nnwerne anù n'anya, anù mee be nhne rikne.

²⁰ Ele bụ rumu, anù noobnonu ele murnu anù nsni nù kpakara nhne, ka bụ nhne Nyenwe aị noopio.

²¹ Ele nda, anù mékọ rumu anù ovu owe ẹhni, ọ zị inwe gwù be.

²² Ele ọhi, anù noobnonu ele nwe anù n'owa nsni nù kpakara nhne, anù neeme be, ọ b́o nga be neele anù anya ma anù buru ele ọma be, kọvu ma nga be zá neele anù anya. Anù gweru ovu anù nọoso be anya n'ezì, nọotu ogwnu Nyenwe aị.

²³ Nhne ọbula anù neeme, anù gweru kpakara ovu anù mee be lele ele nọornunu Nyenwe aị ẹrnu, ọ b́o lele ele nọornunu ele badnù ẹrnu.

²⁴ Anù magwù nù anù jeekehia mkpe n'aka Nyenwe aị lele ọgwo ẹrnu, hne ọ bụ Karaisi bụ nye anù nọornunu ẹrnu.

²⁵ Nye ọbula ke nọornu ẹrnu ojo jaanahia ọgwo ẹrnu ojo n'aka Chiokike. Chiokike zá neele badnù anya nù ruwhnu.

4

¹ Ele nwe ele ọhi, anù mee ọhi anù nhne buru ọma nù nhne kwesiri, kwnornu nù anù nwernu Nyenwe anù ke zị n'oligwe.

Agida ezni

² Anù gwéme aka n'okpe okpukpe, neese nse, nọotu mmamma.

³ Anù kpenu aị okpukpe masị, ma Chiokike gbamanù aị ọnuhna o zni izi ọma, ma a kọ ọkwo nhne tugwaru otugwa ke Karaisi. Ka bụ nhne mernu me zị n'ikelu.

⁴ Anù kpe okpukpe ma m kọ m okwo izi ọma ka kpa ele badnù jọghohia a, ka bụ ẹrnu me kwesiri ọ rnu.

⁵ Anù gweru akọ kpa agwa ọma n'esilawuru ele b́o ele Karaisi. Anù gweru oghere ọbula anù nwernu mee nhne.

⁶ Anù mee ma ọtnurita ọtnutnu anù buru nhne nwernu ovu ọma, ke nọoso n'ọnu lele arụ, ma anù mahia nhne anù jaasa nye ọbula.

Obekwu ikwu ipne-aznu

⁷ Taijikosi, nnwọ nda a whnurnu n'anya nù nye ẹrnu Nyenwe aị ke kwesiri ọkwnata

* 3:11 nye nù lele anọhia ọkwukwo ke mbom kwuru: nye Sikitia

ovu, nye izi ibne aị, jaakanụ anụ kpakara nhne gbasiri m.

⁸ M neeziyanu anụ ya ma anụ mahija kpa a zi, ma o mee ovu si anụ rikne.

⁹ Ya nụ Onesimosi sno naava, nye bụ nnwọ nda a whnuru n'anya kwesiri okwnata ovu, nye bụ masi otu nụ rime anụ. Be jaakanụ anụ kpakara nhne ke neeme hna.

¹⁰ Arisitakosi, nye me nụ a zi n'ikelu neebekwu anụ, ma Makị, nnwọ nwene Banabasi. Anụ nuru nhne gbasiri a, anụ nabanya a nga o varu.

¹¹ Jizosi, nye be kwu Jositosi neebekwu anụ. Ka kwolem ele Ju ibne m me nụ be sno nornu eru eli-eze Chiokike, be neeme ovu si m rikne.

¹² Epafarasi, nye bụ otu nụ rime anụ nụ nye izi Karasi Jizosi neebekwu anụ. O zi naagba otu n'okpukpe nụ risi anụ, naariasno Chiokike ma anụ gwuzosi rikne n'ome nhne bụ echiche a, buru masi ele sozuru nụ badnu.

¹³ M naagbanu a akebe nụ o nornusi eru rikne kwnornu anụ nụ ele zi nụ Laodisia nụ Hirapolisi.

¹⁴ Enyi aị Lukwu wodibia a whnuru n'anya, nụ Demasi neebekwu anụ.

¹⁵ Anụ bekwunu m rumu nda ele zi nụ Laodisia, nụ Nimfa, ma ogbako Chiokike zi n'oro a.

¹⁶ Kpa anụ gwuru okwukwo izi ka, anụ whnu nụ be gwuru a n'ogbako Chiokike ke zi nụ Laodisia. Anụ gwu masi okwukwo izi me gbannu ele Laodisia.

¹⁷ Anụ kanu Akiposi, "Whnu nụ irnukworu eru i naahjaru n'aka Nyenwe aị."

¹⁸ Mawa, Polu, ji aka m gba obekwu ikwu ka. Anụ chenwanya nụ m zi m n'ikelu. Oru Chiokike dazinu anụ.

**Okwukwo izi
ke Mbom
Polu gbaznenu
Ele Teshalonika**

Nhne gbasiri okwukwo izi ka

Polu panizoru ogbako Chiokike ke zi nu Teshalonika (2:13,14) nga o ngoru ernu o ji nooznu ehni a. Nu rime eli-ohna ka zi mkpa nu rime Girisi bu hne agida ele naakwa renwu ghuru ele Karaishi (1:9). Be bu ele kwesiri okwnata mkpoma, ke mernu izi oma Nyenwe ai gbasaru nu kpakara eli wam (1:8). Eleghi anya okwukwo izi ka joburu okwukwo izi mbom Polu gbaru, mabu okwukwo mbom be gbaru nu Teshamentiti Ikne.

Nga agida ele badnu lizoru megidne Polu, o gbazne Atensi. Omekwo, o zizne Timoti zne lekwa kpa ele Karaishi nooso (3:6-10). Nga Timoti hiehnarnu, o nyernu Polu qnutnu buru oma gbasiri ele Karaishi zi nu Teshalonika.

Kpa be zi neese ovuva Nyenwe ai, agwna be zima ngoru ernu. Mkpoma naala ele berere mini kwnornu nu agwna be nwurnu, kovu Nyenwe ai yavage. Polu gbalu o mee ma be mahia nhne jeeme nga Nyenwe ai jaava (4:13-15), nu kpa be kwesiri o wu budnu be (5:1-11).

Nhne zi n'okwukwo izi ka

Obekwu ikwu (1:1-3)

Nhne atu ke okwnata mkpoma ele Teshalonika (1:4--3:13)

Budnu ke nooso Chiokike ovu n'onu (4:1-12)

Nhne be jeele Anya a nga Nyenwe ai jaava (4:13--5:11)

Ezni ipne-aznu nu obekwu ikwu (5:12-28)

¹ Mawa, Polu nu Saikasi nu Timoti naagba okwukwo gbaznenu ogbako Chiokike ke zi nu Teshalonika nu rehna ke Chiokike Nda nu Nyenwe ai Jizosi Karaishi.

Udno nu oru dazinu anu.

² A nootunu Chiokike mmamma nu risi kpakara anu ige obula, neekpenu anu okpukpe.

³ A neechenwanya ernu anu ige obula nu okwnata ovu anu nu ruwhnu Chiokike Nda ai, nu ernu owhnun'anya anu, nu osuta mkpoma anu ke hi nu olile anya anu nwernu nu Jizosi Karaishi.

Nhne atu ke okwnata ovu

⁴ Ele me whurnu n'anya, Chiokike whurnu anu n'anya, ka kpararu o jiri horu anu buru ele ke a.

⁵ Kwnornu nu izi oma a znirni anu vage n'ikwu-onu etekne, kovu o ji iknerna nu okwnagidne ke Enine Nso mee anu mahia ezi oka. Anu magwu kpa a wuru budnu ai n'esilawuru anu.

⁶ Anu ghuru ele muhiaru nhne hite n'ole ai nu Nyenwe ai anya. O bu n'ezi nu anu taru agida awhnuwhnu, kovu anu jiri ovu oso n'onu nabnanya izi a znirni anu hite n'Enine Nso.

⁷ Kam kpararu, anu jiri buru ele be ji gbu atu n'esilawuru ele kweru ekwe nu kpakara Masidonia nu Akaya.

⁸ Ikwu-onu Chiokike hiri n'onu anu gazu kpakara ohna, o buo nu Masidonia nu Akaya kpai. Okwnata ovu anu nu Chiokike zuru kpakara owa, o za nhne berere a jookwu gbasiri a.

⁹ Be nookwu nu anu nabnanyarnu ai nkari, nu kpa anu sigbasiri o kwanu renwu neekpenu Chiokike ke zi budnu nu ezi oka.

¹⁰ Anu zi neese Nnwọ a ke hi n'oligwe, nye o mernu o hi n'enwu lizo, Jizosi nye dohiaru ai n'ovu owe ehni Chiokike ke naava.

2

Ernu Polu nu Teshalonika

¹ Rumu nda ai, anu magwu nu ige ai nu anu dazikotar n'otu buo nhne etekne.

² O bu n'ezi nu a taru awhnuwhnu nu nhne iwhnerne nu Filipai kpa anu magwu, kovu Chiokike yinu ai aka o zni izi oma a megidne okne okpagbu.

³ Nhne a noorio anu buo hite nu nhne ojo mabu echiche ojo, a za noopio o ghonu anu aghigho.

⁴ Tnnuma, a nookwu oka lele ele Chiokike kwnataru ovu yisi izi oma n'aka ai. A za noopio o mee nhne jaamasi ele badnu, kovu a neeme nhne jooso Chiokike ovu n'onu, nye magwu nhne zi n'ovu ai.

⁵ Anu magwu nu a jile ikwu-onu ke jeeme badnu tne eri, a kpunsine ruwhnu ai n'aghigho, ma a rigbu ele badnu, Chiokike bu nye akebe ai.

⁶ A za noopio ele badnu znarni ai, mabu anwa mbe ele berere.

O bu n'ezi nu a bu ele izi Karaishi, kovu a kwele o buru ivu rina nyee anu.

⁷ Kovu a nu lele nyerinya neechi nnwo rema n'esilawuru anu, nye anya duru eli, ji wohnernerne nooznu rumu a.

⁸ Owhnun'anya a nwernu hne anu zi kpararu, o masiri ai anu snornu ai kehja igwe, o buo n'izi oma Chiokike kpai, kovu o buru nu o kwe omume, nu budnu ai masi kwnornu nu anu zi ai mkpa.

⁹ Rumu nda m, m magwu m nu anu jeechenwanya, kpa a jiri aka ai lawuru nu ernu iwhnehnie nu abali, ma a gharu o buru

ivu rinya hne anu zi kpa a nɔokpo okwo izi ɔma Chiokike n'esilawuru anu.

¹⁰ Chiokike bu nye akebne ai ma anuwa masi, kpa a wuru budnu zi nsɔ, nu ome mma ke nwɛe ɔru n'esilawuru anu ele kweru ekwe.

¹¹ Anu magwu nu a mesnornu anu lele kpa nda neemeso rumu a.

¹² A zi naakwnagidne anu, nɔosnuta anu ovu ma anu noowu budnu lele kpa ele Chiokike sukwuru, ma anu bna n'eli-eze a nu igwugwu a.

¹³ Kam kpayarɔ, a nɔotunu Chiokike mmamma ige obula kwnornu nu anu nahɔru ikwu-ɔnu Chiokike ke anu nurnu n'ɔnu ai. Anu gwɛrule a lele nu ɔ bu ikwu-ɔnu ke badnu, kɔvu ɔ bu ikwu-ɔnu Chiokike ke nɔornu ɛnu nu rime anu ele kweru ekwe.

¹⁴ Anu buru ele sno ɔchi ɔgbako Chiokike ke zi nu Judiya, ele ke Karaɔsi Jizɔsi. Anu taru awhnuwhnu n'aka ele eli anu lele kpa ɔgbako Chiokike taru awhnuwhnu n'aka ele Ju.

¹⁵ Ka bu ele gburu Nyenwe ai Jizɔsi nu ele ɔwhnurninya, chiɔhala ai. Be meɔru Chiokike mee masi ele badnu nhne rikne.

¹⁶ Ka bu ma a gharu ɔ kwunu ele buo ele Ju ikwu-ɔnu Chiokike, ma Chiokike znɔhia be. Be zi nɔotukwasi mmehie nu risi be, tem ovu owe eɔni Chiokike dnakwasɔ be.

O nɔogwnu Pɔlu o zne Teşalonika

¹⁷ Kɔvu rumu nda ai, nga a whɔgaru hne anu zi ige mati n'ano-ɛni, ɔ buo nu echiche, ɔ nɔogwnusi ai rikne ɔ whnu anu anya.

¹⁸ ɔ masiri ai ɔ vakwnusi anu, agida ige, mawa Pɔlu pioru ɔ va, kɔvu Ekwensu bnosnirni ai.

¹⁹ Anu bu olile anya nu igwugwu nu ovu ɔso n'ɔnu a nwernu nga Nyenwe ai Jizɔsi jaava,

²⁰ N'ezi, anu bu igwugwu nu ovu ɔso n'ɔnu ai.

3

¹ Kpa a nwɛe rikne naagidne a berere, a kpebi ɔ daziri nu Atɛnsi n'iwɔhuru ai.

² Kam kpayarɔ, a ziyaru Timoti nnwo nda ai nu nye sno ai nɔornu ɛnu Chiokike naagbasa izi ɔma Karaɔsi, ma ɔ kwnagidne anu, mee masi ma ɔkwɔnata ovu anu si rikne.

³ Anu kwɛ nhne ɔrnurna mee nye obula whɔga n'ɔnodi a. Anu magwu nhne ɔrnurna joodonu nye Karaɔsi obula.

⁴ Nga ai nu anu zi, a kannu anu nu be jaakpakna ai ɛni. Anu whnurnu nu ka mezuru.

⁵ Kam kpayarɔ, kpa me nwɛe rikne gwuzoli nu mkpɔma m nu nhne gbasiri anu, m ziya Timoti ma m mahia m kpa anu nu n'ɔkwɔnata ovu. Ovu laru m mini ma nye

ɔrnurna wam ɔ kwnamana anu n'ɔkwɔnata ovu, ma ɛnu ai nu risi anu buru nhne etekne.

Izi nkasi ovu Timoti gweyarɔ

⁶ Nga Timoti hi hne anu zi hiehna, gweyannu ai ɔtnutnu ɔma gbasiri ɔkwɔnata ovu nu ɔwhnunn'anya anu, ɔ kannu ai nu anu neechenwanya nhne buru ɔma gbasiri ai ige obula, nu ɔ nɔogwnu anu ɔ whnu ai anya lele kpa ɔ nɔogwnu masi ai ɔ whnu anu anya.

⁷ Kam kpayarɔ, rumu nda ai, a nwernu ɔkasi ovu nu rime awhnuwhnu ai kwnornu ɔkwɔnata ovu anu.

⁸ N'ezi ɔka, a nwernu budnu ikne kwnornu nu anu gwuzo kwem nu rime Nyenwe ai.

⁹ A jɛenwe rikne tunu Chiokike mmamma kpa o kwesiri kwnornu nu ovu ɔso n'ɔnu a nwernu nu ruwhnu Chiokike nu risi anu.

¹⁰ A zi neekpe okpukpe iwhnehnie nu abali ma a nwe rikne whnu anu anya ma a nyee anu nhne ke zi anu mkpa n'ɔkwɔnata ovu.

¹¹ Kɔtna, a neekpe Chiokike Nda ai n'iwɔhuru a nu Nyenwe ai Jizɔsi gbamanu ai apna ma a vakwnusi anu.

¹² Nyenwe ai mee ma ɔwhnunn'anya anu ba aba k'agida nu risi nye obula, lele kpa ɔwhnunn'anya ai zi nu risi anu.

¹³ Chiokike gba anu inwe ma anu ziri snam, ziri masi nsɔ nu ruwhnu Chiokike Nda ai nga Nyenwe ai Jizɔsi nu ele nsɔ a jaava.

4

Budnu ke jɔso Chiokike ovu n'ɔnu

¹ Ke ipne-aznu, rumu nda ai, a riasno anu wuru budnu ke jɔso Chiokike ovu n'ɔnu, lele kpa a noowu. Bikno, anu neeme kɔam neezne nu ruwhnu kwnornu Nyenwe ai Jizɔsi.

² Anu magwu nhne a znirni anu bu hite nu rɛwhna Nyenwe ai Jizɔsi.

³ Ka bu nhne Nyenwe ai nooppio ma ɔ bita anu nsɔ, ma anu whɔga nu nhne obula ke zila riɔna lele ome ɔyi,

⁴ ma nye obula muhia kpa o jeejikwaru ɛni a * nu apna ke zi nsɔ nu igwugwu,

⁵ ɔ buo ome nhne tu iwhnerne ke nɔogwnu be lele kpa ele ma Chiokike neeme.

⁶ ɔ za nye meɔ nwene a nu nhne nu kpa mɔbu ghɔgbu a. Nyenwe ai jaata kpakara ele neeme nhne ɔjo ka awhnuwhnu lele kpa a kannu anu, ɔ masi anu aka nu nsi.

⁷ Anu magwu nu Chiokike sukwule ai ma a buru ele zila riɔna, kɔvu ma a wuru budnu zi nsɔ.

* 4:4 kpa o jeejikwaru ɛni a mɔbu, kpa ya nu nnwerne a joowu

⁸ Kam kpayarū, nye obula ke juru odo aka nū nsnī ka jūla badnū, kovu Chiokike nye nyernu anū Enine Nso a.

⁹ Nū nhne gbasiri owhnun'anya ke rumu nda, o zila mkpa a gbanū anū okwukwo, kwnornu nū anū magwū nū Chiokike znirni anū whnū ibne anū n'anya.

¹⁰ N'ezi, anū whnurnu kpakara rumu nda ele zī nū Masidonia n'anya. A naarijasno anū neeme kō kam neezne nū ruwhnu.

¹¹ Anū gbalī noowu budnu zī wohnernerne, neeme nhne ke gbasiri anū, anū rūsī ɛrnu rikne lele kpa a znirni anū,

¹² ma ele buo ele ke Chiokike nōoso anū anya, anū gharū o dnakwarū n'ehni nye obula.

Nyenwe aī vawa

¹³ Rumu nda aī, o buo oma anū ziri nū oma ama nū nhne gbasiri ele nwurnu onwu, ma o gharū gbu anū igbugbu lele ele nwēe olile anya.

¹⁴ A kweru nū Jizōsi nwurnu enwu, hi masī n'enwu lizō, kpam masī, a kweru nū Chiokike jeeme ele nwurnu onwu nū rime Jizōsi jooosno a va.

¹⁵ Lele kpa ikwu-onu Nyenwe aī kwuru, nū aī ele zī budnu, tem dū ige Nyenwe aī jaava, jēenwe rikne beru ele nwurnu onwu osno.

¹⁶ Kwnornu nū Nyenwe aī n'iwuru a jeegweru okne nkoli hi n'oligwe hiedna, nū nkoli nye risi enine izi, nū odidna okwodu Chiokike. Ele nwurnu nū rime Karaīsi jeebe oso lizō.

¹⁷ Omekwo, be jeegwelizō aī ele zī budnu neese a nū be nū rime erumeru znekwnsi Nyenwe aī n'olu. Aī nū Nyenwe aī jaazi kpm okwnukokwnu.

¹⁸ Kam kpayarū, anū gweru ikwu-onu ka naakasitaru ibne anū mkpoma.

5

Jiknenu kwnornu obochi Nyenwe aī

¹ Kītna, rumu nda aī, o zila mkpa o gbanū anū okwukwo gbasiri ige nū obochi nga nhne ele ka jeeme,

² kwnornu nū anū magwū nkarī nkarī nū obochi Nyenwe aī jaava lele nye buznu n'abalī.

³ Nga ele badnū neeche "Udno nū ɛli-oji-iyi," aghom jaavakwnusi be n'ibiri, lele kpa rime neeme nnwerne zī rime, be jēenwe rikne gbanahoru a.

⁴ Kovu anū zila nū rime ochichiri rumu nda aī, ke jeeme obochi wam vakwnusi anū n'ibiri lele nye buznu.

⁵ Hne anū bū rumu ke iwhe nū rumu ke obochi, a wū budnu ke abalī mōbu ke ochichiri.

⁶ Kam kpayarū, a nū lele ele berere, ele neezni anyarna, kovu a bū ele tnegwū etne nū ele anya dūru ɛli.

⁷ Kwnornu nū ele anyarna neezni anyarna n'abalī, ele manya, manya noogbu be n'abalī.

⁸ Kpa a bū rumu ke iwhe, a būru ele anya dūru ɛli, ele wogwu okwnata ovu nū owhnun'anya lele mbno mkpoma, a gweru olile anya ozhonia kpuru nū risi lele okpu-ogwnu.

⁹ Kwnornu Chiokike sūkule aī ma a ta awhnūwhnu ke ovu owe ɛhni a, kovu ma a nwehja ozhonia hite Nyenwe aī Jizōsi Karaīsi.

¹⁰ Jizōsi Karaīsi nwurnu enwu nū risi aī, ma a snornu a ziri budnu, a tne etne mōbu a zī n'anyarna.

¹¹ Kam kpayarū, anū naakasi ibne anū ovu, noowu ibne anū lele oro lele kpa anū neeme n'ezi.

Ezni ipne-aznu ke Polu

¹² Kītna rumu nda aī, a naarijasno anū, anū sobisinu kpakara ele nōornu ɛrnu n'esilawuru anū, bū ele nōoznu anū nū rime Nyenwe aī.

¹³ Anū nyee be igwugwu ke agida, anū whnū be n'anya kwnornu ɛrnu be. Anū wuru n'udno n'esilawuru ɛhni anū.

¹⁴ Rumu nda aī, anū gbalī dō ele ime mgwū aka nū nsnī, anū kwnagidne ele nōotu iwhe-nerne, anū yinu ele nwēe rikne aka, anū gweru enwerne ovu mesno kpakara badnū nhne.

¹⁵ O zá nye ji nhne ojo kwūhnata nhne ojo. Kovu anū gbalī ma anū nwe mkpoma oma n'ehni ibne anū ma kpakara ele badnū ige obula.

¹⁶ Anū nwūdna ige obula.

¹⁷ Anū kpe okpukpe ige obula.

¹⁸ Anū nōotu mmamma n'ōnodi obula, kwnornu nū ka bū nhne Chiokike noopio n'aka anū nū rime Karaīsi Jizōsi.

¹⁹ Anū mēsni bēkwnu ke Enine Nso.

²⁰ Anū lédna izi owhnurninya anya.

²¹ Anū tule kpakara nhne, anū nwūkwuru nhne ke būru oma aka rikne,

²² kovu zeru kpakara nhne ke buo oma.

²³ Chiokike ke udno n'iwuru a jaabīta anū nso n'apna ke zuru ozu. Chiokike bīta enine anū, nū mkpuru ovu nū anō-ɛhni anū n'apna nwēe oru tem dū ige Nyenwe aī Jizōsi Karaīsi jaava.

²⁴ Nye wam sukwuru anū bū nye kwesiri okwnata ovu, o jeeme nhne ka.

²⁵ Rumu nda aī, anū bikno, kpenu aī okpukpe.

²⁶ Anū bekwutaru ɛhni anū lele ele sno Karaīsi.

²⁷ M ji m rēwhna Nyenwe aī naakaa anū gwnū okwukwo izi ka nū nsnī kpakara rumu nda.

²⁸ Oru ke Nyenwe aġ Jizqsi Karaġsi
dazġidnenu anu.

**Okwukwo izi
ke Ebo
Polu gbaznenu
Ele Teshalonika**

Nhne gbasiri okwukwo izi ka

Polu panizoru nootunu Chiokike mmamma kwnornu okwnata mkpoma nu owhnun'anya ele Teshalonika ke nooso oso ige obula (1:3). O bu n'ezi nu be naagawhe agida mmekpehni, Polu naakanu be nu Chiokike nootule okwnata mkpoma be nwernu nu hne o zi, o za naata be awhnwuhnu (1:4,5).

Be whnurnu okwukwo izi ke otu badnu karu nu Polu gbaru, ke nookwu nu Nyenwe aj valem (2:2). Kovu Polu nododo be aka nu nsnj be kweko nye obula duwhu be, kwnornu nu Nyenwe aj jaava tem "nye ojo wam" whuya iwhe (2:3).

Polu jiri okpukpe mesni okwukwo izi ka (3:16).

Nhne zi n'okwukwo izi ka

Obekwu ikwu (1:1,2)

Otu mmamma nu okpukpe (1:3-12)

Nyenwe aj yavage (2:1-12)

Buru nye be kwesiri okwnata mkpoma (2:13-17)

Kpe okpukpe, rnu masi ernu (3:1-15)

Okpukpe ipne-aznu (3:16-18)

¹ Mawa, Polu, nu Sajlasi nu Timoti naagba okwukwo gbaznenu ogbako Chiokike ke zi nu Teshalonika, anu ele Chiokike Nda aj nu Nyenwe aj Jizosi Karaishi.

² Oru nu udno ke hi n'aka Chiokike Nda aj nu Nyenwe aj Jizosi Karaishi dazigidhenu anu.

Otu mmamma nu okpukpe

³ A kwesiri nootunu Chiokike mmamma nu risi anu ige obula, ke kakwo kwnornu nu okwnata ovu anu nooso oso kpakara obochi lele kpa owhnun'anya anu nooso masi oso n'ehni ibne anu.

⁴ A ji anu noolu onu n'esilawuru ogbako Chiokike kwnornu nu okwnata ovu anu gwuzo kwem nu ruwhnu okpakna ehni nu nhne ornurna anu naagawhe.

⁵ Ka negesi nu ikpe Chiokike zi snam, ke kpayaru, be joognusi anu nu ele kwesiri o bna eli-eze Chiokike ke anu kwno naata awhnwuhnu.

⁶ Chiokike bu nye zi snam. O jaakpakna ele naakpakna anu ehni.

⁷ O jeeme anu ele be naakpakna ehni zukuwaru inwe, ma aila masi. Ka jobu nga Nyenwe aj Jizosi jaava hite n'oligwe, ya nu ele enine izi a zi rikne nu lele bekwnu noowu va-a-a.

⁸ O jaata kpakara ele ma Chiokike awhnwuhnu nu ele za nobno nsnj izi oma gbasiri Nyenwe aj Jizosi.

⁹ O jaata be awhnwuhnu okwnukokwunu, chima be nu ruwhnu Nyenwe aj nu igwugwu ke iknernema a.

¹⁰ N'obochi o jaava, ele ke a zi nso nu kpakara ele kweru nu ya jeenye a igwugwu, jaa a mma. Anu joosno ele kweru ekwe kwnornu nu anu kweru izi oma a znirni anu.

¹¹ Ka bu nhne a vu n'ovu neekpenu anu okpukpe ige obula, ma Chiokike aj gwnusi anu ele kwesiri osukwu ikwu a, hite n'iknernema a mee kpakara nhne oma anu vu n'echiche mezu nu kpakara nhne anu neeme buru nhne hi n'okwnata ovu.

¹² Ka bu ma be znarni rehna Nyenwe aj Jizosi kwnornu nu anu, ma anu kwnornu ya, hite n'oru Chiokike aj nu Nyenwe aj Jizosi Karaishi.

2

*Badnu wam
ke noolulu iwu*

¹ Nhne gbasiri ovuva ke Nyenwe aj Jizosi Karaishi nu kpa a jeeznokwnusi a, a naariasno anu rumu nda aj,

² mkpoma lakoo anu mini, ogwnu tukoo anu kwnornu agwna izi owhnurninya, moku izi berere, moku okwukwo izi be naakaa nu a gbaru, ke naakaa n'obochi Nyenwe aj jeehiehna whelem.

³ Anu kwe nye obula duwhu anu n'apna obula, kwnornu nu obochi Nyenwe aj jeehiehna jaava tem okne olulu wam nu nye wam noolulu iwu va. Nye wam bu nye Chiokike jaata awhnwuhnu okwnukokwunu,

⁴ O joovulizo ehni a olu megidne kpakara chi ele badnu neekpenu. O joogwuzote ehni a n'Oro Nso Chiokike kaa nu o bu Chiokike.

⁵ Anu chenwanya nu m kannu m anu nhne ka nga me nu anu zi.

⁶ Anu magwu nhne noobnosni a ma o gharu o whuya iwhe kitna, kovu be jeegesi nye ojo wam n'ige kwesiri.

⁷ Kwnornu nu rikne nye wam noolulu iwu noornu ernu nu mgwugwa kitna, kovu nye wam ke noobnosni a jaazi koriri noobnosni a tem be gweme a n'apna.

⁸ Ige wam be jookpume nye wam noolulu iwu, nye Nyenwe aj Jizosi jeeji inwe ke onu a gbu nu hite n'onwu va-a-a ke ovuva a.

⁹ Nga nye wam noolulu iwu jaava, Ekwensu jeegesi ernu ndu-ehni o kphie anya zi odo n'odo nu nhne elekema nu ernu tu n'anya,

¹⁰ nu kpakara ernu ojo o jeeji nooduwhu ele nonwu onwu. Be whu etekne kwnornu nu be kwiele o kweru ezi oka ma Chiokike znghia be.

¹¹ Kam kpayaru, Chiokike ziznenu be rikne o mee nhne buo oma ma be kweru aghalaghala,

¹² Ka bu ma kpakara ele kwéle o kweru ezi oka, ele whnurnu aruru-eli n'anya buru ele ikpe Chiokike maru.

Gwuzosi rikne

¹³ Kovu a n'otunu Chiokike mmamma ige obula kwnornu anu rumu nda aj, ele Nyenwe aj whnurnu n'anya. Hite n'opanizo, Chiokike hohiaru anu ma o znohia anu hite n'ernu Enine Nso ke neeme anu ziri nso, kwnornu nu anu kweruru ezi oka.

¹⁴ Kam kpayaru, o sukwuru anu hite n'izi oma aj, ma anu kehia igwe n'igwugwu Nyenwe aj Jizosi Karaishi.

¹⁵ Rumu nda aj, anu gwuzoru kwem, anu jikwasi nhne a znirni anu rikne, hite n'ikwu-onu m'obu okwukwo izi a gbaru.

¹⁶ Kitna, Nyenwe aj Jizosi Karaishi n'iwuru a nu Chiokike Nda aj, nye whnurnu aj n'anya, hite n'oru o nyernu aj nu olile anya buru oma, mee a gwuzosi rikne,

¹⁷ gba anu inwe, mee anu gbasij rikne nu kpakara ernu oma nu ikwu-onu.

3

Anu kpenu aj okpukpe

¹ Ke ipne-aznu, rumu nda aj, anu kpenu aj okpukpe ma izi Nyenwe aj gbasa k'agida, nwernu masi igwugwu a lele kpa o zi n'esilawuru anu.

² Kpe masi ma Chiokike dohia aj n'aka ele ojo nu ele aruru-eli, kwnornu nu o buo kpakara badnu nwernu okwnata ovu.

³ Kovu Chiokike bu nye kwesiri okwnata ovu, o jeenye anu rikne, kpusni anu hite n'aka nye ojo wam.

⁴ A tukwasiri Nyenwe aj m'kpoma nu anu zi koriri neeme neezne nu ruwhnu kpakara nhne a nyernu anu n'iwu.

⁵ Nyenwe aj duru m'kpoma anu du n'owhnun'anya Chiokike nu osnuta m'kpoma ke zi nu rime Karaishi.

O do aka nu nsni

gbasiri ime mgwu

⁶ Rumu nda aj, a ji rewhna Nyenwe aj Jizosi Karaishi neenye anu iwu, anu zeru nnwo nda obula ke bu nye ime-mgwu, nye za noowu budnu lele kpa nhne a znirni anu.

⁷ Kwnornu nu anu magwu kpa anu kwesiri o snornu nhne atu aj. A buo ele ime-mgwu nga aj nu anu zi.

⁸ A rige wiri nye obula ke a kwila ogwo. Tnunuma, a dogburu ehni aj n'ernu iwhnehné nu abali, n'ornu ernu ma a gharu o buru ivu rinya nyee anu.

⁹ Ka buo nu a nwee rikne nahoru anu nhne, kovu ma a buru ele anu joomuhia nhne n'aka be.

¹⁰ Nga aj nu anu zi, a znirni anu nhne ka, "O buru nu nye obula j'ornu ernu, o ri wiri."

¹¹ A nonu nu agwna ele badnu dazi etekne, be mee nhne obula, ele nookwu oka gbasi la be.

¹² A ji rewhna Nyenwe aj Jizosi Karaishi neenye be iwu, be gbasij rikne, rnuhia nhne be jeeri.

¹³ Rikne gwu anu rumu nda aj n'ome nhne buru oma.

¹⁴ Nye obula ke za naabita nhne a gbaru n'okwukwo izi ka, anu hnata nye wam ama. Anu nu nye wam meko nhne obula, ma iwhnerne tu a.

¹⁵ Kovu anu mee be ele irno anu, anu zni be ezni lele rumu nda.

Obekwu ikwu ipne-aznu

¹⁶ Kitna, Nyenwe aj ke udno n'iwuru a nyee anu udno ige obula n'apna obula. Nyenwe aj dazigidnenu kpakara anu.

¹⁷ Mawa, Polu, ji aka m gba obekwu ikwu ipne-aznu ka. Ka bu nhne neegesi nu mawa gbaru obekwu ikwu ipne-aznu ke me gbaru.

¹⁸ Oru Nyenwe aj Jizosi Karaishi dazigidnenu kpakara anu.

**Ọkwukwo izi
ke Mbom
Pọlu gbaznenu
Timoti**

Nhne gbasiri ọkwukwo izi ka

Timoti snornu Pọlu zne izne, rnụ masị ọrnụ izi ọma Karaịsi. Timoti nụ Pọlu nwernu otu ọkwukwo mkpọma, kam kpayarụ, Timoti nụ lele nnwọ ke Pọlu murnu (1:2). Timoti bụ nye ọrnụ ke Pọlu kwnatarụ mkpọma k'agida.

Ọ bụ n'ezi nụ Pọlu gbaznenu Timoti ọkwukwo izi ka, kọvu o kwuru agida nhne ke gbasiri kpakara ọgbako Chiokike. Pọlu kahjaru kpa be jeeji nọohoru ele risi ọgbako Chiokike. Ọ kaa nụ ele Karaịsi kwesiri neekpenu ibne be okpukpe. A nwernu otu Chiokike nụ Karaịsi Jizọsi, nye nwernu rikne o kwuru aị znekwnusi Chiokike.

Nhne zị n'ọkwukwo izi ka

Obekwu ikwu (1:1,2)

Budnu ọgbako Chiokike (1:3--3:13)

Nhne tugwaru otugwa ke okpukpe aị (3:14-16)

Pọlu zirniri Timoti ezni (4:1--6:21)

¹ Mawa, Pọlu, nye izi Karaịsi Jizọsi lele kpa Chiokike Nye Ọznohia aị nyernu n'iwu nụ ke Jizọsi Karaịsi nye bụ olile anya aị.

² M naagbaznenu Timoti nnwọ m n'ezi n'okwnata ovu ọkwukwo.

Chiokike Nda aị, nụ Nyenwe aị Jizọsi Karaịsi nyee i oru, obirizi nụ udno.

*Anụ zeru iznizni
aghalaghala*

³ Lele kpa me kannụ i nga me neezne Masidonia, daziri n'Efesọsi ma i bnosni ele zni iwu aghalaghala ma be kwusi o zni nhne nụ kpa.

⁴ Be tũwhuma ige o zni ọtutnu ruwhere nụ osnusno ọmumu kwó okwo. Kpakara nhne ka, tñnuma be jeeme ọrnụ Chiokike ke hi n'okwnata ovu neezne nụ ruwhnu, be noovuya okewa.

⁵ Ka bụ ma i zni ele badnụ be whnrita n'anya hite nụ mkpọma zị snam nụ ovu bụru ọma nụ ezi ọkwukwo ovu.

⁶ Agwna ele badnụ kpawhulem, snornu ikwu-ọnu etekne.

⁷ Be noopio ọ bụru ele zni iwu, kọvu be máa nhne be nookwu, ọ bụ n'ezi be nookwusi a rikne.

⁸ A magwụ nụ iwu bụru ọma, ọ bụru badnụ mekwa a nkari.

⁹ A magwụ nụ be kwnóge ele mee mma bíta iwu, kọvu ele noolulu iwu nụ ele risi rikne, ma ele máa Chiokike, nụ ele mmehie, ele zila rịchna, ele tũ ogwnu Chiokike, ma ele noogbu badnụ, ele noogbu nne nụ nda be,

¹⁰ ele neeme ọyi, nụ omekorita nyerukna nụ ibne a, nụ omekorita nyerinya nụ ibne a, ele neerne ọhi, ele aghalaghala, ele kwú ezi ọka n'ikpe, nụ kpakara nhne ọbula ke neemegidne iznizni ka zị snam.

¹¹ Iznizni ka bụ izi ọma wam ke zị igwugwu ke hi n'aka Chiokike nye nwe ngozi. Chiokike nyernu m izi ọma ka n'aka me bíta.

*Oru Nyenwe aị
nyernu Pọlu*

¹² M nọtunu Karaịsi Jizọsi Nyenwe aị mmamma nye nyernu m rikne, nye gwnsiri m nye kwesiri ọkwukwo ovu, mee m bụru nye nọrnụ a ọrnụ.

¹³ Ọ bụ n'ezi nụ m bụ m nye nookwulu a nụ mbom nụ nye kpakarnu ele ke a ẹhni, nụ nye mee nhne rikne, kọvu ọ ọnu m obirizi kwnornu nụ m mernu m kpakara nhne ka nụ ọma ama nụ ókwe ekwe.

¹⁴ Nyenwe aị wukwasiri m oru a zị agida nụ ọkwukwo ovu nụ ọwhnun'anya a ke zị nụ rime Karaịsi Jizọsi.

¹⁵ Ka bụ ikwu-ọnu ke kwesiri ọkwukwo ovu, ke nye ọbula kwesiri o kwuru, Karaịsi Jizọsi varu n'owa ọ znohia ele mmehie, me bụ nye risi ele mmehie.

¹⁶ Ka bụ nhne kpahjaru Chiokike jiri ọnu m obirizi, me nye risi ele mmehie ma Karaịsi Jizọsi gesi ọsnuta ovu a zị ogologo ma m bụru m nhne atụ nyee ele jeekweru nụ ya ma be nwehja budnu kwó okwo.

¹⁷ Kĩna, eze ke zị ọkwukokwunu, nye nwú ọnu, nye be whnụ anya, nye ya nụ nsnu a bụ Chiokike, ya nụ nsnu a nwe igwugwu nụ ọson'anya tim ọm. Amim.

¹⁸ Timoti nnwọ m, m neenye i iwu ka lele kpa ọwhnurninya be whnurnu gbasiri i n'ige wheru ewhe, snornu nhne be kwuru gbasiri i, ma i nwernu rikne lụ ọgwu ọma lele nye Karaịsi.

¹⁹ Jikwasi ọkwukwo ovu i rikne nụ ovu zị snam. Agwna ele badnụ ghasarụ be, ke kpahjaru ọgbo ọkwukwo ovu be kpuru.

²⁰ N'esilawuru be bụ Haijmenousi nụ Alẹkizanda ele me sigbasiri n'aka Setani ma be mụhia gharu o kwulu Chiokike.

2

Kpa be kpe okpukpe

¹ Ke mbom, m naakaa, anụ kpe okpukpe nụ risi kpakara ele badnụ, nọriro aririo, nọtunu Chiokike mmamma.

² Anụ kpenu ele eze nụ kpakara ele zị n'ochichi okpukpe, ma a wuru budnu udno nụ budnu bụru ọma, nọtu ogwnu Chiokike.

³ Ka bụ nhne bụru ọma, ke nọso Chiokike Nye Ọznohia aị mkpọma n'ọnu,

⁴ kwnornu nụ Chiokike noopio ma ọ znohia kpakara ele badnụ, ma be mahja ezi ọka.

⁵ Otu Chiokike zì, otu nye ibno zì n'esilawuru Chiokike nù badnú. Nye ibno wam bú Karáisi Jizòsi,

⁶ nye gweru èhni a nyega ma ò búru nhne ògbahia ke kpakara badnú. Chiokike gesiri aì ka n'ìge kwesiri.

⁷ Ka bú nhne mernu Chiokike hòhiaru m ma m búru nye nòokpo okwo nù nye izi. Ka bú ezi òka, ò búo aghalaghala, Chiokike hòhiaru m ma m búru m nye zni nhne ke ezi òka òkwnata ovu ke ele búo ele Ju.

⁸ M noopio nù rime ògbako òbula ele rukna chìlizo aka lawuru zì nsò n'òkpukpe éwne ovu owe èhni nù agìo.

⁹ M noopio ele rinya masì yìri èyi lele kpa o kwesiri, ke búru òma n'anya. Ele rinya kpá risi gburu okne ònu, mòbu tũru golu mòbu pali, mòbu woru iwo gburu okne ònu,

¹⁰ kòvu rnù èrnu òma, bú ke kwesiri ele rinya ele ka nù be neekpenu Chiokike.

¹¹ Ele rinya kwesiri ò dazìri bii, m̀hìia nhne hite n'orube risi.

¹² M kwéle m nyerinya zni nhne mòbu zìri nù risi nyerukna, o kwesiri ò dazìri bii.

¹³ Kwnornu nù Chiokike beru òsno kpù Adam, omekwo, ò kpù Ivu.

¹⁴ Setani dúhiele Adam, kòvu o duhieru nyerinya wam, ò ghò nye mmehie.

¹⁵ Kòvu Chiokike jòoznohia ele rinya hite n'òmumu nnwò* ò búru nù be jeenwe òkwnata ovu, nù òwhnun'anya, nù òzi nsò nù anya udno.

3

Ele risi ògbako Chiokike

¹ Ka bú ikwu-ònu ke kwesiri be kwnata ovu. Ò búru nù nye òbula ke pioru ò búru nye risi ògbako Chiokike, o noopio nhne búru òma.

² Kìtna, nye risi ògbako Chiokike jòoburu nye nwéé òtna, nye nwernu otu nnwerne, nye anya udno, nye mkpòma òuru èli, nye be nòosonu anya, nye nookwubna ele izne, nye nwernu rikne o zni nhne,

³ nye nwò okne manya, nye méé nhne rikne, enwerne badnú, nye zá nookno òka, nye whnúge ìwai n'anya.

⁴ Nye risi ògbako Chiokike jòoburiri nye nwernu rikne chikwa ezi-nù-òro a nkari, rùmu a jòoburu ele noobnonu a snì, nòoso a anya.

⁵ (Ò búru nù nye òbula nwéé rikne chikwa òro a nkari, ndaa kpa o jeenwe rikne legidne ògbako Chiokike anya?)

⁶ Ò jòoburu nye varù ikne n'ògbako Chiokike, ò zì o mee oknomokno, dnabna n'otu ikpe òmuma wam lele Ekwensu.

⁷ Ò jòoburu nye nwernu rẹwhna òma n'ederezi, ò zì ò dnabna nù nhne iwhterne nù mbjita Ekwensu.

⁸ Ele dikneni masì jòoburu ele be nòosonu anya, ele ezi òka, ele nwò okne manya, ele zá noopio iru zìle ezi.

⁹ Be jeeji mkpòma búru òma jidnesi ezi òka ke Chiokike nyernu aì rikne gbasiri òkwnata ovu.

¹⁰ Be jeebe òsno kpa be iru, ò búru nù ò zá nhne ke megidneru be, be búru dikneni ògbako Chiokike.

¹¹ Ele nnwerne be masì jòoburu ele nwernu òson'anya, ele zá nookwu òka etekne, kòvu ele ovu òma, ele be kwesiri ò tũkwasi ovu nù kpakara nhne.

¹² Nye dikneni jòoburiri nye nwernu otu nnwerne, nye nẹchikwa rùmu a nù ezi-nù-òro a nkari.

¹³ Ele nòornu èrnu be nkari jeenwehìa ovulizo n'olu búru òma, be joogwuzosi rikne n'òkwnata ovu ke zì nù rime Karáisi Jizòsi.

Nhne tugwaru otugwa ke okpukpe aì

¹⁴ M naagbanù ò òkwukwo ka, ò bú n'èzi nù m neele anya nù m jaava wara wara.

¹⁵ Kòvu ò búru me gbu òkwnu, m naagba ma ò mahìa kpa ele badnú jaabjita èhni be nù ezi-nù-òro Chiokike ke bú ògbako Chiokike ke zì búdnu, ke bú nsnùsnu òro nù ntù-èli ezi òka.

¹⁶ A zá neesigha òka, nhne tugwaru otugwa ke okpenu Chiokike zì agìda, Jizòsi whýaru iwhterne n'anò-èhni,

Enine Nsò gbarù akebne a, ele enine izi whnúrnù a, be kpòru okwo a n'esilawuru kpakara mba,

ele badnú kweru a n'òwa, Chiokike kwuru a la n'oligwe n'igwugwu.

4

Pòlu zìrni Timoti ezni

¹ Enine Nsò kwuru kpa o dnornu anya nù ìge ipne-aznù nù ele badnú jòowhoga n'òkwnata ovu snornu enine ke nooduwhu nù nhne ele rẹnwu ojo neezni.

² Ka bú zìrni ke ele riuwhnu lawuru neezni n'aghalaghala, ele jiri rugwe bẹkwnu da akòniche be.

³ Be kwéle ele badnú lù nnwerne mòbu gbò nzi, be kanù ele badnú be rì agwna wiri, ke Chiokike keru ma ele kweru ekwe gweru òtu mmamma rì, bú ele mahìaru ezi òka.

⁴ Kwnornu nù kpakara nhne Chiokike keru búru òma, ò zá ke badnú jéeri, ò búru nù o gweru a, tũ mmamma.

⁵ Be ji ikwu-ònu nù okpukpe Chiokike bjà wiri nsò.

⁶ Ò búru nù ò kanù rùmu nda kpakara nhne ka, ò jòoburu nye izi Karáisi Jizòsi òma, nye be

* 2:15 hite n'òmumu nnwò mòbu nù òmumu nnwò

jiri ezi oka ke okwnata ovu nu iznizni oma ke i snornu znu.

⁷ O za nhne i ji otnutnu ruwhere etekne nu oka ele nnwerne okno badnu mee, znuhia ehni i ma i buru nye notu ogwnu Chiokike.

⁸ Kwnornu nu ozuznu ke an-ehni nwernu iru mati, kovu omahia Chiokike bnarnu iru nu kpakara nhne, o vugwu mkwna ke budnu ka nu budnu ke jaava.

⁹ Ka bu ikwu-onu ke be kwesiri o tukwasi ovu, ke badnu kwesiri o kweru.

¹⁰ Ka bu risi nhne a kwno notodoli n'ernu, naagba otna, nu olile anya ai zi nu Chiokike ke zi budnu, Nye Oznohia ke kpakara badnu, ke kakwo ke ele kweru ekwe.

¹¹ Zni kpakara nhne ka, nyee iwu ma ele badnu mee nhne i neezni.

¹² I kwé nye obula ledna i anya kwnornu nu i bu nnwo ikoro. Kovu buru nhne atu ke ele kweru ekwe, ma n'ikwu-onu, nu budnu, nu owhnun'anya, nu okwnata ovu, nu ozi snam.

¹³ Tem m va, gweru ehni i yisi nu ogwnu nhne be gbaru n'okwukwo nsọ nu rime ogbako Chiokike, notkpo okwo, neezni nhne.

¹⁴ I léwhu nkesi i anya, ke be nyernu hite n'izi owhnurninya wam nga ele okno badnu tukwasiri i aka nu risi.

¹⁵ Anya du i eli gbasiri kpakara nhne ka, gweru ehni i yisi neeme be ma kpakara ele badnu whnu nu i nooso oso.

¹⁶ Ledu anya nu budnu i nu kpakara nhne i neezni. Gbalí neeme kpakara nhne ka, kwnornu nu i mee kpam, i jooznohia ehni i ma ele notnu nhne i neezni.

3

Kpa a jeemeso ele badnu

¹ Ibigbo nye okno badnu rikne rikne, kovu kwunu a oka lele nu o bu nda i. Mesno rumu ikoro lele rumu nwene.

² Mesno ele rinya okno badnu lele nu be bu nne i, gweru ozi richna so rumu oknornokno anya lele rumu nwene i rinya.

³ Lekota ele rinya nzi be nwurnu ele zi nu mkpa anya nkari.

⁴ Kovu o buru nu nyerinya nzi a nwurnu nwernu rumu mabu rumu rumu a, rumu be beru osno mubia kpa be kpenu Chiokike, hite n'olekasi ele murnu be anya, lele kpa ele murnu be jiri lekasi be. Ka bu nhne notso Chiokike ovu n'onu.

⁵ Nyerinya nzi a nwurnu ke nwée badnu obula neelekwasi Chiokike anya, neekpe okpukpe iwhnehné nu abali ma Chiokike yisinu a aka.

⁶ Kovu nyerinya nzi a nwurnu ke noowu budnu ke notso a n'onu nwurnu onwu kpa o zi budnu.

⁷ Kanu be mee kpakara nhne ka, ma be mee nhne buru oma.

⁸ O buru nu nye obula nwée rikne legidne ele oro a, ke kakwo ele ezi-nu-oro a, nye wam gonahorulam okwnata ovu, nye ma Chiokike ka nye wam mma.

⁹ Nyerinya ke nzi a nwurnu ke gbaru nri awha isunu, be gwnusi a n'esilawuru ele nzi be nwurnu, nye kwesiri nzi a kwnata a ovu,*

¹⁰ nye be jiri ernu oma a mahia, nye notznu rumu a nkari, neelekota ele izne nkari, snornu ele nsọ snu ochi be, nye neeyinu ele zi nu mkpa aka, notnu agida ernu oma.

¹¹ Kovu i gbasí rēwhna oknornokno nye nzi a nwurnu n'okwukwo. Kwnornu nu nga an-ehni kpalizoru be, be jéenwe rikne gwuzonu Karaísi, be pio o gboru nzi berere.

¹² Be buru ele ikpe marnu, kwnornu nu be luluru mkwna be kweru nu mbom.

¹³ Tukwasi n'olu ka, be buru ele nwée nhne be mee, be neezne n'oro n'oro noozno izno, nookwu nhne gbasila be, nookwu nhne be kwésile o kwu.

¹⁴ Kam kparyu, m neeznikwa ele oknornokno ele nzi be nwurnu, be gboru nzi berere, mubia rumu, legidne oro be anya o zi be nyee nye irno wam oghere o kaja be nu ogbako Chiokike.

¹⁵ Agwna ele rinya wam snornulem Setai.

¹⁶ O buru nu nyerinya obula nwernu nnwerne nzi a nwurnu n'oro a, o yinu be aka, o kwé ogbako Chiokike wuru ivu nye wam, kovu ma ogbako Chiokike lebna anya n'oyinu ele rinya nzi be nwurnu ele zi nu mkpa aka.

¹⁷ Ele okno badnu, ele neelegidne ogbako Chiokike anya kwesiri be sonu be anya okpukpu lawuru, ke kakwo ele notkpo okwo izi oma, neezni nhne.

¹⁸ Kwnornu nu okwukwo nsọ kwuru kpa, "I knési onu ehni ke notzosna ikpa," nu "Nye ernu kwesiri ogwo ernu a."

¹⁹ I kwéko nhne obula be bnornu nye okno badnu, okwolem ma be nwernu ele akébe lawuru mabu eto.

²⁰ Bigbo nye okno badnu obula mernu mmehie nu ruwhnu ohna, ma ele berere mubia nhne.

²¹ M noogwuzo nu ruwhnu Chiokike nu Karaísi Jizosi nu ele enine izi Chiokike hohiaru neenye i iwu ka, bita kpakara nhne ka me nyernu i, i lé badnu anya nu ruwhnu kpa i neeme be.

²² I méé wara wara notukwasi ele badnu aka, i snó ele berere nu mmehie be. Kovu bita ehni i nsọ.

²³ I nwoma mini kpai, kovu nwọ manya mati kwnornu nu ruwhu i nu ehni igbugbu i naaria ige obula.

* 5:9 mabu nye nwernu otu nzi

²⁴ Mmehie agwna ele badnụ kpumernu, beru be ọsno neezne n'ikpe, ọvụ mmehie agwna ele berere sno be n'aznụ.

²⁵ Kpam masị, ọvụ ọma whụyaru iwihne, ọ bụrụ nụ be whọge iwihne, be nwée rikne kpusni be.

6

¹ Nye ọbula ke bụ ọhi whnụ nụ ọ nọso nye nwe a anya lele kpa o kwesiri, ma be gharu ọ kaja rẹwhna Chiokike nụ iznizni a.

² Ele ọhi ke ele nwe be kweru nụ Chiokike lédna be anya, kwnornu nụ be bụ rụmu nda. Tnụnuma, be rñụnụ be ọvụ ka mma kwnornu nụ ele neerihia mbnarna n'ọvụ be bụ ele kweru ekwe, ele be whnurnu n'anya. Ka bụ nhne i kwesiri neezni, ma be neeme masị be.

Ọwhnu iwai n'anya

³ Ọ bụrụ nụ nye ọbula neezni iznizni aghalaghalala, ke kwéle nụ n'iznizni ke nọtu ogwnu Chiokike nụ iznizni ke zị snam ke Nyenwe aị Jizọsi Karaisi,

⁴ nye wam bụ nye oknomokno. Kọvụ ọ máa nhne ọbula. Echiche a bụo ọma, ka noodubna nụ okno ọka, nụ ọwho-anya, ọlu ogwnu, ọka ojo, anya ojo,

⁵ ọdogbuta zị n'esislawuru ele ovu ojo, ele tuwhuru ezi ọka. Be neechi nụ okpenu Chiokike bụ apna be jeji neenwehija iru ke be.

⁶ Kọvụ okpenu Chiokike nụ rụwho ojiji bnarnụ mbnarna k'agida.

⁷ Kwnornu nụ ọ zà nhne a vuru va n'ọwa, a nwée masị rikne vuru nhne ọbula whọga nụ rime a.

⁸ Kọvụ ọ bụrụ nụ a nwernu wiri oriri nụ iwo o kpusni ẹto aị, ka kwesiri o ji aị rụwho.

⁹ Ele noopio ọ bụrụ ele eze naadnabna nụ rime ọvurnu nụ mbịta, nụ agida nhne iwahnirniwhno ke naakpakna be ẹhni, ke noodubna ele badnụ nụ mwihu.

¹⁰ Kwnornu nụ ọwhnun'anya iwai bụ mgbarẹgwnugwnu kpakara nhne ojo zị ọdo nụ ọdo. Agwna ele noopio iwai k'agida kpawhuru n'okwnata ovu, gweru agida nhne igbugbu mekasi ẹhni be ẹhni.

Lụ ogwnu ọma

ke okwnata ovu

¹¹ Kọvụ, ji badnụ ke Chiokike, gbanahọru kpakara nhne ka. Tnụnuma, snornu ome mma, ọtu ogwnu Chiokike, okwnata ovu, ọwhnun'anya, ndidi nụ ọzi wọhnerne.

¹² Lụ ogwnu ọma ke okwnata ovu. Jikwasi bụdnu kwó okwo aka ke Chiokike nyernu i nga i kwuhjaru okwnata ovu i nkari nụ ruwhnu agida ele akebne.

¹³ Nụ ruwhnu Chiokike nye neenye kpakara nhne bụdnu, nụ Karaisi Jizọsi, nye gbaru akebne ọma nụ ruwhnu Pọtios Pajleti, m neenye i iwu,

¹⁴ bīta nhne ka ma i gharu o nwe ntupo nụ ọtna tem Nyenwe aị Jizọsi Karaisi va,

¹⁵ nye Chiokike jeegweya n'ige ke a, nye nwe ngozi, nye neechi kpoị, Eze kakwo ele eze, nụ Nyenwe kakwo ele nwe.

¹⁶ Chiokike ke zị bụdnu okwnukokwnu, nye wu n'iwihne ke ọ zà nye nwernu rikne vadu ndundu, nye ọ zà nye whnuleru anya, mọbu whnuli a anya, ọson'anya nụ rikne bụrụ ke a tim tọm. Amjim.

¹⁷ Dọ ele eze ke ọwa ka aka nụ nsni be bụo ele oknomokno, be tükwasi ẹkwnu be ovu, ke jáazi tim tọm, kọvụ be tükwasi Chiokike ovu nye naasama aka a neenye aị kpakara nhne bụrụ ọma ke a neeri.

¹⁸ Dọ be aka nụ nsni, be mee nhne bụrụ ọma, be bụrụ ele baru aba n'ome nhne bụrụ ọma, ele ovu ọma ke neekesi ele badnụ nhne be nwernu.

¹⁹ Be mee kpam, be nọtu ntụ-ẹli bụrụ ọma ke zị kwem n'ige naava, ma be nwehija bụdnu ke bụ ezi.

²⁰ Timoti, legidne nhne be yisiri i n'aka anya nkari. Whọga nụ nhne ọbula ke neegweya ikwu-ọnu ke neemedidne ogwnu Chiokike nụ ọka iwahnirniwhno ke nụ lele nụ o nwernu akoniche, kọvụ o nwée.

²¹ Agwna ele badnụ snornu a kpawhu n'okwnata ovu.

Oru Chiokike dazinu anụ.

**Ọkwukwo izi
ke Ẹbo
Pọlu gbaznenu
Timoti**

Nhne gbasiri ọkwukwo izi ka

Nu Ọkwukwo izi ke Ẹbo ka ke Pọlu gbaznenu Timoti, bu ke o gbaru lele ọkwukwo izi nda naagbanu nnwo o whnrnu n'anya (1:2,3), Pọlu pioru ma Timoti buru nye ogwunu o ma ke Karaṣi, o nwe ndidi nga o naata awhnuwhnu lele nye Karaṣi (2:1,3). Pọlu gbadiyaru nne Timoti nu nne nne a, ele nwernu ọkwunata mkpoma nu Karaṣi. Pọlu karu Timoti chenwanya nu ya Pọlu tukwasiri a aka a lawuru nu risi, ke neegesi nu Enine Chiokike noodu a nu ẹru a.

Agwna ele kweru nu Nyenwe aṣi dnabnaru nu mbita nye irno, kovu Pọlu doru Timoti aka nu nsnṣi o gbanahoru kpakara ornuna ke nooduwu rumu ikoro (2:20-26; 3:1-9). O kanu Timoti o ziri kwem neezni izi o ma, o bu n'ezi nu agida ele badnu jeekwero (4:2).

Pọlu magwu nu ige matṣi o jounwu ẹnuwun kwnornu ọkwunata oву a, kovu o nwernu ogwo ẹru (4:6-8). O buru nu a sno Karaṣi nwu ẹnuwun, a joosno a ziri budnu, o buru nu a nwe ndidi, a joosno a chi lele eze (2:11,12a).

Nhne zi n'okwukwo ka

Obekwu ikwu nu okpukpe o kpenu Timoti (1:1,2)

Iwhnerne Nyenwe aṣi tuko i (1:3-18)

Buru nye ogwunu o ma Karaṣi (2:1-26)

Kpa ele badnu joowu budnu be n'ige ipneazu (3:1-9)

Buru nye be kwesiri ọkwunata mkpoma (3:10---4:8)

Ezni ke aka Pọlu nu obekwu ikwu ipneazu (4:9-22)

¹ Mawa, Pọlu, nye izi Karaṣi Jizosi hite n'echiche Chiokike, o ziyaru m me zni ele badnu gbasiri mkwna budnu ke zi nu Karaṣi Jizosi.

² M naagbaznenu Timoti nnwo m me whnrnu n'anya ọkwukwo.

Oru, obirizi nu udno ke hi n'aka Chiokike Nda aṣi nu Nyenwe aṣi nu Jizosi Karaṣi dazinu i.

Iwhnerne Nyenwe aṣi tuko i

³ M notunu Chiokike mmamma, nye me neekpenu hite n'ovu zi snam lele kpa ele nda m kpennu a, neekpe okpukpe iwhnehnie nu abali, neechenwanya i n'okpukpe m.

⁴ Me chenwanya anya-mini ekwna i, o noogwunu m o whnu i anya ma oву so m n'onu.

⁵ M neechenwanya ọkwunata oву i n'ezi, ke beru osno ziri nu rime nne nne i, Lṣisi, nu nne i Unisi, m kweru m nu o zi masi k pam nu rime i.

⁶ Kam kpayaru, gwakne bekwnu ke nkesi Chiokike, ke o nyernu i nga me tukwasiri i aka m nu risi.

⁷ Kwnornu nu Chiokike nyege aṣi enine ke ogwunu, kovu enine ke iknerna nu owhnun'anya nu anya udno.

⁸ Bikno, iwhnerne okpo okwo nhne gbasiri Nyenwe aṣi tuko i, mṣu iwhnerne me nye ikelu a. Kovu snornu m ta awhnuwhnu n'izi o ma hite n'iknerna Chiokike nyernu i.

⁹ Chiokike znhiaru aṣi, sukwu aṣi ma a wuru budnu zi nsṣi. Ka bu hite nu nhne obula ke a mernu, kovu o bu mmuma a hite n'oru a. Ka bu oru ke o nyernu aṣi nu Karaṣi Jizosi su owa panizoru.

¹⁰ Kitna, o mernu ka whnu iwhne nga Nye Oznohia aṣi Karaṣi Jizosi whnyaru iwhne, nye megburu ẹnuwun gweyanu aṣi budnu ke kwṣo okwo, ke noonwu n'iwne ke izi o ma.

¹¹ Me jiri buru nye nookpo okwo izi o ma ka, nu nye izi nu nye zni nhne.

¹² Kam kpayaru, me naata awhnuwhnu nu rime ikelu. Kovu iwhnerne za notu m, kwnornu nu m magwu m nye me kweru nu ya, m magwu m masi nu o nwernu rikne o bita nhne me yisiri a n'aka* du obochi wam.

¹³ Hite n'okwnata oву nu owhnun'anya Karaṣi Jizosi, bita kpakara nhne i nrnu n'onu m, ma be buru nhne atu ke iznizni zi snam.

¹⁴ Enine Nso yinu i aka bita nhne o ma wam be yisiri i n'aka.

¹⁵ I magwu nu kpakara ele zi nu Esia ghasaru m, ma Figelusi nu Hamogenisi.

¹⁶ Nyenwe aṣi donu ezi-nu-oro Onesiforosi obirizi kwnornu nu o mesiri m oву rikne, ijigba be turu m za notu a iwhnerne.

¹⁷ Nga o zi nu Rom, o piosiri m rikne tem o piohia m.

¹⁸ Nyenwe aṣi donu a obirizi n'obochi ikpe. I magwu nkari nkari kpa o yinu m aka n'apna zi odo n'odo n'Efesosi.

2

Nye ogwunu o ma ke Jizosi

¹ Timoti nnwo m, gbasṣi rikne n'oru ke Karaṣi Jizosi.

² Kpakara nhne i nrnu me kwuru nu ruwhnu agida ele akebe, zni ele kwesiri be kwnata be oву, ele jeenwe rikne zni masi ele berere.

³ Nwe okasi oву n'awhnuwhnu lele nye ogwunu o ma ke Karaṣi Jizosi.

* 1:12 nhne me yisiri a n'aka mṣu nhne Chiokike yisiri n'aka m

⁴ Ọ zá nye ọbula ke ọ́ bú nye ọ́gwnu ke neeme nhne nye búo nye ọ́gwnu neeme, ma o mee nhne jọosno nye risi a oву n'ọ́nu.

⁵ Kpam masị, ọ́ zá nye naagba ẹsọ ke jeenwe rikne kpuru okpu mmeri ọ́ búru nù ọ́ gbáge ẹsọ lele kpa iwu ẹsọ kwuru.

⁶ Nye ẹ́rnu ẹ́kwnu ke nọ́ornu ẹ́rnu nkari kwesiri o beru ọ́sọ ri mkpọ́ru mbọ́m ke hi n'ẹ́kwnu a whụya.

⁷ Tule nhne me nookwu, Nyenwe aị jeenye i ọ́ghohia nù kpakara nhne.

⁸ Chenwanya nù ka ọ́ bú izi ọ́ma m, Jizọ́sị Karaịsị nye hiri n'avnọ́rnun Devidi, hiri n'ẹnwu lizọ́.

⁹ Kwnornu nù izi ọ́ma ka, m naata awnhnụwhnu dọ́ kpa be turu m ijigba lele nye noolulu iwu, kọ́vu be tų́ge ikwu-ọ́nu Chiokike ijigba.

¹⁰ Ka ọ́ bú nhne mernu me neenwe nkasi oву kwnornu ele wam Chiokike hohiaru, ma be nwehịa ọ́znohia ke zị nù Jizọ́sị Karaịsị nù igwugwu kwó okwo.

¹¹ Ka ọ́ bú ikwu-ọ́nu ke kwesiri ọ́kwnata oву, Ọ́ búru nù a snornu a nwụ́, a jọosno a zịri búdnú.

¹² Ọ́ búru nù a nwe ndidi, a jọosno a chị́ lele eze.

Ọ́ búru nù a gọ́nahoru a, ọ́ jọogonahoru aị.

¹³ Ọ́ búru nù a nwéé ọ́kwnata oву, ọ́ jeekwesi kọ́riri ọ́kwnata oву, kwnornu nù ọ́ jọogonahoru ẹ́hni a.

Nye ẹ́rnu ke Chiokike naakweru

¹⁴ Chenwanyanụ́ be kpakara nhne ka. Dọ́ be aka nù nsnị́ nù ruwhnu Chiokike gbasị́ri ọ́dogbuta n'ikwu-ọ́nu, ọ́ zá mbnarna ọ́bula zị́ a, ọ́ noolulu ele noobno n'nsi.

¹⁵ Gbalị́ gweru ẹ́hni i gesi nù ruwhnu Chiokike lele nye ẹ́rnu Chiokike nakweru, nye iwchnerne zá nọ́otu, nye nwernu rikne zni ikwu-ọ́nu ke ezi ọ́ka nkari.

¹⁶ Zeru ọ́ka iwchnirniwhno nù ọ́ka etekne, kwnornu nù ele nookwu a neegweme ẹ́hni be hne Chiokike zị́.

¹⁷ Iznizni be naagbasa lele ẹ́kwnu ọ́kochi, * ke Haị́menousi nù Filetusi zị́ n'esilawuru ele neezni a.

¹⁸ Ka ọ́ bú ele kpawhuru n'ezi ọ́ka. Be nookwu nù olizọ́ n'ẹnwu ele nwọ́rnun ọ́nwu whelem, be naakwnadna ọ́kwnata oву agwina ele badnụ́.

¹⁹ Kpa ọ́ zị́, ntụ́-ẹ́l Chiokike gwuzo kwem, ke nwernu akara ka, "Chiokike magwụ́ ele ke a," nù "Nye ọ́bula ke noosukwu rẹ́whna Nyenwe aị, hi nù nhne ọ́jo whụya."

²⁰ N'oro hna okpotokpo, ọ́ búo agbụ́gba wiri golu nù agbụ́gba wiri siliva ọ́ bú nhne zị́ a kpọ́i, kọ́vu okiko isisi nù rị́zna, agwina be

ji nọ́ornu ẹ́rnu zị́ mkpa, agwina be ji nọ́ornu ẹ́rnu zị́la okne mkpa.

²¹ Kọ́vu ọ́ búru nù badnụ́ ọ́bula snọ́snama ẹ́hni a nkari, be jeeji a nọ́ornu ẹ́rnu zị́ mkpa, ke zị́ nsọ́, be jiknernu a, Nyenwe a jeeji nọ́ornu ẹ́rnu ọ́ma ọ́bula.

²² Gbanahọ́ru kpakara nhne ọ́jo ke nọ́ogwnu ele ikoro. Gbasnornu ome mma, nù ọ́kwnata oву, nù ọ́whnun'anya nù udno, jị́ nù kpakara ele neekpenu Nyenwe aị nù mkpọ́ma zị́ rị́chna.

²³ I kwú ọ́ka ọ́bula ke iwchnirniwhno nù agirigo nwéé risi, kwnornu nù be noovuya okno ọ́ka.

²⁴ Nye izi Nyenwe aị jọ́oburu nye nookno ọ́ka, ntunuma, ọ́ jọoburiri nye neegesi nye ọ́bula oву ọ́ma, nye nwernu rikne zni nhne, nye nwernu ndidi.

²⁵ O jeegweru wọ́hnerne neezni ele neemegidne a nhne, neele anya nù Chiokike jeeme be tų́hnasna, o dubna be n'ezi ọ́ka,

²⁶ ma be mahị́a nhne, gbanahọ́ru mbị́ta Ekwensu sninu be, kpa o gidnernu be ma be mee nhne o piuru be mee.

3

Ọ́bochi ipne-aznụ́

¹ Kọ́vu hnata ka ama, ige tų́ ọ́gwnu k'agị́da wawa n'ọ́bochi ipne-aznụ́.

² Ele badnụ́ jọoburu ele whnọ́rnun ẹ́hni be n'anya, ele whnọ́rnun iwai n'anya, ele oknomokno, ele nganga, ele noolulu ele badnụ́, ele zá noobnonu ele mọ́rnun be nsnị́, ele nwéé oву ọ́tu mmamma, ele zá nsọ́,

³ ele nwéé ọ́whnun'anya, ele zá naagbarunụ́ ele badnụ́ nhne be mernu be, ele nookwulu, ele nwéé rikne jikwaru ẹ́hni be, ele nù lele anọ́hia, ele nhne búru ọ́ma zá naamasị́,

⁴ ele neere ele badnụ́, ele risi rikne, ele nọ́owhu nù nganga, ele whnọ́rnun nhne sọ́ n'ọ́nu n'anya karụ́ ọ́ whnụ́ Chiokike n'anya,

⁵ ele nwernu ọ́di ogwnu Chiokike kọ́vu be gonahoru rikne a. Jị́ nù be nwéko nhne ọ́bula.

⁶ Be ọ́ bú ele ji aghigho nooduwu ezi-nu-oro, duwhe ele rinya nwéé rikne, ele rinya mmehie noovughari lele ele nwọ́rnun manya nù egwnurnu nhne ọ́jo.

⁷ Ele rinya nù kpa zị́ nọ́omu nhne, kọ́vu be nwéé rikne mụ́hia ezi ọ́ka.

⁸ Lele kpa Janisi nù Jambirisi gwuzogidnernu Mozizi, ele ka neemegidne ezi ọ́ka, ele mkpọ́ma be nwọ́rnun ọ́nwu, ele ọ́kwnata oву be ọ́ bú nhne etekne.

⁹ Kọ́vu be jéenwe rikne zne nù ruwhnu, lele kpa iwchnirniwhno ele wam whụya ru iwchne, ọ́ bú masị́ kpa iwchnirniwhno ele ka jọ́owhuya iwchne.

Pọ́lu znirni Timoti ezi ipne-aznụ́

* 2:17 mọ́bu lele mbam mbam

¹⁰ Kĩna, Timoti, ì magwù kpakara nhne me znirni nù kpa me wuru bũdnu m. Ì magwù nhne me neeme nù nhne me kweru nù ya, nkasi ovu m, nù ọwhnun'anya m, nù ndidi,

¹¹ nù kpa me nagidnenu ọkpagbu, nù awhnùwhnu. Ì magwù kpakara nhne me whnùrnun'Antìọkọ, nù Aìkoniom, nù Lisitira, kpa me nagidnenu ọkpagbu. Kọvu Nyenwe aì dọhiaru m nù rime kpakara be.

¹² Me kanù ì ezi ọka, nye ọbula ke joowu bũdnu ke nọtu ogwnu Chiokike nù rime Karaìsi Jizọsi jaata awhnùwhnu.

¹³ Kọvu ele ojo nù ele ka nù be bũ nhne be bũla, jaazì nọjokari bujo, nooduwu ele badnù, be nooduwu masì be.

¹⁴ Kọvu dazìgidne nù nhne me znirni ì nù nhne ì kweru, hne ì magwù nye ì mụhiaru nhne n'aka a.

¹⁵ Hite n'ige ì bũ nnwọ matì, ì magwù nhne ọkwukwo nsọ kwuru, ke nwernu rikne mee ì ì bũru nye nwernu akọnìche. Ka joodubna ì n'ọznohia hite n'ọkwnata ovu ke zì nù Karaìsi Jizọsi.

¹⁶ Kpakara nhne be gbarù n'ọkwukwo nsọ hi n'echiche Chiokike whùya, be bũru ọma n'ogweru znì nhne, bigbọ, dọ aka nù nsì nù ọznuznu ke ome mma,

¹⁷ ma badnù ke Chiokike bũru nye zuru ozu, nye be jiknenu nọornu kpakara ọnu ọma.

4

¹ M gwuzo m nù ruwhnu Chiokike nù Karaìsi Jizọsi nye jeekpe ele zì bũdnu nù ele nwùrnun'ọnwu ikpe nga ọ jaava lele eze, neenye ì iwu ka.

² Kpọ okwo izi ọma, zìri gnarnagnarna n'ige kwesiri nù ige kwésìge, bna mbna, bigbọ, kwnalìzọ mkpọma, gweru agìda ndidi nù anya dũru ẹlì neezni nhne.

³ Kwnornu nù ige jaava nga ele badnù jéekweru iznizni bũru ọma. Tnùnuma, be jaachìkọta ele neezni nhne, ele jeezni be nhne ke nsì nọkọ be ẹko noopio.

⁴ Be jéekwe o bno nsì n'ezì ọka, kọvu snornu ọtnutnu ruwhere.

⁵ Kọvu bũru nye anya dũru ẹlì ige ọbula, naagidne awhnùwhnu, rnù ọnu nye nọkpo okwo izi ọma, rnù kpakara ọnu ke kwesiri nye izi Chiokike.

⁶ Kĩna, ige be jowusi bũdnu m lele arìọhna manya dũlam, ige me joonwu ẹnwu valẹm.

⁷ M lùkwolem ọgwnu ọma wam, m gbazulem ẹso wam, m bítala m ọkwnata ovu wam.

⁸ Kĩna, Nyenwe aì bítannu m okpu-eze ke ome mma, ke nye ikpe ziri ezi jeenye m n'ọbochi wam, o jéenyẹ me nù nsùnunu m, kọvu o jeenye kpakara ele noopio ọ whnù a anya nga ọ jowhuya iwhe.

Iznuznu Polu nù Timoti

⁹ Me wara wara va.

¹⁰ Demasì whnùrnun'anya ọwa n'anya, ọ ghasa m zne Tẹsalonika. Kìrẹskensì znernu Galasia, Taitosì zne Dalimatia.

¹¹ Me nù Lukwu kpọ zì. Nga ì jaava kwuru Makì va, kwnornu nù o jeenyinu m aka n'ernu me nọornu.

¹² M ziznenu m Taiikikosi Efesọsi.

¹³ Nga ì jaava chiyanu m iwo me chíсарu n'oro Kapọsi nù Torasi, nù ọkwukwo, ke kakwo mkpa ọkwukwo.

¹⁴ Alẹkizanda nye ọnu rugwe mernu m nhne ojo k'agìda. Nyenwe aì jọokwu a ọgwo ọnu a.

¹⁵ Anya dũ ẹlì hne ọ zì, kwnornu nù ọ bũ nye neemegidne izi aì.

¹⁶ Nga me gwuzo n'ikpe n'ọziri nọogoru ọnu m, ọ zá nye ọbula ke sno m, kpakara ele badnù gbanahoru m. Chiokike bikno, gwnùko nhne ka megidne be.

¹⁷ Kọvu Nyenwe aì dagwunu m, nyee masì m rikne, me jiri kpọ okwo izi ọma nù nsì kpakara ele bũo ele Ju. Be dọhiaru m n'ọnu odum.

¹⁸ Nyenwe aì jọodohia m nù kpakara nhne ojo, duru m n'udno bna n'ọchichi ẹlì-eze oligwe. Ya nwe igwugwu ọkwnukokwnu. Amim.

Obekwu ipne-aznù ke Polu

¹⁹ Bekwu Prisila nù Akwìla nù ezi-nù-oro Onesiforosì.

²⁰ Erasìtosì dazìri nù Kọrinti, Tirofimosì naarija ẹhni igbugbu, m ghasa a nù Miletọsi.

²¹ Gbalì va sù okirika dũ. Ebulusi neebekwu ì, ma Pudesì, Laiñosì, nù Kalaudia nù kpakara rùmu nda.

²² Nyenwe aì dazìnu ì. Oru Chiokike dazìnu anù.

Okwukwo izi Pölu gbaznenu Tajitosi

Nhne gbasiri okwukwo izi ka

Pölu kwuru nhne gbasiri Tajitosi nu hne zi ichne ichne nu rime okwukwo izi o gbarü. O karu nu ya nu Tajitosi sno rnu ernu izi oma nu Esia Matü nu Girisi (2 Korinti 2; Galasia 2:3). Pölu kannu a, o hohia ele risi nu ele jeeleköta ogbako Chiokike anya nu Kiriti.

Pölu kannu Tajitosi o whnu ele risi nu ele neeleköta ogbako Chiokike bu ele, ele badnu nookwu öka öma (1:5-9). Kpakara ele sno Nyenwe ai jöobu ele bitaru ehni be snam, ele za neesigha öka (1:10-2:9).

Pölu kwuru öka gbasiri ele zi ichne ichne nu rime ogbako Chiokike ke zi nu Kiriti. O karu nu a nwernu rikne o wu budnu ikne kwnornu nu Chiokike ziyaru Jizösi Karaösi, Chiokike znöhiaru ai, snüma ai hite nu rikne Enine Nso, mee ai a panizo budnu ikne ke nwernu olile anya budnu kwö ökwo. Chiokike znöhiaru ai kwnornu nu o bu nye obirizi, o buo kwnornu nhne öma öbula a mernu.

Nhne zi n'okwukwo izi ka

Obekwu ikwu nu okpukpe Pölu kpenu Tajitosi (1:1-4)

Ezni ele risi ogbako Chiokike (1:5-16)

Ezni ke Ogbako Chiokike (2:1---3:11)

Ezni ke o znirni Tajitosi nu obekwu ikwu ipne-aznu (3:12-15)

¹ Mawa, Pölu nye izi ke Chiokike nu nye izi Jizösi Karaösi. Ernu m bu o mee ele Chiokike hohiaru nwe ökwnata ovu, ma be mahia ezi öka ke noodubna n'ötu ogwnu Chiokike,

² ma be nwehia olile anya budnu kwö ökwo, hne Chiokike za naagha aghalaghala, bu ke o kweru mkwna sü öwa panizoru.

³ O mernu ikwu-önu a whüya iwihne n'ige ke a hite nu ogbasa izi öma, bu ke o yisiri n'aka m lele nhne Chiokike Nye Öznohia ai nyernu n'iwu.

⁴ M naagbanu i Tajitosi nnwö m n'ezi n'ökwnata ovu ke a kwekötaru okwukwo.

Oru, nu udno ke hi n'aka Chiokike Nda ai nu Jizösi Karaösi, Nye Öznohia ai.

Ernu Tajitosi nu rime Kiriti

⁵ Nhne mernu me gharuru i nu Kiriti bu ma i bikwata nhne ke kwesiri öbikwa, hohia ele okno badnu nu rime eli-öhma öbula, lele kpa me kannu i.

⁶ Nye okno badnu kwesiri o bu nye nwée ötna, nye lu otu nnwerne, nye nwernu rümu be tukwasiri mkpöma, nye kpähie agwa, ele mee risi rikne.

⁷ Kwnornu nu nye risi jöobu nye nwée ötna lele nye izi Chiokike, nye mee n'iche ovu a, we ovu ehni wara wara, nye za nöonwo manya gbu ogbu, nye mee nhne rikne, nye nwée öwhö-anya.

⁸ O jöobu nye neeleköta ele izne, nye whnurnu nhne öma n'anya, nye za neemewhe nhne ike, nye zi snam, ziri nso, nye neejikwaru ehni a.

⁹ O jikwaru öka wam ke kwesiri ökwnata ovu rikne lele kpa be znirni a, ma o mesi ele berere ovu rikne hite n'iznizni a zi snam, gesi masi ele neemegidne a nhne ojo be.

¹⁰ Agida ele kwé ekwe nooduwhu ele berere hite nu ikwu-önu etekne, ke kakwo ele knesnigwü omen'eli ele Ju aka rikne.

¹¹ Be kwesiri o mee be kpüsü önu be, ele noolulu agwna ezi-nu-oro, ele neezni nhne be kwésile o zni, kwnornu iwai.

¹² Otu nye öwhnurninya be, nye Kiriti, karu kpa, "Ele Kiriti bu ele aghalaghala, ele ovu ojo lele anöhia, ele ime-mgwü, nu ele okne nköli."

¹³ Nhne o kwuru bu ezi öka, ka kpararu bigbösi be rikne, ma be gwuzosi rikne n'ökwnata ovu,

¹⁴ ma be gharu iznizni aghalaghala ele Ju nu iwu ele badnu ke hi n'aka ele whögaru n'ezi öka.

¹⁵ Kpakara nhne zi rüchna n'anya ele zi rüchna, kövu nye ruru öru nu nye kwé ekwe, o za nhne zi rüchna, kwnornu nu aköniche be nu echiche be ruru öru.

¹⁶ Be karu nu be magwü Chiokike, kövu ernu be neegesi nu be nöogonahoru a. Ele so ize, ele risi rikne, ele nwée rikne mee nhne öma öbula.

2

Iznizni zi snam

¹ Gbalü zni iznizni zi snam.

² Ele okno badnu nwernu anya udno, ele nwernu öso n'anya, ele za neemewhe nhne ike, ele zi kwem n'ökwnata ovu be, nu öwhnun'anya nu ndidi.

³ Ele okno badnu ele rinya masi wuru budnu lele ele zi nso, ele za noobno ele berere nhne, ele za nöonwo manya gbu ogbu, ele neezni nhne buru öma,

⁴ ma be zni ele nnwerne ikne anya udno, whnu nzi be nu rümu be n'anya.

⁵ Be kwesiri o buru ele za neemewhe nhne ike, ele zi rüchna, ele rinya neelegidne öro be anya nkarü, ele noobnonu nzi be nsü, ma ele badnu gharu o kaja ikwu-önu Chiokike.

⁶ Kpam masi, neezni rümu ikoro ma be buru ele za neemewhe nhne ike.

⁷ Nu kpakara nhne i neeme, gesi ehni i nye öma atu n'ernu öma. Nu nhne i neezni gwuzosi rikne nu rime a, nye anya düru eli.

⁸ Ikwu-õnu bũru õma ma nye õbula ke neemegidne i tũ iwħnerne hne be nwée nhne ojo be jeeji nookwugidne aĩ.

⁹ Zni ele õhi be bnonu ele nwe be nsni nũ kpakara nhne, neeme nhne jõso be n'õnu, be sá oka nga be nookwunu be oka.

¹⁰ Be znũ nhne ele nwe be, kõvu be gesi nũ be jõtukwasi be mkpõma, neegesi nhne õma ke zĩ nũ iznizni Chiokike Nye Qznohia aĩ nũ kpakara nhne.

¹¹ Oru Chiokike ke neegweya õznohia whũyaru iwħne hne kpakara ele badnũ zĩ,

¹² neezni aĩ a sigbasi nhne nõogwunu anõ-ẽhni aĩ n'õwa, nũ bũdnu ke zã nõotu õgwunu Chiokike, a wuru bũdnu ele zã neemewhe nhne ike, ome mma, nõotu õgwunu Chiokike nũ rime õwa ka.

¹³ A nwernu olile anya zĩ ngõzi, bũ õ whũya iwħne igwugwu ke Chiokike hna ezi nũ Nye Qznohia aĩ Jizõsi Karaĩsi.

¹⁴ O bũ nye gweru ẽhni a nyee n'õnodi aĩ ma õ gbahĩa aĩ nũ rime nhne ojo, bĩtannu ẽhni a ele ke a, ele zĩ riçhna, ele ovu neerne bekwnu n'ẽrnu õma.

¹⁵ Zni kpakara nhne ka, naakwnagidne, bna mbna nũ kpakara rikne i nwernu. I kwé badnũ õbula ledna i anya.

3

Bũdnu nye Karaĩsi

¹ Chenwanyanũ ele badnũ be bĩta ẽhni be nũ mkpururu ele risi nũ ele neçchi ẽchi, noobno nsni, jiknernu õ rnũ ẽrnu õma,

² be kwúkwõ oka ojo megidne badnũ õbula, be bũru ele udno, ele agwa õma, ele ovu hieru ẽli hne kpakara ele badnũ zĩ.

³ N'ige mbõm, a bũ ele iwħnirniwhno, ele zã noobno nsni, ele be duwhuru, noosno agida nhne ojo zĩ õdo nũ õdo ke nõogwunu aĩ, a wuru bũdnu ojo, kwno awũwa, be snornu aĩ irno, aĩla sno masĩ be irno.

⁴ Kõvu nga ovu õma nũ õwhnun'anya Chiokike Nye Qznohia aĩ whũyaru iwħne,

⁵ õ znõhia aĩ, õ bũo kwnornu ẽrnu õma a rnũrnu, kõvu kwnornu obirizi a. Hite n'õsnusnu ke õmu berere, Enine Nsõ nyernu aĩ bũdnu ikne.

⁶ Chiokike wũkwasiri aĩ Enine Nsõ k'agida hite nũ Jizõsi Karaĩsi Nye Qznohia aĩ.

⁷ Hne õ gwnũrnu aĩ lele ele mee mma hite n'oru, a bũru ele neekẽhĩa olile anya bũdnu kwó okwo.

⁸ Ka bũ oka kwesiri õkwnata ovu. M naakaa, jĩ kwusi a rikne ma ele kweru nũ Chiokike bũru ele anya ðũru ẽli, neeme nhne bũru õma. Kpakara nhne ka bũru õma naabna iru hne ele badnũ zĩ.

⁹ Kõvu zeru ajiji iwħnirniwhno, nũ õgwunu rẽwhna ẽbnurnu, oknorno, õlu õgwunu kwnornu iwu, be bnána iru, be bũ nhne etekne.

¹⁰ Dõ nye õbula ke neegweya okewa aka nũ nsni mgba lawũru, i mekwo, gharũ a.

¹¹ I magwũ nũ badnũ kĩ bũ nye aghorome, nye mmehie, õ bũ nye naama ẽhni a ikpe.

Ezni ipne-aznu

¹² Nga me jeeziya Atemasĩ nũ Tajikikosi, hna anũ zĩ, gbalĩ vakwnusi m nũ Nikopolisi, kwnornu nũ m jaadazĩ piĩ n'ige okirika.

¹³ Gbalĩ yisinu Zenasi nye õgwunu iwu nũ Apõlosi aka n'izne be, whnũ nũ be nwehĩaru nhne õbula be pioru.

¹⁴ Ele ke aĩ mũhĩa kpa be jeeji ige be rnũ ẽrnu õma, rnũhĩa nhne zĩ mkpa, be wúkwõ badnũ bnána nũ nhne.

¹⁵ Kpakara ele me nũ be zĩ neebekwu i. Bekwu kpakara ele whnũrnu aĩ n'anya nũ rime õkwnata ovu. Oru Chiokike dazĩnu kpakara anũ.

**Ọkwukwo izi
Pọlu gbaznenu
Filemōni**

Nhne gbasiri ọkwukwo izi ka

Filemōni bụ otu nye zị mkpa n'ogbako Chiokike ke zị nù Kọlosi, nye nwe ọhi ke rẹwhna a bụ Onesimosi. Ọhi ka hiri n'oro nye nwe a gbawhu. Kpa ọ kpawhuru, ya nù Pọlu nye zị n'ikelu whnataru. Hite n'aka Pọlu, Onesimosi ghọ nye Karaịsi. Pọlu gbaznenu Filemōni ọkwukwo izi ka naarijasno a, ọ kwubnaharnu ọhi a, nye Pọlu neezihnahienu a. Pọlu naarijasno a, ọ naabnarnu a lele nnwọ nda nù rime Karaịsi, ọ bụo lele ọhi.

Nhne zị n'ọkwukwo izi ka

Ọpanizo (1-3)

Ọwhnun'anya Filemōni nù ọkwnata ovu a (4-7)

Oriasno nù risi Onesimosi (8-22)

Ọkwukwo (23-25)

¹ Mawa, Pọlu, nye ikelu kwnornu Karaịsi Jizọsi, nù nwene aị rukna Timoti, naagbaznenu enyi aị nù nye ẹrnu ibne aị, Filemōni, ọkwukwo izi.

² A naagbaznenu masi nù nwene aị rinya Afia nù nye ọgwun ibne aị Akiposi nù ọgbako ke zị n'oro i.

³ Oru nù udno ke Chiokike Nda aị nù Nyenwe aị Jizọsi Karaịsi dazinu anụ.

*Pọlu nọtunu Chiokike
mmamma*

⁴ M nọtunu Chiokike mmamma ige ọbula me neechenwanya i n'okpukpe m,

⁵ kwnornu nù m nọon nhne gbasiri ọwhnun'anya i hne kpakara rumu Chiokike zị nù ọkwnata ovu i nù Nyenwe aị Jizọsi Karaịsi.

⁶ M neekpe ma ọkwnata ovu i nọornusi ẹrnu rikne n'esilawuru rumu nda ma i mahia kpakara nhne ọma ke a nwernu a ji nọornu ẹrnu nù rime Karaịsi.

⁷ Ọwhnun'anya i nyernu m mkpoma ọso n'ọnu k'agida sụ nwene m rukna, bụ ke mernu ovu ele nsọ ziri bụdnu ikne, gbata kwno m inwe.

*Pọlu riasnornu
nù risi Onesimosi*

⁸ M nwernu m anya rikne nù rime Karaịsi ọ kanu i mee nhne ke kwesiri.

⁹ Kọvu ọwhnun'anya mernu me riasno i, lele ọkpa badnu me bụ, Pọlu nye okno badnu, kọvu kịtna, nye ikelu kwnornu Jizọsi Karaịsi.

¹⁰ M nọorio i kwnornu Onesimosi nnwọ m rukna nù rime Karaịsi, nye ghọru nnwọ m kpa me zị n'ikelu.

¹¹ Nù mbom, ọ bnáge nù nhne ọbula nyee i, kọvu kịtna ọ bnarnu iru nyee i, ma mawa masi.

¹² M neeziyanu i ya hite n'ovu m, lele nye zị m okne mkpa.

¹³ O znernu amasi m ọ bita a hna me zị ma o yinu m aka n'onodi i kpa me zị n'ikelu kwnornu izi ọma.

¹⁴ Kọvu m jéeme nhne ovu i kwéle, kpa nhne ọma ọbula i jeeme jeehi n'ovu i whuya, ọ bụo nhne be kwnagidnernu i mee.

¹⁵ O jọobu nù Onesimosi whogaru ige mati, ma i kwubnanya a n'ehni i ọkwukwo.

¹⁶ O búma lele ọhi, o kakwo ọhi, kọvu lele nnwọ nda be whnurnu n'anya. O zị m mkpa k'ezí, kọvu ọ zị i mkpa kakwo lele badnu nù lele nnwọ nda nù rime Nyenwe aị.

¹⁷ O buri nù i kwuru m nye ẹrnu ibne i, kwubnanya a lele kpa i jeegweru m.

¹⁸ O buri nù o nwernu nhne ọjọ ọbula mọbu ọgwo ke o ji i, gwnusi a nù risi m.

¹⁹ Mawa Pọlu, ji aka m naagba nhne ka, m jọokwu i be. I magwu nù ji n'iwuru i jigwu m ọgwo bụdnu i.

²⁰ Bikno, nwene m rukna, menu m nhne ka kwnornu nù Nyenwe aị, mee ovu sọ m n'ọnu lele nwene rukna nù Karaịsi.

²¹ M tükwasiri m mkpoma nù i jọobno nsnị kpa me naagba ọkwukwo ka nù i jeeme kakwo nhne me nọorio i.

²² Kpam masi, bitanu m otu ọnu ọro, kwnornu m neele anya nù Chiokike jaaza kpakara okpukpe anụ mee m hiehnakwnusi anụ berere.

Obekwu ikwu ipne-aznu

²³ Epafarasí nye me nù a zị n'ikelu kwnornu Karaịsi Jizọsi neebekwu i,

²⁴ ma ele ẹrnu ibne m Makí, Arişitakosi, Demasi nù Lukwu.

²⁵ Oru ke Nyenwe aị Jizọsi Karaịsi dazinu enine anụ.

Ọkwukwo izi Ele Hiburu Nhne gbasiri ọkwukwo izi ka

Ọkwukwo izi Ele Hiburu bu ke be gbaznennu ele Karaisi ele be neemegidne, ele zi nu ogwnu nu be jaaghasa okwnata mkpoma nu Karaisi. Nye gbaru ọkwukwo ka naakanu be nu Jizosi Karaisi bu ezi oyiyi Chiokike n'iwuhuru a. O neegesi nhne ka, ke mbom, Jizosi bu Nnwọ Chiokike ke zi okwnukokwnu, nye muhiaru obno nsni hite n'awhnuwhnu o gawheru. Lele Nnwọ Chiokike, Jizosi kakwo kpakara ele owhnurninya ke Tesisamenti Oknani, ma ele enine izi, ma Mozizi n'iwuhuru a. Ke ebo, Chiokike karu nu Jizosi bu nye arjohna, nye obula ke kweru nu ya, jeenwehia oznohia nu mmehie.

Nye gbaru ọkwukwo izi ka kwuru oka gbasiri ele dikne ke okwnata oву, ele gwuzoru kwem du n'enwu. Be lekwasiri Jizosi anya, nu ruwhnu awhnuwhnu nu okpagbu be kpagburu be. O jiri odo aka nu nsni nu ezni mesni ọkwukwo izi a.

Nhne zi n'okwukwo izi ka

Karaisi bu oyiyi Chiokike zuru ozu (1:1-3)

Karaisi kakwo ele enine izi (1:4--2:18)

Karaisi kakwo Mozizi nu Josua (3:1--4:13)

Karaisi bu nye risi arjohna kakwo (4:14--7:28)

Ogba-njo-ehni Karaisi kakwo (8:1--9:22)

Arjohna Karaisi kakwo (9:23--10:39)

Okwnata mkpoma bu risi nhne (11:1--12:29)

Mee nhne joso Chiokike n'onu (13:1-17)

Okpukpe nu oka ipne-aznu (13:18-25)

Nnwọ a kakwo

ele owhnurninya

¹ N'ige wheru ewhe, Chiokike kwunnu ele nda ai oknani oka agida ige hite n'onu ele owhnurninya n'apna zi ichne ichne.

² Kovu kitna, n'obochi ipne-aznu ka, o kwunnu ai oka hite n'onu Nnwọ a Jizosi, bu nye o hohiaru ma o buru nye jeeri kpakara mke, nye o hiri n'aka a kpu owa.

³ O nwernu igwugwu Nda a. Nnwọ wam bu nhne Nda a bu. O ji ikwu-onu a ke nwernu iknerna jigidne kpakara nhne. O jiri aka a snusnama mmehie owa. Nga o mekworu ka, o daziri eli n'akarikwnunga Chiokike n'oligwe, nye kakwo kpakara nhne n'olu.

Nnwọ Chiokike kakwo

ele enine izi

⁴ Nnwọ wam kakwo ele enine izi lele kpa rehwna a "Nnwọ," ke Chiokike nyernu a kakwo rehwna be.

⁵ Kwnornu nu o za enine izi obula ke Chiokike kannu,

"Ji bu Nnwọ m.

M gholam Nda i tna."

Mobu, o zi masi enine izi ke Chiokike kannu,

"M jooburunu i Nda,
i jooburu Nnwọ m."

⁶ Nga Chiokike neeziya Nnwọ a nu rime owa, o kaa,

"Kpakara ele enine izi Chiokike kponu a risi eli."

⁷ Ka bu nhne Chiokike kwuru gbasiri ele enine izi,

"Chiokike mernu ele enine izi a lele ruwhere,

ele izi a lele bekwnu neerne erne."

⁸ Kovu nhne gbasiri Nnwọ wam, Chiokike karu,

"Chiokike, ngadna eze i jaazi tim tom,

Mkpara eli-eze i bu ikpe zi snam.

⁹ I whnurnu nhne oma n'anya, sno nhne ojo irno,

kam kpayaru, Chiokike, bu Chiokike i teru i mono oву oso n'onu,

bita i nu hne kakwo kpakara ele ibne i."

¹⁰ O kaa,

"Ji Jihova, i turu ntụ-eli owa hite nu mbom.

I ji aka i lawuru kpu oligwe.

¹¹ Kpakara be joowhu, kovu i jaazi okwnukokwnu.

Be jaaka buka lele iwo.

¹² I jaapiakota be lele iwo olu,

be jaagbanwo be lele ikpe,

kovu i zi kpa i zi nu mbom,

onu ogwnugwu awha i jeebi ebi."

¹³ O za enine izi obula ke Chiokike kannu,

"Daziri eli n'akarikwnunga m

tem du nga me jaabita ele irno i

lele nhne i jootukwasi ochi i lawuru."

¹⁴ Ele enine izi, kpakara be buo ele o ziyaru o yinu ele jeekehia oznohia aka sa?

2

Okne oznohia wam

¹ Kam kpayaru, a jigidne ezi oka wam a nurnu aka rikne, o zi be vume ai lele kpa mini noovume ogbo.

² O buru nu ikwu-onu ele enine izi kwuru gwuzosiri rikne, kpakara mmehie nu risi rikne nahiaru ogwo ernu awhnuwhnu kwe-siri be,

³ ndaa kpa a jaagbanahoru, o buru nu a lewhuru okne oznohia hna kpa anya? O bu ke Nyenwe ai n'iwuhuru a beru osno zni, ele nurnu a kannu ai nu o bu ezi oka.

⁴ Chiokike gbannu be akebe hite nu ernu elekema zi ichne ichne ke rikne, nu ernu ndu-ehni, nu ernu rikne zi ichne ichne. O gba masiri akebe nga o nyernu ele badnu nkesi ke Enine Nso lele kpa o masiri a.

Jizosi nu lele rumu nne a

⁵ Berere kwno, Chiokike bítage ele enine izi ele jaachí ọwa ke jaava, bú ọwa ke a nookwu ọka a.

⁶ Kọvu be kwuru n'otu hnenum n'ọkwukwo nsọ,

“Kíni bú nhne badnú etekne bú, ke í naari ọriri gbasiri a,

nú nnwọ ke badnú ke í neelekọta a?

⁷ I mernu a o hietu ẹli matí karú ele enine izi. I jiri igwugwu nù ọson'anya kpusi a nù risi lele okpu-eze.

⁸ I mernu a nye risi kpakara nhne.”

Ka neegesi nù ọ zá nhne ọ sigbasiri ọ bíta nù mkpururu ọchi a. Kọvu kítna, a whnúge nù kpakara nhne ka zì nù mkpururu ọchi a.

⁹ Kọvu a whnúrnú Jizọsi, nye o mernu hietu ẹli matí karú ele enine izi. O jiri igwugwu nù ọson'anya kpusi a nù risi lele okpu-eze kwnornu nù ọ nwúrnu ẹnwu. Hite n'oru Chiokike, o ratúrú ẹnwu riro kwnornu kpakara badnú.

¹⁰ Chiokike nwe kpakara nhne, ya ke masiri kpakara nhne hite n'iknerna a. O mernu nhne kwesiri nga o mernu Jizọsi zu ozu hite n'awhnuwhnu, ma ọ znọhia agída rúmu Chiokike, mee be snornu a kehía igwe n'igwugwu a.

¹¹ Kwnornu nù nye bítaru be nsọ nù ele be bítaru nsọ bú otu ọro. Kam kpayarú, o sukwu be rúmu nda a zá nọotu a iwghnerne.

¹² Ọ karú,

“M jookwupiya rẹwhna í n'esilawúru rúmu nda m,

m jaaznarní í n'esilawúru ọgbako Chiokike.”

¹³ Berere kwno,

“M jọotukwasi a ovu,”

o kwu kwno,

“Le me nù rúmu Chiokike nyernu m.”

¹⁴ Lele rúmu o sukwuru vugwu anọ-ẹhni nù ọvnarna, Jizọsi ghọru badnú ke vugwu anọ-ẹhni nù ọvnarna ke nwernu rikne nwú ẹnwu, ma hite n'ẹnwu a, o megbu nye wam bú Ekwensu ke nwernu rikne ẹnwu,

¹⁵ ma ọ dọhia ele zì n'ọhi kpakara búdnú be n'ogwnu ẹnwu.

¹⁶ Kwnornu n'ezi, Jizọsi váge o yinu ele enine izi aka, kọvu rúmu avnúrnú Eberham.

¹⁷ Kam kpayarú, ọ zì mkpa Jizọsi nù lele rúmu nda a nù apna ọbula, ma ọ búru nye risi aríọhna ke nwernu mkpọma obirizi kwesiri ọkwnata ovu nù ruwhnu Chiokike, ọ búru masí nye mernu badnú nù Chiokike ziri n'udno hite nù ọgbaru mmehie.

¹⁸ Kwnornu nù o tarú awhnuwhnu nga be rnarnú a ọrnurna, o nwernu rikne yisinu ele be naarna ọrnurna aka.

3

Jizọsi kakwo Mozizi

¹ Kam kpayarú, rúmu nda m, ele zì nsọ, ele vu osukwu ikwu oligwe, anù rí ọriri nhne gbasiri Jizọsi, nye izi, nù nye risi aríọhna ke ọkwnata ovu aì.

² Ọ bú nye kwesiri ọkwnata ovu nyee nye hohiaru a, lele kpa Mozizi búri nye be túkwasiri ovu nù kpakara ẹnru a n'ọro Chiokike.

³ Jizọsi kwesiri o nwe igwugwu ke kakwo igwugwu Mozizi lele kpa nye wuru ọro nwernu igwugwu karú ọro o wuru.

⁴ Kwnornu nù kpakara ọro nwernu nye wuru a, kọvu Chiokike wuru kpakara nhne.

⁵ Mozizi, lele nnwọ izi be kwesiri ọ túkwasí ovu nù kpakara ọro a, gbarú akebne nhne be jookwu nù ruwhnu.

⁶ Kọvu Karaisi kwesiri ọkwnata ovu lele nnwọ n'ọro Nda a. A bú ọro a, ọ búru a bíta mkpọma siri rikne aì, gwuzosi masí rikne nù nhne a neele anya a.

Ozukwa inwe ke rúmu

Chiokike

⁷ Lele kpa Enine Nsọ karú,

“Tna, ọ búru nù anù núrnu nkọli a,

⁸ anù mée ovu anù si rikne,

lele kpa ele Izireli mernu nga be gwuzogidnenu Chiokike,

ige ọrnurna n'eli-íkpa.

⁹ Nga ele nda anù ọknani kparú m iru, kpahía m,

be whnúrnú ẹnru m nri awha ẹnó.

¹⁰ Ovu weru m ẹhni kwnornu ebiri kam,

m kaa, 'Mkpọma be noowhu apna,

be kwége ọ bíta iwu m.'

¹¹ Kam kpayarú, m ji m ovu owe ẹhni dú risi, kaa,

'Be jáabna hne me jeenye be ozukwa inwe.'

¹² Rúmu nda m, anya dú anù ẹli, ọ zá nye ọbula n'esilawúru anù ke jeenwe ovu mmehie ke kwé ekwe ke jeeme a ọ whọga nù hne Chiokike ke zì búdnú zì.

¹³ Kọvu anù kwnagidne íbne anù hnebúko ọbochi be kwuru “Tna.” Ọ zá nye kwe aghigho ke mmehie mee ovu a si rikne megidne Chiokike.

¹⁴ Kwnornu nù ọ búru a jidne ọkwnata mkpọma a nwernu nù mbọm dú okwukwo, aì nù Karaisi jeekeko nhne.

¹⁵ Lele kpa be gbarú n'ọkwukwo nsọ,

“Tna, ọ bú nù anù núrnu nkọli a,

anù mékọ ovu anù si rikne

lele kpa ele Izireli mernu nga be gwuzogidnenu Chiokike.”

¹⁶ Ndaa ele núrnu nkọli Chiokike mee risi rikne? Ọ búo ele Mozizi hiri n'ẹli Ijipiti duhía sa?

¹⁷ Ndaa ele Chiokike wesanu ovu ẹhni nri awha ẹnó? Ọ búo ele mehieru, bú ele iznu be dnarnú n'eli-íkpa?

¹⁸ Ndaa ele Chiokike duru risi nū be jáabna nū hne o jeenye be ozukwa inwe? Ọ búo ele bnóge nsnì?

¹⁹ A whnurnu nū be bnáge hne o jeenye be ozukwa inwe kwnornu nū ókwe ekwe be.

4

¹ Chiokike kweru aì mkwna ọ bna n'ozukwa inwe a, mkwna wam noogwuzo kwem, anū ngwa ma a tū ogwnu, ọ zì otu nyenem n'esilawuru anū ba adna nū ọ bna nū rime a.

² Kwnornu nū be znirni aì izi ọma lele kpa be znirni be. Kọvu izi be znirni be bnágene be nū nhne, kwnornu nū ele nurnu a jìle ọkwnata ovu naahọru a.

³ Kìtna aì ele kweru bnarnū n'ozukwa inwe a lele kpa Chiokike kwuru,

“M jì m ovu owe ẹhni dū risi,

be jáabna hne me jeenye be ozukwa inwe.”

O kwuru ka, ọ bú n'ezi nū ẹnu wam kwolem kpa ọ turu ntụ-ẹli ọwa.

⁴ O kwuru ọka gbasiri ọbochi ke ẹsau n'otu hnanum, “Chiokike zukwaru inwe n'ọbochi ke ẹsau nū kpakara ẹnu a.”

⁵ Nū hnam kwno, ọ kaa, “Be jáabna n'ozukwa inwe m.”

⁶ A whnurnu nū ozukwa inwe zìnu ele ke Chiokike. Kọvu, ele nurnu izi ọma wam nū mbòm bnáge n'ozukwa inwe wam kwnornu n'ókwe ekwe be.

⁷ Chiokike bítaru ọbochi berere ele badnū jì naabna n'ozukwa inwe a, kwu a “Tna.” Nga agida awha whemernu, o hi n'ọnu Devidi kwu lele kpa o kwuru nū mbòm, “Tna, ọ búru nū anū nurnu nkọli a, anū mée ovu anū si rikne.”

⁸ Kwnornu nū ọ búru nū Josua duru be bna n'ozukwa inwe, Chiokike bó kwule ọka gbasiri ọbochi ozukwa inwe berere.

⁹ Ka neegesi nū ozukwa inwe berere zìnu rumu Chiokike lele kpa Chiokike zukwaru inwe kpa o kekworu ọwa n'ọbochi ke ẹsau.

¹⁰ Nye ọbula ke bnarnū n'ozukwa inwe ke Chiokike, noozukwa inwe nū kpakara ẹnu a lele kpa Chiokike zukwaru inwe n'ẹnu a.

¹¹ A yisi ẹhni ma a bnazne n'ozukwa inwe a, ọ zì nye ọbula ba adna kwnornu nū ókwe ekwe lele kpa rumu Izireli dnarnū.

¹² Ikwu-ọnu Chiokike zì búdnu nọornusi ẹnu rikne. Ọ zì búko kakwo ama-ogwnu ruwhnu lawuru. Ọ nọodubna, neekewa mkpuru ovu nū enine, ma okpukpu nū ọmio. Ọ nọotupiya echiche ovu nū agwa ke badnū.

¹³ Ọ zá nhne be keru eke ke tugwaru otugwa n'anya Chiokike, kpakara nhne gbe anya n'anya nye wam a jaasa ajiì gbasiri ẹhni aì.

Jizọsi bú nye risi arìohna

¹⁴ Hne a nwernu nye risi arìohna hna ezi kpa, nye beru ọsno zne nū ruwhnu Chiokike n'oligwe, Jizọsi Karaìsi Nnwọ Chiokike, a jidnesi okwuhia ke ọtukwasi ovu aì aka rikne.

¹⁵ Kwnornu nū a nwée nye risi arìohna ke nhne gbasiri aì zá neemetu n'ovu, kọvu a nwernu nye risi arìohna nye be kparu iru n'apna ọbula lele aì, kọvu o méne mmehie.

¹⁶ Ngwa ma a gweru ovu siri rikne vadu ngadna oru ke Chiokike ma a nahia obirizi nū oru jeeyinu aì aka n'ige mkpa.

5

¹ Nye risi arìohna ọbula bú nye be họhiaru n'esilawuru ele badnū, be bíta a ichne ma ọ dnasni anya badnū nū ruwhnu Chiokike, naakwanū be arìohna nū nkesi kwnornu mmehie.

² O nwernu rikne gweru ovu ọma mesno ele nwée rikne nū ele máa nhne n'apna ọbula, kwnornu nū ya n'iwuhuru a zá rikne.

³ Kam kpararu, ọ naakwa arìohna kwnornu mmehie ke a, nū ke ele berere.

⁴ Ọ zá nye gweru igwugwu o chni ẹhni a nye risi arìohna, kọvu nye Chiokike sukwuru lele kpa o sukwuru Eroni.

⁵ Kpam masì, Karaìsi nyége ẹhni a igwugwu ke nye risi arìohna. Kọvu Chiokike kwuru nhne gbasiri a,

“Jì bú Nnwọ m,

M ghọlam Nda jì tna.”

⁶ Chiokike kwu kwno nū hne berere,

“Ì bú nye arìohna ọkwnukokwnu, n'ahiri ke Mèkizedeki.”

⁷ Nga Karaìsi zì búdnu n'ọwa, o jì okne ẹkwna nū anya-mini rìo arìrio a n'okpukpe nyee Chiokike, bú nye nwernu rikne ọ dphia a n'ẹnwu. Ọ nurnu okpukpe a, kwnornu nū o gwednarnū ẹhni a ẹli.

⁸ Ọ bú n'ezi nū Jizọsi bú Nnwọ Chiokike, kọvu, ọ mụhiaru obno nsnì hite n'awhnuwhnu ọ taru.

⁹ Nga be mernu a ọ ziri snam, ọ ghọru nye risi ọznohia ọkwnukokwnu ke kpakara ele joobno nsnì.

¹⁰ Chiokike mernu a ọ búru nye risi arìohna n'ahiri Mèkizedeki.

Odnahala aznū

¹¹ A nwernu agida nhne a jookwu gbasiri Karaìsi nye risi arìohna n'ahiri Mèkizedeki, kọvu a jóokwu a kwnornu nū anū jéenwe rikne ghọhia be.

¹² Kìtna, anū kwesiri ọ búru ele jeezni nhne, kọvu ọ zì kọriri mkpa be neezni anū nhne mbòm ke ikwu-ọnu Chiokike. Ọ búru nū mini-rẹma bú nhne anū zì kọriri nọonwo, ọ búo wiri siri rikne.

¹³ Kwnornu nū nye ọbula ke nọonwo mini-rẹma bú watakiri, o nwée rikne mahia nhne ọma nū nhne búo ọma.

¹⁴ Wiri siri rikne bu ke ele soru oso, bu ele be znrnu o mahja nhne zi ichne nu hne nhne oma nu nhne ojo zi.

6

¹ Ngwa ma a zne ruwgnu, a sigbasi iznizni mbom ke Karaŋsi zne nu ozu ozu, a zoma o tu ntu-eli otuhmasna nu mmehie berere hite n'ome nhne ke neegweya enwu, kweru nu Chiokike.

² Ka bu iznizni ke owu mini nu ke obniakwasi aka nu risi, nu ke ohi n'enwu lizo, nu ke ikpe zi okwnukokwnu.

³ Chiokike kwe, a jeeme nhne ka.

⁴ O bu nhne kwé omume nu ele mahjaru iwhne ke Chiokike dnahnala, jeehiehna, bu ele raturu nkesi oligwe ro, bu ele kehjaru igwe nu rime Enine Nso.

⁵ Ele ka bu ke raturu nhne oma ke ikwu-onu Chiokike ro ya nu iknernema ke owa ke jaava,

⁶ be hi nu ya dnahnala. O bu nhne jéekwe omume o kwuhnaya be, o nu lele be nookpogidne Nnwó Chiokike n'olu ogba berere, naakpasí a iwhnerne nu ruwgnu ohna.

⁷ Eli ke nwornu mini ke noozokwasi a, naamipiya mkpuru ke bnannu ele ekwu iru, o nahja ngozi Chiokike.

⁸ Kovu eli ke nooru igwnu nu akikara bnáge iru obula. Be jovu a onu, n'ipne-aznu, bekwnu jeerne a.

⁹ Kovu ele me whnrnu n'anya, o bu n'ezi a nookwu kpa, a tukwasiri ovu nu nhne kakwo mma gbasiri anu, bu ngozi ke oznohia nu mmehie.

¹⁰ Chiokike zá neeme nhne ojo. O jéechezu ernu anu ya nu ohnun'anya anu gesiri rewhna a, zi koriri neegesi hne ele ke Chiokike zi.

¹¹ A noopio ma nye obula mee koriri kпам du okwukwo, ma olile anya anu ziri kwem.

¹² A picole anu buru ele ime-mgwu, kovu anu nu lele ele kweru ekwe nwe masi ndidi tem du o nahja mkwna Chiokike kweru.

Mkwna Chiokike zi kwem

¹³ Nga Chiokike kweru Ebereham mkwna, o jiri ehni a du risi kwnornu nu o zá nye berere kakwo a.

¹⁴ O kaa, "N'ezi oka, m jogogozí j, nyee i obula masi."

¹⁵ Ebereham jiri ogologo nkasi ovu nwehja mkwna wam Chiokike kweru a.

¹⁶ Ele badnu neeji nye kakwo be du risi, neemesi oka be rikne, kam buru mbimambi oka nu odogbuta.

¹⁷ Chiokike, ma o gesi ele jeekehja mkwna, nu o jaagbanwo mkwna wam, jiri rewhna a du risi.

¹⁸ Chiokike nyernu aj mkwna a nu o du risi a, nhne lawuru ka gbánwo agbanwo

kwnornu nu Chiokike jáagha aghalaghala, aj ele gbaznenu jigidine olile anya ke zi nu ruwgnu aj aka o zi inwe gwu aj.

¹⁹ A nwernu olile anya ka lele nkno ke mkpuru ovu, ke zi jji nu kwem, ke dubnarnu aj n'aznu ikpe obnosni nu rime hne zi nso,

²⁰ hne Jizosi beru aj osno bnazne, buru nye risi arjohna okwnukokwnu n'ahiri Mèkizedeki.

7

Mèkizedeki, nye arjohna

¹ Mèkizedeki ka bu eze Salem, nye arjohna ke Chiokike ke Kakwo Nhne Dum Olu. O zuteru Ebereham nga o hiri ogwnu ke o gburu ele eze neehiehna, o gozi Ebereham.

² Ebereham nyee a otu nga nu nri nga kpakara nhne o gweyaru. Rewhna a ke mbom bu "Eze Ome Mma," ke ebo bu "Eze Salem," ke bu "Eze Udno."

³ O zá otnutnu gbaka gbasiri nda a mōbu nne a, mōbu avnrnu a, omumu a, mōbu enwu a, lele Nnwó Chiokike, o bu nye arjohna okwnukokwnu.

⁴ Le nye kwu ka, ke nda aj Ebereham nyegarú a otu nga nu nri nga kpakara nhne o luhiaru n'ogwnu.

⁵ N'ezi oka, iwu karu rumu Livaj ele arjohna nahoru rumu nda be otu nga nu nri nga. O bu n'ezi nu be bu rumu Ebereham.

⁶ Kovu Mèkizedeki híge nu avnrnu Livaj, kovu o nahoru Ebereham otu nga nu nri nga, gozi masi nye wam nahjaru mkwna Chiokike.

⁷ N'ezi, nye wam ke goziri kakwo nye wam o goziri.

⁸ Hna, badnu etekne ke jōonwu onwu narnu otu nga nu nri nga. Kovu hne berere, Mèkizedeki nye be gbarú akebne nu o jaazi tem nanarnu otu nga nu nri nga.

⁹ A jaakaa nu nga Ebereham kwuru otu nga nu nri nga, nu Livaj nye nanahoru otu nga nu nri nga kwuru ke a masi nu rime Ebereham,

¹⁰ kwnornu nu Livaj zi nu ruwho Ebereham nda a nga Mèkizedeki zuteru Ebereham.

Jizosi bu nye arjohna lele Mèkizedeki

¹¹ Be nyernu ele Izireli iwu hite n'ele arjohna Livaj. O buru nu iwu ke mernu rumu Livaj buru ele arjohna mernu badnu zu ozu, o zá mkpa nu nye arjohna berere jaava n'ahiri Mèkizedeki, buo n'ahiri Eroni.

¹² Kwnornu nu kpa be gbanwornu ele arjohna, kпам masi bu kpa be jiri gbanwo iwu kam.

¹³ Nye a nookwu oka bu Nyenwe aj, nye hiri n'avnrnu berere, o zá nye obula ke hiri n'avnrnu kam bu nye okwa arjohna.

¹⁴ A magwụ nụ Nyenwe aị hiri nụ avn'urnu Juda whuya, bụ ele Mozizi kwúge nhne ọkwa arịohna gbasiri be.

¹⁵ Ka dnornu aị anya nkarị nkarị, kwnornu nụ nye arịohna berere whýaru lele Mèkizedeki.

¹⁶ Ọ búo nye arịohna hite n'iwu ke osnusno ọmumu ke badnụ, ọvụ ọ bụ nye arịohna hite nụ iknerna bụdnụ ke kwó okwo.

¹⁷ Kwnornu nụ ọkwukwo nsọ karụ kpa, "Ị bụ nye arịohna ọkwukokwnu, n'ahiri Mèkizedeki."

¹⁸ Be sigbasiri iwu ọknani kwnornu nụ ọ zá rikne, ọ bnáge iru ọbula,

¹⁹ kwnornu nụ ọ zá nhne ke iwu mernu ozu ozu. Ọvụ a nwernu olile anya ke ka mma ke a jeeji vadu Chiokike ndundu.

²⁰ Chiokike dụru risi gbasiri a, ele berere bụru ele arịohna hne be dúge risi.

²¹ Jizọsi bụ nye arịohna Chiokike dunnu risi, kwu masị nhne gbasiri a,

"Jihova dụru risi, ọ jáalahna aznụ, 'Ị bụ nye arịohna ọkwukokwnu.'"

²² Kwnornu ọdu risi ka, Jizọsi bụ mbi-mambi ke ọgba-njọ-ẹhni ke kakwo mma.

²³ Ele arịohna wam zị agịda kwnornu nụ be nw'urnu ọnwu ke mernu be nwée rikne dazigidne lele ele arịohna.

²⁴ Ọvụ Jizọsi zị bụdnụ ọkwukokwnu, ẹrnu ke nye arịohna a zá naagbanwo agbanwo.

²⁵ Kam kpayaru, ọ nwernu rikne ọ znohia kpm kpm bụ ele hiri n'aka a vakwnusi Chiokike, kwnornu nụ ọ zị bụdnụ ọkwukokwnu n'ọrionu be aririo nụ ruwhnu Chiokike.

²⁶ A nwernu nye risi arịohna nụ kpa, nye zị nsọ, nwée ntubo, nye mmehie zila nụ rime, nye zị ichne hne ele badnụ ele mmehie zị, nye be gwelizọru olu kakwo kpakara oligwe.

²⁷ Jizọsi nuna lele ele risi arịohna ele berere, ọ zá naakwa arịohna kpakara ọbochi kwnornu mmehie ke a nụ ke ele Izireli. Ọvụ ọ kwarnu otu arịohna kpọi ke zuru ọhna nga o gweru ẹhni a kwa arịohna.

²⁸ Kwnornu nụ iwu mernu ele badnụ ele zúge ozu ele risi arịohna, ọvụ ikwu-ọnu wam Chiokike jiri dụ risi ke sno iwu wam n'aznụ mernu Nnwọ wam nye zuru ozu ọkwukokwnu.

8

Jizọsi bụ nye risi ọgba-njọ-ẹhni ikne

¹ Ka bụ risi kpakara nhne a nookwu, a nwernu nye risi arịohna nụ kpa, nye dazị n'akarikwnunga ngadna eze Chiokike n'oligwe.

² Nye arịohna nụ kpa zị n'ọrnu ẹrnu nye arịohna nụ Hne Kakwo Nsọ n'oligwe, bụ ezi

Ọro-Èka Nsọ ke Nyenwe aị wuru, ọ búla badnụ.

³ Nye risi arịohna ọbula jaakwa arịohna nụ nkesi nụ ruwhnu Chiokike, ọ zị mkpa nụ nye ka jeenweriri nhne o jeeji kwa arịohna.

⁴ Ọ bụru nụ ọ zị n'owa, ọ jóobu nye arịohna rja rja, kwnornu nụ agịda ele arịohna zị ele naakwa arịohna lele kpa Iwu Mozizi kwuru.

⁵ Be neezne izi n'Ọro Nsọ ke nhne atụ lele ke zị n'oligwe. Lele kpa Chiokike kannu Mozizi nga o noowu Ọro-Èka Nsọ, "Whnụ nụ i mernu kpakara nhne lele kpa be gesiri i be n'olu rugwu."

⁶ Ọvụ ẹrnu ọkwa arịohna ke Jizọsi kakpa ke ele nr'urnu ẹrnu nụ mkpururu iwu ọknani. Ọgba-njọ-ẹhni ke ọ gbarụ n'esilawuru Chiokike nụ ele badnụ kakwo mma, kwnornu nụ o gwuzogwu n'olu mkwna ke kakwo mma.

⁷ Ọ bụru nụ ọgba-njọ-ẹhni ke mbom zuru ozu, mkpa ke ẹbo be znéne akpa aị.

⁸ Ọvụ Chiokike whn'urnu nụ ele badnụ zúge ozu, ọ kaa,

"Ọbochi vawa, bụ nhne Jihova kwuru, nga me nụ ọro Izireli nụ ọro Juda, jaagba njọ-ẹhni ikne.

⁹ Ọ jóonu lele njọ-ẹhni, me nụ ele nda be gbarụ, n'ọbochi me jiri be n'aka m dọhia be n'eli Ijipiti, be kwnátala ovu nụ njọ-ẹhni wam me nụ be gbarụ, m lemernu m be anya, bụ nhne Jihova kwuru.

¹⁰ Kịtna, ka bụ njọ-ẹhni me nụ ele Izireli jaagba nụ ọbochi ke jaava, bụ nhne Jihova kwuru.

M jeeyisi iwu m nụ rime echiche be, m jaagbakwasị be n'olu mkpoma be, m jọoburu Chiokike be, be jọoburu ele ke m.

¹¹ Ọ zá nye n'esilawuru be ke jeezni ibne a, mọbu kanu nwene a, 'Mahia Jihova,' kwnornu nụ kpakara be jaamahia m, hite nụ nye zị matị dụ nye ezi.

¹² M jaagbarunu be ọgahie be, m jeechenwanya mmehie be berere."

¹³ Hne o nookwu ọka ọgba-njọ-ẹhni ikne, Chiokike mernu ma ke mbom ziri ọknani, nhne ọbula mernu ọknani jodoka odoka, whume masị.

9

Okpenu Chiokike n'owa

¹ Ọgba-njọ-ẹhni ke mbom ke Chiokike nụ rnu Izireli gbarụ nwernu iwu osnusno okpukpe n'oro nsọ ke ọwa.

² Be wuru ọro okpukpe ke mbom ke bụ hne zị nsọ. Nụ rime ọnu ọro ke mbom, nhne zị nụ

rime a bu nhne be bita tonji nu ikpechi nu bredi arìohna Chiokike.

³ N'aznu ikpe obnosni ke ebo bu hne be kwu Hne Kakwo Nso.

⁴ Nhne zi nu rime a bu ojo golu ke isensi, nu Igbe Ogba-Njo-Ehni be woru golu. Nu rime igbe wam, nhne zi a bu otu ite golu mana, nu mkpara Ero ni ke waru okwukwo nu mbadamba akaworugwu lawuru ke be gbakwasiri iwu wam n'olu be.

⁵ N'olu igbe, ele enine izi be wuru owu zi igwugwu be kwu Cherubim gbasaru akankwu be kpusnirni ikpechi oru. A jeenwe rikne kowa kpa be kitna.

⁶ Nga be bita kworu kpakara nhne, ele arìohna naabna nu hne zi nso kpakara obochi nornu ernu be.

⁷ Kovu okwolem nye risi arìohna naabna nu Hne Kakwo Nso n'aznu ikpe obnosni wam otu mgba n'awha. O jeeji onarna ke o jeeji kpusni mmehie ke a nu mmehie ele Izireli mernu nu oma ama.

⁸ Enine Nso neegesi kpa Oro-Eka Nso ke mbom nu omen'eli a gwuzo koriri, apna be jeeji naabna nu rime Hne Kakwo Nso mesnirni emesni.

⁹ Ka bu nhne neegesi n'ige ka, nu nkesi nu arìohna be jiri kwanu Chiokike arìohna jeenwe rikne mee ele neegweya nkesi arìohna zu ozu.

¹⁰ Ka bu wiri nu manya nu mmemem ke onusna, kpakara omen'eli ele ka bu nhne anya nonwhnu joogwuzo tem du ige Chiokike jaagbanwo be.

Ovnarna Karaïsi

¹¹ Kovu Karaïsi varu lele nye risi arìohna nhne ke ka mma ke zi hna, Oro-Eka Nso ke o nonnu ernu nu rime a kakpa, zu masi ozu. O buo ke be jiri aka wu, o buo ke be keru eke n'owa ka.

¹² Nga Karaïsi bnazneru nu rime Hne Kakwo Nso, o bnarnu otu mgba kpoi. O jile onarna owu mbo be nnwo ehni kwa arìohna, kovu o ji onarna ke a gbahja kpakara aj okwnukokwnu.

¹³ Onarna owu nu ehni nu nnwo ehni nu retnu ke be wekwasiri ele zila richna mernu be ziri richna n'olu ehni.

¹⁴ O ko buru onarna Karaïsi, nye hiri n'Enine Nso okwnukokwnu gweru ehni a kwa arìohna nwée oru nu ruwhnu Chiokike, joosnusnama akoniche aj whoga n'ernu ojo ke jaakpaya enwu, ma a kpenu Chiokike ke zi budnu.

¹⁵ Kam kpararu, Karaïsi jiri buru nye agbata ke ogba-njo-ehni ikne, ma ele Chiokike sukuru nwehja mkwna o kehja nhne kwó okwo. Kwnornu nu o nwurnu enwu ma o zi kpa o gbahja be nu rime awhnuwhnu ke mmehie be mernu nu mkpururu ogba-njo-ehni ke mbom.

¹⁶ Hne iwu oke mkpe zi, be jeegesiri nu nye wam gbaru a nwurnu onwu.

¹⁷ Kwnornu nu iwu oke mkpe bu nhne etekne hne nye gbaru a zi budnu, kovu o jaabna n'ernu nga nye gbaru a nwurnu enwu.

¹⁸ Ka bu nhne kpararu nu ogba-njo-ehni ke mbom jiri onwusi onarna gwuzosiri rikne.

¹⁹ Kwnornu nu nga Mozizi kannu ele Izireli kpakara nhne iwu wam kwuru, o gweru onarna nnwo ehni gwagidne a mini, gweru hisopu nu wuulu ihie whesi n'okwukwo iwu wam nu kpakara ele badnu.

²⁰ O kaa, "Anu bno nsni, ka bu onarna ogba-njo-ehni ke anu nu Chiokike gbaru, anu bita a."

²¹ Kpam masi, o whesiri Oro-Eka Nso onarna nu kpakara agbugba nu nhne be ji zne izi.

²² N'ezi oka, o gwnarnu matì onarna mee kpakara nhne ziri snam n'iwu, kwnornu nu hne be wusage onarna, ogbaru mmehie zila.

Arìohna Karaïsi noovume mmehie

²³ Kam kpararu, Oro-Eka Nso ke owa ka nu kpakara nhne zi nu rime a, bu oyiyi nhne zi n'oligwe, bu nhne be jeeji onarna nonosu, kovu nhne ke oligwe n'iwuru a piuru arìohna ke kakwo mma karu onarna anohia.

²⁴ Kwnornu nu Karaïsi bnage nhne zi nso be jiri aka wu, ke bu oyiyi ke okwnamarna nhne. Kovu o bnazneru oligwe hne o gwuzo nu ruwhnu Chiokike nu risi aj.

²⁵ Nye risi arìohna ele ju naabna Hne Kakwo Nso otu mgba n'awha gweru onarna anohia. Kovu Karaïsi znege o ji ehni a kwa arìohna agida ige.

²⁶ O buru kpam, Karaïsi znernu ata awhnuwhnu agida ige hite n'opanizo okike owa. Kovu o whuyaru otu mgba kpoi kwnornu aj n'okwukwo ige ka, gweru ehni a kwa arìohna ma o vume mmehie.

²⁷ Ka bu ezi oka, badnu jonwuriri otu mgba, omekwo, ikpe Chiokike sno a.

²⁸ Kpam masi, be jiri Karaïsi kwa arìohna otu mgba o vume mmehie agida ele badnu, o jaava ke mgba lawuru nonhia ele neele anya a hne mmehie zila a.

10

Karaïsi kwaru arìohna zuru ohna otu mgba

¹ Iwu wam bu enine nhne oma ke jaava, o buo nhne wam, kam kpararu, o nwée rikne hite nu arìohna ke be naakwa ige obula mee ele naava o kpo risi eli zu ozu.

² O buru nu ele neekpenu Chiokike zi richna nu rime ovu, ikpe mmehie ba mana be. Kpakara okwa arìohna znernu okwome.

³ Kòvu kpakara arìjohna wam bù nhne ke neechwanyanụ be mmehie be hite n'awha dụ n'awha.

⁴ Kwnornu nụ ọvna ehi nụ owu nwé rikne vume mmehie.

⁵ Kam kpararụ nga Karaisi varụ n'owa, ọ karụ,

"Arìjohna nụ nkesi ruwhnu ọma másige i, kovu i bitannu m anọ-ehni o bnonu i nsi.

⁶ Ovu zá nọso i n'ọnu kwnornu arìjohna ọkpone bẹkwnu mọbu arìjohna mmehie.

⁷ M kaa, 'Chiokike, le, m valẹm o mee nhne i pioru me mee, lele kpa be gbarụ nhne gbasiri m n'okwukwo nsọ.'

⁸ Ke mbọm, ọ karụ, i pìole arìjohna nụ nkesi ruwhnu ọma, mọbu arìjohna ọkpone bẹkwnu mọbu arìjohna mmehie, ọ bù n'ezì nụ iwu wam karụ be mee kpam.

⁹ O kaa, "Chiokike, le, m valẹm o mee nhne i pioru me mee." O gwemernu nhne ke mbọm ma ọ zì kpa o gwuzote nhne ke ebo.

¹⁰ Kwnornu nụ Jizọsi Karaisi mernu nhne Chiokike pioru o mee, ọ snọsnamarnu mmehie aì hite n'arìjohna ke o jiri ehi a kwa otu mgba ke zuru ọhna.

¹¹ Nye ọkwa arìjohna ọbula noogwuzo kpakara ọbochi nọornu ọnu a, naakwa otu arìjohna agida ige. Kovu kpakara arìjohna ka nwé rikne noovume mmehie.

¹² Kòvu nga nye arìjohna ka kwarụ arìjohna ke zì ọkwukokwnu kwnornu mmehie, ọ daziri ehi n'akarikwungba Chiokike.

¹³ Hite n'ige wam, ọ zì neese ige Chiokike jaabita ele irno a lele nhne ọgbakwasi ọchi a.

¹⁴ Hite nụ otu arìjohna, o mernu ele zì snam hite nụ mmehie zu ozu ọkwukokwnu.

¹⁵ Enine Nsọ naaganụ aì akebne ka hite nụ nhne o kwuru nù mbọm,

¹⁶ "Ka bù njo-ehni ke me nù be jaagba, n'ọbochi ke jaava, bù nhne Jihova kwuru,

m jeeyisi iwu m nù rime ovu be, m jaagbakwasi be n'echiche be."

¹⁷ O kaa kwno berere, "M jéechenwanya aruru-ehi be, nù mmehie be berere."

¹⁸ Kịtna, ọ gbarunnu be kpakara mmehie be, arìjohna berere zá kwnornu mmehie.

¹⁹ Kam kpararụ, rụmu nda m, a nwernu ovu siri rikne ọ bnazne nù Hne Kakwo Nsọ hite n'ovna n'arìjohna Jizọsi.

²⁰ O gbamannụ aì apna ikne ke zì bụdnu hite n'ikpe obnosni wam ke bù anọ-ehni a.

²¹ A nwernu nye risi arìjohna ke kakwo, nye neelegidne ọro Chiokike anya.

²² Ngwa ma a gweru mkpoma zì rịchna nù ezi ọkwata ọvu, nù ovu ikpe m'ana vakwnusi Chiokike, ya nù ehi be jiri mini zì rịchna snọsnama.

²³ Ngwa ma a knetasi olile anya ke ọkwata ovu aì aka rikne, kwnornu nù nye kweru aì mkwna jaabita mkwna o kweru.

²⁴ A gbalì mee nhne joovulizọ ọwhun'anya n'ovu ibne aì hite n'ọnu ọnu ọma.

²⁵ A ghása ọgbako rụmu nda n'otu lele kpa agwna ele badnụ neeme. Kòvu a kwnagidne ibne aì ke kakwo kpa ọbochi wam naava ndundun.

²⁶ O buri nù a jaazi kọriri neeme mmehie hne a n'urnu ezi ọka wam, ọ zá arìjohna berere be jaakwa kwnornu aì.

²⁷ Kòvu nhne ke gwnarnụ bù olile anya ke tị ogwnu ke ikpe, ya nù ke okne bẹkwnu ke jeerne ele neemeigidne Chiokike.

²⁸ Nye ọbula ke dnarnụ Iwu Mozizi nwurnu ọnu hne badnụ lawuru mọbu ọto gbagidnenu a akebne, be dónnu a obirizi.

²⁹ Anụ le kpa ikpe wam jaazi rikne bù awnụwhnu nye wam jaata bù nye lednarnụ Nnwọ Chiokike anya, nye kpóge ọvna ọgba-njo-ehni ke Chiokike nhne, ke snọsnamarnu mmehie a, nye lednarnụ Enine Nsọ ke oru anya.

³⁰ Kwnornu nù a magwụ nye karụ, "Mawa nwe mmegwahia, m jeemegwnarnụ." Jihova kwuru berere, "Jihova jeekpe ele ke a ikpe."

³¹ O bù nhne tị ogwnu ọ dnabna n'aka Chiokike ke zì bụdnu.

³² Anụ chenwanya ọbochi ele ke wheru ewhe kpa anụ snurnu ovu kpa iwhe Karaisi m'ukwasiri anụ nù rime kpakara awnụwhnu.

³³ Agwna ige anụ buri ele be kpasiri iwhe-erne n'ọhna, ige berere anụ dasiri ele berere be neemegbu emegbu n'ikwnu.

³⁴ Anụ dónnu ele zì n'ikelu obirizi. Nga be nahoru anụ nhne anụ nwernu, ovu sọru anụ n'ọnu kwnornu nù anụ magwụ nù anụ nwernu ẹkwnu ke jaazi ọkwukokwnu n'oligwe.

³⁵ Anụ tũwhu ovu osi rikne anụ, o jeenwe ogwo ọnu zì agida.

³⁶ Anụ snuta ovu ma anụ nwernu rikne mee nhne Chiokike pioru, nahia masi nhne o kweru nù mkwna.

³⁷ Kwnornu,

"Ige matì,

nye wam jaava bù nye jaava, o jóogbu ọkwnu.

³⁸ Kòvu, nye mee mma ke m jeehi n'ọkwata ovu ziri bụdnu, ọ buri nù nye ọbula lahna aznụ, nhne gbasiri a jóoso m ovu n'ọnu."

³⁹ Kòvu a bụo ele naalahna aznụ, whu etekne, a bù ele kweru dụ n'oznohia mkpuru ovu.

11

Ele dikne ke ọkwata ovu

1 Okwnata ovu bu odnabneru nu nhne a neele anya, nu otukwasi ovu nu nhne ke a whnuge anya zi.

2 Hite n'okwnata ovu, ele gbaka nahjaru ruwhnu oma n'aka Chiokike.

3 Hite n'okwnata ovu, a ghohiaru nu Chiokike jiri ikwu-onu a ke owa, ke kpayaru, nhne a nqowhnu anya hi nu nhne a whnuge anya whuya.

4 Ebeli jiri okwnata ovu kwanu Chiokike arjohna ke ka arjohna Keni nwene a mma. Hite n'okwnata n'ovu a, Chiokike gbaru akebne nu o bu nye mee mma kwnornu nu Chiokike nahoru nkesi a. Hite n'okwnata n'ovu a, o zi koriri nookwu oka o bu n'ezi nu o nwurnu onwu.

5 Hite n'okwnata ovu, Inoku nwuna onwu, kovu Chiokike kwururu a nu budnu, be whnuna a, kwnornu nu Chiokike kwururu a. Kovu su Chiokike kwururu a, be gbaru akebne a nu o mernu nhne sori Chiokike ovu n'onu.

6 Hne okwnata ovu zila, be nwee rikne mee nhne joso Chiokike ovu n'onu. Kwnornu nu nye jaavakwnusi Chiokike jeekwerjiri nu Chiokike zi, nu o bu nye nookwu ele noopiosi a rikne ogwo ernu.

7 Hite n'okwnata ovu, Noa turu ogbo nga Chiokike doru a aka nu nsnj nhne ke zi nu ruwhnu, o whnuna anya, o tu ogbo o jiri zngha ele oro a. O marnu owa ikpe, kehja ome mma hite n'okwnata ovu.

8 Hite n'okwnata ovu, Ebereham bnornu nsnj nga Chiokike sukuru a zne eli ke o jeekhja nu mkwna, o whoga neezne hne o ma.

9 Hite n'okwnata ovu, o wuru n'eli Chiokike kweru a mkwna lele nye izne. O wuru n'oro-eka, ya nu Aziki nu Jekopu, ele ya nu be kehjaru otu mkwna wam.

10 Kwnornu nu Ebereham neele anya eli ke nwernu ntj-eli, ke Chiokike bu nye nka nu nye wuru a.

11 Hite n'okwnata ovu, Sera nahjaru rikne o tu rime nga o wheru ige, o bu n'ezi nu o nwee nnwo* kwnornu o karu nu o bu nye kwesiri okwnata ovu bu nye kweru mkwna.

12 Hite n'otu badnu ka, Ebereham, o bu n'ezi o nu lele nye nwurnu onwu, hne avurnu a hna lele mbj ke oligwe nu lele rjna ke zi nu ngeri osimini hna ke nwee onu ogwugnwu.

13 Kpakara ele ka nwurnu nu rime okwnata ovu. Be nahjage nhne Chiokike kweru mkwna, kovu be whurnu be hite nu hne zi ikere, gweru be, kwuhja nu be bu ele izne nu ele neewhe ewhe n'owa.

14 Nga ele badnu nookwu kpa, ka neegesi nu be neele anya eli ke aka be.

15 N'ezi oka, o buru nu be naari oriri gbasiri eli ke be hiri whuya, be znernu alahna aznu.

16 Kitna, be neele anya eli ke ka mma, eli ke oligwe. Kam kpayaru, iwhnerne za neeme Chiokike ma be sukwa a Chiokike be, kwnornu nu o bitannu be otu eli.

17 Hite n'okwnata ovu, Ebereham gweru Aziki kwa arjohna nga Chiokike kparu a iru. Nye wam nahjaru mkwna wam jiri otu nnwo kpj o nwernu kwa arjohna.

18 O bu n'ezi nu Chiokike karu, "Hite nu Aziki, i jeenwe agida rumu."

19 Ebereham kweru nu Chiokike nwernu rikne mee Aziki hi n'enwu lizo, n'ezi oka, o nahoru nnwo a lele nye hi n'enwu lizo.

20 Hite n'okwnata ovu, Aziki goziri Jekopu nu Isj, nookwu oka gbasiri ngozi ke zi nu ruwhnu.

21 Hite n'okwnata ovu, Jekopu goziri rumu Josefu lawuru nga o nonwu enwu. O dnabneru nu mkpara a kpj risi eli nyee Chiokike.

22 Hite n'okwnata ovu, Josefu nga o nonwu enwu kwuru nhne gbasiri okwnehala ke rumu Izireli n'eli Ijipiti, nyee be iwu gbasiri okpukpu a.

23 Hite n'okwnata ovu, ele muru Mozizi tugwaru a enwa eto kwnornu nu o bu nnwo zi ichne, ogwnu iwu eze tula be.

24 Hite n'okwnata ovu, Mozizi, nga o sopiyaru nu badnu, kwela be sukwa a nnwo adna Fero.

25 O snornu rumu Chiokike ta awhnuwhnu kanu a mma kakwo o nwe ovu oso n'onu ke mmehie ige mati.

26 O gwurnu nhne iwhnerne ke Karaisi nhne zi okne onu ahja kakwo kpakara ekwnu ke Ijipiti, kwnornu nu o neele anya ogwo ernu ke zi nu ruwhnu.

27 Hite n'okwnata ovu, o sigbasiri eli Ijipiti, o tula ogwnu ovu owe ehni ke eze, kwnornu nu o gwuzoru kwem lele nye whurnu Chiokike wam be whnu anya, anya.

28 Hite n'okwnata ovu, o miteru Iriri Ogawhe nu onarna be wesaru ma enine izi enwu wam ke gburu kpakara nnwo mbom be muru gharu o gbu nnwo mbom ele Izireli.

29 Hite n'okwnata ovu, rumu Izireli wheru Osimini Ihie lele eli etekne, nga ele Ijipiti pioru ma be whe, mini riri be.

30 Hite n'okwnata ovu, oghiri mkpj Jeriko dnarnu, nga ele Izireli gbaru a gburugburu obochi esau.

31 Hite n'okwnata ovu, nwerinya ewhere Rehabu ziri budnu, be gbukotala ya nu ele irno Chiokike, kwnornu nu o tugwaru ele znernu o nyokahja eli wam.

32 Ndaa nhne me jookwu, kwnornu nu ige zila me jookwu nhne gbasiri Gidiqni, nu

* 11:11 mbu hite n'okwnata ovu, Ebereham ghoru nda, o bu n'ezi o mernu okno badnu, Sera n'whuru a nwee nnwo

Barakị, nụ Samsjini, nụ Jẹfita, nụ Devidi nụ Sameli, nụ kpakara ele owhnurninya.

³³ Ele hiri n'okwnata ovu lugbu ẹli-eze, rnụ ẹrnu oma, nahia mkwna, kpusni ọnu odum,

³⁴ kpachni bẹkwnu noonwu onwu, gbanahoru ama-ogwunu, be nwée rikne, kọvu be ghoru ele dikne, ele dikne n'ogwunu, chihala ele ogwunu ẹli berere.

³⁵ Ele rinya nahiaru ele ke be hiri n'ẹnwu lizo. Be taru ele berere awhnụwhnu, kọvu be kwéle be dọhia be, ma be lizo n'ẹnwu ke ka mma.

³⁶ Be mernu ele berere nhne rumu, pnia be hna, owe, be knernu ele berere eriri, yisi be n'ikelu.

³⁷ Be turu be akaworugwu, be kwobiri be ẹbo, be jiri ama-ogwunu gbu be, be woru akpukpo owu nụ atnuru bghari, be ghọ ele mboni, be kpakna be ẹhni, megidne be.

³⁸ Ele ọwa kwésile ele ka. Be gaghari lele ele nwée ọro n'eli-ikpa nụ rugwu matị, be wuru nụ rime mkpewu nụ ọnunu ẹli.

³⁹ Kpakara ele ka nwernu otnutnu oma kwnornu n'okwnata ovu be, kọvu be náhiage mkwna wam.

⁴⁰ Chiokike bitannu aị nhne ka mma. Chiokike mernu ma aị nụ be zukoṭa, ma a buru ele zuru ozu n'otu.

12

Chiokike naapnia rumu a

nhne

¹ Kam kpayaru, hne a nwernu agida ele akebne gbaru aị gburugburu, a tuwhu kpakara nhne ke noobnosni aị nụ mmehie ke naatakwnusi n'ẹhni aị, ma a gweru ọkasi mkpoma gba ẹso ke zị aị nụ ruwhnu.

² A neelegidne Jizosi anya, nye turu ntụ-ẹli nụ nye mekwakworu okwnata ovu aị. Nye kwnornu ovu ọso n'ọnu ke zị a nụ ruwhnu li nhne igbugbu ke ogba, gweme iwghnerne, ọ daziri ẹli kịtna n'akarikwnunga ngadna eze Chiokike.

³ Anụ tule nhne gbasiri nye wam ke liri nhne igbugbu ke ogba nụ omegidne ke ele mmehie, rikne bọ gwu anụ, anụ dna n'apna.

⁴ Nụ rime ogwunu anụ nọolu megidne mmehie, anụ yóluge ogwunu dụ n'owusa ọvnarna anụ n'ẹnwu.

⁵ Anụ chezuru ikwu-ọnu ọkasi ovu wam ke Chiokike nookwu anụ lele rumu, “Nnwọ m, i lédna ọdo aka nụ nsni ke Jihova anya, ovu lákwadia anụ mini nga o bigbọru anụ.

⁶ Kwnornu nụ Jihova naata ele ọ whnurnu n'anya awhnụwhnu, naapnia nye obula o kwuru nnwọ a nhne.”

⁷ Anụ nabnarnu awhnụwhnu anụ naata lele ọdo aka nụ nsni ke nda nọodo rumu a.

Anụ whnulele nnwọ ke nda a zá nọodo aka nụ nsni sa?

⁸ O buru nụ Chiokike zá nọodo anụ aka nụ nsni lele ele berere, anụ búo rumu a, kọvu anụ bú rumu ọyi.

⁹ Nda aị k'owa nọodo aị aka nụ nsni, a noobnonu be nsni. A kwesiri o bnonu Nda aị ke enine aị nsni karukwo ma a ziri budnu.

¹⁰ Nda aị k'owa naapnia aị nhne ige matị n'ovu ọso n'ọnu be, kọvu Chiokike naapnia aị nhne kwnornu mbnarna ke aị, ma a snornu a kehia ọzi nsọ a.

¹¹ O zá ọdo aka nụ nsni obula ke nọoso ọso n'ige wam, kọvu ọ zị igbugbu. Omekwo, ọ mụpiya ezi mkpuru ke ome mma nụ udno nụ rime ele gawheru nụ rime a.

¹² Kam kpayaru, anụ mee aka ke dnarnu adna lizo nụ mkpnerne ọchi ke nwée rikne gwuzoru kwem.

¹³ Anụ zne izne n'apna ke snirni asni ọ zị ele nwée ọchi ba dna n'apna, tnunuma, be gwọ be.

O ọdo aka nụ nsni

¹⁴ Gbalị ma jị nụ kpakara ele badnu ziri n'udno, ziri masi nsọ, kwnornu nụ ọ zá nye joowhnu Chiokike anya sụ ọ zila nsọ.

¹⁵ Anụ whnụ nụ ọ zá nye dnahalaru n'oru ke Chiokike. O zị nye nụ lele ẹgwugwunu luga nlulu n'esilawuru anụ ke joovuyanu anụ mkpa, hite nụ a mejo agida badnu.

¹⁶ Anụ whnụ nụ ọ zá nye neeme ọyi mọbu nye zá nọosonu Chiokike anya lele Iso, nye kwnornu otu mgba wiri re ọnodi ọpnarna a.

¹⁷ Anụ mahiaru, omekwo, o pioru ọ nahoru ngozi nda a, oghere zila kwnornu nụ o nwée rikne gbanwo nhne o mernu, ọ bú n'ezì nụ o jiri anya-mini ẹkwana piosi ngozi wam rikne.

¹⁸ Anụ váduge nụ rugwu ke anụ jeemetu aka, lele rugwu Saịna ke neerne bẹkwnu, nụ ọchichiri, okne ogwunu nụ okne ruwhere,

¹⁹ nụ ọdida ke okwodu nụ ọdida nkọli ke ele nurnu a, riasno nkọli wam kwúma berere.

²⁰ Kwnornu nụ be gwúzolige iwu wam ke karu, “O búbedi anọhia vadu rugwu wam metu a aka, be gweru ara tugbu a.”

²¹ Nhne Mozizi whnurnu zị okne ogwunu, ọ kaa, “Ogwunu turu m, ẹhni nọoznu m biri biri.”

²² Kọvu anụ vaduru rugwu Zayoni, bú Jeruselem ke oligwe, ẹli-ọhna ke Chiokike ke zị budnu, nụ ele enine izi, ọ zá nye nọogwnuli ọnu, ele neetne eri ọnwudna.

²³ Anụ vadulem ogbako Chiokike ke rumu be beru ọsno mụ, ele be gbaru rẹwhna be n'oligwe, vakwnusi masi Chiokike, nye neekpe kpakara ele badnu ikpe, nụ enine ke ele ome mma zuru ozu.

²⁴ Anụ vakwnusiri Jizosi, nye ibno ke ogbanjo-ẹhni ikne, nụ ọvnarna ke owghesa, ke

nookwu nhne ke ka mma kakwo ọvna narna Ebeli.

²⁵ Anya ụ́ ụ́ ẹ́lì, anụ́ whnụ́ nụ́ anụ́ gháruła ọ́ nurnu nhne nye wam nookwu. Ọ́ buru nụ́ ikpe marnụ́ ele wam bnóné nsnị́ nhne nye wam zị́ nọ́do be aka nụ́ nsnị́ n'ọ́wa kwuru, ndaa kpa a jaagbanahọ́ru, ọ́ buru nụ́ a bnóné nsnị́ nhne nye wam zị́ n'oligwe nọ́do aị́ aka nụ́ nsnị́ nookwu?

²⁶ Nkọ́lì a mernu ọ́wa znú́ biri biri n'ige wam, kọ́vu kítna, o kweru mkwna kaa, "Berere kwno, m jeeme ọ́ búo ọ́wa kọ́pì znú́ biri biri, kọ́vu oligwe masị́."

²⁷ "Berere kwno" neegesi nụ́ o jeegweme kpakara nhne nọ́oznu biri biri bú́ nhne be keru eke, ma nhne ke źa nọ́oznu biri biri gwuzosi rikne.

²⁸ Hne a nanahọ́ru ẹ́lì-eze ke źa nọ́oznu biri biri, a tũnu Chiokike mmamma, kwnakwu a kpa ọ́ jọ́oso a n'ọ́nu, nụ́ ogwnu nụ́ ọ́so anya.

²⁹ Kwnornu nụ́ Chiokike bú́ ẹ́kwnu neerne erne.

13

Kpa be wu ụ́dnu

Jaamasị́ Chiokike

¹ Anụ́ nọ́whnu ẹ́hni anụ́ n'anya lele rụ́mu nda.

² Anụ́ chézu elekọ́ta ele izne, kwnornu nụ́ agwna badnụ́ lekọ́taru enine izi hne be máa.

³ Anụ́ chenwanya ele zị́ n'ikelu lele nụ́ anụ́ nụ́ be zị́ n'ikelu. Anụ́ chenwanya ele naata awhnụ́whnu lele nụ́ anụ́ nụ́ be sno naata awhnụ́whnu.

⁴ Anụ́ sọ́bisinu ọ́lulu nzi nụ́ nnwerne. Anụ́ méru ọ́kpata nzi nụ́ nnwerne kwnornu nụ́ Chiokike jeekpe ele neeme ọ́yì nụ́ ele ewhere ikpe.

⁵ Anụ́ kwé ọ́whnun'anya iwai nẹ́echi mkpọ́ma anụ́, nhne anụ́ nwernu jì anụ́ rụ́who, kwnornu nụ́ Chiokike karụ́, "M jáaghasa anụ́ rị́a rị́a, m jáasa anụ́ aka rị́a rị́a."

⁶ Kam kpayarụ́, a jì ovu siri rikne kaa, "Jihova bú́ nye neenyinu m aka, ogwnu źa nọ́otu m nhne badnụ́ jeeme m."

⁷ Anụ́ chenwanya ele risi anụ́ wheru ewhe, ele kwunnu anụ́ ikwu-ọ́nu Chiokike, kpa be wuru ụ́dnu be, kpa be nwurnu ẹ́nwu, anụ́ snornu ọ́kwata ovu be.

⁸ Jizọ́sì Karaị́sì zị́ kpa ọ́ zì, ekile, tna, ụ́ ọ́kwnu kokwnu.

⁹ Anụ́ kwékwadia iznizni ikne ọ́bula zì ichne ichne kwnapụ́ anụ́ n'apna. Ọ́ ka mma mkpọ́ma aị́ gwuzosi rikne n'oru Chiokike, ọ́ búo nụ́ omen'ẹ́lì wiri zì ichne ichne ke źa naabnanụ́ ele neeri a mbnarna ọ́bula.

¹⁰ A nwernu ojo ke ele naakwa arị́ohna n'Ọ́ro-Èka Nsọ́ nwéé rikne ri nhne zì nụ́ olu a.

¹¹ Kwnornu nụ́ nye risi arị́ohna neegwebna ọ́vna narna anọ́hia be gburu lele arị́ohna mmehie nụ́ rime Hne Kakwo Nsọ́, kọ́vu be nọ́okporne ọ́kpna anọ́hia wam ẹ́kwnu n'aznụ́ ẹ́lì-ọ́hna.

¹² Kam kpayarụ́, Jizọ́sì tarụ́ awhnụ́whnu n'aznụ́ ẹ́lì-ọ́hna ma o gweru ọ́vna narna a ẹ́lì be badnụ́ nsọ́.

¹³ Ngwa ma a znekwnusi a n'aznụ́ ẹ́lì-ọ́hna vuru masị́ iwherne a.

¹⁴ Kwnornu nụ́ a nwéé ẹ́lì-ọ́hna ke jaadazigidne hna, kọ́vu a neele anya ẹ́lì ke naava nụ́ ruwhnu.

¹⁵ Ngwa ma a zrnarị́ Chiokike ige ọ́bula, ma ọ́ buru arị́ohna hite nụ́ Jizọ́sì, ka bú́ nhne nkesi ke hi aị́ n'ovu, hite n'ọ́nu nookwuhị́a nụ́ ọ́ bú́ Nyenwe aị́.

¹⁶ Anụ́ chenwanya, neeme nhne ọ́ma ya nụ́ neekesi ele badnụ́ nhne anụ́ nwernu, kam bú́ arị́ohna ke nọ́oso Chiokike ovu n'ọ́nu.

¹⁷ Anụ́ bno nsnị́, anụ́ ẹ́lì anụ́ nụ́ mkpururu ele risi anụ́, kwnornu nụ́ be neelegidne anụ́ anya lele ele jaasa aji jì nụ́ ruwhnu Chiokike, ma be rny ẹ́nu be n'ovu ọ́ma, ọ́ búo nụ́ ovu owe ẹ́hni, ke źa bnanụ́ anụ́ mbnarna ọ́bula.

Obekwu ikwu ipne-aznụ́

¹⁸ Anụ́ kpenu aị́ okpukpe. A magwụ́ nụ́ ovu aị́ zì rị́chna kwnornu nụ́ a piuru o mee nhne buru ọ́ma ige ọ́bula.

¹⁹ M naarị́asno anụ́ kpenu m okpukpe ma m vakwnusi m anụ́ wara wara.

²⁰ Kítna, Chiokike udno nye mernu Nyenwe aị́ Jizọ́sì hi n'ẹ́nwu lizọ́, nye bú́ Okne Nye Znú́ Aturnu wam, hite n'ọ́vna narna ogbanjọ́-ẹ́hni kwó okwo,

²¹ nyee anụ́ kpakara nhne buru ọ́ma o mee echiche a. O gweru masị́ aị́ mee nhne masị́ri a, hite nụ́ Jizọ́sì Karaị́sì nye nwe igwugwu ọ́kwnu kokwnu. Amjìm.

²² Rụ́mu nda m, anụ́ bno nsnị́ n'ikwu-ọ́nu ezni ke me kwuru, kwnornu nụ́ ọ́kwukwo me gbarụ́ źa ogologo.

²³ Anụ́ mahị́a nụ́ nnwọ́ nda aị́ Timoti whụ́yalam n'ikelu. Ọ́ buru ọ́ va ngwa ngwa, me nụ́ a joosno va lekasi anụ́.

²⁴ Anụ́ bekwu kpakara ele risi anụ́ nụ́ kpakara rụ́mu Chiokike. Ele Itali neebekwu anụ́.

²⁵ Oru Chiokike dazị́nu kpakara anụ́.

Okwukwo izi Jemisi

Nhne gbasiri okwukwo izi ka

Okwukwo izi Jemisi jihjaru n'agida ezni o nyernu kpakara rumu Chiokike gbasaru nu "rime kpakara owa." Jemisi ji agida nhne anya n'owhnu n'obochi neezni nhne ke enine, neegesipa kpa nye Karaisi kwesiri o ji akoniche wu budnu n'owa. Jemisi kwuru oka gbasiri owa eze, owa, ornurna, agwa oma, okewa, okwnata mkpoma, riro, akoniche, okno oka, oknomokno, ozi w'ohnerne, okpe ele berere ikpe, nganga, ndidi nu okpukpe.

Okwukwo izi ka nookwu mkpa o zi nu badnu nwernu okwnata mkpoma nu nhne obula o neeme, lele kpa o kwesiri nye neekpeni Chiokike.

Nhne zi n'okwukwo izi ka

Opanizo (1:1)

Okwnata mkpoma nu akoniche (1:2-8)

Qdna owa nu eze (1:9-11)

Ornurna (1:12-18)

Onurnu nu omume (1:19-27)

Odo aka nu nsni gbasiri okewa (2:1-13)

Okwnata mkpoma nu ernu (2:14-26)

Nye Karaisi nu riro a (3:1-18)

Nye Karaisi nu owa (4:1--5:6)

Ezini zi odo nu odo (5:7-20)

¹ Mawa, Jemisi, nye izi ke Chiokike nu ke Nyenwe aji z'osi Karaisi, neebekwu kpakara ele ke Chiokike, ke bu avnurnu nri nu ebo ele Chiokike zi nu rime kpakara owa.

Okwnata ovu n'ige ornurna

² Rumu nda m, o buru nhne snarnima ige obula anu dnabnarnu nu nhne ornurna zi odo n'odo.

³ Kwnornu nu o bu oka okwnata ovu iru jeegweya ndidi.

⁴ Ndidi rnuzu ernu a, ma anu buru ele zuru ozu, o za nhne kogwu.

⁵ O buru nu o zi nye nwée akoniche, nye wam rjo n'aka Chiokike, nye neenye kpakara badnu hite nu mkpoma oma a, o za naakpasij ihnerne. O jeenye a.

⁶ Nye wam jeeji okwnata ovu n'orio, o nwéko mkpoma lawuru. Nye nwernu mkpoma lawuru nu lele abaka-mini osimini, nga ruwhere neewhe, o n'ootulizo a olu.

⁷ Nye kji chéko nu o jeenwehia nhne obula n'aka Nyenwe aji.

⁸ O bu nye mkpoma lawuru, o gwúzole kwem nu kpakara apna a.

Qdna owa nu eze

⁹ Nnwó nda ke bu nye mboni nwúdna nga Chiokike gweliz'oru a olu.

¹⁰ Nnwó nda ke bu nye kwu nwúdna nga Chiokike gwednarnu a éli. Kwnornu nu nye kwu jaagawhe lele igwugwere ohia.

¹¹ Nga éhnam wasiri n'orne békwnu a, o chnagbu achara, igwugwere a dnahnala, mma a kwome masi. Kpam masi, nye eze jaagawhe nu kpakara ernu a.

Ornurna

¹² Ngozi jaazinu nye wam ovu a siri rikne nu ige ornurna, kwnornu nu o megbu ornurna, o jeenwehia budnu kwó okwo ke Chiokike kweru ele whnurnu a n'anya mkwna.

¹³ Nga be naarna anu ornurna, nye wam kákwadia, "Chiokike naarna m ornurna," kwnornu nu o za nye nwernu rikne rna Chiokike ornurna, Chiokike rna badnu ornurna.

¹⁴ Kovu be naarna badnu ornurna nga nhne ojo ke mkpoma n'oto a, ma o duwhu a.

¹⁵ Nga nhne ojo ke mkpoma wam turu rime, o m'uhia mmehie, mmehie masi sopiya, o m'uhia enwu.

¹⁶ Rumu nda m me whnurnu n'anya, anu kwé be duwhu anu.

¹⁷ Kpakara nkesi oma nu nhne buru oma neehi n'oligwe naava, n'aka Nda ke keru iwhne, nye za naagbanwo lele kpa enine naagbanwo.

¹⁸ Chiokike pioru o gweru ikwu-onu ke ezi oka a m'uhia aji, ma a buru mkpuru mbom ke kpakara nhne o keru eke.

Onurnu nu omume

¹⁹ Rumu nda m me whnurnu n'anya, anu mahja ka, kpakara badnu ziri gnarnagnarna n'ornuru, kovu o buo n'okwu oka. O wé masi éhni wara wara.

²⁰ Nye ovu owe éhni nwée rikne mee nhne jaamasij Chiokike.

²¹ Kwnornu nu ka, anu gweme kpakara rune nu kpakara agwa ojo ke jipihjuru mkpoma anu. Anu gweru éhni anu bita nu mkpururu Chiokike, nahoru oka wam ke nwernu rikne o zn'ohia mkpuru mkpoma anu.

²² Anu buru ele neeme nhne oka wam kwuru, anu buko ele nonu onu kpóji, ne-duwhu éhni anu.

²³ Nye obula ke nonu ikwu-onu wam kpóji, kovu o za neeme eme, nu lele badnu ke neelekiru ruwhnu a nu n'yno, whnu ruwhnu a kpa o nu.

²⁴ O lekirikwo éhni a, ngangam, o whoga, chezume okpa badnu o bu.

²⁵ Kovu nye obula ke neelegidne anya n'iwu wam zuru ozu ke neeme badnu nwernu éhni a, ke naadazigidne nu rime a, o buo nye nonu onu neechezu masi, kovu nye neeme nhne iwu wam kwuru, Chiokike j'ogoozi nye wam n'ernu a.

²⁶ Ọ bụru nụ nye ọbula bụ nye neekpenu Chiokike, ọkọvu o knésige riro a eriri, ọ nọghonu mkpọma a aghigho, okpenu Chiokike a bụ nhne etekne.

²⁷ Okpenu Chiokike ke zị snam, ke be mérula emeru nọ ruwhnu Chiokike bụ Nda aị, bụ ka, o chenwanya rụmu nwéé nda nụ nne, nụ ele rinya nzi be nwurru nụ mmekpehni be, nụ badnụ ọ bita ẹhni a rịchna hite nụ nhne ọjọ k'owa ka.

2

Ole badnụ anya nụ ruwhnu

¹ Rụmu nda m, lele ele kweru nụ Nyenwe aị Jizọsị Karaisi, nyenwe igwugwu, anụ lékọ badnụ anya nụ ruwhnu hite nụ ya naakpa ike.

² Ọ bụru nụ nye kwu ke gbagwụ ari mkpaka golu, woru iwo marnụ mma va n'ogbako anụ, nye mboni ke wogwu nkụkara iwo va masị,

³ Ọ bụru nụ anụ sọbisinu nye wam wogwu iwo marnụ mma, kanụ a, "Daziri nụ ngadna ka," ọkọvu kanụ wòmboni wam, "Gwuzoru hna, mọbu daziri n'ẹli etekne n'ochi m,"

⁴ anụ kpála ike, bụru masị ele ikpe ọriri ọjọ marnụ?

⁵ Anụ bnote nsnj, rụmu nda m me whnrnu n'anya, Chiokike ọrulam ele mboni ke ọwa ka, mee be bụru ele kwu n'okwnata ovu be, be bụru masị ele o jeenye ẹli-eze wam o kweru ele whnrnu a n'anya mkwna.

⁶ Ọkọvu anụ lednarnụ wòmboni anya. Ọ búo ele kwu wam neemgbu anụ? Ọ búo be nọpnrnu anụ zne ọro ikpe?

⁷ O búo ele kwu noolulu rẹwhna ọma nye wam nwe anụ?

⁸ Ọ bụru anụ bita iwu Eze aị ke oligwe ke be gbarụ n'okwukwo nsọ, "Whnụ nye agbatibi i n'anya lele ẹhni i," anụ mekwarụ nkari.

⁹ Ọkọvu ọ bụru nụ anụ le badnụ anya nụ ruwhnu, anụ mehielem. Iwu jeegesi nụ anụ dnarnụ iwu.

¹⁰ Nye ọbula ke jaabita kpakara iwu, ọkọvu dna otu kpọi, ọ dnanam kpakara iwu wam.

¹¹ Kwnornu nụ nye wam karu, "I mékọ ọyi," kamasiri, "I gbúkọ badnụ." Ọ bụru nụ i méne ọyi, ọkọvu i gburu badnụ, i bụ nye dnarnụ iwu.

¹² Anụ kwu, mee masị lele ele Chiokike jeeji iwu ke neeme badnụ nwernu ẹhni a kpe ikpe.

¹³ Kwnornu nụ nye nwéé mkpọma obirizi, Chiokike joodonu a obirizi nga o jeekpe a ikpe. Obirizi nnonwudna n'ikpe ọmuma.

Okwnata ovu nwéé ẹrnu bụ nhne etekne

¹⁴ Rụmu nda m, ndaa mbnarna ọbnarnu ọ bụru nụ nye ọbula kaa, "M nwernu m

okwnata ovu," ọkọvu ẹrnu a gésile a? Ọkwnata ovu kpọi ọ jooznohia a?

¹⁵ Ọ bụru nụ rụmu nne rukna mọbu rụmu nne rinya nwéé iwo, mọbu wiri oriri,

¹⁶ mbnarna kịni bụ nhne ọ bnarnụ, ọ bụru nụ otu badnụ n'esilawuru anụ kanụ a, "Lekwaru anya, o nyee i iwo i jooowo, chi i iyi, nụ wiri i jeeji riji ruwho," ọkọvu o nyéne a nhne ke zị anọ-ẹhni mkpa.

¹⁷ Ọ bụ masị kpa ọkwnata ovu ke nwéé ẹrnu bụ nhne nwurru ọnwu.

¹⁸ Ọkọvu otu nyenum jaakaa, "Otu badnụ nwernu okwnata ovu, nye berere nwernu ẹrnu ọma." Gesi m okwnata ovu i ke nwéé ẹrnu, m jeegesi i ẹrnu ọma m hite nụ okwnata ovu m.

¹⁹ I kweru nụ otu Chiokike, ọ bụru ọma. Ele rẹnwu ọjọ kwe masịri, be naama rururu tū ogwu.

²⁰ Ji nye iwhnrniwhno! I pioru ọ mahia nụ okwnata ovu ke nwéé ẹrnu bụ nhne etekne?

²¹ Gweru Ebereham nda aị nụ nhne atụ. Be gwnusiri a nụ nye mee mma hite n'ẹrnu ọma a, nga o jiri Aziki nnwọ a rukna kwa arịohna n'olu ọjọ arịohna.

²² I whnrnu nụ okwnata ovu a nụ ẹrnu a rnukotarụ ẹrnu. Okwnata ovu a zuru ozu hite n'ẹrnu ọma a.

²³ Nhne be gbaru n'okwukwo nsọ mezuru ke kwuru, "Ebereham kweruru Chiokike, Chiokike gwnusinu a nụ ọ bụ nye mee mma." Be sukwa a enyi ke Chiokike.

²⁴ Anụ whnrnu nụ be gwnurru badnụ nụ nye mee mma hite n'ẹrnu ọma a, ọ búo hite nụ okwnata ovu kpọi.

²⁵ Kpam masị, gweru Rehabu nwerinya ewhere nụ nhne atụ. Be gwnurru a nụ nye mee mma hite n'ẹrnu ọma, nga o kwubnanyarnu ele varu ọ dna ndịdna hi n'ẹli Izireli, zihala be n'apna berere.

²⁶ Lele kpa anọ-ẹhni bụ nhne nwurru ọnwu hne enine zila, kpam masị, okwnata ovu bụ nhne nwurru ọnwu hne ẹrnu zila.

3

Ledu riro i anya

¹ Rụmu nda m, kpakara anụ búko ele zni nhne. Kwnornu nụ anụ magwụ nụ ele zni nhne jeenwe agida ikpe kakwo ele berere.

² Kpakara aị naadnahie n'agida nhne. Nye zá naadnahie nụ ikwu-ọnu bụ nye zuru ozu, nwe masịri rikne ọ chikota kpakara ẹhni a.

³ A neekne ọnu iyinya eriri ma be mee nhne a pioru be mee, zne masị hne a pioru be zne.

⁴ A gweru ogbo mini lele nhne atụ, ọ bụ n'ezị nụ o zị okpotokpo, okne ruwhere noovughari a, ọkọvu nụ nye risi ogbo ji amarna matị nootughari ogbo penupe ọbula nye risi ogbo pioru.

⁵ Kpam masị, riro bụ nhne matị zị n'ehni aị, ọ nọotu ọka k'agịda. Le kpa igbogo hna ezi bụ ke bẹkwnu matị mernu o nwuzọ bẹkwnu.

⁶ Riro bụ bẹkwnu. O jihjaru nụ agịda nhne ojo n'esilawuru nhne zị aị n'ehni. Riro bụ nhne neerneru badnụ, n'omusi bụdnụ bẹkwnu hite nụ bẹkwnu ẹli rẹnwu.

⁷ Badnụ nwernu rikne znụ, znụ masilam kpakara nhne be keru eke, mọbu anọhia ke zị ogwnu zị ichne ichne, nụ ọnnu ọbula, mọbu aznụ zị nụ mini, nhne ọbula n'ọpnu ọpnu.

⁸ Kọvu nụ ọ zā nye nwernu rikne znụ riro. O bụ nhne ojo ke zā naadazị bidim. Nhne gbu badnụ zị nụ rime a.

⁹ A ji riro naaznari Nyenwe aị nū Nda aị Chiokike. A ji masị a n'ovu badnụ ọnu bụ nye be kpuru n'oyiye ke Chiokike.

¹⁰ Ọtu mmamma nū ọvu ọnu neehi nū otu ọnu wam n'owhuya. Rumu nda m, o bụo ọma ọ zị kpam.

¹¹ Be tūhia mini sọ n'ọnu nū mini lu nlulu n'otu ọmị?

¹² Rumu nda m, isisi figi o nwernu rikne mīnya mkpuru isisi olivu? Mọbu isisi vañi o nwernu rikne mīnya mkpuru isisi figi? Mini arua, o nwernu rikne gbahja mini so n'ọnu?

Akọniche zị ichne ichne

¹³ O bụru nū o nwernu nye zị n'esilawuru anụ ke nwernu akọniche nū ọghohia, o gesi a hite nū bụdnū a, hite masị nū agwa ọma nū ogwedna ẹhni a ẹli ke hi n'akọniche.

¹⁴ Kọvu ọ bụru nū mkpoma anụ jihjaru nū okwno-awūwa, nū ovu nlulu, nū akanchni, anụ kpá nganga. Anụ mée ezi ọka ghọ aghalaghala.

¹⁵ Akọniche ke nū kpam híge n'oligwe va, ọ bụ ke ọwa. Enine Chiokike zila nū rime a. O bụ nhne ke rẹnwu ojo neezni.

¹⁶ Hne okwno-awūwa nū okewa zị, ọgba aghara ghara jaaziri.

¹⁷ Kọvu akọniche ke hi n'oligwe va, beru ọsno ziri rịchna, omekwo, o nwe udno, o nwernu mkpoma ọma, naadnakota n'otu, o nwernu obirizi nū ẹrnu ọma, o nwée aghigho, ọ kwu ezi ọka.

¹⁸ Ele neeme udno naakpa mkpuru udno. Be jọghohia mkpuru ke imerne ọma.

4

Enyi ke ọwa

¹ O bụ kịni noovuya ọlu ogwnu nū ọdogbuta n'esilawuru anu? Be hi nū nhne ojo ke n'ogwnu mkpoma anu, ke n'oolu ogwnu nū rime anu.

² Anụ piuru nhne, kọvu anụ nwéhjala a, anụ jiknenu o gbu badnụ. Anụ piosi nhne rikne, anụ nwée rikne nwehja be, anụ jiknenu n'ogdogbuta, n'oolu ogwnu. Anụ nwée nhne anụ pioga kwnornu nū anụ rjola n'aka Chiokike.

³ Anụ n'ọorio, kọvu anụ zā nanahja kwnornu n'oriri ojo ke mkpoma anu, ma anụ gweru a mee kpa o jiri masị anu.

⁴ Anụ ele kwé be tūkwasị anụ ovu! Anụ máa nū nye ọbula ke whnurnu nhne ọwa n'anya k'agịda nye wam bụ nye irno ke Chiokike? Nye ọbula ke piuru ọ bụ enyi ke ọwa neeme ẹhni a nye irno ke Chiokike.

⁵ Anụ chéko nū nhne be gbarụ n'okwukwo nsọ bụ etekne, “Chiokike neelegidne Enine Nso a o yisiri nū rime anụ anya k'agịda.”

⁶ Kọvu Chiokike neenye aị oru k'agịda. Lele kpa be gbarụ a n'okwukwo nsọ, “Chiokike noogwuzogidne ele oknomokno, kọvu o neenye rumu mboni oru.”

⁷ Anụ bīta ẹhni anụ nū mkpururu Chiokike. Anụ nyigidne Ekwensu, ọ jaagbawhu hne anụ zị.

⁸ Anụ kpayabetu Chiokike ndundu, ọ jaakpayabetu anu ndundu. Anu kwnosnama aka anu, anu ele aruru-eli. Anu snusnama mkpoma anu, anu ele mkpoma lawuru.

⁹ O gbu anu igbugbu, anu ru ọwa, anu gba mkpe! Rumu anu ghọ ẹkwna. Snarnima anu ghọ ọ gbaru ruwhnu.

¹⁰ Anụ gwedna ẹhni anụ nū ruwhnu Chiokike, o jeegwelizo anu olu.

Anu kpéko ibne anu ikpe

¹¹ Rumu nda m, anu kaja ibne anu. Nye ọbula ke naakaja nnwọ nda a, mọbu neekpe a ikpe, ọ naakaja iwu, neekpe masi iwu ikpe. O buri nū i bụ nye neekpe iwu ikpe, ngam, i buri nye naabita iwu, kọvu nye ikpe iwu.

¹² Chiokike kpọi bụ nye neenye iwu nū nye ikpe. Ya nū nsnunu a nwernu rikne znohia aị mọbu gbumekwo aị. I bụ nyele ke neekpe badnū ibne i ikpe?

Anu lūu ọnu nhne ekile jọbu

¹³ Anụ bnote nsni, anu ele naakaa, “Tna mọbu ekile, a jeezne mba ka mọbu mba kiyari daziri pji otu awha, gba mgbama ahja, kpa agida iwai.”

¹⁴ Anụ máa nhne jeeme ekile. Ndaa nhne bụdnū anu bụ? Būdnū anu nū lele iknornomini ke whuyaru, dazị ige matị, omekwo, o whume n'anya.

¹⁵ Ka bụ nhne anu znernu okwu, “O buri ọ masi Nyenwe aị, a jaazị bụdnū mee ka mọbu mee kiyari.”

¹⁶ Kọvu kītna, anu noolu ọnu, neeme oknomokno. Kpakara o luu ọnu ka buri ọma.

¹⁷ Nye mahjaru nhne buri ọma o mee a, o méne a, ọ bunnu a mmehie.

5

Be ọru ele eze aka nū nsnj

¹ Anụ bnote nsni, anụ ele eze. Anụ kwna ẹkwna, si okokoba kwnornu nụ nhne igbugbu ke jaadnakwasị anụ.

² Ẹkwnu anụ roru oro, akịka takwolem iwo anụ.

³ Kpakara golu nụ siliva anụ tulam ajari, ajari a jọbu nhne akebbe megidne anụ. O jeerne anọ-ẹhni anụ lele ẹkwnu, anụ ele kpabitaru ẹkwnu n'ọbochi ipne-aznụ ka.

⁴ Anụ bno nsni, anụ kwıla ele anụ gnornu ẹrnu n'ẹkwu anụ ogwo ẹrnu be. Ogwo ẹrnu be naakwna, nhne o nọokpokwu anụ dulam nsni Nyenwe aị Chiokike ke Meli Nhne Dum.

⁵ Anụ wuru bụdnu oriri nụ ọnwunwo n'owa, anụ mee lele kpa o masiri anụ. Kịtna, ẹhni anụ ke gbarụ ọto jiknernunem, neese ikpe naava ava.

⁶ Ele aka be zị rịchna bụ ele anụ marnu ikpe, anụ gbu be. Be mēnne anụ risi rikne.

*Osnuta mkpoma
nụ mmekpẹhni*

⁷ Rụmu nda m, anụ knata mkpoma tem Nyenwe aị va. Nye ẹrnu ẹkwu jì naaknata mkpoma nụ mkpuru zị okne ọnu ahia ke ẹkwu a mji, tem mini ozuzo mbom nụ ke ipne-aznụ zo.

⁸ Anụwa masi, anụ knata mkpoma, dazisi rikne, kwnornu nụ ọvua ke Nyenwe aị zị ndundu.

⁹ Rụmu nda m, anụ nwéma mkpoma ojo n'ẹhni ibne anụ, ma Chiokike gharu o kpe anụ ikpe. Nye ikpe gwuzogwu n'ọnu-mgbo jiknernu o va.

¹⁰ Rụmu nda m, anụ chenwanya nhne ele ọwhnurninya kwuru nụ rẹwhna Nyenwe aị. Anụ gweru be lele nhne atụ nụ ọknata mkpoma nụ rime mmekpẹhni.

¹¹ Anụ maam nụ a nookwu ele wam ele ọwa ọma kwnornu nụ be knataru mkpoma. Anụ nurnu ọknata mkpoma Jobu, anụ maam nụ Nyenwe aị dọnnu a obirizi n'ipne-aznụ, kwnornu nụ Nyenwe aị bụ nye obirizi nụ nye imerne ọma.

¹² Rụmu nda m, anụ jí oligwe mọbu ọwa mọbu nhne berere dū risi. Ọka anụ buri owe, owe, mọbu ọza, ọza, o zị Chiokike kpe anụ ikpe.

*Okpukpe be kperu
n'okwnata ovu*

¹³ O zị nye ọbula n'esilawuru anụ ke zị nụ mmekpẹhni? O kpe okpukpe. O zị nye ovu nọoso n'ọnu? O gwnụ eri ọznarni.

¹⁴ O zị nye ọbula ke naarija ẹhni igbugbu? O sukwu ele okno badnụ ọgbako Chiokike, be kpenu a okpukpe, te a mọno olivu nụ rẹwhna Nyenwe aị.

¹⁵ Okpukpe be jiri okwnata mkpoma kpe jọogwo nye nriria wam. Nyenwe aị jeeme ẹhni si a rikne. O buri nụ o mehieru, Chiokike jaagbarunu a.

¹⁶ Kam kpayarū, anụ kwuhianu ibne anụ mmehie anụ, anụ kpenu ibne anụ okpukpe ma be gwọ anụ ẹhni igbugbu anụ. Okpukpe nye mee ọma nọrnusi ẹrnu rikne.

¹⁷ Ẹlaija bụ badnụ etekne lele aịwa. O kpesiri okpukpe rikne ma mini gharu o zo, mini zóle dū awha ẹto nū ẹnwa isunu.

¹⁸ O kpe kwno okpukpe, oligwe gweya mini ozuzo, ẹli mịnya mkpuru.

¹⁹ Rụmu nda m, o buri nū otu badnū n'esilawuru anū kpahalarū n'apna ezi ọka, nye berere kwuhnahie a,

²⁰ anū mahia nū nye mernu nye ojo tūhnasna n'apna ojo a, znọhiaru mkpoma a n'ẹnwu. Nye wam kpusnirni agida mmehie.

**Ọkwukwo izi
ke Mbom
Pita
gbaru**

Nhne gbasiri ọkwukwo izi ka

Ọkwukwo izi ke Mbom Pita gbaru bụ ke Pita gbaznenu ele Karaịsi naata awnhuwhnu kwnornu be neekpenu Nyenwe aị. Pita kannu be nū agida ele ke Karaịsi nṣowhnusni anya n'aka ele Rom ele kwége nū Jizọsi Karaịsi. Be jaazị ọriri naata awnhuwhnu ke kakwo. Ọvu, Pita naakanu be nū be nwe ndidi kwnornu nū kpakara ele sno Nyenwe aị jaata awnhuwhnu kwnornu ọkwnata ovu be. Ọ kaa nū ka jeeme ọkwnata ovu be si rikne, ke jeenye Nyenwe aị igwugwu n'ọbochi Jizọsi jaava.

Ọvu kwnornu nhne Chiokike mernu hite n'ome Karaịsi hi n'enuw lizo, kpakara ele Karaịsi nweru olile anya. Lele kpa Karaịsi beru ọsno ta awnhuwhnu, omekwo, be nyee a igwugwu, ọ bụ masị kpa nye Karaịsi ọbula jeenwe igwugwu nga Jizọsi jaava.

Nhne zị n'ọkwukwo izi ka

Obekwu ikwu nū okpukpe (1:1,2)

Risi olile anya aị (1:3-12)

Owu bụdnu zị nso lele ele ke Chiokike (1:13--2:17)

Nhne atụ awnhuwhnu Karaịsi (2:18-25)

Awhnuwhnu nye Karaịsi (3:1--4:19)

Ezni ele risi ọgbako Chiokike (5:1-11)

Obekwu ikwu ipne-aznū (5:12-14)

¹ Mawa, Pita, nye izi Jizọsi Karaịsi, naag-baznenu ele Chiokike ọhọiaru ke gbasaru kpakara ẹli Pọtosi, Galasia, Kapadosia, Esia nū Bitinia ọkwukwo izi ka.

² Chiokike Nda mahiaaru anū, gweru aka a ọru anū, bīta anū nso hite n'Enine Nso, ma anū noobnonu Jizọsi Karaịsi nsnj, ma ọvnarna a snusnama anū.

Oru nū udno banū anū aba.

Olile anya ke zị bụdnu

³ Ọznarni zīnu Chiokike nū Nda Nyenwe aị Jizọsi Karaịsi, nye hiri nū obirizi a mūhia aị nū bụdnu ikne. O mernu Jizọsi Karaịsi hi n'enuw lizo, ke nyernu aị ọkwnata ovu zị bụdnu.

⁴ A bna n'okehja mkpe ke zá noolulu olulu, nū ke be mērula emeru, nū ke zá nọbo ọbo, ke Chiokike bītannu anū n'oligwe.

⁵ Chiokike jeeji iknerna ma bīta anū tem anū nahja ọznohia, kwnornu nū anū tūkwasiri a ovu. O jeeme ka whya iwhe n'ige ipne-aznū.

⁶ Anū nṣonwudna ọnwudna kītna kwnornu ka, ọ bụ n'ezī nū anū naata awnhuwhnu zị ọdo n'odo n'ige matj ka.

⁷ Kpakara ọrnurna ka varu ma be tule ọkwnata ovu anū ma anū zī snam lele kpa be neeji bēkwnu naagba golu ke noolu olulu. Ọ bụ kpa be neeji bēkwnu nṣotule ọkwnata ovu anū, ma anū nwehja ọznarni nū igwugwu n'ọbochi be jookpume Jizọsi Karaịsi.

⁸ Nye anū whnurnu n'anya, ọ bụ n'ezī nū anū jile anya anū lawuru whnu a, anū kweru nū ya, ọ bụ n'ezī nū anū jile anya anū lawuru whnu a kītna. Kam kpayaru anū nweru snarnima k'agida ke ọnu jọokowali.

⁹ Anū nahjaru nhne anū kwnataru ovu ke bụ ọznohia ke mkpuru ovu anū.

¹⁰ Ka bụ ọznohia wam ele ọwhnurninya piosiri rikne, nyosna nhne gbasiri a, be whnurnu ọwhnurninya gbasiri nkesi wam Chiokike jeenye anū.

¹¹ Be piuru ọ mahja ige wam nū kpa ọ jọoburu bụ nhne Enine Karaịsi ke zī nū rime be kwuru, nhne gbasiri awnhuwhnu Karaịsi jaata nū igwugwu ke joosno a.

¹² Chiokike kpumennu ele ọwhnurninya ka nū ọrnu be bjo ke be, ọvu ke jaabnanu anū iru, bụ ke be kwuru hite n'ọnu ele znirni anū izi ọma, hite nū rikne ke Enine Nso ke hiri n'oligwe va. Ka bụ nhne ke ele enine izi piuru o lebna anya nū rime a.

Anū ziri nso

¹³ Kam kpayaru, anū suru ajnj n'ovu anū, anya dū anū ẹli, anū neele oru ke Jizọsi Karaịsi jeenye anū anya nga be kpumernu a.

¹⁴ Lele rumu ke noobnonu Chiokike nsnj, anū lánna nū rime nhne ojo ke ọnogwu anū nū mbom nga anū zī lele ele má nhne.

¹⁵ Tnūnuma, lele kpa nye wam sukwuru anū zī nso, anū ziri nso nū kpakara nhne anū neeme.

¹⁶ Kwnornu nū be gbaru a n'ọkwukwo nso, kaa, "Anū ziri nso, lele kpa me zī nso."

¹⁷ Ọ buri nū anū noosukwu Nda ke zá neele badnu anya n'ikpe, bī nye neekpe badnu ọbula lele kpa ọrnu be jiri zī, anū ziri bụdnu lele ele izne nṣotu ogwnu n'owa ka.

¹⁸ Anū magwu nū ọ bjo golu mọbu siliva ke noolulu olulu bụ nhne be jiri gbahja anū hite n'aka nhne ojo ke anū nahjaru n'aka ele nda anū ọknani,

¹⁹ Ọvu ọ bụ ọvnarna Karaịsi ke zī okne ọnu ahja, lele nnwo atnurnu ke nwée ọru mọbu ntupo.

²⁰ Chiokike ọhọiaru a tūtu sū ọ tūru ntū-ẹli ọwa. Ọvu o mernu a ọ whya iwhe n'ọbochi ipne-aznū ka kwnornu anū.

²¹ Anū kweru nū Chiokike hite nū ya, nye o mernu ma o hi n'enuw lizo, nyee a igwugwu, ma olile anya anū nū ọkwnata ovu ziri nū Chiokike.

²² Hne anū bītaru ẹhni anū snam hite n'obno nsnj n'ezī ọka, nṣowhnu ele kweru

ekwe n'anya, anụ gweru ọwhnun'anya ke hi n'ovu anụ whụya whnụ ibne anụ n'anya.

²³ Be mụrnu anụ berere, ọ bụo hite nū mkpuru ke nooro oro, kọvu hite nū mkpuru ke zā nooro oro, ke bụ ikwu-ọnu Chiokike ke zị ọkwukokwnu.

²⁴ Ọkwukwo nsọ kwuru,
 “Kpakara badnụ nū lele achara,
 igwugwu badnụ nū lele okoko achara,
 achara chanwụ, okoko a dnahala,
²⁵ kọvu ikwu-ọnu ke Nyenwe aị jaazi ọkwukokwnu.”

Ka bụ ikwu-ọnu ke izi ọma wam be znirni anụ.

2

¹ Kam kpayarụ, anụ gweme kpakara nhne ojo n'ehni anụ, irno, nū kpakara aghigho, nū ruwhnu lawuru, nū okwno-awụwa nū ọkaja.

² Lele rumu be mụrnu ikne, akpịri ke mini-remā ke zī snam ke enine, ke bụ ikwu-ọnu Chiokike nọkpo anụ bẹkwnu, ma anụ nwo a, sopiya nū badnū dū ọznohia.

³ Kịtna, anụ raturu a riro whnū nū Nyenwe aị bụru ọma.

Akaworugwu zị budsonu

⁴ Anụ vakwnusi Nyenwe aị lele rugwu ke zị budsonu ke ele badnū juru, kọvu ke Chiokike hōhiaru, zī okne ọnu ahịa n'anya a.

⁵ Anụwa masị, lele akaworugwu ke zī budsonu, be jiri anụ wu Oro Nso ke enine, ma anụ buri ele ọkwa arịohna zī nsọ, ele jaakwa arịohna enine ke Chiokike jaanarū hite nū Jizosi Karaisi.

⁶ Be gbarū a n'ọkwukwo nsọ, kaa,
 “Le, m bītaru m nū rime Zayōni,
 akaworugwu nsūkala ọro mē hōhiaru ke zī okne ọnu ahịa,
 nye ọbula ke tūkwasiri a ovu,
 iwhnerne jōotu a.”

⁷ Nū hne anụ ele kwuru ekwe zī, akaworugwu ka zī okne ọnu, kọvu hne ele kwé ekwe zī, be gbarū a n'ọkwukwo nsọ, kaa,
 “Akaworugwu ke ele noowu ọro juru,
 kiyam ghōlam risi nsūkala ọro.”

⁸ Be gba kwno,
 “Akaworugwu ke jeeme badnū kpōbi ọchi,
 nū rugwu ke jeeme be dna.”
 Be dnarnū kwnornu nū be kwége ikwu-ọnu Chiokike, lele kpa echiche Chiokike zīnu be.

⁹ Kọvu anụ bụ ele Chiokike jiri aka a hōhia, ele arịohna ke eze, mbam ke zī nsọ, ele ke Chiokike, ma anụ gesi ọznarni nye wam suk-wuru anụ hite nū rime ọchichiri bna nū rime iwhne a zī igwugwu.

¹⁰ Nū mbom anụ bụo ele ke Chiokike, kọvu kịtna, anụ bụ ele ke a, ele nwé obirizi nū mbom, kọvu kịtna, Chiokike dōnnu anụ obirizi.

¹¹ Ele me whnurnu n'anya, m naarjasno anụ, lele ele izne nū ele neewhe ewhe n'owa ka, anụ nyéé nhne ojo ke nọogwnu anụ, ke nọolu masị ọgwnu megidne mkpuru ovu anụ oghere.

¹² Anụ wu budnu ke buri ọma n'esilawuru ele máa Chiokike, ọ bụ n'ezī nū be noobno anụ nhne ojo, kọvu be whnū ọnu ọma anụ, ma be znarni Chiokike n'ọbochi o jeelekasi aị.

Bita ehni anụ nū mkpururu ele ọchichi

¹³ Kwnornu nū Nyenwe aị, anụ bita ehni anụ nū mkpururu ọchichi ke badnū, mọbu eze, lele nye risi,

¹⁴ mọbu ele ọchi ẹli ele o ziyaru ọ ta ele ojo awhnūwhnu, nū ọ znarni nye neeme nhne ọma.

¹⁵ Ka bụ nhne Chiokike noopio, ma anụ hite n'ernu ọma anụ kpusni ọnu ele iwhnirni-whno.

¹⁶ Anụ wu budsonu lele ele nwernu ehni be. Anụ jí ọnodi wam kpusni nhne ojo, kọvu anụ ziri budsonu lele ele izi Chiokike.

¹⁷ Anụ sọ kpakara badnū anya, anụ whnū rumu Nda n'anya, anụ tū ogwnu Chiokike, anụ sōbisinu eze.

Awhnūwhnu Karaisi

¹⁸ Ele ọhi, anụ gweru ọso anya bita ehni anụ nū mkpururu ele nwe anụ. Anụ ménu nye ovu ọma nū nye udno kpōi, ma nye aka rikne masị.

¹⁹ Kwnornu nū Chiokike jōgozi anụ ọ buri nū anụ tarū awhnūwhnu hne ọ zā nhne ojo anụ mernu, kọvu kwnornu nū anụ tūru ogwnu Chiokike.

²⁰ Ndaa igwugwu ke anụ jeenwe, ọ buri nū anụ tarū awhnūwhnu kwnornu nū nhne ojo anụ mernu? Kọvu anụ gwuzogidne n'awhnūwhnu hne anụ mernu nhne ọma, Chiokike jōgozi anụ.

²¹ Ọ bụ nhne be sukwuru anụ, Karaisi tarū awhnūwhnu nū risi anụ, ghasanū anụ nhne atū, ma anụ snornu rēnu ọchi a.

²² “Ọ zā mmehie o mernu,
 ọ zā aghigho be piohiaru n'ọnu a.”

²³ Nga be mernu a nhne iwhnerne, o mégwnarnuge, nga ọ tarū awhnūwhnu, ọ kpála rikne, kọvu o gweru ehni a yisi n'aka nye wam neekpe ikpe buri ọma.

²⁴ Ya n'iwhuru a jiri ehni a vuru kpakara mmehie aị n'olu ọgba, ma a buri ele nwurnu ọnu ghasa mmehie, ziri budsonu ele mee mma. O jiri ọnya a gwō kpakara ehni igbugbu aị.

²⁵ Anụ nū lele atnurnu ke whuru apna, kọvu ke hiehnarnu hne Nye Ọznuznu nū Nye Risi mkpuru ovu anụ zī.

3

Ele nzi nū nnwerne

¹ Kpam masị, anụ ele bụ nnwerne, anụ b́ta ẹhni anụ nụ mkpururu nzi anụ. Ọ b́rurubedi nụ be bụ ele kwéle ikwu-ọnu Chiokike, be jeenwe rikne hiri nụ agwa ọma anụ anụ kweru hne anụ kwúle ọka,

² kpa be ọjowhnu anụ noowu b́dnu b́ru ọma ke zị masị snam n'ọso n'anya.

³ Anụ kwé mma anụ b́ru nhne ke anya nọowhnu kpọi, ọ b́io kpa anụ kparụ risi anụ, mọbu golu anụ t́ n'ẹhni, mọbu iwo marnụ mma anụ wogwu.

⁴ Kọvu mma anụ b́ru agwa ọma wam tugwaru otugwa ke zị nụ rime ovu, ke bụ nhne ẹyi ke zá nooro oro, ke bụ ọzi wọhnerne nụ enine ke udno, ke zị okne ọnu ahia n'anya Chiokike.

⁵ Ọ b́ kpa ele rinya gbaka zị nsọ ele t́kwasiri Chiokike ovu mernu ẹhni be mma, be b́taru ẹhni be nụ mkpururu nzi be.

⁶ Sera nụ kpam, o bnonnu Ebereham nsni, noosukwu a, "Nyenwe ma." Anụ b́ rụmu a rinya, ọ b́ru nụ anụ jeeme nhne ọma gharụ ọ t́ ogwnu nhne ọbula.

⁷ Kpam masị, anụ ele bụ nzi, anụ jiri ọso anya nụ akọ, anụ nụ nnwerne anụ wuru, hne anụ magwú nụ be bụ ele nwé rikne. Anụ nụ be jeekehia nkesi b́dnu kwó okwo Chiokike neekesi anụ n'etekne. Anụ mee kpam, ọ zị nhne ọbula bnosni okpukpe anụ.

Awhnụwhnu kwnornu ome nhne b́ru ọma

⁸ N'ipne-aznụ, kpakara anụ nwe otu ovu, anụ dọnu ibne anụ obirizi, anụ whnụ ibne anụ n'anya lele rụmu nda, anụ nwe obirizi n'ẹhni ibne anụ, anụ b́ru ele be gwednarnụ ẹli.

⁹ Anụ jí nhne ojo kwúhna nhne ojo, anụ gógwna ngúgo, kọvu anụ nọgozi ọgozi, kpa Chiokike sukwuru anụ ma anụ kehia ngozi masị.

¹⁰ Kwnornu nụ ọkwukwo nsọ kwuru, "Nye ọbula ke whnurnu b́dnu n'anya, ke noopio ọbochi ọma, ọ b́ta ọnu a ma ọ gharụ o kwu ọka ojo, b́ta masị mgbele-ọnu a n'aghalaghala.

¹¹ Ọ gharụ nhne ojo, mee nhne b́ru ọma, pio udno, gbasno a.

¹² Kwnornu nụ anya lawurú Nyenwe aị zị n'ẹhni ele mee mma, nsni a nọnu okpukpe be, kọvu ruwhnu Nyenwe aị neemegidne ele neeme nhne ojo."

¹³ Nyele jeemejọ anụ, ọ b́ru nụ anụ gwuzosi rikne nụ nhne ọma?

¹⁴ Ọ b́ru nụ anụ ta awhnụwhnu kwnornu nụ anụ mernu nhne ọma, ovu sọ anụ n'ọnu, ogwnu t́ anụ kwnornu be, ovu lákwadia anụ mini.

¹⁵ Anụ sobisinu Karaịsi lele Nyenwe aị nụ rime ovu anụ. Anụ jiknenu ọ sa ajji nye

ọbula jaasikwa anụ nhne gbasiri olile anya wam zị n'ovu anụ hite n'ọso anya nụ ovu zị wọhnerne.

¹⁶ Anụ b́ta ovu anụ snam, ma ele nookwu nhne ojo kwnornu agwa ọma anụ kweru nụ Karaịsi, iwhnerne ọotu be nụ nhne ojo be nookwu.

¹⁷ Ọ ka mma, ọ b́ru nụ ọ b́ echiche Chiokike nụ anụ tarụ awhnụwhnu kwnornu nụ anụ mernu nhne ọma karụ kwnornu nụ anụ mernu nhne ojo.

¹⁸ Karaịsi nwurnu otu mgba kwnornu mmehie aị, nye ikpe mána nwurnu kwnornu ele ikpe marnụ. Karaịsi mernu ka ma o duru anụ d́ hne Chiokike zị. Ọ nwurnu ẹnwu n'ano-ẹhni, kọvu ọ zị b́dnu n'Enine,

¹⁹ nụ rime enine zị b́dnu,* o znenu zni ele enine ke zị n'oro ikelu izi ọma.

²⁰ Ka b́ ele zá noobno nsni, kpa Chiokike ji nkasi ovu neese nga Noa nọotu ọgbo ke be jiri znọhia badnụ ele nụ ele, badnụ ẹsato kpọi hite nụ mini.

²¹ Ka neegesi nụ ọwu mini znọhiaru anụ, ke b́ nọorio Chiokike ovu zị snam hite n'olizọ n'ẹnwu ke Jizọsi Karaịsi. Ọ b́io ọsnuma rune ke ẹhni.

²² Karaịsi b́ nye larụ oligwe daziri ẹli n'akarikwnunga Chiokike, hne kpakara ele enine izi nụ ọchi risi nụ rikne zị nụ mkpururu a.

4

Owunu Chiokike b́dnu

¹ Kpam masị, Karaịsi tarụ awhnụwhnu n'ano-ẹhni a, anụ jiknenu o mee kpam masị, kwnornu nye tarụ awhnụwhnu n'ano-ẹhni a zima neeme mmehie.

² Kam kpayarụ, ọ zá noowu b́dnu a n'ọwa ka lele kpa agwnurnu nhne ojo ke badnụ, kọvu lele echiche Chiokike.

³ Kwnornu nụ ige anụ tuwhuru n'ige wheru ewhe noowu b́dnu lele ele máa Chiokike zulem. Ige wam anụ noowu b́dnu ke zila rịchna, agwnurnu nhne ojo, ọnwọ manya, okne otne eri, nụ ọkwa renwu.

⁴ Kítna, o jiri be anya nụ anụ zá noosno be neeme nhne ojo berere, ke kpayarụ be nọovu anụ ọnu.

⁵ Kọvu be jaasa ajji gbasiri ẹhni be nụ ruwhnu nye wam jeekpe ele zị b́dnu nụ ele nwurnu ọnwu ikpe.

⁶ Kam kpayarụ, be jiri zni ele nwurnu ọnwu izi ọma nga be zị, ma be kpe ikpe be hite nụ nhne be mernu nga be zị b́dnu lele badnụ, ma be ziri b́dnu n'enine lele Chiokike.

⁷ Mbimambi kpakara nhne zị ndundu. Anụ nwe anya udno, anya d́ anụ ẹli, anụ neekpe okpukpe.

* 3:19 hite nụ Enine Nso

8 Ke kakwo, anụ nwe ọwhnun'anya zị omimi n'esiawururu anụ, kwnornu nụ ọwhnun'anya nookpusni agịda mmehie.

9 Anụ jí ntamu nabnanya ibne anụ.

10 Nye ọbula gweru nkesi ọ nahjuru n'aka Chiokike znenụ ibne a izi, gweru okwesi ọkwnata ovu neekesi oru Chiokike zị ọdo n'odo.

11 Nye neezni izi ọma, ọ zni a lele nụ ọ bu ikwu-ọnu ke hi n'ọnu Chiokike whụya. Nye neezne izi, o mee a lele Chiokike nyernu a iknerna, ma be znarnj Chiokike nụ rime kpakara nhne hite nụ Jizọsi Karaịsi, nye nwe igwugwu nụ rikne tim tọm. Amịm.

Awhnụwhnu lele nye Karaịsi

12 Ele me whnurnu n'anya, ọ gbagwoji anụ anya kwnornu ọrnurna zị igbugbu ke naarna anụ lele nụ ọ bu nhne ikne neeme anụ.

13 Kọvu anụ nwudna, kwnornu nụ anụ sno Karaịsi takọ awhnụwhnu, ma anụ nwe ovu ọso n'ọnu zị agịda nga be jookpume igwugwu a.

14 Ọ bụru nụ be mernu anụ nhne iwhnerne kwnornu nụ rẹwhna Karaịsi, ovu sọ anụ n'ọnu, ka neegesi nụ Enine igwugwu, ke bu Enine Chiokike wu nụ rime anụ.

15 Ọ zá nye ta awhnụwhnu n'esiawururu anụ lele nye gburu badnụ, mọbu nye buznu, mọbu nye mernu nhne ọjọ berere, mọbu nye neelebna anya nụ nhne gbásịla a.

16 Kọvu, ọ bụru nụ nye ọbula ta awhnụwhnu lele nye Karaịsi, iwhnerne tũko nye wam, kọvu o nyee Chiokike ọznarni kwnornu nụ be nookwu a nye Karaịsi.

17 Ige valẹm nga be jaapanizo ikpe n'ezinụ-oro Chiokike. Ọ bụru be panizo ikpe nụ hne a zị, ndaa kpa ọ jaazinu ele kwéle izi ọma Chiokike?

18 Ọ bụru nụ ọ jaara ẹhni ọ znohia ele mee mma,

ndaa hne ele máa Chiokike nụ ele mmehie jaazị?

19 Kam kpayarụ, nye ọbula ke naata awhnụwhnu lele kpa echiche Chiokike jiri zị, gweru ovu ọma yisi ẹhni a kpm kpm n'aka Nye Okike nye kwesiri ọkwnata ovu. Nye wam zne nụ ruwhnu neeme nhne ọma.

5

Ele okno badnụ nụ ele ikoro

1 M naariasno ele okno badnụ zị n'esiawururu anụ hne me bu masị nye okno badnụ, m whnurnu m awhnụwhnu Karaịsi taru, m jeekehia masị igwugwu a nga be jookpume a.

2 Anụ znu atnurnu Chiokike ke zị nụ mkpururu anụ, neelegidne be anya nụ

kpakara ovu anụ kpa Chiokike piuru a, ọ bụo nụ mkpa kpagwu anụ, kọvu kwnornu nụ ọ bu nhne kwesiri omume. Anụ nñ ẹnu anụ, ọ bụo kwnornu iru anụ jeenwehia, kọvu nụ ọ nhne zị n'ovu anụ n'omume.

3 Anụ mée be lele nụ be bu nhne ke aka anụ, kọvu anụ bụru nhne atụ be joosno.

4 Nga Nye Risi Ọznuznu Atnurnu varu, anụ jaanahia okpu-eze zị igwugwu ke jaazị noonwu va-a-a tem.

5 Kpm masị, rumu ikoro, anụ bita ẹhni anụ nụ mkpururu ele okno badnụ. Kpakara anụ woru ọzi wọhnerne n'ovu lele iwo, neeznenu ibne anụ izi. Kwnornu nụ ọkwukwo nsọ kwuru,

"Chiokike noogwuzogidne ele oknomokno, kọvu o neenye ele zị wọhnerne n'ovu oru."

6 Kam kpayarụ, anụ gwedna ẹhni anụ nụ mkpururu aka dikne ke Chiokike, o joovulizo anụ olu n'ige ke a.

7 Anụ vukwnusi a kpakara mkpa anụ, kwnornu nụ nhne gbasiri anụ neemetu a n'ovu.

8 Anya dū anụ ẹli, anụ neese nse, nye irno anụ bu Ekwensu, naagbagharj lele odum noogbo ọgbugbo noopio nye o jeeri.

9 Anụ ziri kwem nụ ọkwnata ovu anụ, anụ gwuzogidne a, kwnornu nụ rumu Nda anụ nụ kpakara ọwa naagawhe otu awhnụwhnu wam.

10 Nga anụ taru awhnụwhnu ige matj, Chiokike ke oru nye sukwuru anụ bna n'igwugwu a kwó okwo nụ Karaịsi, joogwuzote anụ, nyee anụ rikne, gba anụ inwe.

11 Kpakara rikne ọchichi bu ke a ọkwnukokwnu. Amịm.

Obekwu ipne-aznu

12 Saịlasi nwene aji rukna ke kwesiri ọkwnata ovu yinnu m aka gba ọkwukwo izi matj ka, m naariasno anụ naagba akebne nụ ka bu ezi oru Chiokike n'olu hne anụ gwuzo.

13 Ogbako Chiokike ke zị nụ Babiloni,* ke be hohiakoru anụ nụ ya neebekwu anụ, ma Makj nnwọ m.

14 Anụ gweru ọwhnun'anya Karaịsi neebekwu ibne anụ.

Udno dazinu kpakara anụ ele zị nụ rime Karaịsi.

* 5:13 Ka bu Rom

**Ọkwukwo izi
ke Ẹbo
Pita
gbarụ**

Nhne gbasiri ọkwukwo izi ka

Nye gbarụ ọkwukwo ka mernu ele noobno a nsnị mahia nū nye Karaịsi ọbula kwesiri o wu bụdnu ke nọtutu ogwnu Chiokike (1:3). Be kwesiri o jikwasi ezi ọka be nyernu be rikne (1:12).

Ọ dọru be aka nū nsnị gbasiri ele ọwhnurninya aghalaghala, nū ele ọjọ ka bnanam ọgbako Chiokike nooduwu ele kweru n'ezị ọka. N'anya Chiokike, otu ọbochi nū lele otu pokwu awha, otu pokwu awha nū lele otu ọbochi. Chiokike zá noogbu ọkwu nū ọbita mkwna a lele kpa ele badnū neeche. Kọvu Chiokike nwernu ndidi k'agida kwnornu nū ọ másíla a nū otu nye mmehie ọbula joowhu etekne.

Nhne zị n'ọkwukwo izi ka

Obekwu ikwu nū okpukpe (1:1,2)

Kpa ele sno Nyenwe aị kwesiri o wu bụdnu be (1:3-15)

Igwugwu Karaịsi (1:16-21)

Ele ọwhnurninya aghalaghala (2:1-22)

Nyenwe aị jaavariri berere (3:1-18)

¹ Mawa, Saịmoni Pita, nye izi nū nye dazisni anya Jizọsi Karaịsi, naagbaznenu anū ọkwukwo izi ka, anū ele hiteru n'ome mma Chiokike nū Nye Ọznohia aị Jizọsi Karaịsi kehia ọkwnata ovu zị okne ọnu ahia lele ke aị.

² Oru nū udno banū anū aba kpa anū neezne nū ruwuhu naamahia Chiokike nū Jizọsi Nyenwe aị.

Osukwu ikwu Chiokike

³ Chiokike jiri iknerna a nyee aị kpakara nhne a piuru a jeeji wuru bụdnu nọtutu ogwnu Chiokike, kpa a zị neezne nū ruwuhu naamahia nye wam sukwuru aị bna n'igwugwu a nū ọma mma a.

⁴ Hite n'igwugwu a nū ọma mma a, o nyernu aị agida mkwna zị okne ọnu ahia, ma hite nū nhne ele ka, anū kehia igwe n'oyiyi ke Chiokike, ma anū gbanahọru nhne ọjọ ke ọwa ka noovuya a.

⁵ Kwnornu nū otu nhne ka, anū gbalị nọtukwasi n'olu ọkwnata mkpọma anū, ọma mma, n'olu ọma mma, anū tükwasi ọmahia nhne,

⁶ n'olu ọmahia nhne, anū tükwasi badnū knernū ẹhni a, n'olu badnū knernū ẹhni a, anū tükwasi ọsnuta ovu, n'olu ọsnuta ovu, anū tükwasi ọtu ogwnu Chiokike.

⁷ N'olu ọtu ogwnu Chiokike, anū tükwasi ọwhnun'anya rụmu nda, n'olu ọwhnun'anya rụmu nda, anū tükwasi ọwhnun'anya.

⁸ Kwnornu nū ọ bụru nū anū nwernu kpakara nhne ka k'agida, be jeeme anū bụru ele nọornu ẹrnu ọma, naamị mkpuru dū ọmahia Nyenwe aị Jizọsi Karaịsi.

⁹ Kọvu nye nwée nhne ka kpuru isni, ọ whnū nhne zị ikere, o chezume nū be snusnamarnu a nū mmehie ọknani a.

¹⁰ Kam kpayarū, rụmu nda m, anū ziri gnarnagnarna n'ome ikwu Chiokike suk-wuru anū, hōhia anū buru nhne gwuzosiri rikne. Ọ bụru anū mee kpa, anū jáadna rja rja.

¹¹ Kpa, be jeenye anū rikne anū jeeji bna nū rime eli-eze ke zị ọkwukokwunu ke Nyenwe aị nū Nye Ọznohia aị Jizọsi Karaịsi.

¹² Kam kpayarū, me chenwanyannū anū kpakara nhne ka ige ọbula, ọ bụ n'ezị nū anū magwu be, anū gwuzosi rikne n'ezị ọka wam anū nahiaru.

¹³ M che m nū o kwesiri ekwesi o chenwanyanū anū be kpa me zị kọriri bụdnu.

¹⁴ M magwu nū ige maị m joowopu an-ẹhni ka, lele kpa Nyenwe aị Jizọsi Karaịsi kannū m.

¹⁵ M jaagbalị rikne m, whnū nū nga me nwurnu nū anū jaazị neechenwanya be.

Igwugwu Karaịsi

¹⁶ Ọ bụo ọtmutnu ruwhere be jiri akoniche tñu, nga a mernu anū mahia ọvuvu Nyenwe aị Jizọsi Karaịsi, anya aị lawuru whnurnu dudugna a.

¹⁷ Ọ nahiaru ọson'anya nū igwugwu n'aka Chiokike Nda, nga akpiri Chiokike jiri okne igwugwu dna, kaa, "Ka bụ Nnwọ m me whnurnu n'anya, nye nhne a masiri m."

¹⁸ A nrnu akpiri ka hi n'oligwe dna, nga aị nū ya zị n'olu rugwu wam zị nsọ.

¹⁹ Be mernu ikwu-ọnu ele ọwhnurninya wam gwuzosi rikne k'agida, anū bno nsnị nhne be gbarū, kwnornu nū ikwu-ọnu be nū lele tọnji noonwu nū hne gbarū ọchichiri. Ọ jaazị kọriri noonwu tem dū n'ọbochi Jizọsi jaava, iwhe a joonwu nū rime mkpọma anū.

²⁰ Ke kakwo kpakara nhne, anū mahia nū ọ zá nhne ọwhnurninya ọbula be gbarū n'ọkwukwo nsọ ke badnū nwernu rikne kọwa risi a hite nū nhne zị n'echiche a.

²¹ Kwnornu nū ọ zá ọwhnurninya ọbula be jiri echiche badnū vu, kọvu ele badnū kwuru ikwu-ọnu Chiokike kpa Enine Nsọ noodu be kwu.

2

Ele zni nhne aghalaghala

¹ Ele ọwhnurninya aghalaghala whuyaru iwhe n'esilawuru ele Izireli, lele kpa ele zni nhne aghalaghala jowhuya iwhe n'esilawuru anū. Ele ka jeeji aghigho gwebnanya iznizni ọgha zị ọdo n'ọdo ke noovuya ẹnwu, be gnahoru Nyenwe be bụ

nye gbahjuru be, ele neegweya ọla n'iyi zì ngwa ngwa nù risi be.

² Agida ele badnù jooosno apna ome ọyi be. Kwnornu nù nhne be neeme, ele badnù jookwulu apna ezi ọka.

³ Ele zni nhne ka jeeji ọwho-anya kwu nhne be chehjaru nù mkpoma be, gweru anù zù ahia. Ele ikpe omuma be neese be, ọla n'iyi be zà neere anyarna.

⁴ Chiokike sịgbasila ele enine izi ele mernu mmehie, kọvu túbna be nù rime bẹkwnu ẹnwu, hne be turu be ijigba nù rime ọchichiri neese ọbochi ikpe.

⁵ Chiokike sịgbasila ọwa ọknani, kọvu ọhia Noa, nye mernu be badnù ẹsato, nye neezni izi ọma ome mma, nga o gweyaru mgbamini ẹli n'ọwa ele máa Chiokike.

⁶ O marnù ẹli Ọdom nù Gmora ikpe, gweru bẹkwnu rne be lele ẹtnu, mee be buru nhne atù nyee ele joowu bụdnú máa Chiokike.

⁷ O ọhiaru Lọtu nye mee mma, nye bụdnú zila rịchna ke ele noolulu iwu ẹli wam mekaru ẹhni.

⁸ Nye mee mma wam wuru n'esilawuru be, whnù, nù masị ọka ọjo ke gburu a igbugbu nù mkpoma.

⁹ O buri kpa, Nyenwe aị magwu kpa o joodohia ele mee mma nù rime ọrnurna, nù kpa o jaabita ele ọjo nù rime awhnụwhnu du n'ọbochi ikpe,

¹⁰ ke kakwo, ele noosno nhne ruru ọru ke anọ-ẹhni be, neeledna ele nẹchi ẹchi anya.

Be neezni nhne aghalaghala n'anya rikne, ele oknomokno, ele zà nọtut ọgwnu nù ọkaja ele oligwe.

¹¹ O bụbedi ele enine izi ele gbasiri rikne nù ele nwernu iknerna karu ele zni nhne aghalaghala ka, nwée rikne gweru kpari bno ele oligwe nhne nù ruwhnu Nyenwe aị.

¹² Kọvu ele badnù ka nookwulu nhne be ghóhiage, be nù lele anghia nsị inyo, nhne be keru eke neeme kpa o masiri be, be joonwudne be, gbu be lele anghia, be la n'iyi.

¹³ Be jaanahia ọgwo ẹrnu nhne ọjo be mernu, o nọoso be o mee nhne ọjo n'iwnehne. Be bụ nhne iwernerne n'esilawuru anù. Nhne zì nù mkpoma be bụ nhne ọjo kpa be sno anù neeri wiri nọonwo.

¹⁴ Ome ọyi jiri be n'anya, inwe zà nọogwu be nù mmehie, be nooduwhu mkpoma zà rikne, ele mkpoma be jiharu n'ọwho-anya nù ẹrnu ọjo, ele be vuru ọnu.

¹⁵ Be ghahieru apna, gharu apna ziri ezi, snornu apna Balam nnwọ Boso, nye whnurnu ọgwo ẹrnu nhne ọjo n'anya.

¹⁶ Kọvu iyinya a bigbora a nù mmehie a, anghia kwú ọka, kwuru ọka n'ibiri n'nkoli ke badnù, chima era nye ọwhnurninya wam.

¹⁷ Ele badnù ka nù lele ọmi nwée mini, lele erumeru ruwhere mini noovuhari, be bitannu be okne ọchichiri ọkwukokwnu.

¹⁸ Kwnornu nù ọnu be nookwu okne ọka mpako iwhnurniwhno, be naarnabnahna nù rime mmehie ele naagbanahoru bụdnú ọjo.

¹⁹ Be neekwe be mkwna o nwernu ẹhni be, kọvu be n'iwuru be bụ ọhi agwa ọjo noovuya ẹnwu. Kwnornu nù nhne ọbula ke megburu badnù, nye wam bụ ọhi a.

²⁰ O buri nù be gbanahoru nhne noolulu ke ọwa nga be maharu Nyenwe aị nù Nye Ọznohia aị Jizosi Karaisi, be knegidne kwno be nù rime a, o nwegidne be, ọnodi be n'ipne-aznù joojobujo karu nù ọpanizo.

²¹ O ka mma nù be máa apna ome mma karu nù be maharu a, be dnasini iwu nsọ wam be nyernu be aznù.

²² Nhne mernu be gesiri nù elulu wam bụ ezi ọka, "Nkita nwarnu rugburu gburu lahna nù nhne o nwarnu," nù "Ezni be hniarnu ẹhni lahnarnu nù rime ọrot."

3

Ọbochi Nyenwe aị

¹ Ele me whnurnu n'anya, ka bụ ọkwukwo izi ke ẹbo me naagbanu anù, m naakpali echiche ọma nù rime anù.

² Anù chenwanya ikwu-ọnu ele ọwhnurninya zì nsọ kwuru, ya nù iwu Nyenwe aị nù Nye Ọznohia aị nyernu anù hite n'aka ele izi a.

³ Anù mahia nù mbom nù ele ọkwa emo jaava n'ọbochi ipne-aznù, neezne izne n'anọ-ẹhni be.

⁴ Be jaakaa, "Ndaa omezu mkwna ọvwa a? Hite nga ele nda aị nwurnu ẹnwu, kpakara nhne zì koriri kpa o zì hite nù okike ọwa."

⁵ Be ma ama lewhuru anya n'ige wheru ewhe nù Chiokike kwuru ọka, oligwe nù ọwa ziri. O hiri nù rime mini kehia ọwa hite nù mini.

⁶ O bụ masị hite nù mini, ke okne mgbamini ẹli, be jiri lulu ọwa ọknani.

⁷ Kọvu oligwe nù ọwa ke zì kịta bụ ke o bitaru hite n'ikwu-ọnu Chiokike wam, o jeeji bẹkwnu lulu. O bitaru be kwnornu ọbochi o jeekpe ele máa Chiokike ikpe, lulu be.

⁸ Kọvu ele me whnurnu n'anya, anù chézu otu nhne ka, otu ọbochi nù hne Nyenwe aị zì nù lele otu pokwu awha, otu pokwu awha nù lele otu ọbochi.

⁹ Nyenwe aị zà naakpa ndnarna n'omezu mkwna a, lele kpa ele badnù neechi, kọvu o nwernu ogologo ọsnuta ovu hne anù zì, kwnornu nù o pirole nye ọbula whu etekne, kọvu ma kpakara badnù hi nù mmehie be whya.

¹⁰ Kọvu ọbochi Nyenwe aị jaava, o joonu lele nye buznu, ele badnù jáazì neele anya a. Oligwe jeeji okne mkpakpo gawhe, kpakara nhne zì n'olu jeeji okne bẹkwnu gbaza. Ọwa

nụ kpakara ẹrnu be rnụrnu nụ rime a jọowho iwhe.

¹¹ Kpa a mahjaru nụ kpakara nhne jaagbaza, ndaa kpa a kwesiri o wu bụdnu? A kwesiri o wu bụdnu zị nsọ, ya nụ ọ tụ ogwnu Chiokike.

¹² Kpa anụ neele anya ọvva ọbochi Chiokike,* anụ mee ma ọ va ngwa ngwa, oligwe jaagba bẹkwu, kpakara nhne zị n'olu jeeji okne okpe bẹkwu gbaza.

¹³ Kọvu a neele anya oligwe ikne nụ ọwa ikne, lele kpa o kweru mkwna, ọro ome mma.

¹⁴ Kam kpararụ, ele me whnụrnu n'anya, hne anụ neele anya nhne ka, anụ gbalị ma anụ ziri snam, ele nwée ọtna ọtna, anụ nụ Chiokike ziri n'udno.

¹⁵ Anụ vuru nụ mkpọma nụ ogologo ọsnuta ovu Chiokike bụ ọznohia anụ, lele kpa nnwọ nda aị Pọlu, nye a whnụrnu n'anya gbannu anụ n'ọkwukwo hite n'akọniche Chiokike nyernu a.

¹⁶ Ka bụ nhne o nookwu nụ kpakara ọkwukwo izi a, nga ọ naagba nhne gbasiri nhne ka, o nookwu agida nhne siri rikne n'oghohia, ke ele máa nhne nụ ele ovu be zá kwem nọkawahie, lele kpa be neeme nụ nhne berere zị n'ọkwukwo nsọ, ka bụ ma be la n'iyi.

¹⁷ Kọvu anụ, ele me whnụrnu n'anya, anụ magwụ nhne ka, anya dụ anụ ẹli, ma nhne ọjọ ke ele noolulu iwu ẹli neezni gharu o duhie anụ, mee anụ dnahnala n'ogwuzosi rikne anụ.

¹⁸ Kọvu anụ ziri nooso oso nụ oru nụ nhne ọmuma ke Nyenwe aị nụ Nye Ọznohia aị Jizọsi Karaịsi. Kpakara igwugwu zinu a, kịtna, dụ ọkwukokwnu. Amim.

* 3:12 Mọbu ọbochi Nyenwe aị jeekpe ọwa nụ oligwe ikpe

**Okwukwo izi
ke Mbom
Jóni
gbarụ**

Nhne gbasiri okwukwo izi ka

Jóni mernu ma ele Karaịsi mahia nù ò buru a kwuhia mmehie aị, Chiokike jaagbarụnu aị, vume mmehie aị.

Nhne neegesi nù ele Karaịsi nwernu okwnata mkpoma bu ọwhnun'anya be nwernu n'ehni badnu ibne be (3:11-24). Chiokike bu ọwhnun'anya n'iwuru a, ele ke a kwesiri ò nù lele ya masi (4:1-21). Nhne neegesi nù a nwernu omegbu mmehie bu ọwhnun'anya a nwernu n'ehni ele berere, a kweru nù Jizosi bu Nnwọ Chiokike, nù ò bu Karaịsi wam n'ezì, nù enwu a kwnornu aị bu ezi oka (5:1-12).

Nhne zì n'okwukwo izi ka

Ikwu-ọnu ke neenye budnu (1:1-4)

Chiokike bu iwhe aị, Karaịsi bu nhne atu aị (1:5--2:6)

Iwu ikne (2:7-17)

Ele irno Karaịsi nù ele ke Chiokike (2:18--3:10)

Ọwhnun'anya Chiokike nù ọwhnun'anya aị (3:11--4:21)

Omegbu ọwa (5:1-21)

Ikwu-ọnu ke neenye budnu

¹ Ikwu-ọnu Chiokike wam ke panizoru nù mbom, bu ke a nurnu, ke anya aị whnurnu, ke a leri anya, bu ke a kpaturu aka masi, bu nhne a nọkpo okwo a, bu ikwu-ọnu ke neenye budnu.

² Budnu wam whuyaru iwhe, a whnurnu a, gba masi akebe a, a kpọ okwo budnu kwọ okwo ke zì n'aka Nda, omekwo du aị.

³ A nọkpo okwo nhne a whnurnu, nurnu masi, ma anu snornu aị meko nhne. Omekorita aị bu ke aị nù Chiokike nù Nnwọ a Jizosi Karaịsi.

⁴ A gbarụ nhne ka n'okwukwo ma ovu ọso n'ọnu aị zu ozu.

Chiokike bu iwhe

⁵ Ka bu izi a nurnu n'ọnu a bu masi ke a znirni anu. Chiokike bu iwhe, o zá ọchichiri zì nù rime a rja rja.

⁶ Ọ buru nù a kaa nù aị nù ya neemekọ nhne, kovu a neezne izne n'ọchichiri, a bu ele aghalaghala, ezi oka zila aị n'ọnu.

⁷ Kovu, ọ buru nù a zne izne n'iwhe, lele kpa o neezne izne n'iwhe, a neenwe mekorita n'esilawuru aị, ọvna Jizosi Nnwọ a, nọsunsuna kpakara mmehie aị.

⁸ Ọ buru nù a kaa nù a nwée mmehie, a nooduhie ehni aị, ezi oka zila aị n'ọnu.

⁹ Kovu, a kwuhia mmehie aị, Chiokike bu nye kwesiri okwnata ovu nù nye mee mma, ọ jaagbarụnu aị mmehie aị, ọ snumakwo kpakara aruru-eli aị.

¹⁰ Kovu, a kaa nù a méné mmehie, a neeme a nye aghalaghala, ikwu-ọnu a zila nù rime aị rja rja.

2

¹ Rumu takiri m, m naagbanu anu okwukwo ma anu gharu o mee mmehie. Kovu, ọ buru nù nye obula mehiero, a nwernu nye nookwunu aị ọnu nù ruwunu Nda aị, rẹwhna a bu Jizosi Karaịsi, nye mee mma.

² Jizosi bu nye ji ọvna na a naawhaji-eli kwnornu mmehie aị, ọ buo mmehie ke aị kpọ, kovu mmehie kpakara ele badnu.

³ Ka bu nhne neegesi nù a magwu nye ọ bu, ọ buru nù a bita kpakara nhne o nyernu n'iwu.

⁴ Ọ buru nù a kaa nù a magwu nye ọ bu, kovu a zá naabita iwu a, a bu ele aghalaghala, ezi oka zila aị n'ọnu.

⁵ Ka bu nhne neegesi nù a magwu Chiokike, ọ buru nù a bita iwu a, ọwhnun'anya Chiokike zuru ozu n'ovu aị.

⁶ Nye obula ke kaa nù ọ zì nù rime a, joowu budnu lele kpa Jizosi wuru.

Iwu ikne

⁷ Ele me whnurnu n'anya, m zá m naagbanu anu okwukwo iwu ikne, kovu iwu oknani. Iwu oknani ka bu ke anu nurnu hite nù ọpanizo.

⁸ Kovu m naagbanu anu iwu ikne, ezi oka wam zì nù rime Jizosi, nù rime anu, kwnornu nù ọchichiri naagawhe, ezi iwhe wam nọomukwasi aị.

⁹ Nye obula ke kaa nù ọ zì n'iwhe, kovu, sno nwene a irno, zì koriri n'ọchichiri.

¹⁰ Nye obula ke whnurnu nwene a n'anya zì n'iwhe wam, ọ zá nhne jeeme a ọ kpọbi ọchi.

¹¹ Nye obula ke snornu nwene a irno zì n'ọchichiri, neezne izne n'ọchichiri, ọ máa hne o neezne kwnornu nù ọchichiri mernu a okpu isni.

¹² Rumu takiri m, m naagbanu anu okwukwo, kwnornu nù Chiokike gbarunu anu mmehie kwnornu rẹwhna Karaịsi.

¹³ Ele nda, m naagbanu anu okwukwo, kwnornu nù anu magwu Karaịsi, nye zì hite n'ọpanizo.

M naagbanu anu okwukwo, rumu ikoro, kwnornu nù anu megburu nye ojo wam.

Rumu takiri m, m naagbanu anu okwukwo, kwnornu nù anu magwu Nda wam.

¹⁴ Ele nda, m naagbanu anu okwukwo, kwnornu nù anu magwu Karaịsi, nye zì hite n'ọpanizo.

M naagbanu anu okwukwo, rumu ikoro,

kwnornu nù anù gbasìri rikne,
ikwu-ònu Chiokike zì nù rime anù,
kwnornu nù anù megbulem nye ọjọ
wam.

*Anù whnú nhne ọwa
n'anya*

¹⁵ Anù whnú ọwa n'anya, mọbu nhne zì
n'ọwa. Ọ búrù nù nye ọbula whnú ọwa n'anya,
ọwhnun'anya ke Nda zìla nù rime a.

¹⁶ Kpakara nhne zì n'ọwa bụ ẹgwnurnu
nhne ọjọ ke badnú, nù ẹgwnurnu nhne ọjọ ke
anya, nù oknomokno ke mkpọma ke badnú.
Nhne ka híge n'aka Nda aì va, o hí n'ọwa va.

¹⁷ Ọwa nù kpakara ẹgwnurnu nhne ọjọ
ke zì nù rime a jaagawhe, kọvu nye ọbula
ke neeme echiche Chiokike jaazì bụdnu
ọkwnukokwnu.

Nye neemegidne Karaìsi

¹⁸ Rùmu takìri m, ka bụ ige ipne-aznú,
anù nùrnù nù nye wam neemegidne Karaìsi
vawa, me kanù anù, agida ele neemegidne
Karaìsi valẹm. Ka neegesi nù ige wam zì
ndundu.

¹⁹ Be hiri nù hne a zì whọga, kwnornu nù
be nù aì zìla n'otu n'ezì. Ọ búrù nù aì nù be
zì n'otu, be zernu adazìgidnenu aì. Ọwhoga
be neegesi nù aì nù be zìla n'otu.

²⁰ Kọvu, Nye Nsọ wam teru anù mọno, ka
neegesi nù kpakara anù mahjaru ezi ọka.

²¹ M zá m naagbanù anù ọkwukwo ka
kwnornu nù anù máa ezi ọka, kọvu kwnornu
nù anù mahjaru ezi ọka. Aghalaghala zìla
n'ezì ọka.

²² Nyele bụ nye aghalaghala? Ọ bụ
nye wam ke gọnahoru nù Jizọsi bụ Karaìsi.
Nye wam bụ nye neemegidne Karaìsi. Ọ
gọnahoru Nda nù Nnwọ a.

²³ Nye ọbula ke gọnahoru Nnwọ máa nye
Nda wam bụ, nye ọbula ke magwù Nnwọ
magwù Nda wam masì.

²⁴ Anù ledu anya nù nhne anù nùrnù hite
nù mbọm dazìgidnenu nù rime anù. Ọ búrù
kpam, anù jaadazìgidne nù rime Nnwọ nù
rime Nda.

²⁵ Bụdnu kwó okwo bụ nhne o kweru aì nù
mkwna.

²⁶ M naagba ka n'ọkwukwo kwnornu ele
piuru o duwhu anù.

²⁷ Kọvu Karaìsi teru anù mọno Enine Nsọ.
O kwésìle nye ọbula zni anù nhne, mọno o
teru anù zì nù rime anù neezni anù kpakara
nhne lele kpa otute mọno wam zì ire, ma
anù dazìgidne nù rime Karaìsi.

²⁸ Kìtna, rùmu takìri m, anù dazìgidne nù
rime a, ma nga ọ jọowhuya iwhe, ovu si aì
rikne o gwazoru nù ruwhnu a, iwheerne
jọotu aì.

²⁹ Anù magwù nù Karaìsi bụ nye mee
mma, nye ọbula ke neeme mma bụ nnwọ
Chiokike.

3

Rùmu Chiokike

¹ Le, kpa Chiokike jiri whnú aì n'anya, o
sukwu aì rùmu a. Ka bụ nhne a bụ n'ezì.
Kam kpayarù, ele zì n'ọwa máa ele a bụ, lele
kpa be máa nye ọ bụ.

² Ele me whnúrnù n'anya, a bụ rùmu
Chiokike kìtna, nhne a jọobu whọge iwhe
kìtna. Kọvu a magwù nga ọ jaava, a jọonu lele
kpa ọ nù, kwnornu nù a jọowhnu a kpa ọ nù.

³ Nye ọbula ke nwernu olile anya ka
neeme ẹhni a zìri snam, lele kpa ọ zì snam.

⁴ Nye ọbula ke neeme mmehie, noolulu
iwu, kwnornu nù mmehie bụ olulu iwu.

⁵ Kọvu anù magwù nù ọ whųyaru iwhe
ma o gweme kpakara mmehie aì. Ya
n'iwhuru a nwée mmehie.

⁶ Nye ọbula ke zì bụdnu nù rime Karaìsi,
zá neemezne mmehie. Nye neeme mmehie
máa nye Karaìsi bụ, nye wam whnúlele a
anya.

⁷ Rùmu takìri, anù kwé nye ọbula duwhu
anù. Nye ọbula ke neeme nhne búrù ọma bụ
nye mee mma, lele kpa Karaìsi bụ nye mee
mma.

⁸ Nye ọbula ke neemezne mmehie bụ nye
Ekwensu, kwnornu nù Ekwensu bụ nye
neeme mmehie hite n'ọpanizo. Kam kpa-
yarù Nnwọ Chiokike jiri whųya iwhe, ma
o lulu kpakara ẹrnu ke Ekwensu.

⁹ Nye ọbula ke Chiokike murnu zá
neemezne mmehie, kwnornu nù mkpuru
Chiokike zì nù rime a, o jéenwe rikne mee
mmehie, kwnornu nù Chiokike bụ Nda a.

¹⁰ Ka bụ nhne rùmu Chiokike jiri zìri ichne
nù hne rùmu Ekwensu zì. Nye ọbula ke zá
neeme nhne búrù ọma bụo nnwọ Chiokike,
ma nye ọbula ke whnúge nwene a n'anya.

Anù whnú ibne anù n'anya

¹¹ Ka bụ izi anù nurnu hite n'ọpanizo, anù
whnúrita ibne anù n'anya.

¹² Ọ zá nye nù lele Keni, nye Ekwensu
nẹchi o gbu nwene a. Kìni kpayarù o jiri
gbu a? Kwnornu nù ẹrnu a bụo ọma, kọvu
ẹrnu nwene a búrù ọma.

¹³ Rùmu nda m, ọ gbagwoji anù anya, ọ
búrù nù ele zì n'ọwa snornu anù irno.

¹⁴ A magwù nù a hiri n'ẹnwu bna nù bụdnu,
kwnornu nù a whnúrnù rùmu nda aì n'anya.
Nye ọbula ke zá nọowhnu n'anya bụ nye
nwurnu ọnwu.

¹⁵ Nye ọbula ke snornu nwene a irno bụ
nye noogbu badnú. Anù magwù nye ọbula
ke noogbu badnú nwée bụdnu kwó okwo nù
rime a.

¹⁶ Ka bụ nhne neegesi ọwhnun'anya, Jizọsi
Karaìsi gweru bụdnu a nyee kwnornu aì.
A kwesiri o nyee bụdnu aì kwnornu rùmu
nwene aì masì.

¹⁷ Ọ búrù nù nye ọbula nwernu ẹkwnu
k'ọwa ka, whnú nwene a zì nù mkpa, ọ

dóla obirizi, nye wam nwée ɔwhnun'anya Chiokike nù rime a.

¹⁸ Rùmú takírí m, a whnú n'anya n'ònu etekne m̀òbu n'ikwu-ònu kpòí, kòvu n'èrnu n'èzi ọka.

¹⁹ Ka b̀u nhne neegesi nù a magwù ezi ọka, ke neeme mkpoma aì si rikne nù ruwhnu Chiokike,

²⁰ ọ b̀ubedi ovu aì naama aì ikpe, Chiokike kakwo ovu aì, ọ magwù kpakara nhne.

²¹ Ele me whǹrnu n'anya, ọ b̀uru nù ovu aì mána ikpe, ovu jeesi aì rikne o gwuzo nù ruwhnu a.

²² A jaanahòru a nhne ọbula a ǹorìo a, kwnornu nù a naab̀ita iwu a neeme masì nhne ǹososo a ovu n'ònu.

²³ Ka b̀u nhne o nyernu n'iwu, a kweru nù r̀ewhna Nnwò a Jizòsì Karaìsì, a whǹrita ibne aì n'anya lele kpa o nyernu aì n'iwu.

²⁴ Ele naab̀ita iwu a zì b̀udnu nù rime a, ya nù rime be. Enine Nsò wam o nyernu aì b̀u nhne neegesi nù ọ zì nù rime aì.

4

Anù tule kpakara enine

¹ Ele me whǹrnu n'anya, anù kwéko kpakara enine, anù tule kpakara enine ma be hi n'aka Chiokike, kwnornu nù ag̀ida ele ɔwhnun'ninya aghalaghala bnarnù nù rime ọwa.

² Ka b̀u nhne anù jeeji mah̀ja Enine Chiokike, enine ọbula ke kwuh̀jaru nù Jizòsì Karaìsì varù n'anò-èhni hi nù Chiokike va.

³ Kòvu enine ọbula ke kwéle nù Jizòsì hiri nù Chiokike va, enine ka híge nù Chiokike. Ka b̀u enine nye neemeig̀dne Karaìsì, nye anù ǹrnu ọ jaava, ọ zì n'òwa k̀itna.

⁴ Rùmú takírí m, anù b̀u rùmú Chiokike, anù megbulem ele irno wam, kwnornu nù nye wam zì nù rime anù kakwo nye wam ke zì n'òwa.

⁵ Ele ka hi n'òwa, be nookwu hite nù nhne be magwù n'òwa, ele zì n'òwa noobnonu be nsnì.

⁶ A hi hne Chiokike zì va, nye ọbula ke magwù Chiokike ǹonu nhne a nookwu. Kòvu nye ke máa Chiokike zà ǹonu nhne a nookwu. Ka b̀u nhne a jiri mah̀ja enine ezi ọka nù enine aghalaghala.

Chiokike b̀u ɔwhnun'anya

⁷ Ele me whǹrnu n'anya, a whǹrita ibne aì n'anya, kwnornu nù ɔwhnun'anya hi nù Chiokike va. Nye ọbula ke ǹowhnu n'anya b̀u nye Chiokike m̀rnu, nye wam magwù Chiokike.

⁸ Nye ọbula ke whnú n'anya máa Chiokike, kwnornu nù Chiokike b̀u ɔwhnun'anya.

⁹ Chiokike gesiri aì ɔwhnun'anya n'esiławuru aì, kpa o ziyaru Nnwò ọ m̀rnu kpòí n'òwa, ma a nwernu b̀udnu hite nù rime a.

¹⁰ Ka b̀u ɔwhnun'anya, ọ b̀uò nù a whǹrnu Chiokike n'anya, kòvu ọ whǹrnu aì n'anya ziya Nnwò ma ọ b̀uru nhne ariohna be jeeji gbarù mmehie aì.

¹¹ Ele me whǹrnu n'anya, lele kpa Chiokike whǹrnu aì n'anya, a kwesiri ọ whǹrita ibne aì n'anya.

¹² Ọ zà nye ọbula ke whǹleru Chiokike anya, kòvu ọ b̀uru nù a whǹrita ibne aì n'anya, Chiokike wu nù rime aì, ɔwhnun'anya a zuru ozu nù rime aì.

¹³ A magwù nù a wu nù rime Chiokike, nù Chiokike wumako nù rime aì, kwnornu nù o nyernu aì Enine a.

¹⁴ A whǹrnu, gba akebbe nù Nda ziyaru Nnwò a ma ọ b̀uru Nye Ọznohia ke ọwa.

¹⁵ Nye ọbula ke kweru nù Jizòsì b̀u Nnwò Chiokike, Chiokike wu nù rime nye wam, nye wam masì wu nù rime Chiokike.

¹⁶ Kam kpayarù, a magwù, kweru masì nù ɔwhnun'anya Chiokike b̀u n'èzi.

Chiokike b̀u ɔwhnun'anya. Nye ọbula ke ǹowhnu n'anya wu nù rime Chiokike, Chiokike wu masì nù rime a.

¹⁷ Chiokike mernu ɔwhnun'anya a zu ozu n'esiławuru aì, ma a nwernu mkpoma siri rikne n'òbòchi ikpe, kwnornu nù a nù lele ya n'òwa ka.

¹⁸ Ogwnu zìla n'òwhnun'anya. Ọwhnun'anya ke zuru ozu ǹechihala ogwnu, kwnornu nù ogwnu nù awhǹwhnu nookno aka. Nye ọbula ke ǹeotu ogwnu zúge ozu n'òwhnun'anya.

¹⁹ A ǹowhnu n'anya kwnornu nù Chiokike beru ọsno whnú aì n'anya.

²⁰ Nye ọbula ke karù nù ọ whǹrnu Chiokike n'anya, kòvu sno nwene a irno b̀u nye aghalaghala. Nye ọbula ke whǹuge nwene a n'anya, b̀u nye ọ ǹowhnu anya, nwé rikne whnú Chiokike nye ọ zà ǹowhnu anya n'anya.

²¹ Ka b̀u nhne o nyernu n'iwu, nye ọbula ke whǹrnu Chiokike n'anya, ọowhnriri nwene a n'anya.

5

Okwnata ovu nù Nnwò Chiokike

¹ Nye ọbula ke kweru nù Jizòsì b̀u Karaìsì hi nù Chiokike va. Nye ọbula ke whǹrnu Nda n'anya whǹrnu Nnwò a n'anya masì.

² Ka b̀u nhne neegesi nù a whǹrnu rùmú Chiokike n'anya, ọ b̀u ọ whnú Chiokike n'anya, neeme nhne o nyernu n'iwu.

³ Ka b̀u nhne neegesi nù a whǹrnu Chiokike n'anya, ọ b̀uru a b̀ita nhne o nyernu n'iwu, iwu Chiokike zìla r̀inya.

⁴ Kwnornu nù nye ọbula ke b̀u nnwò Chiokike neemegbu ọwa. Okwnata ovu aì nù Chiokike b̀u nhne neemegbu ọwa.

⁵ Ndaa nye neemegbu ọwa? Ọ bụ nye wam ke kweru nụ Jizọsi bụ Nnwọ Chiokike.

⁶ Jizọsi Karaịsi bụ nye wam jiri ọvna nụ mini va. Ọ bụo mini kpọi, kọvu ọ varụ hite n'ọvna nụ mini. Enine Nsọ naagba akebne a, a magwụ nụ akebne a bụ ezi ọka.

⁷ Kwnornu nụ nhne akebne ẹto zị,

⁸ Enine, mini nụ ọvna.* Nhne ẹto ka kwerikọtaru otu nhne.

⁹ Ọ bụru a kweru nụ nhne badnụ kwuru, nhne Chiokike kwuru kakwo, kwnornu nụ ọ bụ akebne Chiokike gbarụ gbasiri Nnwọ a.

¹⁰ Nye ọbula ke kweru nụ Nnwọ Chiokike nwernu nhne akebne ka nụ mkpọma a. Nye ọbula ke kwéle nụ Chiokike neeme a nye aghalaghala, kwnornu nụ o kwéle n'akebne Chiokike gbarụ gbasiri Nnwọ a.

¹¹ Ka bụ akebne wam, Chiokike nyernu aị bụdnu kwó okwo, bụdnu wam zị nụ rime Nnwọ a.

¹² Ka neegesi nụ nye ọbula ke nwernu Nnwọ Chiokike nwernu bụdnu kwó okwo, nye ọbula ke nwéee Nnwọ Chiokike nwéee bụdnu.

Ọka ipne-aznụ

¹³ M naagbanụ anụ ele kweru nụ rẹwhna Nnwọ Chiokike, ma anụ mahija nụ anụ nwernu bụdnu kwó okwo.

¹⁴ Ka bụ nhne neemesi aị ovu rikne ọ vakwnusi Chiokike. A magwụ nụ a rjọ nhne ọbula lele kpa echiche ovu a jiri zị, ọ jọnu aị.

¹⁵ Ọ bụru nụ a magwụ nụ ọ nọnu nhne a nọorio a, ovu siri aị rikne nụ a jeenwehija nhne nọorio a.

¹⁶ Ọ bụru nụ nye ọbula whnurnu nwene a mernu mmehie ke zá noodubna n'ẹnwu, o kpe okpukpe ma Chiokike nyee a bụdnu. M nookwu nhne gbasiri ele neeme mmehie ke zá noodubna n'ẹnwu. Mmehie ke noodubna n'ẹnwu zị. M zá naakaa badnụ kpe okpukpe gbasiri a.

¹⁷ Kpakara nhne bụo ọma bụ mmehie, kọvu agwna mmehie zá noodubna n'ẹnwu.

¹⁸ A magwụ nụ nye ọbula Chiokike murnu zá neemezne mmehie. Nnwọ Chiokike naabija nye ọbula ke Chiokike murnu, nye ojo wam nwéee rikne mekasi a nhne.

¹⁹ A magwụ nụ a bụ rụmu Chiokike, kọvu kpakara ọwa zị nụ mkpururu nye ojo wam.

²⁰ A magwụ nụ Jizọsi Karaịsi Nnwọ Chiokike varụ, ma a mahija nye wam bụ ezi ọka. A zị masị nụ rime nye wam ke bụ ezi ọka, Jizọsi Karaịsi Nnwọ a. Ya n'iwhuru a bụ Chiokike n'ezi nụ bụdnu kwó okwo.

²¹ Rụmu takiri m, anụ gweme ẹhni anụ n'okwa rẹnwu.

* 5:8 Agwna okwukwo ke be gbarụ kpa agida awha whemernu kwu kwno, n'oligwe Nda, Ikwu-ọnu nụ Enine Nsọ. Nhne ẹto ka nookwu otu ọnu. 8 Nhne akebne ẹto zị n'ọwa, Enine, mini nụ ọvna.

**Okwukwo izi
ke Ebo
Jóni
gbarụ**

Nhne gbasiri okwukwo izi ka

Nga Jóni gbarụ *Okwukwo izi Jóni ke ebo*, ọ gholam nye okno badnụ. O gwezenu a “Nyerinya oma nụ rụmu a,” ke bu ọgbako Chiokike. Okwukwo izi matị ka nookwu ọka gbasiri ọwhnun'anya n'ehni ibne be, nọodo be aka nụ nsnị gbasiri ele neezni nhne aghalaghala.

Nhne zị n'okwukwo izi ka

Ọpanizo (1-3)

Ezi ọka nụ Ọwhnun'anya (4-11)

Okwukwo (12-13)

Obekwu ikwu nụ okpukpe

¹ Mawa, Jóni, nye okno badnụ, naagbazenu nwerinya Chiokike ọhíaru nụ rụmu a okwukwo, ele me whnuru n'anya n'ezí, ọ búo me nụ nsnunu m, kọvu kpakara ele magwụ ezi ọka.

² Kwnornu nụ ezi ọka ke zị nụ rime aị, ke jaazigidne aị tim tòm.

³ Oru nụ obirizi nụ udno ke hi n'aka Chiokike Nda nụ Jizọsi Karaịsi Nnwọ Nda aị va, jaadazinu aị nụ ezi ọka nụ ọwhnun'anya.

Ezi ọka nụ ọwhnun'anya

⁴ O neenye m ovu ọso n'ọnu kpa me nọowhnu rụmu ị neezne izne n'ezí ọka lele kpa Nda aị nyernu aị n'iwu.

⁵ Kịtna, nwerinya oma, m zá m naagbanụ ị iwu ikne, kọvu ọ bú kọriri ke a ị híte nụ mbọm. M naarịasno ma a whnurita ehni aị n'anya.

⁶ Ka bú ọwhnun'anya wam, a zne izne noobno nsnị nụ nhne Chiokike nyernu n'iwu. Lele kpa anụ nurnu n'ọpanizo, iwu a bú ma anụ zne izne n'ọwhnun'anya.

⁷ Agịda ele nooduwu ele badnụ, ele zá neekweru nụ Jizọsi Karaịsi varụ n'anọ-ehni, bnarnụ nụ rime ọwa. Nye nụ kpam bú nye nooduwu nụ nye neemegidne Karaịsi.

⁸ Anụ ledu anya, ọ zị anụ tuwuh nhne anụ dogburu ehni anụ n'ernu, kọvu ma anụ nwehija ọgwo ernu zuru ozu.

⁹ Nye ọbula ke neezne nụ ruwhnu gharu nhne Karaịsi znirni máa Chiokike. Kọvu nye ọbula ke zị neeme iznizni a magwụ Nda nụ Nnwọ a.

¹⁰ Nye ọbula ke vakwnusiri anụ ke gwéyala iznizni ka, anụ kwúbana ọro anụ, mọbu kanụ a, “Ị valẹ.”

¹¹ Nye ọbula ke kannụ a, “Ị valẹ” jeekehija igwe n'ernu ọjọ a.

¹² M nwernu m agịda nhne me jaagbanụ anụ, kọvu m jéeme kpam n'okwukwo nụ nki.

Tnụnuma, m neele anya nụ m jaava me nụ anụ kwu ọka ruwhnu nụ ruwhnu, kpam, ovu ọso n'ọnu aị joozu ozu.

¹³ Rụmu nwene i rinya kam Chiokike ọhíaru neebekwu i.

**Okwukwo izi
ke Eto
Jóni
gbarụ**

Nhne gbasiri okwukwo izi ka

Nga Jóni gbarụ *Okwukwo izi Jóni ke eto*, ọ ghọlam nye okno badnụ. O gweznenu nye risi ogbako Chiokike, nye rẹwhna a bụ Gayọsi. Okwukwo izi ka, naaznarni Gayọsi kwnornu ọnu ọma a hne rụmu Chiokike berere zị, nọodo masị a aka nụ nsnị gbasiri otu nyerukna be kwu Diotirifesi.

Nhne zị n'okwukwo izi ka

Opanizo (1-4)

Gayọsi kwesiri okwnata ovu (5-8)

Diotirifesi mékwala nkari (9-10)

Demetirisi mekwarụ nkari (11-12)

Okwukwo (13-15)

¹ Mawa, nye okno badnụ, naagbaznenu Gayọsi enyi m me whnurnu n'anya nụ ezi ọka.

² Enyi m me whnurnu n'anya, okpukpe m bụ ma ẹhni i si rikne, ma kpakara nhne i neeme gakwanụ i nkari lele kpa mkpuru ovu i naagakwa nkari.

³ O nyernu m mkpoma ọso n'ọnu k'agida nga agwna rụmu nda varụ kanụ m nhne gbasiri okwnata ovu i n'ezị ọka nụ kpa i neezne izne n'ezị ọka wam.

⁴ Ọ zà nhne nọoso m ovu n'ọnu kakwo nga me nurnu nụ rụmu m neezne izne n'ezị ọka.

Gayọsi kwesiri

okwnata ovu

⁵ Ezi enyi m me whnurnu n'anya, i kwesiri okwnata ovu nụ kpakara nhne i neemenu rụmu nda, ọ bụ n'ezị nụ be bụ ele izne n'ẹhni i.

⁶ Be kannụ ogbako Chiokike ọwhnun'anya i, ọ jọburu ọma ma i zihala be kpa o kwesiri n'anya Chiokike.

⁷ Be kwnornu rẹwhna Karaisi whọga zni izi ọma, be kwéle ọ nahọru oyi aka hite n'aka ele kwé ekwe.

⁸ A kwesiri ọ nabnanya ele ka nkari ma aị nụ be snornu rnụkota ọnu ezi ọka n'otu.

Diotirifesi mékwala nkari

⁹ M gbaznenu m ogbako Chiokike okwukwo, kọvu Diotirifesi nye noopio ọ bụru nye risi kwéle obno nsnị nụ nhne me nookwu.

¹⁰ Nga me varụ, m jeeme ele badnụ mahia nhne o neeme, kpakara nhne o nookwu gbasiri aị nụ kpakara aghalaghala a. Tụkwasi n'olu nhne ka, o kwéle ọ nabnanya rụmu nda aị. Ele pioru o kwubnanya rụmu nda aị, o kwéle be, kọvu ọ chihala be n'ogbako Chiokike.

Demetirisi mekwarụ nkari

¹¹ Enyi m me whnurnu n'anya, i snó nhne bụo ọma, kọvu snornu nhne bụru ọma. Nye ọbula ke neeme nhne bụru ọma hi hne Chiokike zị va. Nye neeme nhne ọjọ whnuge Chiokike anya ria ria.

¹² Kpakara ele badnụ nookwu Demetirisi ọka ọma hite n'ezị ọka. Aila masị nookwu a ọka ọma, anụ magwụ nụ akebbe aị bụ ezi.

Obekwu ikwu ipne-aznụ

¹³ M nwernu m agida nhne me kwesiri ọ gbanụ i n'okwukwo, kọvu m jéjei mkpisi okwukwo nụ nki naagba a.

¹⁴ M neele anya nụ m jaava whnụ i anya ige mati, me nụ jị kwu ọka ruwhnu nụ ruwhnu.

¹⁵ M neekpe ma Chiokike nyee i udno. Kpakara ele enyi i neebekwu i. Bekwu kpakara ele enyi aị n'otu n'otu.

Ọkwukwo izi Judu gbarụ

Nhne gbasiri ọkwukwo izi ka

Judu gbarụ *Ọkwukwo izi Judu*, nọdo ele badnụ aka nù nsnị gbasiri ele neezni nhne aghalaghala, ele karu nù be bụ ele kweru ekwe. Lele 2 *Pita*, Judu, n'ọkwukwo matị ka, naakwnagidne nye nọogwnu a, ọ naakaa be gba ọtna kwnornu ọkwnata mkpọma ke Chiokike nyernu ele ke a otu mgba be ọbịta.

Nhne zị n'ọkwukwo izi ka

Ọpanizo (1-2)

Ele neezni nhne aghalaghala (3-16)

Ezni ọ ọbịta ọkwnata mkpọma (17-23)

Ọjija zjnu Chiokike (24-25)

¹ Mawa, Judu, nye izi ke Jizọsi Karaịsi, nye bụ kwno nwene rukna Jemisi, naagbaznenu kpakara ele Chiokike sukwuru ọkwukwo, ele wu nù rime ọwhnun'anya Chiokike Nda, ele Jizọsi ọbịtaru.

² Obirizi nù udno nù ọwhnun'anya banu anụ ọba.

Ele neezni nhne aghalaghala

³ Ele me whnurnu n'anya, m neeyisi rikne naagbanu anụ ọkwukwo gbasiri ọznohia ke a nwernu igwe nù rime a, ọ zị mkpa me gbanu anụ ma anụ yisi ẹhni naagba ọtna kwnornu nù ọkwnata ovu ke Chiokike nyernu ele ke a otu mgba be ọbịta.

⁴ Kwnornu nù agwna ele zá nọotu ogwnu Chiokike rjbnanyarnu hne a máa n'esilawuru aị, ele naagbanwo izi ọma ke oru Chiokike, ma be nwe oghere rnụ ẹrnu ojo be, be gọnahoru Jizọsi Karaịsi Nyenwe aị nù eze aị. Ọkwukwo nsọ kwuru nhne gbasiri be agịda ige wheru ewhe nù be jaanahia ọmuma ikpe.

⁵ M neechenwanyanụ anụ nhne ka, ọ bụ n'ezị nù anụ magwu kpakara nhne ka, nù Nyenwe aị ọghiaru ele Izireli n'ẹli Ijipiti, kọvu omekwo, gbu kpakara ele kwé ekwe.

⁶ Anụ chenwanya ele enine izi ele ọbitala ọnodi be nù mbọm, kọvu gharu ọnodi be, Chiokike ọtu be ijigba tim ọm nù ọchichiri, ọbịta be dụ n'okne ọbochi ikpe wam ọ jaama be ikpe.

⁷ Lele kpa Sodom nù Gómora nù kpakara ẹli gbaru be gburugburu, ele wu nù rime be ruru aruru-ẹli ke ome ọyi nù nhne zila rịchna, be taru be awhnwuhnu bekwnu noonwu tim ọm, ma be ọburi nhne ọdo aka nù nsnị nyee kpakara ele badnu.

⁸ Kpam masị, ele nọoro mboro ojo ka mehieru megidne anọ-ẹhni be, be ledna ọchi risi Chiokike anya, ele kajarụ ele wu n'oligwe.

⁹ Ọ bụbedi nye risi ele enine izi Maịkeli, nga ya nù Ekwensu nọdogbuta iznu Mozizi, nwée rikne kwu ọka ojo megidne Ekwensu, kọvu ọ karu, "Nyenwe aị bigbo i."

¹⁰ Kọvu ele ka naakaja nhne be máa, be nù lele rumu anọhia ojo, neeme nhne nọogwnu be, kpakara nhne ka ọjodoka be.

¹¹ Awhnwuhnu jaazjnu be. Be snornu apna Keni. Be kwnornu ịwai dnabna nù mmehie Balam, be bụ ele risi rikne lele Kora, be joowhu etekne lele kpa Kora whuru.

¹² Ele ka nù lele rune nù iriri omekọrita anụ, iwhnerne zá nọotu be o mee nhne ojo. Be nọoznu ẹhni be kpọi. Be nù lele ẹrumeru oligwe ruwhere neewhesa, be nwée rikne gweya mini ozuzo. Be nù lele isisi mla mkpuru, ọ bụbedi n'okochi, isisi be vnurnu hite nù ẹgwnugwnu a, ke nwurnu ọnwu n'ezị.

¹³ Be nù lele okne abaka-mini ke osimini, be nù ẹrnu iwhnerne be nọogbo okoto. Be nù lele mbọ ghieru apna, ele Chiokike ọbitanu oghere n'okne ọchichiri ọkwnukokwnu.

¹⁴ Ọ bụ Inoku, nye ẹsau hite n'Adam, nye kwuru n'agịda ige wheru ewhe, "Le, Nyenwe aị jaava, ya nù agịda ele nsọ a be ọjogwnuli ọnu,

¹⁵ o jeekpe kpakara ele badnu ikpe, ọ jaama kpakara ele máa Chiokike ikpe, kwnornu kpakara aruru-ẹli be ruru, nù kpakara ọka ele mmehie ka máa Chiokike kwuru kwugidne a."

¹⁶ Ka bụ ele zị naatakpo ntakpo, noobno ele berere nhne, be noosno nhne ojo ke nọogwnu mkpọma be, be noovugnada ẹhni be, naaznarni ele badnu ma be nwehija nhne be pioru.

Ọdo aka nù nsnị nù ezni

¹⁷ Ele me whnurnu n'anya, anụ chenwanya nhne ele izi Nyenwe aị Jizọsi Karaịsi kwuru.

¹⁸ Be kannu anụ, "N'ige ipne-aznu, ele ọjomu anụ rumu jaava, ele noosno nhne ojo ke nọogwnu mkpọma máa Chiokike be."

¹⁹ Ka bụ ele neegweya okewa, ele anọ-ẹhni nẹchi, ele nwée Enine Chiokike.

²⁰ Kọvu anụ, ele me whnurnu n'anya, anụ wulizọ ẹhni anụ lele ọro hite nù ntụ-ẹli ọkwnata ovu anụ ke zị nsọ. Anụ kpe okpukpe nù rikne Enine Nsọ.

²¹ Anụ ọbịta ẹhni anụ n'ọwhnun'anya ke Chiokike, kpa anụ noosno, neele anya obirizi ke Nyenwe aị Jizọsi Karaịsi jeenye anụ nù ọbđnu kwó okwo.

²² Anụ ọdnu ele nwernu mkpọma lawuru obirizi.

²³ Anụ znọhia ele berere, ọghia be lele ele hi nù rime bekwnu. Anụ gweru ogwnu ọdnu ele berere obirizi. Kọvu anụ sno ọ bụbedi iwo ke mmehie be gburu hite n'ẹrnu anọ-ẹhni irno.

Ojja z̄inu Chiokike

²⁴ Chiokike b̄u nye ke nwernu rikne ọ b̄ita an̄u ma an̄u ghar̄u ọ dna, mee ma an̄u gwuzoru nwée ọru, n̄u mkp̄oma ọso n'ọnu n̄u ruwhnu a z̄i igwugwu.

²⁵ Ya b̄u Chiokike kp̄oi, Nye Ọznohia āi, hite n̄u Jiz̄osi Karāisi Nyenwe āi, kpakara igwugwu, n̄u dudugna, n̄u rikne n̄u ọchi risi z̄inu a, hite n̄u mb̄om d̄u k̄itna, ọkw̄nkokw̄nu. Am̄im.

Okpume Chiokike kpumennu Joni

Nhne gbasiri okwukwo ka

Okwukwo ka neegesi nhne Joni whnrnu gbasiri izi Chiokike nu nhne Jizosi Karaishi mernu (1:2). Izi ka waru ngalaba eto. (1) Rikne ojo nqornu ernu n'owa, nye Karaishi jaata awnhwuhnu, nwu masi. (2) Jizosi bu Nyenwe aj, o jeemegbu kpakara ele badnu nu kpakara rikne ke neemegidne Chiokike. (3) Chiokike nwernu ogwo ernu ke o bitannu kpakara ele ke a, ele kwesiri be kwnata be mkpoma, ele dazigidnenu n'okwnata ovu be, ke kakwo ele nwurnu n'ernu Nyenwe aj.

Ka bu izi ke nwernu olile anya nyee ele Karaishi, ele taru awnhwuhnu, nwu kwnornu okwnata mkpoma be nu Karaishi. Okwukwo izi ka nookwu nu o bu n'ezi nu ochichi aka rikne ele Rom zi naakpa rikne, kovu Nnwọ Atnrnu Chiokike nwe omegbu n'ipne-aznu. Ka mernu be buru ele kwesiri okwnata ovu du n'ernu.

Nhne zi n'okwukwo ka

Qwhnrninya Joni (1:1-8)

Nyenwe aj zi budnu (1:9-20)

Okwukwo izi ogbako Chiokike esau (2:1--3:22)

Okpukpe n'oligwe (4:1-11)

Okwukwo ke nwernu akara esau (5:1--6:17)

Okpukpe nu ruwhnu ngadna eze Chiokike (7:1-17)

Okwodu esau (8:1--11:19)

Agwo nu anohia lawuru wam (12:1--13:18)

Ikpe Chiokike nu ochekwa a (14:1--15:8)

Okiko ovu owe ehni Chiokike (16:1-21)
Be megburu ele irno Chiokike (17:1--20:10)

Ikpe ipne-aznu (20:11-15)

Oligwe ikne nu owa ikne (21:1-8)

Jeruselem ikne (21:9--22:6)

Karaishi jaava wara wara (22:7-21)

¹ Okpume Jizosi Karaishi, ke Chiokike nyernu a, ma o gesi ele izi a nhne jeeme n'ige mati ke vazne, o zizne enine izi a o gesi nye izi a Joni.

² Joni gbaru akebe ikwu-onu Chiokike nu akebe Jizosi Karaishi, o kwuru kpakara nhne o whnrnu.

³ Nye owa oma bu nye nqogwnu kpakara ikwu-onu ke okwukwo qwhnrninya ka, nu ele nrnu be, bita masi be, kwnornu nu ige zi ndundu.

Obekwu ikwu

⁴ Mawa, Joni naagbaznenu ogbako Chiokike esau ke zi n'Esia okwukwo.

Oru nu udno ke Chiokike nye zi, nye zi nu mbom, nu nye ke jaava dazinu anu, hite n'aka enine esau ke zi nu ruwhnu ngadna eze a,

⁵ ma n'aka Jizosi Karaishi, nye akebe kwesiri be kwnata a mkpoma, nye mbom ke hi n'ernu lizo, nye ke n'echi ele eze k'owa.

Nye whnrnu aj n'anya, gweru onarna a snusnama kpakara mmehie aj,

⁶ o mee aj a buru mbam ele okwa arjohna Chiokike a, nu Nda a, igwugwu nu rikne zinu a hite kina du n'ige kwokwo. Amim.

⁷ Le, o vawa nu rime erumeru oligwe,

kpakara anya jowhnu a,
ma ele duru a ara,

kpakara ele zi n'owa jaagbanu a mkpe.
Owe! Amim.

⁸ "Mawa bu Alifa nu Omega," bu nhne Nyenwe aj kwuru. "Mawa bu Onanizo nu Okwukwo, nye zi, nye zi nu mbom, nu nye jaava, Nye Meli Nhne Dum."

Nye nu lele

Nnwọ ke Badnu

⁹ Mawa bu Joni, nye bu nnwo nda anu, nye sno anu nu rime awnhwuhnu, a bu ele eli-eze a, a naagidne awnhwuhnu. Be kwuznenu m nu rime eli ohia esilawuru osimini ke Patimosi, kwnornu nu m kpuru m okwo ikwu-onu Chiokike nu nhne Jizosi gbaru ama a.

¹⁰ M zi m nu rime Enine n'obochi Nyenwe aj, m nrnu m okne nkoli n'aznu m ke dnarnu lele okwodu.

¹¹ Nkoli ka kaa, "Gbasih nhne i whnrnu n'okwukwo, ziznenu a ogbako Chiokike esau ka, ziznenu Efesosi, nu Simaina, ziznenu Pegamosi, nu Tajira, ziznenu Sadisi, nu Filadefia, zizne masina Laodisia."

¹² M tuhnasna ma m whnrnu m nye nookwunu m oka. M whnrnu m nhne be tukwasi tonji esau be wuru голу.

¹³ N'esilawuru nhne be tukwasi tonji esau wam gwuzo otu nye nu lele Nnwọ ke Badnu. O wogwu iwo awura duru a eli ochi, o ji ajnji su nu mkpoma a.

¹⁴ Risi a nu rukeri-ize a noonwu va-a-a lele wulu, naachna va-a-a lele mkpuru-mini, anya a nu lele riro bekwnu.

¹⁵ Ochi a lawuru nu lele ola be gbaru bekwnu nu rime ite bekwnu, nkoli a naadna lele agida mini.

¹⁶ O ji mbọ esau n'akarikwnunga a, amaogwnu nwernu ruwhnu lawuru tuga buko neehi n'onu a nqowhuya, ruwhnu a noonwu lele ehnam n'esilawuru iwhehnie.

¹⁷ Nga me whnrnu a, m dna n'eli n'ochi a lele nye nwurnu onwu. Kovu o tukwasiri m akarikwnunga a, kaa, "Ogwu tuko i, mawa bu Nye Mbom nu Nye Ipne-aznu.

¹⁸ M zi m budnu. M nwurnu m ernu, kovu le, m zi m budnu tim tom. M ji m snambj ernu nu eli renwu.

¹⁹ “Gbasị nhne ị whnuru n’okwu-kwo, nhne zị kịta, nụ nhne jeeme nụ ruwhnu.

²⁰ Ka bụ nhne miri emi ke mbọ ọsaw wam ị whnuru n’akarikwunga m, nụ nhne be tükwasị tọnji ọsaw wam be wuru golu. Mbọ ọsaw wam bụ enine izi ọgbako Chiokike ọsaw, nhne be tükwasị tọnji ọsaw wam ị whnuru bụ ọgbako ọsaw.”

2

Izi ele Efesosi

¹ Gbaznenu enine izi ke ọgbako Chiokike ke zị n’Efesosi ọkwukwo: Hite n’onu nye wam ji mbọ ọsaw wam n’akarikwunga a, nye neezne izne n’esilawuru nhne be tükwasị tọnji ọsaw wam.

² M magwụ m nhne anụ neeme. Anụ n’ogdogbu ẹhni anụ n’eru nụ ọsnuta mkpoma anụ. Anụ kwéle o kwubnanya ele aruru-eli, anụ kparụ ele kwuru ẹhni be ele izi iru, kovu be búo, anụ whnụ nụ be búo ele aghalaghala.

³ Anụ jiri ọsuta mkpoma nagidne awhnụwhnu anụ taru kwnornu ọsaw wam, anụ kwéle rikne gwụ anụ.

⁴ Kovu m nwernu m otu nhne megidne anụ, anụ zịma n’owhnnun’anya lele kpa anụ neeme nụ mbom.

⁵ Anụ chenwanya hne anụ dnarnụ. Anụ hi nụ mmehie anụ tūhnasna, rñu ẹrnu mbom anụ rñuru. O buri nụ anụ jootūhnasna hite nụ mmehie anụ, m jaavakwnusi anụ wara wara, gweme nhne be tükwasị tọnji anụ nū hne o zị, okwolem ma anụ tūhnasnarnu.

⁶ Kovu anụ nwernu otu nhne buru oma, anụ sno ẹrnu ele Nikolata irno lele kpa me snornu a irno.

⁷ Nye nwernu nsni, o nurnu nhne Enine Nso naakanu kpakara ọgbako Chiokike. Nye megburu, m jeenye a rikne o ri mkpuru isisi ke budnu ke zị n’obna Chiokike.

Izi ele Sįmaina

⁸ Gbaznenu enine izi ke ọgbako Chiokike ke zị nū Sįmaina ọkwukwo: Hite n’onu nye wam bụ Nye Mbom nū Nye Ipne-aznū, nye nwuru, ziri kwno budnu.

⁹ M magwụ m awhnụwhnu anụ naata. M magwụ m nū anụ bú ele mboni, kovu anụ bú ele nwernu ekwu k’agida. M magwụ m oka ojo ele ka nū be bú ele Ju nookwugidne anụ, kovu be búo, be búo ele ọro ọgbako Setani.

¹⁰ Ogwnu tuko anụ kwnornu awhnụwhnu anụ jaata. Le Setani jeeyisi agwna anụ n’ikelu ma be kpa anụ iru. Anụ jeenwe ọkpabgu nri ọbuchi. Anụ buru ele kwesiri ọkwadata mkpoma du n’enu, m jeenye anụ okpu-eze ke bú budnu.

¹¹ Nye nwernu nsni, o nurnu nhne Enine Nso naakanu kpakara ọgbako Chiokike. Nye megburu, enwu ke ẹbo jogbu a.

Izi ele Pegamosi

¹² Gbaznenu enine izi ke ọgbako Chiokike ke zị nū Pegamosi ọkwukwo:

Hite n’onu nye wam nwernu ama-ogwnu ke nwernu ruwhnu lawuru zị búo.

¹³ M magwụ m hne anụ wu bú hne ngadna Setani zị. Anụ jidnesiri ọsaw wam m rikne, anụ tūwhule ọkwadata mkpoma anụ nū hne me zị, o búbedi nga be gburu Antipasi nye akebe m nye kwesiri ọkwadata mkpoma n’esilawuru anụ hne Setani wu.

¹⁴ Kovu m nwernu m nhne ele nū ele megidne anụ. Agwna ele noosno iznizni Balam nye znirni Balak kpa o jeeme rumu Izireli mmehie hite n’ori nhne be jiri kwanu ọsaw wam arjohna nū hite n’ome oyi.

¹⁵ Agwna ele noosno iznizni ele Nikolata zị masi n’esilawuru anụ.

¹⁶ Anụ hi nū mmehie tūhnasna, o búo kpa, m jaavakwnusi anụ wara wara, gweru ama-ogwnu hi n’onu m whuya lusi ele ka ogwnu.

¹⁷ Nye nwernu nsni, o nurnu nhne Enine Nso naakanu kpakara ọgbako Chiokike. Nye megburu, m jeenye a agwna mana ke tugwaru otugwa. M jeenye masi a otu akaworugwu abochna ke be gbakwasiri ọsaw wam ikne n’olu a, o zá nye berere marnu a, okwolem nye wam nahjara a.

Izi ele Taıtira

¹⁸ Gbaznenu enine izi ke ọgbako Chiokike ke zị nū Taıtira ọkwukwo: Ka bụ nhne Nnwọ Chiokike kwuru, nye wam anya a lawuru nū lele ẹkwu, nye ọchi a lawuru noonwu lele ọla chnarnu achna.

¹⁹ M magwụ m nhne anụ neeme. M magwụ m ọwhnnun’anya anụ, nū ọkwadata mkpoma anụ, nū izi anụ, nū ọsnuta mkpoma anụ. M magwụ m masi nū ẹrnu anụ kịta kakwo ke mbom.

²⁰ Kovu m nwernu otu nhne megidne anụ. Anụ gharuru nwerinya wam bú Jezibel n’esilawuru anụ. Nwerinya ka kwuru ẹhni a nye ọwhnnun’anya Chiokike, neezni ele izi m kpa be mee oyi, nū o ri nhne be jiri kwa ọsaw wam, nooduhie ele badnu.

²¹ M nyernu m a ige ma o tūhnasna nū mmehie ome oyi, o kwéle.

²² Le, m jootubna n’okpata ya nū ele oyi a, be jaata awhnụwhnu k’agida, okwolem ma be tūhnasnarnu hite nū nhne ojo be mħiaru n’aka a.

²³ M joogbu rumu a, ma kpakara ọgbako Chiokike mahjā nū mawa bú nye wam noonyosna mkpoma nū echiche ke rumu badnu. M joo kwuhnsi nye ọbula lele kpa ẹrnu a jiri ziri.

²⁴ Kovu agwna anụ gwnarnu nū Taıtira, ele snoge iznizni ojo ka, ele máa nhne be nookwu nhne tugwaru otugwa ke Setani, m jeenye anụ ivu rana berere.

²⁵ Kọvu anụ jidnesi rikne nhne anụ ji tem m va.

²⁶ Nye megburu, bīta ikwu-ọnu m dū okwukwo,

m jeenye a rikne hne kpakara mba zi.

²⁷ O jeeji mkpara rugwe nēechi be,

o jeejiwa be lele kpa be liwa itechi,

²⁸ lele kpa me nahīaru iknerna n'aka Nda m. M jeenye a mbō ọsisi.

²⁹ Nye nwernu nsni, o nūrnu nhne Enine Nso naakanụ kpakara ogbako Chiokike.

3

Izi ele Sadisi

¹ Gbaznenu enine izi ke ogbako Chiokike ke zī Sadisi okwukwo: Ka bụ nhne nye wam ji enine ẹsau Chiokike n'aka a, nū mbō ẹsau. M magwū m nhne anụ neeme. M magwū m nū anụ nwernu rēwhna nū anụ zī būdnu, kọvu anụ nwūrnu ọnwu.

² Anụ tnenya, jikwasi nhne ke gwnarnū matī o nwū rikne, kwnornu nū m whnūge m ẹrnu anụ ke zuru ozu nū ruwhnu Chiokike m.

³ Anụ chenwanya nhne anụ nahīaru, ke anụ nūrnu, anụ mee be. Anụ hi nū mmehie anụ tūhnasna. O buri nū anụ jēetnenya, m jaavakwnusi anụ lele nye buznu, anụ jāamahīa ige me jaava.

⁴ Kọvu anụ nwernu badnū ele nū ele nū Sadisi ele mērula awura be. Be joowo awura abochna snornu m zne izne kwnornu nū be kwesiri.

⁵ Nye megburu kpa, be joowote a awura abochna, m jóokwnome rēwhna a n'okwukwo ke būdnu. M jookwuhīa rēwhna a nū ruwhnu Nda m ya nū ruwhnu ele enine izi a.

⁶ Nye nwernu nsni, o nūrnu nhne Enine Nso naakanụ kpakara ogbako Chiokike.

Izi ele Filadefīa

⁷ Gbaznenu enine izi ke ogbako Chiokike ke zī nū Filadefīa okwukwo: Ka bụ nhne nye wam zī nso nū nye ezi ọka kwuru, nye jigwu snambī Devidi, nye o buri nū o gbama ọnuhna, o zā nye nwernu rikne o gbasni a, nye gbasni ọnuhna, o zā nye nwernu rikne o gbama a.

⁸ M magwū m nhne anụ neeme. Le, m gbamannū m anụ ọnuhna ke o zā nye nwernu rikne gbasni, kwnornu nū anụ nwernu iknerna matī, kọvu anụ bītaru ikwu-ọnu m, anụ gōnahorula rēwhna m.

⁹ Anụ joowhnu nhne me jeeme ele ọro ogbako Setani, ele ka nū be bụ ele Ju, kọvu be būo, be bụ ele aghalaghala, m jeeme be va dna n'eli n'ochi anụ, be jaamahīa nū m whnūrnu m anụ n'anya.

¹⁰ Kwnornu nū anụ bītaru ikwu-ọnu m, snūta ovu, m jaabīta masī anụ n'ige ọrnurna ke jaadnakwasī kpakara ọwa, o rna ele wu n'ọwa ọrnurna.

¹¹ Le, m vawa wara wara, anụ jidnesi nhne anụ ji rikne, o zī nye berere nahōru anụ okpu-eze anụ.

¹² Nye megburu, m jeeme a nsnūsnu Ọro Nso Chiokike m. O jeehi nū rime a whōga berere. M jaagbakwasī rēwhna Chiokike m n'olu a, ya nū rēwhna ọhna ikne Chiokike m, ke bụ Jeruselem ikne, ke hi n'oligwe n'aka Chiokike m hiedna. M jaagbakwasī a rēwhna ikne m n'olu a.

¹³ Nye nwernu nsni, o nūrnu nhne Enine Nso naakanụ kpakara ogbako Chiokike.

Izi ele Laodisia

¹⁴ Gbaznenu enine izi ke ogbako Chiokike ke zī nū Laodisia okwukwo: Ka bụ nhne Amīm kwuru, nye akebne kwesiri be kw-nata a mkpōma nū nye ezi ọka, nye nēechi kpakara nhne Chiokike keru.

¹⁵ M magwū m nhne anụ neeme. Anụ kpéle bēkwnu, anụ jīla iyi. O joooburu ọma nū anụ kperu bēkwnu mōbu nū anụ jiri iyi.

¹⁶ Kọvu kwnornu nū anụ zī marna marna, anụ kpéle bēkwnu, anụ jīla iyi, m jooobohala anụ n'ọnu m.

¹⁷ Anụ kwuru, “M barū m eze, m nwernu m ẹkwnu, o zā nhne naara m,” kọvu nū anụ máa nū anụ bụ ele n'owhnuji anya, nū ele be kwesiri o ọnu obirizi, ele mboni, ele isni nū ele gba ẹto.

¹⁸ Me zni anụ ezni, anụ zūnahoru m golu be snūrnu, ma anụ nwernu ẹkwnu, nū awura abochna, ma anụ kpusni ẹto anụ gbagwū, tna ẹgwnumisi n'anya anụ ma anụ whnūrnu ọsno.

¹⁹ M neebigbō kpakara ele me whnūrnu n'anya, naapnīa masī be nhne. Anụ gbalī tūhnasna, hi nū mmehie whūya.

²⁰ Le, m gwuzogwu m n'ọnuhna, nooznu aka. Nye ọbula ke nūrnu nkōli m, gbama ọnuhna, m jaabnazne n'oro a, snornu a ri wiri, ya snornu m masī ri wiri.

²¹ Nye megburu, m jeenye a rikne o snornu m daziri ẹli nū ngadna eze m, lele kpa me megburu, m snornu Nda m daziri ẹli nū ngadna eze a.

²² Nye nwernu nsni, o nūrnu nhne Enine Nso naakanụ kpakara ogbako Chiokike.

4

Ngadna eze ke zī n'oligwe

¹ Nga nhne ka mekworu, m whnūrnu m, le, otu ọnuhna gbamarnū n'oligwe. Nkōli wam me nūrnu nū mbōm ke dnarnū lele okwodu karū, “Vaa hna, m jeegesi i nhne jeemeriri nū ruwhnu.”

² Ngangam, m zī m n'Enine, m whnūrnu m nū rime oligwe otu ngadna eze nū nye dazī n'olu a.

³ Nye wam dazị nụ ngadna eze wam, ruwḥnu a noogbu marna marna lele akaworugwu jasịpa nụ sadisi, eke nụ egwurugwu hnirni ngadna eze wam gburugburu ke naachna lele emiradi.

⁴ Nri ngadna eze lawuru nụ ẹno berere gbarụ ngadna eze wam gburugburu, ele okno badnụ nri lawuru nụ ẹno dazị n'olu ngadna eze berere wam woru awura abochna, kpuru okpu-eze golu nụ risi be.

⁵ Amuma nụ egbe oligwe nụ ọdida hi nụ ngadna eze wam naadna. Tọnji ẹsau zị nụ ruwḥnu ngadna eze wam noonwu bẹkwnu, ke bụ enine ẹsau wam Chiokike.

⁶ Osimini nụ lele nyo nọowḥnu ọsno zị nụ ruwḥnu ngadna eze wam.

N'esilawuru ngadna eze wam ya nụ gburugburu a bụ nhne ẹno zị bụdnụ bụ anya anya ruwḥnu nụ aznụ zị.

⁷ Nhne ke mbom nụ lele odum, ke ẹbo nụ lele nnwọ ehni, ke ẹto nwernu ruwḥnu lele ruwḥnu badnụ, ke ẹno nụ lele igno neewhe ewhe.

⁸ Nhne zị bụdnụ ẹno wam, ke ọbula nwernu aka-nkwu isunu, kpakara ehni be bụ anya anya. Be kpúsní ọnu be iwḥnehnie nụ abalí, be nọogwu eri naakaa,

“Nsọ, nsọ, nsọ

bụ Nyenwe aị Chiokike ke Meli Nhne Dum,

Nye zị nụ mbom, nye zị kítna, nye jaava.”

⁹ Kpa nhne wam zị bụdnụ zị neenye a igwugwu nụ ọson'anya, nọotunu nye wam dazịgwu nụ ngadna eze wam mmamma, nye zị bụdnụ ọkwukwokwunu,

¹⁰ ele okno badnụ nri lawuru nụ ẹno wam dna n'ẹli nụ ruwḥnu nye wam dazịgwu nụ ngadna eze, kpọ risi ẹli nụ ruwḥnu nye wam zị bụdnụ ọkwukwokwunu. Be tūbita okpu-eze be nụ ruwḥnu ngadna eze wam, kaa,

¹¹ “I bụ nye kwesiri, Nyenwe aị Chiokike, ọ nahoru igwugwu nụ ọson'anya, nụ ikn-ernema,

kwnornu nụ ọ bụ jīwa keru kpakara nhne hite nụ echiche i, jī nyernu be bụdnụ.”

5

Okwukwo nụ Nnwọ Aturu nū wam

¹ M whuru nū m otu okwukwo n'akarikwunga nye wam dazị nū ngadna eze wam, be gbarụ a nhne ruwḥnu nū aznū, be kasiri a akara ẹsau.

² M whuru nū m otu enine izi nwernu rikne jī okno nkoli neesi okokoba, naakaa, “Ndaa nye kwesiri ọ gbaji akara ẹsau wam nū o kpume okwukwo wam?”

³ Kọvu ọ zā nye be whuru nū n'oligwe nū ọwa mọbu nū mkpururu ọwa, bụ nye kwesiri

o kpume okwukwo wam mọbu lebna anya nū rime a.

⁴ M kwana ẹkwana k'agida kwnornu nū ọ zā nye be whuru nū kwesiri o kpume okwukwo wam mọbu lebna anya nū rime a.

⁵ Otu nū rime ele okno badnū wam kanu m, “I kwana ẹkwana, le, Odum ke ẹbunuru Juda,* Mgbaregwugwu Devidi,† o megbulem, o nwernu rikne o kpume okwukwo wam, nū ọ tọma akara ẹsau wam.”

⁶ Ige wam m whuru nū m otu Nnwọ Aturu gwuzo n'esilawuru ngadna eze wam, ma nū esilawuru nhne ẹno wam zị bụdnū ya nū ele okno badnū wam, lele nū be gburu a ogbu. O nwernu mfu ẹsau, nū anya ẹsau ke bụ enine ẹsau wam Chiokike, ke o zihalaru nū rime kpakara ọwa.

⁷ Nnwọ Aturu nū wam zne nahoru nye wam dazị nū ngadna eze wam okwukwo n'akarikwunga a.

⁸ Nga ọ nahoru a ọkwukwo wam, nhne ẹno wam zị bụdnū nū ele okno badnū nri lawuru nū ẹno wam dna n'ẹli nū ruwḥnu Nnwọ Aturu nū wam, kpakara be jī ọbo be n'aka, ya nū obele golu ke isensi jiharu, ke bụ okpukpe ele nsọ.

⁹ Be gwnu eri ikne,

“I kwesiri ọ nahoru okwukwo wam, nū ọ tọma akara a,

kwnornu nū be gburu i,

i gweru ọvnarna i gbahia ele ke Chiokike hite nū kpakara ẹbunuru, nū ikwu-ọnu, hite nū mba nū ele badnū.

¹⁰ I mernu be buri mbam ele ọkwa ariohna, ke jeekpenu Chiokike, be jọbu ele eze neechi ọwa.”

¹¹ M le anya, m nuru nū m nkoli agida enine izi gbarụ ngadna eze wam gburugburu, nū nhne ẹno wam zị bụdnū nū ele okno badnū, pokwu nū pokwu nū pokwu ndasi, nū pokwu ndasi nū ndasi.

¹² Be nọogwu eri nū okno nkoli, naakaa,

“Nnwọ Aturu nū wam be gburu kwesiri ọ nahoru rikne, nū ẹkwu nū akoniche, nū iknerna

nū ọson'anya nū igwugwu, nū ọznarni.”

¹³ M nuru nū m hne kpakara nhne zị bụdnū zị n'oligwe, n'ọwa, nū mkpururu ọwa, kpakara nhne zị bụdnū ke zị n'okno osimini nū kpakara nhne zị nū rime be, naakaa,

“Ọznarni nū ọson'anya nū igwugwu nū rikne zinu

nye wam dazị nū ngadna eze, ya nū Nnwọ Aturu nū wam tim tọm.”

¹⁴ Nhne ẹno wam zị bụdnū, kaa, “Amim.” Ele okno badnū wam dna n'ẹli, kpọnu Chiokike nū Nnwọ Aturu risi ẹli.

* 5:5 Odum ke ẹbunuru Juda Jenesisi 49:9 † 5:5 Mgbaregwugwu Devidi Azaya 11:1, 10

6

Akara ɛsau wam

1 M whn̄n̄nu m nga Nnw̄o Atn̄n̄nu wam t̄omarnu akara ke mb̄om. Otu nhne z̄i b̄udnu ɛno wam j̄i nk̄oli dnarn̄u lele egbe oligwe kaa, "Vaa."

2 M le anya, le otu iyinya riçhna, nye gbagw̄u a j̄i otu mgbata, be nyee a okpu-eze, ɔ wh̄oga n̄ɔolugbu, neemeḡbu.

3 Nnw̄o Atn̄n̄nu wam t̄oma akara ke ɛbo, m n̄n̄nu m nhne ɛno wam z̄i b̄udnu ke ɛbo, naakaa, "Vaa."

4 Le, iyinya berere naachna ihie ihie, be nyernu nye gbagw̄u a rikne o gweme udno n̄'owa, mee ele badn̄u noogbu ibne be, be nyernu a ama-ogw̄nu hna ezi.

5 Nga Nnw̄o Atn̄n̄nu wam t̄omarnu akara ke ɛto, m n̄n̄nu m hne nhne ɛno wam z̄i b̄udnu ɛto kar̄u, "Vaa." M le anya whn̄u iyinya neeji riji, nye gbagw̄u a j̄i nhne be n̄yotu nhne n̄'aka a.

6 M n̄n̄nu m nk̄oli n̄'esilaw̄uru nhne ɛno wam z̄i b̄udnu, naakaa, "Otu nt̄utu ikpa wheti b̄u ɔgwo ɛrnu otu ɔbochi, nt̄utu ikpa bal̄i ɛto ɔgwo ɛrnu otu ɔbochi. K̄ovu an̄u l̄ulu m̄ono olivu n̄u manya vaīni."

7 Nnw̄o Atn̄n̄nu wam t̄oma akara k'ɛno, m n̄n̄nu m nk̄oli nhne z̄i b̄udnu k'ɛno kar̄u, "Vaa."

8 M le anya, otu iyinya ogbu-n̄u-orio, r̄ɛwhna nye daz̄i n̄'olu a b̄u ɛnwu, ɛli R̄ɛnwu sno a n̄'azn̄u. Be nyernu a rikne hne otu nga n̄u nga ɛno ke ɔwa z̄i, ma o gweru ama-ogw̄nu n̄u ɔkwun̄nyo gbu be, ma nr̄īria ɔjo n̄u ɔjo an̄ghia ke ɔwa.

9 Nnw̄o Atn̄n̄nu wam t̄omarnu akara ke isne, m whn̄n̄nu m mkp̄uru ovu k̄pakara ele be gburu kwnornu ikwu-ɔnu Chiokike n̄u ama be gbar̄u n̄u mkpururu ɔjo ar̄iohna.

10 Be j̄i okne nk̄oli neesi okokoba, naakaa, "Nyenwe āj̄ z̄i ns̄o, j̄i b̄u ezi, d̄u ngele, hne i jeekpe ele z̄i n̄'owa ikpe, megwnah̄ia ɔvnarna āj̄?"

11 Be nyernu nye ɔbula n̄u rime be iwo awura ab̄oçhna, be kan̄u be, be zukwaru inwe ige mat̄i, tem ɔnu ogwnugw̄nu ele izi ibne be n̄u r̄umu nda be, ele be joogbu zute.

12 Nnw̄o Atn̄n̄nu wam t̄omarnu akara ke isunu, okne ɛli otne enye dnarn̄u, ehn̄am j̄i riji lele ikpe mkpe, ɛnwa chna ihie ihie lele ɔvnarna.

13 Mb̄o hi n̄'oligwe naadna n̄'owa lele ike isisi be kwu figi chn̄a achna naadna nga ruwhere neewhe.

14 Be piakota oligwe lele ɔkwukwo, rugwu n̄u ɛli ɔhia esilaw̄uru wh̄oga n̄'ɔnodi be.

15 Ele eze ke ɔwa n̄u ele dikne, ele n̄ɛchi ele ɔgw̄nu ele bar̄u eze, ele dimkpa, nye ɔbula, ma ɔhi ma nye nwernu ɛh̄ni a, tugwa n̄u rime ɔgba n̄u iketa rugwu.

16 Be kan̄u rugwu kwu n̄u rugwu mat̄i, "Dnagidne āj̄, k̄pusni āj̄ n̄'anya nye wam daz̄i n̄u ngadna eze, ya n̄u ovu owe ɛh̄ni Nnw̄o Atn̄n̄nu wam.

17 Kwnornu n̄u okne ɔbochi ovu owe ɛh̄ni be val̄em. Nyele joogwuzoli?"

7

Be kar̄u 144,000 ele badn̄u akara

1 Nga nhne ka whemernu, m whn̄n̄nu m enine izi ɛno gwuzo n̄u ngeri ɛno ke ɔwa, knern̄u ruwhere k'ɔwa n̄'aka, ma ruwhere ghar̄u o whe n̄'ɔwa, ma n̄'osimini m̄obu n̄'olu isisi ɔbula.

2 M whn̄n̄nu m enine izi berere hi n̄'ɔbosi ɛhn̄am n̄ɔowhuya, o j̄i akara Chiokike ke z̄i b̄udnu n̄'aka a, o j̄i okne nk̄oli naakan̄u ele enine izi ɛno wam Chiokike nyernu rikne o lulu ɔwa n̄u osimini,

3 kaa, "An̄u l̄ulu ɔwa, m̄obu osimini, m̄obu isisi, tem a ka ele izi Chiokike akara n̄'egedege ruwhnu be."

4 M n̄n̄nu m ɔnu ogwnugw̄nu ele be kar̄u akara n̄'egedege ruwhnu be, be b̄u otu ri-whu n̄u nri ɛno n̄u pokwu ɛno, hite n̄u k̄pakara ɛbnurnu Izirēli.

5 Be b̄u hite n̄u ɛbnurnu Juda, nri n̄u pokwu law̄uru, ɛbnurnu Rub̄eni, nri n̄u pokwu law̄uru, ɛbnurnu Gad̄i, nri n̄u pokwu law̄uru,

6 hite n̄u ɛbnurnu Asa, nri n̄u pokwu law̄uru, ɛbnurnu Naf̄itali, nri n̄u pokwu law̄uru, ɛbnurnu Manase, nri n̄u pokwu law̄uru,

7 hite n̄u ɛbnurnu Simīoni, nri n̄u pokwu law̄uru, ɛbnurnu Livāi, nri n̄u pokwu law̄uru, ɛbnurnu Isaka, nri n̄u pokwu law̄uru,

8 hite n̄u ɛbnurnu Zeb̄uloni, nri n̄u pokwu law̄uru, ɛbnurnu Josef̄u, nri n̄u pokwu law̄uru, ɛbnurnu Benjamini, nri n̄u pokwu law̄uru.

Igbudu ele badn̄u wam

9 Nga nhne ka mekworu, m le anya whn̄u igbudu badn̄u ɔ z̄a nye nwernu rikne gwn̄li ɔnu. Be hi n̄u k̄pakara mba n̄u ɛbnurnu, n̄u ɛli, n̄u ikwu-ɔnu va, be gwuzo n̄u ruwhnu ngadna eze n̄u n̄u ruwhnu Nnw̄o Atn̄n̄nu wam, be wo awura ab̄oçhna, be j̄i mas̄i igwugwu buk̄wu n̄'aka be.

10 Be j̄i okne nk̄oli naakaa, "Ozn̄ohia āj̄ hi n̄'aka Chiokike, nye daz̄i n̄u ngadna eze, ya n̄u Nnw̄o Atn̄n̄nu."

11 Kpakara ele enine izi gwuzo gba ngadna eze wam gburugburu n̄u ele okno badn̄u wam n̄u nhne ɛno wam z̄i b̄udnu, dna k̄pute ruwhnu n̄'eli n̄u ruwhnu ngadna eze wam, k̄ponu Chiokike risi ɛli.

12 Be kaa, "Am̄im! Ngozi n̄u igwugwu n̄u ak̄oniche, n̄u ɔtu mmamma n̄u ɔson'anya

nụ rikne nụ iknernema

zĩnu Chiokike dũ ọkwukokwnu.

Amịm."

¹³ Otu nye okno badnụ sịkwa m, "Ele ka wogwu iwo awura abochna be bụ ele ke ele? Ndaa hne be hi va?"

¹⁴ M sa a, "Nda-aj-kwu, m máam, jì magwu."

Ọ kanụ m, "Ele ka bụ ele hiri n'okne mmekpehni wam whụya, be snrnu iwo be, mee be ziri rịchna nụ rime ọvna Nnwọ Atnrnu wam.

¹⁵ Kam kpararụ, be jiri gwuzoru nụ ruwhnu ngadna eze Chiokike, be jeekpenụ a iwhnehie nụ abalị nụ rime Oro Nsọ a.

Nye wam dazị nụ ngadna eze jaagbasa ọro-eka a, be wuru nụ rime a.

¹⁶ Wiri jógwunu be berere, akpịri jóokpo be békwnu berere, ẹhnam jóomu kwno be berere, whurwhuru ẹhni jéeme kwno be berere.

¹⁷ Kwnornu nụ Nnwọ Atnrnu nye ke zị n'esilawuru ngadna eze wam jọbu nye nọoznu be lele atnrnu.

O joodu be zne nụ risi mini ke bụdnu, Chiokike jookwnosnama anya-mini ẹkwna n'anya be."

8

Akara ke ẹsau

¹ Nga Nnwọ Atnrnu wam kpumernu akara ke ẹsau, oligwe dnarnu bii dũ ichichi awa.

² M whnrnu m enine izi ẹsau ele gwuzo nụ ruwhnu Chiokike, be nyernu be ọkwodu ẹsau.

³ Enine izi berere ke jigwu nhne isensi golu varu gwuzoru nụ ruwhnu ojo arịohna, be nyernu a agịda isensi, o gweru a yikọta nụ okpukpe ele nsọ Chiokike, gweru a kwa arịohna n'olu ojo arịohna golu ke zị nụ ruwhnu ngadna eze wam.

⁴ Rwnwurnu isensi wam nụ okpukpe ele nsọ Chiokike lizọ nụ ruwhnu Chiokike hite n'aka enine izi wam.

⁵ Enine izi wam gweru nhne isensi wam gharu békwnu n'ọjo arịohna, ghasa a nụ rime ọwa. Agịda egbe oligwe nụ ọdidna nụ amụma nụ ẹli otne enye dnarnu.

Ọkwodu ẹsau wam

⁶ Enine izi ẹsau wam jì ọkwodu ẹsau jiknernu ọ gbụ be.

⁷ Enine izi ke mbom gbụ ọkwodu a, mkpuru mini nụ békwnu gwaru ọvna n'owa, otu-ibewa nụ nga ẹto ke ọwa rne békwnu, otu-ibewa nụ nga ẹto ke isisi nụ kpakara achara bụdnu rnernu békwnu.

⁸ Enine izi ke ẹbo gbụ ọkwodu a, be tũbna nhne nụ lele rugwu okpotokpo neerne

békwnu nụ rime osimini, otu-ibewa nụ nga ẹto ke osimini ghọ ọvna.

⁹ Otu-ibewa nụ nga ẹto ke nhne zị bụdnu nụ rime osimini nwuma, otu-ibewa nụ nga ẹto ke ọgbo mini kpu.

¹⁰ Enine izi ke ẹto gbụ ọkwodu a. Otu okne mbọ hi n'oligwe dna, noonwu lele tonji dnakwasị otu-ibewa nụ nga ẹto mini, ma nụ risi mini.

¹¹ Rẹwhna mbọ wam bụ Nlulu. Otu-ibewa nụ nga ẹto mini noolu nlulu, agịda ele badnụ nwurnu kwnornu nụ be nwornu mini wam.

¹² Enine izi ke eno gbụ ọkwodu a. Be lulu otu-ibewa nụ nga ẹto ẹhnam, nụ otu-ibewa nụ nga ẹto enwa, nụ otu-ibewa nụ nga ẹto mbọ, ke kpararụ otu-ibewa nụ nga ẹto iwhne be zima noonwu, otu-ibewa nụ nga ẹto ke ọbochi nwée iwhne ya nụ otu-ibewa nụ nga ẹto ke abalị.

¹³ M leru m anya, m nrnu m otu igno nee- whe n'esilawuru oligwe, gweru okne nkoli neesi okokoba, "Awhnrwhnu! Awhnrwhnu! Awhnrwhnu zinu kpakara ele wu n'owa nga be jọonu ọdidna ọkwodu ke ele enine izi ẹto ke gwnarnu jọgbu."

9

¹ Enine izi ke isne gbụ ọkwodu a. M whnrnu m otu mbọ hiri n'oligwe dna n'owa, be nyee a snambị ọnuhna olulu awnrwhnu.

² Mbọ wam tuma ọnuhna olulu awnrwhnu, rwnwurnu hi nụ rime a whụya nụ lele rwnwurnu hi n'okne ite békwnu, iwhne ẹhnam nụ ruwhere gbaru ọchichiri kwnornu rwnwurnu hi n'olulu awnrwhnu wam whụya.

³ Igwurube hi nụ rwnwurnu wam whụya n'olu ọwa, be nyernu be rikne lele akpị ke ọwa.

⁴ Be kanu be, be lulu achara mọbu isisi, mọbu achara bụdnu berere, kovu be gba nye ọbula ke nwée akara Chiokike n'egedege ruwhnu a.

⁵ Igwurube wam nwée rikne o gbu be, kovu be ta be awnrwhnu enwa isne. Nhne igbugbu be nụ lele nye akpị gbaru.

⁶ N'enwa isne ka, ele badnụ ka jooipo enwu joogbu be, kovu be jooihnu enwu, enwu joogwunu be, kovu enwu jaagba ẹso.

⁷ Igwurube wam nụ lele iyinya jiknernu o zne ọgwunu, be kpu nhne nụ lele okpu-eze golu nụ risi be, ruwhnu be nụ lele ruwhnu badnụ.

⁸ Rukeru-ize risi be nụ lele rukeri-ize nyerinya, ize be nụ lele ize odum.

⁹ Mbno mkpoma be nụ lele mbno rugwe, ọdidna aka-nkwu be naadna lele ọgbo-ẹli agịda iyinya nọdopnu neezne ọgwunu.

¹⁰ Ọdnu be nụ lele akpị, be nwernu nhne ọgbuga n'ọdnu be, nwe masiri rikne n'ọdnu ọ kpakna ele badnụ ẹhni ẹnwa isne.

¹¹ Be nwernu eze n̄echi be, nye b̄u enine izi olulu aw̄hn̄uw̄hnu. Nye r̄ew̄hna a n̄'onu Hiburu b̄u Abad̄oni, n̄'onu Giriki, Apoloni, ke b̄u nye noolulu nhne.

¹² Nhne aw̄hn̄uw̄hnu ke mb̄om kwolem, nhne aw̄hn̄uw̄hnu law̄uru berere wawa.

¹³ Enine izi ke isunu gb̄u ọkwodu a, m n̄urnu m otu nk̄oli hi n̄'ahn̄jo n̄u ngeri ẹno ke ojo ar̄johna golu wam b̄u ke gwuzo n̄u ruw̄hnu Chiokike wh̄uya.

¹⁴ Nk̄oli wam kan̄u enine izi ke isunu wam ke gb̄uru ọkwodu, "Sigbasi enine izi ẹno wam ke be knern̄u eriri n̄'okne Osimini Ufer-etisi."

¹⁵ Be sigbasi enine izi ẹno wam, ke be jikn-ernernu n̄'otnu-ige ka n̄'obochi ka, n̄u ẹnwa ka, n̄'awha ka o gb̄u otu-ibewa n̄u nga ẹto ke kpakara ele bad̄n̄u.

¹⁶ M n̄urnu m ọnu ọgw̄nugw̄nu ele ọgw̄nu gba iyinya b̄u riw̄hu pokwu ndasi law̄uru.

¹⁷ N̄u rime ọwh̄nurninya wam, m wh̄nurnu m iyinya n̄u ele naagba be, be nwernu mbno mkp̄oma naachna ihie ihie lele b̄ekw̄nu, lele jasīnti, n̄u rugwu b̄ekw̄nu, risi iyinya wam n̄u lele risi odum, b̄ekw̄nu n̄u r̄unwurnu n̄u rugwu b̄ekw̄nu neehi n̄'onu be n̄ow̄huya.

¹⁸ B̄ekw̄nu n̄u r̄unwurnu n̄u rugwu b̄ekw̄nu ke hi n̄'onu iyinya wam n̄ow̄huya gb̄uru otu-ibewa n̄u nga ẹto ke ele bad̄n̄u.

¹⁹ Kwnornu n̄u iknernema be hi n̄'onu be ya n̄u ọdnu be. Ọdnu be n̄u lele agw̄o, ke be ji risi be neemeru ele bad̄n̄u ẹhni.

²⁰ Ele bad̄n̄u gwnarn̄u ke nhne igbugbu ka gb̄ule, kw̄ele o sigbasi nhne aka be t̄uru, be kw̄ele o sigbasi o kpenu r̄umu r̄enwu ojo, n̄u r̄enwu golu n̄u ke siliva, n̄u ọla n̄u akaworugwu n̄u ke isisi, ke zá n̄ow̄hnu ọsno, zá n̄on̄u nhne, zá neezne izne.

²¹ Ele bad̄n̄u wam t̄uhnasnana hite n̄u ogbu bad̄n̄u be, n̄u amusu be neeri, n̄u ome ọyi be, m̄obu n̄u buznu be nooznu.

10

Enine izi n̄u ọkwukwo mat̄i

¹ Omekwo, m wh̄nurnu m enine izi berere ke nwernu rikne hi n̄'oligwe hiedna. O wogwu erumeru oligwe, eke n̄u egwu-rugwu z̄i n̄'olu risi a, ruw̄hnu a noonwu lele ẹhnam, ọchi a law̄uru n̄u lele sn̄s̄nu ọro b̄ekw̄nu.

² O ji otu ọkwukwo mat̄i be kpumernu okpume n̄'aka a. O b̄ita ọchikwunga a n̄'osimini, ọchirita a n̄'olu ẹli.

³ O ji okne nk̄oli si l̄ulo lele hne odum neebigbo, nga o sikworu okokoba, egbe oligwe ẹsau wam gba n̄'osisa.

⁴ Nga egbe oligwe ẹsau wam gbakworu, m piuru m ọ gba n̄'okwukwo, m n̄urnu m otu nk̄oli hiri n̄'oligwe naakan̄u m, "Kpusime

nhne egbe oligwe ẹsau wam kwuru, i gbá be n̄'okwukwo."

⁵ Enine izi wam me wh̄nurnu gwuzo n̄'osimini n̄u n̄'olu ẹli, gweliz̄o akarikw-nunga a olu.

⁶ O gweru nye wam z̄i ọkw̄nukokw̄nu d̄u risi, b̄u nye keru oligwe n̄u kpakara nhne z̄i n̄u rime a, n̄u ọwa n̄u kpakara nhne z̄i n̄u rime a, n̄u osimini n̄u kpakara nhne z̄i n̄u rime a. Enine izi wam kar̄u, "Ige kwolem.

⁷ K̄ovu nga enine izi ke ẹsau j̄ogbu ọkwodu a, nhne tugwaru otugwa ke Chiokike jeemezu, lele kpa o kwuru hite n̄'onu ele izi a, b̄u ele ọwh̄nurninya."

⁸ Nk̄oli wam me n̄urnu hi n̄'oligwe nookwunu m ọka, kwukw̄nonu m ọka berere, ọ kaa, "Zne, gweru ọkwukwo mat̄i wam be kpumernu okpume ke z̄i n̄'aka enine izi wam gwuzo n̄'osimini n̄'olu ẹli."

⁹ M znekwnusi enine izi wam, kan̄u a o nyee m ọkwukwo mat̄i wam. O kaa, "Gweru a, ri a, o joolu nlulu n̄u r̄uwo i, k̄ovu o j̄ososo n̄'onu i lele m̄ono ebeka."

¹⁰ M gweru ọkwukwo wam n̄'aka a, ri a, o n̄u lele m̄ono ebeka n̄'onu m, k̄ovu kpa me rikworu a, o mernu r̄uwo m lu nlulu.

¹¹ O kan̄u m, "I j̄ooko okwo ikwu-ọnu Chiokike ka berere n̄u ruw̄hnu agida ele bad̄n̄u, n̄u mba z̄i ọdo n̄'odo, n̄'ikwu-ọnu z̄i ọdo n̄'odo, ma n̄u ruw̄hnu ele eze."

11

Ele akebe law̄uru

¹ Be nyernu m otu isisi lele nhne be ji n̄ot̄u nhne, be kan̄u m, "Liz̄o, t̄u Ọro Ns̄o Chiokike, n̄u ojo ar̄johna, gwn̄u ele n̄ooko risi ẹli n̄u rime a.

² K̄ovu i t̄u n̄'ederezi, kwnornu n̄u be nyernu a ele b̄u ele Ju, ele j̄ooodna ẹli-ọhna ns̄o wam nri ẹnwa ẹno n̄u ẹnwa law̄uru.

³ M jeezizne ele akebe m law̄uru, be jooowo iwo mkpe z̄ni izi ọma otu pokwu ọbochi n̄u riw̄hu ọbochi law̄uru n̄u nri isunu."

⁴ Ka b̄u isisi olivu law̄uru wam n̄u nhne be b̄ita t̄onji law̄uru wam gwuzo n̄u ruw̄hnu Nyenwe ọwa.

⁵ Nye irno ọbula ke piuru ọ kpakna be ẹhni, b̄ekw̄nu hi n̄'onu be jeernegbu be. Nye ọbula ke kpaknarn̄u be ẹhni j̄onwuriri kpam.

⁶ Ele ka nwernu rikne o knesni oligwe, ke mernu mini ozuo z̄ole kpakara ige be n̄ooko okwo ikwu-ọnu Chiokike, be nwernu rikne o mee kpakara mini gh̄o ọvnarna, n̄u rikne o mee ele z̄i n̄'owa r̄ia ẹhni igbugbu ọbula lele kpa be piuru.

⁷ Nga be gbasakworu ikwu-ọnu Chiokike, an̄ohia wam hi n̄u olulu aw̄hn̄uw̄hnu, l̄usi be ọgw̄nu, megbu be, gbu be.

⁸ Iznu be joovubi n̄'esilaw̄uru apna okne ẹli-ọhna wam be nookwu n̄'elulu S̄odom n̄u

Ijipiti, hne be kpogburu Nyenwe be n'olu ogba.

⁹Kpakara ele badnu, nu ebnurnu, nu ikwu-onu, nu mba zi odo n'odo, jeelekiri iznu be obochi eto n'ichichi, be jeeke be li be.

¹⁰Kpakara ele zi n'owa jonwudna, mkpoma so be n'onu kwnornu nu be nwurnu, be neeziznenu ibne be nkesi kwnornu ele owhnurninya lawuru ka nwurnu onwu bu ele mernu ele zi n'owa ta awhnwuhnu k'agida.

¹¹Nga obochi eto n'ichichi whemernu, enine budnu hiri nu Chiokike bnazne nu rime be, be gwuzoru, okne ogwnu turu kpakara ele whnurnu be.

¹²Ele owhnurninya lawuru wam nurnu otu nkoli hiri n'oligwe noosukwu be, "Anu va n'olu hna." Be lizo, la n'olu n'erumeru oligwe, kpa ele irno be neelekiri be.

¹³N'ige wam, okne eli otne enye dnarnu n'owa, ke mernu otu nga nu nri nga eli-ohna wam lulu, eli otne enye wam gburu pokwu badnu esau, ogwnu turu ele ke gwnarnu, be znarni Chiokike ke oligwe.

¹⁴Nhne awhnwuhnu ke ebo whemernu, kovu le, nhne awhnwuhnu ke eto vawa wara wara.

Okwodu ke esau

¹⁵Enine izi ke esau gbu okwodu a, agida nkoli dnarnu n'oligwe, naakaa,

"Eli-eze k'owa ka gholam eli-eze ke Nyenwe ai nu ke Karaisi,

o jaachi hite n'ige kwó okwo du n'ige kwó okwo."

¹⁶Nri ele okno badnu lawuru wam nu eno ele dazi nu ngadna eze be nu ruwhnu Chiokike, dna kpu ruwhnu n'eli, kpou Chiokike risi eli.

¹⁷Be kaa,

"A notunu i mmamma, Nyenwe ai Chiokike ke Meli Nhne Dum,
nye zi, nye zi nu mbom,
kwnornu nu i ji okne iknernema i neechi.

¹⁸Ovu neewe ele zi n'owa ehni, kwnornu nu onuma i valəm,

ige i jeekpe ele nwurnu onwu ikpe valəm,
nu ige i jokwu ele izi i, ele owhnurninya i ogwo ernu

nu kpakara ele ke i, nu ele notu ogwnu i

ma nye kwu nu nye matj,
nu ige o lulu ele luluru owa."

¹⁹Be gbamarnu Oro Nso Chiokike n'oligwe, be whnurnu Igbe Ogba-Njo-Ehni Chiokike nu rime a, agida amuma, nu odidna, nu egbe oligwe, nu eli otne enye, nu okne mkpuru mini dnarnu.

12

Nwerinya wam nu okne agwo wam

¹Otu okne nhne ndu-ehni mernu n'oligwe. Otu nwerinya wogwu iwo eham, nye enwa zi nu mkpururu ochi a, o kpu okpu-eze nwernu nri nu mbo lawuru nu risi.

²Nwerinya wam zi rime, rime omumu nnwo neeme a, o kwana ekwana kpa o nomu nnwo.

³Nhne ndu-ehni berere whuya kwno n'oligwe, otu agwo okpotokpo ihie ke nwernu risi esau nu nri mfu, kpu okpu-eze esau nu risi esau a.

⁴O ji odnu a doru otu-ibewa nga eto mbo ke oligwe dodna be n'owa, o zne gwuzoru nu ruwhnu nwerinya wam nomu nnwo ma o ri nnwo wam wara wara o muiaru a.

⁵Nwerinya wam muhia nnwo rukna, nye jeeji mkpara rugwe nechi kpakara mba, kovu be kwumernu nnwo wam, kwuznenu a Chiokike nu ngadna eze a.

⁶Nwerinya wam gbawhu, ghabna nu rime eli-ikpa, hne Chiokike bitannu a, ma be lekasi a anya pokwu obochi nu riwhu obochi lawuru nu nri isunu.

⁷Ogwnu dna n'oligwe, Majkeli nu ele enine izi a lu ogwnu megidne agwo wam, agwo wam nu ele enine izi a lu ogwnu megidne be.

⁸Kovu Majkeli nu ele enine izi a megburu agwo wam, oghere zimana agwo wam nu ele enine izi a n'oligwe berere.

⁹Be chidna agwo okpotokpo wam, ke bu agwo oknani wam bu Ekwensu mbo Setani n'owa, nye nooduwu kpakara ele zi n'owa. Be chidnaru ya nu kpakara ele izi a.

¹⁰Ige wam, m nurnu m otu okne nkoli n'oligwe, kaa,

"Oznohia valəm, nu rikne nu eli-eze Chiokike ai,

nu iknernema Karaisi a,

kwnornu nu be chidnaru nye noobno rumu nda ai nhne,

bu nye noobno be nhne nu ruwhnu Chiokike iwhehnie nu abali.

¹¹Be jiri onnarna Nnwọ Atnurnu wam nu akebe be gbaru

megbu a,

be whnuna budnu be n'anya du n'enwu.

¹²Kam kpararu, oligwe nwudnahoru, ovu oso anu n'onu ele wu nu rime a.

Kovu awhnwuhnu zinu owa nu osimini, kwnornu nu Ekwensu vakwnusilem anu,

onuma jiri a mkpoma,

kwnornu nu o magwu nu ige a zi ichichi."

¹³Nga agwo wam whnurnu nu be chidnaru a n'owa, o bete o chi nwerinya wam eso bu nye murnu nnwo rukna wam.

14 Be nyee nwerinya wam aka-nkwu lawuru ke okne igno ma o wheru iwhe zne hne o wu n'eli-ikpa, hne be jeelekasi a anya awha eto nu enwa isunu hne agwo wam bo o whnuna a.

15 Agwo wam gbuhia agida onu-mini a gbasn nwerinya wam, ma o vuru nwerinya wam.

16 Kovu eli yinnu nwerinya wam aka, kpumernu onu a, nwokwo mini agwo wam gbuhiaru n'onu a.

17 Agwo wam we ovu ehni k'agida megidne nwerinya wam, o zne noolusi agwna rumu nwerinya wam ke gwnarnu ogwnu, bu ele bitaru nhne Chiokike nyernu n'iwu, nu ele kwesiri okwnata ovu n'ezi oka Jizosi gesiri.

18 Agwo wam gwuzoru n'olu rizna ke osi-mini.

13

Anohia lawuru

1 M whnuru m otu anohia hi nu rime osimini noowhuya, o nwernu nri mfu nu risi esau, o kpu okpu-eze n'olu mfu a, be gbakwasiri n'olu kpakara risi a rewhna ojo nookwulu Chiokike.

2 Anohia me whnuru nu lele agwnu, ochi a lawuru nu lele anohia bea, onu a nu lele onu odum. Agwo wam nyee anohia wam rikne a, ngadna eze a nu okne iknerna.

3 O nu lele nu be gburu otu risi anohia wam, kovu nhne omernu ehni wam ke nwernu rikne o vuya enwu gworu, o tu kpakara owa n'anya, be gbasornu anohia wam.

4 Be kponu agwo wam risi eli ke nyernu anohia wam iknerna a, be kpo masinu anohia wam risi eli, naakaa, "Nyele nu lele anohia ka? Nyele nwernu rikne o lusi a ogwnu?"

5 Be nyernu anohia wam rikne o ji nookwu agida nhne zi ogwnu nu oka ojo nookwulu Chiokike, o nwernu rikne nri enwa eno nu enwa lawuru.

6 Anohia wam kpume onu a nookwulu Chiokike, nu rewhna a, nu Oro Nso a, nu kpakara ele wu n'oligwe.

7 Be nyernu a rikne o lusi ele nso ogwnu nu o megbu be, be nyee kwno a rikne megidne kpakara avnuru nu ele badnu nu ikwu-onu nu mba.

8 Kpakara ele wu n'owa jookponu a risi eli, ele be gbala rewhna be nu rime okwukwo budnu ke Nnwog Aturu nye be gburu hite n'okike owa.

9 Nye nwernu nsni, o nurnu.

10 Nye obula be jodoru n'ogwnu be jodoru a n'ogwnu.

Nye obula be jeeji ama-ogwnu gbu, be jeeji ama-ogwnu gbu a.

Ele nso jeeenwe okwnata ovu nu ndidi.

11 M whnu anohia berere hi n'eli noowhuya. O nwernu mfu lawuru lele mfu nnwo aturu, o nookwu oka lele agwo.

12 O ji rikne anohia mbom wam nu ruwnu a. O mernu kpakara owa nu ele zi nu rime a kponu anohia mbom wam risi eli, nye be gworu nhne omernu ehni wam ke noovuya enwu.

13 Anohia ke ebo ka rnu enu rikne, o mernu bekwnu hi n'oligwe dna n'owa n'anya ele badnu.

14 O duhie kpakara ele wu n'owa kwnornu enu ndu-ehni ka ke be nyernu a rikne o rnu nu ruwnu anohia ke mbom. O kanu ele zi n'owa be kpu igbudu anohia wam ke be jiri ama-ogwnu mernu ehni, kovu o zi budnu.

15 Be nyernu anohia ke ebo wam rikne o nyesi inwe budnu nu rime igbudu anohia mbom wam, ke kpayaruru igbudu wam nookwu oka, kaa be noogbu kpakara ele kwela o kponu igbudu wam risi eli.

16 O mee kpakara ele badnu ma nye mati ma nye kwu, nye baru eze nu nye mboni, ohi nu nye buo ohi, be narnu akara nu akarikwunga be mibu n'egedege ruwnu be.

17 O za nye nwernu rikne zu nhne mibu re nhne, okwolem nye nwernu akara anohia wam ke bu rewhna anohia wam, mibu ogwnugwu rewhna a.

18 Nye obula nwehia akoniche, nye obula ke nwernu ogwnugwu risi, o mahia ogwnugwu anohia wam, kwnornu nu o bu ogwnugwu badnu, ogwnugwu a bu riwhu isunu nu nri isunu nu isunu [666].

14

Nnwog Aturu nu ele ke a

1 M leru m anya, whnu Nnwog Aturu gwuzo n'olu rugwu Zayoni, ya nu otu riwhu nu nri eno nu pokwu eno ele badnu, be vu rewhna a nu rewhna Nda a n'egedege ruwnu be.

2 M nurnu m otu nkoli hi n'oligwe dna lele agida mini, nu okne nkoli egbe oligwe, m nurnu m ele naagba obo ji obo be naagba.

3 Be gwnu eri ikne nu ruwnu ngadna eze wam, ma nu ruwnu nhne eno wam zi budnu, nu ele okno badnu wam. O za nye nwernu rikne sno be gwnu eri wam, okwolem otu riwhu nu nri eno nu pokwu eno wam ele be gbaharu n'owa.

4 Ka bu ele merula ehni be n'ehni nyerinya kwnornu nu be bitaru ehni be snam. Be joosno Nnwog Aturu wam penupe obula o neezne, be gbaharu be n'esilawuru ele badnu lele mkpuru mbom be kesiri Chiokike nu Nnwog Aturu a.

5 O za aghalaghala be whnuru n'onu be, be zi snam.

Ele enine izi eto

⁶ M whnuru m enine izi berere nee-whe n'oligwe, n'okpo okwo izi oma ke zi okwnukokwuu n'owa, ma kpakara ele mba, nu avuru nu ikwu-onu nu ele badnu nuru a.

⁷ O ji okne nkoli naakaa, "Anu tu ogwuu Chiokike, anu znarni ebube a, kwnornu nu ige vale m o jeekpe kpakara badnu ikpe, anu kponu nye keru oligwe, nu owa, nu osimini, nu kpakara risi mini risi eli."

⁸ Enine izi ke ebo snornu ke mbom kaa, "O dnanam, Babiloni dnanam, okne mba ke mernu kpakara eli nwogwuu manya okne ome oyi a."

⁹ Enine izi ke eto snornu be gweru okne nkoli kaa, "Nye obula ke kponu anohia wam nu igbudu a risi eli, nahuru masi akara a n'egedege ruwuu a, mba n'aka a,

¹⁰ o jwonwo manya okne ovu owe ehni Chiokike, ke o wusaru nu rikne, ke be gwala agwa nu rime okiko onuma a, be jeeji bekwnu nu rugwu bekwnu ta a awnuruwuu nu ruwuu ele enine izi nsogwuu nu ruwuu Nnwogwuu Aturu wam.

¹¹ Runwuru awnuruwuu be zi naala olu okwnukokwuu, be za noozukwa inwe iwhe-nehnie nu abali, bu ele wam kponu anohia wam nu igbudu a risi eli, nu nye obula ke nahuru akara ruwuu a."

¹² Ele nsogwuu ndidi, ele naabita nhne Chiokike nyernu niwu nu ele kwnataru Jizosi mkpoma.

¹³ Nga wam m nuru m nkoli hiri n'oligwe kaa, "Gba n'okwukwo, owa oma zinu ele nwuru nu rime Chiokike hite nu kitna."

Enine Nsogwuu kaa, "Owe, be joozukwa inwe neru be, kwnornu nu eru nu be joosno be n'aznu."

Ogwue nhne n'ekwu ke owa

¹⁴ M le anya, wuu, otu erumeru abochna, otu nye nu lele Nnwogwuu ke Badnu dazi n'olu erumeru wam, o kpu okpu-eze golu nu risi a, o ji ama ekwu zi buko n'aka a.

¹⁵ Enine izi berere hi nu rime Oro Nsogwuu whuya, gweru okne nkoli kanu nye wam dazi n'erumeru, "Gweru ama i, gweru nhne n'ekwu, kwnornu nu ige o gwe nhne n'ekwu k'owa vale m, mkpuru k'owa chnanam."

¹⁶ Nye wam dazi n'erumeru gweru ama a yisi nu rime owa, gweru nhne ekwu k'owa.

¹⁷ M whnuru m enine izi berere hi n'Oro Nsogwuu n'oligwe, o ji masi ama zi buko.

¹⁸ Enine izi berere ke nwernu rikne megidne bekwnu, hi n'oyo arjohna whuya. O gweru okne nkoli kanu enine izi wam ji ama zi buko, "Gweru ama i ghohia mkpuru vaji ke ekwu, kwnornu nu vaji ke owa chnanam."

¹⁹ Enine izi wam yisi ama a, ghohia mkpuru vaji, tubna be nu rime hne be joozosna manya okne ovu owe ehni Chiokike.

²⁰ Be zosna manya vaji wam n'aznu ehni, onarna a gbahia nu hne be nozosna manya wam du nhne nu lele riwuu maji lawuru, du oknesni onu iyinya n'olu.

15

Nhne awnuruwuu esau

¹ M wuu nhne berere n'oligwe, okne nhne nduehni. Enine izi esau vu nhne awnuruwuu esau ke ipne-aznu, okne ovu owe ehni Chiokike ke ipne-aznu zi nu rime be.

² M wuu kwno nhne nu lele osimini nyo be gwaru bekwnu, nu ele wam megburu anohia wam nu igbudu a nu onu ogwuwuu ruwuu a, hne be gwuzo nu ngeri osimini nyo wam, be ji obo Chiokike nyernu be.

³ Be ogwuu eri Mozizi nye izi Chiokike nu eri Nnwogwuu Aturu wam, "Eru nu tu n'anya, zi masi rikne!

Nyenwe a Chiokike ke Meli Nhne Dum, Kpakara apna i sniri asni buru ezi oka,

Eze zi okwnukokwuu.

⁴ Nyele jootu ogwuu i, Nyenwe a?

Nyele joochwua igwuwuu ke ruwuu i?

Kwnornu nu ji nu nsunu i zi nsogwuu, kpakara mba jaava kpo risi eli nu ruwuu i, kwnornu nu ikpe buru oma i zuru kpakara owa."

⁵ Nga ka mekworu, m wuu Oro Nsogwuu Chiokike n'oligwe gbamuru bu Oro-Eka ruwuu Chiokike.

⁶ Enine izi esau wam vu nhne awnuruwuu esau hi nu rime Oro Nsogwuu whuya, be wogwu iwo noonwu onwu, be ji ajni mkpoma golu kne nu mkpoma be.

⁷ Otu nhne zi budnu wam nyega enine izi esau wam obele esau okne ovu owe ehni Chiokike jihuru nu rime be, bu nye zi budnu okwnukokwuu.

⁸ Runwuru jihia Oro Nsogwuu hite n'igwuwuu nu iknema Chiokike, o za nye nwernu rikne o bna Oro Nsogwuu tem awnuruwuu esau wam enine izi esau wam vuyaru kwome.

16

Obele esau ovu owe ehni Chiokike

¹ Ige wam, m nuru m otu okne nkoli hi n'Oro Nsogwuu wam naakanu enine izi esau wam, "Anu zne wusa obele esau ovu owe ehni Chiokike n'owa."

² Enine izi ke mbom zne wusa obele a n'owa, esuso ehni tu ogwuu noogbu igbugbu se kpakara ele vu akara anohia wam n'ehni, nu kpakara ele kponu igbudu wam risi n'ehni.

³ Enine izi ke ebo zne wusa obele a n'osimini, o ghogwuu onarna nu lele onarna nye

nwǔrnu ọnwu, kpakara nhne zị bụdnu nù rime osimini nwụkwọ.

⁴ Enine izi ke ẹto zne wụsa obele a nù mini nù kpakara risi mini, be ghọ ọvna.

⁵ M nǔrnu m nga enine izi ke neelegidne mini karu,

“Ji bụ nye mee mma n'ikpe

ji bụ nye zị, nye zị nù mbom, Nye zị Nso, kwnornu nù i kperu ikpe nù kpa.

⁶ Be wụsaru ọvna ele nsọ i nù ele ọwhnurninya i,

i nyee be ọvna be nwọ lele mini, kwnornu nù be kwesiri a.”

⁷ M nǔrnu m otu nkọli hi n'ọjo arịohna naakaa,

“Owe! Nyenwe aị Chiokike ke Meli Nhne Dum,

ikpe i bụru oma, bụ masị ezi oka.”

⁸ Enine izi ke eno zne wụsa obele a n'ehnam, o neerne ele badnu lele bẹkwu.

⁹ Okne okpe bẹkwu rne ele badnu, be kọsna rẹwhna Chiokike nye nwernu rikne nù hne awhnụwhnu ka zị. Kọvu be kwéle ọ tughasna nù mmehie be znarni Chiokike.

¹⁰ Enine izi ke isne zne wụsa obele a n'olu ngadna eze anohia wam. Okne ọchichiri gbasni ẹli-eze anohia wam, ele badnu naatabi riro be kwnornu nhne igbugbu.

¹¹ Be kọsna Chiokike ke oligwe kwnornu nhne igbugbu be nù nhne mernu ẹhni be. Kọvu be kwéle ọ tughasna nù apna ojo be.

¹² Enine izi ke isunu zne wụsa obele a n'okne Osimini Uferetisi, mini a takwo, kpa mini a takworu, apna ele eze hi n'obosi ẹhnam whuya.*

¹³ M whnụ renwu ẹto zila richna lele redokpo, hi n'onu agwo wam, nù onu anohia wam, nù onu nye ọwhnurninya aghalaghala wam nọowhuya.

¹⁴ Be bụ renwu ojo nọornu ẹrnu ndu-ẹhni. Renwu ẹto ka znekwnusi ele eze ọwa, chikota be n'otu kwnornu ọgwu okne ọbochi Chiokike ke Meli Nhne Dum.

¹⁵ Le, m jaava lele nye buznu, ngozi zinu nye obula neese nse, bikwata iwo a, ọ zị kpa ọ gbaru ẹto zneghari, iwhnerne tu a n'ohna.

¹⁶ Renwu ojo wam chikota kpakara eze nù hne ele Hiburu nookwu Amagidoni.

¹⁷ Enine izi ke ẹsau zne wụsa obele a nù ruwhe. Otu okne nkọli hi nù ngadna eze zị n'oro Nso wam, kaa, “Be menem a.”

¹⁸ Agida amuma oligwe, nù odidna, nù egbe oligwe nù okne ẹli otne enye dnarnu, ẹli otne enye nù kpam zigelele hite nga Chiokike kpuru badnu. Ẹli otne enye ka kakwo ibne a.

¹⁹ Ẹli-ohna kwu wam kewamarnu nga ẹto, ẹli-ohna kpakara mba luluru. Chiokike

chenwanya Babiloni, mee a ọ nwọ manya hi n'ikiko okne ovu owe ẹhni a.

²⁰ Kpakara ẹli ohia esilawuru nù rugwu gbawhu, whume.

²¹ Okne mkpuru mini neenyi rinya † naadnakwasị ele badnu hite n'oligwe. Ele badnu nọovu Chiokike ọnu kwnornu mkpuru mini wam, nù kwnornu awhnụwhnu wam zị ogwu ke agida.

17

Nwerinya nù anohia

¹ Otu nù rime ele enine izi ẹsau wam vu obele ẹsau vakwnusi m kaa, “Vaa, me gesi i awhnụwhnu okne nye ewhere wam ke dazị n'olu agida mini,

² nye ele eze ke ọwa snornu mee ọyi, ele zị n'owa nwornu manya ewhere a.”

³ Enine izi wam wuru m n'Enine zne nù rime ẹli-ikpa, hne me whnurnu otu nwerinya dazị n'olu anohia naachna ihie ihie. Anohia wam nwernu agida rẹwhna ojo nookwulu Chiokike be gbakwasiri a, o nwernu risi ẹsau, nù nri mfu.

⁴ Nwerinya wam wogwu iwo odno odno nù ihie ihie, o jiri nhne ẹyi golu nù rugwu okne ọnu ahia nù palị mee ẹhni a mma, o ji ikiko golu n'aka a, nhne ruru ọru nù nhne zila richna ke ome ọyi a jiharuru nù rime a.

⁵ Be gbakwasiri a otu rẹwhna n'egedege ruwahu,

Nhne miri emi,

okne Babiloni,

nne kpakara ele ewhere

nù nhne ruru ọru ke ọwa.

⁶ Ọvna ele nsọ nù ele be gburu kwnornu Jizọsi noogbu a lele manya.

Ọ gbaru m anya aghari nga me whnurnu a.

⁷ Enine izi wam kanu m, “Ndaa kpa o jiri naagba i anya ghari? M jaakanu i nhne tugwaru otugwa gbasiri nwerinya ka nù anohia ke vu a, bụ anohia ke nwernu risi ẹsau nù nri mfu.

⁸ Anohia ke i whnurnu zị bụdnu nù mbom, kọvu ọ nwurnu, o jeehi n'olulu awhnụwhnu whuya zne n'enu a. Kpakara ele wu n'owa ele be gbala rẹwhna be n'okwukwo ke bụdnu hite n'okike ọwa, ọ jotu be n'anya nga be whnurnu anohia wam zị bụdnu nù mbom, kọvu ọ nwurnu, ọ jaazi kwono bụdnu.

⁹ “A kwesiri o nwe ovu ke nwernu akoniche, risi ẹsau wam bụ rugwu matị ẹsau ke nwerinya wam dazị n'olu a. Be bụ masị ele eze ẹsau,

¹⁰ isne dnanam, otu neechi kpori, otu ya vage. Nga ọ varu, ọ jaadazi ike matị.

* 16:12 Nga apna wam whuyaru, ele irno be whnurnu oghere bnanya lusi be ọgwu. † 16:21 Mkpuru mini wam neenyi nù nhne otutu 50 kg.

11 Anòhia wam zì b̀udnu ǹu mb̀om, ke nẁurnu, b̀u eze ke ̀sato, nye zì n'̀esilaẁuru eze ̀sasu wam, jaala n'̀iyi.

12 "Nri mfu wam ì wh̀nurnu b̀u masì nri eze ele ya váge ̀echi, k̀ovu be jeenye be rikne otu ̀otnu-ige lele eze snornu anòhia wam ch̀i.

13 Be nwernu otu mkp̀oma, be jeenye anòhia wam iknernema ǹu rikne be.

14 Ele ka j̀olusi Nnẁo Atnurnu wam ̀ogwnu, k̀ovu Nnẁo Atnurnu wam jeemegbu be, kwnornu ǹu ̀o b̀u Nyenwe ke kakwo ele nwe ǹu Eze kakwo ele eze. Ele sno a b̀u ele o sukuru, ele ̀o hòhiaru ǹu ele kwesiri ̀okwnata ovu."

15 Ọ kanu m, "Mini ke ì wh̀nurnu hne nwerinya ewhere wam dazì, b̀u ele badǹu, ǹu agida ele badǹu, ǹu mba ǹu ikwu-ònu zì ̀odo n'̀odo.

16 Anòhia wam ǹu nri mfu wam ì wh̀nurnu joo sno nwerinya ewhere wam irno, be jaanahoru a kpakara nhne o nwernu, gbata a ̀eto, be jeeri anò-èhni a, kpòrne a ǹu b̀ekwnu.

17 Kwnornu ǹu Chiokike yisiri a ǹu mkp̀oma be, ma be mee echiche a, be jeekwerikòta o nyee anòhia wam ̀eli-eze be, ̀o jaachì be tem Chiokike mezu ikwu-ònu a.

18 Nwerinya wam ì wh̀nurnu b̀u okne ̀eli-òhna wam ke ǹechi kpakara ele eze ke ̀owa."

18

Odudna Babiloni

1 Nga nhne ka mekworu, m wh̀nurnu m enine izi berere hi n'̀oligwe neehidna, o nwernu okne iknernema, ogbu marna marna ruwuhna a neenye iwhe n'̀owa.

2 O gweru okne nkòli siwama, kaa, "Ọ dnanam, okne Babiloni dnanam, ̀o g̀hòlam hne r̀umu r̀enwu ̀ojo wu, ̀oro ikelu kpakara r̀enwu zila r̀ichna, kpakara ̀onunu ̀ojo ke be rì eri zì ǹu rime a.

3 Kwnornu ǹu kpakara mba nwòrnu manya okne ome ̀oyi a, ele eze ke ̀owa snornu a mee ̀oyi, ele ǹojozu ahija ke ̀owa baru eze hite ǹu okne ewhere a."

4 M ǹu kwno okne nkòli hi n'̀oligwe kaa, "Ele ke m, anu hi n'̀esilaẁuru a wh̀uya, ̀o zì anu snornu a kehija igwe ǹu mmehie a, ̀o zì anu snornu a ta awhǹuwhnu.

5 Kwnornu ǹu mmehie a gwuzo d̀u oligwe, Chiokike chenwanyalam kpakara mmehie a.

6 Anu mesno a lele kpa o mernu anu, anu mesno a mgba lawuru kpa o mernu, okiko ̀o gbajiri, anu gbajite a mgba lawuru ma ̀o nwòrnu.

7 Anu ta a awhǹuwhnu ǹu anya-mini

lele kpa o nyernu ̀ehni a igwugwu ǹu ̀egwnurnu ̀ojo a,

kwnornu ǹu ̀o karu ǹu mkp̀oma a, 'M b̀u m eze nyerinya, m b̀ula m nnwerne nwée nzi, m jaagba mkpe.'

8 Kam kpayaru, n'otu ̀obochi, ̀o jowhnuji anya,

enwu, mkpe, ǹu ̀oknuyo, b̀ekwnu jeernegbu a, kwnornu ǹu Nyenwe aji Chiokike ke neekpe a ikpe b̀u dikne.

9 "Nga ele eze ke ̀owa ele snornu a mee ̀oyi, n'̀egwnurnu ̀ojo a, jowhnu r̀unwurnu b̀ekwnu a, be jaakwna ̀ekwna, gbanu a mkpe.

10 Be joogwuzo ǹu hne zì ikere kwnornu ogwnu awhǹuwhnu a, kaa,

'Chei, chei, okne ̀eli-òhna, Babiloni, b̀u dikne, Chiokike taru ì awhǹuwhnu n'otu ̀otnu-ige.'

11 "Ele ǹojozu ahija ke ̀owa jaakwanu a ̀ekwna, gbanu a mkpe, kwnornu ǹu ̀o zá nye ǹojozu kwno mgwna ahija be berere.

12 Be b̀u ele ǹojozu ahija golu, siliva, rugwu okne ̀onu ahija, palì, iwo marnu mma, iwo naachna odno odno, siliki ǹu iwo naachna ihie ihie, isisi ̀obula, nhne ̀obula be jiri ize eni kpu, nhne ̀obula be jiri isisi zì okne ̀onu ahija pnjo, ̀ola, rugwe, rugwu mabulu,

13 ǹu sinamoni, ǹu nhne nwernu ̀eknarna, isensi, maa, franki-isensi, ǹu manya, ǹu m̀ono olivu, ǹu ̀ikpa ǹu wheti, ǹu anòhia, ǹu atnurnu, ǹu iyinya, ǹu ̀ogbo-eli iyinya ǹodopnu, ǹu ̀ohi, ma mkpuru ovu badnu masi.

14 "Be kaa, 'Nhne ì piburu whnunahoru ì, kpakara ̀ekwnu ì ǹu ebube ì whuru etekne, ì jéenwe kwno be berere.'

15 Ele ǹojozu ahija, ele baru eze kwnornu ǹu be neere nhne ka, joogwuzo ǹu hne zì ikere, ogwnu ǹootu be kwnornu awhǹuwhnu a, be naakwna ̀ekwna, gba masi mkpe.

16 Be jeesiwama okokoba, kaa, 'Chei, chei, ̀eli-òhna kwu, ke jiri iwo marnu mma odno odno ǹu ihie ihie,

ǹu golu noogbu marna marna, ǹu akaworugwu okne ̀onu ahija ǹu palì mee ̀ehni a mma.

17 Agida ̀ekwnu hna kpa whuru etekne n'otu ̀otnu-ige.'

"Kpakara ele ǹookwo ̀ogbo mini ǹu ele jì ̀ogbo mini neezne, ǹu ele ̀ernu mini, ǹu kpakara ele nhne be jiri wuru b̀udnu hi ǹu mini wh̀uya, joogwuzo ǹu hne zì ikere.

18 Nga be jowhnu r̀unwurnu b̀ekwnu a, be jaakaa, 'Ọ zì ̀eli ke ǹu lele okne ̀eli-òhna ka?'

19 Be jowukwasi r̀etnu ǹu risi be, kwna ̀ekwna, gba mkpe, kaa, 'Chei, chei, okne ̀eli-òhna, hne kpakara ele nwernu ̀ogbo mini baru eze hite n'̀ekwnu a,

n'otu ọtnu-ige hne ọ kọ túbiri etekne.

²⁰ Ovu sọ j n'ọnu, sụ oligwe,
ele nsọ nụ ele izi nụ ele ọwhnurninya snornu
anụ nwụdna,
Chiokike kperu a ikpe kwnornu nhne o
mernu anụ.' "

²¹ Otu enine izi gbasiri rikne gweru otu
akaworugwu hna lele okne rugwu ogwe
wiri túbna nụ rime osimini, kaa,
"Ọ bụ kpa be jeeji nhne rikne
kwnadna okne ẹli-ọhna Babiloni,
ọ zá nye jọwhnu a berere.

²² Be jọonu kwno eri, mọbu ọbo, ọpi,
mọbu ọkwodu nụ rime i berere,
nye ọbula ke nwernu nka ẹrnu
jáazị nụ rime i berere,
ọ zá nye jọonu ọdidna ogwe wiri
nụ rime i berere.

²³ Tọnji jọonwuma
nụ rime i berere,
akpiri nye nọlu nnwerne ikne nụ nye
nọgbo nzi ikne,
jáazịma nụ rime i berere,
kwnornu nụ ele nọozu ahia i bụ ele dikne ke
ọwa,
i jiri amusu i duwhu kpakara mba.

²⁴ Be piohjaru nụ rime a ọvnarna ele
ọwhnurninya nụ ọvnarna ele nsọ,
nụ kpakara ele be gburu ogbu nụ rime
ọwa."

19

¹ Nga nhne ele ka whemernu, m nurnu
m nhne nụ lele okne nkọli igbudu badnụ
n'oligwe, naakaa,
"Aleluya,

oznohia, nụ igwugwu nụ rikne bụ ke
Chiokike aị,

² kwnornu nụ ikpe a bụru ọma nụ ezi ọka,
ọ marnụ nwerinya okne ewhere wam ikpe
nye jiri ome ọyi a meru ọwa,
o megwnahialam ọvnarna ele nsọ a n'aka
a."

³ Berere kwno be siwama, kaa,
"Aleluya,
runwurnu bẹkwnu a naala olu dụ
ọkwukokwnu."

⁴ Ele okno badnụ nri lawuru nụ ẹno nụ
nhne ẹno wam zị bụdnu wam dna n'eli kpọ
risi ẹli nụ ruwhnu Chiokike nye dazị nụ
ngadna eze. Be kaa,
"Amim, Aleluya."

*Olulu nnwerne
ke Nnwọ Atnurnu*

⁵ Otu nkọli hiri nụ ngadna eze wam whuya
kaa,
"Znarni Chiokike aị,
anụ ele izi a,
anụ ele nọotu ogwnu a,
ma nye matị ma nye kwu."

⁶ M nurnu m nhne nụ lele nkọli igbudu
badnụ lele ọdidna agida mini, lele okne egbe
oligwe, naakaa,

"Aleluya,
Nyenwe aị Chiokike ke Meli Nhne Dum
nechi.

⁷ Ngwa ma a nwụdna, ovu sọ aị n'ọnu,
a nyee a igwugwu,
kwnornu nụ ọlulu nnwerne ke Nnwọ
Atnurnu wam valẹm,
nnwerne a jiknurnunem ẹhni a.

⁸ Be nyernu nnwerne a iwo abọchna,
zị rịchna, noonwu onwu va-a-a, o
woru."

(Iwo abọchna wam bụ ome mma ke ele nsọ.)

⁹ Enine izi wam kanụ m, "Gba n'ọkwukwo,
'Ngọzi zinu nye ọbula be sukwuru wa n'iriri
ọlulu nnwerne Nnwọ Atnurnu wam.' " Ọ kaa
kwno, "Ikwu-ọnu ka bụ ezi ọka Chiokike."

¹⁰ M dna n'ẹli n'ọchi enine izi wam ma m
kpọnu m a risi ẹli, kọvu ọ kanụ m, "I mée
kpam, m bụ m nye izi ibne i nụ ke rumu nda
i ele berere bụ ele ji akebne Jizọsi. Kpọnu
Chiokike risi ẹli. Kwnornu nụ akebne Jizọsi
gbarụ bụ enine ọwhnurninya."*

Nye naagba

iyinya abọchna

¹¹ M whnurnu m oligwe kpumernu nụ otu
iyinya abọchna, rẹwhna nye zị n'olu a bụ Nye
Ọkwnata Ovu nụ Nye Ezi Ọka. O ji ikpe bụru
ọma neekpe ikpe, nọlu ọgwnu.

¹² Anya a lawuru nụ lele riro bẹkwnu, o
kpu agida okpu-eze nụ risi a. O nwernu
rẹwhna be gbakwasiri a ke ọ zá nye magwụ,
okwolem ya magwụ nhne ọ bụ.

¹³ Iwo o wogwu bụ ke be tūruru n'ọvnarna,
be noosukwu a Ikwu-Ọnu Chiokike.

¹⁴ Ele ọgwnu ke oligwe sno a n'aznụ n'olu
iyinya abọchna woru iwo abọchna marnụ
mma.

¹⁵ Ama-ọgwnu zị bụko hi n'ọnu a nọwhuya,
ke o ji neemegbu kpakara mba. "O jeeji mk-
para rugwe nechi be."† Ọ nọzosna manya
ke okne ovu owe ẹhni Chiokike ke Meli Nhne
Dum.

¹⁶ Be gbakwasiri n'olu iwo a ma nụ ọchi a
rẹwhna,

"EZE KAKWO ELE EZE NỤ
NYENWE KAKWO ELE NWE."

¹⁷ M whnụ otu enine izi gwuzo n'ẹhnam,
o ji okne nkọli si okokoba, kanụ kpakara
ọnnu oligwe, "Anụ va gbakọ n'okne iriri
Chiokike.

¹⁸ Anụ va ri anọ-ẹhni ele eze, nụ ke ele risi
ogwnu, nụ ke ele dikne, nụ ke iyinya nụ ke ele
gba be, nụ anọ-ẹhni kpakara ele badnụ, ma
ohi nụ ke ele bụo ọhi, nye kwu nụ nye matị."

¹⁹ M whnụ anọhia wam nụ ele eze ke ọwa
nụ ele ọgwnu be gbakọru n'otu ma be lusi nye

* 19:10 ke neeyinu ele badnụ aka kpọ okwo ikwu-ọnu Chiokike. † 19:15 Eri Ọma 2:9

wam dazị n'olu iyinya ọgwu ya nū ele ọgwu a.

²⁰ Ọwụ be nwudnenu anọhia wam ya nū nye ọwhnurninya aghalaghala wam nye nrūnu ọrnu ndu-ẹhni wam nū ruwhnu a, nye ji ọrnu ndu-ẹhni wam rnawhu ele nwernu akara anọhia wam nū ele kpōnnu igbudu anọhia wam risi ẹli. Anọhia wam nū nye ọwhnurninya aghalaghala wam, be tūbna be nū bụdnu nū rime olulu bẹkwnu ji rugwu bẹkwnu neerne.

²¹ Be ji ama-ọgwu neehi n'onu nye wam dazị n'olu iyinya wam gbu kpakara ele ọgwu be, ọnnu oligwe rijiri rụwho hite n'anọ-ẹhni be.

20

Otu pokwu awha

¹ M whnū otu enine izi hi n'oligwe neehiedna, o ji snambị ọnuhna olulu awhnūwhnu, ji masị ijigba hna okpotokpo n'aka a.

² Ọ nwudne agwọ wam, bụ agwọ gbaka wam, nye bụ Ekwensu, nū Setani kne a eriri otu pokwu awha.

³ Ọ tūbna a nū rime olulu awhnūwhnu, kasnị a akara, ma ọ gharū o duwhu kpakara mba berere tem otu pokwu awha wheme. Omekwo, be jọtoma a eriri ige matị.

⁴ M whnū agida ngadna eze, be nyee ele dazị n'olu be rikne be jeeji kpe ikpe. M whnū mkpuru ovu ele be gburu kwnornu akebe be gbannū Jizōsi nū ikwu-ọnu Chiokike, ele kpōla risi ẹli nyee anọhia wam, mọbu igbudu a, mọbu nahọru akara a n'egedege ruwhnu be, mọbu n'aka be. Be ziri bụdnu snornu Karaisi nẹchi otu pokwu awha.

⁵ (Ele berere ke nwurnu ọnwu lizola n'enuw tem otu pokwu awha wheme.) Ka bụ olizọ n'enuw ke mbom.

⁶ Chiokike jọgozi ele ke a, ele jeekehia igwe n'olizọ n'enuw ke mbom. Ẹnwu ke gba lawuru jeenwe rikne n'ehni be. Be jọbu ele ọkwa arịohna Chiokike nū ke Karaisi, be jooosno a chī otu pokwu awha.

O megburu Setani

⁷ Nga otu pokwu awha whemernu, be jọtoma Setani, ọ whūya n'ikelu a.

⁸ Ọ jọwhoga duwhu agida mba ke gbasaru nū nkala ẹno ke ọwa, Gogi, nū Magogi, chikota be zne ọgwu. Ọnu nngugwu be hna lele riza zị nū ngeri osimini.

⁹ Be gbasara kpakara ọwa, gahnata gburugburu hne ele nsọ zị, nū ẹli-ohna wam Chiokike whnurnu n'anya, ọwụ bẹkwnu hiri n'oligwe dna rnegbu kpakara be.

¹⁰ Be tūbna Ekwensu wam, nye duwhuru be nū rime olulu bẹkwnu be ji rugwu bẹkwnu neerne hne anọhia wam nū nye ọwhnurninya aghalaghala wam zị. Be jaata

be awhnūwhnu iwhehnie nū abalị hna ọkwukokwunu.

Ikpe ipne-aznū

¹¹ M whnū otu ngadna eze abọchna okpotokpo, nū nye dazị n'olu a, ọwa nū oligwe gbawhuru nū ruwhnu a, be whnūna be berere.

¹² M whnū ele nwurnu ọnwu, ele kwu nū ele matị, gwuzo nū ruwhnu ngadna eze wam. Be kpume agida ọkwukwo, be kpume kwno ọkwukwo berere, ke bụ ọkwukwo ke bụdnu. Chiokike kpe ele nwurnu ọnwu ikpe hite nū nhne be gbarū n'ọkwukwo wam lele kpa ọrnu be jiri ziri.

¹³ Osimini gwehia ele nwurnu nū rime a, ẹnwu nū ẹli ẹnwu gwehia ele zị nū rime be, be kpe nye ọbula ikpe lele kpa ọrnu ọ nrurnu jiri ziri.

¹⁴ Be tūbna ẹnwu nū ẹli ẹnwu nū rime olulu bẹkwnu. Olulu bẹkwnu ka bụ ẹnwu ke mgba lawuru.

¹⁵ Nye ọbula ke be gbála rẹwhna a nū rime ọkwukwo ke bụdnu, be tūbna nū rime olulu bẹkwnu.

21

Oligwe ikne nū ọwa ikne

¹ Omekwo, m whnū oligwe ikne nū ọwa ikne, kwnornu nū oligwe ke mbom nū ọwa ke mbom gawheru, osimini zima masi.

² M whnū ẹli-ohna nsọ wam, Jeruselem ikne, hi n'oligwe hne Chiokike zị neehiedna, be jiknenu a lele nnwerne ikne naalakwnusi nzi a.

³ M nurnu m okne nkoli hi nū ngadna eze wam nookwu ọka, kaa, "Le, Oro Nsọ Chiokike zị n'esilawuru rumu badnū, Chiokike jaadazinu be, be jọbu ele ke a, ọ jọbu Chiokike be, dazigidnenu be.

⁴ Ọ jookwnosnama kpakara anya-mini n'anya be, ẹnwu jaaazima, mọbu ọgba mkpe, mọbu ọkwana ẹkwana, nhne igbugbu jaaazima, kwnornu nū nhne ọknani gawhelem."

⁵ Nye wam dazị nū ngadna eze wam, kaa, "Le, m neeme kpakara nhne buri nhne ikne." Ọ kanū m, "Gba nhne ka n'ọkwukwo, kwnornu nū ikwu-ọnu ka bụ ezi ọka ke kwe-siri ọkwana ovu."

⁶ Ọ kanū m, "Be menem a. Mawa bụ Alifa nū Omega, Ọpanizo nū Okwukwo. Nye ọbula akpiri nọkpo bẹkwnu, m jeenye a mini ke hi nū risi mini ke bụdnu n'etekne.

⁷ Nye megburu, jeekehia kpakara nhne ka, m jọburu Chiokike a, ọ jọburu nnwọ m.

⁸ Ọwụ ele ọgwu nū ele kwé ekwe, nū ele ruru ọru, ele noogbu badnū, nū ele neeme ọyi, nū ele amusu, nū ele naakwa ẹnwu, nū kpakara ele aghalaghala jeekehia igwe nū rime olulu bẹkwnu ji rugwu bẹkwnu neerne. Ka bụ ẹnwu ke mgba lawuru."

Jeruselem ikne

⁹ Otu n'esilawuru ele enine izi esau wam wu obele awhnwuhnu ipne-aznu wam vakwnusi m, kaa, "Vaa, m jeegesi i nnwerne be nolu ikne, bu nnwerne Nnwọ Aturu wam."

¹⁰ O wuru m n'Enine zne n'olu okne rugwu zi n'olu, gesi m eli-ohna nsọ wam, bu Jeruselem hi n'oligwe hne Chiokike zi neehiedna.

¹¹ O wu igwugwu Chiokike, noonwu lele akaworugwu zi okne onu ahia, lele jasipa, ziri snam lele nyo.

¹² O nwernu mkpo be turu a hna n'olu, o nwernu nri nu onuhna lawuru, nu nri enine izi lawuru neese onuhna. Be gbasiri rewhna nri nu avuru lawuru ru mu Izireli n'onuhna a.

¹³ Onuhna eto zi n'obosi ennam, n'olu olu onuhna eto, n'eli eli onuhna eto, n'odidna ennam, onuhna eto.

¹⁴ Mkpo eli wam nwernu ntụ-eli n'olu nri nu akaworugwu lawuru, hne be gbakwasiri rewhna ele izi nri nu ebo ke Nnwọ Aturu wam.

¹⁵ Nye wam naakanu m oka ji otu nhne golu be neeji nọtụ nhne, nọtụ ike eli-ohna wam, kpakara onuhna a, nu ehni mkpo a.

¹⁶ Eli-ohna wam hna n'otu. Ogologo a nu rude a hna n'otu. O gweru nhne be tu nhne tu eli-ohna wam, o tuhia otu pokwu nu riwhu maiji eno, ogologo a, nu rude a, nu olu a, hna n'otu.

¹⁷ O tu ehni mkpo wam, tuhia riwhu rula lawuru, lele kpa otutu ke badnu jiri zi, ke enine izi ji nọtụ.

¹⁸ Ehni mkpo wam bu jasipa, eli-ohna wam bu golu zi snam, lele nyo.

¹⁹ Be ji agida akaworugwu zi okne onu ahia mee ntụ-eli mkpo eli-ohna wam mma. Ntụ-eli ke mbom bu jasipa, ke ebo bu safia, ke eto bu kasidoni, ke eno bu emiradi,

²⁰ Ke isne bu sadonisi, ke isunu bu kanelia, ke esau bu kirisoliti, ke esato bu berili, ke tolu bu topasi, ke nri bu kirisopasisi, ke nri nu otu bu jasinti, ke nri nu ebo bu ametisi.

²¹ Nri nu onuhna lawuru wam bu pali nri nu ebo, otu onuhna otu pali. Ogodo apna eli-ohna wam bu golu zi snam n'owhnu osno lele nyo.

²² M whnuna m Oro Nso n'eli-ohna wam, kwnornu nu Nyenwe a Chiokike ke Meli Nhne Dum nu Nnwọ Aturu wam bu Oro Nso a.

²³ Mkpa ennam mbu enwa za naakpa a, be za noomu nu rime a, kwnornu nu igwugwu Chiokike noomu nu rime a, Nnwọ Aturu wam bu iwhne a.

²⁴ Ele mba ke owa jeezne izne n'iwhe a, ele eze ke owa jeegweya igwugwu be nu rime a.

²⁵ Be jaagbasni onuhna eli wam, o jeegberu anya kwnornu nu ochichiri zila nu rime a.

²⁶ Be jeegwebnanya nhne igwugwu nu on'anya kpakara mba nu rime a.

²⁷ Nhne obula ke zila richna jaaabna nu rime a rja rja, mbu nye obula ke neeme nhne ruru oru, mbu nye aghalaghal, okwolem ele be gbaru rewhna be nu rime okwukwo ke budnu ke Nnwọ Aturu wam.

22

Mini ke budnu

¹ Enine izi wam gesi m osimini ke budnu noonwu lele nyo, hi nu ngadna eze Chiokike nu ke Nnwọ Aturu wam naagbahia.

² Naagbawhe n'esilawuru ogodo apna eli-ohna wam, nu ngeri lawuru mini wam isisi ke budnu zi, ke naami nri nu mgba mkpuru lawuru n'awha ke bu otu mgba n'enwa. Okwukwo isisi wam bu nhne be ji noogwo ehni igbugbu ele kpakara mba.

³ Ovu onu zima rja rja. Ngadna eze Chiokike nu ke Nnwọ Aturu wam jaazi n'eli-ohna wam, ele izi a jeezneni a izi.

⁴ Be jowhnu ruwhnu a, rewhna a jaazi n'egedege ruwhnu be.

⁵ Abali jaaizma berere, be jomu tonji, ennam jomu, kwnornu nu Nyenwe a Chiokike jeenye be iwhne, be jeechi lele eze tim tom.

⁶ Enine izi wam kanu m, "Ikwu-onu ka bu ezi oka ke kwesiri okwnata ovu. Nyenwe a Chiokike ke enine ele ohnurninya ziyaru enine izi a gesi ele izi a kpakara nhne jeemeriri n'ige matị vazne nu ruwhnu."

Jizosi vawa

⁷ "Le, m vawa wara wara, ngozi jaazinu ele jaabita ikwu-onu ohnurninya ke okwukwo ka."

⁸ Mawa, Joni, nurnu, whnu masi kpakara nhne ka. Nga me nurnu, whnu kwo masi, m dna n'eli n'ochi enine izi nye gesiri m kpakara nhne ka ma m kponu m a risi eli.

⁹ Kovu o kannu m, "I mee kpa m, m bu m nye izi ibne i, nu ke ru mu nda i ele ohnurninya, nu kpakara ele jaabita ikwu-onu okwukwo ka. Kponu Chiokike risi eli."

¹⁰ O kanu m, "I tuga ikwu-onu ke okwukwo ohnurninya ka, kwnornu nu ige zi ndundu.

¹¹ Nye ojo mernu nhne ojo a zne ruwhnu, nye zila richna, o zila richna a zne ruwhnu, nye mee mma, mernu mma a zne ruwhnu, nye zi nsọ, ziri nsọ a zne ruwhnu."

¹² "Le, m vawa wara wara, ogwo eru m zi m n'aka, m jeenye nye obula lele kpa eru a jiri ziri.

¹³ Mawa bu Alifa nu Omega, Nye Mbom nu Nye Ipne-aznu, Opanizo nu Okwukwo.

¹⁴ "Nguzi jaazinu ele snurnu iwo awura be, be nwernu rikne o ri mkpuru isisi ke budnu wam, be jeehi n'ogodo onuhna bnazne nu rime eli-ohna wam.

¹⁵ Kọvu rụmu nkịta, nụ ele amusu, nụ ele neeme ọyi, nụ ele noogbu badnụ, nụ ele naakwa rẹnwu, nụ ele whnụrnu aghalaghala n'anya neeme be jaazị n'ederezi.

¹⁶ “Mawa Jizọsi, ziyaru enine izi m ọ gba akebne kpakara nhne ka nụ rime kpakara ọgbako Chiokike. Mawa bụ Mgbarẹgwngwnu nụ Nnwọ Devidi, Mbọ ọsisi marnụ mma.”

¹⁷ Enine Nsọ nụ nnwerne ikne karụ, “Vaa.” Nye ọbula ke nurnu, kaa, “Vaa.” Nye ọbula akpịri nọokpo bẹkwnu, vaa, nye ọ masịri gweru mini ke bụdnụ n'etekne nwọrnu.

¹⁸ M nọodo nye ọbula ke nurnu ikwu-ọnu ke ọkwukwo ọwhnurninya ka aka nụ nsnị, nye ọbula ke tükwasiri nhne n'olu a, Chiokike jootukwasinu a nhne nụ kpakara awhnụwhnu be gbarụ n'ọkwukwo ka.

¹⁹ Nye ọbula ke gwemernu nhne n'ikwu-ọnu ke ọkwukwo ọwhnurninya ka, Chiokike jeegweme igwe a n'isisi ke bụdnụ nụ ẹli-ọhna nsọ, ke bụ nhne be gbarụ n'ọkwukwo ka.

²⁰ Nye gbarụ akebne kpakara nhne ka karụ, “Owe, m vawa wara wara.”

Amim. Vaa, Nyenwe aị Jizọsi.

²¹ Oru ke Nyenwe aị Jizọsi dazinu kpakara anụ. Amim.